

Nawēnnε Yetɔga la Ninkāre

Farefare 2003 Edition

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Amatie	4
Amarkı.....	33
Aluki.....	51
Azã	83
Tõoma.....	104
Rom	132
1 Korëntı	145
2 Korëntı	158
Galatı.....	166
Efëezı	171
Filipi	176
Kolıstı.....	180
1 Tesaloniki	184
2 Tesaloniki	187
1 Timõtı.....	189
2 Timõtı.....	193
Atiti	196
Afilmõ	198
Ebre	199
Azakı.....	209
1 Pııyëerı	213
2 Pııyëerı	217
1 Zã	220
2 Zã	224
3 Zã	225
Azudi.....	226
Pukre	228

Amatie

Azezi-krisi yaabdōma yelle

(Aluki 3:23-38)

1 Azezi n de Adavidi yuŋa, la Abraham yuŋa yaab-dōma n wāna:
² Abraham n dōge A'izaki,
 tɪ A'izaki dōge Azakɔbi,
 tɪ Azakɔbi dōge Azuda, la a kēendōma, la a yɪbsɪ.
³ Tɪ Azuda la a pɔga Atamaari dōge Afareɪsɪ la Azara,
 tɪ Afareɪsɪ dōge A'esrɔm,
 tɪ A'esrɔm dōge Aram,
⁴ tɪ Aram dōge Aminadabi,
 tɪ Aminadabi dōge Anaasō,
 tɪ Anaasō dōge Asalmō.
⁵ Tɪ Asalmō la a pɔga Arahabi dōge Aboozɪ,
 tɪ Aboozɪ la a pɔga Aruti dōge A'obɛɛdɪ,
 tɪ A'obɛɛdɪ dōge Azese.
⁶ Tɪ Azese dōge naba Adavidi.
 Tɪ Adavidi daan di A'uuri pɔkɔore, tɪ ba dōge Asalomō.
⁷ Tɪ Asalomō dōge Aroboam,
 tɪ Aroboam dōge Abiya,
 tɪ Abiya dōge Aza.
⁸ Tɪ Aza dōge Azozafatɪ,
 tɪ Azozafatɪ dōge Azoram,
 tɪ Azoram dōge A'oziasɪ.
⁹ Tɪ A'oziasɪ dōge Azɔtam,
 tɪ Azɔtam dōge Akaazɪ,
 tɪ Akaazɪ dōge A'ezekiasɪ.
¹⁰ Tɪ A'ezekiasɪ dōge Amanase,
 tɪ Amanase dōge Amō,
 tɪ Amō dōge Azoziasɪ.
¹¹ Tɪ Azoziasɪ dōge Azekoniyasɪ la a yɪbsɪ.
 Wakat-ēŋa tɪ ba yōge Israyelɪ dōma tarɪ sēŋe Ba-bilɔnɪ.

¹² La ban paage Babilɔnɪ na poorum,
 tɪ Azekoniyasɪ dōge Asalatɪyɛlɪ,
 tɪ Asalatɪyɛlɪ dōge Azorobabelɪ.
¹³ Tɪ Azorobabelɪ dōge Abiyuudɪ,
 tɪ Abiyuudɪ dōge A'eliakim,
 tɪ A'eliakim dōge Azɔɔɔɔɔ.
¹⁴ Tɪ Azɔɔɔɔɔ dōge Asadɔkɪ,
 tɪ Asadɔkɪ dōge Akim,
 tɪ Akim dōge A'eliyuudɪ.
¹⁵ Tɪ A'eliyuudɪ dōge A'eleazaari,
 tɪ A'eleazaari dōge Amatā,

tɪ Amatā dōge Azakɔbi.

¹⁶ Tɪ Azakɔbi dōge Azozefu n de Amaari sɪra la.

Amaari ēŋa n dōge Azezi tɪ ba wi'iri Krisi la.

¹⁷ Lan pī'ilum na Abraham wa paage Adavidi, de la zamāana pia la anaasɪ. Lan sēŋe la Adavidi wa paage ban yōge Israyelɪ dōma sēŋe Babilɔnɪ na, de la zamāana pia la anaasɪ. Ban yōge Israyelɪ dōma sēŋe Babilɔnɪ wa paage Krisi la, de la zamāana pia la anaasɪ.

Azezi-krisi dɔka yelle

(Aluki 1:26-38;2:1-7)

¹⁸ Azezi-krisi dɔka daan ēŋe la wāna: A ma Amaari daan yetɪ a ele la Azozefu, la ba daan nān ka gā'are la taaba, dee tɪ a tara puure, la de la Nawēnne Sɪa n botɪ a tara puure la. ¹⁹ La Azozefu n daan yetɪ a di ē na de la nēr-sōŋɔ, a ka boorɪ tɪ a ēŋe ē yānne nērba nifum, a daan tē'ese mɛ tɪ a base ē sīm. ²⁰ La ēn daan tē'esrɪ bela la, tɪ Zuudāana Nawēnne maleka wa'am wa puke a mēŋa pa'alɛ ē zāasɔɔ puam yele ē yetɪ: «Azozefu, Adavidi yuŋa, da zoe dabeem, di Amaari tɪ a dɛna fu pɔga, puure la tɪ a tarɪ la de la Nawēnne Sɪa n bɔ ē. ²¹ A wun dōge la budibla, tɪ fu sɪ a yu'ure tɪ Azezi, la de ēŋa n wun fāage a nērba la ba tōon-be'ero puam base.»

²² Bōn-bāma wuu ēŋe mɛ tɪ Zuudāana Nawēnne n yuun botɪ a nōtɔ'ɔsa la yele se'em na n ēŋe. A yuun yetɪ:

²³ «Bɪsɛ-ya, pugla n nān ka mi buraaga wun yōke puure dōge budibla,

tɪ ba wi'ira a yu'ure tɪ A'emanuwɛlɪ.»

A vōore de la Nawēnne boe la tɪ lɛ.

²⁴ Tɪ Azozefu nēge, ēŋe wu Zuudāana maleka la n yele ē se'em na, di a pɔga la. ²⁵ La a daan ka gā'are la ē, halɪ tɪ a wa dōge budibla la, tɪ a sɪ bia la yu'ure tɪ Azezi.

Bāŋrɪba sēŋe ka yē Azezi

2 Ba daan dōge Azezi la Betelem n boe Zude so'olum, se'emwēnne tɪ A'erɔdɪ de naba la. Tɪ bāŋrɪba ze'ele dapɔa bɔba wa'am Zerizalem, ² wa soke yetɪ: «Bia la tɪ ba dōge la boe la bɛ, sɛka n wun dɛna Zifdōma naba la? Tōma yē la a wōrbiire dapɔa bɔba, bela īyā tɪ tōma wa'am tɪ tɪ nā'ase ē.» ³ La naba A'erɔdɪ n daan wōm bela la, ēŋa la Zerizalem dōma wuu yem n yɔɔɔɔɔ. ⁴ Tɪ A'erɔdɪ daan lagɛ kāabɔɔ kēma nēŋadōma, la lɔɔ karēnsāandōma la wuu, soke ba yetɪ: «Tēn-kāna tɪ ba wun dōge Krisi la?» ⁵ Tɪ ba yele ē yetɪ: «Betelem n

boe Zude so'olum na, se'ere n soe la, Nawēnne nōtɔ'ɔsa la yuun gulɛ yele la wāna:

⁶ «Betelem n de tēn-pika,
fu ka pɔ'ɔge Zude so'olum tēn-kāra la puam,
se'ere n soe la,
nēra n wun yese fōn puam dēna nējadāana bɪsra ls-
rayelɪ dōma n de mam nērba la yelle.»

⁷ La A'erɔdɪ sugɛ mɛ wi bānɾɪba la soke ba bānɛ
wēnse'ere tɪ wōrbiire la yese, ⁸ dee tōm ba yetɪ: «Sēnɛ-
ya Betelem ka ɛ soke bānɛ bia la yelle sōnɔ sōnɔ, la ya
sān yē ē, ya leme wa'am wa yele mam tɪ mam mē sēnɛ
ka nā'asɛ ē.» ⁹ La ban wōm naba la yetɔga la, ba sēnnɪ
mɛ wɛ'ɛsa, darɛ le yē wōrbiire la tɪ ba daan yē dapɔa
bɔba la n tole ba nēnɔ, tarɪ ba halɪ ka paage bia la n
boe zē'e-sɛka la ze'ele.

¹⁰ La ban daan yē wōrbiire la, ba sūure ēnɛ yēlum mɛ
halɪ zozo'e. ¹¹ Tɪ ba kē yire la puam yē bia la, la a ma
Amaari, ka dūma tēnɔ bia la nēnɔm nā'asɛ ē, dee lorge
ba lɔgrɔ loose ban tarɪ sɛla la bɔ ē. Ba daan de la sāl-
ma, la tɪdarɛ, la miiri n tarɪ yūuɲ-yēlga.

¹² Tɪ Nawēnne daan kā'an ba zāasɲɔ puam yetɪ, ba da
le doose naba A'erɔdɪ zē'am, belɔ tɪ ba daan doose
sore ayēma lebe kule ba tēnɔ.

A'erɔdɪ boorɪ tɪ a ku Azezi

¹³ Bānɾɪba la n fōrge la, tɪ Nawēnne malɛka puke a
mēnɔ pa'alɛ Azozɛfu zāasɲɔ puam, yele ē yetɪ: «Isge
tarɪ bia la, la a ma la zoe sēnɛ Ezipti ka bɔna bilam halɪ
tɪ m le wa yele fu se'ere. Se'ere n soe la, naba A'erɔdɪ
wun ɛɛra bia la mɛ tɪ a ku.» ¹⁴ Tɪ Azozɛfu isge yu'ɲɔ
tarɪ bia la, la a ma la sēnɛ Ezipti, ¹⁵ ka bɔna bilam halɪ tɪ
A'erɔdɪ wa ki. La ēnɛ la belɔ, tɪ Zuudāana Nawēnne n
yuun botɪ a nōtɔ'ɔsa yele se'em na ēnɛ. A yuun yetɪ:
«Mam wi m Dayua la n boe Ezipti la tɪ a wa'am.»

¹⁶ La A'erɔdɪ n daan bānɛ tɪ bānɾɪba la pā'asɛ ēnɔ mɛ
na, a sūure n yīige halɪ, tɪ a tōm nērba yetɪ ba sēnɛ
Betelem, la tēn-seba n boe a kēnkersɪ la wuu ka ku
budim-seba wuu n mase wu yuuma ayi, la seba n ka
paage belɔ la, wu ēnɔ n daan soke bānɾɪba la bānɛ
se'emwēnne tɪ wōrbiire la yese la.

¹⁷ Belɔ tɪ Nawēnne nōtɔ'ɔsa Azeremi n yuun yele
se'em na ēnɛ. A yuun yetɪ:

¹⁸ «Ba wōm tagursi Rama tēnɔ,
kuuɲɔ la fablɔgɔ zozo'e.
La de la Arasɛɪ n kellɪ a kɔma yelle,
tɪ ba pā'asra ē tɪ a ka sakra tɪ a go'oge.
Se'ere n soe la, a kɔma la ka le bɔna.»

¹⁹ La naba A'erɔdɪ daan wa ki mɛ, tɪ Zuudāana malɛka
puke a mēnɔ pa'alɛ Azozɛfu zāasɲɔ puam Ezipti, yele ē
yetɪ: ²⁰ «Isge tarɪ bia la, la a ma la lebe lsrayelɪ tēnɔ,
se'ere n soe la, sɛka n daan eerɪ bia la tɪ a ku la ki mɛ.»

²¹ Tɪ Azozɛfu isge tarɪ bia la, la a ma la kule lsrayelɪ
tēnɔ.

²² La a daan wōm mɛ tɪ Arkelawusi n sɔɔge a sɔ
A'erɔdɪ zē'am di Zude na'am. Tɪ a daan zoe dabeem ka
sēnɛ Zude so'olum. Tɪ Nawēnne kā'an ē zāasɲɔ puam,
tɪ a sēnɛ Galile so'olum. ²³ A daan sēnɛ ka kē'era la tēnɔ
yu'ure n de Nazaretɪ. Belɔ tɪ Nawēnne nōtɔ'ɔsɪba la n
daan yele se'em na ēnɛ. Ba daan yetɪ: «Ba wun wi'ira
Krisi la tɪ Nazaretɪ nēra.»

Azā mōolɪ Nawēnne yetɔga, dee misri nērba ko'om puam

(Amarkɪ 1:1-8, Alukɪ 3:1-18, Azā 1:19-28)

3 Belɔ wēnne tɪ Azā n misri nērba ko'om puam na,
wa sēnɛ Zude weem ka mōola ² yetɪ: «Teege-ya
yem base tōon-be'ero, tɪ Nawēnne so'olum lɛm mɛ.»

³ La de la Azā yelle tɪ Nawēnne nōtɔ'ɔsa A'ezayi daan
gulɛ yetɪ:

«Nēra ayɪla n boe weem mōola ke'enke'em yetɪ:
«Malge-ya sore sōnɔ gu'ura Zuudāana.

Malge-ya sɔa la tɪ ba tɔ tēntēesɪ bɔ ē.»

⁴ Azā daan yɛ la fuugo n de yugne kōbrɔ, dɪke sagānne
lu a sɪa. A dia daan de la saniiro la seero. ⁵ Tɪ nērba
daan ze'ele Zerizalem, la Zude so'olum wuu, la tēn-sɛ-
ba n lɛm kulaaga yu'ure n de Zurdē la wuu sēnna a
zē'am, ⁶ tɔgra ba tōon-be'ero pa'ala ē, tɪ a misra ba
Zurdē ko'om na puam.

⁷ La Azā yē la Farisi dōma, la Saduse dōma zozo'e n
sēm a zē'am tɪ a mise ba ko'om puam, tɪ a yele ba yetɪ:
«Yāma ān wu kāmpēesɪ buuri, āne n pa'alɛ ya tɪ ya tā
wun zoe pōsɛ Nawēnne sɪbgɛ n sēm na? ⁸ Tōm-ya
tōon-seba n pa'alɪ tɪ ya teege yem base tōon-be'ero.

⁹ La ya da tē'esra tɪ Abraham n de ya yaaba la, ya wun
pōsɛ Nawēnne sɪbgɛ la mɛ. Mam yetɪ ya mɛ tɪ Nawēn-
ne tā wun dɪke kuga wā botɪ ba lebge Abraham yuusi
mɛ. ¹⁰ Nēra n pōn tara lɪa a nu'usum tɪ a lube tɪlɪ. Tɪ-
sɛka woo n ka wɔnnɪ biɛ sōma, a wun lube ē mɛ, lobge
bugum puam, tɪ bugum di ē.

¹¹ Mam misri ya la ko'om puam tɪ la pa'alɛ tɪ ya teege
yem base tōon-be'ero. La sɛka n boe mam poorum sē-
na la pānɔ gānnɪ mam mɛ. La mam pōn ka mase tɪ m
pirge a tagra. ēnɔ n wun mise ya Nawēnne Sɪa, la
bugum puam. ¹² ēnɔ wun welge nērba wu nēra n zālɪ
pɪ'ɔgɔ a nu'usum tɪ a vaage a si zɛɛnɔ yeele, ēnɛ a
bāare puam dee yō urgo la, la bugum n ka kɪnɾi.»

Azezi ko'om misga

(Amarkɪ 1:9-11, Alukɪ 3:21-22)

¹³ Azezi daan ze'ele la Galile wa'am Zurdē Azā zē'am
tɪ a mise ē ko'om puam. ¹⁴ Tɪ Azā daan zagɛ, dee yetɪ:
«La de nɪ na mam n wun wa'am fōn zē'am tɪ fōn mise
mam, tɪ fōn sēna mam zē'am?» ¹⁵ Tɪ Azezi lerge ē yetɪ:
«Base tɪ la ēnɛ belɔ lɛlɛ wā, tɪ la de la belɔ tɪ tɪ wun
ēnɛ lan mase Nawēnne n boorɪ se'em na wuu.» Azezi n
yele belɔ la, tɪ Azā sake ¹⁶ mise ē, tɪ a dɔɔra. Haya, tɪ

saazuum yo'oge, ti a yě Nawēnne Sĩa n signi a zuo wu na'adawenne. ¹⁷ Tĩ kōa ze'ele Nawēnne yire yeti:

«Ēna de la mam Dayua
ti mam nōŋe la m sūure wuu,
a paage la mam yem.»

Asūtāana make Azezi

(Amarki 1:12-13, Aluki 4:1-13)

4 Nawēnne Sĩa la daan tarĩ Azezi sēŋe la weem ti Asūtāana make ě. ² Azezi daan lu la nōore dabsa pinaasi, wuntēŋa la yu'ũŋ. Tĩ a kōm dōnna. ³ Tĩ Asūtāana lem ě, yeti: «Fu sãn sũri dena la Nawēnne Dayua, fu boti kuga wā lebge dia.» ⁴ Tĩ Azezi lerge yeti: «La gulse Nawēnne gōŋŋ puam yeti:
«Nērsaala kãn vɔa dia mā'a ĩyā,
la de la yetɔg-seba wuu n yesũ Nawēnne nōorum ĩyā.»

⁵ Tĩ Asūtāana tarĩ Azezi sēŋe Zerizalem, ka zom Wēndekāte la zuo ze'ele, ⁶ dee yele ě yeti: «Fu sãn dena Nawēnne Dayua, fu ěke bisge tēŋa, se'ere n soe la, la gulse Nawēnne gōŋŋ puam yeti:

«Nawēnne wun boti a malekadōma kōke fu la ba nu'usi,
ti fu kãn wē fu nā'are la kugre.» »

⁷ Tĩ Azezi yele ě yeti: «La ken gulse yeti:
«Da make fu Zuudāana Nawēnne bise.» »

⁸ Tĩ Asūtāana le tarĩ Azezi zom tēŋa n ba wɔge zuo, ka pa'alē ě dũnia so'olum wuu la a na'am pāŋa, ⁹ yele ě yeti: «Fu sãn ka dũma tēŋa nā'ase mam, mam wun bɔ fu bāna wā wuu.» ¹⁰ Tĩ Azezi yele ě yeti: «Sēŋe fōrge, Asūtāana! La gulse Nawēnne gōŋŋ puam yeti:

«Nā'asra Zuudāana Nawēnne,
dee sakra ēŋa ayila mā'a.» »

¹¹ Tĩ Asūtāana base Azezi dee fōrge. Tĩ malekadōma wa'am wa sōŋra ě.

Azezi pɔse a tōoma Galile so'olum

(Amarki 1:14-15, Aluki 4:14-15)

¹² Tĩ Azezi wōm ti ba yōke Azā yu yu'a deego puam, ti a lebe Galile so'olum. ¹³ La a daan base Nazareti tēŋa, dee sēŋe ka kē'era la Kapernaum n lem Galile mōgre la nōorum, Zabolō la Neftali so'olum puam, ¹⁴ ti Nawēnne nōtɔ'ɔsa A'ezayi n yuun yele se'em na ēŋe. A yuun yeti:

¹⁵ «Zabolō la Neftali tēnsi n tɔgle ko-kāte bɔba, Zurdē doone ke bɔba,

Galile tēnsi ti bu-zāŋsi boe a puam na,

¹⁶ nēr-seba n boe lika puam na yě peelem zozo'e.

La nēr-seba n zĩ kũm mā'asum puam na,
peelem nēge me bɔ ba.»

¹⁷ Bela wēnne ti Azezi daan pɔse mōola yeti: «Teege-ya yem base tōon-be'ero, ti Nawēnne so'olum lem me.»

Azezi wi zũn-yōgrĩba ti ba dɔla ě

(Amarki 1:16-20, Aluki 5:1-11)

¹⁸ Azezi daan eerĩ la Galile mōgre la nōorum, yě buraasi bayi, Asimō ti ba wi'iri ti Apyeerĩ, la a yĩbga A'āndre, ti ba lobri yuka mōgre la puam, ba daan de la zũn-yōgrĩba. ¹⁹ Tĩ Azezi yele ba yeti: «Dɔla-ya mam, ti mam wun base ti ya era nērba ti ba dɔla mam wu yā-ma n yōgrĩ zũma se'em na.» ²⁰ Tĩ ba base ba yugsi la bilam mēŋa, dee dɔla ě.

²¹ Tĩ a sēŋe nēŋa le yě buraasi bayi n de Azebede koma, Azaki la a yĩbga Azā. Tĩ bāma, la ba sɔ Azebede bɔ-na ōorŋŋ puam malgra ba yugsi. Tĩ Azezi wi ba, ²² ti ba base ōorŋŋ la, la ba sɔ la tɔtɔ, dee dɔla ě.

Azezi zāsni nērba, dee bɔ'ɔra ba ĩmā'asum

(Aluki 6:17-19)

²³ Azezi daan kaari la Galile so'olum wuu zāsna nērba Zifdōma wēndeto puam, mōola Nawēnne so'olum kō-yēlga dee boti bā'adōma, la kobro wuu n boe nērba la puam yēta ĩmā'asum. ²⁴ Tĩ a yu'ure daan yese Siiri so'olum wuu, ti ba tara bā'adōma wuu ti bā'asi buuri to'oto'ore tarĩ ba, nērba ĩisi n dōnni ti ba nāmsra, la kulkā'arsi n doli seba, la nērba n luti kinki'ire, la kɔɔrɔ wa'am a zē'am, ti a boti ba wuu yě ĩmā'asum. ²⁵ Tĩ nērkuuŋŋ zozo'e ze'ele Galile, la Dekapɔli, la Zerizalem, la Zude, la tēnsi n boe Zurdē doone ke bɔba doose ě.

Nēr-seba n tarĩ Nawēnne yel-sōnne

(Aluki 6:20-23)

5 Tĩ Azezi yě nērkuuŋŋ la, zom tēŋa zuo zĩ'ire. Tĩ a karēnbiisi la lagse a zē'am. ² Tĩ a yāŋa zāsum ba yeti:

³ «Nēr-seba n mi ti ba ka mase Nawēnne nēŋam tarĩ zu-yēlga,

se'ere n soe la, Nawēnne so'olum de la ba bōnɔ.

⁴ Sũ-sā'arŋŋ dōma tarĩ zu-yēlga,

se'ere n soe la, Nawēnne wun boti ba sūure mā'age.

⁵ Sũ-bugsum dōma tarĩ zu-yēlga,

se'ere n soe la, Nawēnne wun bɔ ba dũnia ti ba sɔna.

⁶ Seba n boori sela n mase Nawēnne yem la ba sūure wuu tarĩ zu-yēlga,

se'ere n soe la, Nawēnne wun bɔ ba sela ti ba boori la ti la seke.

⁷ Ninbāal-zɔtba tarĩ zu-yēlga,

se'ere n soe la, Nawēnne wun zoe ba ninbāalga.

⁸ Pupeelem dōma tarĩ zu-yēlga,

se'ere n soe la, ba wun yě Nawēnne.

⁹ Seba n boti sũ-mā'asum bɔna nērba tēŋasuka tarĩ zu-yēlga,

se'ere n soe la, Nawēnne wun wi'ira ba ti a koma.

¹⁰ Seba n iti sela n mase, ti ba nāmsra ba tarĩ zu-yēlga,

se'ere n soe la, Nawēnne so'olum de la ba bōnɔ.
¹¹ Yāma seba tɪ ba tuurɪ ya, nāmsra ya, tɔgra ya tɔg-be'ero dee parna bɔ'ɔra ya, yan doli mam na īyā, tarɪ zu-yēlga. ¹² Ēŋe-ya sū-yēlga sɪrum, ya yɔɔɔ n wun zo'oge Nawēnne yire la īyā. Ba mē daan nāmsɛ Nawēnne nōtɔ'ɔsrɪba n dēŋe yāma la bela.»

Yaarum, la peelem makre

(Amarkɪ 9:50, Alukɪ 14:34-35)

¹³ Azezi daan le yetɪ: «Wu yaarum n botɪ dia zā'asum na, yāma mē mase tɪ ya āna wu yaarum dūnia wā puam. La yaarum sān sabge, bēm n wun base tɪ a le zā'asum? A lebge la zāŋa, a ka le tara yōɔɔ, a de la ba lobe ē base yēŋa, tɪ nērba nē ē la nāma.

¹⁴ Yāma de la dūnia wā peelem. Tēŋa n boe tāŋa zuo ka tā wun sugɛ. ¹⁵ La ba ka yō'orɪ fitla vugra la pɪ'lgɔ, ba wun zoole ē na fitla zoolgo zē'a, tɪ a nēegɛ peelem bɔ'ɔra nēr-seba wuu n boe yire la puam na. ¹⁶ Bela, base-ya tɪ ya peelem nēegɛ nērba tēŋasuka, tɪ ba yē ya tōon-sōma nā'ase ya Sɔ Nawēnne n boe saazuum.»

Azezi zāsum lɔɔ yelle

¹⁷ «Da tē'ese-ya tɪ mam wa'am tɪ m sā'am na Nawēnne lɔɔ, bu a nōtɔ'ɔsrɪba yetɔga la. Mam ka wa'am tɪ m sā'am ba, mam wa'am tɪ m pa'ale la ba vōore ba'ase, dee ēŋe ban yele se'em na. ¹⁸ Mam yetɪ ya la sɪra sɪra, tɪ saazuum la tēŋa n wun yuuge se'em, sela sela kān yese Nawēnne lɔɔ la puam baa fēfēe, halɪ tɪ sela woo wa ēŋe ba'ase. ¹⁹ Bela, nēr-seka n ka sake Nawēnne lɔɔ ayɪla, baa a sān āna pɪka gānna wuu, dee zāsna nērba baseba tɪ ba da sake, a wun dēna nēr-pɪka Nawēnne so'olum puam. La seka n sake Nawēnne lɔɔ, dee zāsna nērba tɪ ba ita bela, a wun dēna nēr-kāte Nawēnne so'olum puam. ²⁰ Mam yetɪ ya la sɪra sɪra, tɪ ya sān ka ita Nawēnne n boorɪ se'em na gānna lɔɔ karēnsāandōma, la Farisi dōma, ya kān tā'age kē Nawēnne so'olum puam.»

Azezi zāsum sū-isgre yelle

(Alukɪ 12:57-59)

²¹ «Yāma wōm tɪ ba daan yele kurum dōma yetɪ: «Da ku nēra, la nēra sān ku nēra, ba di a sarɪya.» ²² La mam yetɪ ya tɪ nēr-seka woo sūure n isge la a sobia, la mase tɪ ba di a sarɪya. La seka n yele a sobia yetɪ: «Yalma», la mase tɪ sarɪyaditba nēŋadōma di a sarɪya. La seka n yele a sobia yetɪ: «Fu ka tarɪ vōore», ēŋa dāana mase mɛ tɪ a kē bug-tēŋa. ²³ Bela, fu sān tarɪ fu bɔ'a wa'am kāabgo bīm̄bīnne zē'a tɪ fu bɔ Nawēnne, sān tēegɛ tɪ fōn tarɪ la yelle la fu sobia, ²⁴ fu base fu bɔ'a la kāabgo bīm̄bīnne la nēŋam, dee dēŋe sēŋe ka malge fu yelle la, la fu sobia la, dee yāŋa leme wa'am wa dɪke fu bɔ'a la bɔ Nawēnne.

²⁵ Fu sān tara yelle la nēra, tɪ a tara fu wē'esa sarɪya-dia zē'am, malge fu yelle la tɔtɔ, yāma n nān boe sore la, tɪ a da dɪke fu bɔ sarɪyadita, tɪ a tɔge fu yetɔga la dɪke fu bɔ gu'ura, tɪ a kē'ese fɔ yu'a deem. ²⁶ Mam yetɪ fu la asura, tɪ fu kān yē sore yese yu'a deem na, halɪ tɪ fu wun wa yɔ fu sānne na wuu ba'ase.»

Azezi zāsum yalsɪ yelle

²⁷ «Yāma wōm tɪ ba daan yetɪ: «Da gā'are la fu tadāana pɔga.» ²⁸ La mam yetɪ ya tɪ, seka n bɪse pɔka tɪ a yem bɔɔra ē, a pōn gā'are la ē mɛ a sūure puam. ²⁹ Fu zuugo nifo sān yetɪ a botɪ fu base Nawēnne sore, fu kɪrge ē lobe base zāazāare, se'ere n soe la, fu īyā sela ayɪla sān ka bɔna mī sōɪ ba wun lobe fu īyā wuu bug-tēŋa. ³⁰ La fu zuugo nu'ugo sān yetɪ a botɪ fu base Nawēnne sore, fu wike ē lobe base zāazāare, se'ere n soe la, fu īyā sela ayɪla sān ka bɔna mī sōɪ ban wun lobe fu īyā wuu bug-tēŋa.»

Azezi zāsum pɔka lebsgo yelle

(Amatie 19:9, Amarkɪ 10:11-12, Alukɪ 16:18)

³¹ «Ba yuun yetɪ: «Nēr-seka n lebse a pɔga, a bɔ ē gōŋɔ n pa'ale tɪ a lebse ē mɛ.» ³² La mam yetɪ ya mɛ tɪ, nēr-seka woo n lebse a pɔga, tɪ la sān dagna tɪ a gā la buraasi, a wun botɪ pɔka la sā'am mɛ, a sān ele sɪra ayēma. La nēr-seka n di pɔg-seka tɪ ba lebse la, ēŋe la be'em wu nēra n gā'are la a tadāana pɔga.»

Azezi zāsum pɔre yelle

³³ «Ya ken wōm tɪ ba yuun yele kurum dōma yetɪ: «Da viige ya pɔre. Fu sān bīŋe nōore pɔɪ tɪ fu ēŋe sela bɔ Zu-udāana Nawēnne, dēnɪ tɪ fu ēŋe bela.» ³⁴ La mam yetɪ ya tɪ, ya pōn da pɔɪ. Da pɔɪ saazuum, bēm īyā, a de la Nawēnne na'am bīm̄bīnne. ³⁵ Da pɔɪ tēŋa, bēm īyā, a de la a nāma dɔglɔ zē'a. Da pɔɪ Zerizalem, bēm īyā, a de la Nawēnne n de na-kāte la tēŋa. ³⁶ Da pɔɪ fu zuugo, bēm īyā, fu ka tā wun base tɪ fu zomto baa ayɪla lebge pɛelga bu sabga. ³⁷ Base-ya tɪ ya «ēe» dēna «ēe», tɪ ya «ayɛɪ» dēna «ayɛɪ». La sān gāŋe bela, sela n pa'ase la de la be'em dāana bōnɔ.»

Da lebse be'em be'em īyā

(Alukɪ 6:29-30)

³⁸ «Ya wōm tɪ ba daan yetɪ: «Nēra sān pusge a tadāana nifo, ba mē pusge a nifo, nēra sān vike a tadāana yēnne, ba mē vike a yēnne.» ³⁹ La mam yetɪ ya mɛ tɪ, nēra sān ēŋe ya be'em, ya da ēŋe be'em lebse. La nēra sān wē fu zuugo peka, fu base tɪ a wē fu gɔbga peka pa'ase. ⁴⁰ La nēra sān sām fɔ tɪ a to'oge fu fu-pɪka, fu base tɪ a to'oge fu fu-kāte pa'ase. ⁴¹ La nēra sān pērgɛ fɔ tɪ fu kɔlge ē kilomētrɪ ayɪla, fu kɔlge ē kilomētrɪ bayɪ. ⁴² Nēra sān sose fu sela, fu bɔ ē. La nēra sān bɔɔra tɪ a penje sela fu zē'am, da mōŋe ē.»

Nõnje-ya ya be'eba

(Aluki 6:27-28,32-36)

⁴³ «Ya wõm ti ba daan yeti: «Fu nõnje fu tadāana, dee sise fu be.» ⁴⁴ La mam yeti ya me ti, ya nõnje ya be'eba, dee pu'usra Nawēnne bɔ'ɔra seba n nāmsrɪ ya la. ⁴⁵ Ya sǎn ɛnje bela, ya wun dena ya Sɔ Nawēnne n boe saazuum na kɔma, se'ere n soe la, ɛnja n botɪ wuntɛɛnja yɛkra bɔ'ɔra nɛr-sɔma la nɛr-be'ero, dee botɪ saaga ni-ira bɔ'ɔra seba ɪrgɔ n mase, la seba ɪrgɔ n ka mase. ⁴⁶ Yāma sǎn nõnje seba n nõnje ya la mā'a, bēm yɔɔɔɔ ti ya wun yɛ Nawēnne zɛ'am? Lampo-tɔ'ɔsrɪba mē ɪti la bela. ⁴⁷ La yāma sǎn pu'usra la ya sɔbiisi mā'a, bēm ti yāma ɪti gǎnna ya taaba la? Nɛr-seba n ka dolɪ Nawēnne na mē ɪti la bela. ⁴⁸ Bela, dena-ya nɛrba ti ya ɪrgɔ wuu wun mase, wu ya Sɔ Nawēnne n boe saazuum ɪrgɔ wuu n mase se'em na.»

Azezi zāsum nɛrba sɔnjɛ, la Nawēnne pu'usgɔ, la nɔor-lua yelle

(Aluki 11:2-4)

6 «Guuse-ya, da ita-ya ɪr-sɔma nɛrba nɛjam ti ba yɛta ya. Ya sǎn ita bela, ya kǎn to'oge yɔɔɔɔ ya Sɔ Nawēnne n boe saazuum zɛ'am.

² Bela, fu sǎn yeti fu sɔnje nasa, da kǎn mōole nɛrba zɛ'am wu pulibsum dōma n ɪti se'em ba wēndeto puam, la sorɔɔɔɔ zuto ti nɛrba pɛge ba la. Mam yeti ya la sɪra, ti bǎma pōn to'oge ba yɔɔɔɔ mɛ. ³ Fu sǎn yeti fu sɔnje nasdōma, da base ti fu gɔbga nu'ugo bǎnje fu zuugo nu'ugo n ɪti sela. ⁴ Bela nɛra nɛra kǎn bǎnje ti fu sɔnje nasdōma, la fu Sɔ Nawēnne n yɛ fōn sugɛ ɛnje la, a wun lebse fo.

⁵ Ya sǎn pu'usra Nawēnne, da ita-ya wu pulibsum dōma n ɪti se'em na, bǎma nõnje la ba ze ba wēndeto puam, la sorɔ-puursi zuto pu'usra Nawēnne ti nɛrba yɛta ba. Mam yeti ya la sɪra, ti ba pōn to'oge ba yɔɔɔɔ mɛ. ⁶ Fu sǎn yeti fu pu'use Nawēnne, fu kē fu deem yu kulɪja pu'use fu Sɔ Nawēnne n boe zɛ'a n sugɛ la. La fu Sɔ la n yɛ ti fu sugɛ mɛ pu'use la, a wun yɔ fo.

⁷ Ya sǎn pu'usra Nawēnne, ya da tɔgra yetɔga n ka tarɪ vōore kaana wu nɛr-seba n ka mi Nawēnne n ɪti se'em na, ba tɛ'ese ti bǎma n tɔgrɪ zɔ'ɔra la ɪyǎ, Nawēnne wun lerge bǎma pu'usgɔ mɛ. ⁸ Bela, da āna-ya wu bǎma n ān se'em na, se'ere n soe la, lan dɛnje ya wun sose ya Sɔ Nawēnne, a pōn mina yāma n boorɪ sela mɛ. ⁹ Bela, pu'usra-ya wāna:

«Tōma Sɔ Nawēnne n boe saazuum,
botɪ fu yu'ure yɛta pɛka,

¹⁰ wa'am wa di na'am nɛrba tɛjasuka,
botɪ fōn boorɪ se'em ɛnje tɛja zuo,
wu lan ɪti fōn yire se'em na.

¹¹ Bɔ tɔ ti zina dia.

¹² Base ti tōon-be'ero taale,

wu tōma n mē base seba n ɛnje tōma be'em taale se'em na.

¹³ Da base ti yelle paage tɔ ti ti lui.

Fāage tɔ be'em dāana nu'usum base.

[Ti fōn soe so'olum, la pǎnja, la nǎasgɔ wakate n ka ba'asrɪ. Amina!]

¹⁴ Ya sǎn base nɛr-seba n ɛnje ya be'em na taale, ya Sɔ Nawēnne mē wun base ya tōon-be'ero taale. ¹⁵ La ya sǎn ka base nɛr-seba n ɛnje ya be'em na taale, ya Sɔ Nawēnne mē kǎn base ya taale.

¹⁶ Ya sǎn lu nōore, da zūnje-ya nɛnja wu pulibsum dōma n zūnjri ba nɛnsɪ se'em, ti ba pa'ale nɛrba ti bǎma lu la nōore la. Mam yeti ya la asɪra, ti ba pōn to'oge ba yɔɔɔɔ mɛ. ¹⁷ Fu sǎn lu nōore, wire fu nɛnja dee sāsase fu zuugo, ¹⁸ ti nɛrba da bǎnje ti fu lu la nōore. La fu Sɔ Nawēnne n boe zɛ'a n sugɛ la wun bǎnje. La fu Sɔ la n yɛ fōn sugɛ lu nōore la, a wun yɔ fo.»

Azezi zāsum Nawēnne yire bōntarsōm yelle

(Aluki 12:33-34;11:34-36;16:13;12:22-31)

¹⁹ «Da lagsrɪ-ya bōntarsōm bɪnjra dūnia wǎ zuo, zɛ'e-seka ti bōn-mōgla la tɛjanzɛem wun sǎ'am ba, ti nayigba mē kɛ'era zūura.

²⁰ Lagsra-ya bōntarsōm bɪnjra Nawēnne yire, bilam ti mōka la tɛjanzɛem kǎn sǎ'am ba, ti nayigba mē kǎn kē zū. ²¹ Se'ere n soe la, ya bōntarsōm n boe zɛ'a na, ya putɛ'era mē boe la bilam.

²² Nini n nɛerɪ peelem bɔ'ɔra ɪyǎ wu fɪtla la. Bela, fu nini sǎn āna sɔnja, fu ɪyǎ wuu tarɪ peelem mɛ. ²³ La fu nini sǎn ka āna sɔnja, fu ɪyǎ wuu boe la lika puam. Peelem seka n wun nɛege fu puam na sǎn dena lika, la de la lika mɛnja mɛnja.

²⁴ Nɛra ka boe n tā wun sake zuudāandōma bayi, a wun sise ayɪla mɛ, dee nõnje ayɪla, bu a wun nanna ayɪla la mɛ, dee pɔ'ɔra ayɪla la. Bela, yāma ka tā wun sake Nawēnne n de ya Zuudāana, dee botɪ bōntarsōm mē dena ya zuudāana.

²⁵ Bela n soe ti mam yele ya yeti, ya da fabla ya vɔm yelle, yāma n wun di sela, bu ya wun yū sela, la ya da fabla ya ɪyǎ yelle, ya wun ye sela. Vɔm ka gǎnnɪ dia? Bu ɪyǎ ka gǎnnɪ futo? ²⁶ Bɪse-ya bōn-ɛgla, ba ka butɪ, ba mē ka lagsrɪ bōnkɔɔla ita bǎ puam. La ya Sɔ Nawēnne bɔ'ɔrɪ ba dia mɛ. Yāma ka tarɪ yōorɔ gǎnna bōn-ɛgla halɪ zozo'e? ²⁷ Āne n boe yāma puam n tā wun pa'ase a vɔm woglum fɛfɛe ɛn fablɪ la ɪyǎ?

²⁸ La bēm ti ya fabla futo yelle? Bɪse-ya mō-puuro n ān sɔnja se'em, ba ka tōnnɪ, ba mē ka wugrɪ futo. ²⁹ La mam yeti ya me ti, baa naba Asalomō na'am n yuun tarɪ pǎnja la, a yuun ka tā'age ye fuugo n ān sɔnja wu mō-puugo ayɪla. ³⁰ La Nawēnne sǎn botɪ mōorɔ n boe zina dee ti ba wun yō ba bugum beere āna sɔnja bela, a kǎn bɪse yāma yelle gǎnna bela? Bēm ti yāma ka bɔ Nawēnne sɪra zo'oge? ³¹ Da fabla-ya yeti ti: «Bēm ti wun di?» bu «ti wun yū la bēm?» bu «ti wun ye la bēm?»

³² La de la nêr-seba n ka mi Nawênnê n eerɪ bôn-bâma wuu. La yâma So Nawênnê mi tɪ yâma boorɪ bôn-bâma wuu mɛ. ³³ Dêŋɛ-ya ɛ Nawênnê so'olum, la sela n mase Nawênnê zê'am, tɪ a wun bɔ ya bôn-bâma wuu pa'ase. ³⁴ Da fabla-ya beere yelle, tɪ beere ya wun bânɛ ya wun êŋɛ se'em, daare woo n bɪsrɪ a mɛŋa yelle.»

Da zerga-ya taaba

(Aluki 6:37-38,41-42)

7 «Da zerga-ya taaba, ti Nawēnne mē da zerge ya. ² Se'ere n soe la, yan wun zerge nērba se'em na, Nawēnne mē wun zerge ya la bela. La sela ti ya dıke make bɔ nērba la, ēŋa ti Nawēnne wun dıke make bɔ ya. ³ Bēm ti fu bısra sɔko n boe fu sɔbia nifum, dee ka bısra dɔɔɔ n boe fu mēŋa nifum na? ⁴ Fōn ēŋe la wāne yeta fu sɔbia yeti, a base ti fu yese sɔko a nifum, dee ti dɔɔɔ bɔna fōn mēŋa nifum? ⁵ Pulibsum dāana, dēŋe yese dɔɔɔ la fu mēŋa nifum, dee yāŋa tā'age yē sōŋa yese sɔko la n boe fu sɔbia nifum na.

⁶ Da dıke-ya Nawēnne bōn-sōma bɔ baasi, la ya da dıke sela n tarı yōorɔ zozo'e lobge kurkurdōma nēŋam, tı ba wun nē ba me la ba nāma, dee tı baasi la wērgē dōn ya zōrzōrum.»

Azezi zãsum pu'usgɔ yelle

(Aluki 11:9-13)

⁷ «Sose-ya Nawēnne, tɪ a wun bɔ ya. Ɛ-ya, tɪ ya wun yē. Wē-ya kuliŋa, tɪ a wun yo'oge bɔ ya. ⁸ Se'ere n soe la, nēr-seka woo n sosrɪ Nawēnne, a wun bɔ ē. La nēr-seka woo n eerɪ, wun yē. La nēr-seka n wē'erɪ kuliŋa, ba wun yo'oge bɔ ē. ⁹ Āne n boe yāma puam tɪ a bia wun sose ē borborɪ, tɪ a bɔ ē kugre? ¹⁰ Bu a sǎn sose zūfo, tɪ a bɔ ē bōnsela? ¹¹ Yāma nērsaalba n de tōon-be'ero dōma la sǎn mina tɪ ya bɔ ya kɔma bōn-sōma, ya So Nawēnne n boe saazuum kǎn bɔ yāma seba n sosrɪ ē na bōn-sōma n qǎnnɪ belɔ?

¹²Yāma n boori ti nērba ita se'em bɔ'cra ya la, yāma mē ita bela bɔ'cra ba. Ēna de la Nawēnnɛ ɔɔ, la a nōtɔ'csrɔba n gulɛ se'em n bela.»

Sorokoro bayi yelle

(Aluki 13:24)

¹³ «Doose-ya zanõre n ãn mika kē, se'ere n soe la, zanõ-yalŋa, la so-kāte la we'esu la sā'arɔ zē'am, la nēr-ba zozo'e doli la bilam. ¹⁴ La zanõ-mika, la so-bāalga we'esu la vom zē'am. La de la nērba fēe n doli ē.»

Tla woo la a biε

(Aluki 6:43-44)

¹⁵ «Guuse ya mēŋa la nēr-seba n parŋi tɪ bāma de la Nawēnne nōtɔʼscrɪba la. Ba wun ēŋe ba mēŋa wu saasaadōma n dɪke piisi gāna fure ba mēŋa wa'am ya zē'am wu ba de la piisi la, dee tɪ ba puam ba sā'ana wu

saasaadōma la. ¹⁶ Ba tōoma puam ti ya wun bāŋe ba. Bēm iŷā, zāaŋa ka tã wun wam tã'ama, la kěkw ka tã wun wam kěnkāma. ¹⁷ Tl-sōŋk woo wam na biē sōma, la tl-be'ego woo wam na biē be'ero. ¹⁸ Tl-sōŋk ka tã wun wam biē be'ero, la tl-be'ego mē ka tã wun wam biē sōma. ¹⁹ Tl-seka woo n ka wam na biē sōma, ba wun lube ē mē yō la bugum. ²⁰ Bela, la de la nērba la tōoma puam ti yāma wun bāŋe ban de nēr-seba.»

Něr-seba n sakri Nawēnne asıra sıra

(Aluki 13:25-27)

²¹ Azezi daan le yele yeti: «Dagɪ n̄r-sɛka woo n wi'iri mam ti «Zuudāana, Zuudāana» la n wun kē Nawēnne so'olum puam. La de la n̄r-sɛka n ɪti mam So Nawēnne n boe saazuun n boori se'em na n wun kē.

²² Sarɣyadia daare, nërba zozo'e wun yele mam yeti: «Zuudāana, Zuudāana, tōma daan dɪke la fōn yu'ure to'oge Nawēnne yetɔga tɔge bɔ nërba. La fōn yu'ure ti tōma daan dɪke dige kulkā'arsi, dee daan tōm tōon-yālma zozo'e la fōn yu'ure.» ²³ La mam wun yele ba yeti: «Mam pōn ka mina ya, sēŋe-ya fōrge, tōon-be'ero dōma wā.» »

Deto bayi mĩa makre

(Aluki 6:47-49)

²⁴ «Nër-seka woo n wōm mam yetōga wā, dee ēņe wu yetōga la n ye le se'em na, a dāana ān wu yem dāana n mē a yire tāmpīa zuo. ²⁵ Tl saaga ni, tl ko'om pūre kulst zoe wē ē, tl kusebgo vuge wē ē, tl a ka lui, se'ere n soe la, a mē la tāmpīa zuo.

²⁶ La nēr-sekā woo n wōm mam yetōga wā, dee ka sake ita yetōga la n ye le se'em na, a ān wu yalma n mē a yire tēntōnbī'isgo zuo. ²⁷ Tl saaga ni, tl ko'om pūrē kulst zoe wē ē, tl kusebgo vuge wē ē, tl a wuu lui saam saam.»

²⁸ La Azezi n tɔge yetɔga la ku'lum na, zāsɔɔ la di'ige nērba la zozo'e me. ²⁹ Se'ere n soe la, a zāsɔɔ la taru la pāga, la ka ān wu ba loɔ karēnsāandōma n zāsni se'em na.

Azezi botl kōnkonne yē ĩmā'asum

(Amarkı 1:40-45, Aluki 5:12-16)

8 Azezi daan ze'ele la tãŋja la zuo sige, tɪ nẽr-kuuŋɔ zozo'e dɔla ẽ. ² Tɪ kũnkonne wa'am a zẽ'am wa ka dũma tẽŋa a nẽŋam yele ẽ yetɪ: «Zuudãana, fu sãn bɔɔra, fu tã wun base tɪ m yẽ ãmã'asum mɛ le ãna sõŋa.» ³ Tɪ Azezi tẽege a nu'ugo kalum ẽ, dee yetɪ: «Mam bɔɔra, yẽ ãmã'asum le ãna sõŋa.» Bilam mẽŋa tɪ kũnkɔm na base ẽ, tɪ a le ãna sõŋa. ⁴ Tɪ Azezi yele ẽ yetɪ: «Da yele nẽra nẽra. La sẽŋe Nawẽnnẽ kãabɔ kẽe-ma zẽ'am ka pa'ale ẽ fɔ mẽŋa tɪ a bɪsɛ, dee bɔ bõn-sɛ-ba tɪ Amoyisi yuun gulɛ yetɪ ba bɔ la, tɪ la pa'ale ba tɪ fu sɪrɪ yẽ ãmã'asum.»

Azezi boti suda-ke'ema tōntōnna yē ĩmā'asum

(Aluki 7:1-10)

⁵ Azezi daan sēñe ka paage kē'era la Kapernaum tēña puam, ti Rom dōma suda-ke'ema wa'am a zē'am wa sose ē ⁶ yeti: «Zuudāana, mam tōntōnna n bē'eru kōorum gā yire, a ba nāmsra me zozo'e.» ⁷ Ti Azezi yele ē yeti: «Mam wun wa'am wa boti a yē ĩmā'asum.» ⁸ Ti suda-ke'ema la lebe yele ē yeti: «Mam ka narı ti fōn wa'am mam yire. Wen tōge yetōga mā'a, ti mam tōntōnna la wun yē ĩmā'asum. ⁹ Se'ere n soe la, nēba n soe mam, la mam mē soe la sudaasi baseba. Mam sān yele suda-seka yeti: «Sēñe», a we'esı me. La mam sān yele ayēma yeti: «Wa'am», a sēm me. Mam sān yele m tōntōnna yeti: «Ĕñe wāna», a ıtı me.» ¹⁰ Azezi n wōm bela la, la di'ige ē me. Ti a yele nēr-seba n dolı ē na yeti: «Mam yeti ya la asıra, ti mam nān ka yē nēra n bō mam sıra wu bura-ēna wā, baa lsrayelı buuri la puam mam ka yē. ¹¹ Mam yeti ya ti, nēba zozo'e wun ze'ele zanō-bōba, la dapō-bōba wa'am wa zı're la Abraham, la A'izakı, la Azakōbı di Nawēnne so'olum puam. ¹² La ba wun lobge lsrayelı dōma n wun soe nı Nawēnne so'olum na base la yēña lika puam, bilam ba wun kaasra, dee dıke ba nu'usi gı nōorum.»

¹³ A yele bela, dee yele suda-ke'ema la yeti: «Kule, ti la wun ēñe wu fōn bō mam sıra se'em na.» La wakat-ēña mēña ti a tōntōnna la yē ĩmā'asum.

Azezi boti nēba zozo'e yē ĩmā'asum

(Amarkı 1:29-34, Aluki 4:38-41)

¹⁴ Bela poorum, Azezi sēñe la Apıyεrı yire ka yē Apıyεrı deem-pōka n bē'eru gā, ti a ĩyā tulge. ¹⁵ Ti Azezi kalum pōka la nu'ugo, ti bā'aga la base ē. Ti a isge ēñe Azezi sāane. ¹⁶ Ti zaanōore paage, ti ba tarı nēba zozo'e ti kulkā'arsı tarı ba wa'am Azezi zē'am. Ti a tōge yetōga dige kulkā'arsı la, dee boti seba wuu n de bā'adōma yē ĩmā'asum. ¹⁷ La de la bela ti Nawēnne nōtō'usa A'ezayi n yuun yele se'em na ēñe. A yuun yeti: «Ĕña n to'oge tōma tooro, la ti bā'ası base.»

Azezi doosgo yelle

(Aluki 9:57-62)

¹⁸ Azezi n yē nēr-kuuñı n kaage ē na, ti a yele a karēnbiisi la yeti: «Ti dooge-ya mōgre la doone ke bōba.» ¹⁹ Ti bō karēnsāama ayıla wa'am a zē'am wa yele ē yeti: «Karēnsāama, mam wun dōla fu sēnna zē'e-seba wuu ti fu wun sēnna.» ²⁰ Ti Azezi yele ē yeti: «Pıuna tarı yogro me, ti niinto tara tugro, la Nērsaala Dayua la ka tarı zē'a wun gā'are vo'ose.» ²¹ Ti a karēnbia ayıla yele ē yeti: «Zuudāana, base ti m dēñe sēñe ka laage m so dee wa'am wa dōla fu.» ²² Ti Azezi yele ē yeti: «Dōla mam dee base seba n ka tarı wōm Nawēnne zē'am ti ba laage ba kūm.»

Azezi boti kusebgo yōke

(Amarkı 4:35-41, Aluki 8:22-25)

²³ Azezi daan kē la dōrñı, ti a karēnbiisi la doose ē. ²⁴ Ti kuseb-kāte wa'am wa vugra mōgre la zuo. Ti komı'si boti dōrñı la zıgra la a mise. La Azezi daan gı'srı me. ²⁵ Ti a karēnbiisi la paage nēege ē yeti: «Zuudāana, fāage tō, tōma yeti ki me.» ²⁶ Ti Azezi yele ba yeti: «Bēm ti ya zōta dabeem, ya ka bō mam sıra zo'oge.» Azezi yele bela, dee isge tāse kusebgo, la ko'om na me, ti ba āna sım. ²⁷ Ti ba wuu palēña ēke, ti ba yeti: «Bēm nēra n de ēna ti kusebgo, la ko'om sakra a nōore?»

Kulkā'arsı n dolı buraası bayi, ti Azezi dige ba

(Amarkı 5:1-20, Aluki 8:26-39)

²⁸ Ba daan dooge mōgre la doone ke bōba paage la Gadara dōma tēña puam, ti buraası bayi ti kulkā'arsı dolı ba ze'ele yōwı zē'a sēnna tu'usra ē. Ba daan de la zol-wēensi, ti nēba zōta ka sakra dōla bilam tōlla. ²⁹ Ti ba kaasra tagursı yeti: «Nawēnne Dayua, bēm boe tōma la fōn tēñasuka? Fōn wa'am ti fu nāmse tōma me dee ti wakate la nān ka paage?» ³⁰ La kurkurdōma n daan zo'oge lem bilam bōba. ³¹ Ti kulkā'arsı la sose Azezi yeti: «Fu sān yeti fu dige to ti ti yese, fu base ti ti sēñe ka kē kurkurdōma la.» ³² Ti Azezi yele ba yeti: «Sēñe-ya.» Ti ba yese sēñe ka kē kurkurdōma la. Ti kurkurdōma la ze'ele tēña zuo zoe sige ka lui mōgre la puam ki. ³³ Ti seba n gu'uri kurkurdōma la zoe sēñe tēña puam ka yele lan ēñe se'em na wuu, la bōn-seka n ēñe seba ti kulkā'arsı la daan dolı la. ³⁴ Ti tēña la dōma wuu yese tu'usra Azezi, la ban yē ē na, ba sose ē yeti, a fōge dee base ba tēña.

Azezi boti kōwñı yē ĩmā'asum

(Amarkı 2:1-12, Aluki 5:17-26)

9 Azezi daan kē dōrñı lebe dooge la mōgre la ke bōba kule Kapernaum, ēn kē'erı zē'a la. ² Ti nēba baseba ze buraayıla n de kōwñı n gā a bōn-gā'ala puam wa'am a zē'am. Ti Azezi yē ban bō ē sıra la, yele kōwñı la yeti: «M bia, keñe fu sūure, fu tōon-be'ero taale ka le bōna fu zuo.»

³ Ti bō karēnsāandōma baseba tē'esra ba sūure puam yeti: «Bura-ēna pōwı la Nawēnne.» ⁴ La Azezi mi ban tē'esrı se'em na me, ti a yele ba yeti: «Bēm ti yāma tē'esra putē'e-be'ero ya sūure puam? ⁵ Bēm n de nāana gānna? Mam sān yele buraayıla la yeti, a tōon-be'ero taale ka le bōna a zuo, bu mam sān yele ē yeti, a isge sēnna n de nāana gānna? ⁶ Mam wun boti ya bāñe ti Nērsaala Dayua tarı nōore dūnia zuo wun base tōon-be'ero taale.» Azezi yele bela, dee yele kōwñı la yeti: «Isge, dıke fu bōn-gā'ala la kule.» ⁷ Ti a isge kule. ⁸ Ti nēr-kuuñı la yē bela, ti dabeem yōke ba, ti ba nā'asra Nawēnne ēn bō nērsaalba nōor-ēña la ĩyā.

Azezi wi Amatie ti a dɔla ẽ

(Amarki 2:13-17, Aluki 5:27-32)

⁹ Azezi daan ze'ele la bilam senna tɔlla, yẽ buraa yu'ure n de Amatie n zĩ tɔ'wsra lampo. Ti a yele ẽ yeti: «Isge dɔla mam.» Ti Amatie isge dɔla ẽ. ¹⁰ Ti Azezi sɛnɛ ka zẽa Amatie yire dita, ti lampo-tɔ'wsrɔba, la tɔon-be'ero dɔma zozo'e wa'am wa lagum na Azezi la a karɛnbiisi la zẽa dita. ¹¹ Ti Farisi dɔma yẽ bela, soke a karɛnbiisi la yeti: «Bẽm ti yãma karɛnsãama la lagum na lampo-tɔ'wsrɔba, la tɔon-be'ero dɔma dita.» ¹² Ti Azezi wõm bela, yele ba yeti: «Sɛba n tarɪ ãmã'asum ka eerɪ tɔba, la de bã'adɔma n eerɪ tɔba. ¹³ Sɛnɛ-ya ka zãsum Nawẽnne gɔnɔ n yele se'em na vɔore, Nawẽnne yeti: «Mam boorɪ ti nẽrsaalba zɔta la taaba ninbãalga, dee dagɪ ti ba dɪke ba bõnɔ kãabra bɔ'wra mam.» Bela, mam ka wa'am ti m wi sɛba dɔma n yeti bãma mase mɛ na, mam wa'am na tɔon-be'ero dɔma ãyã.»

Ba soke Azezi nɔorlua yelle

(Amarki 2:18-22, Aluki 5:33-39)

¹⁴ Ti Azã karɛnbiisi wa'am Azezi zẽ'am wa soke ẽ yeti: «Bẽm ti tɔma la Farisi dɔma luta nɔore, dee ti fõn karɛnbiisi la ka luta?» ¹⁵ Ti Azezi yele ba yeti: «Nẽra sãn di pɔka ɛnɛ kibsa wi a tadãandɔma ti ba wa'am naage la ẽ dita, ba tã wun ɛnɛ sũ-sã'anjɔ wakat-seka ti pɔgdita la ken bɔna la ba le mɛ bu? Ayɛ. La dabsa sɛm mɛ, ti ba wun yese pɔgdita la ba zẽ'am. Bela ti ba yãna wun lu nɔore. ¹⁶ Nẽra kãn dɪke tãn-paalga lige fu-keka. A sãn ɛnɛ bela, tãn-paalga la wun botɪ fu-keka la ãage mɛ gãnɛ bela.

¹⁷ La nẽra kãn dɪke dã-paalga sũm wɔ-kegsɪ puam. A sãn ɛnɛ bela, dã-paalga la sãn kella, ba wun botɪ wɔɔsɪ la tãse mɛ, ti dãam na ka'age, ti wɔɔsɪ la mẽ sã'am. La mase ti ba dɪke dã-paalga sũm na wɔ-paalsɪ puam, bela ti ba wuu kãn sã'am.»

Pɔka n yẽ ãmã'asum, la pugla vo'ore yelle

(Amarki 5:21-43, Aluki 8:40-56)

¹⁸ Azezi n ken tɔgra la ba bela la, ti Zifdɔma nɛnjadãana ayɪla wa'am a zẽ'am, wa ka dũma tɛnɔa a nɛnjam yele yeti: «Mam pɔyua n ki lɛɛɛ wã, wa'am wa dɪke fu nu'ugo paglɛ a zuo, ti a vo'oge.» ¹⁹ Ti Azezi la a karɛnbiisi la daan isge dɔla ẽ wɛ'ɛsa.

²⁰ Ban daan wɛ'ɛsɪ la, ti pɔka ayɪla n luti sɪkɛnɔa yuu-ma pia la ayɪ ti la ka gɔ'wra, wa'am Azezi poorum wa kalum a fuugo nɔore. ²¹ Se'ere n soe la, a daan tɛ'ɛsrɪ a sũurum yeti: «Mam sãn kalum a fuugo mã'a, mam wun yẽ ãmã'asum.» ²² Ti Azezi gelge yẽ ẽ, yele ẽ yeti: «M bia, keɛnɛ fu sũure! Fõn bɔ mam sɪra la n basɛ ti fu yẽ ãmã'asum.» Ti pɔka la yẽ ãmã'asum bilam mɛnɔa.

²³ Ti Azezi paage Zifdɔma nɛnjadãana la yire yẽ wɪ-pɛɛbrɪba la nɛr-kuunɔ n bɔgrɪ. ²⁴ Ti a yele ba yeti:

«Yese-ya, ti pugla la ka ki, a gĩsri mɛ.» Ti nɛrba la la'ara ẽ. ²⁵ La ɛn botɪ nɛr-kuunɔ la yese la, a kɛ la deem gurɛ pugla la nu'ugo, ti a isge. ²⁶ Ti yel-ɛna saage tɛnɔa la wuu.

Azezi botɪ fɔɔsɪ bayɪ yɛta

²⁷ Azezi daan yese zẽ'e-ɛnɔa mɛ fɔrgra, ti fɔɔsɪ bayɪ dɔla ẽ tɔgra ke'enke'em yeti: «Adavidɪ yuunɔ, zoe ti nin-bãalga!» ²⁸ Ti Azezi paage kɛ yire, ti fɔɔsɪ la paage a zẽ'am, ti a soke ba yeti: «Yãma bɔ sɪra ti mam wun tã'age ɛnɛ yan boorɪ se'em na?» Ti ba lerge yeti: «Ɛ! Zuudãana.» ²⁹ Ti a kalum ba nini dee yeti: «La wun ɛnɛ wu yan bɔ sɪra se'em na.» ³⁰ Ti ba nini na pike yɛta. Ti a kã'an ba yeti: «Da basɛ-ya ti nẽra bãnɛ.» ³¹ La ban fɔrge la, ba mɔole bõn-ɛnɔa mɛ tɛnɔa la zẽ'a woo.

Azezi botɪ muko tɔgra

³² Ban daan yesɪ la, ti ba tarɪ nẽra ti kulkã'arga dolɪ ẽ, ti a dena muko, wa'am Azezi zẽ'am. ³³ Ti Azezi digɛ kulkã'arga la, ti a yese. Ti muko la tɔgra. Ti la di'ige nɛr-kuunɔ la, ti ba yeti: «Nẽra nẽra nãn ka yẽ wãna bu-urɪ lsrayɛlɪ puam.» ³⁴ La Farisi dɔma daan yeti: «La de la kulkã'arsɪ naba n bɔ ẽ pãnɔa, ti a tara digra kulkã'arsɪ la.»

Azezi zoe nɛr-kuunɔ ninbãalga

³⁵ Azezi daan kaarɪ la tɛn-kãra la tɛn-pɪgsɪ wuu, zãs-na nɛrba Zifdɔma wɛndeto puam, mɔola Nawẽnne so'olum kɔ-yɛlga, dee botɪ bã'adɔma, la kobro buuri wuu yɛta ãmã'asum. ³⁶ La Azezi n yẽ nɛr-kuunɔ la, ba ninbãalga n yõke ẽ. Se'ere n soe la, ba targe mɛ bãle, ãna wu piisi n ka tarɪ dũnsiina. ³⁷ Ti a yele a karɛnbiisi la yeti: «Va'am na bõnkɔɔla lagsɔ zo'oge mɛ, la tɔn-tɔnɔba n wun lagsɛ bõnkɔɔla la pɔ'wɪ mɛ. ³⁸ Bela ãyã, sose-ya va'am na dãana ti a tɔm tɔntɔnɔba pa'ase ti ba lagsɛ bõnkɔɔla la.»

Azezi looge a karɛnbiisi pia la ayɪ tɔm ba

(Amarki 3:13-19;6:7-13, Aluki 6:12-16;9:1-6)

10 Azezi daan wi a karɛnbiisi pia la ayɪ la mɛ bɔ ba pãnɔa ti ba digɛ kulkã'arsɪ, dee botɪ bã'adɔma buuri wuu, la kobro buuri wuu yẽ ãmã'asum. ² Karɛnbiisi pia la ayɪ la ti a looge ti a tɔm na yu'ura n wãna: Pɔspɔsɪ dãana de la Asimɔ ti ba wi'iri ti Apiyɛɛrɪ, la a yɪbga A'ãndre, la Azebede dayɔɔsɪ Azakɪ la a yɪbga Azã, ³ la Afilipi, la Abatelemi, la Atoma, la Amatie n de lam-po-tɔ'wsa la, la Azakɪ n de Alfe dayua, la Atade, ⁴ la Asimɔ n daan de Zelɔtɪ nẽra ayɪla la, la Azudaasɪ Iskariyo, seka n wun pa'ale ti ba yõke Azezi la.

⁵ La de la bãna pia la ayɪ ti Azezi daan tɔm, yele ba yeti: «Da sɛnɛ-ya bu-zãnsɪ la zẽ'am, la da kɛ-ya Samaari dɔma tɛnsɪ puam. ⁶ Sɛnɛ-ya lsrayɛlɪ dɔma n ãn wu piisi n bɔɪ la zẽ'am, ⁷ ka mɔola yeti: «Nawẽnne

so'olum na lem me.»⁸ La ya boti bā'adōma yē
ĩmā'asum, dee boti kūm vo'oge, dee boti kōnkōma yē
ĩmā'asum le āna sōja, dee dige kulkā'arsu. Yāma
to'oge la zāja, bela bō-ya zāja.⁹ Da dīke-ya sālma bu
ligri sūm sēje.¹⁰ La ya da dīke tāmpōkō sore la sēnne
īyā, da dīke-ya futo bayi, bu tagra, bu doore. Ba wun
bō tōntōnna ēn boori sela.

¹¹ Ya sān paage tēn-kāte bu tēn-pīka puam, soke-ya
bāje nēr-sōjō sān bōna mī wun to'oge ya ti ya kē'era a
yire, bōna-ya bilam ka paage daar-seka ti ya wun fōrge
tēja la.¹² Ya sān paage kē yire puam, ya pu'use ba
yeti: «Sū-mā'asum wun bōna la ya.»¹³ La yire la dōma
sān to'oge ya, ya sū-mā'asum wun bōna la ba. La ba
sān zagse ka to'oge ya, ya sū-mā'asum wun weege ya
zē'am.¹⁴ La yi-seka, bu tēn-seka nērba sān ka to'oge
ya, bu ka selse ya yetōga, ya yese zē'e-ēja dee puse ya
nāma tēntōnno base mī.¹⁵ Mam yeti ya la sūra sūra, ti
sarīyadia daare tēn-ēja dōma wun yē toogo gānna
Sodom la Gomōori tēnsi nērba.»

Azezi yeti nāmsgo n wun wa'am

(Amarki 13:9-13, Aluki 21:12-17)

¹⁶ Azezi le yeti: «Bise-ya, mam tōm ya wu piisi
saasaadōma tējasuka. Bela īyā, dena-ya yem dōma wu
bōnse'edōma, la ya āna wu na'adawema n ka tarī yelle
se'em na.¹⁷ Guuse-ya ya mēja la nērba la. Se'ere n soe
la, ba wun wa yōge ya me tarī sēje sarīyadia zē'esum,
dee wē ya ba wēndeto puam.¹⁸ La ba wun yōge ya
sēje gōmnadōma, la na'adōma nējam, yāma n doli
mam na īyā, ti ya wun dena kaset-dōma tōge bō bāma
la bu-zājsi.¹⁹ La ba sān tarī ya sēje, da fabla-ya yāma
n wun tōge se'em, bu yāma n wun tōge sela yelle.
Se'ere n soe la, wakat-ēja mēja Nawēnne Sīa wun bō
ya bōn-seka ti ya wun tōge.²⁰ La dagi yāma mēja n
wun tōge, la de la ya Sō Nawēnne Sīa la n boe ya puam
na n wun tōge.

²¹ Sōbia wun boti ba yōke a sōbia ku. La sōdōma mē
wun ēje ba kōma bela. La kōma mē wun zēbe la ba dō-
grība, boti ba ku ba.²² Nērba wuu wun sise ya mam
yu'ure la īyā. La seka n ze'ele kājkāje ka paage ba'as-
go, a wun yē fāare.²³ Ba sān nāmse ya tēja ayila
puam, ya zoe sēje tēja ayēma. Mam yeti ya la sūra, ti
ya kān yāje kaage Israyeli tēnsi ba'ase dee ti mam n
de Nērsaala Dayua la leme wa'am.

²⁴ Karēnbīa ka gānni a karēnsāama, la tōntōnna mē
ka gānni a zuudāana.²⁵ La karēnbīa sān wa āna wu a
karēnsāama la, la tōntōnna sān wa āna wu a zuudāana
la, la seke me. Ban wi'iri yidāana la ti Abelzebuli n de
Asūtāana la, ba wun tuura a yire la dōma gānna la
bela.»

La mase ti ya zōta la Nawēnne

(Aluki 12:2-9)

²⁶ «Bela, da zōta-ya nērsaalba, ti bōn-seka woo n lile,
wun lilge. La bōn-seka woo n sugē, wun puke.²⁷ Mam
n yeje ya se'em lika puam wā, tōge-ya ē peelem puam.
La sela ti mam waasum ya la, zom-ya deto zuto mōole
ē.²⁸ Da zōta-ya seba n kuuri īyā, dee ka tāna wun ku
sīa la. Zōta-ya Nawēnne n tā wun boti ya īyā, la ya sīa
sā'am bug-tēja la.²⁹ Ba ka koosrī mōom niinto bayi la
lag-kōbre ayila mā'a? La baa niila ayila kān ki, ti la sān
dagna ya Sō Nawēnne n sake.³⁰ La baa yāma zuugo
zomto, Nawēnne mi ba wuu källe me.³¹ Bela īyā, da zō-
ta-ya dabeem, yāma tarī yōoro gānna niinto zozo'e me.

³² Nēr-seka woo n wun ze'ele nērba nējam yeti ēja
de la mam nēra, mam mē wun ze'ele mam Sō Nawēn-
ne n boe saazuum nējam yeti a de la mam nēra.³³ La
nēr-seka woo n sī'ise nērba nējam yeti ēja ka mi
mam, mam mē wun sī'ise mam Sō Nawēnne n boe
saazuum nējam ti mam ka mi ē.»

Ti nōje Azezi gānna

(Aluki 12:51-53; 14:26-27)

³⁴ «Da tē'ese-ya ti mam tarī la nō-yēnne wa'am dūnia
zuo. Mam ka wa'am ti m boti nērba dena nōore ayila
dūnia zuo, la de la welgre ti mam tarī wa'am.³⁵ Se'ere
n soe la, mam wa'am ti m welge la dayōōsi la ba sōdō-
ma, la pugunto la ba madōma, la dayōōsi pōgba la ba
sūrba madōma.³⁶ Ti nēra mēja yir-dōma wun dena a
be'eba.³⁷ Nēr-seka n nōje a sō bu a ma gānna mam, a
ka mase ti a dena mam nēra. La nēr-seka woo n nōje a
dayua bu a pōyua gānna mam, a ka mase ti a dena
mam nēra.³⁸ La nēr-seka woo n ka sake nāmsgo wu
nēra n zēeri a kūm dō-puurja dōla mam, a ka mase ti a
dena mam nēra.³⁹ La nēr-seka woo n boori ti a gu a
vōm, a wun kōje ē. La nēr-seka n base a vōm mam īyā,
a wun yē ē.»

Nēr-seba n tarī yōoro

(Amarki 9:41)

⁴⁰ «Nēr-seka woo n to'oge ya, a to'oge la mam. La
nēr-seka woo n to'oge mam, a to'oge la seka n tōm
mam na.⁴¹ La nēr-seka woo n to'oge Nawēnne nōtō'ōsa
ēn de Nawēnne nōtō'ōsa la īyā, a wun to'oge Nawēnne
nōtō'ōsa yōoro. La nēr-seka woo n to'oge sūra dāana ēn
de sūra dāana la īyā, a wun to'oge sūra dāana yōoro.⁴² La nēr-seka woo n bō mam nērba wā ayila ko-mā'as-
ga ti a yū, ēn de mam karēnbīa la īyā, mam yeti ya la
sūra, ti a kān kōje yōoro.»

**Azã n mise nërba ko'om puam tòm a karënbiisi Azezi-
krisi zë'am**
(Aluki 7:18-35)

11 Azezi n daan pa'alë a karënbiisi pia la ayi la kù'lum na, a yese bilam sêñe la so'olum na tēnsi la wuu puam ka zāsna nërba, dee mōola Nawēnne kō-yēlga.

² Tl Azã daan bōna yu'a deem, wōm Krisi tōoma la yelle, tòm a karënbiisi a zë'am, ³ tl ba sêñe ka soke ē yeti: «Fōn de la sēka tl Nawēnne yeti a wun wa'am na bu, tl gu'ura nēra ayēma?» ⁴ Tl Azezi lerge ba yeti: «Sēñe-ya ka ye le Azã yāma n wōnni se'em, la yāma n yēti se'em na: ⁵ Fōnsi nini yēti mē, tl kōrnō sēnna, tl kōnkōma yēta īmā'asum le āna sōja, tl wansī wōnna, tl kūm vō'cra, tl nasdōma wōnna Nawēnne kō-yēlga. ⁶ La nēr-sēka n ka lebrī poorum mam īyā la tarī zu-yēlga.»

⁷ Azã karënbiisi la n fōrge la, tl Azezi yāja tōgra Azã yelle bō'cra nēr-kusōja la yeti: «Bēm tl yāma daan sēñe ka bise weem? Yāma sēñe ka bise la mōorō tl kusebgo mīini bu? Ayel. ⁸ La bēm tl yāma sēñe ka bise? Nēra n ye fu-sōma? Ayel. Nēr-seba n ye fu-sōma la boe na'adōma yie. ⁹ La yāma sēñe ka bise la bēm? Ya sēñe ka bise la Nawēnne nōtō'cra bu? Ēe. La mam yeti ya tl a de la nēra n gānni Nawēnne nōtō'cra. ¹⁰ La de la ēja yelle tl la gulse Nawēnne gōja puam tl Nawēnne yeti:

«Mam tōntōnna n wāna
tl mam tōm tl a dēñe fu nēja
malge sore bō fō.»

¹¹ Mam yeti ya la sūra, tl nērsaalba tl ba dōge la wuu puam, nēra ka boe n gānni Azã n mise nērba ko'om puam na. La nēr-sēka n de pika Nawēnne so'olum na puam gānni Azã mē. ¹² Lan pōse Azã n misri nērba ko'om puam na wa paam lēle wā, Nawēnne so'olum sēnni nēja la pāja, la pānsi dōma n mōrgri tl ba fāage ē. ¹³ Nawēnne nōtō'cra la wuu, la lō gōnnō la wuu dēñe tōge so'olum na yelle mē halī wa paage Azã wakate. ¹⁴ La ya sān bōcra tl ya bāñe a vōore, Azã n de A'eli tl ba yuun yeti a wun wa'am na. ¹⁵ Sēka n wōm yetōga wā, a selse sōja sōja.

¹⁶ Mam wun dīke la bēm make la zamāan-ēna wā nērba? Ba ān wu kōma n zī da'am wi'ira taaba yeti: ¹⁷ «Tōma peebe wūsī mē, tl yāma zagse ka wa. Tl tōma yōom kuure yōoma, tl yāma zagse ka yōom.» ¹⁸ Se'ere n soe la, Azã wa'am mē wa luta nōore dee ka yūura dāam, tl ba yeti kulkā'arga n doli ē. ¹⁹ Tl Nērsaala Dayua la wa'am wa dita dee yūura, tl ba yeti, a de la dita, la dā-yūura, la lampo-tō'cra, la tōon-be'ero dōma sūre. Yem dāana tōoma n pa'alī tl a tarī yem.»

Azezi zerge tēn-seba nērba n ka bō ē sūra la
(Aluki 10:13-15)

²⁰ Bela poorum tl Azezi zerge nēr-seba tl a tōm tōon-yālma zozo'e ba tēnsi puam, dee tl ba ka teege yem base tōon-be'ero la yeti: ²¹ «Korazē dōma, ya wun yē toogo! Betisayida dōma, ya wun yē toogo! Se'ere n soe la, tōon-yālma seba n tōm ya tēnsi puam na, daan sān tōm nī na Tiiri, la Sidō tēnsi puam, ba wun teege nī yem base tōon-be'ero halī kurum kurum, ye bōra futo ēñe tāmpeglum ēñe ba zuto tl la pa'alē tl ba teege yem. ²² Bela īyā tl mam yeti ya tl sarīyadia daare, la wun dena toogo bō yāma gānna Tiiri, la Sidō dōma. ²³ La yāma Kapernaum dōma, yāma tē'ese tl ya wun zēke mē ka paage saazuum bu? Ayel, ya wun sige mē halī ka paage kī'ln-tēja. Se'ere n soe la, tōon-yālma seba tl mam tōm ya zē'am na daan sān tōm nī na Sodom tējam, a wun ken boe nī mē zīna. ²⁴ La mam yeti ya tl sarīyadia daare, Sodom dōma kān yē toogo paage yāma.»

Azezi tōge ēja la a Sō Nawēnne yelle
(Aluki 10:21-22)

²⁵ Wakat-ēja Azezi tōge mē yeti: «Mam Sō Nawēnne n de saazuum la tēja wā Zuudāana, mam pēgrī fō, se'ere n soe la, fōn sūge bōn-bāna wā mē tl yem dōma la bāñrība ka mina, dee pa'alē nēr-seba n ān wu kōmpgī la. ²⁶ Ēe, mam Sō, la de la fōn boorī bela la īyā.»

²⁷ «Mam Sō dīke sela woo ēñe la mam nu'usum. La nēra ka mi mam n de Nawēnne Dayua la n de sēka, sān dagna mam Sō la, la nēra mē ka mi mam Sō la n de se'em, sān dagna mam n de a Dayua la, la seba tl mam wun botī ba bāñe ē na.»

Azezi n bō'cra nērba vo'osgo

²⁸ «Wa'am-ya mam zē'am, yāma seba wuu n tu ze-tūsa targe la, tl mam wun bō ya vo'osgo. ²⁹ Dīke-ya mam sōgriga sōge ya mēja, zāsum sela tl mam wun pa'alē ya la, tl ya wun yē vo'osgo. Se'ere n soe la, mam de la sū-bugsum dāana, la sik-m-mēja dāana. ³⁰ Mam sōgriga la fake mē, la mam zeero la ka tūbge.»

Vo'osgo daare yelle
(Amarki 2:23-28, Aluki 6:1-5)

12 Wakat-ēja, Azezi la a karënbiisi la daan doli la vato puam, Zīfdōma vo'osgo daare tōlla. Tl a karënbiisi kōm dōnna, tl ba kō si wēna cōbra. ² Tl Farisi dōma yē, ye le Azezi yeti: «Bise, fu karënbiisi la tti la sela n sisri vo'osgo daare.» ³ Tl Azezi lerge ba yeti: «Yāma ka karēñe Adavidi la a nērba la kōm n yuun dōnni tl ba ēñe se'em na? ⁴ A yuun kē la Nawēnne deego la puam dīke borbōri seba tl ba bīñe bō Nawēnne na obe, dee bō a nērba la. La sisri mē, nēra nēra ka obrī

ba, sãn dagna kãabgo kẽma la mã'a. ⁵ Bu yãma ka karẽŋe loo gõŋo la puam n yeti, vo'osgo daare, kãabgo kẽma la n tõnni Wẽnde-kãte la puam na sã'anì vo'osgo daare sisgo la me ti taale ka bõna? ⁶ Mam yeti ya me ti nẽra n gãnni Wẽnde-kãte la n boe kalam. ⁷ La gulse ti Nawẽnne yeti: «Mam boori ti nẽrsaalba zota la taaba ninbãalga, dee dagi ti ba dıke ba bõno kãabra bõ'ora mam.» Yãma sãn bãŋe ni yetog-ẽna wã vooŋe, ya kãn yele ni seba n ka tõm be'em ti ba tuuge ya. ⁸ Se'ere n soe la, Nẽrsaala Dayua la n soe vo'osgo daare.»

Buraa nu'ugo n ki, ti Azezi boti a yẽ ìmã'asum

(Amarki 3:1-6, Aluki 6:6-11)

⁹ Azezi fõrge bilam sẽŋe la ba wẽndeem. ¹⁰ Ti buraa ayila daan bõna mĩ, ti a nu'ugo ki. Ti Farisi dõma bõra ti ba dõre Azezi, soke ẽ yeti: «Sore boe ti ba boti nẽra yẽ ìmã'asum vo'osgo daare?» ¹¹ Ti Azezi lerge ba yeti: «Nẽr-kãna n boe yãma puam wun tara pesgo, ti a lui boko puam vo'osgo daare, ti a kãn yõke ẽ ti a dooge? ¹² Nẽrsaala tarì yõoro me gãnna pesgo zozo'e. Bela, sore boe me ti nẽra ẽŋe sõŋa vo'osgo daare.» ¹³ La Azezi yele buraa la yeti: «Tẽege fu nu'ugo la.» Ti a tẽege, ti a nu'ugo la әне sõŋa wu nu'ugo ayẽma la. ¹⁴ Ti Farisi dõma la yese yẽŋa ka bãm bãm a n wun ẽŋe se'em ku Azezi.

Azezi de la Nawẽnne tõntõnna

¹⁵ Ti Azezi bãŋe bela, fõrge bilam. Ti nẽrba zozo'e doose ẽ. Ti a boti bã'adõma wuu yẽ ìmã'asum. ¹⁶ Dee kã'an ba yeti, ba da boti nẽra bãŋe. ¹⁷ A ẽŋe la bela ti Nawẽnne n yuun boti a nõto'wsa A'ezayi yele se'em na ẽŋe.

¹⁸ A yuun yeti:

«Mam tõntõnna ti mam looge n wãna:
Nẽr-seka ti mam nõŋe, a paage la mam yem.
Mam wun base ti m Sia pãŋa bõna la ẽ,
ti a mõole sira, la sela n mase mam yem bõ buuri wuu.

¹⁹ A kãn wẽ'era nõke'ene, la a kãn zebra.

La nẽra kãn wõm a kõa soroworo zuto.

²⁰ A kãn ko'oge mõi-seka n ko'oge la ba'ase.

La a kãn kĩŋe fitla göngõŋo la n diti fẽfẽ la ba'ase,
halì ti la ka paage wakat-seka ti a wun boti sira, la sela n mase to'oge zẽ'a wuu.

²¹ Ti buuri la wuu wun te'lege ẽ.»

Azezi pãŋa gãnni Asũtãana

(Amarki 3:20-30, Aluki 11:14-23; 6:43-45)

²² Ti ba tarì nẽra ayila ti kulkã'arga doli ẽ, ti a dena fua la muko wa'am Azezi zẽ'am, ti Azezi boti a yẽ ìmã'asum, togra dee yẽta.

²³ Ti la di'ige nẽr-kuuŋo la wuu, ti ba yeti: «Bura-ẽna wã kãn dena naba Adavidi yuŋa la?» ²⁴ Ti Farisi dõma

wõm bela, yele yeti: «Bura-ẽna tarì la Abelzebuli n de kulkã'arsì naba la pãŋa digra kulkã'arsì la.» ²⁵ Ti Azezi bãŋe ban tẽ'esrì se'em na, yele ba yeti: «So'olum seka woo nẽrba n welge wẽrge zebra la taaba, so'olum na wun sã'am me. La tẽn-seka woo, bu yi-seka woo nẽrba n welge zebra la taaba, a wun wõrge me. ²⁶ La Asũtãana sãn digra Asũtãana, a welge me zebra la a mẽŋa. Bela, a so'olum na kãn tã'age ze'ele. ²⁷ Yãma n yeti mam digri kulkã'arsì la Abelzebuli pãŋa la, yãma nẽrba tarì la әне pãŋa digra kulkã'arsì? Bela, ya nẽrba la mẽŋa n wun pa'ale ti ya ka tarì buuro. ²⁸ La de la Nawẽnne Sia pãŋa ti mam tarì digra kulkã'arsì, bela pa'ale ti Nawẽnne n wa'am wa dita na'am ya tẽŋasuka.

²⁹ Nẽra ka tã wun kẽ pãŋa dãana yire vaage a looro, sãn dagna ti a dẽŋe lu pãŋa dãana la me dee yãŋa vaage a looro la.

³⁰ Seka n ka boe la mam, sisri mam me. La seka n ka lagum na mam lagsra, a wurgrì me. ³¹ Bela n soe ti mam yele ya yeti, tõon-be'ero wuu, la po'ore yetoga wuu ti nẽrsaalba itì la, Nawẽnne tã wun base ba taale. La seka n toge po'oge Nawẽnne Sia, a kãn base ẽ taale. ³² La nẽr-seka n togrì Nẽrsaala Dayua la toge-be'ero, a wun base ẽ taale. La seka n togrì Nawẽnne Sia la toge-be'ero, Nawẽnne kãn malun base ẽ taale dũnia ẽna wã puam, la dũni-seka n sëm na puam.

³³ Ya sãn yeti, tia ãn sõŋa, ya yeti a biẽ ãn sõŋa. Bu ya sãn yeti, tia de ti-be'ego, ya yeti a biẽ mẽ de la biẽ be'ero. Se'ere n soe la, tia biẽ n boti ba bãŋra ẽn de ti-seka. ³⁴ Yãma ãn wu kãmpẽesi buuri, yãma n de nẽr-be'esi wãna wã, ya wun ẽŋe la wãne toge toge-sõma? Se'ere n soe la, sela n zo'oge sũure puam na ti nõore togrì. ³⁵ Nẽr-sõŋo togrì la bõn-sõma ti a tarì a sũure puam. La nẽr-be'ego togrì la bõn-be'ero ti a tarì a sũure puam. ³⁶ Mam yeti ya ti sarıyadia daare, nẽrsaalba wun ka toge yetog-yaalsì ti ba toge la wuu yelle Nawẽnne nẽŋam. ³⁷ La de la fu yetoga puam ti fu wun yẽ buuro, la, la de la fu yetoga puam ti fu wun koŋe buuro.»

Nẽrba boori ti ba yẽ bõn-yãlma

(Amarki 8:11-12, Aluki 11:29-32)

³⁸ Azezi n toge bela la, ti loo karẽnsãandõma, la Farisi dõma yele ẽ yeti: «Karẽnsãama, tõma boori ti fu ẽŋe la bõn-yãlma n pa'ale ti fõn ze'ele la Nawẽnne zẽ'am ti ti yẽ.» ³⁹ Ti a yele ba yeti: «Zamãan-ẽna wã nẽrba n de nẽr-be'esi, dee ka dõla Nawẽnne la sira la, boori ti ba yẽ la bõn-yãlma n wun pa'ale Nawẽnne pãŋa, la ba kãn yẽ bõn-yãlma, sãn dagna bõn-yãlm-seka n yuun ẽŋe Nawẽnne nõto'wsa Azonaasi la. ⁴⁰ Wu Azonaasi n yuun boe zũn-kãte la puurum dabsa atã wuntẽŋa la yu'uŋo la, bela Nẽrsaala Dayua la mẽ wun bõna yowgo puam na dabsa atã, wuntẽŋa la yu'uŋo. ⁴¹ Sarıyadia daare, Niniivi dõma wun isge zerge zamãan-ẽna wã dõma me ba tõon-be'ero la ãyã. Se'ere n soe la, Azonaasi n yuun

mōole Nawēnne yetoga bo ba la, ba yuun teege yem me base tōon-be'ero. La nēra n gānni Azonaasi n boe kalam, dee ti yāma ka teege yem. ⁴² La sarlyadia daare, na-pɔka la n yuun yese wēntulle gɔbga bɔba la, wun isge me zerge zamāan-ēna wā nērba ba tōon-be'ero la iŷā, se'ere n soe la, a daan ze'ele la zē'a n zāage wa'am wa selse naba Asalomō yem yetoga. La nēra n gānni Asalomō n boe kalam, dee ti yāma ka selsra ē.»

Kulkā'arga n yese dee leme makre

(Aluki 11:24-26)

⁴³ Azezi le yetu: «Kulkā'arga sān yese dee base nēra, a sēŋe la pɔgēntusi puam ka ɛera zē'a ti a vo'ose, la a sān ka yē, ⁴⁴ a yetu me ti: «Mam wun lebe la m yi-seka ti m yese dee base la puam.» La a sān lebe ka paage yē ti deego la de la voore, puse malge āna sōŋa, ⁴⁵ a wun lebe me ka taru kulkā'arsi bayopɔi n de wēensi gānna ēŋa, wa'am wa kē bɔna mī. La nēra la toogo wun gān-na kurum toogo la. La mē wun dena la bela bo za-māan-ēna wā nēr-be'esi la.»

Azezi ma, la a yibsi

(Amarki 3:31-35, Aluki 8:19-21)

⁴⁶ Azezi daan ken togra la nēr-kuuŋɔ la, ti a ma, la a yibsi daan ze yēŋa bɔɔra ti ba toge la ē. ⁴⁷ Ti nēra ayila yele ē yetu: «Fu ma, la fu yibsi n wāna n ze yēŋa bɔɔra ti ba toge la fɔ.» ⁴⁸ Ti Azezi yele seka n togru la ē na yetu: «Āne n de mam ma, la āndōma n de mam yibsi?»

⁴⁹ Dee tēge a nu'ugo pa'ale a karēnbiisi la yetu: «Mam ma, la mam yibsi n wāna. ⁵⁰ Nēr-seka woo n uti mam So Nawēnne n boe saazuum n boori se'em, ēŋa n de mam yibga, la mam tā, la mam ma.»

Kaara n lobge a bōnbuuri makre

(Amarki 4:1-9, Aluki 8:4-8)

13 Daar-ēŋa, Azezi yese yire sēŋe ka zēa la mōgre la nōorum. ² Ti nēr-kuuŋɔ zozo'e lagse a zē'am, ti a kē ōorŋɔ la puam zī'ire, dee ti nēr-kuuŋɔ la ze mōgre la nōorum. ³ Ti a make magsa toge yela zozo'e bo ba yetu: «Kaara n daan yese ti a lobge a bōnbuuri. ⁴ La ēn lobgru bōnbuuri la, baseba lui la sore nōorum, ti niinto wa'am wa di ba. ⁵ Ti baseba lui tāmpīa zuo, zē'a ti tēntōnnɔ ka zo'oge. Tēntōnnɔ n ka zo'oge la iŷā, ba yese la toɔɔ. ⁶ Ti wunteŋa yēke wē ba, ti ba ki, ba yēga n ka kē tēŋa la iŷā. ⁷ Ti baseba lui gō'osi zē'a, ti gō'osi la yese fure ba. ⁸ Ti baseba lui zē'e-sōŋɔ zē'a, wɔm biē. Baseba wɔm na biē kɔbga kɔbga, ti baseba wɔm pisyoo-byoobi, baseba pitā-tā. ⁹ Seka n wōm yetoga wā, a selse sōŋa sōŋa.»

Sela n soe ti Azezi make magsa la

(Amarki 4:10-12, Aluki 8:9-10)

¹⁰ Ti a karēnbiisi la lem ē soke yetu: «Bēm iŷā ti fōn makra magsa togra bɔ'ɔra ba?» ¹¹ Ti a lerge ba yetu: «Nawēnne boti yāma bāŋe a so'olum yelle n suge la me. La a ka boti bāma bāŋe. ¹² Seka n taru wun to'oge pa'ase, ti la zo'oge. La seka n ka taru, baa sela ti a taru fēe la, ba wun to'oge ē. ¹³ Bela iŷā ti mam magsra magsa togra bɔ'ɔra ba, se'ere n soe la, ba bɔsɔ me, dee ka yēta, wōnna, dee ka bāŋra a vōore. ¹⁴ Nawēnne nōtɔ'ɔsa A'ezayi n yuun yele se'em na uti la bāma le. A yuun yetu:

«Ya wun wōm,

la ya kān bāŋe a vōore,

ya wun bɔse,

la ya kān yē.

¹⁵ Se'ere n soe la,

nēr-bāna putē'era ka like,

ba li ba tuba me,

dee mūm ba nini,

ti ba nini da yē,

ti ba tuba da wōm,

ti ba da wōm a vōore.

Sān dagi ni bela,

ba wun teege ni yem

leme wa'am mam zē'am,

ti m bo ba laafe.»

¹⁶ La, la sān dena yāma, ya taru zu-yēlga, yāma taru la nini n yēti, dee tara tuba n wōnni. ¹⁷ Mam yetu ya la sira, ti Nawēnne nōtɔ'ɔsɔɔba, la nēr-sōma zozo'e yuun boori ti ba yē yāma n yē sela la me, la ba ka yē, ba yuun boori ti ba wōm sela ti yāma wōm na me, la ba ka wōm.»

Azezi pa'ale bōnbuuri makre la vōore

(Amarki 4:13-20, Aluki 8:11-15)

¹⁸ «Bela, selse-ya seka n lobge bōnbuuri la makre la vōore. ¹⁹ Sore la nōorum ti bōnbuuri seba lui la, ān wu nēr-seka n wōm Nawēnne so'olum kō-yēlga la, dee ka bāŋe a vōore. Ti Asūtāana n de tōon-be'ero dāana la wa'am wa yese yetoga la a sūure puam. ²⁰ Tāmpīa zuo ti bōnbuuri seba lui la, ān wu nēr-seka n wōm kō-yēlga la, to'oge ē bilam mēŋa la sū-yēlga. ²¹ La ban ka kē a sūure puam na iŷā, a sake la wakate fēe. La toogo bu nāmsoɔ sān paage ē Nawēnne yetoga la iŷā, a basɔ me toɔɔ. ²² La gō'osi la zē'a ti bōnbuuri seba lui la, ān wu nēr-seka n wōm Nawēnne so'olum kō-yēlga la, ti a yem yɔɔra la dūnia wā yela, ti bōntarsōm yela pā'asra ē, boti yetoga la ka tāna wun wɔm biē a sūure puam. ²³ La zē'e-sōŋɔ la ti bōnbuuri seba lui la, ān wu nēr-seka n wōm Nawēnne kō-yēlga la, wōm a vōore, wōnna biē.

Ti baseba wɔm kɔbga kɔbga, ti baseba pisyoob-yoobi,
ti baseba pitā-tā.»

Kanarsɩ makre

²⁴ Azezi le make la makre ayɩla bɔ ba yeti: «Nawēnne so'olum ān wu buraa n bure si sōma a va'am. ²⁵ Tɩ wēnne kē, tɩ nērba gā gīsra, tɩ a bɛ tarɩ kanarsɩ sēŋe ka bure lagum mī. ²⁶ Tɩ si la yese bɩ waage. Tɩ kanarsɩ la mē waage, tɩ ba yē tɩ ba dagɩ si. ²⁷ Tɩ tōntōnɩba la sēŋe va'am na dāana zē'am ka soke ē yeti: «Zuudāana, dagɩ si sōma tɩ fōn daan bure fu va'am na? La bēm tɩ kanarsɩ bɔna mī zozo'e?» ²⁸ Tɩ a yele yeti: «La de la mam bɛ n ēŋe bela.» Tɩ tōntōnɩba la soke ē yeti: «Fōn boori tɩ tɩ sēŋe ka vō kanarsɩ la mɛ bu?» ²⁹ Tɩ a yele ba yeti: «Ayɛi, ya sǎn vō kanarsɩ la, ya wun po vō la si. ³⁰ Base-ya tɩ ba wuu bɩ ka paage bōnkɔɔla lagsɔ wakate, tɩ mam wun yele seba n lagsɩ bōnkɔɔla la tɩ ba dēŋe vō kanarsɩ la, bobe ba yō bugum, dee yāŋa lagsɛ si la dɩge m bāare puam.» »

Sɔ'ɔɔ biire, la dābille makre

(Amarkɩ 4:30-32, Aluki 13:18-21)

³¹ Azezi le make la makre ayɩla bɔ ba yeti: «Nawēnne so'olum ān wu sɔ'ɔɔ biire tɩ buraa bure a va'am. ³² A āna pɩka pɩka gǎnna bōnbuuri la wuu biɛ, la ba sǎn bure ē, a bitɩ mɛ gǎnna zēvōɔɔ buuri wuu, āna wu tɩa la, tɩ niinto sēna tɛ'era ba tugɔ a wila zuo.»

³³ La a le make la makre ayɩla bɔ ba yeti: «Nawēnne so'olum ān wu dābille tɩ pɩka dɩke ēŋe borborɩ zom la-kāra batā puam wē, tɩ dābille la botɩ ba wuu uke.»

Sela n soe tɩ Azezi magsra magsa

(Amarkɩ 4:33-34)

³⁴ Bela wuu Azezi magsɩ la magsa tɔgra bɔ'ɔra nēr-kuuŋɔ la, a ka tɔge yetɔga bɔ ba, tɩ la sǎn dagna magsa. ³⁵ A ēŋe bela tɩ Nawēnne nōtɔ'ɔsa n yuun gulse se'em na n ēŋe. A yuun yeti: «Mam wun make la magsa tɔge bɔ ba, mam wun pa'alɛ yel-seba n sugɛ halɩ dūnia pɩ'iluŋo wakate wa paam lɛɛɛ wā.»

Azezi pa'alɛ si, la kanarsɩ la makre vōore

³⁶ Azezi daan base nēr-kuuŋɔ la mɛ, dee kule yire. Tɩ a karēnbiisi wa'am wa yele ē yeti: «Pa'alɛ tɔ kanarsɩ la makre vōore.» ³⁷ Tɩ a yele ba yeti: «Seka n bure si sōma la, de la mam n de Nērsaala Dayua la. ³⁸ La va'am na de la dūnia, tɩ si sōma la dena Nawēnne so'olum nērba. Tɩ kanarsɩ la dena Asūtāana nērba. ³⁹ Tɩ bɛ la n bure kanarsɩ la dena Asūtāana. Tɩ bōnkɔɔla lagsɔ wakate la dena dūnia ba'asɔ. Tɩ seba n lagsɩ bōnkɔɔla la dena Nawēnne malekadōma. ⁴⁰ Ban lagsɛ kanarsɩ la lobe base bugum puam se'em na, la wun ēŋe la bela mē dūnia ba'asɔ. ⁴¹ Nērsaala Dayua la wun tōm na a malekadōma tɩ ba lagsɛ seba n pǎ'ase nērba tɩ ba base

Nawēnne sore, la tōon-be'ero dōma wuu, yese ba Nawēnne so'olum puam, ⁴² lobe ba base bugum puam. Zē'e-seka tɩ ba wun kella, dee dɩke ba nu'usi gɩ nōorum. ⁴³ La nēr-seba n ēŋe sela n mase wun yēgra ba Sɔ Nawēnne so'olum puam wu wuntɛŋa la. Seka n wōm yetɔga wā, a selse sōŋa sōŋa.»

Bōn-sōŋa n gǎnnɩ wuu makre

⁴⁴ Azezi le yele ba yeti: «Nawēnne so'olum ān wu tuulum bōnɔ tɩ ba dɩke sugɛ va'am puam, tɩ nēra yē ē. Tɩ a sūure ēŋe yēlum, tɩ a le sugɛ ē pa'ase, dee sēŋe ka koose ēn tarɩ sela wuu, sēŋe ka da va'am na.

⁴⁵ Nawēnne so'olum le āna wu lɛɛba n eeri kug-sōma n de tuulum bōnɔ tɩ a da. ⁴⁶ La a yē la ayɩla n ba āna sōŋa tɩ a ligri zo'oge, tɩ a lebe kule ka koose ēn tarɩ sela wuu, sēŋe ka da ē.»

Yuka makre

⁴⁷ «Nawēnne so'olum ken āna wu yuka tɩ ba lobge ko-kāte puam yōge zūma buuri wuu, ⁴⁸ tɩ yuka la pɩɛ. Tɩ ba ve'ege ē dooge doone, gāse zūn-seba n ān sōŋa ēŋe pɩtɔ puam, dee lobe seba n ka ān sōŋa la base.

⁴⁹ La wun āna la bela dūnia ba'asɔ wakate. Malekadōma n wun wa'am wa gāse nēr-be'esi, nēr-sōma la puam, ⁵⁰ lobe ba base bugum puam, zē'e-ēŋa tɩ ba wun kella, dee dɩke ba nu'usi gɩ nōorum.»

⁵¹ Azezi tɔge bela, dee soke ba yeti: «Yāma wōm bela wuu vōore?» Tɩ ba lerge ē yeti: «Ēe.» ⁵² Tɩ a yele ba yeti: «Nēr-seka woo n de lɔɔ karēnsāama dee zāsum Nawēnne so'olum yelle pa'ase, ān wu yidāana n loori bōn-kegsɩ, la bōn-paalsɩ a bōntarsōm puam bɔ'ɔra nērba.»

Nazaretɩ nērba ka bɔ Azezi sɩra

(Amarkɩ 6:1-6, Aluki 4:16-30)

⁵³ Azezi daan magsɛ magsa la kɩ'ulum, dee fōrge bilam sēŋe la a mēŋa tēŋa. ⁵⁴ La ēn paage a mēŋa tēŋa la, a kē la ba wēndeego puam zāsna nērba, tɩ a zāsɔ la di'ige nērba la, tɩ ba yeti: «A yē yem ēna la bɛ? A ēŋe la wāne tōnna tōon-yālma wā? ⁵⁵ Dagɩ ēna n de dɔ-wāta la dayua la? Dagɩ ēna ma yu'ure n de Amaari la, tɩ a yɩbsɩ dena Azakɩ, la Azozefu, la Asimō, la Azudi la?

⁵⁶ Dagɩ a tāpa wuu n boe tɩ zē'am wā? A yē bōn-bāma wuu la bɛ?» ⁵⁷ Bela tɩ ba daan ka bɔ ē sɩra. Tɩ Azezi yele ba yeti: «Nawēnne nōtɔ'ɔsa yeti pēka mɛ, sǎn dagna a mēŋa tēŋa, la a yir-dōma tēŋasuka mā'a tɩ a ka yeti pēka.» ⁵⁸ A daan ka tōm tōon-yālma zozo'e bilam, ban ka bɔ ē sɩra la ūyā.

Azā kūm yelle

(Amarkɩ 6:14-29, Aluki 9:7-9)

14 Wakat-ēŋa tɩ Galile naba A'erɔɔɩ daan wōm ban tɔgrɩ Azezi yelle, ² tɩ a yele a tōntōnɩba yeti: «Ēna

de la Azā n daan misri nērba ko'om puam na n vo'oge. La de la bela n soe ti a tara pāṇa tōnna tōon-yālma.»

³ Se'ere n soe ti a yele bela la, A'erodl mēṇa n daan boti ba yōke Azā lu tarl ka kē'esē yu'a deem a kēema Afilipi pōga A'erodladl īyā. ⁴ Se'ere n soe la, A'erodl daan fāage la Afilipi pōga di, ti Azā daan yele ē yeti: «La ka mase ti fu fāage ē di.» ⁵ A'erodl daan boori ti a ku Azā mē, dee zōta tēṇa la nērba, se'ere n soe la, ba tē'esē ti Azā de la Nawēnne nōtō'wasa.

⁶ La A'erodl daan wa ita la a dōka daare kibsa, ti A'erodladl pōyua wa nērba nēṇam, ti A'erodl sūure ēṇe yēlum hal zozo'e, ⁷ ti a pōl yele pugla la yeti, bōn-sēka wuu ti a wun sose, ēṇa wun bō ē. ⁸ Ti a ma boti a yele naba A'erodl yeti: «Dike Azā n mise nērba ko'om puam na zuugo ēṇe la-pesṇa puam bō mam kalam.» ⁹ Ti naba la sūure sā'am, la ēn pōl la īyā, la sāama la īyā, ti a bō nōore yeti ba bō pugla la ēn boori sela la. ¹⁰ Dee tōm nēra ti a sēṇe yu'a deem ka wike Azā zuugo. ¹¹ Ti a sēṇe ka wike zuugo la ēṇe la-pesṇa puam tarl ka bō pugla la, ti a to'oge ka bō a ma. ¹² Ti Azā karēnbiisi wa'am wa dike kūm na ka laage, dee sēṇe ka yele Azezi.

Azezi bō nēr-kuuṇṇ dia

(Amarkl 6:30-44, Aluki 9:10-17, Azā 6:1-14)

¹³ Azezi n daan wōm bela la, a kē la ḏorṇṇ fōrge we'esa kēnkēṇa, zē'a ti nērba ka boe. Ti nēr-kuuṇṇ la bāṇe, ze'ele tēnsi puam babse ē la nāma. ¹⁴ Ti Azezi paage ze'ele ḏorṇṇ la zuo sige, yē nēr-kuuṇṇ la, ti ba ninbāalga yōke ē, ti a boti ba bā'adōma yē īmā'asum. ¹⁵ Ti zaanōore paage, ti karēnbiisi la lem Azezi yele ē yeti: «Zē'a wā de la mōom, dee ti wēnne kē'era, bela boti nērba la sēṇe tēnsi la puam ka da dia di.» ¹⁶ Ti Azezi yele ba yeti: «La ka de pēgrē ti ba sēṇe, ya mēṇa bō ba dia.» ¹⁷ Ti ba lerge ē yeti: «Tōma tarl la borbori banuu, la zūma bayi mā'a.» ¹⁸ Ti Azezi yele ba yeti: «Tarl-ya ba wa'am wa bō ma.» ¹⁹ Dee boti nēr-kuuṇṇ la zī'ire mōorō zuo. Ti a dike borbori banuu, la zūma bayi la, gorge bise saazuum pu'use Nawēnne, dee fiise borbori la bō a karēnbiisi la ti ba pui nēr-kuuṇṇ la, ti ba to'oge pui ba. ²⁰ Ti ba wuu di tiḡe, dee ti karēnbiisi la vaage bōn-gito n deege pūe pūto pia la ayi. ²¹ Seba n daan di dia la, buraasi daan de wu tusanuu, ti pōgsi la kōma källe ka pa'ase.

Azezi sēnni ko'om zuo

(Amarkl 6:45-52, Azā 6:15-21)

²² Bela poorum ti Azezi base a karēnbiisi la ti ba kē ḏorṇṇ dēṇe ē dōra mōgrē la doone ke bōba, dee ti a mēṇa weege ti a keese nēr-kuuṇṇ la. ²³ Ēn daan keese nēr-kuuṇṇ la ki'ulum na, a sēṇe la kēnkēṇa ka zom tāṇa zuo ti a pu'use Nawēnne. Ti wēnne kē, ti ēṇa ayula mā'a bōna mī. ²⁴ La ḏorṇṇ la daan boe la mōgrē la

puam zāazāare, ti ko-mī'isi wē'era ē, ti ba nāmsra, se'ere n soe la, kusebgo n vugri tu'usra ba. ²⁵ Ti beere yōna wiire, ti Azezi sēnna ko'om na zuo we'esa a karēnbiisi la bōba. ²⁶ Ti karēnbiisi la yē ti a sēnni ko'om na zuo, ti ba palēṇa ēke, ti ba yeti: «A de la ki-isgne.» Ti dabeem yōke ba, ti ba kaasra tagursi. ²⁷ Bilam mēṇa ti Azezi yele ba yeti: «Kerje-ya ya sūure, la de la mam, da zoe-ya dabeem.» ²⁸ Ti Apyeeri yele yeti: «Zuudāana, la sān sūri dena la fōn, bō mam nōore ti m sēṇe ko'om na zuo wa'am fu zē'am.» ²⁹ Ti Azezi yele ē yeti: «Wa'am.» Ti Apyeeri yese ḏorṇṇ la puam sēnna ko'om na zuo we'esa Azezi zē'am. ³⁰ La Apyeeri bise la kusebgo la n vugri zo'oge la, ti dabeem yōke ē. Ti a bōna mī ti a mise, kaase yeti: «Zuudāana, fāage ma.» ³¹ Ti Azezi dare tēge nu'ugo gure ē dee yeti: «Fu ka bō mam sūra zo'oge, bēm ti fu yem yōkra?» ³² Ti ba kē ḏorṇṇ la puam, ti kusebgo la go'oge. ³³ Ti karēnbiisi la n boe ḏorṇṇ la puam na ka dūma Azezi nēṇam yeti: «Fōn sūri de la Nawēnne Dayua la.»

Azezi boti bā'adōma yē īmā'asum Zenezareti

(Amarkl 6:53-56)

³⁴ Ti ba pārge mōgrē la dooge paage Zenezareti tēṇa. ³⁵ Ti zē'e-ēṇa nērba bāṇe Azezi, tōm nērba tēn-seba n lem na wuu, ti ba tarl bā'adōma wuu wa'am a zē'am. ³⁶ Ba daan sose ē yeti a base ti bā'adōma la kalum a fuugo nōore mā'a. La seba wuu n daan kalum a fuugo la yē īmā'asum mē.

Yaabdōma zāsṇṇ, la sela n boti nēra dena dēgrō

(Amarkl 7:1-23)

15 Ti Farisi dōma, la lōṇ karēnsāandōma n ze'ele Zerizalem wa'am wa soke Azezi yeti: ² «Bēm ti fōn karēnbiisi la ka sakra ti yaabdōma malṇṇ la? Ba sān yeti ba di, ba ka peeri nu'usi wu ti yaabdōma n uti se'em na.» ³ Ti a lebe soke ba yeti: «Bēm ēṇe ti yāma mē si'usra Nawēnne nōore la, ya mēṇa malṇṇ īyā? ⁴ Nawēnne yeti: «Nanna fu sō, la fu ma.» Dee le yeti: «Sēka n tōge a sō bu a ma be'em, dēni ti ba ku ē.» ⁵ La yāma yeti, nēra sān yele a sō bu a ma yeti: «Mam n tarl n bōn-sēka ti m sōṇe fō la, de la Nawēnne bōn», la ka le dena ti a ēṇe sela bō a sō. ⁶ Bela, ya basri ti Nawēnne yetōga la lebge la zāṇa, dee dōla ya mēṇa malṇṇ. ⁷ Pulibsum dōma wā, Aezayi yuon sūri to'oge Nawēnne yetōga tōge ya yelle, ti Nawēnne yeti: ⁸ «Nēr-bāna wā pēgrī mam na ba nōore yetōga, la ba sūure zāage la mam mē. ⁹ Ban nā'asri mam na, la de la zāṇa. Se'ere n soe la, ba zāsni na zāsṇṇ n de nērsaalba lōṇ.» ¹⁰ La Azezi wi nēr-kuuṇṇ la, ti ba wa'am na a zē'am, ti a yele ba yeti: «Selse-ya sōṇa sōṇa wōm a vōore: ¹¹ La dagl sela n kē'eri nērsaala nōorum n boti a dena dē-

grɔ, la de la sela n ze'etu nērsaala nōorum yesra n boti a dena dēgrɔ.»

¹² Bela ti a karēnbiisi la lēm ē, soke ē yeti: «Fōn mi ti Farisi dōma la n wōm fōn tɔge bela la, la dōn ba sūure mē?» ¹³ Ti Azezi lerge yeti: «Sela woo ti mam So Nawēnne ka bure, ba wun vōoge ē base. ¹⁴ Base-ya ba, ti ba ān wu fɔɔsi n ve'eri fɔɔsi. Fua sān ve'era fua, bā-ma bayi wuu wun lui la boko puam.»

¹⁵ Ti Apiyēri yele ē yeti: «Pa'ale tɔ makre la vōore.» ¹⁶ Ti Azezi soke ba yeti: «Yāma yem mē ka like? ¹⁷ Yāma ka mi ti bōn-seka woo n kē'eri nērsaala nōorum tolli la a puurum, ti a yē'era ba basra? ¹⁸ La sela n yesri nērsaala nōorum ze'ele la a sūure puam, la de la bōn-bā-ma n boti a dena dēgrɔ. ¹⁹ Se'ere n soe la, putē'e-yooro ze'etu la nērsaala sūure puam boti a bɔɔra ti a ēnɛ be'em: Nēr-kua, la yalsi, la taaba pɔgba la taaba surba gā'a, la nayigum, la pōmpɔrɔ, la pɔ'ɔre yetɔga. ²⁰ La de la bāna wā n dēgrɔ nērsaala. La nēra sān di dee ka peege nu'usi, bela ka dēgrɔ nēra.»

Kanaan pɔka bɔ Azezi sura

(Amarki 7:24-30)

²¹ Azezi daan fōrge bilam sēnɛ la Tiiri, la Sidō so'olum. ²² Ti Kanaan pɔka ze'ele tēn-bāma wa'am a zē'am wa tɔgra ke'enke'em yeti: «Zuudāana, Adavidi yuɔa, zoe m ninbāalga, mam pɔyua ti kulkā'arga nāmsra ē halɔ zo-zo'e.» ²³ Ti Azezi ka lerge ē se'ere. Ti a karēnbiisi la paage a zē'am yele ē yeti: «Ēnɛ bɔ ē ti a fōrge, ti a kaasri dɔla tɔ.» ²⁴ Ti Azezi lerge ba yeti: «Nawēnne tōm mam na lsrayeli dōma n ān wu piisi n bɔi la mā'a zē'am.» ²⁵ Ti pɔka la paage ka dūma tēnɛ a nējam yele ē yeti: «Zuudāana, sōnɛ ma.» ²⁶ Ti Azezi lerge yeti: «La ka mase ti ba dɔke koma dia bɔ baasi.» ²⁷ Ti pɔka la lerge yeti: «Zuudāana, la de la sura. La baasi diti la di-zōra n luti ba dāana taabli tilum.» ²⁸ Ti Azezi lerge ē yeti: «Pɔka, fu bɔ mam sura zo'oge mē. La wun ēnɛ wu fōn boori se'em na bɔ fɔ.» La wakat-ēnɛ mēnɛ ti a pɔyua la yē īmā'asum.

Azezi boti nērba zozo'e yē īmā'asum

²⁹ Azezi daan ze'ele bilam sēnɛ la Galile mōgre la nōorum, ka zom tānɛ zuo zēa. ³⁰ Ti nēr-kuuɔɔ zozo'e tarɔ kɔɔrɔ, la fɔɔsi, la kobro, la mugro, la bā'adōma baseba zozo'e wa'am Azezi nējam. Ti Azezi boti ba yē īmā'asum. ³¹ La nērba la n daan yē mugro la n tɔgrɔ, ti kobro la yeege, ti kɔɔrɔ na sēnna, ti fɔɔsi la yēta la, la daan di'ige ba mē, ti ba pēgra Nawēnne n de lsrayeli dōma Zuudāana la.

Azezi le bɔ nēr-kuuɔɔ dia

(Amarki 8:1-10)

³² Azezi daan wi a karēnbiisi la mē yele ba yeti: «Nēr-kuuɔɔ wā ninbāalga n tarɔ mam, se'ere n soe la, la de

la dabsa atā n wāna ti ba boe mam zē'am, dee ka tara dia wun di. La mam ka boori ti m base ba ti ba kule la kɔm, ba tā wun ka vibe sore mē.» ³³ Ti a karēnbiisi la soke ē yeti: «Ti wun yē dia la bē, zē'e-ēna n de mōom wā, bɔ nēr-kuuɔɔ wā wuu ti la seke ba?» ³⁴ Ti Azezi soke ba yeti: «Yāma tarɔ la borborɔ balē?» Ti ba lerge yeti: «Bayopɔi, la zūn-pɔgsɔ fēe.» ³⁵ Ti Azezi yele nēr-kuuɔɔ la yeti, ba zī'ire tēnɛ. ³⁶ Dee dɔke borborɔ bayopɔi la, la zūma la pu'use Nawēnne, dee fiise bɔ a karēnbiisi la, ti ba to'oge puɔ nēr-kuuɔɔ la. ³⁷ Ti ba wuu di tɔge, dee ti ba vaage bōn-gito n deege pɔre pɔtɔ bayopɔi. ³⁸ Seba n daan di dia la, buraasi de la tusa anaasi, ti pɔgsɔ la koma källe ka pa'ase. ³⁹ Bela poorum, Azezi base nēr-kuuɔɔ la ti ba kule mē, dee kē ōorɔɔ sēnɛ Magdala.

Farisi dōma, la Saduse dōma pulibsum

(Amarki 8:11-21, Aluki 12:54-56)

16 Ti Farisi dōma, la Saduse dōma baseba wa'am Azezi zē'am wa bɔɔra ti ba make ē bise, yele ē yeti, a ēnɛ bōn-yālma pa'ale ti ēnɛ ze'ele la Nawēnne yire. ² Ti Azezi lerge ba yeti: «Zaanōore, sawara sān mō'oge, yāma yeti saaga kān ni. ³ La bulika, sawara sān mō'oge sobge, yāma yeti saaga n wun ni. Yāma bɔsɔ la sawara mina la ān se'em, dee ka tāna wun bānɛ bōn-seba n uti lēle wā n pa'alɔ sela. ⁴ Zamāan-ēna nērba n de nēr-be'esɔ, dee ka dɔla Nawēnne la sura la, boori ti ba yē la bōn-yālma, la ba kān yē bōn-yālma, sān dagna Nawēnne nōtɔ'ɔsa Azonaasi bōn-yālma la.» La a base ba mē dee fōrge.

⁵ Ti ēnɛ la a karēnbiisi la dɔɔra mōgre la doone ke bɔ-ba, ti a karēnbiisi la yīm ka dɔke borborɔ. ⁶ Ti Azezi yele ba yeti: «Guuse-ya ya mēnɛ la Farisi dōma, la Saduse dōma dābille la.» ⁷ Ti karēnbiisi la tē'esra yeti: «Tōma n ka dɔke borborɔ la īyā ti a yele bela.» ⁸ Ti Azezi bānɛ ban tē'esri se'em na, yele ba yeti: «Ya ka bɔ mam sura zo'oge. Bēm ti yāma tē'esra yeti, la de la yāma n ka tarɔ borborɔ la īyā? ⁹ Yāma nān ka bānɛ a vōore? Yāma ka tēri, borborɔ banuu la ti buraasi tusanuu daan di tɔge deege la, yāma daan vaage di-seba n daan deege la pɔre la pɔtɔ balē? ¹⁰ La borborɔ bayopɔi la, ti buraasi tusanaasi la daan di tɔge deege la, yāma vaage di-seba n deege la pɔre la pɔtɔ balē? ¹¹ Bēm ti ya ka bānɛ ti la dagɔ borborɔ yelle ti mam tɔgrɔ la ya? Guuse ya mēnɛ la Farisi dōma, la Saduse dōma dābille la yelle.» ¹² Ti ba yānɛ bānɛ ti a ka yele ba ti ba guuse ba mēnɛ la dābille seba ti ba tarɔ gaana borborɔ zom na, la de la Farisi dōma, la Saduse dōma zāsɔɔ la ti a tɔgrɔ.

Apiyēri pa'ale Azezi n de nēr-seka

(Amarki 8:27-30, Aluki 9:18-21)

¹³ Azezi daan paage la tēnɛ yu'ure n de Filipi Sezaare, soke a karēnbiisi la yeti: «Nērba yeti mam n de Nēr-

saala Dayua la de la āne?» ¹⁴ Tl ba lerge yetl: «Seba yetl fōn de la Azā n daan misri nērba ko'om puam na. Tl seba yetl fōn de la Nawēnne nōtō'wsa A'eli. Tl baseba yetl fōn de la Nawēnne nōtō'wsa Azeremi, bu Nawēnne nōtō'wsrība la nēra ayula.» ¹⁵ Tl a lebe soke ba yetl: «La yāma yetl mam de la āne?» ¹⁶ Tl Asimō-piyēerl lerge ē yetl: «Fōn de la Krisi, Nawēnne n de vōm dāana la Dayua.» ¹⁷ Tl Azezi lebe yele ē yetl: «Asimō, Azā dayua, fu tarl zu-yēlga, se'ere n soe la, la dagl nērsaala n pa'alē fu wāna, la de la mam So Nawēnne n boe saazu-um na. ¹⁸ Mam yetl fu tl fu de la Apyēerl, a vōore de la tāmpīa, la tāmpī-ēna zuo tl mam wun vigle m nērba lagsgo zē'a. La kūm pānja kām tā'age ē. ¹⁹ Mam wun bō fo Nawēnne so'olum kulnbiē. La bōn-seka woo tl fu wun lu dūnia wā zuo, bōn-ēnja wun lu Nawēnne yire. La bōn-seka woo tl fu wun lorge dūnia wā zuo, bōn-ēnja wun lorge Nawēnne yire.» ²⁰ Azezi yele bela dee kā'an a karēnbiisi la yetl, ba da yele nēra nēra tl ēnja de la Krisi.

Azezi dēnje tōge a kūm yelle

(Amarkl 8:31—9:1, Aluki 9:22-27)

²¹ Wakat-ēnja tl Azezi daan pōse zāsna a karēnbiisi la yetl: «Dēnl tl mam sēnje Zerizalem, tl tēnja la kēma, la kāabgo kēma nējadōma, la lōo karēnsāandōma ka nāmse mam hall zozo'e, la ba wun ku mam mē. La dabsa atā daare mam wun vo'oge.» ²² Tl Apyēerl tarl ē yese kēnkēnja ka yele ē yetl: «Zuudāana, da le tōge bela, Nawēnne wun gu fo, la kām ēnje fu bela.» ²³ Tl Azezi gelge yele Apyēerl yetl: «Lebe mam poorum, Asūtāana wā. Fōn boorl tl fu botl mam lebe la poorum. Fu tē'esgo la dagl Nawēnne tē'esgo, la de la nērsaala tē'esgo.»

²⁴ Dee yele a karēnbiisi la yetl: «Nēra sām bōora tl a dōla mam, dēnl tl a base a mēnja n boorl se'em, dee sake nāmsgo wu nēra n buke a kūm dō-puurja dōla mam. ²⁵ Se'ere n soe la, nēr-seka woo n boorl tl a gu a vōm, a wun koje ē. La nēr-seka woo n sake tl a koje a vōm mam īyā, a wun yē vōm. ²⁶ La nēra sām yē dūnia wā sela woo, dee koje vōm Nawēnne zē'am, a yōoro de la bēm? Sela ka boe tl nēra wun dīke teege vōm. ²⁷ Nērsaala Dayua la wun leme wa'am mē la a So Nawēnne na'am pānja, la a malēkadōma. La wakat-ēnja a wun yō nēra woo mase la a tōone. ²⁸ Mam yetl ya la sra, tl nēr-seba n ze kalam wā baseba kām ki, sām dagna tl ba wa yē la Nērsaala Dayua la n sēm, la a na'am.»

Azezi nēnja teere

(Amarkl 9:2-13, Aluki 9:28-36)

17 Dabsa ayoobl n daan tole, tl Azezi botl Apyēerl, la Azakl, la a ylbga Azā doose ē sēnje kēnkēnja ka zom tām-kāte zuo. ² Tl a nēnja teege ba nējam, yē-

gra wu wuntēnja la. Tl a futo pelge hall wu peelem na. ³ Tl Amoyisi la A'eli puke ba zē'am tōgra la Azezi. ⁴ Tl Apyēerl yele Azezi yetl: «M Zuudāana, tōma n boe kalam wā, la ān sōnja mē. Fu sām bōora, mam wun tī pōnsl batā, bō fōn ayula, bō Amoyisi ayula, bō A'eli ayula.» ⁵ La ēn nām ken bōna mī tōgra la, tl sawate n yē-grl wa'am wa lile ba. Tl kōa ze'ele sawate la puam yetl: «Ēna de la mam Dayua tl mam nōje la m sūure wuu, a paage la mam yem. Selse-ya a yetōga.» ⁶ La a karēnbiisi la n wōm bela la, tl dabeem yōke ba zozo'e, tl ba lui dīke nēnsl vōgle tēnja.

⁷ Tl Azezi lem kalum ba yetl: «Isge-ya, da zoe-ya dabeem.» ⁸ Tl ba gorge bīse, ka le yē nēra, sām dagna Azezi mā'a.

⁹ La ban daan ze'ele tēnja la zuo sigra la, Azezi kā'an ba yetl: «Da yele-ya nēra sela tl ya yē wā, sām dagna tl Nērsaala Dayua la wa ki mē dee vo'oge.» ¹⁰ Tl a karēnbiisi la soke ē yetl: «Wāne tl lōo karēnsāandōma yetl, dēnl tl A'eli wun dēnje Krisi wa'am?»

¹¹ Tl Azezi lerge ba yetl: «La de la sra tl A'eli n wun dēnje wa'am wa le malge sela woo. ¹² La mam yetl ya mē tl A'eli pōn wa'am mē, tl ba ka bānje ē, dee ēnje ē ban boorl se'em. Ba mē wun nāmse Nērsaala Dayua la bela.» ¹³ Tl a karēnbiisi la yānja bānje tl la de la Azā n daan misri nērba ko'om puam na yelle tl a tōge.

Kinki'ire n tarl bia, tl Azezi botl a yē īmā'asum

(Amarkl 9:14-29, Aluki 9:37-43)

¹⁴ Ban daan lebe ka paara nēr-kuorj la zē'am na, tl buraa wa'am wa yigle Azezi nējam, ¹⁵ yele ē yetl: «M Zuudāana, zoe m dayua ninbāalga, a luti la kinki'ire tl la nāmsra ē zozo'e. La sām ēn girge ē, a luti la bugum puam, bu ko'om puam. ¹⁶ Bela tl mam tarl ē wa'am fu karēnbiisi la zē'am, la ba ka yānje botl a yē īmā'asum.» ¹⁷ Tl Azezi yele ba yetl: «Zamāan-ēna nērba, ya ka bō'orl mam sra, la ya ka tti sōnja. Mam wun bōna la yā-ma, mā'age m mēnja hall ka paage la wakat-kāna? Tarl-ya bia la wa'am.» ¹⁸ La Azezi daan tāse kulkā'arga la mē, tl a yese dee base bia la, tl a yē īmā'asum bilam mēnja.

¹⁹ Tl karēnbiisi la sēnje Azezi zē'am bāma mā'a, ka soke ē yetl: «Bēm tl tōma ka yānje dige kulkā'arga la tl a yese?» ²⁰ Tl a lerge ba yetl: «Yan ka bō sra zo'oge la īyā. Mam yetl ya la sra sra, tl yāma n bō mam sra la, sām āna baa pika wu sō'orl biire la, ya tā wun yele tām-ēna yetl: «Vurge sēnje ke», la a wun ēnje la bela. La sela ka boe tl ya kām tā'age ēnje. [²¹ La de la pu'usgo, la nōorlua mā'a tl ya wun yānje dige kulkā'ar-ēnja buuri.]»

Azezi le tōge a kūm, la a vo'ore yelle

(Amarkl 9:30-32, Aluki 9:43-45)

²² Daare ayula tl Azezi la a karēnbiisi la lagum bōna Galile, tl a yele ba yetl: «Ba wun dīke Nērsaala Dayua la ēnje la nērba nu'usum, ²³ tl ba ku ē. La dabsa atā

daare a wun vo'oge me.» Ēn yele bela la, ti ba sūure sā'am zozo'e.

Wēnde-kāte lampo yua yelle

²⁴ Azezi la a karēnbiisi la daan paage la Kapernaum tēja, ti Wēnde-kāte la lampo-t'w'srība sēṇe ka soke Apɿyɛɛɾɿ yeti: «Ya karēnsāama la yw'w' Wēnde-kāte la lampo me bu?» ²⁵ Ti a lerge yeti: «Ēe, a yw'w'ra.» Ti Apɿyɛɛɾɿ kule yire, ti Azezi dēṇe soke ē yeti: «Asimō, fōn tē'srɿ ti dūnia wā na'adōma to'osrɿ ba lampo la āndōma zē'am? Tēja dōma zē'am bu, seba n de sāama la zē'am?» ²⁶ Ti Apɿyɛɛɾɿ yeti: «Sāama zē'am.» Ti Azezi yele ē yeti: «Bela, tēja la dōma nēja ka boe mī. ²⁷ La tōma n ka boori ti ti sā'am ba sūure la īyā, sēṇe ka lobge zūmbāṇa mōgre puam, fōn yōke zūn-seka yien na, fu ya'age a nōore, ti fu wun yē lag-kōbre, dɿke sēṇe ka yw' mam, la fōn īyā.»

Āne n wun dēna nēr-kāte Nawēnne so'olum puam

(Amarkɿ 9:33-48, Aluki 9:46-48; 17:1-2)

18 Wakat-ēṇa ti karēnbiisi la daan lēm Azezi soke ē yeti: «Āne n de nēr-kāte Nawēnne so'olum puam?» ² Ti Azezi wi bi-pɿka ze'ele ba tēṇasuka, ³ dee yele ba yeti: «Mam yeti ya la sɿra sɿra, ti ya sān ka teege yem āna wu kōma la, ya kān kē Nawēnne so'olum puam. ⁴ Bela, seka woo n sike a mēja āna wu bi-pɿka la, a wun dēna nēr-kāte Nawēnne so'olum puam. ⁵ La seka n to'oge bi-pɿka n ān wu ēna, mam yu'ure īyā, a to'oge la mam mēja.»

⁶ La nēra sān botɿ kōm-pɿgsɿ bāna wā n bɔ mam sɿra la ayɿla base Nawēnne sore, sɿbgre seka ti a wun yē la, ba sān dɿke nēere kug-kāte lu yulse a yugla lobe ē base ko-kāte puam n sōl.

⁷ Toogo boe dūnia zuo, nērba n pā'srɿ nērba ti ba basrɿ Nawēnne sore la īyā. Dēnɿ ti pā'asgɔ wa'am, la nēr-seka n pā'srɿ la wun yē toogo.

⁸ Fu nu'ugo bu fu nā'are sān yeti a botɿ fu base Nawēnne sore, wige ba base. Fu sān tara nu'u-yēṇɔ bu nā'a-yēṇɔ dee kē Nawēnne yire vɔa, n sōl fōn tarɿ nu'usi bayi, la nāma bayi, dee ti ba lobe fu base bugum n ka kɿṇri puam. ⁹ La fu nifo sān yeti a botɿ fu base Nawēnne sore, kɿrgē ē base. Fu sān tara nin-yēṇɔ dee kē Nawēnne yire vɔa, n sōl fōn tarɿ nini bayi, dee ti ba lobe fu base bug-tēja.»

Pesgo n bɔl makre

(Aluki 15:3-7)

¹⁰ Azezi le yele ba yeti: «Guuse-ya da pɔ'w'ra kōm-bāna wā baa ayɿla. Mam yeti ya ti ba malekadōma n boe Nawēnne yire, boe mam Sɔ Nawēnne nēṇam me wakate woo.

[¹¹ Nērsaala Dayua la wa'am ti a fāage la nēr-seba n bɔl la.]

¹² Yāma tē'srɿ la bēm? Nēra sān tara piisi kɔbga, ti ayɿla bɔl, a kān base piswei la aweɿ la kūnkūnne zuo ti ba ɔbra, dee sēṇe ka ē ayɿla n bɔl la? ¹³ La mam yeti ya la sɿra, ti a sān yē ē, a sūure wun ēṇe yēlum me la ayɿla la gānna piswei la aweɿ n ka bɔl la. ¹⁴ Ya Sɔ Nawēnne mē ān na bela, a ka boori ti kōm-pɿgsɿ bāna ayɿla bɔl.»

Nērba n wun malge ba yelle la taaba se'em

¹⁵ Ti Azezi le yeti: «Fu sɔbia sān ēṇe be'em, sēṇe ka yē ē fōn na ēṇa mā'a, pa'ale ē a tuure la. A sān sake fu nōore, fu to'oge ē base. ¹⁶ La a sān zagse fu nōore la, fu doose nēra ayɿla bu bayi sēṇe a zē'am. Ti nērba bayi bu batā dēna kaset-dōma yelle la māalgɔ īyā, wu Nawēnne gōṇɔ n yele se'em na. ¹⁷ La a sān zagse ka selse ba, fu yele wēndeego la nērba. La a sān zagse ka selse wēndeego la nērba, ya bɿsra ē wu nēra n ka dolɿ Nawēnne, bu tōon-be'ero dāana. ¹⁸ La mam yeti ya la sɿra sɿra, ti bōn-seka woo ti ya wun lu dūnia wā zuo, wun lu Nawēnne yire. La sela ti ya wun lorge dūnia wā zuo, wun lorge Nawēnne yire. ¹⁹ Mam ken yeta ya ti nērba bayi sān naage nōore dūnia wā zuo sose mam Sɔ Nawēnne sela, a wun ēṇe bɔ ba. ²⁰ La nērba bayi bu batā sān lagse taaba mam yu'ure īyā, mam boe la ba le me.»

Tōntōnna n ka bɔ'w'ra sugri makre

²¹ Ti Apɿyɛɛɾɿ lēm Azezi soke ē yeti: «M Zuudāana, mam sɔbia sān ēṇe mam be'em, nōore wāne ti mam wun base ē taale? Nōore ayopɔl bu?» ²² Ti Azezi yele ē yeti: «Mam ka yeti nōore ayopɔl mā'a, mam yeti nōore pisyopɔl nōore buyopɔl.

²³ La de la bela, ti Nawēnne so'olum āna wu naba n boori ti a tōntōnɿba geele a tōoma pa'ale ē. ²⁴ La ēn pɔse bɔna mī geela la, ti ba tarɿ nēra ayɿla n di a sānne lig-kōba yu'ure n de talā tuspia wa'am. ²⁵ La a daan ka tarɿ sela wun yw, ti a zuudāana la bɔ nōore yeti, ba koose ē, la a pɔga la a kōma, la a lɔgrɔ wuu yw sānne na. ²⁶ Ti tōntōnna la ka dūma tēja a zuudāana la nēṇam sose ē yeti, a ēṇe sugri ti ēṇa wun yw sānne na wuu. ²⁷ Ti a zuudāana la zoe a ninbāalga, base sānne na, dee base ē ti a fōrgē.

²⁸ La tōntōn-ēṇa n yesrɿ la, a tu'use la a tōntōn-tadāana n di a sānne lig-kōba yu'ure n de deniye kɔbga, yōke ē kēke a kōnkɔa, dee yele ē yeti: «Yw ma m sānne na.» ²⁹ Ti a tōntōn-tadāana la ka dūma tēja a nēṇam sose ē yeti, a ēṇe sugri ti ēṇa wun yw a sānne na. ³⁰ Ti a zagse, dee tarɿ ē sēṇe ka kē'ese yu'a deem yeti, a sān ka yw ēṇa a sānne na, a kān yese.

³¹ La a tōntōn-taaba la n yē bela la, ti ba sūure sā'am zozo'e. Ti ba sēṇe ba zuudāana la zē'am ka yele ē sela n ēṇe la wuu. ³² Ti zuudāana la botɿ ba wi ē, ti a yele ē yeti: «Tōntōn-be'ego wā, sān-seka wuu ti fōn di la, mam base me ti la ba'ase, fōn sose mam na īyā. ³³ La

mase nɪ mɛ tɪ fu mē zoe fu tadāana la ninbāalga, wu mam n zoe fōn ninbāalga se'em na.› ³⁴ La a zuudāana la sūure yīige mɛ, tɪ a base tɪ ba tarɪ ē sēje ka kē'ese yu'a deem tɪ ba nāmse ē halɪ tɪ a ɣɔ sānne na wuu.

³⁵ Mam So Nawēnne mē wun ēje ya la bela, ya sān ka base ya sɔbiisi tōon-be'ero taale la ya sūure wuu.»

Pɔka lebsgo yelle

(Amarkɪ 10:1-12)

19 Azezi n daan tɔge bela kɪ'ulum na, a yese Galile sēje la Zude so'olum Zurdē doone ke bɔba. ² Tɪ nēr-kuuŋɔ zozo'e doose ē, tɪ a botɪ ba bā'adōma yē īmā'asum.

³ Tɪ Farisi dōma baseba wa'am a zē'am tɪ ba di a yem bise, soke ē yetɪ: «Sore boe tɪ buraa lebse a pɔga n wen ēje bōn-sɛka woo mɛ bu?» ⁴ Tɪ Azezi lerge yetɪ: «Yāma ka karēje Nawēnne gōŋɔ la? Pī'iluŋɔ wakate, Nawēnne n nāam nērsaalba la, a nāam na buraa la pɔka. ⁵ Bela īyā tɪ a yetɪ, buraaga base a sɔ, la a ma, dee lagum na a pɔga, tɪ bāma bayi lebge ayɪla. ⁶ Bela, ba ka le dena nērba bayi, ba yāŋa lebge la ayɪla. Bela, sela tɪ Nawēnne lagum na taaba, nērsaala da welge ba.»

⁷ Tɪ Farisi dōma la soke ē yetɪ: «La bēm īyā tɪ Amoyisi yuun bɔ nōore yetɪ, buraa sān yetɪ a lebse a pɔga, a bɔ ē pɔgdire lebsgo gōŋɔ, dee tarɪ ē ka lebse?» ⁸ Tɪ Azezi lerge yetɪ: «La de la ya sūure n kɛ tɪ ya ka sake pa'alɔ la īyā, tɪ Amoyisi yuun sake tɪ ya lebse ya pɔgba. Pī'iluŋɔ wakate, la yuun ka ān wāna. ⁹ La mam yetɪ ya tɪ, buraaga sān lebse a pɔga tɪ la sān dagna tɪ a gā la buraasi, a sān le di pɔka ayēma, a ēje la be'em wu nēra n gā'are la a tadāana pɔga.»

¹⁰ Tɪ a karēnbiisi la yele ē yetɪ: «Buraaga la a pɔga yelle sān dena bela, buraaga sān ka di pɔka n sōɪ.» ¹¹ Tɪ a yele ba yetɪ: «La dagɪ nērba wuu n wun yāje to'oge yetɔg-ēna, sān dagna seba tɪ Nawēnne sōje ba tɪ ba to'oge. ¹² Nērba baseba n boe tɪ ba dɔge ba tɪ ba āna wu ba fɔ ba mɛ na, ka dita pɔgsɪ. Tɪ nērba mē fɔ buraasi baseba. Tɪ Nawēnne so'olum īyā, tɪ seba mē ka dita pɔgsɪ. Sɛka n tā wun yāje to'oge yetɔg-ēna, a to'oge.»

Azezi pu'use Nawēnne bɔ kɔm-pɪgsɪ

(Amarkɪ 10:13-16, Aluki 18:15-17)

¹³ Tɪ nērba tarɪ kɔm-pɪgsɪ wa'am Azezi zē'am tɪ a dɪke nu'usi pagle ba zuto pu'use Nawēnne bɔ ba. Tɪ a karēnbiisi la zɛbe nērba la. ¹⁴ Tɪ Azezi yele yetɪ: «Base-ya kɔm-pɪgsɪ la tɪ ba wa'am mam zē'am, da gu'ura-ya ba. Se'ere n soe la, Nawēnne so'olum de la nēr-seba n ān wu kɔma wā bōnɔ.» ¹⁵ La a dɪke la a nu'usi pagle ba zu-to pu'use Nawēnne bɔ ba, dee fōrge.

Budib-polle n de bōntarsa yelle

(Amarkɪ 10:17-31, Aluki 18:18-30)

¹⁶ Tɪ buraaga wa'am Azezi zē'am wa soke ē yetɪ: «Karēnsāama, mam wun tōm na tōon-sōŋɔ kāna yē vɔm n ka ba'asɪ?» ¹⁷ Tɪ a lerge ē yetɪ: «Bēm tɪ fu sɔkra ma sela n ān sōŋa yelle? Nawēnne mā'a n ān sōŋa. Fu sān bɔɔra tɪ fu yē vɔm n ka ba'asɪ, fu sake Nawēnne n bɔ a nōore se'em na.» ¹⁸ Tɪ a soke yetɪ: «Nawēnne nōore yetɔg-bāna?» Tɪ Azezi lerge ē yetɪ: «Da ku nēra, da gā'are la fu tadāana pɔga, da zū, da tɔge pōmpɔŋɔ kaseto, ¹⁹ nanna fu sɔ, la fu ma, la fu nōje fu tadāana wu fu mēŋa.» ²⁰ Tɪ budib-polle la yele ē yetɪ: «Mam pōn sakra bōn-bāna wuu mɛ, bēm n deege?» ²¹ Tɪ Azezi yele ē yetɪ: «Fu sān bɔɔra tɪ fu mase sela woo puam, sēje ka koose fōn tarɪ sela la wuu dɪke bɔ nasdōma, tɪ fu wun yē bōntarsōm Nawēnne yire, dee wa'am wa dɔla mam.» ²² Budib-polle la n wōm bela la, a fōrge mɛ la sū-sā'ŋɔ, se'ere n soe la, a tarɪ la bōntarsōm zo'oge.

²³ Tɪ Azezi yele a karēnbiisi la yetɪ: «Mam yetɪ ya la sɪra sɪra, tɪ la tɔ mɛ bɔ bōntarsa tɪ a kē Nawēnne so'olum puam. ²⁴ La mam le yeta ya tɪ, la de la nāana tɪ yugne doose fupīim yoko puam yese, gānna bōntarsa n wun kē Nawēnne so'olum puam.» ²⁵ La a karēnbiisi la n wōm bela la, tɪ la di'ige ba halɪ zozo'e, tɪ ba yetɪ: «La sān dena bela, āne n wun tā'age yē fāare?» ²⁶ Tɪ Azezi bɪsra ba, dee yetɪ: «Nērsaala ka tā wun ēje bōn-ēna, la Nawēnne tā sela woo ita mɛ.»

²⁷ Tɪ Apɪyɛɛɪ yele Azezi yetɪ: «Tōma base sela woo mɛ, dee dɔla fōn. Bēm tɪ tōma wun yē?» ²⁸ Tɪ Azezi yele ba yetɪ: «Mam yetɪ ya la sɪra sɪra, tɪ wakat-sɛka tɪ sela woo wun lebge paalsɪ la, Nērsaala Dayua la n wun zī'ire a na'am bīm̄bīnne zuo la, yāma seba n dolɪ mam na mē wun zī'ire na'am bīm̄bīna pia la ayi zuto, di ls-rayelɪ buuri pia la ayi la sarɪya. ²⁹ La seba wuu n base ba yie, bu ba kēendōma, la ba yɪbsɪ, bu ba sɔdōma, bu ba madōma, bu ba kɔma, bu ba vatɔ mam yu'ure īyā, ba wun to'oge bāma n base sela la nōore kɔbga, dee yē vɔm n ka ba'asɪ. ³⁰ La nējam dōma zozo'e wun lebge poorum dōma, tɪ poorum dōma zozo'e lebge nējam dōma.»

Tōntōnɪba ɣɔɔɔ makre

20 Azezi le yetɪ: «Nawēnne so'olum ān wu yidāana n yese bulika yu'uhɔ yu'uhɔ, sēje ka dɪke tōn-tōnɪba tɪ ba tōm a va'am. ² La a tɔge ku la tōntōnɪba la tɪ ēŋa wun ɣɔ ba lag-kōbrɛ ayɪla daare puam, dee tōm ba a va'am na tɪ ba ka tōm. ³ Tɪ wuntɛŋa bɪ fēe, tɪ a le yese yē nērba baseba n ze da'am ka tōnna, ⁴ tɪ a yele ba yetɪ: «Ya mē sēje mam va'am na ka tōm, tɪ mam wun ɣɔ ya lan mase se'em.» ⁵ Tɪ ba isge sēje va'am na. Tɪ a le yese wuntɛŋa zuu-tēŋasuka, la wēngelŋa le ēje bela. ⁶ Tɪ a le yese wēnne n we'esi lua, le yē nērba

baseba n ze, ti a soke ba yetu: «Bēm ĩyā ti yāma ze kalam daare la wuu puam ka ita sela sela?» ⁷ Ti ba lerge yetu: «Nēra nēra ka dıke tōma tōoma.» Ti a yele ba yetu: «Ya mē sēje m va'am na ka tōm.»

⁸ Ti wēnne kē, ti va'am na dāana yele seka n bısrı a tōoma la yelle yetu: «Wi tōntōnıba la ti ba wa'am ti fu y ba. Dēje y seba n sēje poorum na ka paage seba n dēje sēje la.» ⁹ Ti seba n sēje wēnne n we'esı lua la wuu to'ose lag-kōbre ayıla ayıla. ¹⁰ Ti seba n dēje sēje la tē'esra ti bāma wun to'ose gānna seba n wa'am poorum na. La ba wuu to'ose la lag-kōbre ayıla ayıla wu seba n sēje poorum na n to'ose se'em na. ¹¹ La seba n dēje sēje la n to'ose lag-kōbre ayıla ayıla la, ba yōnnı yidāana la mē, ¹² yetu: «Seba n wa'am poorum na tōm na karf-ayıla mā'a, la fōn base ti ba to'ose zōna la tōma seba n tōm halı daare la wuu puam nāmse la wuntēja la.» ¹³ Ti a lebe yele ba nēra ayıla yetu: «M sıre, mam ka ēje fu sela n ka mase. Ti tōge ku, ti fu sake ti fōn wun to'oge la lag-kōbre ayıla. ¹⁴ To'oge fu yccw sēje fōrge. La de la mam n boorı ti m y seba n wa'am poorum na zōna la fōn. ¹⁵ Mam ka tarı nōore ti m dıke m bōw ēje sela ti mam boorı? Bu mam n ēje sōja la ĩyā ti fōn ita sūure?» ¹⁶ Bela, nējam dōma wun lebge poorum dōma, ti poorum dōma lebge nējam dōma.»

Azezi le tōge a kūm, la a vo'ore yelle

(Amarkı 10:32-34, Aluki 18:31-34)

¹⁷ Azezi daan we'esı la Zerizalem welge a karēnbiisi pia la ayi la mā'a, yele ba yetu: ¹⁸ «Ya yē ya, ti we'esı la Zerizalem, bilam ba wun dıke Nērsaala Dayua la mē ka ēje kāabgo kēma nējadōma, la wō karēnsāandōma nu'usum, ti ba wun tōge a yelle ku yetu, a mase la kūm. ¹⁹ La ba wun dıke ē ēje la bu-zājı nu'usum, ti ba la ē, wē ē na ka'asa, dee ka ē dı-puurnja zuo ku. La dabsa atā daare a wun vo'oge.»

Azakı la Azā ma sosgo

(Amarkı 10:35-45, Aluki 22:24-27)

²⁰ Ti Azebede pōga daan doose la a dayccw paage Azezi zē'am ka dūma tēja a nējam ti a sose ē ti a ēje sela bō ē. ²¹ Ti Azezi soke ē yetu: «Fōn boorı ti m ēje la bēm bō f?» Ti pōka la lerge yetu: «Bō nōore ti fu sān wa dita fu na'am na, ti m dayccw bayi wā ayıla zı'ire fu zuug, ti ayıla zı'ire fu gōbga.» ²² Ti Azezi lerge ba yetu: «Ya ka mi yāma n sosrı sela. Ya wun tā'age nāmse nāmsgo seka ti mam wun nāmse wā?» Ti ba yetu: «Ti wun tā'age ēje bela.» ²³ Ti Azezi yele ba yetu: «Ya wun sırı nāmse nāmsgo seka ti mam wun nāmse la. La, la dagı mam n wun looge seka n wun zı'ire mam zuug bu mam gōbga. Mam So Nawēnne māasum zē'e-bāma ti a bō la nēr-seba ti a yetu a bō la.»

²⁴ La karēnbiisi pia la n wōm bela la, ba sūure n isge la ba tadāandōma bayi la. ²⁵ Ti Azezi wi ba wuu yetu: «Ya mi ti dūnia wā na'adōma soe ba nērba la pāja, dee ti ke'endōma pēgrı nērba ti ba ita bāma n boorı se'em. ²⁶ La yāma puam, la kān dēna bela. Nēr-seka n boorı ti a lebge nēr-keko ya puam, la mase mē ti a dēna ya tōntōnna. ²⁷ La nēr-seka n mē boorı ti a dēna nējadāana ya puam, la mase mē ti a dēna ya yamja wu Nērsaala Dayua la. ²⁸ Nērsaala Dayua la ka wa'am ti nērba tōm bō ē, a wa'am ti a tōm mē bō, dee dıke a wōm bō ti nērba zozo'e yē fāare.»

Azezi botı fccw bayi nini yēta

(Amarkı 10:46-52, Aluki 18:35-43)

²⁹ Azezi daan ze'ele la Zeriko tēja puam yesra, ti nērkuunjo zozo'e dola ē. ³⁰ Ti fccw bayi zēa sore nōorum wōm ti Azezi n tollı, ti ba tıi tōgra yetu: «Zuudāana, Adavidi yuıja, zoe ti ninbāalga.» ³¹ Ti nērkuunjo la tāsē ba yetu, ba sına. Ti ba malın tıi tōgra gānna bela yetu: «Zuudāana, Adavidi yuıja, zoe ti ninbāalga.» ³² Ti Azezi ze'ele dee wi ba, soke ba yetu: «Yāma boorı ti m ēje la bēm bō ya?» ³³ Ti ba lerge yetu: «Zuudāana, tōma boorı la ti nini yēta.» ³⁴ Ti Azezi zoe ba ninbāalga, kalum ba nini, ti ba nini na yēta bilam mēja, ti ba dola ē.

Azezi kē'erı Zerizalem la na'am

(Amarkı 11:1-11, Aluki 19:28-40, Azā 12:12-19)

21 Azezi la a karēnbiisi la daan sēje ka lem na Zerizalem, paage tēja yu'ure n de Betıfaazi, Oliivi tāja sıa. Ti Azezi tōm a karēnbiisi bayi ² yele ba yetu: «Sēje-ya tēja la n boe ya nēja la puam, ti ya wun yē bōj-yā'aja n lu ze la a biire, lorge-ya ē tarı ba wa'am wa bō ma. ³ Nēra sān yele ya se'ere, ya yele ē yetu: «Zuudāana la n boorı ba», ti a wun base ti ya tarı ē wa'am tōw.»

⁴ La ēje la bela ti Nawēnne nōt'wısa la n yuun tōge se'em na ēje. ⁵ A yuun yetu:

«Yele-ya Siyō tēja nērba yetu:

«Ya naba la n wāna n sēm.

A sike a mēja bā la bōja,

la a biire sēna.» »

⁶ Ti karēnbiisi la sēje ka ēje Azezi n yele ba se'em na,

⁷ tarı bōj-yā'aja la a biire wa'am, wa dıke ba futo

pagle ba zuto ti Azezi bā. ⁸ Ti nērkuunjo zozo'e yerge

ba futo sore zuo, ti seba kō tııı vōorj yerge sore zuo.

⁹ Ti nēr-seba n daan boe a nēja, la seba n boe a

poorum na wuu tıi tōgra yetu:

«Ozaana, naba Adavidi yuıja.

Pēge-ya nēr-seka n sēm na

Zuudāana Nawēnne yu'ure la.

Ozaana! Nā'ase-ya Nawēnne n boe saazuun.»

¹⁰ Ban daan sēnnı kē'era Zerizalem na, tēja la wuu

dām mē, ti ba sokra taaba yetu: «Āne n de ēna?» ¹¹ Ti

nēr-kuuŋɔ la lerge ba yeti: «La de la Nawēnne nōtɔ'ɔsa Azezi n ze'ele Nazareti n boe Galile so'olum na.»

Azezi dige nērba n koosri Wēnde-kātum na

(Amarki 11:15-19, Aluki 19:45-48, Azā 2:13-22)

¹² Azezi daan kē la Wēnde-kāte la zēnzakam digra se-ba wuu n koosri, la seba n da'ari la, ti ba yesra, dee zā'age seba n teeri ligri taabludōma, la seba n koosri na'adawema kugsi lube. ¹³ Dee yele ba yeti: «La gulse Nawēnne gōŋɔ puam ti Nawēnne yeti: «Ba wun wi'ira mam deego la ti pu'usgo deego.» La yāma dīke ē ēŋe la nayigba lagsgo zē'a.»

¹⁴ Ti fɔɔsi, la wɔbsi wa'am a zē'am Wēnde-kātum na, ti a boti ba yē īmā'asum. ¹⁵ La kāabgo kēma nējadōma, la ɔɔ karēnsāandōma n yē tōon-yālma la ti Azezi tōnni, la koma n malun tīi tɔgra Wēnde-kātum na yeti ti: «Ozaana! Pēge-ya naba Adavidi yuŋa» la, ba sūure n daan yīige. ¹⁶ Ti ba yele Azezi yeti: «Fōn wōm ban yeti se'em na?» Ti a lerge yeti: «Ēe, mam wōm ya. Yāma nān ka karēŋe Nawēnne gōŋɔ la yetɔg-ēna n yeti: «Fōn boti koma, la bilēsi n nā'asra fōn.» » ¹⁷ La Azezi base ba bilam, dee sēŋe la Betani ka gā'are.

Kēnkāŋa n ka tarɔ biɛ yelle

(Amarki 11:12-14,20-24)

¹⁸ Beere n daan wiige bulika, ti Azezi lebra Zerizalem, ti a kom dōnna. ¹⁹ Ti a yē kēnkāŋa n ze sore nōorum, sēŋe ti a ka bise, la a paage yē la vōoro mā'a. Ti a yele kēnkāŋa la yeti: «Fu kān le malun wōm biɛ.» La bilam mēŋa ti kēnkāŋa la ku. ²⁰ La a karēnbiisi la n yē bela la, la di'ige ba me, ti ba yeti: «La ēŋe la wāne ti kēnkāŋa wā dare ku wāna?» ²¹ Ti Azezi lerge ba yeti: «Mam yeti ya la asra, ti ya sān bɔ Nawēnne sra dee ka sē'ena, ya mē wun tā'age ēŋe wu mam n ēŋe ti-ēna se'em wā, la, la dagi bela mā'a, ya wun tā'age yele tān-ēna yeti: «Vōoge ka lui mōgre puam», la a wun ēŋe bela. ²² La ya sān sose Nawēnne sela dee bɔ ē sra, ya wun to'oge.»

Āne n bɔ Azezi nōore ti a tōnna?

(Amarki 11:27-33, Aluki 20:1-8)

²³ Azezi daan kē la Wēnde-kātum na zāsna nērba, ti kāabgo kēma nējadōma, la tēŋa la kēma wa'am wa soke ē yeti: «Fōn yē nōore la be ita bōn-bāna? La āne n bɔ fōn nōore ti fōn ita?» ²⁴ Ti Azezi lerge ba yeti: «Mam wun soke ya sokre ayula, ti ya sān lerge mam, mam mē wun yele ya nōor-seka ti mam tarɔ ita bōn-bāna. ²⁵ Yele-ya ma, Azā n daan misri nērba ko'om puam na, la de la Nawēnne n tōm ē bu, la de la nērsaalba?» Ti ba bām na taaba yeti: «Ti sān yeti la de la Nawēnne n tōm ē, a wun yeti, bēm īyā ti tōma ka sake ē? ²⁶ Ti mē ka tā wun yeti, la de la nērsaalba n tōm ē, dēni ti zɔta nērba la, se'ere n soe la, ba wuu sake ti Azā de la

Nawēnne nōtɔ'ɔsa.» ²⁷ Ti ba kōŋe lerge ē yeti: «Tōma ka mi.» Ti a mē yele ba yeti: «Mam mē kān yele ya mam n yē nōore zē'e-seka ita bōn-bāna.»

Dayɔɔsi bayi makre

²⁸ Azezi daan le yele ba yeti: «Pa'alɛ-ya ma yāma n tē'esri se'em: Buraa n daan boe tarɔ a dayɔɔsi bayi, yele ɔɔspɔsi dāana la yeti: «M dayua, sēŋe ka tōm m va'am na zīna.» ²⁹ Ti a dayua la lerge ē yeti: «Mam kān sēŋe.» Ti la ēŋe fēe, ti a teege yem sēŋe. ³⁰ Ti a sēŋe a dayua buyi dāana la zē'am ka yele ēŋa mē yeti, a sēŋe ka tōm a va'am na. Ti a yele ē yeti: «M sɔ, mam wun sēŋe.» La a yele bela dee ka sēŋe. ³¹ Bāma bayi, āne n ēŋe a sɔ la n boori se'em na?» Ti ba lerge yeti: «Pɔɔspɔsi dāana la.» Ti Azezi yele ba yeti: «Mam yeti ya la sra sra, ti lampo-tɔ'ɔsɔrɔba, la ɔɔg-yalsi dōma wun dēŋe ya nēŋa kē Nawēnne so'olum puam. ³² Se'ere n soe la, Azā wa'am wa pa'alɛ ya la sore ti ya wun doose mase Nawēnne zē'am, la ya ka bɔ ē sra. La lampo-tɔ'ɔsɔrɔba, la ɔɔg-yalsi dōma n bɔ ē sra. La baa yāma n yē bela la, ya ken ka teege yem bɔ ē sra.»

Nērba n bɔsɔ va'am makre

(Amarki 12:1-12, Aluki 20:9-19)

³³ Azezi daan le yele ba yeti: «Selse-ya makre ayula. Yidāana ayula n daan kɔ a va'am sele tɔsi yu'ure n de viinye, mē lalga kaage ē, tū boko ti ba wēkra viinye la biɛ, dee mē de-woko ti ba zɔnna bɔsra a va'am na, yāŋa dīke nērba ti ba bɔsra va'am na, dee sēŋe sore. ³⁴ Ti viinye la biɛ go'osgo wakate paage, ti a tōm a tōn-tōnɔba ti ba sēŋe seba n bɔsɔ va'am na zē'am, ka to'oge a viinye la biɛ wa bɔ ē. ³⁵ Ti seba n bɔsɔ va'am na yōge tōntōnɔba la wē ayula, ku ayula, dee lobe ayēma la kuga ku. ³⁶ Ti a le tōm tōntōnɔba baseba n zo'oge gānna ɔɔspɔsi dōma la. Ti ba le ēŋe bāma mē bela. ³⁷ Ti a yāŋa tōm a mēŋa dayua seba n bɔsɔ va'am na zē'am, dee tē'esra yeti: «Ēna n de mam mēŋa dayua la, ba wun nan ē.» ³⁸ La seba n bɔsɔ va'am na n yē ē na, ba yele taaba yeti: «Ēna n wun wa sɔɔge sɔna a sɔ bōn-tarsōm na. Base-ya ti ti ku ē, dee ti bōntarsōm na lebge tōma bōnɔ.» ³⁹ Ti ba yōke ē ve'ege yese va'am na kēnkernɔ ka ku ē.

⁴⁰ Bela, va'am na dāana sān wa'am, a wun ēŋe seba n bɔsɔ va'am na la wāne?»

⁴¹ Ti ba lerge yeti: «A wun nāmse nēr-be'esɔ bāna me halɔ ku ba, dee dīke va'am na bɔ nēr-seba n wun bɔ ē a viinye la biɛ ba go'osgo wakate, ti ba bɔsra.»

⁴² Ti Azezi yele ba yeti: «Yāma nān ka karēŋe Nawēnne gōŋɔ la n yeti:

«Kug-seka ti tōnmētba zagse la n lebge kugre n boti deego la tara pāŋa. La de la Zuudāana Nawēnne n ēŋe bōn-ēna, ti la dēna yel-di'iŋa bɔ tōma.»

⁴³ Bela, mam yeti ya ti Nawēnne wun to'oge a so'olum ya zē'am dīke bɔ buur-seba n wun tōm Nawēnne so'olum tōoma. [⁴⁴ La kug-seka ti tōnmētbā zagse la, nēr-seka woo n lui kug-ēja zuo, a wun kɔ kɔ mē. La kugre la sǎn lui seka zuo, a wun mērgē ē.]»

⁴⁵ La kāabgo kēma nējadōma, la Farisi dōma n wōm makre la, ba bānje ti a tɔgrɪ la bāma yelle. ⁴⁶ Tɪ ba bɔɔra ti ba yōke ē, dee zɔta nērba la, se'ere n soe la, ba sake ti Azezi de la Nawēnne nōtɔ'ɔsa.

Naba dayua pɔgdire kibsa makre

(Aluki 14:15-24)

22 Azezi daan le make la makre yele ba yeti: ² «Nawēnne so'olum ǎn wu naba n ēnje a dayua pɔgdire kibsa, ³ tōm a tōntōnɪba yeti, ba sēnje ka wi nēr-seba ti ēja daan wi la. Tɪ nērba la ka bɔɔra ti ba wa'am. ⁴ Tɪ a le tōm tōntōnɪba baseba yeti: «Sēnje-ya ka yele seba ti mam daan wi la yeti, mam māasum sela woo mē, mam ku la lɔlsɪ, la dūnsi n nōbe, māasum sela woo ze'ele, ba wa'am kibsa la.» ⁵ Tɪ ba sēnje ka wi ba, ti ba zagse, dee sēnje ba sēnne. Tɪ ayɪla sēnje a va'am, ti ayēma sēnje a koosgo zē'am. ⁶ Tɪ baseba la yōge tōntōnɪba la nāmse ba dee ku ba. ⁷ Tɪ naba la sūure yīge, ti a tōm a zebzebrɪba ti ba sēnje ka ku nēr-kuurba la, dee yō ba tēja la. ⁸ La a yele a tōntōnɪba la yeti: «Kibsa la sela woo māasum ba'ase mē, la mam n daan wi seba la ka mase ti ba di kibsa la. ⁹ Bela, sēnje-ya sorɔ-puursi zuto ka wi nēr-seba wuu ti ya wun yē ti ba wa'am pɔgdire kibsa la zē'am.» ¹⁰ Tɪ tōntōnɪba la sēnje sorɔ-puursi zuto ka wi nēr-seba wuu ti ba yē, nēr-sōma la nēr-be'esɪ. Tɪ nērba wa'am wa purē kibsa la zē'am.

¹¹ Tɪ naba la sēnje ti a bɪse nērba la, yē ti nēra n boe mɪ ka ye pɔgdire kibsa la fuugo. ¹² Tɪ a yele ē yeti: «M sɪrē, la ēnje la wāne ti fōn wa'am kibsa la, dee ka ye a fuugo?» Tɪ a ka yānje lerge se'ere. ¹³ Tɪ naba la yele a tōntōnɪba yeti, ba lu a nu'usi, la a nāma lobe ē base yēja lika puam. Bilam ti nērba wun ka kella, dee dīke ba nu'usi gɪ nōorum. ¹⁴ La de la nērba pǎi ti ba wi, la fēe ti ba tū'use.»

Lampo yua yelle

(Amarkɪ 12:13-17, Aluki 20:20-26)

¹⁵ Tɪ Farisi dōma sēnje ka bām bāma n wun ēnje se'em botɪ Azezi tɔge tuuge ti ba yē sore yōke ē. ¹⁶ Bela ti ba daan tōm ba karēnbiisi, la naba A'erɔdɪ nērba ti ba sēnje Azezi zē'am ka yele ē yeti: «Karēnsāama, tōma mi ti fōn de la sɪra dāana, dee zāsna nērba Nawēnne sore yela la sɪra. Fōn ka fabɪ nērba n tɔgrɪ fōn yelle se'em na, la fōn ka tū'usri nērba. ¹⁷ Yele to fōn tē'esri se'em. Sore boe ti ti yɔ lampo bɔ Rom na-keko bu, sore ka boe?» ¹⁸ Tɪ Azezi bānje ba putē'e-be'ero la, yele ba yeti: «Pulibsum dōma wǎ, bēm ti ya bēta mam? ¹⁹ Pa'alē-ya ma lag-seka ti ba tarɪ yɔɔra lampo la.» Tɪ ba dīke lag-

kōbre pa'alē ē. ²⁰ Tɪ a soke ba yeti: «ǎne yinyisja, la ǎne yu'ure n gulse a zuo?» ²¹ Tɪ ba lerge yeti: «La de la Rom na-keko la.» Tɪ Azezi yele ba yeti: «La sǎn dēna bela, bɔ-ya na-keko la ēja n soe bōn-seka, dee bɔ Nawēnne ēn soe bōn-seka.» ²² Ban wōm bela la, ti la di'ige ba, ti ba base ē dee fōrgē.

Kūm vo'ore yelle

(Amarkɪ 12:18-27, Aluki 20:27-40)

²³ Daar-ēja ti Saduse dōma n yeti nēra sǎn ki a kǎn vo'oge la, bāma nērba baseba n wa'am Azezi zē'am wa soke ē yeti: ²⁴ «Karēnsāama, Amoyisi daan gulse yeti, buraaga sǎn ki dee ka tara bia, a sɔbia di pɔkōore la dɔge kɔma bɔ seka n ki la.

²⁵ Buraasɪ bayopɔɪ n daan boe tōma puam dēna sɔbi-isi, ti pɔspɔsɪ dāana la di pɔka ki dee ka dɔge bia. ²⁶ Tɪ buyi dāana la di pɔkōore la mē ki dee ka dɔge bia. Tɪ butā dāana la mē ēnje bela, la bāma bayopɔɪ la wuu ēnje la bela. ²⁷ Tɪ pɔka la mē yāja ki. ²⁸ Bela, ba sǎn wa vo'oge kūm vo'ore daare, bāma bayopɔɪ la puam, ǎne n wun sɔna pɔka la, bāma wuu n lagum di ē na?» ²⁹ Tɪ Azezi lerge ba yeti: «Ya tuuge mē, yāma n ka mi Nawēnne gōɔɔ n yele se'em vōore, la Nawēnne pǎja n ǎn se'em na i'jǎ. ³⁰ Kūm vo'ore daare, buraasɪ ka diti pɔgsɪ, la pɔgsɪ mē ka ellɪ sɪrba. Ba wun ǎna wu malekadōma n boe Nawēnne yire la. ³¹ La sǎn dēna kūm vo'ore yelle, yāma nǎn ka karēje Nawēnne n yele ya a gōɔɔ la puam se'em yeti: ³² «Mam de la Abraham, la A'izakɪ, la Azakɔbɪ Nawēnne» na? La pa'alē ti bāma wuu vɔa mē Nawēnne zē'am. Se'ere n soe la, Nawēnne dagɪ seba n ki Nawēnne, a de la nēr-seba n vɔa Nawēnne.» ³³ Nēr-kuuɔɔ la n daan wōm a zāsɔɔ la, la di'ige ba mē.

Nawēnne n bɔ nōore ti ba ita se'em na, bōn-kāna n gǎnnɪ?

(Amarkɪ 12:28-34, Aluki 10:25-28)

³⁴ Farisi dōma n daan wōm ti Azezi lerge Saduse dōma, ti ba ka le tā'age ya'age nōore la, ti ba lagse a zē'am. ³⁵ Tɪ ba nēra ayɪla n de lɔɔ karēnsāama bɔɔra ti a di a yem bɪse, soke ē yeti: ³⁶ «Karēnsāama, Nawēnne n bɔ nōore ti ba ita se'em na, bōn-kāna n gǎnnɪ wuu?» ³⁷ Tɪ a lerge ē yeti: « «Nōnje fu Zuudāana Nawēnne la fu sūure wuu, la fu sɪa wuu, la fu yem wuu.» ³⁸ Ēna n de Nawēnne nōore la pɔspɔsɪ dāana, ēja n gǎnnɪ wuu. ³⁹ La buyi dāana n ǎn wu ēja n wāna n yeti: «Nōnje fu tadāana wu fōn nōnje fu mēja se'em na.» ⁴⁰ Amoyisi lɔɔ la wuu, la Nawēnne nōtɔ'ɔsɪrɪba n gulse sela la wuu boe la nō-bāma bayi puam.»

Krisi de la naba Adavidi Zuudāana

(Amarki 12:35-37, Aluki 20:41-44)

⁴¹ Farisi dōma n lagse taaba la, ti Azezi soke ba yeti:
⁴² «Yāma tē'srī la bēm la Krisi yelle: Āne yuŋa n de ē?»
 Ti ba lerge yeti: «A de la naba Adavidi yuŋa.» ⁴³ Ti a
 yele ba yeti: «La ēŋe la wāne ti Nawēnne Sia daan boti
 Adavidi wi ē ti Zuudāana yeti:
⁴⁴ «Zuudāana Nawēnne yele mam Zuudāana yeti,
 zī'ire m zuogɔ bɔba hal ti m wa ēŋe fu be'eba ti ba
 bɔna fu nāma tēŋa.»
⁴⁵ Adavidi sān wi ē yeti, Zuudāana, la wun ēŋe la wāne
 ti a dena Adavidi yuŋa?» ⁴⁶ Ti nēra nēra ka yāŋe lerge ē
 se'ere. Lan pɔse daar-ēŋa, nēra ka le saage soke ē
 sokre.

Azezi tɔge lɔɔ karēnsāandōma, la Farisi dōma yelle

(Amarki 12:38-40, Aluki 11:37-54;20:45-47)

23 Ti Azezi yele nēr-kuuŋɔ, la a karēnbiisi la yeti:
² «Lɔɔ karēnsāandōma, la Farisi dōma n sɔɔge
 Amoyisi zē'a. ³ Bela, ban zāsni ya se'em na, ya ita bela,
 dee da ita bāma n uti se'em na. Se'ere n soe la, bāma n
 zāsni se'em na, ba ka uti bela. ⁴ Ba zāsɔɔ la ān wu ze-
 tɔbsa ti ba lu zelge nērba, la ba mēŋa ka boori ti ba
 kalum ba la ba nu'ubiire. ⁵ Ba tōnni ba tōoma la wuu ti
 nērba n bɔsra ba, bela ti ba dɔke gāna gulse Nawēnne
 yetɔga ba puam dɔke lu ba dīa bu ba kēnkānsi. Dee pe
 fu-wogro ēŋe bisa ti ba wɔge ti nērba nā'asra ba. ⁶ Ba
 nōŋe la nā'asgo zē'esī dia zē'esum, la ba wēndeto
 puam. ⁷ Ba nōŋe ti nērba n pu'usra ba da'asi puam,
 dee bɔɔra ti ba wi'ira ba yeti: «Karēnsāama.» ⁸ La yāma
 da base ti ba wi'ira ya ti karēnsāama. Se'ere n soe la,
 yāma tarɔ la karēnsāama ayɔla mā'a, la ya wuu de la
 sobiisi la taaba. ⁹ Da wi'ira-ya nēra ti sɔ dūnia wā zuo
 Nawēnne sore la doosgo ŋyā. Se'ere n soe la, ya tarɔ la
 sɔ ayɔla mā'a n boe saazuum. ¹⁰ La ya da base ti nēra
 wi'ira ya ti nējadāana. Se'ere n soe la, ya tarɔ la
 nējadāana ayɔla mā'a n de Krisi. ¹¹ Seka n de nēr-keko
 ya puam, a dena ya tōntōnna. ¹² Seka n zēke a mēŋa,
 Nawēnne wun sike ē. La seka n sike a mēŋa, Nawēnne
 wun zēke ē.

¹³ Yāma Farisi dōma, la lɔɔ karēnsāandōma, pulibsum
 dōma wā, ya wun yē toogo. Se'ere n soe la, yāma
 gu'uri la nērba ti ba da kē Nawēnne so'olum puam. Ya
 ka kē'eri ya mēŋa, dee mē ka basra nēr-seba n boori ti
 ba kē la sore ti ba kē.

[¹⁴ Yāma Farisi dōma, la lɔɔ karēnsāandōma, pulib-
 sum dōma wā, ya wun yē toogo, se'ere n soe la, ya
 to'osrɔ la pɔkɔpa n tarɔ sela la wuu, dee pu'usra
 Nawēnne pu'us-wogro ti nērba bɔsra ya. Ya wun yē
 sɔbgre gānna wuu].

¹⁵ Yāma lɔɔ karēnsāandōma, la Farisi dōma, pulibsum
 dōma wā, ya wun yē toogo, se'ere n soe la, ya kaari la

dūnia zē'esī wuu eera ti ya yē nēra ayɔla ti a sake dɔla
 ya sore la. La ya sān yē nēra ayɔla, ya base ti a lebge la
 tōon-be'ero dāana gānna ya mēŋa nōore ayi, wun sēŋe
 bug-tēŋa.

¹⁶ Yāma seba n de nējadōma de la fɔɔsi, ya wun yē
 toogo, se'ere n soe la, yāma yeti, nēra sān pɔɔ Wēnde-
 kāte la, la de la zāŋa. La seka sān pɔɔ sālma la n boe
 Wēnde-kāte la puam na, dēni ti a ēŋe ēn pɔɔ ti a ēŋe
 se'em na. ¹⁷ Yāma ka wōnni sela vōore, dee āna wu
 fɔɔsi la. Bēm n gānni? Sālma la bu, Wēnde-kāte la n
 boti sālma la dena Nawēnne tuulum bōnɔ na n gānni?
¹⁸ Ya ken yeti, nēra sān pɔɔ Nawēnne kāabgo bīmɔbīnne
 na, la de la zāŋa. La nēra sān pɔɔ sela ti ba dɔke kāabe
 bīŋe bīmɔbīnne na zuo la, dēni ti a ēŋe ēn pɔɔ ti a ēŋe
 se'em na. ¹⁹ Fɔɔsi, bēm n gānni? Sela ti ba dɔke kāabe
 la bu, kāabgo bīmɔbīnne na n boti sela ti ba dɔke kāabe
 la dena Nawēnne tuulum bōnɔ na n gānni? ²⁰ Bela, se-
 ka n pɔɔ kāabgo bīmɔbīnne na, a po pɔɔ la sela n boe a
 zuo la wuu. ²¹ La seka n pɔɔ Wēnde-kāte la, a po pɔɔ la
 Nawēnne n boe mī na. ²² La seka n pɔɔ Nawēnne yire, a
 pɔɔ la Nawēnne na'am bīmɔbīnne na, la seka n zī a zuo
 la.

²³ Yāma lɔɔ karēnsāandōma, la Farisi dōma, pulibsum
 dōma wā, ya wun yē toogo. Se'ere n soe la, yāma bɔ'ɔrɔ
 Nawēnne zēvōorɔ buuri wuu pia pure mē, baa ba sān
 āna pɔka pɔka, dee basra yel-seba n de kāŋkāŋe lɔɔ la
 puam na, ka ita. La de la sela n mase, la ninbāal-zua, la
 sakre. La de la bōn-bāna ti ya wun dēŋe ita, dee yāŋa
 ita sela ti ya ita la pa'ase. ²⁴ Yāma nējadōma de la fɔɔsi,
 yāma yoorɔ ya bōn-yūula mē yesra lislima basra, dee
 volla yugma.

²⁵ Yāma lɔɔ karēnsāandōma, la Farisi dōma, pulibsum
 dōma wā, ya wun yē toogo. Yāma peerɔ ya laasi, la ya
 wama pɔa mē ti ba āna sōŋa, dee ti ba puam pure la
 nayigum, la be'ero bōnɔ. ²⁶ Yāma Farisi dōma, ya de la
 fɔɔsi! Peege-ya ya laasi la puam pɔspɔsi, ti ba poore la
 mē wun āna sōŋa.

²⁷ Yāma lɔɔ karēnsāandōma, la Farisi dōma, pulibsum
 dōma wā, yāma ān wu yɔɔɔɔ ti ba take ti ba zuum
 pelge āna sōŋa sōŋa, dee ti ba puam pure la kōba, la
 pō'osgo wuu. ²⁸ Yāma mē ān na bela. Yāma boti nērba
 bɔsra ya ti ya āna wu nērba n uti sela n mase, dee ti ya
 puam pure la pulibsum, la tōon-be'ero.

²⁹ Yāma lɔɔ karēnsāandōma, la Farisi dōma, pulibsum
 dōma wā, ya wun yē toogo. Ya mētɔ la Nawēnne
 nōtɔ'ɔsrɔba yɔɔɔɔ, dee malgra nēr-seba n ēŋe sela n
 mase yɔɔɔɔ ti ba āna sōŋa. ³⁰ Dee yeti, yāma daan sān
 boe ni yāma yaabdōma wakate la, yāma daan kān po
 lagum na ba ku Nawēnne nōtɔ'ɔsrɔba la. ³¹ Ya mēŋa n
 bɔ'ɔrɔ ya mēŋa kaseto ti yāma de la seba n yuun ku
 nōtɔ'ɔsrɔba la yuusi. ³² Tɔ. Ken sēŋe-ya nēŋa ēŋe ya
 yaabdōma la n daan ēŋe sela la ba'ase. ³³ Bōnse'edōma
 wā! Kāmpēesi buuri! Yāma wun ēŋe la wāne pōse
 sariyadia ti ba kān kē'ese ya bug-tēŋa? ³⁴ Bela ti mam

yeta ya ti mam wun tōm m nōt'ɔsrɪba, la yem dōma, la ɔɔ karēnsāandōma. La ya wun ku seba, dee ka base-ba dɔ-puursi zuto ku, wē seba la ka'asa ya wēndeto puam, dee dɔla ba nāma tēŋa tēŋa nāmsra ba. ³⁵ Bela ti pupeelem dōma la wuu ti ba ku dūnia zuo la taale wun bɔna ya zuto, lan pɔse la Abelɪ kua halɪ wa paage Abarakɪ dayua Azakari ti ya ku Wēnde-kāte zē'e-sōŋɔ, la kāabgɔ bīmɪbɪnne na tēŋasuka la. ³⁶ Mam yetɪ ya la sɪra sɪra, ti bōn-bāna taale wun bɔna zamāan-ēna nēr-ba wuu zuto.»

Azezi sūure sā'am Zerizalem dōma ïyā

(Aluki 13:34-35)

³⁷ Azezi daan yetɪ: «Zerizalem nērba, Zerizalem nēr-ba, yāma kuuri la Nawēnne nōt'ɔsrɪba, dee ɔbra seba ti Nawēnne tōm ba ya zē'am na kuga kuura. Nōore faa ti mam boori ti m lagse ya wu nō-yā'ana n lagsɪ a kɔma ũna a kempagsɪ puam se'em na, ti ya ka bɔɔra. ³⁸ Bāŋe-ya ti Nawēnne wun base ya tēŋa la ti a lebge la daboto. ³⁹ Mam yetɪ ya ti ya kǎn le malɪn yē mam, halɪ ti ya wun wa yetɪ: «Pēge-ya seka n sēm na Zuudāana Nawēnne yu'ure la.» »

Wēnde-kāte la sā'arɔ, la dūnia ba'asgɔ toogo

(Amarkɪ 13:1-23, Aluki 17:22-24;21:5-24)

24 Azezi daan ze'ele la Wēnde-kāte la puam yese fōrgra. Ti a karēnbiisi la lem ē pa'alē ē ti a bɪse Wēnde-kāte la n mē sōŋa se'em. ² Ti a yele ba yetɪ: «Yāma yē bōn-bāna wā wuu? Mam yetɪ ya la sɪra, ti ba wun lubē ba wuu mē saam saam, ti kugre baa ayɪla kǎn weege a tadāana zuo.»

³ La a daan sēŋe ka zēa la Oliivi tāŋa zuo, ti a karēnbiisi la mā'a sēŋe a zē'am ka yele ē yetɪ: «Yele to wakat-seka ti bōn-bāma wuu wun ēŋe, la sela n wun pa'alē fōn lemŋo, la dūnia ba'asgɔ wakate.» ⁴ Ti a yele ba yetɪ: «Guuse ya mēŋa ti nēra da pā'ase ya ti ya tuuge. ⁵ Nērba zozo'e n wun dɪke mam yu'ure wa'am wa pā'asra ya, ti ba nēra woo yetɪ: «Mam n de Kisi la.» La ba wun boti nērba zozo'e tuuge mē. ⁶ Ya wun wa wōm zebre yelle, la zebre dāmne. La da base-ya ti dabeem tarɪ ya. Dēni ti bōn-bāma ēŋe, la, la nān dagɪ dūnia ba'asgɔ. ⁷ Buuri ayɪla nērba wun isge zebra la buuri ayēma nērba, ti so'olum ayɪla isge zebra la so'olum ayēma, la kɔm, la tēn-mīŋo wun bɔna zē'esɪ zozo'e. ⁸ La bōn-bāma nān de la toogo la sēŋe, la ān wu pɔka virgre toogo n nān sēŋrɪ la. ⁹ Ba wun yōge ya mē tarɪ ka bɔ ti ba nāmse ya, ku ya, la buuri wuu wun sɪsra ya mam yu'ure ïyā.

¹⁰ Nērba zozo'e wun base sɪra sore, dee ita taaba zāmɔ, dee sɪsra taaba. ¹¹ La nērba zozo'e wun isge parum yetɪ bāma de la Nawēnne nōt'ɔsrɪba pā'ase nērba zozo'e ti ba tuuge. ¹² Tōon-be'ero wun wa pa'ase mē halɪ ti nērba zozo'e nōŋre ba'ase. ¹³ La nēr-seka n wun mōrge ze'ele kǎŋkǎŋe ka paage ba'asgɔ wun yē fāare.

¹⁴ Nawēnne so'olum kō-yēlga wun mōole dūnia wuu mē, ti buuri wuu wōm, dee ti dūnia ba'asgɔ yāŋa paage.

¹⁵ Ya wun wa yē seka n de bōn-be'ego n sā'anɪ sela woo la, seka ti Nawēnne nōt'ɔsa Adanɪyɛɪ yuun tɔge a yelle la, ti a boe Nawēnne zē'e-sōŋɔ la.» Seka n karēŋrɪ mōrge wōm a vōore.

¹⁶ «Ya sǎn wa yē bela, nēr-seba n boe Zude zoe zom tǎnsɪ zuto. ¹⁷ La nēr-seka n boe gɔsgɔ da sige bɔɔra ti a kē deem dɪke sela. ¹⁸ La nēr-seka n boe va'am da kǎn lebe kule yire ti a dɪke a fuugo. ¹⁹ Dabs-bāma, la wun dēna la toogo bɔ pɔg-seba n tarɪ pua, la seba n tarɪ kɔma ti ba mōgra la. ²⁰ Sose-ya Nawēnne ti ya zua la wakate da dēna ɔɔɔ wakate, bu vo'osgo daare.

²¹ Se'ere n soe la, wakat-ēŋa, la wun dēna la toogo halɪ zozo'e ti ba nǎn ka yē halɪ dūnia n pī'ilum wa paam wakat-ēŋa, la toog-ēŋa buuri kǎn le malɪn wa'am.

²² Nawēnne sǎn ka bo'oge nɪ dabs-bāma sōore, nēra nēra ka boe n wun pōse. La nēr-seba ti a looge la ïyā ti a bo'oge dabs-bāma sōore.

²³ La nēr-seka sǎn yele ya yetɪ: «Bɪse-ya, Kisi la boe la kalam», bu «bɪse-ya, a boe la ke», ya da sake. ²⁴ Nērba wun wa'am wa parum ti bāma n de Kisi, la nērba wun wa'am wa parum ti bāma n de Nawēnne nōt'ɔsrɪba tōnna tōon-yālma, la yel-kɪrsɪ, bɔɔra ti ba sǎn tā'age, ba boti nēr-seba ti Nawēnne looge la tuuge. ²⁵ Mam dēŋe yele ya mē ti la nǎn ka paam. ²⁶ Bela, ba sǎn yele ya yetɪ: «Bɪse-ya, a boe la weem», da sēŋe-ya. Bu, ba sǎn yetɪ: «A boe la deem», ya da sake. ²⁷ Nērsaala Dayua la lemŋo wun āna wu saaga n ēn yāke dapoore bɔba nēge ka paage zanōa bɔba la. ²⁸ Bōn-kɪ'ɪsɪ n boe zē'e-seka la, zōa lagsɪ taaba la bilam.»

Azezi n de Nērsaala Dayua la lemŋo

(Amarkɪ 13:24-37, Aluki 17:26-36;21:25-33)

²⁹ «Toogo dabsa la poorum, wēntulle wun sobge mē, ti wōrga kǎn le nēra a peelem, ti wōrbie wun ze'ele saazuum lui. La bōn-seba n boe saazuum wun mīim mē. ³⁰ La sela n pa'alɪ Nērsaala Dayua la lemŋo la wun puke saazuum. Ti dūnia nērba buuri wuu wun kaasra fabla. La ba wun yē Nērsaala Dayua la n boe sawara puam sēna la pāŋa, ti a na'am pāŋa peelem nēge zozo'e. ³¹ La a wun tōm na a malɛkadōma, ti benkonne peebe, ti ba sēŋe dūnia zuugo, la gɔbga, la dapoore, la zanōre ka lagse nēr-seba ti Nawēnne looge la, halɪ ka paage dūnia teka wuu.

³² Dɪke-ya makre la kēnkāŋa bāŋe zāsŋɔ la vōore. Kēnkāŋa wila sǎn wa pusra vō-paala, ya mi ti sigre lem mē. ³³ Bela, ya mē sǎn wa yē ti bōn-bāna wuu itɪ, ya bāŋe ti Nērsaala Dayua la lem mē, a boe la zanōrum.

³⁴ Mam yetɪ ya la sɪra, ti bōn-bāna wuu wun ita mē, dee ti zamāan-ēna yāŋa tole. ³⁵ Saazuum la tēŋa wun tole mē, la mam yetɔga la kǎn malɪn tole.

³⁶ Nēra nēra ka mi daar-seka la wakat-seka ti Nēr-saala Dayua la wun leme wa'am, baa malekadōma n boe Nawēnne yire, bu Dayua la mēŋa ka mi, sǎn dagna So Nawēnne mā'a. ³⁷ Nērsaala Dayua la lemŋo, la wun āna wu Anoe wakate n yuun ān se'em na. ³⁸ Se'ere n soe la, lan dēŋe sǎ'anj sa-kāte la, nērba yuun diti me dee yūura, ti buraasi dita pogsɪ, ti pogsɪ ella sɪrba, dee tara ba pɔyɔɔsɪ sura, halɪ wa paage daar-seka ti Anoe kē ōorŋ-kāte la puam na. ³⁹ Ba yuun ka bāŋe ti yelle boe, halɪ ti saaga wa ni, ti ko'om pe'ege nērba la wuu. La mē wun āna la bela Nērsaala Dayua la lemŋo wakate. ⁴⁰ Daar-ēŋa buraasi bayi wun bɔna va'am, ti ba dɪke ayɪla, dee base ayēma. ⁴¹ Ti pogsɪ bayi wun bɔna nēerum, ti ba dɪke ayɪla, dee base ayēma. ⁴² Bela, guuse ya mēŋa, se'ere n soe la, ya ka mi daar-seka ti ya Zuudāana la wun leme wa'am. ⁴³ Bāŋe-ya ti yidāana sǎn mina nayiga n wun wa'am yu'ujɔ wakat-seka wa zū ē, a wun gu'ura a yire me, a kǎn base ti nayiga la kē zū ē. ⁴⁴ Bela, māasum-ya gu'ura, ti Nērsaala Dayua la sēm na wakat-seka ti ya ka tē'esɪ ti a wun wa'am na.»

Tōntōn-sōŋɔ, la tōntōn-be'ego makre

(Aluki 12:41-48)

⁴⁵ Azezi le yeti: «Āne n de tōntōn-sōŋɔ n tarɪ yem? La de la ēŋa ti a zuudāana wun yeti a bɪsra a yire yelle, bɔ'ɔra a tōntōnɪba dia wu lan mase, dee sēŋe sore. ⁴⁶ Zuudāana la sǎn leme wa yē ti tōntōnna la tōm wu ēŋa n yele ē se'em na, tōntōnna la tarɪ zu-yēlga. ⁴⁷ Mam yeti ya la sɪra, ti a zuudāana la wun dɪke ēŋa n tarɪ sela la wuu bɔ ē me ti a bɪsra. ⁴⁸ La a sǎn dena tōntōn-be'ego, tē'esɪ yeti ēŋa zu-udāana la yuuri me ka kulna, ⁴⁹ yāŋa wē'era a tōntōn-taaba la, dita dee yūura la dā-yūuriba, ⁵⁰ a zuudāana la wun kulum na daar-seka ti a ka tē'esɪ ti a wun wa'am, la wakat-seka ti a ka mi, wa di'ige ē. ⁵¹ La a wun dige ē me botɪ a lagum na pulibsum dōma yē subgre. Zē'e-ēŋa ti ba wun kella, dee dɪke ba nu'usi gɪ nōorum.»

Pug-sarsɪ pia makre

25 Azezi ken yeti: «Wakat-ēŋa Nawēnne so'olum wun āna wu pug-sarsɪ pia n dɪke ba fitladōma yese sēŋe ti ba ka tu'usɛ pɔgdita. ² Banuu ka tarɪ yem, dee ti banuu dena yem dōma. ³ Ti seba n ka tarɪ yem na dɪke ba fitladōma, dee ka dɪke kaam pa'ase. ⁴ La se-ba n tarɪ yem na dɪke ba fitladōma me, dee dɪke kaam pa'ase. ⁵ Ti pɔgdita la yuuge ka sēna, ti gēem yōke ba, ti ba wuu gɪse.

⁶ Ti sōnsua, ti ba kaase tagurga yeti: «Pɔgdita la sēm me, isge-ya yese tu'usɛ ē.» ⁷ Ti pug-sarsɪ la wuu nēege malge ba fitladōma. ⁸ Ti seba n ka tarɪ yem na, yele yem dōma la yeti: «Purge-ya ya kaam na bɔ tɔ, ti tōma fitladōma la kɪŋri me.» ⁹ Ti yem dōma la lerge yeti:

«Ayɛɪ, tōma sǎn ēŋe bela, kaam na kǎn seke tōma, la yāma. Sēŋe-ya ka-kɔɔsɪba la zē'am ka da ya mēŋa bōnɔ.»

¹⁰ Ti ba sēŋe ti ba ka da, dee ti pɔgdita la paam, ti banuu la n māasum kɪ'ulum na doose pɔgdita la kē pɔgdire la zē'am, dee ti ba yu zanōre.

¹¹ Bela poorum ti pug-sarsɪ banuu la n weege la wa'am wa wi'ira yeti: «Zuudāana, zuudāana, yo'oge bɔ tɔ.» ¹² Ti pɔgdita la lerge yeti: «Mam yeti ya la sɪra, ti mam ka mi ya.»

¹³ Bela, guuse ya mēŋa, se'ere n soe la, ya ka mi daar-seka bu wakat-seka ti Nērsaala Dayua la wun leme wa'am.»

Tōntōnɪba batā makre

(Aluki 19:11-27)

¹⁴ «Nawēnne so'olum ken āna wu buraaga n boori ti a sēŋe sore, wi a tōntōnɪba dɪke a bōntarsōm puɪ ba ti ba bɪsra. ¹⁵ A bɔ tōntōnna ayɪla la talā banuu, bɔ ayɪla talā bayi, dee bɔ ayɪla talā ayɪla. A bɔ nēra woo mase la ēn wun tā'age se'em tōm, dee sēŋe. ¹⁶ Ti nēr-seka n to'oge talā banuu la dare tōm yē yōorɔ talā banuu pa'ase. ¹⁷ Ti seka n to'oge talā bayi la mē tōm yē talā bayi pa'ase. ¹⁸ La seka n to'oge talā ayɪla la sēŋe ka tū la boko pɪ a zuudāana ligri la.

¹⁹ Ti la yuuge, ti tōntōnɪba la zuudāana la leme kulum, wa yele ba ti ba geele bāma n tōm se'em. ²⁰ Ti se-ka n daan to'oge talā banuu la, tarɪ talā banuu la ti a yē pa'ase la wa'am wa yeti: «M zuudāana, fōn daan bɔ mam na talā banuu, mam tōm yē la talā banuu pa'ase, ban wāna.» ²¹ Ti a zuudāana la yele ē yeti: «La ān sōŋa. Fu de la tōntōn-sōŋɔ n de sɪra dāana. Fōn ēŋe sɪra la sela fēe ti mam bɔ fu la īyā, mam wun base ti fu sɔna bōnɔ zozo'e bɪsra. Wa'am wa naage la mam ēŋe sū-yēlga.»

²² Ti seka n to'oge talā bayi la mē wa'am wa yeti: «M zuudāana, fōn daan bɔ mam na talā bayi, mam tōm yē la talā bayi pa'ase, ban wāna.» ²³ Ti a zuudāana la yele ē yeti: «La ān sōŋa. Fu de la tōntōn-sōŋɔ n de sɪra dāana. Fōn ēŋe sɪra la sela fēe ti mam bɔ fu la īyā, mam wun base ti fu sɔna bōnɔ zozo'e bɪsra. Wa'am wa naage la mam ēŋe sū-yēlga.»

²⁴ Ti seka n to'oge talā ayɪla la wa'am wa yeti: «M zu-udāana, mam mi ti fōn de la nēra yelle n tɔɪ. Fōn lagsɪ la bōnkɔɔla seba ti fōn ka bure, dee vaara bōn-seba ti fōn ka yerge. ²⁵ Bela ti mam zoe dabeem dɪke fu ligri la sēŋe ka tū boko pɪ. Fu bōnɔ n wāna, to'oge.» ²⁶ Ti a zu-udāana la yele ē yeti: «Tōntōn-be'ego wā, fu de la zēyā-ka. Fōn mi ti mam lagsɪ la bōnkɔɔla seba ti mam ka bure, dee vaara bōn-seba ti mam ka yerge la, ²⁷ bela, la de nɪ na fu dɪke m ligri la bīŋe bānkɪ puam, ti mam sǎn leme wa'am, m to'oge m ligri la, la yōorɔ.» ²⁸ A yele bela dee yeti: «To'oge-ya a talā la bɔ seka n tarɪ talā pia la. ²⁹ Se'ere n soe la, nēr-seka n tarɪ, a wun to'oge

pa'ase ti la zo'oge. La seka n ka tarɪ, baa sela fēe ti a tarɪ la, ba wun to'oge ē. ³⁰ La tōntōn-seka n ka tarɪ yōorɔ la, lobe-ya ē base yēŋa lika puam. Zē'e-ēŋa ti ba wun kella, dee dɪke ba nu'usi gi nōorum.»

Azezi wun di buuri wuu sarɪya dūnia ba'asgo daare

³¹ «Nērsaala Dayua la sǎn leme wa'am la a na'am pǎŋa, la a malekadōma wuu, a wun zī'ire la a na'am bīm̄bīnne zuo. ³² Ti dūnia so'olum wuu nērba wun lagse a nēŋam, ti a welge nērba la yēma yēma wu dūnsīina n welgri a piisi, la a buusi se'em na. ³³ La a wun ze'ele piisi la a zuugo bɔba, dee ze'ele buusi a gɔbga bɔba.

³⁴ Ti naba la wun yele seba n boe a zuugo la yeti: «Wa'am-ya, yāma seba n tarɪ mam Sɔ Nawēnne yel-sōnne na. To'oge-ya so'olum na ti Nawēnne daan pōn māasum ti a bɔ ya halɪ lan dēŋe dūnia pī'iluŋo la. ³⁵ Se'ere n soe la, mam kɔm daan dōnni mɛ, ti yāma bɔ mam dia. Koyūuro daan tarɪ mam mɛ, ti yāma bɔ mam ko'om ti mam yū. Mam daan de la sāana, ti yāma to'oge mam. ³⁶ Mam daan de la beele, ti yāma bɔ mam futo ti mam yɛ. Mam daan bē'erɪ mɛ, ti yāma wa'am wa bise mam, la mam daan boe la yu'a deem, ti yāma wa'am mam zē'am.» ³⁷ La nēr-seba n ēŋe sela n mase la wun lerge yeti: «Zuudāana, la de la wakat-kāna ti tōma yē fōn, ti fōn kɔm dōnni, ti tōma bɔ fōn dia? Bu koyūuro tarɪ fōn, ti tōma bɔ fōn ko'om? ³⁸ La wakat-kāna ti tōma yē fōn, ti fōn dena sāana, ti tōma to'oge fōn? Bu fōn de beele, ti tōma bɔ fōn futo ti fōn yɛ? ³⁹ La wakat-kāna ti fōn bē'erɪ, ti tōma wa'am wa bise fōn, bu fōn boe yu'a deem, ti tōma wa'am fōn zē'am?» ⁴⁰ Ti naba la wun lerge ba yeti: «Mam yeti ya la sɪra, ti yāma n daan ēŋe sela wuu bɔ mam nērba la, baa la sǎn dena la nēr-pɪka ayɪla ti ya ēŋe bɔ, la de la mam ti ya bɔ.»

⁴¹ La a wun yele seba n boe a gɔbga bɔba la yeti: «Sēŋe-ya fōrgɛ, Nawēnne kā'a-be'ego boe ya zuo. Sēŋe-ya ka kē bugum n ka kīŋri ti Nawēnne māasum ti a kē'ese Asūtāana, la a malekadōma la puam. ⁴² Se'ere n soe la, mam kɔm daan dōnni mɛ, ti yāma ka bɔ mam dia. Ti koyūuro daan tara mam, ti yāma ka bɔ mam ko'om ti mam yū. ⁴³ Mam daan de la sāana, ti yāma ka to'oge mam. Mam daan de la beele, ti yāma ka bɔ mam futo ti mam yɛ. Mam daan bē'erɪ mɛ, ti yāma ka wa'am wa bise mam. Mam daan boe la yu'a deem, ti yāma ka wa'am mam zē'am.» ⁴⁴ La ba wun lerge ē yeti: «Zuudāana, la de la wakat-kāna ti tōma daan yē fōn, ti fōn kɔm dōnni, bu koyūuro tarɪ fōn, bu fōn de sāana, bu beele, bu fōn bē'erɪ, bu fōn boe yu'a deem, dee ti tōma ka sōŋe fōn?» ⁴⁵ Ti a wun lerge ba yeti: «Mam yeti ya la sɪra, ti yāma n daan ka itɪ bela bɔ'ɔra mam nērba la, baa la sǎn dena la nēr-pɪka ayɪla ti ya ka ēŋe bɔ ē, la de la mam ti ya ka ēŋe bɔ.»

⁴⁶ La bāma wun sēŋe ka kē nāmsgɔ n ka ba'asɪ puam. La seba n ēŋe sela n mase la wun yē vɔm n ka ba'asɪ.»

Ba eerɪ sore ti ba yōke Azezi

(Amarkɪ 14:1-2, Alukɪ 22:1-2, Azā 11:45-53)

26 Azezi n daan tɔge yetɔg-bāma wuu kɪ'lɪm na, a yele a karēnbiisi la yeti: ² «Yāma mi ti la deege la dabsa ayɪ ti Zɔɔg-base kibsa paage, ti ba wun yōke Nērsaala Dayua la ka bɔ ti ba ka ē dɔ-puurnɔ zuo ku.»

³ Nawēnne kāabgo kēma nēŋadōma, la tēŋa la kēma daan sēŋe ka lagse la taaba Akayifu yire. Akayifu daan de la Nawēnne kāabgo kēma nēŋadōma la nēŋadāana. ⁴ Ba daan tɔge la taaba ku yeti, ba ēŋe yem yōke Azezi ku. ⁵ La ba yeti: «Ti da kǎn ēŋe-ya bela kibsa la puam, ti nērba la wun gire mɛ.»

Pɔka n ka'age tudare kaam ēŋe Azezi zuo

(Amarkɪ 14:3-9, Azā 12:1-8)

⁶ Azezi daan boe la Betani tēŋa, Asimō n wa dena kōnkonne na yire. ⁷ Ti ba daan bɔna mī dita, ti pɔka tarɪ albatɪ dugla n pɪre la tudare ka-sōma ligri n zo'oge, wa'am Azezi zē'am wa ka'age kaam na ēŋe Azezi zuugo. ⁸ Ti a karēnbiisi la yē bela, ti ba sūure sǎ'am. Ti ba yele taaba yeti: «Bēm ti a sǎ'am kaam na wāna? ⁹ Ba tā nɪ wun koose kaam wǎ ligri zo'oge mɛ, dɪke bɔ nasdōma.» ¹⁰ Ti Azezi bāŋe ba tē'esgo la, yele ba yeti: «Bēm ēŋe ti ya tɔgra pɔka la ti a sūure sǎ'am? Ēn ēŋe sela bɔ mam na de la tōon-sōŋɔ. ¹¹ Nasdōma boe la ya lɛ mɛ wakate wuu, la mam kǎn bɔna la ya wakate wuu. ¹² Ēŋa n ka'age kaam na ēŋe mam zuo la, a ēŋe la ba wun ēŋe mam se'em mam laare daare. ¹³ Mam yeti ya la sɪra, ti dūnia wǎ zē'e-seka wuu ti ba wun mōole Nawēnne kō-yēlga la, ba mē wun tɔge pɔka wǎ n ēŋe mam se'em wǎ, ti ba tēra a yelle.»

Azudaasɪ eerɪ sore ti a pa'alɛ ti ba yōke Azezi

(Amarkɪ 14:10-11, Alukɪ 22:3-6)

¹⁴ Ti Azezi karēnbiisi pia la ayɪ la nēra ayɪla yu'ure n de Azudaasɪ Iskariyo, daan sēŋe kāabgo kēma nēŋadōma zē'am ¹⁵ ka yele ba yeti: «Ya wun bɔ mam na bēm, ti m pa'alɛ ya sore ti ya yōke Azezi?» Ti ba bɔ ē lig-kōba pitā. ¹⁶ La pɔse la wakat-ēŋa ti a ēera sore ti a pa'alɛ ti ba yōke Azezi.

Azezi diti Zɔɔg-base kibsa la a karēnbiisi

(Amarkɪ 14:12-26, Alukɪ 22:7-23, Azā 13:21-30, 1 Korēntɪ 11:23-25)

¹⁷ Borborɪ n ka tarɪ dābulɛ kibsa la pɔspɔsɪ daare, ti Azezi karēnbiisi la sēŋe a zē'am ka soke ē yeti: «Fōn boorɪ ti ti sēŋe la be ka māasum Zɔɔg-base kibsa la ti fu di?» ¹⁸ Ti a lerge ba yeti: «Sēŋe-ya tēŋa la puam Abōnɔ yire ka yele ē yeti: «Karēnsāama la yeti, ēŋa wakate paage mɛ, la de la fōn yire ti ēŋa wun di Zɔɔg-

base kibsa la, la a karēnbiisi.» ¹⁹ Tl karēnbiisi la ēṇe Azezi n yele ba se'em na, māasum Zɔɔg-base kibsa la.

²⁰ Tl wēnne daan mā'age, tl Azezi la a karēnbiisi pia la ayi la sēṇe yire la puam ka zēa dita. ²¹ Ban daan dita la, tl Azezi yele ba yeti: «Mam yeti ya la sɔra sɔra, tl ya nēra ayila n wun pa'ale tl ba yōke mam.» ²² Tl a karēnbiisi la sūure sā'am hal, tl ba sokra ē ayila ayila yeti: «Zuudāana, la de la mam bu?» ²³ Tl a lerge ba yeti: «Seka n wun yegle la mam tūm a nu'ugo laaga puam na, la de la ēṇa n wun pa'ale tl ba yōke mam. ²⁴ Nērsaala Dayua la wun ki wu la yuun pōn gulse a yelle se'em Nawēnne gōṇɔ puam na. La nēr-seka n wun pa'ale tl ba yōke Nērsaala Dayua la wun yē toogo. Nēr-ēṇa ma daan sān ka dōge nɛ ē n sōl.» ²⁵ Tl Azudaasi n de nēr-seka n daan wun pa'ale tl ba yōke Azezi la soke ē yeti: «Karēnsāama, la de la mam bu?» Tl Azezi yele ē yeti: «Fōn yele la bela.»

²⁶ Ban daan boe mī dita la, tl Azezi dɛke borborɔ pu'use Nawēnne, dee fiise bɔ a karēnbiisi la yeti: «To'oge-ya di. Ēna de la mam iŷā.» ²⁷ Dee dɛke bōn-yūula la pu'use Nawēnne, dee bɔ ba yeti: «To'oge-ya ya wuu yū. ²⁸ Bāna wā de la mam zūm n wun yese saage nērba zozo'e iŷā, pa'ale tl Nawēnne bīṇe nōore la ba tl a base ba tōon-be'ero taale. ²⁹ Mam yeti ya tl, mam kān le yū viinye biē bōn-yūula wā, hal tl la ka paage daar-seka tl mam wun le naage la ya yū ba mam Sɔ Nawēnne so'olum puam.» ³⁰ Tl ba daan yōom yōoma pēge Nawēnne, dee yese wē'esa Oliivi tāṇam.

Azezi yeti Apiyēerɛ wun sɛ'ise ēṇa

(Amarkɪ 14:27-31, Aluki 22:31-34, Azā 13:36-38)

³¹ Tl Azezi yele a karēnbiisi la yeti: «Yāma wuu wun lebe la poorum dee base mam zīna yu'uṇɔ, se'ere n soe la, la gulse Nawēnne gōṇɔ puam yeti: «Mam wun ku dūnsīina, dee tl piisi la wɪrge.» ³² La Azezi le yele ba yeti: «La mam sān wa vo'oge, mam wun dēṇe ya nēṇa sēṇe Galile.» ³³ Tl Apiyēerɛ yele yeti: «Baa bāna wuu sān lebe poorum dee base fōn, mam kān maln base fōn.» ³⁴ Tl Azezi yele ē yeti: «Mam yeti fu la sɔra, tl zīna yu'uṇɔ wā, lan dēṇe nō-rɔɔɔ n wun kaase, fu wun sɛ'ise nōore atā tl fōn ka mi mam.» ³⁵ Tl Apiyēerɛ yele yeti: «Baa la sān dena tl mam lagum na fōn ki, mam kān maln sɛ'ise fōn.» Tl Azezi karēnbiisi la wuu lagum yele bela.

Azezi pu'use Nawēnne Getsemane

(Amarkɪ 14:32-42, Aluki 22:39-46)

³⁶ Azezi la a karēnbiisi la daan sēṇe ka paage la zē'e-seka tl ba wi'iri tl Getsemane, tl a yele a karēnbiisi la yeti: «Zī'ire-ya kalam, dee tl m sēṇe nēṇa ka pu'use Nawēnne.» ³⁷ La Azezi tarɪ la Apiyēerɛ, la Azebede dayɔɔsɪ bayi la sēṇe. Tl a sūure sā'am hal zozo'e, tl a palēṇa ēgra. ³⁸ Tl a yele ba yeti: «Sū-sā'āṇɔ n tarɪ mam

zozo'e tl la āna wu mam yeti m ki mē na. Weege-ya kalam gu'ura mam, da gīse-ya.» ³⁹ La a sēṇe la nēṇa fēe ka vōgle a nēṇa tēṇa pu'use Nawēnne yeti: «M Sɔ, la sān tāna, fu base tl nāmsgɔ ēna tole dee base ma. La, la da kān dena mam n boorɪ se'em, la dena fōn boorɪ se'em.»

⁴⁰ La a lebe a karēnbiisi la zē'am ka yē tl ba gīsri mē. Tl a soke Apiyēerɛ yeti: «Yāma ka tā'age naage la mam gu karf-ayila mā'a ka gīse? ⁴¹ Base-ya gēem dee pu'use Nawēnne tl yelle da paage ya tl ya lui. Ya sɪa boorɪ mē, la ya iŷā la ka tarɪ pāṇa.»

⁴² La a daan le lebe mē ka pu'use yeti: «M Sɔ, nāmsgɔ wā sān ka tāna wun tole dee base mam, la sān dena tl mam nāmse, base tl fōn boorɪ se'em ēṇe.» ⁴³ La a le lebe a karēnbiisi la zē'am ka yē tl ba le gīsra mē, se'ere n soe la, gēem n daan ba tara ba.

⁴⁴ Tl a base ba, dee le lebe nōore atā puam ka pu'use Nawēnne tōge yetɔg-bāma mēṇa. ⁴⁵ Dee leme wa'am a karēnbiisi la zē'am wa soke ba yeti: «Ya gīsri mē dee vɔ'ɔsra? Wakate paage mē, tl ba wun dɛke Nērsaala Dayua la ēṇe tōon-be'ero dōma nu'usum. ⁴⁶ Isge-ya tl tl sēṇe. Seka n wun pa'ale tl ba yōke mam na n wāna n sēm.»

Ba yōke Azezi

(Amarkɪ 14:43-50, Aluki 22:47-53, Azā 18:3-12)

⁴⁷ Azezi n daan ken tɔgra la, tl Azudaasi n de a karēnbiisi pia la ayi la nēra ayila doose la nēr-kuuṇɔ zozo'e sēṇe paam. Ba daan tarɪ la sukɔbrɔ la dɔa. La de la kāabgɔ kēma nēṇadōma, la tēṇa la kēma n daan tōm ba. ⁴⁸ La Azudaasi n wun pa'ale tl ba yōke ē na, pōn pa'ale ba mē yeti: «Seka tl mam wun kɔke ē na, la de la ēṇa, yōke-ya ē.»

⁴⁹ La ēn paam na, a sēṇe mē tɔtɔ lēm Azezi, pu'use ē yeti: «Karēnsāama, zaanōore», dee kɔke ē. ⁵⁰ Tl Azezi yele ē yeti: «M sɪrē, ēṇe fōn wa'am tl fu ēṇe se'em na.» Tl nērba la paage yōke Azezi. ⁵¹ Tl nēr-seba n daan boe la Azezi la, nēra ayila fooge a sukɔbrɔ sē kāabgɔ kēma nēṇadāana tōntōnna tubre fiige. ⁵² Tl Azezi yele ē yeti: «Lebse sūm fu su'a la a fuugɔ puam, se'ere n soe la, se-ba n zebri la su'usɪ, su'usɪ n wun ku ba. ⁵³ Fōn ka mi tl mam tā wun sose m Sɔ Nawēnne, tl a tōm malekadōma n gānnɪ tusa tusa pia la ayi? ⁵⁴ La mam sān ēṇe nɪ bela, Nawēnne gōṇɔ n yeti la wun ēṇe se'em na, wun ēṇe la wāne ēṇe?»

⁵⁵ A tōge bela, dee soke nēr-kuuṇɔ la yeti: «Yāma sēm na sukɔbrɔ, la dɔa tl ya yōke mam wu mam de la fāara la? Mam daan boe la yāma mē Wēnde-kātum na daare woo zāsna nērba, tl yāma ka yōke mam. ⁵⁶ La bōn-bāna wuu ēṇe tl Nawēnne nōtɔ'ɔsɪba n yuun yele se'em Nawēnne gōṇɔ puam na n ēṇe.» Tl a karēnbiisi la wuu zoe dee base ē.

Ba tarı Azezi sēŋe Zifdōma sarıyaditba zē'am

(Amarkı 14:53-65, Aluki 22:54-55,63-71, Azã 18:13-14,19-24)

⁵⁷ Seba n daan yōke Azezi la, tari ē sēŋe la kāabgo kēma nēŋadāana Akayifu yire. Bilam ti ɓɔ karēnsāandōma, la tēŋa la kēma daan lagsɛ. ⁵⁸ Ti Apɪyɛɛɪ daan ɓɔ na poorum zāazāare dɔla ka paage kāabgo kēma nēŋadāana la yire, kē naage la tōntōnɩba zēa ti a bɩse yelle la n wun ba'ase se'em. ⁵⁹ Kāabgo kēma nēŋadōma, la sarɪyaditba la wuu daan eeri la yelle ti ba parum ɓɔ Azezi boti ba ku ē. ⁶⁰ La ba ka yē, baa la nērba zo-zo'e n parum pōmpɔrɔɔ kaseto ɓɔ ē na. Ti nērba bayi yāŋa isge ⁶¹ yeti: «Buraa wā daan yeti, ēŋa tā wun wōrge Wēnde-kāte la, dee le mē ē dabsa atā puam.»

⁶² Tɪ kǎabgɔ kɛ̃ma nɛ̃ɲadǎana la isge soke Azezi yetɪ: «Ban tɔgɛ fɔ̃n se'em na, fɔ̃n kǎn lerge se'ere?» ⁶³ Tɪ Azezi ka lerge se'ere. Tɪ kǎabgɔ kɛ̃ma nɛ̃ɲadǎana la yele ẽ yetɪ: «Pɔɪ la Nawɛ̃nnɛ n de vɔm dǎana la yu'ure, fu sǎn dɛna la Krisi, Nawɛ̃nnɛ Dayua la, yele to.» ⁶⁴ Tɪ Azezi lerge ẽ yetɪ: «La de la fɔ̃n yele se'em na. La mam yetɪ ya tɪ ya wun yɛ̃ Nɛ̃rsaala Dayua la, tɪ a zĩ Nawɛ̃nnɛ n de pǎɲa dǎana la zuugɔ bɔba, ya wun yɛ̃ tɪ a boe sawara puam sɛ̃na.» ⁶⁵ Tɪ kǎabgɔ kɛ̃ma nɛ̃ɲadǎana la ǎasum a mɛ̃ɲa futo, dee yetɪ: «A tuurɪ la Nawɛ̃nnɛ. Tɪ ka le ɛ̃ra tɪ nɛ̃ra le bɔ kaseto. Ya wɔ̃m ɛ̃n tuurɪ Nawɛ̃nnɛ se'em. ⁶⁶ Yǎma tɛ̃'ese la bɛ̃m?» Tɪ ba lerge yetɪ: «A mase la kũm.»

⁶⁷ Tɪ ba tubsɛ nōtōorum mĩ a nẽŋa, dee wẽ ẽ na
kũnkũra. Tɪ baseba wẽ a pɛgsɪ, ⁶⁸ dee ye le ẽ yeti: «Krisi,
bãŋe seka n wẽ fõn tɔge pa'ale tɔ.»

Αρtyεεrι sι'ιsε tι ēηa ka mi Azezi

(Amarkı 14:66-72, Aluki 22:56-62, Azã 18:15-18,25-27)

⁶⁹ Apɪyɛɛɾɪ daan zɪ la yire la zɛnzakam, tɪ tɔntɔn-pɔka lɛm ɛ yele ɛ yetɪ: «Fɔn mɛ daan boe la Azezi n de Galile nɛra la lɛ.» ⁷⁰ Tɪ a sɪ'ɪsɛ ba wuu nɛŋam yetɪ: «Mam ka bɔŋɛ fɔn boori tɪ fu yele se'em.» ⁷¹ Tɪ Apɪyɛɛɾɪ yese yaŋa nɔorum, tɪ tɔntɔn-pɔka ayɛma yɛ ɛ, yele seba n boe mɪ na yetɪ: «ɛna mɛ daan boe la Azezi n ze'ele Nazareti la lɛ.» ⁷² Tɪ Apɪyɛɛɾɪ le sɪ'ɪsɛ pɔɪ yetɪ: «Mam ka mi buraaga wɔ.» ⁷³ Tɪ la ɛŋɛ fɛɛ, tɪ seba n ze mɪ na, lɛm Apɪyɛɛɾɪ yetɪ: «Asɪra, fɔn de la ba nɛra ayɪla, se'ere n soe la, fu yetɔga n pa'alɛ fɔn ze'ele zɛ'a.» ⁷⁴ Tɪ Apɪyɛɛɾɪ pɔɪ yetɪ: «Mam ka mi buraaga wɔ, mam sɔn parɪm mɛ, Nawɛnnɛ sɪbge ma.» Wakat-ɛŋa mɛŋa tɪ nɔ-ɾɔɔgo kaasɛ. ⁷⁵ Tɪ Apɪyɛɛɾɪ yɔŋa tɛege Azezi n daan yele ɛ yetɪ: «Lan dɛŋɛ nɔ-ɾɔɔgo n wun kaasɛ, fu wun sɪ'ɪsɛ nɔore atɔ tɪ fɔn ka mi mam» na. Tɪ Apɪyɛɛɾɪ yese yɛŋa ka kella la sɔ-sɔ'ɔŋ zozo'e.

Ba tarı Azezi sēṇe gōmna Apilatı zē'am

(Amarkı 15:1, Aluki 23:1-2, Azã 18:28-32)

27 Beere n daan wiige bulika, tɪ kãabgɔ kɛma
nɛ̃jadɔ̃ma, la tɛ̃ŋa la kɛma la wuu lagse tɔge ku
yetɪ ba ku Azezi. ²Tɪ ba lu ẽ tarɪ sɛ̃ŋe Apilatɪ n de gɔm-
na zɛ'am ka bɔ ẽ.

Azudaasi kũm

(Tõoma 1:18-19)

³ Azudaasɪ n de sɛka n daan pa'alɛ tɪ ba yōkɛ Azezi la, n yɛ tɪ ba tɔgɛ Azezi yelle ku yetɪ ba ku ẽ na, a sũure sã'am mɛ. Tɪ a tarɪ lig-kõba pitã la sɛŋɛ tɪ a ka lebse kãabgɔ kɛma nɛŋadõma, la tɛŋa la kɛma la, ⁴ dee yetɪ: «Mam ɛŋɛ la be'em, mam n pa'alɛ tɪ ba yōkɛ sɛka n ka ɛŋɛ be'em tɪ ba ku ẽ na.» Tɪ ba yele ẽ yetɪ: «La ka pake tõma. La de la fõn yelle.» ⁵ Tɪ Azudaasɪ dɪkɛ ligri la lobge Wẽnde-kãte la puam, dee sɛŋɛ ka pire mɪ'isi ki. ⁶ Tɪ kãabgɔ kɛma la dɪkɛ ligri la yetɪ: «Ba de la zum ligri, la ka mase tɪ tɪ dɪkɛ ba naage la Wẽnde-kãte la ligri.» ⁷ Tɪ ba bãm, dɪkɛ ligri la da yagba va'am tɪ a dɛna sãama laare zẽ'am. ⁸ Bela n soe tɪ ba ken wi'ira zẽ'e-ɛŋa tɪ zum va'am, halɪ wa paam zĩna. ⁹ La de la bela tɪ Nawẽnne nõtɔ'ɔsa Azeremi n yuun gulse se'em na ɛŋɛ.

A youn yeti: «Ba dıke la lig-kōba pitã, lig-sēba tı ls-
rayelı dōma sake tı ba dıke da ě na, ¹⁰ ba dıke la bāma
da yagba va'am wu Zuudāana Nawēnne n yele mam
se'em na.»

Ba tɔgɛ ku yetɪ ba ku Azezi

(Amarkı 15:2-20, Aluki 23:3-5,13-25, Azã 18:33—19:16)

¹¹ Ban daan tarɩ Azezi sɛ̃ɲɛ ɔ̃mna la zɛ'am na, tɩ a soke ẽ yetɩ: «Fɔ̃n de la Zifdɔ̃ma naba?» Tɩ Azezi lerge ẽ yetɩ: «La de la fɔ̃n yele se'em na.» ¹² La k̃aabɔ k̃ɛma ñɛ̃ɛadɔ̃ma, la t̃ɛ̃ɲa la k̃ɛma daan d̃ɔ̃ɛ ẽ mɛ, tɩ a ka lerge se'ere. ¹³ Tɩ Apilatɩ yele ẽ yetɩ: «Fɔ̃n ka wɔ̃m ban tɔ̃ɔɣɩ se'em wuu d̃ɔ̃ta fɔ?» ¹⁴ Tɩ Azezi ka lerge yetɔ̃ɔa la baa ayɩa, tɩ la di'ige ɔ̃mna la halɩ zozo'e.

¹⁵ La Zɔɔg-base kɪbsa wakate woo gɔmna la ɛn yese la nɛra ayɪla yu'a deem base, nɛr-seka tɪ nɛr-kuɔŋɔ la boori. ¹⁶ La wakat-ɛŋa bibɛ'a ayɪla n daan boe yu'a deem, tɪ a yu'ure dena Abarabasi, tɪ nɛrba wuu mina a yelle. ¹⁷ Tɪ nɛr-kuɔŋɔ la n lagse la, tɪ Apilati soke ba yeti: «ʔne tɪ yāma boori tɪ m yese base bɔ ya, Abarabasi bu Azezi tɪ ba wi'iri tɪ Krisi la?» ¹⁸ Apilati daan mi tɪ la de la sūure ʔyā tɪ ba yōke Azezi wa bɔ ɛŋa.

¹⁹ La Apilati n daan zĩ saryadia zẽ'am na, ti a pɔga tɔm ti ba wa yele ẽ yeti: «Yese fu nu'ugo pupeelem dāana la yelle puam, se'ere n soe la, mam zāasum me a yelle yu'unɔ, ti la nāmse mam zozo'e.»

²⁰ La kãabgo kēma nējadōma, la tēja la kēma daan
yele nērba la me ti ba sose Apilatı ti a base Abarabası
bo ba, dee ku Azezi. ²¹ Ti qomna la le soke ba yeti:

«Nēr-bāna bayi wā, yāma boorɪ tɪ m base la āne bɔ ya?» Tɪ ba lerge yetɪ: «Abarabasɪ.» ²² Tɪ a soke ba yetɪ: «Bela, yāma boorɪ tɪ m ēŋe Azezi tɪ ba wi'iri tɪ Kriɪ la, la wāne?» Tɪ ba wuu lerge yetɪ: «Ka ē dɔ-puurnja zuo.» ²³ Tɪ a soke ba yetɪ: «A ēŋe la bēm n de be'em?» Tɪ ba malɪn tɔgra ke'enke'em yetɪ: «Ka ē dɔ-puurnja zuo.» ²⁴ La Apilatɪ n yē tɪ ēŋa kān yāŋe ēŋe sɛla, dee tɪ nērba la gita pa'asra la, tɪ a dɪke ko'om peege a nu'usi nērkuuŋɔ la wuu nēŋam, dee yele yetɪ: «Mam nēŋa ka boe ēna wā kua puam. La de la yāma yelle.» ²⁵ Tɪ nērkuuŋɔ la wuu lerge yetɪ: «A kua la taale bɔna tōma la tɪ koma zuto.» ²⁶ Tɪ Apilatɪ base Abarabasɪ bɔ ba, dee botɪ ba wē Azezi la ka'asa, dee dɪke ē bɔ tɪ ba ka ka ē dɔ-puurnja zuo.

²⁷ Tɪ gɔmna la sudaasɪ tarɪ Azezi kē gɔmna la yire, tɪ sudaasɪ wuu lagse kaage ē. ²⁸ Tɪ ba yēse Azezi futo, dee ye ē fuugo n de gomusga, ²⁹ dɪke gō'osɪ wuge mūŋa vuge ē, dɪke dasaare zānte a zuugo nu'ugo, yāŋa ka dūma tēŋa a nēŋam la'ara ē yetɪ: «Zifdōma naba, naal!» ³⁰ La ba daan tubsɪ la nōtōorum ita ē, dee tɔ'ɔsra dasaare la wē'era a zuugo. ³¹ La ban la ē kɪ'lɪlɪm na, ba yēge gomusga fuugo la mē, dee dɪke a mēŋa fuugo la lebe ye ē, tara ē wē'esa tɪ ba ka ka dɔ-puurnja zuo.

Ba ka Azezi dɔ-puurnja zuo

(Amarkɪ 15:21-32, Alukɪ 23:26-43, Azā 19:17-27)

³² Ban daan ze'ele tēŋa puam yesra la, ba tu'use la buraaga ayɪla yu'urɛ n de Asimō n ze'ele Sireɪnɪ, tɪ ba pērgɛ ē tɪ a to'oge Azezi kūm dɔ-puurnja la buke. ³³ Tɪ ba paage zē'a tɪ ba wi'iri a yu'urɛ tɪ Golgota, a vōore de la zuwaŋɛ zē'a, ³⁴ dɪke dāam n gaam na tum n ān too-go bɔ Azezi tɪ a yū. Tɪ a leme ba, zagse ka yū. ³⁵ Tɪ ba daan ka ē dɔ-puurnja zuo, dee dɪke a futo tɪ ba puɪ la taaba, pɔse tɪ ba bāŋe nēra woo n wun to'oge sɛka. ³⁶ Dee yāŋa zēa gu'ura ē. ³⁷ Ba daan gulse la gulsɔ pa'alɛ se'ere n soe tɪ ba ku ē, lablɛ a zuum dɔ-puurnja la zuo. Ba daan gulse yetɪ:

«Ēna de la Azezi
n de Zifdōma naba la.»

³⁸ Ba daan tarɪ la fāarba bayi wa po ka dɔ-puursi zuto, ayɪla Azezi zuugo bɔba, ayēma a gɔbga bɔba. ³⁹ Tɪ seba n doli bilam tɔlla la, lɔbra ba zuto dee tuura ē ⁴⁰ yetɪ: «Dagɪ fōn daan yetɪ fōn wun wōrgɛ Wēnde-kāte la, dee le mē ē dabsa atā puam? Fu sān sɪrɪ dena la Nawēnne Dayua, fāage fu mēŋa ze'ele dɔ-puurnja la zuo sige.» ⁴¹ Kāabgɔ kēma nēŋadōma, la lɔɔ karēnsāandōma, la tēŋa la kēma mē daan tuuri ē mē yetɪ: ⁴² «A daan fāagrɪ nērba baseba mē, dee ka tāna wun fāage a mēŋa. A sān dena lɪsrayɛlɪ dōma naba, a ze'ele dɔ-puurnja la zuo sige nānanne wā, tɪ tōma wun bɔ ē sɪra. ⁴³ A te'ege Nawēnne mē yetɪ ēŋa de la Nawēnne Dayua, Nawēnne sān nōŋe ē, a fāage ē lɛlɛ wā.» ⁴⁴ Tɪ fāarba la tɪ ba ka dɔ-puursi zuto lɛm ē na mē tɔgra ē be'em.

Azezi kūm

(Amarkɪ 15:33-41, Alukɪ 23:44-49, Azā 19:28-30)

⁴⁵ La daan pɔse la wunteŋa zuu-tēŋasuka, tɪ tēŋa la wuu lebge lika tarɪ ka paage zaanōore karf-atā. ⁴⁶ Karf-atā la wakate tɪ Azezi tɔge ke'enke'em yetɪ: «Eli, Eli, lama sabaktani.» La vōore de la: «Mam Wēnnaam, mam Wēnnaam, bēm tɪ fōn base mam?» ⁴⁷ Tɪ seba n ze lɛm bilam na baseba wōm bela, yetɪ: «A wi'iri la A'eli.» ⁴⁸ Tɪ ba nēra ayɪla zoe sēŋe ka dɪke nētɪŋa luse dā-m'isgo puam zēke la dɔɔgɔ bɔ ē tɪ a yū. ⁴⁹ Tɪ seba yetɪ: «Base tɪ gu bɪse A'eli la sān wun wa'am wa fāage ē.» ⁵⁰ Tɪ Azezi le kaase ke'enke'em, dee kɪ. ⁵¹ Tɪ fuugo la n yuli Wēnde-kāte la puam beŋe zē'e-sōŋɔ la āage pusuka saazuum halɪ ka paage tēŋa. Tɪ tēŋa mīim, tɪ tāmp'isi wōre. ⁵² Tɪ yɔɔɔ be'ese, tɪ pūpeelem dōma zozo'e n yuun kɪ vo'oge. ⁵³ Tɪ Azezi n wa vo'oge la, tɪ ba ze'ele yɔɔɔ puam yese kē Zerizalɛm, tɪ nērba zozo'e yē ba. ⁵⁴ La Rom sudaasɪ ke'ema, la sudaasɪ la n ze gu'ura Azezi la n yē tēŋa la n mīim, la bōn-seba n ēŋe la, dabeem n yōke ba zozo'e, tɪ ba yetɪ: «A sɪrɪ de la Nawēnne Dayua.»

⁵⁵ La pɔgsɪ zozo'e n daan ze zāazāare dee bɪsra, ba daan ze'ele la Galile doose Azezi tɪ ba sōŋra ē.

⁵⁶ Amaari n ze'ele Magdala, la Amaari n de Azakɪ la Azozefu ma, la Azebede dayɔɔsɪ la ma n daan boe pɔg-bāma puam.

Azezi laare

(Amarkɪ 15:42-47, Alukɪ 23:50-56, Azā 19:38-42)

⁵⁷ Buraaga ayɪla n daan de bōntarsa, n ze'ele Ari-mate, tɪ a yu'urɛ dena Azozefu. A de la Azezi karēnbɪa. ⁵⁸ Wēnne n daan mā'age, tɪ a sēŋe Apilatɪ zē'am ka sose ē tɪ a base tɪ a dɪke Azezi kūm na sēŋe ka laage. Tɪ Apilatɪ bɔ nōore tɪ ba bɔ ē. ⁵⁹ Tɪ Azozefu dɪke kūm na, dɪke tān-paale n ān sōŋa vile ē, ⁶⁰ tarɪ ē ka laage yɔ-paale puam tɪ a botɪ ba tū tāmp'ia iŋyā, a mēŋa iŋyā. Tɪ ba bilge kug-kāte lige yɔɔgɔ la nōore dee fōrgɛ. ⁶¹ Amaari n ze'ele Magdala, la Amaari ayēma la daan zɪ mē tɪ ba nēŋa tɔ yɔɔgɔ la.

⁶² Daar-sɛka tɪ Zifdōma māasɪ ba vo'osgo daare la n tole tɪ beere wiige, tɪ kāabgɔ kēma nēŋadōma, la Farisi dōma lagse taaba sēŋe Apilatɪ zē'am, ⁶³ ka yele ē yetɪ: «Zuudāana, tōma tēri tɪ pōmpā'asum dāana wā, ēn daan nān vɔa la, a daan yetɪ: «Mam wun vo'oge dabsa atā daare.» ⁶⁴ Bela, bɔ nōore tɪ ba gu'ura yɔɔgɔ la sōŋa sōŋa ka paage dabsa atā daare, la sān dagna bela, a karēnbɪisi la wun wa zū kūm na mē dee yele nērba tɪ a vo'oge mē. Pā'asgɔ ēna wā yāŋa wun dena be'em gānna pɔspɔsɪ la.» ⁶⁵ Tɪ Apilatɪ yele ba yetɪ: «Tarɪ-ya gu'urba sēŋe ka base tɪ ba gu'ura yɔɔgɔ la wu yāma n boori se'em na.» ⁶⁶ Tɪ ba sēŋe ka bɪ yɔɔgɔ la nōore dee base tɪ gu'urba gu'ura ē.

Azezi vo'ore

(Amarki 16:1-10, Aluki 24:1-12, Azā 20:1-10)

28 Zifdōma vo'osgo daare n daan tole, ti beere wi-ige Lasri daare bulika yu'uhj yu'uhj, ti Amaari n ze'ele Magdala, la Amaari ayēma isge sēje ti ba ka bise yaggo la. ² Ti tēja daan mīim zozo'e, ti Zuudāana Nawēnne maleka ze'ele saazuum sigum wa bilge kugre la bīje kēnkernja zēa a zuo. ³ A nēja daan yēgru wu sa-yāka. Ti a futo pelge āna yuli yuli. ⁴ Ti dabeem yōke se-ba n gu'uri yaggo la. Ti ba gōgra dee āna wu ba ki me na.

⁵ Ti maleka la yele pagsi la yeti: «Da zoe-ya dabeem, mam mi ti ya eeri la Azezi ti ba ka dɔ-puurnja zuo ku la. ⁶ A ka boe kalam. A vo'oge me wu ēn daan yele se'em na. Wa'am-ya wa bise ban daan bīje ē zē'e-sēka la, ⁷ dee sēje-ya tɔtɔ ka yele a karēnbiisi la yeti, a vo'oge me. La a wun dēje ya nēja sēje Galile. Bilam ti ya wun ka yē ē. Sela ti mam taru ti m yele ya n bela.» ⁸ Ti pagsi la fōrge yagom na tɔtɔ la dabeem, dee tara sū-yēlga zozo'e, zɔta wē'esa ti ba ka yele Azezi karēnbiisi la sela n ēje la.

⁹ Ti Azezi dare tu'use pu'use ba. Ti ba lem ē ka dūma tēja a nējam gure a nāma nā'ase ē. ¹⁰ Ti Azezi yele ba yeti: «Da zoe-ya dabeem, sēje-ya ka yele m sobiisi la yeti, ba sēje Galile, ti la de la bilam ti ba wun yē mam.»

¹¹ Pagsi la n daan boe sore wē'esa la, ti seba n gu'uri yaggo la nērba baseba sēje tēja puam ka tɔge pa'ale kāabgo kēma nējadōma bōn-seba wuu n ēje la. ¹² Ti kāabgo kēma nējadōma, la tēja la kēma la lagse ku nōore ayila, bɔ sudaasi la ligri zozo'e, ¹³ dee yele ba yeti: «Yele-ya nērba la yeti, yu'uhj ti yāma gā gīsra dee ti Azezi karēnbiisi la wa'am wa zū kūm na. ¹⁴ La gomna la sān wōm bela, tōma wun tɔge la ē le, yese ya yelle la puam.» ¹⁵ Ti sudaasi la to'oge ligri la, dee ēje wu ban yele ba se'em na. Ti yetɔg-ēja saage Zifdōma la tējasuka halu wa paam zīna.

Azezi puke a mēja pa'ale a karēnbiisi

(Amarki 16:14-18, Aluki 24:36-49, Azā 20:19-23, Tōoma 1:6-8)

¹⁶ Karēnbiisi pia la ayila la daan sēje la Galile, ka zom tām-sēka ti Azezi bɔ ba nōore yeti ba sēje la zuo. ¹⁷ La ba yē ē me, ka dūma tēja a nējam nā'ase ē, la baseba daan sē'enu me. ¹⁸ Ti Azezi lem ba, yele ba yeti: «Nawēnne bɔ mam pāja wuu n boe saazuum, la tēja wā zuo me. ¹⁹ Bela, sēje-ya dūnia wuu ka boti nērba buuri wuu lebge mam karēnbiisi. Mise-ya ba ko'om puam, la So Nawēnne, la a Dayua, la a Sia yu'ure. ²⁰ La ya zāsum ba ti ba sake bōn-seba wuu ti mam bɔ ya nōore ti ya ita la. La bāje-ya ti mam boe la ya me wakate wuu, halu ti la ka paage dūnia ba'asgo.»

Amarkı

Bilgre

Amarkı yuun doose la Apoli, la Apıyεeri tōm Nawēnne tōoma. (Tōoma 13:5, Kolosı 4:10, 1 Pıyεeri 5:13). Amarkı gōŋɔ wā pa'alε me tı Azezi de la Nawēnne Dayua n tarı nōore la sela woo (Amarkı 1:1 la 15:39). A gōŋɔ la pɔse tɔgra la Azā seka n yuun misri nērba ko'om puam na n wa'am wa malge sore bɔ Azezi yelle, la Azezi n botı Azā mise ē ko'om puam, la Asūtāana n make Azezi yelle (1:1-13). A pa'alε tı Azezi wi la nērba tı ba dɔla ē, zāsum ba, botı bā'adōma yē ĩmā'asum, dige kulkā'arsı, tı ba yese dee base nērba, dee base nērba tōon-be'ero taale (1:14 - 10:52). A ken yetı Azezi dēŋe yele a karēnbiisi la me tı ēŋa sān sēŋe Zerizalem, ēŋa wun yē la nāmsgɔ, dee ki, la ēŋa wun vo'oge me. La ba ka wōm a yetɔga la vōore (8:31-32, 9:30-32, 10:32-34). A yetı Azezi we'esı la Zerizalem sēŋe ka paage kē'era tēŋa la puam, tı nēr-kuuŋɔ nā'ase ē zozo'e, dee tı Zıfdōma nēŋadōma sise ē. La a zāsum la nēr-kuuŋɔ, la a karēnbiisi, la a be'eba mē wuu (sapıtrı 11 - 13). Gōŋɔ la ba'asgɔ, Amarkı gulse yetı Azezi ki la dɔ-puurnɔa zuo, dee vo'oge (sapıtrı 14 - 16).

Azā n mōoli Nawēnne yetɔga la yelle

(Amatie 3:1-12, Alukı 3:1-18, Azā 1:19-28)

¹ Nawēnne Dayua Azezi-krisi kō-yēlga n pɔse se'em n wāna: ² La ēŋe wu Nawēnne nōtɔ'ɔsa A'ezayi n yuun pōn gulse se'em, tı Nawēnne yetı:

«Bıse, mam wun tōm m tōntōnna tı a dēŋe fu nēŋa ka malge sore bɔ fɔ.

³ La de la seka n mōoli weem tɔgra ke'enke'em yetı: «Malge-ya sore sōŋa gu'ura Zuudāana.

Malge-ya sɔa la tı ba tɔ tēntēesi bɔ ē.» »

⁴ Bela tı Azā daan bɔna weem misra nērba ko'om puam, dee mōola yetı: «Teege-ya yem base tōon-be'ero, dee botı ba mise ya ko'om puam, tı Nawēnne base ya tōon-be'ero taale.» ⁵ Tı nērba zozo'e ze'ele Zude so'olum wuu, la Zerizalem wuu sēnna Azā zē'am tɔgra ba tōon-be'ero pa'ala ē. Tı Azā misra ba kulaa yu'ure n de Zurdē puam.

⁶ Azā daan ye la fuugo n de yugma kōbrɔ, dee dıke sagānne lu a sıa. A daan diti la seero la saniiro.

⁷ A daan mōoli yetı: «Nēra n boe mam poorum sēna, ēŋa tarı pāŋa gānna mam me. Mam ka mase tı m dōbre a nēŋam pırge a tagra. ⁸ Mam misri ya la ko'om puam, la ēŋa wun mise ya la Nawēnne Sıa.»

Azezi ko'om misga, la Asūtāana n make ē bıse

(Amatie 3:13—4:11, Alukı 3:21-22;4:1-13)

⁹ Wakat-ēŋa Azezi ze'ele la Nazareti n boe Galile so'olum wa'am Azā zē'am, tı a mise ē Zurdē ko'om na puam. ¹⁰ Tı Azezi ze'ele ko'om na puam dɔɔra, yē tı saazuum dare yo'oge, tı Nawēnne Sıa āna wu na'adawenne na sige a zuo, ¹¹ tı kōa ze'ele Nawēnne

yire yetı: «Fōn de la mam Dayua tı mam nōŋe la m sūure wuu, fu paage la mam yem.»

¹² Bilam mēŋa tı Nawēnne Sıa botı Azezi sēŋe weem.

¹³ A daan boe weem na dabsa pinaasi, tı Asūtāana wa'am wa make ē bıse. A daan boe la we-dūnsı lε, tı Nawēnne malekadōma sōŋra ē.

Azezi wi nērba banaasi tı ba dɔla ē

(Amatie 4:12-22, Alukı 4:14-15;5:1-11)

¹⁴ Ba daan yōke Azā yu la yu'a deego puam. Bela poorum tı Azezi sēŋe Galile ka mōola Nawēnne kō-yēlga yetı: ¹⁵ «Wakate paage me, Nawēnne so'olum lem me. Teege-ya yem base tōon-be'ero dee sake kō-yēlga la.»

¹⁶ Azezi daan dolı la Galile mögre la nōorum, yē Asimō la a ylbga A'andre n boe mĩ lɔbra yuka mögre la puam, ba daan de la zūn-yōgrıba. ¹⁷ Tı a yele ba yetı: «Dɔla-ya mam, tı mam wun botı ya εera nērba tı ba dɔla mam wu yāma n yōgrı zūma se'em na.» ¹⁸ Tı ba base ba yugsı la bilam mēŋa, dee dɔla ē.

¹⁹ Tı a sēŋe fēe yē Azebede dayɔɔsı Azakı la a ylbga Azā n boe ōorŋɔ puam malgra ba yugsı. ²⁰ Tı a dare wi ba, tı ba base ba sɔ Azebede la a tōntōnıba ōorŋɔ la puam, dee dɔla ē.

Kulkā'arga n tarı buraa tı Azezi botı a yese

(Alukı 4:31-37)

²¹ Tı Azezi la a karēnbiisi sēŋe Kapernaum. Tı Zıfdōma vo'osgo daare paage, tı Azezi kē ba wēndeem zāsna nērba. ²² La zāsŋɔ la di'ige nērba la me, se'ere n soe la, a zāsŋɔ la daan tarı la pāŋa, la ka ān wu lɔɔ karēn-sāandōma n zāsı se'em na.

²³ Tl buraa daan bɔna wēndeem na tl kulkā'arga tara ē, tl buraa la kaase yetl: ²⁴ «Azezi n de Nazareti nēra, fōn bēm yelle n boe la tōma? Fōn wa'am tl fu sā'am na tōma? Mam mi fōn de sēka. Fōn de la pupeelem dāana n ze'ele Nawēnne zē'am.»

²⁵ Tl Azezi tāse kulkā'arga la yetl: «Go'oge, yese dee base ē.» ²⁶ Tl kulkā'arga la bigse buraa la tl a gōgra, dee kaase tagurga yese dee base ē. ²⁷ Tl ba wuu ze yerl, sakra taaba yetl: «Wāna de la bēm? La de la zāsɔ paalga n tarl pāɔa. A tɔgrl la kulkā'arsl, tl ba sakra a nōore.» ²⁸ Tl Azezi yu'ure dare saage Galile so'olum zē'a woo.

Azezi botl bā'adōma yē īmā'asum

(Amatie 8:14-17, Aluki 4:38-41)

²⁹ Tl Azezi la a nērba daan yese Zifdōma wēndeem na, tl Azaki la Azā doose ba, tl ba sēɔe ka kē Asimō la Aāndre dōma yire. ³⁰ Tl Asimō dēem-pɔka īyā ba tulge, tl a gā. Tl Azezi paage, tl ba dare tɔge pɔka la yelle bɔ ē. ³¹ Tl Azezi sēɔe lem ē, gure a nu'ugo botl a isge. Tl bā'a la base ē, tl a ēɔe ba sāano.

³² Tl wēnne wa lui sobe, tl ba tarl bā'adōma wuu, la seba tl kulkā'arsl tarl ba wa'am Azezi zē'am. ³³ Tl tēɔa la nērba wuu lagse taaba yire la zanōrum. ³⁴ Tl Azezi botl nērba zozo'e tl bā'asl to'oto'ore tarl ba yē īmā'asum, dee dige kulkā'arsl zozo'e, tl ba yese. La a ka sake tl kulkā'arsl la tɔge, se'ere n soe la, ba pōn mi-na ē me.

Azezi mōole Nawēnne kō-yēlga Galile

(Aluki 4:42-44)

³⁵ Azezi daan isge la bulika yu'ɔɔɔ yu'ɔɔɔ yese tēɔa la puam sēɔe zē'a tl nērba ka boe, tl a ka pu'use. ³⁶ Tl Asimō la nēr-seba n daan boe la ē na yese eera ē. ³⁷ La ba daan yē ē me, yele ē yetl: «Nērba wuu eerl fu me.» ³⁸ Tl Azezi lerge ba yetl: «Base-ya tl tl sēɔe tēn-seba n lem na tl m ka mōole kō-yēlga la bilam mē, tl la de la bela īyā tl mam wa'am.» ³⁹ Tl a kaage Galile so'olum wuu mōole kō-yēlga la Zifdōma wēndeto puam, dee dige kulkā'arsl tl ba yese dee base nērba.

Azezi botl kōnkonne yē īmā'asum

(Amatie 8:1-4, Aluki 5:12-16)

⁴⁰ Buraa aylla n de kōnkonne n wa'am Azezi zē'am wa ka dūma tēɔa a nēɔam sose ē yetl: «Fu sān bɔɔra, fu tā wun base tl m yē īmā'asum me le āna sōɔa.» ⁴¹ Tl a ninbāalga yōke Azezi, tl a tēege a nu'ugo kalum ē yetl: «Mam bɔɔra, yē īmā'asum le āna sōɔa.» ⁴² Tl bā'a la base ē bilam mēɔa, tl a le āna sōɔa. ⁴³ Tl Azezi yele ē yetl a fōrge, dee kā'an ē yetl: ⁴⁴ «Da kān yele nēra nēra, la sēɔe Nawēnne kāabgo kēema zē'am ka pa'ale ē fɔ mēɔa tl a bise, dee bɔ ē bōn-seba tl Amoyisi yuon gulse yetl ba bɔ la, tl la pa'ale ba tl fu sɔrl yē īmā'asum.»

⁴⁵ La buraa la fōrge me ka dıke yelle la mōole pa'ale la ēɔe se'em. Bela tl Azezi daan ka le tāna wun kē tēɔa puam, sān dagna tl a li'ise me kē. A daan boe la zē'e-seba tl nērba ka boe mī na, tl nērba daan ze'eta zē'a woo sēnna a zē'am.

Azezi botl kɔɔɔɔ yē īmā'asum

(Amatie 9:1-8, Aluki 5:17-26)

2 Bela poorum, dabsa fēe n tole, tl Azezi lebe Kapernaum. Tl nērba wōm tl a boe yire, ² lagse halı zozo'e tl zē'a ka bɔna, baa deego la nōorum. Tl a tɔgra Nawēnne yetɔga bɔ'ɔra ba. ³ Tl nērba banaasl ze kɔɔɔɔ wa'am Azezi zē'am. ⁴ La nērba la n zo'oge la, ba ka tā wun ze ē paage Azezi zē'am, tl ba zom gɔsgɔ ka lake gɔsgɔ la bɔbre aylla, doose bilam sike kɔɔɔɔ la, la a bōn-gā'ala deego la puam Azezi nēɔam. ⁵ Tl Azezi yē ban bɔ ēɔa sɔra se'em na, yele kɔɔɔɔ la yetl: «M bia, fu tōon-be'ero taale ka le bɔna fu zuo.» ⁶ La ɔɔ karēn-sāandōma baseba n daan boe mī, daan zēa tē'esra ba sūurum yetl: ⁷ «Bēm tl ēna tɔgra bela? A tɔgrl pɔ'ɔra la Nawēnne. Ān tā wun base tōon-be'ero taale, sān dagna Nawēnne mā'a?» ⁸ Tl Azezi bāɔe a putē'erum ban tē'es-rl se'em ba sūurum na, yele ba yetl: «Bēm tl ya tē'esra wāna ya sūurum?» ⁹ Bēm n de nāana gānna, mam sān yele kɔɔɔɔ la yetl, a tōon-be'ero taale ka le bɔna a zuo, bu mam sān yele ē yetl, a isge dıke a bōn-gā'ala sēnna n de nāana? ¹⁰ Bela m wun botl ya bāɔe tl Nērsaala Dayua la tarl pāɔa dūnia wā zuo me, wun base tōon-be'ero taale.» Azezi yele bela, dee yele kɔɔɔɔ la yetl: ¹¹ «Isge dıke fu bōn-gā'ala kule.» ¹² Tl kɔɔɔɔ la isge kalam dıke a bōn-gā'ala la ba wuu nifum yese. Tl ba wuu ze yerl, pēgra Nawēnne yetl: «Tōma nān ka yē wāna.»

Azezi wi Alevi tl a dɔla ē

(Amatie 9:9-13, Aluki 5:27-32)

¹³ Azezi le sēɔe la mōgre la nōorum, tl nērba zozo'e sēna a zē'am, tl a zāsna ba. ¹⁴ La Azezi sēnnı tɔlla me yē Alfe dayua Alevi tl a zı lampo to'osgo deem tɔ'ɔsra lampo, tl a yele ē yetl: «Dɔla mam.» Tl a isge dɔla ē.

¹⁵ Tl Azezi sēɔe ka zēa Alevi yire dita, tl lampo-tɔ'ɔsrla ba la tōon-be'ero dōma zozo'e lagum na Azezi la a karēnbiisi la dita, se'ere n soe la, nēr-bāma buuri n daan zo'oge dɔla ē. ¹⁶ Tl ɔɔ karēnsāandōma n de Farisi dōma la yē Azezi n diti la lampo-tɔ'ɔsrla, la tōon-be'ero dōma la, tl ba soke a karēnbiisi la yetl: «Bēm tl a lagum na lampo-tɔ'ɔsrla, la tōon-be'ero dōma dita?» ¹⁷ Tl Azezi wōm bela, yele ba yetl: «Seba n tarl īmā'asum ka eerl tıba, seba n bē'erl n eerl tıba. Mam ka wa'am tl m wi seba dōma n yetl bāma mase me na, mam wa'am na tōon-be'ero dōma īyā.»

Ba soke Azezi nōorlua yelle

(Amatie 9:14-17, Aluki 5:33-39)

¹⁸ Azã karēnbiisi, la Farisi dōma daan lutu la nōore. Tl ba wa'am wa soke Azezi yetu: «Bēm tl Azã karēnbiisi, la Farisi dōma karēnbiisi la luta nōore dee tl fōn karēnbiisi la ka luta nōore?» ¹⁹ Tl Azezi yele ba yetu: «Nēra sãn ēņe pōgdire kibsa wi a sūrdōma tl ba wa'am, ba tã wun lu nōore me wakat-seka tl pōgdita la ken bōna ba zē'am na bu? Ayel, pōgdita la sãn ken bōna ba zē'am, ba kãn tã'age lu nōore. ²⁰ Wakate sēm me tl ba wun yese pōgdita la ba zē'am, wakat-ēņa tl ba yãņa wun lu nōore.

²¹ Nēra kãn dıke tãn-paale lige fu-keka. A sãn ēņe bela, tãn-paalga la wun botu fu-keka la āage me gãnna kurum na. ²² La nēra mē kãn dıke dā-paalga sūm wō-kegsı puam. A sãn ēņe bela, dā-paalga la sãn kella, ba wun botu wōwı la tãse me, tl dāam na, la wōwı la wuu sã'am. La mase tl ba dıke dā-paalga sūm na wō-paalstı puam.»

Vo'osgo daare yelle

(Amatie 12:1-8, Aluki 6:1-5)

²³ Zıfđōma vo'osgo daare ayula tl Azezi la a karēnbiisi daan dola vato puam tōlla, tl a karēnbiisi la kō si wēena obra. ²⁴ Tl Farisi dōma yele ē yetu: «Bıse, bēm tl ba ita sela n sisri vo'osgo daare?» ²⁵ Tl Azezi lerge ba yetu: «Yãma nãn ka karēņe Adavidi la a nērba la kom n yuun dōnnı tl ba bōora dia tl ba di, tl Adavidi yuun ēņe se'em, ²⁶ wakat-seka tl Abiata de Nawēnne kãabgo kēma nēnadãana la? A yuun kē la Nawēnne deego la puam dıke borborı seba tl ba bıņe bō Nawēnne na obe. La sisri me, nēra nēra ka obrı ba, sãn dagna Nawēnne kãabgo kēma mã'a. La Adavidi yuun obe ba me, dee bō nēr-seba n boe a zē'am na.» ²⁷ Azezi yele bela dee le yele ba yetu: «La de la nērsaala iŷã tl Nawēnne ēņe vo'osgo daare, a ka ēņe nērsaala vo'osgo daare iŷã. ²⁸ Bela, Nērsaala Dayua la n soe sela woo, baa la vo'osgo daare.»

Buraa nu'ugo n ki, tl Azezi botu a yē iŷmã'asum

(Amatie 12:9-14, Aluki 6:6-11)

3 Bela poorum, Azezi le kē la Zıfđōma wēndeem. Tl buraa bōna mĩ tl a nu'ugo ki. ² Tl ba bısrı Azezi wun botu buraa la yē iŷmã'asum vo'osgo daare bu, a kãn botu a yē iŷmã'asum. Ba daan eerı la ba doose bilam dōre ē. ³ Tl Azezi yele buraa la nu'ugo n ki la yetu: «Isge ze'ele tēņasuka.» ⁴ Dee soke seba n bısrı ē na yetu: «Sore boe tl nēra ēņe sōņa vo'osgo daare bu, a ēņe be'em? Sore boe tl a fãage nēra vo'osgo daare bu, a ku ē?» Tl ba sına. ⁵ Tl Azezi sūure yĩge, tl a bıse nērba la kaage, tl a sūure sã'am, ba sūure n ke la iŷã. La a yele buraa la yetu: «Tēege fu nu'ugo la.» Tl a tēege, tl

nu'ugo la yãņa tēege āna sōņa. ⁶ Tl Farisi dōma yese tōtō ka bãm la naba A'erōdı nērba bãm n wun ēņe se'em ku Azezi.

Nērba zozo'e n lagsē Azezi zē'am Galile mōgrum

⁷ Azezi la a karēnbiisi la yese sēņe la Galile mōgrum bōba. Tl nērba zozo'e ze'ele Galile, la Zude, ⁸ la Zerizale, la Idume, la Zurdē kulaa doone, la tēn-seba n lem Tiiri la Sidō doose ē. Nēr-kunŷ la daan wōm na ēn ēņe se'em na wuu, tl ba sēņe a zē'am. ⁹ Tl Azezi yele a karēnbiisi la yetu, ba vuta dōrŷ lem na tl nērba la da wa mike ē. ¹⁰ A daan botu bã'adōma zozo'e n yē iŷmã'asum, bela tl bã'adōma wuu daan mikra taaba bōora tl ba paage kalum ē. ¹¹ La kulkã'arsı n doli nēr-seba la sãn ēn yē ē, ba luti la a nējam kaasra tagursı yetu tl: «Fōn de la Nawēnne Dayua.» ¹² Tl Azezi daan zebe kulkã'arsı la yetu, ba da botu nēra bãņe ēņa n de nēr-seka.

Azezi looge a karēnbiisi pia la ayi

(Amatie 10:1-4, Aluki 6:12-16)

¹³ La bela poorum Azezi daan sēņe ka zom na tãņa zuo, dee wi nēr-seba tl a boorı la tl ba wa'am a zē'am. ¹⁴ Tl a looge nērba pia la ayi tl ba bōna la ē, tl a tōnna ba tl ba sēnna mōola Nawēnne kō-yēlga, ¹⁵ dee bō ba pãņa tl ba digra kulkã'arsı tl ba yesra. ¹⁶ Seba tl a looge la daan de la Asimō tl Azezi sı a yu'ure tl Apyeeri, ¹⁷ la Azebede daywı Azakı la a yıbga Azã, tl a sı ba yu'ure tl Buanergesı. A vōore de la nērba n ān wu sa-dãmŷ. ¹⁸ La A'āndre, la Afilipi, la Abatelemi, la Amatie, la Atoma, la Alfe dayua Azakı, la Atade, la Asimō seka n de Zelbtı nēra ayula la, ¹⁹ la Azudaası Iskariyo, seka n wun pa'ale tl ba yōke Azezi la.

Azezi pãņa gãnı Asūtãana

(Amatie 12:22-32, Aluki 11:14-23;12:10)

²⁰ La Azezi daan kule la yire, tl nērba le lagsē zozo'e. Tl Azezi la a karēnbiisi la ka yē folle wun di. ²¹ Tl ba daan yetu Azezi yirsri me, tl a yir-dōma wōm bela sēņe tl ba ka yōke ē.

²² Tl bō karēnsãandōma n ze'ele Zerizale wa'am wa yetu: «Abelzebuli n doli ē, la de la ēņa n de kulkã'arsı naba la pãņa tl a tarı digra kulkã'arsı tl ba yesra.» ²³ Tl Azezi wi ba, make makre bō ba yetu: «Asūtãana wun ēņe la wãne dige Asūtãana? ²⁴ So'olum ayula nērba sãn welge zebra taaba, so'olum ēņa wun wōrgē me. ²⁵ La yire ayula dōma sãn welge zebra taaba, yi-ēņa wun wōrgē me. ²⁶ La Asūtãana sãn isge zebe la a mēņa welge, a pãņa la ba'ase me, a kãn tã'age ze'ele.

²⁷ La nēra ka tã wun kē pãņa dãana yire ka vaage a lōgrō, sãn dagna tl a dēņe lu pãņa dãana la me, dee vaage a lōgrō la.

²⁸ Mam yeti ya la sira, ti Nawēnne tā wun base nēr-saalba tōon-be'ero la wuu ti ba itti la, la ba pɔ'wre yetoga la wuu taale. ²⁹ La nēra sǎn pɔ'wge Nawēnne Sɔa, Nawēnne kǎn malin base ē taale. Tōon-be'e-ēna taale boe la a dāana zuo wakate wuu.» ³⁰ Ban yeti kulkā'arga n doli ē na iŷā, ti a yele bela.

Azezi ma, la a yibsi

(Amatie 12:46-50, Aluki 8:19-21)

³¹ Ti Azezi ma, la a yibsi wa'am wa ze yēŋa dee tōm yeti, ba wi ē ti a wa'am. ³² La nēr-kunŋ n daan zī kaage ē, ti ba yele ē yeti: «Fu ma, la fu yibsi n wāna n boe yēŋa ɛera fɔ.» ³³ Ti Azezi yele ba yeti: «Āne n de mam ma, la āndōma n de mam yibsi?» ³⁴ Dee bise nēr-seba n zī kaage ē na, yeti: «Mam ma, la mam yibsi n wāna. ³⁵ Se'ere n soe la, nēr-seka woo n itti Nawēnne n boori se'em na n de mam yibga, la mam tā, la mam ma.»

Kaara n lobge a bōnbuuri makre

(Amatie 13:1-9, Aluki 8:4-8)

4 Azezi le bɔna la mōgre la nōorum zāsna nērba. Ti nēr-kunŋ zozo'e lagse a zē'am. Bela ti a kē ōorŋ la n boe mōgre la puam na zī'ire, dee ti nēr-kunŋ la wuu bɔna mōgre la nōorum. ² Ti a make magsa zāsum ba yela zozo'e. A zāsŋ la puam a yele ba yeti: ³ «Selse-ya, kaara n daan yese ti a lobge a bōnbuuri. ⁴ La ēn sēŋe ka lobgra bōnbuuri la, baseba lui la sore zuo, ti ni into wa'am wa di ba. ⁵ Ti baseba lui zē'a n de tāmpīisi ti tēntōnno ka zo'oge mī. Tēntōnno n ka zo'oge mī na iŷā, ti ba bule tɔtɔ yese, ⁶ ti wunteŋa yēke wē ba ti ba ki, ba yēga n ka kē tēŋa la iŷā. ⁷ Ti bōnbuuri baseba lui gō'osi zē'a. Ti gō'osi la yese fure ba, ti ba ka wɔm biɛ. ⁸ Ti bōnbuuri baseba lui zē'e-sōŋ puam bule yese, bu wɔm biɛ. Baseba wɔm na biɛ pitā-tā, ti baseba wɔm pisyoob-yoobi, ti baseba wɔm kɔbga kɔbga.» ⁹ A yele bela dee yeti: «Seka n wōm yetoga wā, a selse sōŋa sōŋa.»

Azezi pa'ale magsa vōore

(Amatie 13:10-23, Aluki 8:9-15)

¹⁰ La Azezi yese la kēnkernŋ ti seba n kaage ē na, la a karēnbiisi pia la ayi la soke ē magsa la vōore. ¹¹ Ti a yele ba yeti: «Nawēnne boti yāma bāŋe a so'olum yelle n suge la mɛ. La seba n ka boe tōma puam na, yela wuu de la magsa bɔ ba.

¹² «Bela ti ba wun bise yē dee kǎn bāŋe.

Ba wun wōm dee kǎn bāŋe a vōore.

Sǎn dagi ni bela, ba wun leme wa'am Nawēnne zē'am,

ti a base ba tōon-be'ero taale.» »

¹³ La Azezi le yele ba yeti: «Yāma sǎn ka bāŋe makre ē na wā vōore, yāma wun ēŋe la wāne bāŋe magsa la

wuu vōore? ¹⁴ Bōnbuuri la ti kaara la lobge la, de la Nawēnne yetoga. ¹⁵ Sore la zuo ti bōnbuuri seba lui la, ān wu nēr-seba n wōm yetoga la, ti Asūtāana wa'am tɔtɔ wa yese yetoga la ba sūure puam. ¹⁶ La tāmpīa la zuo ti bōnbuuri seba lui la, ān wu nēr-seba n wōm yetoga la dee sake to'oge ba tɔtɔ la sū-yēlga. ¹⁷ La yetoga la n ka kē ba sūure puam na iŷā, ba sake la wakate fēe, la toogo bu nāmsgɔ sǎn paage ba yetoga la iŷā, ba basri me tɔtɔ. ¹⁸ La gō'osi la zē'a ti bōnbuuri seba lui la, ān wu nēr-seba n wōm yetoga la, ¹⁹ ti ba yem yɔkra la dūnia wā yela, ti bōntarsōm yela pā'asra ba, ti yela baseba yemleego tara ba, boti yetoga la ka tāna wun wɔm biɛ ba sūure puam. ²⁰ La zē'e-sōŋ la ti bōnbuuri seba lui la, ān wu nēr-seba n wōnni kō-yēlga la sakra, wɔm biɛ. Ti baseba wɔm pitā-tā, ti baseba pisyoob-yoobi, ti baseba kɔbga kɔbga.»

Fitla makre

(Aluki 8:16-18)

²¹ Azezi le yele ba yeti: «Ba yō'ori fitla dīke pɔ'igɔ vuge ē, bu ba dīke ē ze'ele gɔrgɔ tilum? Ayɛi, ba wun dīke ē zoole la sela zuo. ²² Bela, bōn-seka n suge, dēni ti a puke. La bōn-seka wuu n lile wun lilge. ²³ Nēr-seka n wōm yetoga wā, a selse sōŋa sōŋa.»

²⁴ A le yele ba yeti: «Mōgre-ya wōm yāma n selsri se'em na vōore. Bōn-seka ti ya dīke make bɔ nērba la, Nawēnne wun make la bela lebse ya, le make pa'ase.

²⁵ Se'ere n soe la, seka n tarɔ, a wun bɔ ē pa'ase. La seka n ka tarɔ, bōn-seka ti a tarɔ la, a wun to'oge ē.»

Bōnbuuri bua makre

²⁶ Azezi le yele ba yeti: «Nawēnne so'olum ān wu nēra n bure a bōnbuuri va'am puam. ²⁷ A sǎn gīsra me bu a sǎn piga me, wunteŋa la yu'utŋ, bōnbuuri la bulli me yesra bita, ti a ka mina lan itti se'em. ²⁸ Tēntōnno n boti bōnbuuri la yesra ba mēŋa, dēŋe puse vōoro, yāŋa yōge pua, wɔm biɛ, ti ba bi. ²⁹ La biɛ la sǎn bi, kaara la se'eri ba me, se'ere n soe la, bōnkɔla lagsgɔ paage mɛ.»

Sɔ'wɔ biire makre

(Amatie 13:31-34, Aluki 13:18-19)

³⁰ Azezi le yele ba yeti: «Ti wun dīke la bēm make la Nawēnne so'olum, bu ti wun yeti a wōn na bēm? ³¹ A ān wu sɔ'wɔ biire n ān pɔka pɔka gǎnna bōnbuuri wuu n boe dūnia zuo. ³² La ba sǎn bure ē, a bitu me puse wil-kāra gǎnna zēvōoro buuri wuu. Ti niinto tāna wun te ba tugro a zuo a mā'asum puam.»

³³ Azezi daan dīke la magsa zozo'e n ān wu bāna tɔge bɔ ba, mase wu ban wun tā'age wōm se'em na. ³⁴ A ka tɔge bɔ ba ti la sǎn dagna magsa. La a sǎn yese la a karēnbiisi la mā'a kēnkernŋ, ti a pa'alɔ ba yela la wuu vōore.

Azezi boti kusebgo yōke

(Amatie 8:23-27, Aluki 8:22-25)

³⁵ Daar-ēṇa mēṇa zaanōore, tɪ Azezi yele a karēnbiisi la yetu: «Tɪ dooge-ya mōgrɛ la ke bɔba.» ³⁶ Tɪ a karēnbiisi la base nēr-kuuṇɔ la, dee sēṇe ka kē ḡorṇɔ la tɪ Azezi boe mī na puam, dɪkɛ ẽ tɪ ba wɛ'esa. La ḡorṇɔ baseba n daan mē boe ba zē'am. ³⁷ Tɪ kuseb-kāte wa vugra ke'enke'em, tɪ ko-mī'isi wē'era kē'era ḡorṇɔ la puam deege la ba pɪrɛ ẽ. ³⁸ La Azezi gā la ḡorṇɔ la poorum kuke dafeere gīsra. Tɪ a karēnbiisi la nēege ẽ, soke ẽ yetu: «Karēnsāama, tōma n yetu ki wā, la ka pake fōn?» ³⁹ Tɪ a isge tāse kusebgo la, dee yele ko-mī'isi la yetu: «Go'oge-ya, āna-ya sīm.» Tɪ kusebgo, la ko-mī'isi la go'oge āna sīm. ⁴⁰ Tɪ a soke ba yetu: «Bēm tɪ ya zɔta dabeem bela? Bēm tɪ ya ka bɔ Nawēnne sɪra?» ⁴¹ Tɪ dabeem ba kē ba. Tɪ ba sɔkra taaba yetu: «Āne n de ẽ-na tɪ kusebgo la ko'om sakra a nōore?»

Kulkā'arsɪ n dolɪ buraaga, tɪ Azezi dige ba

(Amatie 8:28-34, Aluki 8:26-39)

5 La Azezi la a karēnbiisi la dooge paage la mōgrɛ la doone Geraza dōma tēṇa puam. ² Tɪ Azezi ze'ele ḡorṇɔ la puam sige. Tɪ buraa tɪ kulkā'arga dolɪ ẽ dare ze'ele yɔɔrum sēnna tu'usra ẽ. ³ Buraa la daan kē'erɪ la yɔɔɔ la tēṇasuka. Tɪ ba daan ka le tāna wun ba ẽ na bānsɪ. ⁴ Se'ere n soe la, ba daan ẽn ba la a nāma la a nu'usi la bānsɪ, tɪ a ẽn kɔ ba base. Tɪ nēra nēra daan ka tāna wun yāṇe ẽ. ⁵ Wuntēṇa la yu'uṇɔ a ẽn ɛera la yɔɔrum, la tānsɪ tēṇasuka kaasra tagursi, dee wē'era a mēṇa la kuga pɔgna.

⁶ Tɪ a yē Azezi zāazāare, zoe sēṇe ka ka dūma tēṇa a nēṇam, ⁷ dee tɔge ke'enke'em yetu: «Azezi, Nawēnne n gānnɪ wuu Dayua, bēm n boe mam na fōn tēṇasuka? Mam sosɪ fu mɛ Nawēnne īyā, da nāmse ma.» ⁸ Azezi dēṇe yele kulkā'arga la mɛ yetu a yese dee base ẽ. Bela n soe tɪ kulkā'arga la yele bela. ⁹ Tɪ Azezi soke ẽ yetu: «Fōn yu'ure?» Tɪ a lerge yetu: «Mam yu'ure de la Atusa, se'ere n soe la, tōma zo'oge mɛ.» ¹⁰ Tɪ a belem Azezi yetu, a da dige bāma tɪ ba yese tēṇa la puam. ¹¹ La kurkurdōma zozo'e n daan boe tāṇa zuo ɔbra. ¹² Tɪ kulkā'arsɪ la belem Azezi yetu: «Bɔ tɪ nōore tɪ tɪ sēṇe ka kē kurkurdōma la.» ¹³ Tɪ a sake ban yele se'em na. Tɪ kulkā'arsɪ la base buraa la dee sēṇe ka kē kurkurdōma la. Tɪ ba wuu zoe sige ka lui mōgrɛ puam ki. Ba källe daan de wu tusayi.

¹⁴ Tɪ seba n daan gu'uri kurkurdōma la zoe sēṇe tēṇa puam, la kēnkɛrsɪ la wuu ka yele sela n ēṇe la. Tɪ ba sēṇe tɪ ba ka bɪse lan ēṇe se'em. ¹⁵ La ban paage Azezi zē'am na, ba yē buraa la tɪ kulkā'arsɪ la daan dolɪ ẽ na n zī mī, ye futo, tɪ a yem bɔna sōṇa sōṇa. Tɪ dabeem kē ba. ¹⁶ Tɪ seba n yē lan ēṇe se'em na, tɔge pa'alɛ ba bōn-

seka n ēṇe buraa la, la bōn-seka n ēṇe kurkurdōma la.

¹⁷ Tɪ ba belem Azezi yetu a fōrge bāma tēṇa.

¹⁸ Tɪ Azezi daan kē'era ḡorṇɔ la puam, tɪ buraa la tɪ kulkā'arsɪ daan dolɪ ẽ na belem Azezi yetu, a base tɪ a dɔla ẽ. ¹⁹ Tɪ Azezi ka sake, dee yele ẽ yetu: «Kule ya yire ka yele fu yir-dōma Zuudāana n zoe fu ninbāalga se'em, la ẽn ēṇe sela wuu bɔ fu la.» ²⁰ Tɪ buraa la sēṇe Dekapɔɪ so'olum ka mōola Azezi n ēṇe bōn-seba wuu bɔ ēṇa. Tɪ la daan di'ige ba wuu.

Azayirusi pɔyua, la pɔka n kalum Azezi fuugo yelle

(Amatie 9:18-26, Aluki 8:40-56)

²¹ Azezi daan lebe dooge la mōgrɛ la doone ke bɔba la ḡorṇɔ la, daan bɔna mōgrɛ la nōorum, tɪ nēr-kuuṇɔ zozo'e lagse a zē'am. ²² Tɪ Zifdōma wēndeego nēṇadōma nēra ayɪla yu'ure n de Azayirusi wa'am mī wa yē Azezi, ka dūma tēṇa a nēṇam, ²³ belem ẽ na a sūure wuu yetu: «Mam pɔyua n bē'erɪ deege la a ki, wa'am wa dɪkɛ fu nu'usi paglɛ a zuo tɪ a pōse da ki.» ²⁴ Tɪ Azezi dɔla ẽ wɛ'esa, tɪ nēr-kuuṇɔ dɔla ẽ mikra ẽ.

²⁵ La pɔka n daan boe nērba la tēṇasuka luta sɪkēṇa yuuma pia la ayi, tɪ la ka gɔ'ɔra. ²⁶ A daan nāmse mɛ zo-zo'e tɪbdōma zē'am, dɪkɛ ẽn tarɪ sela wuu sā'am, dee tɪ la ka sōna, la malɪn gānna la bela. ²⁷ Tɪ pɔka la daan wōm Azezi yelle, wa'am wa fɪrge nēr-kuuṇɔ la tēṇasuka paage Azezi poorum kalum a fuugo. ²⁸ A daan yele a putē'erum yetu: «Mam sān kalum a fuugo mā'a, mam wun yē īmā'asum.» ²⁹ La ẽn kalum fuugo la, a zɪm na n yesɪ la ze'ele mɛ ka le yesra, tɪ a bāṇe a īyā puam tɪ ēṇa yē īmā'asum. ³⁰ La bilam mēṇa tɪ Azezi bāṇe tɪ pāṇa n yese ēṇa puam ēṇe sela, tɪ a gelge soke nēr-kuuṇɔ la yetu: «Ān kalum mam fuugo?» ³¹ Tɪ a karēnbiisi la lerge ẽ yetu: «Fōn yē la nēr-kuuṇɔ n mikri fōn wāna, dee sɔkra tɪ ān kalum fōn.»

³² Tɪ Azezi bɪse kaage tɪ a bāṇe nēr-seka n ēṇe bela. ³³ Tɪ dabeem tara pɔka la, tɪ a gōgra. La ẽn bāṇe sela n ēṇe ẽ na, a wa'am mɛ wa ka dūma tēṇa Azezi nēṇam tɔge ẽ a sɪra wuu. ³⁴ Tɪ Azezi yele ẽ yetu: «M bia, fōn bɔ mam sɪra la n botɪ fu yē īmā'asum. Sēṇe la sū-mā'asum, fu bā'a la base ya.»

³⁵ La Azezi n ken bɔna mī tɔgra la, tɪ nērba ze'ele Zifdōma wēndeego nēṇadāana la yire wa'am wa yele ẽ yetu: «Fu pɔyua la ki mɛ. Da le nāmse karēnsāama.»

³⁶ Tɪ Azezi wōm ban yele se'em na, dee yele Zifdōma wēndeego nēṇadāana la yetu: «Da zoe dabeem, wen bɔ mam sɪra.» ³⁷ La Azezi daan ka base tɪ nēra nēra kɔlge ẽ, sān dagna Apɪyɛrɪ, la Azakɪ, la a yɪbga Azā mā'a.

³⁸ La ban sēṇe ka paage Zifdōma wēndeego nēṇadāana yire la, tɪ Azezi yē nēr-kuuṇɔ n voollɪ, kaasra dee fabla zozo'e. ³⁹ Tɪ a kē yire la yele ba yetu: «Bēm tɪ ya vɔɔla dee kella? Bia la ka ki, a gīsri mɛ.» ⁴⁰ Tɪ ba la'ara ẽ. Tɪ a botɪ nērba la wuu yese yēṇa, dee doose bia la sɔ, la a ma, la a karēnbiisi batā la kē bia la n boe zē'a na, ⁴¹ gurɛ a nu'ugo dee yele ẽ yetu: «Talita kumi.»

A vōore de la: «Pugla, mam yeti fu ti fu isge.» ⁴² Ti pugla la daan dare isge sēnna. Ti la di'ige nērba la, ti ba ze yeri. Pugla la daan taru la yuuma pia la ayi. ⁴³ Ti Azezi daan kā'an ba yeti, ba da kān boti nēra nēra bāñe bōn-ēña. Dee yeti, ba bo pugla la dia ti a di.

Nazareti nērba ka bo Azezi sira

(Amatie 13:53-58, Aluki 4:16-30)

6 Azezi daan base tēn-ēña dee sēñe la a mēña tēñam, ti a karēnbiisi la doose ē. ² Ti Zifdōma vo'osgo daare ti a kē ba wēndeem zāsna nērba. Ti nērba pāi wōm a zāsñu la, ti la di'ige ba, ti ba sokra taaba yeti: «Bura-ēna yē zāsñu ēna la be? Āne bo ē yem ēna? A ēñe la wāne ita bōn-yālma bela? ³ Dagl ēna n de do-wāta la? Dagl ēna n de Amaari dayua, ti a yibsi dena Azaki, la Azoze, la Azudi, la Asimō la? Dagl a tāpa n boe tōma zē'am kalam wā?» Bela ti ba zagse ka bo Azezi sira. ⁴ Ti a yele ba yeti: «Nawēnne nōt'wsa yēti pēka me, sän dagna a mēña tēña, la a buuri, la a yir-dōma tēñasuka mā'a ti a ka yēti pēka.» ⁵ La a daan ka yāñe tōm tōon-yālma bilam, sän dagna bā'adōma fēe ti a daan dūke a nu'usi pagle ba zuto, ti ba yē īmā'asum. ⁶ La ban daan ka bo ē sira la, la di'ige ē me.

Azezi tōm a karēnbiisi pia la ayi

(Amatie 10:5-15, Aluki 9:1-6)

Azezi daan kaaru la tēnsi la n boe bilam na zāsna nērba, ⁷ daan wi a karēnbiisi pia la ayi la, ti ba wa'am a zē'am ti a tōm ba bayi bayi, dee bo ba pāña ti ba dige kulkā'arsu. ⁸ Dee daan yele ba yeti: «Da dūke-ya sela sela sore la sēnne īyā, dūke-ya dasaare mā'a, da tara-ya dia, bu tāmpoko, bu ligri sūm sēñe. ⁹ La pire-ya tagra, dee da ye-ya futo bayi bayi.» ¹⁰ A le yele ba yeti: «Yan sēñe ka sige yi-seka, kē'era-ya bilam ka paage daar-se-ka ti ya wun yese fōrge tēña la. ¹¹ La tēn-seka nērba n ka to'oge ya, bu ka selse ya yetoga, ya yese zē'e-ēña dee puse ya nāma tēntōnnu base mī. Ya sän ēñe bela, la wun pa'ale ba ti ba ka ēñe sōña.» ¹² Ti karēnbiisi la sēñe ka mōola yeti, ba teege yem base tōon-be'ero. ¹³ Dee dige kulkā'arsu zozo'e ti ba yese, dee ēñe kaam ēñe bā'adōma zozo'e zuto, ti ba yē īmā'asum.

Azā n mise nērba ko'om puam na kūm yelle

(Amatie 14:1-12, Aluki 9:7-9)

¹⁴ Ti naba A'erodl wōm Azezi yelle, se'ere n soe la, Azezi yu'ure daan yese la zē'a woo. Ti nērba baseba daan yeta ti: «A de la Azā n daan misri nērba ko'om puam na n vo'oge, bela n soe ti a tara pāña tōnna tōon-yālma.» ¹⁵ Ti baseba yeti: «A de la Nawēnne nōt'wsa A'eli n leme wa'am.» Ti seba yeti: «A de la Nawēnne nōt'wsa ayēma wu Nawēnne nōt'wsaba baseba n daan boe la.» ¹⁶ Ti naba A'erodl daan wōm

bela, yeti: «A de la Azā seka ti mam daan boti ba wike a zuugo la n vo'oge.»

¹⁷ Se'ere n soe la, A'erodl mēña n daan boti ba yōke Azā lu taru ka kē'esē yu'a deem, a kēema Afilipi poga A'erodiadi īyā. Se'ere n soe la, a daan fāage la a kēema poga di. ¹⁸ Ti Azā daan yele ē yeti, la ka mase ti a fāage a kēema poga di. ¹⁹ Ti A'erodiadi sūure yīge la Azā, ti a zigra ti a ku ē, la A'erodl īyā a ka tā'age ku ē. ²⁰ A'erodl daan zoti Azā me, a daan mi ti a de la nēr-sōñu, dee dena pupeelem dāana, bela īyā ti a gu'ura ē ti sela da ēñe ē. A daan sän ēn selsra Azā yetoga, la dāan ē me zozo'e, la baa bela, a ēn selsra ē me la sū-yēlga.

²¹ La daare ayula ti A'erodl ēñe a doka daare kibsa, wi a tēña nērzuoto, la suda-ke'endōma, la Galile nēñadōma. Ti A'erodiadi yē sore ēñe ēña n boori se'em na.

²² A'erodiadi poyua n daan kē ka wa, ti A'erodl, la sāa-ma la sūure ēñe yēlum. Ti naba la yele pugla la yeti:

«Sose mam fōn boori sela ti m bo f.» ²³ Dee poi yeti:

«Bōn-seka wuu ti fu wun sose mam, baa la sän dena

mam so'olum pusuka, mam wun bo f.» ²⁴ Ti pugla la

yese ka soke a ma yeti: «M sose bēm?» Ti a ma lerge ē

yeti: «Sose Azā n mise nērba ko'om puam na zuugo.»

²⁵ Ti pugla la lebe naba la zē'am tōto ka yele ē yeti:

«Mam boori ti fu dūke la Azā n mise nērba ko'om puam

na zuugo ēñe la-pesña puam bo ma lēle wā.» ²⁶ Ti na-

ba la sūure sā'am halu, la ēn poi nērba la zē'am na īyā,

a ka boori ti a mōñe ē. ²⁷ Ti a tōm a sudaaga tōto yeti,

a sēñe ka wike Azā zuugo taru wa'am. Ti a yese sēñe

yu'a deem na ka wike Azā zuugo, ²⁸ dūke ēñe la-pesña

puam taru wa'am wa bo pugla la. Ti pugla la dūke zuu-

go la bo a ma. ²⁹ Ti Azā karēnbiisi wōm, sēñe ka dūke

kūm na laage.

Azezi bo nēr-kuuñu dia

(Amatie 14:13-21, Aluki 9:10-17, Azā 6:1-14)

³⁰ Azezi n tōm seba la leme me wa lagse taaba a zē'am tōge pa'ale ē bāma n ēñe sela, la bāma n zāsum

se'em wuu. ³¹ La nērba zozo'e n daan sēnni mī dee fōr-

gra, ti Azezi la a karēnbiisi la daan ka yē folle wun di. Ti

Azezi yele a karēnbiisi la yeti: «Wa'am-ya ti ti yese

kēnkernja zē'e-seka ti nērba ka boe mī na, ti ya ka

vo'ose fēe.» ³² Ti ba kē ñorñu we'esa kēnkernja zē'e-seka

ti nērba ka boe.

³³ Ti nērba zozo'e daan yē ban we'esi la bāñe ba,

daan yese tēnsi la wuu puam lagum sēñe tōto dēñe

Azezi la a karēnbiisi la zē'e-seka ti ba we'esi la. ³⁴ Ti

Azezi paage ze'ele ñorñu la zuo sige, yē nēr-kuuñu la, ti

ba ninbāalga yōke ē, se'ere n soe la, ba ān wu piisi n ka

taru dūnsīina. Ti a daan zāsna ba yela zozo'e. ³⁵ Ti wēn-

ne daan kē'era, ti a karēnbiisi la sēñe ka yele ē yeti:

«Kalam zē'a de la mōom dee ti wēnne kē'era, ³⁶ base

nērba la ti ba sēñe yie, la tēn-pigsi la ka da dia di.» ³⁷ Ti

a lerge ba yeti: «Yāma mēña bo ba dia ti ba di.» Ti ba

soke ē yeti: «Ti wun sēñe ka da borboru lig-kōba kobsyi

tarı wa'am wa bɔ ba tı ba di?» ³⁸ Tı Azezi soke ba yetı: «Yāma tarı la borborı bale? Sēŋe-ya ka bıse.» Tı ba sēŋe ka bıse, dee leme wa yetı: «Tōma tarı la borborı banuu la zūma bayi.»

³⁹ Tı Azezi yele ba yetı, ba base tı nērba la welse sill-sille zīire mō-mā'asa la zuo. ⁴⁰ Tı ba daan zīire kɔbga kɔbga, tı baseba zīire pinu-nu. ⁴¹ Tı Azezi dıke borborı banuu, la zūma bayi la gorge bıse saazuo pu'use Nawēnne, dee fiise borborı la bɔ a karēnbiisi la yetı, ba puı nērba la, dee dıke zūma bayi la fiise bɔ ba wuu. ⁴² Tı ba wuu di tıge. ⁴³ Tı a karēnbiisi la vaage borbor-gito, la zūn-gito n deege pıre pıto pia la ayi. ⁴⁴ Nērba la n daan di dia la, buraasi de la tusanuu.

Azezi sēnnı ko'om zuo

(Amatie 14:22-33, Azā 6:15-21)

⁴⁵ Bela poorum tı Azezi dare base tı a karēnbiisi la kē ōorŋɔ dēŋe ē dɔɔra mōgre la doone ke bɔba, Betisayi-da tēŋa bɔba. Dee tı a mēŋa weege tı a keese nērba la. ⁴⁶ La ēn keese ba la, a sēŋe la tāŋa zuo tı a ka pu'use. ⁴⁷ Tı wēnne kē tı ōorŋɔ la bɔna ko-kāte la tēŋasuka, dee tı Azezi bɔna doone ēŋa ayıla mā'a. ⁴⁸ Tı Azezi yē tı a karēnbiisi la n mōnnı ōorŋɔ la nāmsrı me zozo'e, se'ere n soe la, kusebgo n vugrı tu'usra ba. Tı beere yɔna wi-ire, tı a sēnna ko'om na zuo we'esa ba bɔba, bɔɔra tı a gāŋe ba tole. ⁴⁹ La ban yē ēn sēnnı ko'om na zuo la, ba tē'ese tı a de la ki-isgne, tı ba kaase tagursi. ⁵⁰ Ba wuu yē ē me, tı dabeem kē ba. Tı a dare yele ba yetı: «La de la mam, keŋe-ya ya sūure, da zoe-ya dabeem!» ⁵¹ Dee zom ba zē'am ōorŋɔ la puam, tı kusebgo la go'oge. Tı karēnbiisi la palēŋa ēke, tı ba ze yeri, se'ere n soe la, ⁵² ba ka bāŋe borborı bōn-yālma la vōore, ba putē'era ka like.

Azezi botı bā'adōma yē ĩmā'asum Zenezareti tēŋam

(Amatie 14:34-36)

⁵³ Ba pārgɔ mōgre la dooge paage la Zenezareti, ze'ele mōgre la nōorum. ⁵⁴ La ban daan ze'ele ōorŋɔ la puam dooge la, tı nērba la bāŋe Azezi tɔtɔ. ⁵⁵ Tı ba zoe kē so'olum na wuu, tı ba ze bā'adōma ba bōn-gā'ala puam wa'am, bāma n wōm tı Azezi boe zē'e-seka la. ⁵⁶ La Azezi daan sän ēn sēŋe zē'e-seka woo, tēn-kāra, la tēn-pıgsı, la yie n boe kēnkırsı la, ba tarı la bā'adōma sēnna gā'ata da'ası puam, dee belna ē yetı, a base tı bā'adōma la kalum a fuugo nōore mā'a. La seba wuu n daan kalum a fuugo la yē ĩmā'asum me.

Yaabdōma zāsŋɔ, la bōn-seba n botı nēra dena dēgrɔ

(Amatie 15:1-20)

7 Farisi dōma, la lɔɔ karēnsāandōma baseba n ze'ele Zerizalem daan wa'am wa lagse Azezi zē'am, ² yē tı a karēnbiisi la baseba diti la nu'usi n ka ān sōŋa,

la boorı tı la yetı ba ka peege nu'usi wu Zıfdōma sisgo n yetı ba ita se'em na.

³ Farisi dōma, la Zıfdōma wuu sän ka wobse nu'usi wu ba yaabdōma malŋɔ la, ba ka diti. ⁴ Ba sän ze'ele da'am wa'am, ba wun peege ba mēŋa me dee di. La malŋɔ baseba zozo'e tı ba itı, la de la wama, la yɔa, la kuto laasi peere.

⁵ Tı Farisi dōma, la lɔɔ karēnsāandōma la soke Azezi yetı: «Bēm tı fōn karēnbiisi la ka sakra tı yaabdōma malŋɔ la, dita dia la nu'usi n ka ān sōŋa?» ⁶ Tı Azezi lerge ba yetı: «A'ezayi n yuun to'oge Nawēnne yetɔga la tɔge ya yelle la, a tarı buurɔ, yāma de la pulibsum dōma wu lan gulse se'em na. La gulse tı Nawēnne yetı: «Nēr-bāna pēgrı mam na nōore yetɔga, la ba sūure la zāage la mam me.

⁷ Ban nā'asrı mam na, la de la zāŋa.

Se'ere n soe la, ba zāsı la zāsŋɔ n de nērsaalba nōore.»

⁸ Ya base Nawēnne nōore me dee dɔla nērsaalba malŋɔ.»

⁹ Azezi le yele ba yetı: «Ya sırı zagse Nawēnne lɔɔ me, dee tı ya dɔla ya mēŋa malŋɔ. ¹⁰ Amoyisi yuun yetı: Nanna fu sɔ, la fu ma. Dee le yetı: Nēr-seka sän tɔge a sɔ bu a ma be'em, dēnı tı ba ku ē. ¹¹ La yāma yetı: Nēra sän yele a sɔ, bu a ma yetı: Mam n tarı bōn-seba tı m sōŋe fu la de la «Kɔrbā», (a vōore de la «Nawēnne bōnɔ»), ¹² la ka le mase tı a ita sela bɔ'ɔra a sɔ, la a ma. ¹³ Yāma mēŋa malŋɔ la tı ya zāsı nērba la, botı ya base tı Nawēnne yetɔga la dena la zāŋa. La bōnɔ zozo'e n wōm na bela tı ya itı.»

¹⁴ La Azezi le wi la nēr-kuurɔ, tı ba wa'am a zē'am, tı a yele ba yetı: «Yāma wuu, selse-ya mam sōŋa wōm a vōore. ¹⁵ Sela n ze'eti yēŋa kē'eri nērsaala puurum ka tā wun botı a dena dēgrɔ. Bōn-seka n ze'eti nērsaala puam yesra n botı a dena dēgrɔ. [¹⁶ Seka n wōm yetɔga wā, a selse sōŋa sōŋa.]]»

¹⁷ La a daan ze'ele nērba la zē'am kē la deem. Tı a karēnbiisi la soke ē makre la vōore. ¹⁸ Tı a yele ba yetı: «Yāma yem mē ka like? Yāma ka bāŋe tı sela n ze'eti yēŋa kē'era nērsaala puurum ka tā wun botı a dena dēgrɔ? ¹⁹ Se'ere n soe la, bōn-bāma ka kē'eri sūure puam, ba kē'eri la puure puam tı ba yē'era ba basra.» (Azezi n daan yele bela la, a boorı tı a yetı dia ka bɔ'ɔrı dēgrɔ, nēra tā wun di dia wuu me.) ²⁰ Dee daan le yetı: «La de la bōn-seka n ze'eti nērsaala puam yesra n botı a dena dēgrɔ. ²¹ Se'ere n soe la, putē'e-yooro ze'eti la nērsaala sūure puam botı a bɔɔra tı a ēŋe be'em: yalsı, la nayigum, la nēr-kua, ²² la taaba pɔgba la taaba sırba gā'a, la nēra n nōŋe bōnɔ, la putuulgo, la yemkēgsıga, la tōon-dēgrɔ, la nēra n itı sūure la a tadāana bōnɔ, la pɔ'ɔre yetɔga, la pa'al-m-mēŋa, la yalm-tōoma. ²³ Bōn-be'ero bāna wuu ze'eti la nērsaala sūure puam botı a dena dēgrɔ.»

Pɔka n bɔ Azezi sura

(Amatie 15:21-28)

²⁴ Azezi daan ze'ele zē'e-ēŋa sēŋe la Tiiri so'olum ka kē yire puam, dee ka bɔɔra tɪ nēra bāŋe tɪ ēŋa boe bilam. La a daan ka tā'age sūge. ²⁵ Tɪ pɔka ayɪla tɪ kulkā'arga daan dolɪ a pɔyua, wōm Azezi yelle, sēŋe ka ka dūma tēŋa a nēŋam, ²⁶ sose ē yetɪ, a dige kulkā'arga la tɪ a yese dee base a pɔyua la. Pɔka la daan de la Greki, ba dɔge ē na Fenisi tēŋa n boe Siiri so'olum puam. ²⁷ Tɪ Azezi lerge ē yetɪ: «Base tɪ kɔma dēŋe di tuge, se'ere n soe la, la ka mase tɪ ba dɪke kɔma dia bɔ baasi.» ²⁸ Tɪ pɔka la lerge ē yetɪ: «M Zuudāana, la de la sura, la baasi n boe ba dāana taablɪ tilum diti la kɔma di-zōra n luti la.» ²⁹ Tɪ Azezi yele ē yetɪ: «Fōn lerge se'em wā ŷyā, kule, tɪ kulkā'arga la base fu pɔyua la.» ³⁰ Tɪ pɔka la daan lebe kule, la ēn paage yire la, a yē tɪ a pɔyua la gā la bōn-gā'ala puam, la kulkā'arga la sɪrɪ yese dee base ē mē.

Azezi botɪ buraa n de waŋa, dee ka tāna tɔgra sōŋa, tā'age tɔgra dee wōnna

³¹ Azezi le ze'ele Tiiri so'olum doose la Sidō, doose Dekapɔlɪ tēnsɪ puam lebe Galile mōgre la bɔba. ³² Tɪ ba tarɪ buraa n de waŋa, dee ka tāna tɔgra sōŋa wa'am a zē'am, wa belem ē yetɪ, a dɪke a nu'ugo pagle waŋa la zuo. ³³ Tɪ Azezi tarɪ ē nēr-kuɔŋɔ la puam yese kēnkernja dɪke a nu'ubie tūm a tuba puam, dee tubse nōtōorum kalum buraa la zɪlɔŋa. ³⁴ Dee gorge saazuo sɪ'im vo'ose fōo, dee yele buraa la yetɪ: «Efata», a vōore de la «yo'oge!» ³⁵ Bilam mēŋa tɪ buraa la tuba yo'oge, tɪ a zɪlɔŋa lake, tɪ a tɔgra sōŋa sōŋa. ³⁶ Tɪ Azezi kā'an ba yetɪ, ba da tɔge bɔ nēra nēra. La ēn daan kā'an ba yetɪ, ba da tɔge bɔ nēra nēra la, ba daan tōn tɔgra mē zo-zo'e. ³⁷ Tɪ la di'ige ba zozo'e halɪ tɪ ba yetɪ tɪ: «A ēŋe sela woo la sōŋa, botɪ wansɪ wōnna, tɪ mugro tɔgra.»

Azezi le bɔ nēr-kuɔŋɔ dia

(Amatie 15:32-39)

8 Dabs-bāma puam nēr-kuɔŋɔ n daan le lagse, tɪ dia ka bɔna tɪ ba wun di. Tɪ Azezi wi a karēnbiisi la yele ba yetɪ: ² «Nēr-kuɔŋɔ wā ninbāalga n tarɪ mam, se'ere n soe la, dabsa atā tɪ ba boe mam zē'am dee ka tara dia wun di. ³ Mam sān base ba tɪ ba kule ba yie la kɔm, ba wun ka vibe mē sore, se'ere n soe la, baseba ze'ele la zē'a n zāage wa'am.» ⁴ Tɪ a karēnbiisi la lerge ē yetɪ: «Tɪ wun ēŋe la wāne tā'age yē dia tɪ la seke nēr-bāna wuu, zē'e-ēna n de mōom wā?» ⁵ Tɪ Azezi soke ba yetɪ: «Yāma tarɪ la borborɪ bale?» Tɪ ba lerge yetɪ: «Bayopɔɪ.»

⁶ Tɪ a botɪ nērba la zɪ'ire tēŋa. Dee dɪke borborɪ bayopɔɪ la pu'use Nawēnne, dee fiise bɔ a karēnbiisi la tɪ ba puɪ nērba la. Tɪ ba puɪ nēr-kuɔŋɔ la. ⁷ La ba daan

tarɪ la zūn-pɪgsɪ mē fēe. Tɪ Azezi pu'use Nawēnne zūma la ŷyā, dee botɪ a karēnbiisi la dɪke puɪ nērba la. ⁸ Tɪ nērba la daan di tuge. Dee tɪ a karēnbiisi la vaage dia n weege pɪre pɪtɔ bayopɔɪ. ⁹ Nērba la n daan di dia la, buraasi de wu tusanaasi. Tɪ Azezi daan botɪ ba kule, ¹⁰ dee tɪ ēŋa la a karēnbiisi la kē ōorŋɔ sēŋe Dalmanuta so'olum.

Farisi dōma pulibsum yelle

(Amatie 16:1-12)

¹¹ Tɪ Farisi dōma daan wa'am wa wē'era nōke'ene la Azezi, yetɪ ba make ē bise, yele ē yetɪ, a botɪ bōn-yālma ze'ele saazuo ēŋe n pa'alɪ tɪ ēŋa ze'ele la Nawēnne yire. ¹² Tɪ Azezi sɪ'im vo'ose fōo, dee soke yetɪ: «Bēm tɪ zamāana ēna nērba ēera bōn-yālma? Mam yetɪ ya la sura, tɪ mam kān botɪ bōn-yālma n pa'ale bela ēŋe tɪ zamāana ēna yē.»

¹³ La Azezi base ba mē dee le kē ōorŋɔ dɔɔra mōgre la doone ke bɔba. ¹⁴ Tɪ a karēnbiisi la daan yīm ka dɪke borborɪ, sān dagna borborɪ ayɪla mā'a tɪ ba tarɪ ōorŋɔ la puam. ¹⁵ Tɪ Azezi kā'an ba yetɪ: «Guuse-ya ya mēŋa la Farisi dōma, la naba A'erɔdɪ dābulle la.» ¹⁶ Tɪ karēnbiisi la tɔgra la taaba yetɪ: «Tōma n ka tarɪ borborɪ la ŷyā tɪ a yele bela.» ¹⁷ Tɪ Azezi daan bāŋe, soke ba yetɪ: «Bēm tɪ ya tɔgra la taaba tɪ la de la yāma n ka tarɪ borborɪ la ŷyā? Yāma ka wōm a vōore? Yāma yem ka like? ¹⁸ Yāma tarɪ la nini dee ka yēta? Ya tarɪ la tuba dee ka wōnna? Yāma ka tērɪ? ¹⁹ Mam n daan fiise borborɪ banuu la bɔ buraasi tusanuu tɪ ba di la, borborɪ gito n dege la, pɪtɔ bale tɪ yāma daan vaage?» Tɪ ba lerge ē yetɪ: «Pɪtɔ pia la ayi.» Tɪ a le soke ba yetɪ: ²⁰ «La mam n daan fiise borborɪ bayopɔɪ la puɪ buraasi tusanaasi la, yāma daan vaage seba n dege la pɪtɔ bale?» Tɪ ba lerge yetɪ: «Pɪtɔ bayopɔɪ.» ²¹ Tɪ a soke ba yetɪ: «Yāma nān ka wōm a vōore?»

Azezi botɪ fua nini yēta

²² Azezi la a karēnbiisi la daan sēŋe la Betisayida. Tɪ ba tarɪ fua wa'am Azezi zē'am wa belem ē yetɪ a kalum ē. ²³ Tɪ Azezi gure fua la nu'ugo ve'ege ē tēŋa la puam yese kēnkernja, ka tubse nōtōorum ēŋe a nini, dee dɪke a nu'usi pagle a zuo, soke ē yetɪ: «Fōn yēti sela mē bu?» ²⁴ Tɪ buraa la dɔ'oge zuugo bise, yetɪ: «Mam yēti nērba tɪ ba āna wu tɪsɪ la, la ba sēnnɪ mē.» ²⁵ Tɪ Azezi le dɪke a nu'usi kalum fua la nini. Tɪ a nini pike yulŋe, tɪ a yēta sela woo sōŋa sōŋa. ²⁶ Tɪ Azezi base ē yetɪ a kule, a da le kē tēŋa la puam.

Apiyεrɪ pa'ale Azezi n de nēr-seka

(Amatie 16:13-20, Aluki 9:18-21)

²⁷ La Azezi la a karēnbiisi la daan we'esɪ la tēnsɪ n lēm tēŋa yu'ure n de Filipi Sezaare. La ban boe sore wē'esa la, tɪ a soke ba yetɪ: «Nērba yetɪ mam de la āne?» ²⁸ Tɪ

ba lerge yeti: «Seba yeti fõn de la Azã n daan misri nërba ko'om puam na. Tl baseba yeti fõn de la Nawënne nõto'wsa A'eli. Tl seba yeti fõn de la Nawënne nõto'wsruba n yuun boe la nëra ayula.» ²⁹ Tl a soke ba yeti: «La yãma yeti mam de la ãne?» Tl Apyeeri lerge yeti: «Fõn de la Krisi tl Nawënne tõm na.» ³⁰ Tl Azezi kã'an ba yeti, ba da tɔge ëŋa yelle bɔ nëra nëra.

Azezi dëŋe tɔge a nãmsgɔ, la a kũm yelle

(Amatie 16:21-28, Aluki 9:22-27)

³¹ Tl Azezi yãŋa zãsna a karënbiisi la, yele ba yeti: «Dëni tl mam n de Nërsaala Dayua la nãmse zozo'e. Tëŋa wã këma, la kãabgɔ këma nëŋadõma, la lɔɔ karënsãandõma nifo wun kë mam mɛ, tl ba ku mam, la dabsa atã daare mam wun vo'oge mɛ.» ³² A daan tɔge ba la vëelga vëelga. Tl Apyeeri wi ë yese kënkerŋa ka yele ë yeti, a da le tɔge bela. ³³ Tl Azezi gelge buse a karënbiisi la, dee tãse Apyeeri yeti: «Asūtãana, sëŋe lebe mam poorum, se'ere n soe la, fu t'ësɔgɔ la dagi Nawënne t'ësɔgɔ, la de la nërsaala t'ësɔgɔ.» ³⁴ Dee wi nër-kuuŋɔ la, la a karënbiisi la a zë'am, yele ba yeti: «Nëra sãn bɔɔra tl a doose mam, dëni tl a base a mëŋa n boori se'em, dee sake nãmsgɔ daare woo wu nëra n buke a kũm dɔ-puurŋa dɔla mam. ³⁵ Nër-seka woo n boori tl a gu a vɔm, a wun koŋe ë. La nër-seka woo n sake tl a koŋe a vɔm mam iŷã, la kō-yëlga la iŷã, a wun yë vɔm. ³⁶ Nëra sãn yë dũnia sela woo dee koŋe vɔm Nawënne zë'am, a yõoro de la bëm? ³⁷ Bëm tl nërsaala wun dɔke teege vɔm? Sela kal. ³⁸ Nër-seka n zoe yãnnɛ mam iŷã, la mam yetɔga la iŷã, zamãana ëna wã n ka doli Nawënne la sra, dee dëna tōon-be'ero dõma wã tēŋasuka, Nërsaala Dayua la më wun zoe yãnnɛ na ë, wakat-seka tl a wun leme wa'am la a So Nawënne na'am pãŋa, la a malekadõma la.»

9 La a le yele ba yeti: «Mam yeti ya la sra, tl yãma nër-seba n boe kalam wã, baseba kãn ki, sãn dagna tl ba wa yë la Nawënne so'olum n sëm na pãŋa.»

Azezi nëŋa teere

(Amatie 17:1-13, Aluki 9:28-36)

² Tl dabsa ayoobi daan tole, tl Azezi boti Apyeeri, la Azaki, la Azã mã'a doose ë tl ba sëŋe kënkerŋa ka zom tãn-kãte zuo. Tl a nëŋa teege ba nëŋam. ³ Tl a futo pelge yuli yuli yëgra halɔ, tl nëra ka bɔna dũnia wã zuo tãna wun peege tl ba pelge bela. ⁴ Tl A'eli, la Amoyisi puke ba zë'am tɔgra la Azezi. ⁵ Tl Apyeeri yele Azezi yeti: «Karënsãama, tõma n boe kalam wã, la ãn sōŋa mɛ. Base tl ti tĩ pōnsi batã, bɔ fõn ayula, bɔ Amoyisi ayula, bɔ A'eli ayula.» ⁶ A daan ka mi ëŋa n tɔge se'em, se'ere n soe la, dabeem n daan kë ba. ⁷ Tl sawate wa'am wa lile ba la a mã'asum. Tl kōa ze'ele sawate la puam yeti: «Ëna de la mam Dayua tl mam nõŋe. Selse-

ya a yetɔga.» ⁸ Bilam mëŋa tl ba buse kaage ka le yë nëra, sãn dagna Azezi mã'a n boe ba zë'am.

⁹ Tl ba ze'ele tãŋa la zuo sigra, tl Azezi kã'an ba yeti: «Da tɔge-ya pa'ale nëra nëra yãma n yë sela la, sãn dagna tl Nërsaala Dayua la wa ki mɛ, dee vo'oge.» ¹⁰ Tl ba to'oge ën yele se'em na, dee sokra taaba yeti: «Kũm vo'ore vōore de la bëm?» ¹¹ Tl ba soke Azezi yeti: «Bëm tl lɔɔ karënsãandõma yeti, dëni tl A'eli dëŋe wa'am, tl Krisi yãŋa wa'am poorum?» ¹² Tl a lerge ba yeti: «Asra, A'eli n wun dëŋe wa'am wa malge sela woo. La bëm tl la gulse Nërsaala Dayua la yelle yeti, a wun nãmse mɛ zozo'e dee yë pɔ'ɔrɛ?» ¹³ La mam yeti ya mɛ tl A'eli pōn wa'am mɛ, tl nërba ëŋe ë ban boori se'em, wu lan gulse a yelle Nawënne gōŋɔ puam se'em na.»

Kulkã'arga n doli bia, tl Azezi dige ë tl a yese

(Amatie 17:14-21, Aluki 9:37-43)

¹⁴ Ban lebe ka lëm karënbiisi baseba la zë'am na, ba yë la nër-kuuŋɔ zozo'e n kaage ba, tl lɔɔ karënsãandõma baseba wë'era nõke'ema la ba. ¹⁵ La nërba la n daan yë Azezi la, la di'ige ba mɛ, tl ba zoe ka pu'use ë. ¹⁶ Tl Azezi soke ba yeti: «Bëm yelle tl yãma wë'era nõke'ene la ba?»

¹⁷ Tl nëra ayula ze'ele nër-kuuŋɔ la tēŋasuka yele yeti: «Karënsãama, mam tarɔ la m dayua wa'am fõn zë'am, kulkã'arga n doli ë boti a dëna muko. ¹⁸ La kulkã'arga la sãn ën girge ë, a lubri ë mɛ tl nōtōn-fulunfuka yesra, tl a ɔbra yëna dee gorŋe. Bela tl mam tarɔ ë wa'am wa sose fu karënbiisi la yeti ba dige kulkã'arga la tl a yese, tl ba ka yãŋe.»

¹⁹ Tl Azezi yele ba yeti: «Zamãan-ëna nërba, ya ka bɔ'ɔrɔ mam sra, mam wun bɔna la yãma mã'age m mëŋa halɔ ka paage la wakat-kãna? Tarɔ-ya bia la wa'am.» ²⁰ Tl ba tarɔ ë wa'am a zë'am. La kulkã'arga la n yë Azezi la, bilam mëŋa a dãan bia la mɛ, tl a lui tēŋa bilna, tl nōtōn-fulunfuka yesra a nōorum. ²¹ Tl Azezi soke bia la so yeti: «Wakat-kãna tl bōn-ëna ëŋe ë?» Tl a lerge yeti: «A bōnbɔ'ulum. ²² La kulkã'arga la ën lubɛ ë na bugum, bu ko'om puam, bɔɔra tl a ku ë. Fu sãn tãna wun ëŋe sela, zoe tl ninbãalga sōŋe tɔ.» ²³ Tl Azezi lerge ë yeti: «Bëm tl fu yeti, fõn sãn tãna? Nër-seka woo n bɔ Nawënne sra, a tã wun ëŋe sela woo bɔ ë mɛ.» ²⁴ Bilam mëŋa tl bia la so tɔge ke'enke'em yeti: «Mam bɔ sra, la sōŋe mam tl m bɔ sra pa'ase.»

²⁵ La Azezi daan yë tl nër-kuuŋɔ n zoti sëna a zë'am, tl a tãse kulkã'arga la yeti: «Kulkã'arga n boti nëra dëna muko la waŋa, mam yeti fu yese dee base ë, da le doose ë.» ²⁶ Tl kulkã'arga la kaase tagurga, dee bigse bia la ke'enke'em, dee yese. Tl bia la ãna wu kũm na. Tl nërba zozo'e yeti a ki mɛ. ²⁷ Tl Azezi gure a nu'ugo zëke ë, tl a isge ze'ele saazuo.

²⁸ La Azezi daan kë la deem, ëŋa la a karënbiisi la mã'a, tl ba soke ë yeti: «Bëm tl tõma ka tã'age dige kulkã'ar-ëna?» ²⁹ Tl a lerge ba yeti: «Sãn dagna pu'us-

gɔ, sela sela ka boe n tã wun dige kulkã'ar-ëna buuri.»

Azezi le tɔge a kũm, la a vo'ore yelle

(Amatie 17:22-23, Aluki 9:43-45)

³⁰ La ba daan yese bilam doose la Galile tēja tole. La Azezi daan ka boori ti nēra bāŋe ēŋa n boe zē'a. ³¹ A daan zāsum a karēnbiisi la yeti: «Ba wun dɩke Nērsaala Dayua la ēŋe la nēra nu'usum, ti ba ku ē. La ba sãn ku ē, dabsa atã daare a wun vo'oge mɛ.» ³² Ti ba daan ka bāŋe yetɔga la vōore, dee zɔta ka soke ē.

Āne n wun dɛna nēr-kāte?

(Amatie 18:1-9, Aluki 9:46-50; 17:1-2)

³³ Ti ba sēŋe ka paage Kapernaum kē deem. Ti Azezi soke a karēnbiisi la yeti: «Bēm yelle ti yāma wē'eri n nōke'ene sore zuo la?» ³⁴ Ti ba sīna, se'ere n soe la, ba wē'eri la nōke'ene la taaba bɔɔra ti ba bāŋe sɛka n de nēr-kāte gānna. ³⁵ Ti Azezi zī'ire, wi a karēnbiisi pia la ayi la yele ba yeti: «Nēra sãn bɔɔra ti a dɛna nēŋadāana, dēni ti a dɛna poorum dāana, la nēra wuu tōntōnna.» ³⁶ Azezi yele bela dee tarɩ la bi-pɩka wa ze'ele ba tēŋasuka, dɩke a nu'usi kōke bia la, dee yele ba yeti: ³⁷ «Nēra sãn to'oge bi-pɩka ēna tadāana mam yu'urɛ īyā, a to'oge la mam mēŋa, la nēra sãn to'oge mam mēŋa, la dagɩ mam ti a to'oge, a to'oge la sɛka n tōm mam na.»

³⁸ Ti Azā yele ē yeti: «Karēnsāama, tōma daan yē la buraa n tarɩ fōn yu'urɛ digra kulkā'arsi, la ēŋa n ka po dɛna tōma nēra la īyā ti tōma gu ē.» ³⁹ Ti Azezi yele ba yeti: «Da gu-ya ē, se'ere n soe la, nēra ka boe wun tōm tōon-yālma la mam yu'urɛ, dee ti la ēŋe fēe ti a le tã'age tɔge mam be'em. ⁴⁰ Nēr-sɛka n ka sisri tōma, a de la tōma nēra. ⁴¹ Mam yeti ya la asura, ti nēra sãn bɔ ya ko'om ti ya yū, yāma n de mam n de Krisi nēra la īyā, ēŋa dāana kãn koŋe a yɔɔɔɔ.

⁴² La nēra sãn botɩ kɔm-pɩgsɩ bāna wā n bɔ mam sɩra la ayɩla base Nawēnne sore, sɩbgrɛ sɛka ti a wun yē la, ba sãn dɩke nēere kug-kāte lu yulɛ a yugla lobe ē base ko-kāte puam n sōɩ. ⁴³ La fu nu'ugo sãn yeti a botɩ fu base Nawēnne sore, fu wike ē base, se'ere n soe la, fu sãn tara nu'u-yēŋɔ dee kē Nawēnne yire vɔa, n sōɩ fōn wun tara nu'usi bayi dee kē bug-tēja, [⁴⁴ zē'e-ēŋa ti zūnzūa boe mĩ dita nēra īyā ka kiira, dee ti bugum na ka kīŋra.] ⁴⁵ La fu nā'are sãn yeti a botɩ fu base Nawēnne sore, fu wike ē base, se'ere n soe la, fu sãn tara nā'a-yēŋɔ dee kē Nawēnne yire vɔa, n sōɩ fōn wun tara nā-ma bayi dee ti ba dɩke fu lobe base bug-tēja, [⁴⁶ zē'e-ēŋa ti zūnzūa boe mĩ dita nēra īyā ka kiira, dee ti bugum na ka kīŋra.] ⁴⁷ La fu nifo sãn yeti a botɩ fu base Nawēnne sore, fu kɩrgɛ ē base, se'ere n soe la, fu sãn tara nin-yēŋɔ dee kē Nawēnne so'olum, n sōɩ fōn wun tara nini bayi dee ti ba lobe fu base bug-tēja, ⁴⁸ zē'e-

ēŋa ti zūnzūa boe mĩ dita nēra īyā ka kiira, dee ti bugum na ka kīŋra.

⁴⁹ Ba wun dɩke la bugum make nēra wuu wu ban dɩke yaarum yugse sela. ⁵⁰ Yaarum ān sōŋa mɛ, la yaarum sãn sabge, ba wun ēŋe la wāne botɩ a le āna yēlum?

Āna-ya wu yaarum n tarɩ yēlum se'em na, dee tara sū-mā'asum la taaba.»

Pɔka lebsgo yelle

(Amatie 19:1-12, Aluki 16:18)

10 La Azezi daan ze'ele zē'e-ēŋa sēŋe la Zude so'olum, Zurdē doone ke bɔba. Ti nēra zozo'e le lagse a zē'am, ti a zāsna ba wu ēŋa n ēn tta se'em na.

² Ti Farisi dōma baseba wa'am ti ba di a yem bɩɛ, soke ē yeti: «Buraa tarɩ nōore ti a lebsɛ a pɔga mɛ bu?» ³ Ti a lebe soke ba yeti: «Amoyisi yuun bɔ ya nōore yeti bēm?» ⁴ Ti ba lerge yeti: «Amoyisi yuun sake ti ti gulɛ la pɔgdire lebsgo gōŋɔ, dee tarɩ ē ka lebsɛ.» ⁵ Ti Azezi yele ba yeti: «La de la ya sūure n kɛ ti ya ka sake pa'algo la īyā ti Amoyisi yuun gulɛ nōor-ēŋa bɔ ya. ⁶ La halɩ dūnia pī'iluŋo, Nawēnne n yuun nāam nēr-saalba la, a nāam la buraa la pɔka. ⁷ Bela īyā ti buraa wun base a sɔ, la a ma, dee lagum na a pɔga. ⁸ La ba ka le dɛna bayi, ba lebsge la ayɩla. ⁹ Bela, sela ti Nawēnne lagum na taaba, nērsaala da welge ba.»

¹⁰ La Azezi la a karēnbiisi la kē la deem, ti ba le soke ē yelle ēŋa vōore. ¹¹ Ti a yele ba yeti: «Buraa sãn lebsɛ a pɔga dee di pɔka ayēma, a ēŋe la be'em wu nēra n gā'arɩ la a tadāana pɔga. ¹² La pɔka mē sãn base a sɩra dee ele buraa ayēma, a mē ēŋe la be'em wu a gā'are la buraa n dagɩ a sɩra.»

Azezi kã kã'a-sōma bɔ kɔma

(Amatie 19:13-15, Aluki 18:15-17)

¹³ Ti nēra zozo'e tarɩ kɔm-pɩgsɩ wa'am Azezi zē'am ti a dɩke a nu'usi pagɩ ba zuto. Ti a karēnbiisi la zɛbe nēra la. ¹⁴ La Azezi n yē bela la, la ka ēŋe a sūure yēlum, ti a yele ba yeti: «Base-ya kɔm-pɩgsɩ la ti ba wa'am mam zē'am, da gu'ura-ya ba, se'ere n soe la, Nawēnne so'olum de la nēr-sɛba n ān wu kɔma wā bōɔɔ. ¹⁵ Mam yeti ya la sɩra, ti nēr-sɛka n ka sake ti Nawēnne sɔna ē wu bia la, a kãn kē Nawēnne so'olum puam.» ¹⁶ A yele bela, dee to'ose kɔma la mɛ, dɩke a nu'usi pagɩ ba zuto kã kã'a-sōma bɔ ba.

Bōntarsa yelle

(Amatie 19:16-30, Aluki 18:18-30)

¹⁷ Azezi daan base bilam dee le dɩke la sore sēnna. Ti buraa zoe wa'am a zē'am, wa ka dūma a nēŋam soke ē yeti: «Karēnsāama, fōn de la nēr-sōŋɔ, mam wun ēŋe la wāne yē vɔm n ka ba'asɩ?» ¹⁸ Ti Azezi yele ē yeti: «Bēm ti fōn wi'ira mam ti nēr-sōŋɔ? Nēra ka boe n ān

sõja sãn dagna Nawënne mã'a. ¹⁹ Fõn mi Nawënne n bõ nõore ti ba ita se'em: «Da ku nẽra, da gã'are la fu tadãana pɔga, da zũ, da tɔge pɔmpɔrɔɔ kaseto, da wẽge nẽra, nanna fu sɔ, la fu ma.» ²⁰ Tɪ buraa la lerge ẽ yetu: «Karẽnsãama, halɪ mam bõnbɪ'ulum tɪ mam põn sakra bõn-bãma wuu.» ²¹ Tɪ Azezi bise ẽ nõge ẽ, dee yele ẽ yetu: «Sela ayɪla n deege dɛna fu ẽge: Sẽje ka koose fõn tarɪ sela la wuu dɪke ligri la bɔ nasdõma, tɪ fu wun yẽ bõntarsõm Nawënne yire, dee wa'am wa dɔla mam.» ²² La ẽn wõm wãna la, tɪ a nẽja zũje tɪ a fõrge la sũ-sã'arɔ, se'ere n soe la, a tarɪ la bõntarsõm zo'oge.

²³ Tɪ Azezi bise a karẽnbiisi la kaage, dee yele ba yetu: «La tɔ me bɔ bõntatba tɪ ba kẽ Nawënne so'olum puam.» ²⁴ Tɪ a yetɔga la di'ige a karẽnbiisi la. Tɪ Azezi le yele ba yetu: «M kɔma, la tɔ me tɪ nẽra kẽ Nawënne so'olum puam.» ²⁵ La de la nãana tɪ yugne doose fupĩim yoko puam yese, gãnna bõntarsa n wun kẽ Nawënne so'olum puam.»

²⁶ Tɪ la di'ige ba halɪ zozo'e, tɪ ba sɔkra taaba yetu: «La sãn dɛna bela, әне n wun tã'age yẽ fãare?» ²⁷ Tɪ Azezi bɪsra ba dee yetu: «Nẽrsaala ka tã wun ẽge bõn-ẽna, la Nawënne tã wun ẽge me. Se'ere n soe la, Nawënne tã sela woo ita me.»

²⁸ Tɪ Apyɛɛrɪ yele ẽ yetu: «Tõma base sela woo me dee dɔla fõn.» ²⁹ Tɪ Azezi yele yetu: «Mam yetu ya la sɪra, tɪ nẽr-seka n base a yire, bu a kẽendõma, la a yɪbsɪ, bu a ma, bu a sɔ, bu a kɔma, bu a vato mam ãyã, la Nawënne kɔ-yẽlga la ãyã, ³⁰ dũnia wã zuo a wun to'oge yie, la kẽendõma, la yɪbsɪ, la madõma, la kɔma, la vato nõor-kɔbga, la a wun yẽ nãmsgɔ. La wakate n sɛm, a wun yẽ vɔm n ka ba'asɪ. ³¹ La nẽjam dõma zozo'e wun lebge poorum dõma, tɪ poorum dõma lebge nẽjam dõma.»

Azezi le tɔge a kũm, la a vo'ore yelle

(Amatie 20:17-19, Aluki 18:31-34)

³² Ba daan boe la sore we'esa Zerizalem, tɪ Azezi bɔna ba nẽja. Tɪ a karẽnbiisi la palẽja ẽgra, dee tɪ dabeem tara nẽr-seba n daan dolɪ ba la. Tɪ Azezi le tarɪ a karẽnbiisi pia la ayɪ la sɛje ka tɔgra pa'ala ba bõn-seba n wun wa ẽje ẽja, ³³ yetu: «Ya yẽ ya, tɪ we'esɪ la Zerizalem, bilam tɪ ba wun dɪke Nẽrsaala Dayua la ka ẽje Nawënne kãabgɔ kẽma nẽjadõma, la bɔ karẽnsãandõma nu'usum. Tɪ ba wun tɔge a yelle ku yetu a mase la kũm, dɪke ẽ ẽje bu-zãɔsɪ nu'usum, ³⁴ tɪ ba la ẽ, dee tubse nõdõorum mĩ ẽ, wẽ ẽ na ka'asa dee ku ẽ. La a wun vo'oge dabsa atã daare.»

Azaki la Azã sosgo

(Amatie 20:20-28)

³⁵ Tɪ Azebede kɔma Azaki la Azã sɛje lɛm Azezi yele ẽ yetu: «Karẽnsãama, tõma boorɪ la tõma n wun sose fõn

bõn-seka la, fu ẽje bɔ tɔ.» ³⁶ Tɪ a soke ba yetu: «Yãma boorɪ tɪ m ẽje la bẽm bɔ ya?» ³⁷ Tɪ ba lerge ẽ yetu: «Fu sãn wa dita fu na'am na, botɪ tõma nẽra ayɪla zĩ'ire fu zuugɔ, tɪ ayɪla zĩ'ire fu gɔbga.» ³⁸ Tɪ Azezi lerge ba yetu: «Ya ka mi yãma n sosɪ sela. Ya wun tã'age nãmse nãmsgɔ seka tɪ mam nãmsɪ wã, bu ya wun tã'age nãmse wu mam n sake tɪ m nãmse se'em na halɪ ka ki?» ³⁹ Tɪ ba yele ẽ yetu: «Tɪ wun tã'age ẽje bela.» Tɪ Azezi lebe yele ba yetu: «Asɪra, ya wun nãmse nãmsgɔ seka tɪ mam nãmsɪ wã halɪ ka ki. ⁴⁰ La, la dagɪ mam n wun looge seka n wun zĩ'ire mam zuugɔ bu mam gɔbga. Nawënne mãasum zẽ'e-bãma tɪ a bɔ la nẽr-seba tɪ a yetu a bɔ la.»

⁴¹ La karẽnbiisi pia la n wõm bela la, ba sũure n isge la Azaki la Azã. ⁴² Tɪ Azezi wi ba wuu, yele ba yetu: «Ya mi tɪ dũnia wã na'adõma soe ba nẽba la pãja, dee tɪ kɛ'endõma pẽrgra nẽba tɪ ba ita bãma n boorɪ se'em. ⁴³ La yãma puam, la kãn dɛna bela. Nẽr-seka n boe ya puam bɔɔra tɪ a lebge nẽr-keko, la mase me tɪ a dɛna ya tõntõnna. ⁴⁴ La nẽr-seka n boorɪ tɪ a dɛna nẽjadãana ya puam, la mase me tɪ a dɛna ya wuu yamja. ⁴⁵ Se'ere n soe la, Nẽrsaala Dayua la ka wa'am tɪ nẽba tõm bɔ ẽ, a wa'am tɪ a tõm me bɔ, dee dɪke a vɔm bɔ tɪ nẽba zozo'e yẽ fãare.»

Azezi botɪ Abartime nini yẽta

(Amatie 20:29-34, Aluki 18:35-43)

⁴⁶ Azezi la a karẽnbiisi la daan sɛje ka paage dɔla la Zeriko tẽja puam tɔlla, la ban daan ze'ele tẽja la puam yesra la, nẽr-kuuɔɔ n dolɪ ba. Tɪ fua zẽa sore nõorum sɔsra, a yu'ure de la Abartime, a de la Atime dayua. ⁴⁷ La ẽn wõm tɪ ba tɔgrɪ tɪ la de la Azezi n ze'ele Nazaretɪ la, tɪ a tĩi tɔgra yetu: «Azezi, Adavidɪ yɪɔja, zoe m ninbãalga.» ⁴⁸ Tɪ nẽba zozo'e tãse ẽ yetu: «Go'oge fu yetɔga la.» Tɪ a malɪn tĩi tɔge yetu: «Adavidɪ yɪɔja, zoe m ninbãalga.» ⁴⁹ Tɪ Azezi ze'ele dee yetu: «Wi-ya ẽ tɪ a wa'am.» Tɪ ba wi ẽ yele ẽ yetu: «Keje fu sũure, isge tɪ a wi'iri fo.» ⁵⁰ Tɪ a lobe a fugɔbga base, dee vaa isge sɛje Azezi zẽ'am. ⁵¹ Tɪ Azezi soke ẽ yetu: «Fõn boorɪ tɪ m ẽje la bẽm bɔ fɔ?» Tɪ a yetu: «M Zuudãana, mam boorɪ tɪ m le yẽta me.» ⁵² Tɪ Azezi yele ẽ yetu: «Sẽje, fõn bɔ mam sɪra la ãyã tɪ fu yẽ laafe.» Tɪ fua la yẽta bilam mẽja, dɔla Azezi sore la zuo.

Azezi kẽ'erɪ Zerizalem la na'am

(Amatie 21:1-11, Aluki 19:28-40, Azã 12:12-19)

11 Azezi la a karẽnbiisi la daan sɛje ka yɔna la Zerizalem, lɛm Betɪfaazɪ la Betani, Oliivi tãja la zẽ'am. Tɪ a tõm a karẽnbiisi bayi, ² yele ba yetu: «Sẽje-ya tẽn-seka n boe ya nẽja la puam. Ya sãn paage mĩ, ya wun yẽ bõn-biire tɪ ba lu ze'ele, tɪ nẽra nãn ka bã ẽ. Ya lorge ẽ tarɪ wa'am. ³ La nẽra sãn soke ya yetu: «Wãne tɪ ya lɔrgra ẽ?», ya lerge ẽ yetu: «Zuudãana la n boorɪ ẽ,

tɪ a wun base tɪ ya tarɪ ẽ leme wa'am tɔtɔ.» ⁴ Tɪ ba sɛŋɛ ka yẽ bɔn-biire la n lu zanɔrum sore nɔorum, tɪ ba lorge ẽ. ⁵ La nɛrba baseba n daan ze bilam soke ba yetɪ: «Wãne tɪ yãma lɔrgra bɔn-biire la?» ⁶ Tɪ ba lerge wu Azezi n yele ba se'em na, tɪ nɛrba la base ba. ⁷ Tɪ ba tarɪ bɔn-biire la sɛŋɛ Azezi zẽ'am, ka dɪke ba futo pagle a zuo, tɪ Azezi bã. ⁸ Tɪ nɛrba zozo'e yerge ba futo sore zuo, tɪ baseba sɛŋɛ va'am ka kɔ vɔorɔ wa yerge sore zuo. ⁹ Tɪ nɛr-seba n boe a nɛŋa, la seba n boe a poorum na daan tɪi tɔgra yetɪ:

«Ozaana! Pɛŋɛ-ya nɛr-seka n sɛm la Zuudãana Nawɛnnɛ yu'urɛ la.

¹⁰ Pɛŋɛ-ya nɛr-seka n sɛm tɪ a di tɪ yaaba Adavidi na'am na.

Ozaana! Nã'ase-ya Nawɛnnɛ n boe saazuum.»

¹¹ Tɪ Azezi paage Zerizalem kɛ Wɛnde-katum na bɩse sela woo kaage. Tɪ wɛnnɛ mã'age, tɪ ɛŋa la a karɛnbiisi pia la ayi la yese sɛŋɛ Betani.

Azezi kã be'em bɔ kɛnkãŋa

(Amatie 21:18-19)

¹² Tɪ beere wiige, tɪ ba ze'ele Betani lɛbra Zerizalem, tɪ Azezi kɔm dɔnna. ¹³ Tɪ a yẽ kɛnkãŋa n ze zãazãare tara vɔorɔ, tɪ a sɛŋɛ tɪ a ka bɩse a na'an wun yẽ sela kɛnkãŋa la zuo. La ɛn paage la, a ka yẽ sela a zuo, a yẽ la vɔorɔ mã'a. Se'ere n soe la, kɛnkãma wakate daan nãn ka paage. ¹⁴ Tɪ Azezi yele kɛnkãŋa la yetɪ: «Nɛra kãn le malun di fu biɛ.» Tɪ a karɛnbiisi la wɔm.

Azezi dige nɛrba n koosrɪ lɔgrɔ Wɛnde-katum na

(Amatie 21:12-17, Aluki 19:45-48, Azã 2:13-22)

¹⁵ Tɪ ba paage Zerizalem, tɪ Azezi kɛ Wɛnde-kãte la zɛnzakam digra nɛr-seba n koosrɪ, la seba n da'arɪ Wɛndeem na tɪ ba yesra. Dee zã'age lig-tɛerba taablɔdɔma, la seba n koosrɪ na'adawema la kugsi lubɛ. ¹⁶ La a daan ka sake tɪ nɛra zɛera sela dɔla Wɛnde-kãte la zɛnzakam. ¹⁷ Dee daan zãsna nɛrba la yetɪ: «La gulse Nawɛnnɛ gɔŋɔ puam tɪ Nawɛnnɛ yetɪ: «Ba wun wi'ira mam deego la tɪ pu'usgɔ deego buuri wuu ãyã.» La yãma dɪke ẽ ɛŋɛ la nayigba lagsgɔ zẽ'a.»

¹⁸ Tɪ Nawɛnnɛ kãabgɔ kɛma nɛŋadɔma, la lɔɔ karɛnsãandɔma wɔm bela, ɛera bãma n wun ɛŋɛ se'em ku ẽ, la ba zotɪ ẽ mɛ, se'ere n soe la, a zãŋɔ la daan kɛ nɛrkuuŋɔ la sũure mɛ zozo'e. ¹⁹ Tɪ zaanɔore daan mã'age, tɪ Azezi la a karɛnbiisi yese tɛŋa la puam.

Kɛnkãŋa n kuɪ yelle

(Amatie 21:20-22)

²⁰ Tɪ bulika yu'urɔ yu'urɔ tɪ ba dɔla sore la, yẽ kɛnkãŋa la n kuɪ la yẽga wuu. ²¹ Tɪ Apyɛɛrɪ tɛege lan ɛŋɛ se'em na, yele Azezi yetɪ: «Karɛnsãama, bɩse, kɛnkãŋa la tɪ fu kã be'em bɔ ẽ na kuɪ mɛ.» ²² Tɪ Azezi yele ba yetɪ: «Bɔ-ya Nawɛnnɛ sra. ²³ Mam yetɪ ya la

asɪra, tɪ nɛra sãn yele tãn-ɛna yetɪ: «Vɔoge ka lui mɔgre puam», dee bɔ sra a sũure puam tɪ ɛŋa n yele se'em na wun ɛŋɛ, dee ka sɛ'ena, la wun sɪrɪ ɛŋɛ.

²⁴ Bela tɪ mam yetɪ, ya sãn pu'usra Nawɛnnɛ sɔsra sela, bɔ-ya Nawɛnnɛ sra tɪ ya to'oge ya, tɪ ya wun sɪrɪ to'oge. ²⁵ La ya sãn bɔna mɪ pu'usra Nawɛnnɛ, ya sãn tara yelle la nɛra, base-ya ẽ taale, tɪ ya Sɔ Nawɛnnɛ n boe saazuum mɛ base ya tɔon-be'ero taale. [²⁶ Yãma sãn ka base nɛr-seba n ɛŋɛ ya be'em na taale, ya Sɔ Nawɛnnɛ n boe saazuum mɛ kãn base ya tɔon-be'ero taale.]»

Åne n bɔ Azezi nɔore tɪ a tɔnna?

(Amatie 21:23-27, Aluki 20:1-8)

²⁷ Azezi la a karɛnbiisi la le sɛŋɛ la Zerizalem, tɪ Azezi kɛ Wɛnde-katum na ɛera. Tɪ kãabgɔ kɛma nɛŋadɔma, la lɔɔ karɛnsãandɔma, la tɛŋa la kɛma sɛŋɛ a zẽ'am, ²⁸ ka soke ẽ yetɪ: «Fɔn yẽ nɔore la be ita bɔn-bãna? Bu åne n bɔ fɔn nɔore tɪ fɔn ita bɔn-bãna?» ²⁹ Tɪ Azezi lerge ba yetɪ: «Mam wun soke ya sokre ayɪla, tɪ ya sãn lerge mam, mam mɛ wun yele ya nɔor-seka tɪ mam tarɪ ita bɔn-bãna. ³⁰ Azã n daan misri nɛrba ko'om puam na, la de la Nawɛnnɛ n tɔm ẽ bu, la de la nɛr-saalba? Lerge-ya ma.» ³¹ Tɪ ba bãm na taaba yetɪ: «Tɪ sãn lerge yetɪ, la de la Nawɛnnɛ n tɔm ẽ, a wun yetɪ, bɛm ãyã tɪ tɔma ka sake ẽ? ³² Tɪ mɛ kãn tã'age yetɪ la de la nɛrsaalba n tɔm ẽ.» Ba daan zotɪ la nɛrba la, se'ere n soe la, nɛrba la wuu daan sake tɪ Azã sɪrɪ de la Nawɛnnɛ nɔtɔ'ɔsa. ³³ Tɪ ba kɔŋɛ lerge ẽ yetɪ: «Tɔma ka mi.» Tɪ Azezi yele ba yetɪ: «Mam mɛ kãn yele ya mam n yẽ nɔore zẽ'e-seka ita bɔn-bãma.»

Nɛrba n bɩsrɪ va'am makre

(Amatie 21:33-46, Aluki 20:9-19)

12 Bela poorum, Azezi daan magsrɪ la magsa tɔgra bɔ'ɔra ba yetɪ: «Buraa ayɪla n daan kɔ a va'am se-le tusɪ yu'urɛ n de viinye, mɛ lalga kaage ẽ, dee tũ boko tɪ ba wɛkra viinye la biɛ, dee mɛ de-woko tɪ ba zɔnna bɩsra a va'am na, yãŋa dɪke va'am na bɔ nɛrba tɪ ba bɩsra, dee sɛŋɛ sore. ² Tɪ viinye la biɛ go'osgo wakate paage, tɪ a tɔm a tɔntɔnna tɪ a sɛŋɛ seba n bɩsrɪ va'am na zẽ'am ka to'oge a purɛ wa'am wa bɔ ẽ. ³ Tɪ ba yɔke tɔntɔnna la wɛ, botɪ a lebe kule zãŋa. ⁴ Tɪ va'am na dãana le tɔm nɛra ayɪla ba zẽ'am, tɪ ba wɛ a zuugo åage, dee yaale ẽ. ⁵ Tɪ a le malun tɔm nɛra ayɪla, tɪ ba ku ẽ. Tɪ a tɔm nɛrba zozo'e, tɪ ba wɛ baseba, dee ku baseba.

⁶ La nɛra ayɪla mã'a n daan deege tɪ a tãna wun tɔm, la de la a bi-nɔŋrɛ. Tɪ a daan tɔm ẽ seba n bɩsrɪ va'am na zẽ'am, dee tɛ'esra yetɪ: «ɛna n de mam dayua la, ba wun nan ẽ.» ⁷ Tɪ seba n bɩsrɪ va'am na yele taaba yetɪ: «ɛna n wun wa sɔɔge sɔna a sɔ bɔntarsɔm na, base-ya

tɪ tɪ ku ẽ, tɪ bõntarsõm na lebge tõma bõnɔ. 8 Tɪ ba yõke ẽ ku, tarɪ ẽ yese va'am na kẽnkerɲa ka base.

9 Bela, va'am na dāana yāɲa wun ẽɲe la wāne? A wun wa'am wa ku seba n bɪsɪ va'am na mɛ, dee to'oge va'am na bɔ baseba. 10 Yāma põn karẽɲe Nawẽnne gõɲɔ zẽ'e-seka n gulɛ yetɪ:

«Kug-seka tɪ tõnmẽtba zagɛ la
n lebge kugre n botɪ deego la tara pāɲa.

11 La de la Zuudāana Nawẽnne n ẽɲe bõn-ẽna,
tɪ la dɛna yel-di'iɲa bɔ tõma.» »

12 Tɪ Zɪfdõma nẽɲadõma la daan ɛɛra tɪ ba yõke Azezi, se'ere n soe la, ba mi tɪ la de la bāma ɪyā tɪ a make makre ẽɲa, la ba daan zotɪ la nẽrba la, tɪ ba base ẽ dee fõrge.

Ba soke Azezi lampo yua yelle

(Amatie 22:15-22, Aluki 20:20-26)

13 Tɪ ba tõm Farisi dõma baseba, la naba A'ercɔɔɔ nẽrba baseba, tɪ ba sɛɲe ka soke Azezi sokre tɪ a tɔge tu-uge tɪ ba yẽ sore yõke ẽ. 14 Tɪ ba wa'am wa yele ẽ yetɪ: «Karẽnsāama, tõma mi tɪ fõn de la sɪra dāana, dee ka fabla nẽrba n tɔgrɪ fõn yelle se'em na, fõn ka tũ'usri nẽrba, la fõn zāsɪ nẽrba Nawẽnne sore yela la sɪra. Tõma yetɪ tɪ soke bɪsɛ, sore boe tɪ tɪ yɔ lampo bɔ Rom na-keko bɪ, sore ka boe? Tɪ yɔ bɪ tɪ da yɔ?» 15 Tɪ Azezi bāɲe tɪ ba boorɪ tɪ ba bẽre ẽɲa mɛ, soke ba yetɪ: «Bẽm tɪ ya bẽta ma? Tarɪ-ya lagfɔ wa'am tɪ m bɪsɛ.» 16 Tɪ ba tarɪ lagfɔ la wa'am wa bɔ ẽ. Tɪ Azezi soke ba yetɪ: «Āne yinyisɲa, la āne yu'urɛ n gulɛ a zuo?» Tɪ ba lerge yetɪ: «La de la Rom na-keko la.» 17 Tɪ Azezi yele ba yetɪ: «Bɔ-ya na-keko la ẽɲa n soe bõn-seka, dee bɔ Nawẽnne ẽn soe bõn-seka.» Tɪ Azezi yetɔga la di'ige ba.

Ba soke Azezi kũm vo'ore yelle

(Amatie 22:23-33, Aluki 20:27-40)

18 Saduse dõma n yetɪ nẽra sãn ki a kãn vo'oge la, bāma nẽrba baseba n wa'am Azezi zẽ'am wa soke ẽ yetɪ:

19 «Karẽnsāama, Amoyisi yuun gulɛ bɔ tõma yetɪ: «Nẽra sɔbia sãn ki deege a pɔga dee ka tara bia, a di pɔkõore la dɔge kɔma bɔ seka n ki la.» 20 La buraasɪ bayopɔɔ n daan boe dɛna sɔbiisi. Tɪ pɔspɔsɪ dāana la di pɔga, ki dee ka dɔge bia. 21 Tɪ buyi dāana la di pɔkõore la, mẽ ki dee ka dɔge bia. Tɪ butā dāana la mẽ ẽɲe bela.

22 La bāma bayopɔɔ la wuu lagum di pɔka la mɛ, ki dee ka dɔge bia. Bela poorum tɪ pɔka la mẽ ki. 23 Bāma bayopɔɔ wuu n lagum di pɔka la dee ki la, ba sãn wa vo'oge kũm vo'ore daare, āne n wun sɔna pɔka la?»

24 Tɪ Azezi yele ba yetɪ: «Ya tuuge mɛ, yāma n ka mi Nawẽnne gõɲɔ n yele se'em, la Nawẽnne pāɲa n ān se'em na ɪyā. 25 Kũm vo'ore daare, buraasɪ ka diti pɔg-ba, la pɔgsɪ mẽ ka ellɪ sɪrba, ba wuu wun āna wu malekadõma n boe Nawẽnne yire la. 26 La sãn dɛna kũm vo'ore yelle, yāma nãn ka karẽɲe Amoyisi gõɲɔ la

puam Nawẽnne n yuun ze'ele tũntuugo la puam tɔge la ẽ se'em na? A yuun yele yetɪ: «Mam de la Abraham, la A'izaki, la Azakɔbɪ Nawẽnne.» 27 La pa'ale tɪ bāma wuu vɔa mɛ Nawẽnne zẽ'am, se'ere n soe la, Nawẽnne dagɪ seba n ki Nawẽnne, a de la seba n vɔa Nawẽnne. Ya tuuge mɛ zozo'e.»

Nawẽnne n bɔ nõore tɪ ba ɪta se'em na, bõn-kāna n gānnɪ?

(Amatie 22:34-40, Aluki 10:25-28)

28 Tɪ ɔɔ karẽnsāandõma nẽra ayɪla wõm ban tɔgrɪ la taaba, dee bāɲe tɪ Azezi lerge Saduse dõma la sõɲa, tɪ a ɛm ẽ, soke ẽ yetɪ: «Nawẽnne n bɔ nõore tɪ ba ɪta se'em na wuu puam, bõn-kāna n gānnɪ?» 29 Tɪ Azezi lerge ẽ yetɪ: «Seka n gānnɪ wuu n wāna: «ɪsrayɛɪ dõma, selse-ya. Zuudāana n de tɪ Nawẽnne na, de la Zuudāana ayɪla. 30 Nõɲe Nawẽnne n de fu Zuudāana la fu sũure wuu, la fu sɪa wuu, la fu yem wuu, la fu pāɲa wuu.» 31 La buyi dāana n wāna: «Nõɲe fu tadāana wu fõn nõɲe fu mẽɲa se'em na.» Nõore ayẽma ka boe n gānnɪ bāna.» 32 Tɪ ɔɔ karẽnsāama la yele ẽ yetɪ: «Karẽnsāama, fõn yele se'em na ān sõɲa, la de la sɪra, Nawẽnne de la ayɪla, ayẽma ka boe sãn dagna ẽɲa mǎ'a. 33 Fu nõɲe Nawẽnne la fu sũure wuu, la fu yem wuu, la fu pāɲa wuu, la fu nõɲe fu tadāana wu fõn nõɲe fu mẽɲa se'em na, ān sõɲa mɛ gānna kǎabgɔ bu-urɪ wuu.»

34 Tɪ Azezi yẽ ẽn lerge la yem na, tɪ a yele ẽ yetɪ: «Fu ka zāage la Nawẽnne so'olum.» Tɪ nẽra nẽra ka le saage soke ẽ sokre.

Krisi de la naba Adavidi Zuudāana

(Amatie 22:41-46, Aluki 20:41-44)

35 Azezi n daan zāsɪ nẽrba Wẽnde-kātum na, a soke ba yetɪ: «Wāne tɪ ɔɔ karẽnsāandõma yetɪ Krisi de la naba Adavidi yuɲa? 36 Dee tɪ Nawẽnne sɪa yuun botɪ Adavidi mẽɲa tɔge yetɪ:

«Zuudāana Nawẽnne yele mam Zuudāana yetɪ, zĩire m zuugɔ bɔba halɪ tɪ m wa ẽɲe fu be'eba la tɪ ba bɔna fu nāma tẽɲa.»

37 Adavidi mẽɲa sãn wi ẽ yetɪ: «Zuudāana», la wun ẽɲe la wāne tɪ a dɛna Adavidi yuɲa?» Tɪ nẽr-kuuɲɔ la selsra a yetɔga la sũ-yẽlum.

Azezi yele nẽrba tɪ ba da āna wu ɔɔ karẽnsāandõma

(Amatie 23:1-36, Aluki 20:45-47)

38 Azezi n zāsɪ nẽrba la, a yele ba yetɪ: «Guuse ya mẽɲa la ɔɔ karẽnsāandõma n eerɪ kaara la fu-wogro bɔɔra tɪ nẽrba pu'usra nǎ'asra ba da'asum, 39 dee bɔɔra nǎ'asgɔ zẽ'esɪ wẽndeto puam, la dia zẽ'esum tɪ ba zẽa la. 40 Ba to'osɪ la pɔkõpa n tarɪ sela la wuu, dee pu'us-ra Nawẽnne pu'us-wogro tɪ nẽrba bɪsra ba. Ba wun yẽ sɪbgre gānna wuu.»

Pɔkɔɔre bɔ'a yelle

(Aluki 21:1-4)

⁴¹ Azezi daan zĩ la Wēnde-kātum ligri daka la zē'am dee bɪsra nēr-kuɔŋ la n sēnni ita ligri daka la puam. Tɪ bōntatba zozo'e ita ligri pāi. ⁴² Tɪ pɔkɔɔre n de nasa wa'am wa dɪke lig-kōb-pɪgsɪ bayi mā'a ēŋe mĩ. ⁴³ Tɪ Azezi wi a karēnbiisi la, yele ba yeti: «Mam yeti ya la asura, tɪ pɔkɔɔre ēna n de nasa la ēŋe ligri daka la puam zo'oge gānna ba wuu mē. ⁴⁴ Se'ere n soe la, bāma wuu looge la bāma n tarɪ sela pāi la puam wa ēŋe mĩ. La ēŋa n de nasa la, dɪke la a dia ligri wuu wa ēŋe mĩ.»

Wēnde-kāte la sā'anɔ, la dūnia ba'asɔ nāmsɔ yelle

(Amatie 24:1-28, Aluki 21:5-24)

13 Azezi daan ze'ele la Wēnde-kātum na yesra, tɪ a karēnbia ayɪla yele ē yeti: «Karēnsāama, bɪsɛ ku-ga n ba āna sōŋa tɪ ba dɪke mē de-kāra se'em.» ² Tɪ Azezi yele ē yeti: «Fōn yē de-kāra wā, ba wun lubɛ ba wuu mē saam saam tɪ kugre baa ayɪla kān weege a tadāana zuo.»

³ La Azezi daan sēŋe ka zēa la Oliivi tāŋa zuo tɪ a nēŋa bɪsra Wēnde-kāte la. La Apyɛɛɪ, la Azaki, la Azā, la A'āndre mā'a n daan boe a zē'am, ⁴ soke ē yeti: «Yele to, wakat-kāna tɪ bōn-ēŋa wun ēŋe, la bēm n wun pa'alɛ tɪ wakate la paage mē tɪ bōn-bāma wuu wun ēŋe?» ⁵ Tɪ Azezi yele ba yeti: «Guuse-ya tɪ nēra da pā'asɛ ya tɪ ya tuuge. ⁶ Nērba zozo'e n wun dɪke mam yu'urɛ wa'am wa pā'asra ya, tɪ ba nēra woo yeti: «Mam n de Krisi la.» La ba wun botɪ nērba zozo'e tuuge mē. ⁷ Ya sān wa wōm zɛbrɛ dāmne, la zɛbrɛ yelle, da base-ya tɪ dabeem kē ya, dēni tɪ bōn-bāma ēŋe. La, la nān ka de dūnia ba'asɔ. ⁸ Buuri ayɪla wun isge zebra la buuri ayēma, tɪ so'olum ayɪla isge zebra la so'olum ayēma. La tēŋa wun tīi mīim mē zē'esɪ zozo'e, la kōm wun bōna. Bela wuu nān de la toogo la sēŋre, la ān wu pɔka virgre toogo n nān sēŋrɪ la.

⁹ Guuse ya mēŋa, tɪ nērba wun tarɪ ya mē sēŋe ka sām ba sarɪyadia zē'esum, tɪ ba wē ya ba wēndeto puam. La ba wun tarɪ ya sēŋe ɔɔmnadōma, la na'adōma nēŋam mam īyā. La ya wun tɔge mam yela pa'alɛ ba. ¹⁰ La dēni tɪ Nawēnne kō-yēlga la dēŋe mōole bɔ buuri wuu, dee tɪ dūnia ba'asɔ paage. ¹¹ La ba sān wa yōge ya tarɪ sēŋe ka sām sarɪyadia zē'am, ya da fabla yāma n wun tɔge se'em, wakate sān wa paage, tɔge-ya yetɔg-seba tɪ Nawēnne wun bɔ ya la, se'ere n soe la, la dagɪ ya mēŋa n wun tɔge, la de la Nawēnne Sɪa n wun sōŋe ya. ¹² Sobia wun botɪ ba yōke sobia ku, tɪ sɔ mē wun ēŋe a bia bela, la kōma wun zebra la ba sɔdōma, la ba madōma botɪ ba ku ba. ¹³ Nērba zozo'e wun sise ya mam yu'urɛ īyā. La nēr-seka n wun mōrge ze'ele kāŋkāŋe ka paage ba'asɔ wun yē fāare.

¹⁴ Ya wun wa yē sɛka n de bōn-be'ego n sā'anɪ sela woo la, tɪ a boe zē'e-sɛka n ka masɛ tɪ a bōna la.» (Sɛka n karēŋrɪ la mōrge wōm a vōore.) «Ya sān yē bela, seba n boe Zude zoe zom tānsɪ zuo. ¹⁵ La nēr-seka n boe ɔsɔɔ da sige bɔɔra tɪ a kē deem dɪke sela. ¹⁶ La nēr-seka n boe va'am da kān lebe kule yire tɪ a dɪke a fuugo. ¹⁷ Dabs-bāma, la wun dɛna la toogo bɔ pɔg-seba n tarɪ pua la, la seba n tarɪ kōma tɪ ba mōgra la. ¹⁸ Sose-ya Nawēnne tɪ yel-bāma da wa dɛna ɔɔɔ wakate. ¹⁹ Se'ere n soe la, dabs-bāma wun dɛna la toogo zozo'e, tɪ ba nān ka yē halɪ pī'iluŋo tɪ Nawēnne nāam dūnia wa paam zīna, la toog-ēŋa buuri kān le malɪn wa'am. ²⁰ Nawēnne sān ka bo'oge nɪ dabs-bāma sōore, nēra ka boe nɪ n wun pōsɛ. La Nawēnne mēŋa nērba tɪ a looge la īyā, tɪ a bo'oge dabs-bāma sōore.

²¹ La nēra sān yele ya yeti: «Bɪsɛ-ya, Krisi boe la kalam», bu «bɪsɛ-ya, a boe la ke», ya da sake. ²² Nērba n wun wa'am wa parum tɪ bāma n de Krisi, la nērba n wun wa'am wa parum tɪ bāma n de Nawēnne nōtɔ'ɔsrɪ-ba tōm tōon-yālma, la yel-kursɪ, bɔɔra tɪ ba sān tā'age, ba botɪ nēr-seba tɪ Nawēnne looge la tuuge doose ba. ²³ Guuse ya mēŋa, tɪ mam dēŋe yele ya sela woo mē.»

Azezi n de Nērsaala Dayua la lemŋo

(Amatie 24:29-44, Aluki 21:25-36)

²⁴ Azezi le yele yeti: «Toogo la dabsa poorum, wēntulle wun sobge mē, tɪ wōrga kān le nēera a peelem. ²⁵ La wōrbie wun ze'ele saazuum lui. La bōn-seba n boe saazuum wun mīim mē. ²⁶ La ba wun yē Nērsaala Dayua la n boe sawara puam sēna la pān-kāte, tɪ a na'am pāŋa peelem nēge. ²⁷ La a wun tōm a malekadōma mē tɪ ba sēŋe dūnia ɔɔbga la zuugo, la dapoore la zanōre, ka lagɛ nēr-seba tɪ a looge la halɪ ka paage dūnia tɛka wuu.»

²⁸ Azezi le yele ba yeti: «Dɪke-ya makre la kēnkāŋa bāŋe zāsŋɔ la vōore. Kēnkāŋa wila sān wa pusra vōoro, ya mi tɪ sigre lem mē. ²⁹ Bela mē, ya sān wa yē tɪ bōn-bāma wuu itɪ, ya bāŋe tɪ Nērsaala Dayua la lem mē, a boe la zanōrum. ³⁰ Mam yeti ya la sɪra, tɪ bōn-bāna wun ita mē dee tɪ zamāan-ēna yāŋa tole. ³¹ Saazuum la tēŋa wun tole mē, la mam yetɔga kān malɪn tole.

³² Nēra nēra ka mi daar-sɛka la wakat-sɛka tɪ Nērsaala Dayua la wun leme wa'am. Baa malekadōma n boe Nawēnne yire, bu Dayua la mēŋa ka mi, sān dagna Sɔ Nawēnne mā'a. ³³ Guuse ya mēŋa sōŋa, la ya māasum, se'ere n soe la, ya ka mi wakate la. ³⁴ La wun āna wu buraa n we'esɪ sore dee dɪke a yire gu'ule a tōntōnɪba, bɔ tōntōnna woo a tōone, dee yele zanōr-gu'ura tɪ a gu'ura. ³⁵ Bela īyā gu'ura-ya, se'ere n soe la, ya ka mi wakat-sɛka tɪ yidāana la wun leme wa'am. A tā wun leme wa'am zaanōore mē, bu sōnsua, bu nō-ɔɔɔ kaasga wakate, bu bulika. ³⁶ Guuse-ya tɪ yidāana la da wa'am wa di'ige ya, tɪ ya ɔisri mē. ³⁷ Mam n yeti ya se'em na, mam yeti nērba wuu la bela, gu'ura-ya.»

Zifdōma nējadōma eerl sore tɪ ba ku Azezi

(Amatie 26:1-5, Aluki 22:1-2, Azā 11:45-53)

14 La daan deege la dabsa ayi tɪ Zɔɔg-base kibsa tɪ ba obrɪ borborɪ n ka tarɪ dābulɪ dabsa paage. Tɪ kāabgɔ kēma nējadōma, la ɔɔ karēnsāandōma ɛɛra sore tɪ ba sugɛ yōkɛ Azezi ku. ² Tɪ ba yele taaba yetɪ: «Tɪ da kǎn ēɲɛ-ya bela kibsa wǎ puam, tɪ nērba la wun gire mɛ.»

Pɔka n ka'age kaam ēɲɛ Azezi zuo

(Amatie 26:6-13, Azā 12:1-8)

³ Azezi daan boe la Betani, Asimō n wa dɛna kōnkonne yire, tɪ ba daan bɔna mǐ dita. Tɪ pɔka tarɪ albatrɪ dugla n pɪɾɛ la tɪdare ka-sōma ligri n zo'oge tɪ ba wi'iri tɪ naartɪ, wa'am wa vuke dugla la, ka'age kaam na ēɲɛ Azezi zuugo. ⁴ Tɪ nērba baseba n boe bilam na sūure sǎ'am, tɪ ba yele taaba yetɪ: «Bēm tɪ pɔka la sǎ'am ka-sōma la wǎna? ⁵ Ba tā nɪ wun koose ba gǎɲɛ lig-kōba kɔbstǎ mɛ, dɪkɛ ligri la bɔ nasdōma.» Tɪ ba zerge pɔka la.

⁶ Tɪ Azezi yele ba yetɪ: «Base-ya pɔka la bǎalam, bēm tɪ ya tɔgra ē tɪ a sūure sǎ'am? Ēn ēɲɛ sela bɔ mam na de la tōon-sōɲɔ. ⁷ Nasdōma boe la ya lɛ mɛ wakate wuu, ya tā wun ēɲɛ ba sōɲa mɛ yan boorɪ wakat-seka, la mam kǎn bɔna la ya lɛ wakate wuu. ⁸ Ēɲa n tarɪ sela la, tɪ a ēɲɛ. Ēn ka'age ka-sōma la ēɲɛ mam īyǎ la, a dēɲɛ ēɲɛ la ban wun ēɲɛ mam se'em mam laare daare. ⁹ Mam yetɪ ya la asura, tɪ dūnia wǎ zē'e-seka wuu tɪ ba wun wa mōole Nawēnnɛ kō-yēlga la, ba mē wun tɔge pɔka wǎ n ēɲɛ mam se'em wǎ, tɪ ba tēra a yelle.»

Azudaasɪ eerl sore tɪ a pa'alɛ tɪ ba yōkɛ Azezi

(Amatie 26:14-16, Aluki 22:3-6)

¹⁰ Tɪ Azudaasɪ Iskariyo n de Azezi karēnbiisi pia la ayi la nēra ayula sēɲɛ kāabgɔ kēma nējadōma zē'am, ka yele ba tɪ ēɲa wun pa'alɛ tɪ ba yōkɛ Azezi. ¹¹ La ban daan wōm ēn yele se'em na, tɪ ba sūure ēɲɛ yēlum, tɪ ba yetɪ bǎma wun bɔ ē ligri. Tɪ Azudaasɪ yǎɲa ɛɛra so-seka tɪ a wun pa'alɛ tɪ ba yǎɲɛ yōkɛ ē na.

Azezi diti Zɔɔg-base kibsa la a karēnbiisi

(Amatie 26:17-30, Aluki 22:7-23, Azā 13:21-30, 1 Korēntɪ 11:23-25)

¹² Borborɪ n ka tarɪ dābulɪ kibsa la pɔɔpɔɔ daare tɪ ba kuurɪ pebilsɪ dita Zɔɔg-base kibsa la n daan paage. Tɪ Azezi karēnbiisi la soke ē yetɪ: «Fōn boorɪ tɪ tɪ sēɲɛ la bɛ ka māasum Zɔɔg-base kibsa la tɪ fu di?» ¹³ Tɪ Azezi tōm a karēnbiisi bayi yele ba yetɪ: «Sēɲɛ-ya tēɲa la puam, tɪ ya wun tu'usɛ buraaga n tu yoore la ko'om, ya doose ē ¹⁴ sēɲɛ yi-seka tɪ a wun kē la, ka yele yidāana la yetɪ: «Karēnsāama la yetɪ, deego boe la bɛ, tɪ ēɲa la a karēnbiisi wun di Zɔɔg-base kibsa la?» ¹⁵ A wun pa'alɛ ya de-kāte n boe ayēma zuo, tɪ sela woo māasum bɔna

mǐ. Bilam tɪ ya wun māasum tɪ tɪ di kibsa la.» ¹⁶ Tɪ a karēnbiisi la yese sēɲɛ tēɲa la puam ka yē sela woo wu Azezi n yele ba se'em na. Tɪ ba māasum Zɔɔg-base kibsa la bilam.

¹⁷ Tɪ wēnnɛ daan mā'age, tɪ Azezi la a karēnbiisi pia la ayi la wa'am, ¹⁸ wa zēa dita, tɪ Azezi yele ba yetɪ: «Mam yetɪ ya la asura, tɪ ya nēra ayula n diti la mam kalam n wun pa'alɛ tɪ ba yōkɛ mam.» ¹⁹ Tɪ la daan sǎ'am ba sūure. Tɪ ba sɔkra ē ayula ayula yetɪ: «La de la mam?» ²⁰ Tɪ a lerge ba yetɪ: «La de la ya nērba pia la ayi la nēr-seka n wun yegle la mam tūm a nu'ugo laaga puam na. ²¹ Nērsaala Dayua la wun ki wu lan pōn gulse a yelle Nawēnnɛ gōɲɔ puam se'em na. La seka n yetɪ a pa'alɛ tɪ ba yōkɛ Nērsaala Dayua la wun yē toogo. Nēr-ēɲa ma sǎn ka dɔge nɪ ē n sōl.»

²² La ban daan diti la, tɪ Azezi dɪkɛ borborɪ pu'usɛ Nawēnnɛ, dee fiise bɔ a karēnbiisi la yetɪ: «To'oge-ya dɪ, ēna wǎ de la mam īyǎ.» ²³ Dee dɪkɛ bōn-yūula pu'usɛ Nawēnnɛ, dee bɔ ba, tɪ ba wuu yū. ²⁴ Dee yele ba yetɪ: «Bǎna wǎ de la mam zum n wun yese saage nērba zozo'e īyǎ, pa'alɛ tɪ Nawēnnɛ bīɲɛ nōore la ba. ²⁵ Mam yetɪ ya la asura, tɪ mam kǎn le yū viinye biɛ bōn-yūula wǎ, halɪ tɪ la ka paage daar-seka tɪ mam wun le yū ba Nawēnnɛ so'olum puam.» ²⁶ Tɪ ba yōom yōoma pēge Nawēnnɛ, dee yese wē'esa Oliivi tāɲam.

Azezi yetɪ Apɪyɛɛrɪ wun sɪ'usɛ ēɲa

(Amatie 26:31-35, Aluki 22:31-34, Azā 13:36-38)

²⁷ Tɪ Azezi yele a karēnbiisi la yetɪ: «Yǎma wuu wun lebe la poorum dee base mam, se'ere n soe la, la gulse Nawēnnɛ gōɲɔ puam yetɪ: «Mam wun ku dūnsiina dee tɪ piisi la wurge.» ²⁸ La Azezi le yele ba yetɪ: «La mam sǎn wa vo'oge, mam wun dēɲɛ ya sēɲɛ Galile.» ²⁹ Tɪ Apɪyɛɛrɪ yele ē yetɪ: «Baa ba wuu sǎn lebe poorum dee base fōn, mam kǎn base fōn.» ³⁰ Tɪ Azezi yele ē yetɪ: «Mam yetɪ fu la sɪra, tɪ zīna, yu'ɔɲɔ ēna wǎ, lan dēɲɛ nō-rɔɔɔ n wun kaase nōore ayi, fu wun sɪ'usɛ nōore atǎ tɪ fōn ka mi mam.» ³¹ Tɪ Apɪyɛɛrɪ le tɔge ke'enke'em yetɪ: «Baa la sǎn dɛna tɪ mam lagum na fōn ki, mam kǎn malun sɪ'usɛ fōn.» Tɪ karēnbiisi la wuu lagum yele bela.

Azezi pu'usɛ Nawēnnɛ Getsemane

(Amatie 26:36-46, Aluki 22:39-46)

³² Tɪ ba paage zē'e-seka yu'urɛ n de Getsemane la. Tɪ Azezi yele a karēnbiisi la yetɪ: «Zī'ire-ya kalam dee tɪ m sēɲɛ ka pu'usɛ Nawēnnɛ.» ³³ La a tarɪ la Apɪyɛɛrɪ, la Azakɪ, la Azā sēɲɛ. Tɪ a sūure sǎ'am zozo'e, tɪ la dāan ē. ³⁴ Tɪ a yele ba yetɪ: «Sū-sǎ'arɔ n tarɪ mam zozo'e tɪ mam āna wu m yetɪ m ki mɛ na. Weege-ya kalam gu'ura, da gīse-ya.» ³⁵ La a sēɲɛ la nēɲa fēɛ, ka vōgle tēɲa pu'usɛ Nawēnnɛ yetɪ, la sǎn tāna, toogo la fōrge dee base ē. ³⁶ Dee yetɪ: «M Sɔ, fōn tā sela woo ita, base

ti nāmsgo ēna fōrge dee base ma. La, la da kǎn dēna mam n boori se'em, la dēna fōn boori se'em.»

³⁷ La a leme a karēnbiisi batā la zē'am wa yē ti ba gīs-ri mē, ti a soke Apiyēerī yeti: «Asimō, fōn gīsri mē? Fōn ka tā wun gu karf-ayla ka gīse?» ³⁸ Dee yele ba yeti: «Base-ya gēem dee pu'use Nawēnne ti yelle da paage ya ti ya lui. Ya sīa la boori mē, la ya īyā ka tara pāṇa.»

³⁹ La a daan le lebe ka pu'use Nawēnne wu ēn pu'use se'em na. ⁴⁰ Dee le leme wa yē ti ba gīsri mē, se'ere n soe la, gēem n ba tarī ba. Ti ba ka mina ban wun yele ē se'em.

⁴¹ A daan le sēṇe mē, dee leme wa'am nōore atā puam wa soke ba yeti: «Ya ken v'ōsra mē dee gīsra? La ēṇe ba'ase mē, wakate paage mē ti ba wun dīke Nērsaala Dayua la ēṇe tōon-be'ero dōma nu'usum. ⁴² Isge-ya ti sēṇe, ti seka n wun pa'ale ti ba yōke mam na n wāna sēm.»

Ba yōke Azezi

(Amatie 26:47-56, Aluki 22:47-53, Azā 18:3-12)

⁴³ Azezi n daan ken tōgra la, ti Azudaasi n de a karēnbiisi pia la ayi la nēra ayila, doose la nēr-kuuṇṇ sēṇe paam. La nēr-kuuṇṇ la daan tarī la sukōbrō, la dā dōla ē. La de la kāabgo kēma nēṇadōma, la lō karēnsāandōma, la tēṇa la kēma n tōm ba. ⁴⁴ La Azudaasi n wun pa'ale ti ba yōke ē na, pōn tōge mē pa'ale ba yeti: «Seka ti mam wun kōke ē na, ēṇa n bela, yōke-ya ē, tarī ē sōṇa fōrge.»

⁴⁵ La Azudaasi n paam na, a sēṇe lem na Azezi, yele ē yeti: «Karēnsāama.» Dee kōke ē. ⁴⁶ Ti nērba la paage yōke ē. ⁴⁷ Ti nēr-seba n daan boe mī na nēra ayila fooge a sukōbgo se kāabgo kēma nēṇadāana tōntōnna tubre fiige. ⁴⁸ Ti Azezi soke ba yeti: «Yāma tarī la sukōbrō, la dā sēna ti ya yōke mam wu mam de la fāara la? ⁴⁹ Mam daan boe la yāma le Wēnde-kātum na daare woo zāsna nērba, ti ya ka yōke mam. La, la de la ti bōn-seka n gulse Nawēnne gōṇṇ puam na ēṇe.» ⁵⁰ Ti a karēnbiisi la wuu zoe dee base ē.

⁵¹ La budib-polle ayila n daan lobe fugōbga mā'a dōla Azezi. Ti ba daan ze ē ti ba yōke, ⁵² ti a base a fugōbga la dee zoe beele fōrge.

Ba tarī Azezi sēṇe Zīfdōma sarīyaditba zē'am

(Amatie 26:57-68, Aluki 22:54-55,63-71, Azā 18:13-14,19-24)

⁵³ Ba daan tarī Azezi sēṇe la kāabgo kēma nēṇadāana la yire, bilam ti kāabgo kēma nēṇadōma, la tēṇa la kēma, la lō karēnsāandōma la wuu tigse. ⁵⁴ Ti Apiyēerī daan bōna poorum zāazāare dōla, ka paage kē kāabgo kēma nēṇadāana la yire zēnzakam, zēa la tōntōnba cōsra bugum.

⁵⁵ La kāabgo kēma nēṇadōma, la sarīyaditba la wuu daan eerī la yelle ti ba dōre Azezi botī ba ku ē, la ba ka

yē. ⁵⁶ Ti nērba zozo'e daan parim bō Azezi, la ba yetōga la ka doose taaba.

⁵⁷ Ti nērba baseba daan isge parim bō ē yeti: ⁵⁸ «Tōma wōm ti a yeti: «Mam wun wōrge Wēnde-kāte la ti nērsaalba mē la, dee le mē ayēma dabsa atā puam n dagi nērsaalba mēa.» ⁵⁹ Baa bōn-ēṇa puam ba yetōga la ka doose taaba.

⁶⁰ Ti kāabgo kēma nēṇadāana la isge ze'ele ba wuu nēṇam soke Azezi yeti: «Ban tōge fōn se'em na, fōn kǎn lerge se'ere?» ⁶¹ Ti Azezi daan sīna ka lerge se'ere. Ti kāabgo kēma nēṇadāana la le soke ē yeti: «Fōn de la Krisi, Nawēnne ti tōma pēgrī la Dayua la?» ⁶² Ti Azezi lerge yeti: «Ēe, mam de la ēṇa. La ya wun yē Nērsaala Dayua la ti a zī Nawēnne n de pāṇa dāana la zuugo bōba, ya wun yē ti a boe sawara puam sēna.» ⁶³ Ti kāabgo kēma nēṇadāana la āasum a mēṇa futo, dee yeti: «Ti le ēera la bēm kaset-dōma? ⁶⁴ Ya wōm ēn sā'am Nawēnne yu'ure. Yāma tē'esē la wāne?» Ti ba wuu yeti: «A mase la kūm.»

⁶⁵ Ti ba nērba baseba daan sēṇe tubsra nōtōorum ita Azezi, dīke tǎnne pī a nini, mūm kūnkūra wē ē, dee ye-ta ē ti: «Bāṇe pa'ale tō nēr-seka n wē fō?» Ti gu'urba la to'oge ē, wē a pēgsi.

Apiyēerī sī'ise ti ēṇa ka mi Azezi

(Amatie 26:69-75, Aluki 22:56-62, Azā 18:15-18,25-27)

⁶⁶ La Apiyēerī daan ken bōna la zēnzakam na, ti kāabgo kēma nēṇadāana tōntōn-pōka wa'am mī, ⁶⁷ wa yē Apiyēerī n cōsri bugum na, ti a bisra ē, dee yeti: «Fōn mē daan po bōna la Nazaretī buraa Azezi le.» ⁶⁸ Ti Apiyēerī sī'ise yeti: «Mam ka mi, mam ka bāṇe fōn yele se'em na vōore.» Apiyēerī yele bela dee yese ka ze la zanōrum, ti nō-rōcōgō kaase. ⁶⁹ Ti tōntōn-pōka la le yē ē, yele seba n boe mī na yeti: «Bura-ēna de la Azezi nēra ayila.» ⁷⁰ Ti Apiyēerī le sī'ise. Ti la ēṇe fēe, ti nēr-seba n ze mī na le yele Apiyēerī yeti: «Asīra, fōn de la ba nēra ayila. Fōn de la Galile nēra.» ⁷¹ Ti Apiyēerī pōi Nawēnne yeti: «Mam ka mi bura-seka ti ya tōgrī a yelle wā.»

⁷² Bilam mēṇa ti nō-rōcōgō le kaase nōore ayi puam. Ti Apiyēerī tēege Azezi n daan yele ē yeti: «Lan dēṇe nō-rōcōgō n wun kaase nōore ayi, fu wun sī'ise nōore atā ti fōn ka mi mam» na. Ti a sūure sā'am, ti a kella.

Ba tarī Azezi sēṇe gōmna Apilatī zē'am

(Amatie 27:1-2,11-14, Aluki 23:1-5, Azā 18:28-38)

15 Beere n daan wiige bulika, ti kāabgo kēma nēṇadōma, la tēṇa la kēma, la lō karēnsāandōma, bāma wuu n de sarīyaditba la daan lagse mē tōge ku, botī ba lu Azezi tarī ē sēṇe Apilatī zē'am. ² Ti Apilatī soke Azezi yeti: «Fōn de la Zīfdōma naba?» Ti a lerge yeti: «La de la fōn yele se'em na.» ³ Ti kāabgo kēma nēṇadōma la dōre ē yela zozo'e. ⁴ Ti Apilatī le soke Azezi yeti: «Fōn wōm yetōg-seba wuu ti ba tōge bō fu

wā, fōn kǎn lerge se'ere?» ⁵ Tl Azezi ka le lerge se'ere, tl la di'ige Apilatı.

Ba tɔge tl ba ku Azezi

(Amatie 27:15-26, Aluki 23:13-25, Azā 18:39—19:16)

⁶ Ƴɔɔg-base kibsa woo Apilatı daan ɛn botı ba yese la nēr-seka tl nērba la boorı la yu'a deem base. ⁷ La buraa ayıla yu'ure n de Abarabası, ɛɲa la nērba baseba n daan dāme tɛɲa, ku nēra tl ba yōge ba yu. ⁸ Tl nēr-kuuɲɔ la sɛɲe Apilatı zɛ'am ka sose ɛ yetı, a ɛɲe ɛɲa n ıtı se'em na bɔ ba. ⁹ Tl a soke ba yetı: «Ya boorı tl m yese la Zıfdōma naba la base bɔ ya?» ¹⁰ Se'ere n soe la, a bāɲe tl kǎabgɔ kēma nēɲadōma la ɛɲe la sūure botı ba yōke Azezi wa bɔ ɛ. ¹¹ La kǎabgɔ kēma nēɲadōma la daan sa'ase nēr-kuuɲɔ la mɛ, tl ba sɛɲe ka sose Apilatı tl a yese Abarabası base bɔ ba. ¹² Tl Apilatı le soke ba yetı: «Bela, seka tl ya wi'iri tl Zıfdōma naba la, yāma boorı tl m ɛɲe ɛ na wāne?» ¹³ Tl ba tɔgra ke'enke'em yetı: «Ka ɛ dɔ-puurnja zuo.» ¹⁴ Tl Apilatı soke ba yetı: «A ɛɲe la bēm n de be'em?» Tl ba malun tɔgra ke'enke'em yetı: «Ka ɛ dɔ-puurnja zuo.» ¹⁵ La Apilatı daan boorı tl a ɛɲe tl nērba la sūure n ɛɲe yēlum, tl a yese Abarabası base bɔ ba. Dee botı ba wē Azezi la ka'asa, dee dıke ɛ bɔ tl ba ka ɛ dɔ-puurnja zuo.

Sudaası yaale Azezi

(Amatie 27:27-31, Azā 19:2-3)

¹⁶ Tl sudaası tarı Azezi kē gɔmna la yire zēnzakam, dee wi sudaası la wuu, tl ba lagse. ¹⁷ Tl ba dıke fuugo n de gomusga ye Azezi, dee dıke gō'osi wuge mūɲa vuge ɛ. ¹⁸ Dee yāɲa pu'usra ɛ yetı: «Zıfdōma naba, naa!» ¹⁹ Dee dıke dasaare wē a zuugo, tubse nōtōorum mī ɛ, dee ka dūma tɛɲa a nēɲam nā'asra ɛ. ²⁰ Ban yaale ɛ kɪ'lım na, ba yeɛge gomusga fuugo la mɛ, dee le ye ɛ a futo, tarı ɛ yese tl ba sɛɲe ka ka dɔ-puurnja zuo ku.

Ba ka Azezi dɔ-puurnja zuo

(Amatie 27:32-44, Aluki 23:26-43, Azā 19:17-27)

²¹ Ban daan tarı Azezi wɛ'esa la, ba daan tu'use la buraaga ayıla yu'ure n de Asimō n ze'ele Sireni, a de la Alegsāndrı la Arufusi sɔ. A daan ze'ele la va'am lɛmna. Tl sudaası la pɛrge ɛ, tl a to'oge Azezi kūm dɔ-puurnja la buke. ²² Ba daan tarı Azezi sɛɲe la zɛ'a tl ba wi'iri tl Golgota, a vōore de la zuwanɲe zɛ'a. ²³ Ba daan dıke la dāam n gaam na tum yu'ure n de miiri bɔ ɛ tl a yū, tl a zagse ka yū. ²⁴ Tl ba daan ka ɛ dɔ-puurnja zuo, dee dıke a futo tl ba puı taaba, pɔse tl ba bāɲe nēra woo n wun to'oge se'em. ²⁵ La daan de la bulika karf-awɛı wakate tl ba ka ɛ dɔ-puurnja zuo. ²⁶ Ba daan gulse la gulsgɔ pa'alɛ bōn-seka n botı ba ka ɛ lablɛ dɔ-puurnja la zuo. Ba daan gulse yetı: «Zıfdōma naba.» ²⁷ Ba daan tarı la fāarba bayi wa po ka dɔ-puursi zuto, ayıla a zuugo bɔ-ba, ayēma a gɔbga bɔba. [²⁸ La de la bela, tl Nawēnne

gōɲɔ n gulse se'em na ɛɲe. La gulse yetı: «Ba geele ɛ pa'ase la tōon-be'ero dōma puam.»]

²⁹ Tl nēr-seba n dolı bilam tɔlla la lɔbra ba zuto, dee tuura ɛ yetı: «Ėhēe, faa! Dagı fōn yetı fōn wun wōrge Wēnde-kāte la dee le mē ɛ dabsa atā puam?» ³⁰ Fāage fu mēɲa dɔ-puurnja la zuo sige.» ³¹ Tl kǎabgɔ kēma nēɲadōma, la lɔɔ karēnsāandōma la mē la'ara ɛ yetı taaba yetı: «A daan fāagrı nērba baseba mɛ, dee ka tǎ-na wun fāage a mēɲa. ³² A sǎn dena Krisi, lırayelı dōma naba la, a ze'ele dɔ-puurnja la zuo sige nānanne wā tl tl yē dee sake.» Tl nēr-seba tl ba ka dɔ-puursi zuto lɛm ɛ na mē tɔge ɛ be'em.

Azezi kūm

(Amatie 27:45-56, Aluki 23:44-49, Azā 19:28-30)

³³ Wunteɛɲa zuu-tēɲasuka n daan paage, tl tɛɲa la wuu lebgɛ lika halı ka paage zaanōore karf-atā. ³⁴ Karf-atā la wakate tl Azezi tɔge ke'enke'em yetı: «Eloi, Eloi, lama sabaktani.» La vōore de la: «Mam Wēnnaam, mam Wēnnaam, bēm n soe tl fōn base mam?» ³⁵ Tl se-ba n ze bilam na baseba wōm bela, yetı: «Selse-ya, a wi'iri la A'eli.» ³⁶ Tl nēra ayēma zoe ka dıke nētıɲa luse dǎ-mīisgo puam zēke la dɔɔgɔ bɔ ɛ tl a yū, dee yetı: «Base-ya tl tl gu bıse A'eli la sǎn wun wa sike ɛ dɔ-puurnja la zuo.» ³⁷ Tl Azezi le kaase ke'enke'em dee yāɲa ki.

³⁸ Wakat-ɛɲa, tl fuugo la n yuli Wēnde-kāte la puam beɲe zēle-sōɲɔ la āage pusuka saazuum ka paage tɛɲa.

³⁹ Tl Rom sudaası ke'ema daan ze Azezi nēɲam yē ɛn ki se'em, tl a yetı: «Bura-ɛna wā surı de la Nawēnne Dayua.» ⁴⁰ La pɔgsı baseba n mē daan boe mī ze kēnkernja bısrı. Amaari n ze'ele Magdala, la Amaari n de Azakı pıka la Azoze ma, la Asalome n daan boe ba puam. ⁴¹ Azezi n daan boe Galile la, ba daan dolı ɛ mɛ dee sōɲra ɛ. La pɔgsı baseba zozo'e n daan lagum doose ɛ wa'am Zerizalem n boe mī.

Azezi laare

(Amatie 27:57-61, Aluki 23:50-56, Azā 19:38-42)

⁴² Tl wēnne daan bɔna mī kē'era, la daan de la beere n wun wiige Zıfdōma vo'osgo daare, tl ba daan bɔna mī māasna. ⁴³ Tl buraa ayıla yu'ure n de Azozefu, a ze'ele la Arimate, a de la sarıyaditba la nēra ayıla tl ba nannı. A mē daan gu'uri la Nawēnne n wun wa'am wa di na'am nērba tēɲasuka. Lan daan de beere n wun wiige vo'osgo daare la ıyā, tl a ke'em sūure sɛɲe Apilatı zɛ'am ka sose Azezi kūm na. ⁴⁴ La Apilatı n wōm tl Azezi dare ki mɛ na, la di'ige ɛ mɛ. Tl a botı ba wi suda-ke'ema la, tl a soke bāɲe Azezi ki yuuge mɛ? ⁴⁵ La Apilatı n wōm suda-ke'ema la lergre la, tl a bɔ Azozefu sore tl a sike kūm na. ⁴⁶ Tl Azozefu da tǎnne sike kūm na dɔ-puurnja la zuo, dıke tǎnne la vile ɛ, tarı ɛ sɛɲe ka

laage yɔɔɔɔ tɪ ba daan tũ tãmpĩa ãyã, yãɲa bilge kug-kãte lige yɔɔɔɔ la nõore. ⁴⁷ Amaari n ze'ele Magdala, la Azoze ma Amaari daan ze me bɪsra zẽ'e-seka tɪ ba bĩɲe ẽ na.

Azezi vo'ore

(Amatie 28:1-8, Aluki 24:1-12, Azã 20:1-10)

16 Zifdõma vo'osgo daare n daan tole, tɪ Amaari n ze'ele Magdala, la Azaki ma Amaari, la Asalome da tidare yũuɲo n ẽn sõɲa tɪ ba tarɪ sɛɲe ka ẽɲe Azezi ãyã. ² Tɪ Lasɪ daare bulika wɛnnɛ n doorɪ se'em mã'a la, tɪ ba wɛ'esa yɔɔm na, ³ dee tɔgra la taaba sore yetɪ: «Åne n wun bilge kugre la yɔɔɔɔ la nõorum bɔ tɔ?» ⁴ La ban paage la, ba yẽ tɪ kugre la n ba ẽnã kãte la põn bilge me gã. ⁵ Tɪ ba kẽ yɔɔɔɔ la puam, yẽ budib-polle n ye fu-pɛelga zẽa zuugo bɔba, tɪ ba palẽɲa ẽke. ⁶ Tɪ a yele ba yetɪ: «Da base-ya tɪ ya palẽɲa ẽgra, mam mi tɪ ya eerɪ la Azezi n ze'ele Nazaretɪ, tɪ ba ka dɔ-puurɲa zuo ku la. A vo'oge me, a ka boe kalam. Bɪsɛ-ya zẽ'e-seka tɪ ba daan bĩɲe ẽ na n wãna. ⁷ Sɛɲe-ya ka yele Apɪyɛɛɪ, la a karẽnbiisi baseba la yetɪ: «A wun dɛɲe ya nẽɲa sɛɲe Galile. Bilam tɪ ya wun yẽ ẽ, wu ẽn daan yele ya se'em na.» ⁸ Tɪ ba yem bɔɪ, tɪ ba ãyã gõgra, tɪ ba yese yɔɔɔɔ la puam zoe, la ba daan ka yele nẽra nẽra sɛla, se'ere n soe la, dabeem n tarɪ ba.

Azezi dɪke a mẽɲa pa'ale nẽba

(Amatie 28:9-10,16-20, Aluki 24:13-49, Azã 20:11-23)

[⁹ Azezi n daan vo'oge Lasɪ daare bulika yu'ɲɔ yu'ɲɔ la, a dɛɲe dɪke a mẽɲa pa'ale la Amaari n ze'ele Magdala. La de la ɛɲa tɪ kulkã'arsɪ bayopɔɪ daan dolɪ ẽ

tɪ Azezi dige ba, tɪ ba yese la. ¹⁰ Tɪ a sɛɲe ka yele nẽr-seba n daan dolɪ Azezi la. Ba daan zĩ la sũ-sã'arɲo la nin-tãm. ¹¹ La ban daan wõm tɪ Azezi vo'oge me tɪ Amaari yẽ ẽ na, ba daan ka sake.

¹² Bela poorum tɪ Azezi le teege nẽɲa ayẽma dɪke a mẽɲa pa'ale a karẽnbiisi bayi n daan boe sore wɛ'esa tẽn-pɪka ayɪla. ¹³ Tɪ ba lebe ka yele ba taaba la, tɪ ba ka sake.

¹⁴ La bela poorum, tɪ a karẽnbiisi pia la ayɪla la daan zẽa dita, tɪ Azezi dɪke a mẽɲa pa'ale ba. Dee zɛbe ba, ban daan ka bɔ sɪra, la ba sũure n ke la ãyã. Se'ere n soe la, ba daan ka sake seba n daan yẽ ẽ yetɪ a vo'oge me na yetɔga. ¹⁵ A yele bela, dee yele ba yetɪ: «Sɛɲe-ya dũnia zẽ'a woo ka mõole Nawɛnnɛ kõ-yɛlga la bɔ nẽr-ba wuu. ¹⁶ Seka woo n bɔ sɪra, botɪ ba mise ẽ ko'om puam, a wun yẽ fãare. La sɛka woo n ka bɔ sɪra, ba wun di a sarɪya sɪbge ẽ. ¹⁷ La seba n wun bɔ mam sɪra la, wun ɪta la bõn-yãlma bãna pa'ale Nawɛnnɛ pãɲa: Ba wun dɪke la mam yu'ure digra kulkã'arsɪ, dee tɔgra yetɔg-zãɲsɪ. ¹⁸ La ba sãn yõge bõnse'edõma, bu yũ yab-ga, la kãn ɛɲe ba sɛla. La ba wun dɪke ba nu'usi pagle bã'adõma zuto, tɪ ba yẽ ãmã'asum.»

Azezi zom Nawɛnnɛ yire

(Aluki 24:50-53, Tõoma 1:9-11)

¹⁹ Zuudãana Azezi n daan tɔge la ba kɪ'ulum na, a zẽke me zom Nawɛnnɛ yire, ka zĩ'ire Nawɛnnɛ zuugo. ²⁰ Tɪ a karẽnbiisi la sɛɲe ka mõole kõ-yɛlga la zẽ'esɪ wuu. Tɪ Zuudãana la sõɲe ba, botɪ ba tõm tõon-yãlma pa'ale tɪ ba kõa la mõolgo de la sɪra.]

Aluki

Bilgre

Aluki yuun de la logtore, dɔla Apolɔ tɔnna Nawɛnnɛ tɔoma (Afilmɔ 24). Ɛŋa n ken gulɛ Azezi-krisi Tɔntɔnɔba Tɔoma Gɔŋɔ. A dagɔ Zifu. A yuun mɔrgɛ mɛ doose Azezi yela la wuu nɔma sɔŋa sɔŋa, gulɛ bɔ bu-zɔŋsɔ yetɩ ɛŋa yetɩ a pa'alɛ ba mɛ tɩ ba bɔŋɛ tɩ ban zɔsum ba se'em na de la sɩra (Aluki 1:1-4).

Aluki pa'alɛ tɩ Azezi de la Zifdɔma, la dɔnɩa buuri wuu nɛrba Fɔagra, la ɛŋa n zotɩ nasdɔma, la bɔ'adɔma, la se-ba tɩ nɛrba sisri ninbɔalga zozo'e. A ken pa'alɛ tɩ Azezi tɔm na Nawɛnnɛ Sɩa pɔŋa lɛ, dee yetɩ Nawɛnnɛ kɔ-yɛlga la bɔ'ɔrɩ la sɩ-yɛlga zo'oge (Aluki 2:10, 24:52).

A pa'alɛ la Azezi wɔm n doose se'em wu Amatɩe, la Amarkɩ n mɛ gulɛ se'em na. A pa'alɛ la Azezi tɔoma pɔ'ilunɔ, la ɛn zɔsum nɛrba, dee botɩ nɛrba yɛ ɩmɔ'asum, la ɛn sɛŋɛ Zerizalem tɩ ba yɔkɛ ɛ ka dɔ-puurnɔa zuo, tɩ a ki, dee vo'oge, zom Nawɛnnɛ yire.

Aluki gɔŋɔ la tarɩ la yela zozo'e n ka gulɛ gɔnnɔ baseba la puam:

- Nawɛnnɛ n tɔm maleka tɩ a wa'am wa yele Amaari Azezi dɔka yelle, la Azɔ n yuun misri nɛrba ko'om puam na mɛ dɔka yelle (sapɩrɩ 1).
- Azezi dɔka n doose se'em, la malegsɩ n pa'alɛ dɔnsɩima tɩ ba sɛŋɛ ka pɛgɛ Azezi (2:1-20).
- Ban dɩkɛ Azezi bɔ Nawɛnnɛ, tɩ Asimeyɔ, la A'annɩ tɔgɛ Azezi yelle se'em (2:22-40).
- Azezi n tarɩ yuuma pia la ayɩ wakate la, ɛn sɛŋɛ Wɛnde-kɔtum ka ɛŋɛ se'em (2:41-52).
- Samaari nɛra n sɔŋɛ nɛra makɛ (10:30-35), bɔntarsa n ka tarɩ yem makɛ (12:13-21), la bia n base a sɔ yire, le lebe kule makɛ (15:11-32).

Se'ere n soe tɩ Aluki gulɛ gɔŋɔ la

¹ Mam sɩr-sɔŋɔ Ateofili, nɛrba zozo'e n mɔrgɛ gulɛ yel-seba wuu n ɛŋɛ tɔma zɛ'am na. ² Ba gulɛ yel-bɔma wuu wu nɛrba baseba n daan yɛ yela la wuu halɩ ba pɔ'ilunɔ, dee mɔole kɔ-yɛlga la tɔgɛ pa'alɛ tɩ tɔma wɔm se'em na. ³ Bela ɩyɔ tɩ mam mɔ'age m mɛŋa doose yel-bɔma nɔma sɔŋa sɔŋa halɩ ba pɔ'ilunɔ puam, tɩ mam tɛ'ese tɩ la ɔn sɔŋa tɩ m gulɛ yela la n doose taaba se'em na bɔ fɔ. ⁴ Mam gulsɩ wɔna tɩ fu bɔŋɛ mɛ tɩ yel-bɔna wuu tɩ ba pa'alɛ fu la de la sɩra.

Azakari bia Azɔ tɩ ba wun dɔgɛ yelle

⁵ Se'emwɛnum tɩ A'ercɔɩ daan de Zude tɛŋa naba la, buraa n daan boe tɩ a yu'urɛ dɛna Azakari. A daan de la Zifdɔma kɔabgɔ kɛema, a de la Abiya buuri nɛra. Tɩ a pɔga yu'urɛ dɛna A'elizabetɩ, ɛŋa mɛ daan de la kɔabgɔ kɛma nɛjadɔana Aarɔ buuri. ⁶ Bɔma bayi daan de la nɛrba n ɩtɩ sɔŋa Nawɛnnɛ nifum, dee sakra Nawɛnnɛ nɔore, la a lɔ la wuu sɔŋa. ⁷ La ba daan ka tarɩ bia, se'ere n soe la, A'elizabetɩ daan de la kɔndɔgre, la bɔma bayi la wuu mɛ kurgɛ mɛ.

⁸ La wakate n daan paage tɩ Abiya buuri kɛ Wɛnde-kɔte la puam tɩ ba tɔm. Tɩ Azakari mɛ kɛ tɩ a tɔm.

⁹ Kɔabgɔ kɛma la malɔŋ daan de la ba pɔse looge nɛr-

seka n wun kɛ zɛ'e-sɔŋɔ puam yɔ tɩdare bɔ Nawɛnnɛ.

Tɩ ba daan pɔse, tɩ la yɔkɛ Azakari. Tɩ Azakari kɛ tɩ a yɔ.

¹⁰ La tɩdare la yɔ'a wakate nɛr-kusɔŋɔ la wuu boe la yɛŋa pu'usra Nawɛnnɛ.

¹¹ Tɩ Nawɛnnɛ maleka dare wa'am Azakari zɛ'am wa ze tɩdare yɔ'a bɩmbɩnne na zuugɔ bɔba. ¹² La Azakari n yɛ ɛ na, a palɛŋa n ɛkɛ halɩ, tɩ dabeem kɛ ɛ. ¹³ Tɩ maleka la yele ɛ yetɩ: «Azakari, da zoe dabeem, tɩ Nawɛnnɛ wɔm fu pu'usgɔ mɛ. Fu pɔga A'elizabetɩ wun dɔgɛ la budibla, tɩ fu sɩ a yu'urɛ tɩ Azɔ. ¹⁴ La fu wun ɛŋɛ sɩ-yɛlga sɩrum. La nɛrba zozo'e wun ɛŋɛ sɩ-yɛlga bia la dɔka ɩyɔ. ¹⁵ A wun dɛna la nɛr-keko Zuudɔana Nawɛnnɛ nifum, la a kɔn yɔ dɔam bu bɔn-yɔula n bugri. Nawɛnnɛ Sɩa wun bɔna la ɛ halɩ lan pɔse ɛn boe a ma puurum, la wakate wuu. ¹⁶ A wun botɩ Israyɛlɩ nɛrba zozo'e lebe sake ba Zuudɔana Nawɛnnɛ. ¹⁷ La a wun dɛŋɛ Zuudɔana nɛŋam tara Nawɛnnɛ Sɩa pɔŋa wu Nawɛnnɛ nɔtɔ'ɔsa A'eli n daan tarɩ se'em na. La a wun naage sɔdɔma la ba kɔma yela, dee wun botɩ nɛr-seba n sɩ'ɩsɩrɩ Nawɛnnɛ nɔore la tara yem ɩta wu seba n ɩtɩ sela n mase la. A wun botɩ nɛrba mɔasum sɔŋa gu'ura tɩ Zuudɔana.»

¹⁸ Tɩ Azakari soke maleka la yetɩ: «Bɛm n wun botɩ mam bɔŋɛ tɩ bɔn-ɛna de la sɩra? Se'ere n soe la, mam de la bura-yɔ'ana dee tɩ mam pɔga mɛ kurgɛ.» ¹⁹ Tɩ maleka la lerge ɛ yetɩ: «Mam yu'urɛ de la Agabɩyɛlɩ,

mam ze la Nawēnne nējam. Ēja n tōm mam yeti, m wa'am yele fu yetɔg-yēlga wā. ²⁰ La fōn ka sake mam yetɔga la iŷā, fu nōore n wun māam. La wakate sān paage, bōn-seba ti mam yele fu la wun ēje. La fu kān le tāna tɔgra, halu ti la paage daar-seka ti bōn-bāna wun ēje la.»

²¹ Wakat-ēja, nērba la daan gu'uri me ti Azakari yese. La ēn daan boe zē'e-sōŋ la puam yuura la, ba palēja n ēke. ²² La ēn yāja wa yese la, a ka tā'age tɔge la nērba la. A nōorum n māam ti a tara nu'usi magra pa'ala ba. Bela ti ba bāje ti a yē la bōn-yālma zē'e-sōŋ la puam.

²³ Dabs-seba ti Azakari daan wun tōm Wēnde-kāte la puam n ba'ase la, a daan lebe kule la a yire.

²⁴ Dabs-bāna poorum, ti a pɔga A'elizabeti yōke puure bōna yire wōr-sīnuu. ²⁵ Dee yeti: «Wāna de la Zuudāana Nawēnne tōoma. Wakat-ēna ēja n yāja bise mam yelle, dee yese bōn-ēna n de ni yānne bɔ mam nērba tējasuka.»

Maleka n tɔge Azezi dɔka yelle

²⁶⁻²⁷ Pugla ayila n daan boe Galile tēja ayila yu'ure n de Nazareti, ti a yu'ure dena Amaari. A daan nān ka mi buraa. La buraa ayila yu'ure n de Azozefu n yeti a di ē. Azozefu de la naba Adavidi buuri nēra. La wakat-seka ti A'elizabeti daan taru puure wōr-sīyoobi puam na, ti Nawēnne tōm a maleka Agabryeli ti a sēje Amaari zē'am. ²⁸ Ti maleka la sēje Amaari zē'am ka pu'use ē yeti: «Fu tōoma. Zuudāana Nawēnne boe la fu me, a ēje fu yel-sōnne me.» ²⁹ La Amaari n daan wōm maleka yetɔga la, a palēja n ēke, ti a tē'esra maleka la n yele se'em na vōore n de sela. ³⁰ Ti maleka la yele ē yeti: «Amaari, da zoe dabeem, ti Nawēnne ēje fu yel-sōnne me. ³¹ Fu wun yōke la puure dɔge budibla, si a yu'ure ti Azezi. ³² A wun dena la nēr-keko. La ba wun wi'ira ē ti, Nawēnne n gānni wuu Bia. La Zuudāana Nawēnne wun bɔ ē a yaaba Adavidi na'am, ³³ ti a dena Azakobi buuri naba wakate wuu, a na'am na kān maln ba'ase.»

³⁴ Ti Amaari soke maleka la yeti: «Mam ka mi buraa, la wun ēje la wāne ti mam yōke puure?» ³⁵ Ti maleka la lerge ē yeti: «Nawēnne n gānni sela wuu Sia wun sige fu zuo, la Nawēnne pāja wun bōna la fu, bela bia la ti fu wun dɔge la wun welge la to'ore, ba wun wi'ira ē ti Nawēnne Dayua. ³⁶ Bāje ti fu sōogo A'elizabeti ti ba yeti a de la kōndɔgre la, a taru la puure wōr-sīyoobi n wāna. Baa la ēn kurge la, a wun dɔge la budibla.

³⁷ Se'ere n soe la, sela sela ka boe ti Nawēnne ka tā uta.» ³⁸ Ti Amaari lerge yeti: «Mam de la Zuudāana Nawēnne tōntōn-pɔka. Nawēnne boti la ēje wu fōn yele se'em na.» Ti maleka la fōrge dee base ē.

Amaari sēje ka bise A'elizabeti

³⁹ La dabsa bāma puam, ti Amaari isge sēje tɔtɔ paage Zude so'olum tēja ayila ti tānsi boe mī. ⁴⁰ La ēn paage la, a kē la Azakari yire pu'use A'elizabeti. ⁴¹ La A'elizabeti n wōm a pu'usgo la, bia la wērge me a puurum. Ti Nawēnne Sia wa'am A'elizabeti zē'am la pāja, ⁴² ti a tīi tɔge yeti: «Nawēnne ēje la fōn yel-sōnne gānna pɔgsi la wuu. La bia la ti fu wun dɔge la, taru yel-sōnne me. ⁴³ Mam de la āne ti mam Zuudāana ma sēna mam zē'am? ⁴⁴ Se'ere n soe la, mam wōm fōn pu'usgo la, bia la n boe mam puurum na wērge me la sū-yēlga. ⁴⁵ Fōn sake ti Zuudāana Nawēnne yetɔga ti a tɔge bɔ fu la wun siri ēje la, fu yē zu-yēlga.»

Amaari n yōom yōoma pēge Nawēnne la yelle

⁴⁶ Ti Amaari yele yeti:

«Mam pēgru Zuudāana Nawēnne la m sūure wuu.

⁴⁷ Mam taru sū-yēlga me, Nawēnne n de mam Fāagra la iŷā,

⁴⁸ se'ere n soe la, a bise mam n de a tōntōn-pɔg-tar-ma la yelle me.

Bela lan pɔse lēle wā we'esa, zamāana wuu nērba wun wi'ira mam ti zu-yēlga dāana.

⁴⁹ Se'ere n soe la, Nawēnne n tā wuu la n ēje bōn-kāra bɔ mam.

A de la pupeelem dāana.

⁵⁰ La nēr-seba n zoti ē na, a zoti ba ninbāalga me zamāana wuu.

⁵¹ A dīke la a nu'ugo tōm tōon-kāra, dee boti zēk-m-mēja dōma la zoe wūrge la ba zēk-m-mēja putē'era la.

⁵² La sān dena pānsi dōma, a sikri ba me ba na'am puam, dee zēkra sik-m-mēja dōma.

⁵³ La seba n ka taru sela la, a bɔ'ɔru ba bōntarsōm zɔ'ɔra me, dee boti bōntatba lebe fōrge dee ka to'oge sela sela.

⁵⁴ A tēerɔ zɔta tōma lsayeli nērba n de a tōntōntba la ninbāalga me, dee sōŋra tōma,

⁵⁵ wu ēn yuun bīje a nōore la tōma yaaba Abraham, la tōma sɔ-yaabdōma, la ba yūsɔ la wuu ti a wun sōŋra tōma wakate wuu se'em na.»

⁵⁶ La Amaari daan weege A'elizabeti zē'am ēje wu wōr-sitā, dee yāja lebe kule.

Azā dɔka yelle

⁵⁷ A'elizabeti dɔka wakate n daan paage la, a dɔge la budibla. ⁵⁸ Ti a sawiiba, la a yir-dōma wōm ti Zuudāana Nawēnne zoe a ninbāalga zo'oge, ti ba wuu lagum ita sū-yēlga la ē. ⁵⁹ Bia la dɔka dabsa anii daare ti ba wa'am ti ba wā ē, daan bɔɔra ti ba si a yu'ure a sɔ Azakari yu'ure. ⁶⁰ La a ma ka sake, yeti: «Ayei, a yu'ure wun

dēna la Azā.» ⁶¹ Tl ba lerge yetl: «Ya yir-dōma la puam nēra ka boe mī tl a yu'urē dēna Azā.» ⁶² Tl ba yūbse la nu'usi soke bia la sɔ tl ba bānje ēja n boorl tl ba sɪ bia la yu'urē se'em. ⁶³ Tl a botl ba bɔ ē dɔ-palaka, tl a to'oge gulse yetl: «A yu'urē de la Azā.» Tl la di'ige nēr-ba la waa wuu. ⁶⁴ La ēn gulse yele bela la, bilam mēja tl a zɪlɪja lake, tl a tā'age tɔgra pēgra Nawēnne. ⁶⁵ Tl dabeem yōke seba n lem bilam na wuu. Tl kō-ēja saage Zude tēn-seba tl tānsɪ boe mī na wuu. ⁶⁶ Bāma wuu n daan wōm yela la, ba daan tē'esrɪ mē dee sɔkra yetl: «Bi-ēna yetl a wa āna la wāne?» Zuudāana Nawēnne pānja boe la ē mē.

Azakari n to'oge Nawēnne yetɔga bɔ nērba la yelle

⁶⁷ Nawēnne Sia n wa'am bia la sɔ Azakari zē'am la pānja. Tl a to'oge Nawēnne yetɔga tɔge yetl:

⁶⁸ «Base-ya tl pēge Nawēnne n de Israyelɪ Zuudāana la,

se'ere n soe la, a wa'am mē wa bɪse a nērba yelle, fāage ba base.

⁶⁹ A bɔ tōma la Fāagra n tarɪ pānja n wun yese a tōn-tōnna Adavidi buuri la puam,

⁷⁰ wu ēja n yuun botl a nōtɔ'srɪba tɔgra kurum se'em na.

⁷¹ A yetl a wun fāage tɔ tl be'eba nu'usum, la nēr-seba n sisri tōma la nu'usum.

⁷² Bela, a zoe tl yaabdōma ninbāalga mē, dee tēege ēn yuun bīje a nōore la ba la yelle.

⁷³ Se'ere n soe la, a yuun bīje nōore mē la tl yaaba Abraham

⁷⁴ tl a wun fāage tɔ tl be'eba nu'usum, dee wun botl tl tōm a tōoma, tl dabeem kana.

⁷⁵ Dee dɔla ē la pupeelem, dee ita tl la masra ēn boorl se'em ka paage tl vɔm tē-ka.

⁷⁶ La fōn, m bia, ba wun wi'ira fu tl Nawēnne n gānnɪ wuu nōtɔ'ɔsa.

Bela īyā, fōn wun dēje tl Zuudāana la nējam malge sore bɔ ē,

⁷⁷ dee yele Nawēnne nērba la tl ba bānje tl a wun fāage ba base ba tōon-be'ero taale.

⁷⁸ La de la Nawēnne n zotɪ tōma ninbāalga la īyā tl a wun botl a peelem n ān wu wuntēja n yēke bulika la,

⁷⁹ nēege bɔ nēr-seba n boe lika puam, la nēr-seba n zotɪ kūm dabeem na, dee pa'ale tl so-seka tl tl wun doose yē sū-mā'asum.»

⁸⁰ Tl bia la daan bita, tl a putē'ere pa'asra. A daan boe la weem ka paage daar-seka tl a wa'am Israyelɪ dōma la zē'am tl ba bānje ē.

Azezi dɔka yelle

(Amatie 1:18-25)

² Ban daan dɔge Azā la, wakat-ēja tl na-keko A'ogisti daan bɔ nōore yetl, ba kāale a tēja la wuu nērba. ² La daan de la pɔspɔsɪ n bela tl ba kāale nērba la, wakat-seka tl Akirinusi daan de Siiri tēnsɪ gɔmna la. ³ Tl nērba wuu kule ba mēnsɪ tēnsɪm tl ba kāale ba.

⁴ Tl Azozefu mē yese Nazaretɪ n boe Galile so'olum sēje Betelem n boe Zude so'olum puam, zē'e-ēja tl ba yuun dɔge naba Adavidi. Se'ere n soe tl a sēje bilam na, a de la naba Adavidi buuri. ⁵ ēja la Amaari n de pɔg-seka n yetl a ele ē na sēje mē tl ba kāale ba, wakat-ēja Amaari tarɪ la puure. ⁶ La ban nān boe Betelem la, tl a dɔka daare paage. ⁷ Tl a dɔge a budib-kēema, vile ē na fuugo gā'are dūnsi yɔnnɔ daka puam. Se'ere n soe la, zē'a n ka boe sāama yire la puam tl ba wun gā'are.

Dūnsīima la malekadōma yelle

⁸ La tēn-ēja dūnsīima daan boe la sēkam gu'ura ba dūnsi yu'urɔ. ⁹ Tl Nawēnne maleka sige ba zē'am. Tl Nawēnne na'am pānja peelem nēege gilge ba. Tl dabeem ba kē ba halɪ. ¹⁰ Tl maleka la yele ba yetl: «Da zoe-ya dabeem, tl mam tarɪ la kō-yēlga tl m yele ya, n wun base tl nērba wuu sūure ēje yēlum. ¹¹ La de la yu'urɔ-ēna tl ba dɔge ya Fāagra la Adavidi tēja puam, ēja n de Zuudāana Kisi la. ¹² La bōn-ēna n wun botl ya bānje tl la de la sɪra, ya wun yē bilta tl ba vile ē na fuugo gā'are dūnsi yɔnnɔ daka puam.»

¹³ Tl Nawēnne malekadōma kuurɔ-kuurɔ dare wa'am wa naage la ayɪla la. Tl ba pēgra Nawēnne yetl:

¹⁴ «Nawēnne n boe saazuum n soe pēka, la nēr-seba tl a nōje la tarɪ sū-mā'asum dūnia zuo.» ¹⁵ La malekadōma la lebe la Nawēnne yire, dee tl dūnsīima la yele taaba yetl: «Base-ya tl tl sēje Betelem ka bɪse sela n ēje tl Nawēnne yele tl la.»

¹⁶ La ba isge mē tɔtɔ sēje ka paage yē Amaari, la Azozefu, la bilta la tl a gā dūnsi yɔnnɔ daka puam. ¹⁷ La dūnsīima la n yē ē na, ba tɔge bia la yelle wu maleka la n yele ba se'em na. ¹⁸ Tl seba wuu n wōm dūnsīima la n yele se'em na, la di'ige ba mē. ¹⁹ La Amaari tē'esrɪ yela wā wuu mē a sūure puam. ²⁰ Dee tl dūnsīima la daan lebra dee pēgra Nawēnne yu'urē zozo'e, se'ere n soe la, ba wōm dee yē maleka la n yele ba se'em na.

Azezi yu'urē sia yelle

²¹ La dabsa anii la daare n daan paage, tl ba botl ba wā bia la wu Amoyisi gōjɔ n pa'ale tl ba wā ba budim-to se'em na. Tl ba sɪ a yu'urē tl Azezi, yu'ur-seka tl maleka daan yele ba tl ba sɪ ē na, wakat-seka tl Amaari daan nān ka yōke a puure la.

Ba tarɪ Azezi ka bɔ Nawēnne

²² La wakate la n paage ti Amaari malge a mēŋa Nawēnne zē'am wu Amoyisi ɔɔ gōŋɔ n yele se'em na. Ti Azozefu la Amaari tarɪ bia la sēŋe Zerizalem Wēnde-kātum ti ba dɪke ē bɔ Nawēnne. ²³ Se'ere n soe la, la gulse Nawēnne ɔɔ gōŋɔ la puam ti budib-kēema woo wun dēna la Nawēnne bōɔɔ. ²⁴ Ba daan sēŋe ti ba kãabe la sela bɔ Nawēnne wu Nawēnne ɔɔ la n yele se'em na. La yeti, ba bɔ mōom dawema bayi bu na'adawen-bie bayi.

²⁵ Wakat-ēŋa ti buraa daan boe Zerizalem ti a yu'ure dēna Asimeyō. A de la nēr-sōŋɔ dee sakra Nawēnne sōŋa, dee gu'ura Israyeli Fāagra la n sēm na. Ti Nawēnne Sia bɔna la ē. ²⁶ La Nawēnne Sia la daan pōn yele ē ti a kã ki, sãn dagna ti a yē la Krisi ti Zuudāana Nawēnne wun tōm ti a wa'am na. ²⁷ Ti Nawēnne Sia la botɪ a sēŋe Wēnde-kātum na, la wakat-ēŋa ti Azezi sɔ, la a ma daan tarɪ ē sēŋe ti ba ēŋe Nawēnne ɔɔ n yele se'em na. ²⁸ Ti Asimeyō to'oge bia la a nu'usum, pu'use Nawēnne yeti:

²⁹ «Zuudāana, lēele wã, fōn bīŋe nōore se'em na ēŋe mē.

Fu yãŋa tã base mam n de fōn tōntōnna sore ti m base dūnia dee wa'am fōn yire la sū-mã'asum.

³⁰ Se'ere n soe la, m nini yē Fāagra la ti fu tōm na,

³¹ ēŋa ti fu mãasum bɔ ti dūnia nērba wuu yē.

³² Ŋa n de peelem n wun botɪ la nēge bɔ buuri wuu ti ba bāŋe fōn,

dee wun botɪ tōma Israyeli dōma n de fōn nērba yē pēka.»

³³ La Asimeyō n tɔge bia la yela la, la daan di'ige bia la sɔ, la a ma mē. ³⁴ Ti Asimeyō kã kã'a-sōma bɔ ba, dee yele bia la ma Amaari ti Nawēnne looge bi-ēna ti a botɪ Israyeli dōma zozo'e lui mē, dee ti zozo'e mē isge. Ŋa n wun pa'alē Nawēnne tōoma, dee ti nērba zozo'e wun zagse ē. ³⁵ Ŋa n wun nēge pa'alē sela n sugē ba putē'era puam na. Dee yeti, Amaari mēŋa wun yē sū-sā'arɔ wu sɔ'a ti ba suse lu nēra sūure la.

³⁶ Wakat-ēŋa Nawēnne nōtɔ'ɔs-pɔka n mē daan boe ti a yu'ure dēna A'annɪ. Ti a sɔ yu'ure dēna Afanuyeli, a de la Azēri buuri nēra. Ŋa daan de la pug-sa'are dee ele sra paage yuuma ayopɔ ti a sra la ki. ³⁷ La a sra la n ki la, a yãŋa de la pɔkōore kurge halɪ ka paage yuuma pinii la anaasi. A daan boe la Wēnde-kātum na wakate wuu, tōnna bɔ'ɔra Nawēnne wuntēŋa la yu'urɔ wuu ka basra, dee luta nōore sɔsra Nawēnne. ³⁸ Wakat-ēŋa ti a paage ba zē'am, pu'use Nawēnne a yel-sōnne, dee tɔgra bia la yelle bɔ'ɔra seba wuu n gu'uri wakat-seka ti Nawēnne wun le fāage Zerizalem nērba la base.

³⁹ La ban ēŋe sela woo ba'ase wu Nawēnne ɔɔ la n yele se'em na, ti Azozefu la Amaari lebe kule Nazareti

n boe Galile so'olum na. ⁴⁰ Ti bia la bɪta tara pãŋa la yem, dee ti Nawēnne yel-sōnne bɔna la ē.

Azezi daan de la bia, dee weege Zerizalem

⁴¹ Yuune woo Azezi sɔ, la a ma sēnnɪ la Zerizalem dita Zɔɔg-base kibsa. ⁴² La Azezi daan tarɪ la yuuma pia la ayi, dee ti ba sēŋe kibsa la wu ban ēn ita se'em na.

⁴³ La kibsa la dabsa n ba'ase la, ti ba lebe kulla. Dee ti Azezi weege Zerizalem, ti a sɔ la a ma daan ka bāŋe ti a weege ya. ⁴⁴ Ba daan tē'esē ti a doli la ba tēŋa dōma, dee sēŋe dabsre mōone sēnne. La ban ē bɔ nērba la, la ba sɪrdōma zē'am dee ka yē ē na, ⁴⁵ ba daan lebe la Zerizalem ka ēera ē. ⁴⁶ La dabsa atã daare ti ba yē ē Wēnde-kātum na, ti a zĩ la karēnsāandōma selsra, dee sɔkra ba sokrisɪ. ⁴⁷ Azezi n daan tarɪ yem la ēn lergri se'em na, di'ige seba wuu n daan wōm na mē. ⁴⁸ La a dɔgrɪba la n yē ē na, la ba di'ige ba mē. Ti a ma soke ē yeti: «M bia, bēm ti fu ēŋe ti wãna? Mam la fu sɔ ē fu mē halɪ la sū-sā'arɔ.» ⁴⁹ Ti a lerge ba yeti: «Bēm ti ya ēera ma? Yãma ka mi ti la mase mē ti mam bɔna m sɔ yire wã bu?» ⁵⁰ Ti ba ka bāŋe Azezi yetɔga la vōore.

⁵¹ Ti Azezi doose ba kule Nazareti, dee sake ba nōore. Ti a ma tē'esra yel-bãma wuu a sūurum. ⁵² Ti Azezi bɪta, ti a yem pa'asra, ti Nawēnne la nērba nōŋe ē.

Azã mōoli Nawēnne yetɔga dee misra nērba ko'om puam

(Amatie 3:1-12, Amarkɪ 1:1-8, Azã 1:19-28)

3 Na-keko Atibēerɪ n daan di na'am na, a yuuma pia la anuu yuune, ti Apōnsɪ-pilatɪ de Zude gɔmna, dee ti A'erɔdɪ dēna Galile naba, ti a sɔbia Afilipi mē de-na Itiire la Trakoniti naba. Ti Alisaniyasɪ dēna Abilēni naba. ² La A'annɪ, la Akayifu de la Nawēnne kãabgɔ kēma nēŋadōma. Wakat-ēŋa ti Azakari bia Azã daan boe mōom ti Nawēnne tɔge bɔ ē. ³ Bela ti Azã sēŋe tēn-se-ba n boe Zurdē kulaa nōorum la wuu ka mōola yeti, ba teege yem base tōon-be'ero, ti ba mise ba ko'om puam ti Nawēnne base ba tōon-be'ero taale. ⁴ Azã n mōoli se'em na ēŋe wu Nawēnne nōtɔ'ɔsa A'ezayi n yuun gul-se gōŋɔ puam se'em na. A yuun yeti:

«Nēra n mōoli weem tɔgra ke'enke'em yeti:

Malge-ya sore sōŋa gu'ura Zuudāana, malge-ya sɔa la ti ba tɔ tēntēesi bɔ ē.

⁵ Pale-ya bɔgsɪ la wuu,

sirge-ya tãnsɪ la kũnkũma la wuu,

mãale-ya so-gɔlma ti ba tɔ tēntēesi,

pale-ya sorɔɔɔ bogro ti ba naage taaba.

⁶ Bela nērsaalba wuu wun yē Nawēnne n itɪ se'em fāagra nērba basra.»

⁷ La nērba zozo'e n sēŋe ka lagse Azã zē'am ti a mise ba ko'om puam. Ti a yele ba yeti: «Yãma ãn wu kãm-pēesi buuri, ãne n yele yãma yeti, ya tã wun zoe pōse Nawēnne sɪbgrē n sēm na? ⁸ Tōm-ya tōon-seba n pa'alɪ

tı ya teege yem base tōon-be'ero. Da kǎn tē'esε-ya tı Abraham n de yāma yaaba la, ya wun pōse Nawēnne subgre me. Mam yetı yāma me tı, Nawēnne tā wun dıke kuga wā botı ba lebge Abraham yusu. ⁹ Nēra n pōn tara lia a nu'usum tı a lubε tı. Tı-seka woo n ka wōn-nı bıe sōma la, a wun lubε ē me, lobge bugum puam tı bugum di ē.»

¹⁰ Tı nēr-kuuṇṇa la soke ē yetı: «Tı wun ēṇε la wāne?»

¹¹ Tı Azā lerge ba yetı, seka n tarı futo bayi, a looge bō seka n ka tarı. Tı seka n tarı dia, mē ēṇε bō seka n ka tarı. ¹² Tı lampo-t'w'sruba mē wa'am tı a mise ba ko'om puam, soke ē yetı: «Karēnsāama, tı wun ēṇε la wāne?»

¹³ Tı a lerge ba yetı: «Da to'oge-ya ligri gāṇε ban yele ya se'em na.» ¹⁴ Tı sudaası mē soke ē yetı: «Dee tōma, tı wun ēṇε la wāne?» Tı a yele ba yetı: «Da to'oge-ya nēra bōnō la pāṇa bu dōre nērba to'oge sela. Base-ya tı ya yōwō la seke ya.»

¹⁵ Tı nērba daan ze gu'ura tı Nawēnne fāage ba, la ba wuu daan sokrı la ba mēṇa bōwra tı ba bāṇε, Azā na'an dēna Kriši tı ba gu'ura la bu? ¹⁶ La ban tē'esrı bela la, tı Azā yele ba yetı: «Mam misrı ya la ko'om puam, la nēra n boe tara pāṇa gānna mam sēna, la mam pōn ka mase tı m pirge a tagra bō ē. Éṇa n wun mise ya Nawēnne Sıa, la bugum puam. ¹⁷ A wun welge nērba wu nēra n zālı pı'ıgō a nu'usum tı a vaage a si zēṇa yeele ēṇε a bāare puam, dee yō urgo la, la bugum n ka kīṇrı.»

¹⁸ Yetōg-bāna, la yetōga baseba zozo'e tı Azā daan dıke zāsum nērba la pa'ale ba Nawēnne kō-yēlga la.

¹⁹ La Azā daan zerge naba A'erōdı me, se'ere n soe la, a daan fāage la a kēema pōga yu'ure n de A'erōdıadı di, dee tōm tōon-be'ero baseba zozo'e pa'ase, tı Azā yele ē yetı la ka ān sōṇa. ²⁰ La A'erōdı daan yōke Azā ka page me, bela A'erōdı malın tōm la tōon-be'ero pa'ase.

Azezi ko'om misga

(Amatie 3:13-17, Amarkı 1:9-11)

²¹ Azā n daan misrı nērba wuu ko'om puam na, a daan mē mise Azezi me. La Azezi daan pu'usrı la Nawēnne, tı saazuum yo'oge, ²² tı Nawēnne Sıa sige a zuo, tı ba yē ē tı a wōn na na'adawenne. Tı kōa ze'ele Nawēnne yire yetı: «Fōn de la mam Dayua tı mam nōṇε la m sūure wuu. Fu paage la mam yem.»

Azezi yaabdōma

(Amatie 1:1-17)

²³ La Azezi n daan pī'ilum a tōoma la, a daan tarı la yuuma pitā, tı nērba daan tē'esra tı a de la Azozefu bia. Azozefu sō daan de la Aheli,

²⁴ tı Aheli sō dēna Amata,
tı Amata sō dēna Alevi,
tı Alevi sō dēna Amelki,
tı Amelki sō dēna Azanayi,

tı Azanayi sō dēna Azozefu,
²⁵ tı Azozefu sō dēna Amatatlasi,
tı Amatatlasi sō dēna Amōsı,
tı Amōsı sō dēna Anahum,
tı Anahum sō dēna A'esli,
tı A'esli sō dēna Anagayi,
²⁶ tı Anagayi sō dēna Amatlı,
tı Amatlı sō dēna Amatatlasi,
tı Amatatlasi sō dēna Asemeyē,
tı Asemeyē sō dēna Azozekı,
tı Azozekı sō dēna Azoda,
²⁷ tı Azoda sō dēna Azoanā,
tı Azoanā sō dēna Areza,
tı Areza sō dēna Azorobabelı,
tı Azorobabelı sō dēna Asalatıyelı,
tı Asalatıyelı sō dēna Aneri,
²⁸ tı Aneri sō dēna Amelki,
tı Amelki sō dēna Adi,
tı Adi sō dēna Akozam,
tı Akozam sō dēna A'elmadam,
tı A'elmadam sō dēna A'eri,
²⁹ tı A'eri sō dēna Azoze,
tı Azoze sō dēna A'eliezεεrı,
tı A'eliezεεrı sō dēna Azorim,
tı Azorim sō dēna Amata,
tı Amata sō dēna Alevi,
³⁰ tı Alevi sō dēna Asimeyō,
tı Asimeyō sō dēna Azuda,
tı Azuda sō dēna Azozefu,
tı Azozefu sō dēna Azonam,
tı Azonam sō dēna A'eliakim,
³¹ tı A'eliakim sō dēna Ameleya,
tı Ameleya sō dēna Amena,
tı Amena sō dēna Amatata,
tı Amatata sō dēna Anatā,
tı Anatā sō dēna Adavidı,
³² tı Adavidı sō dēna Azese,
tı Azese sō dēna A'obεεdı,
tı A'obεεdı sō dēna Aboozı,
tı Aboozı sō dēna Asala,
tı Asala sō dēna Anaasō,
³³ tı Anaasō sō dēna Aminadabı,
tı Aminadabı sō dēna Admē,
tı Admē sō dēna Arni,
tı Arni sō dēna A'esrōm,
tı A'esrōm sō dēna Afaresı,
tı Afaresı sō dēna Azuda,
³⁴ tı Azuda sō dēna Azakobı,
tı Azakobı sō dēna A'izakı,
tı A'izakı sō dēna Abraham,
tı Abraham sō dēna Atara,
tı Atara sō dēna Anakōwı,
³⁵ tı Anakōwı sō dēna Aseruki,
tı Aseruki sō dēna Arago,

tɪ Arago sɔ dɛna Afalɛkɪ,
 tɪ Afalɛkɪ sɔ dɛna A'ɛbɛrɪ,
 tɪ A'ɛbɛrɪ sɔ dɛna Asala,
³⁶ tɪ Asala sɔ dɛna Akayinam,
 tɪ Akayinam sɔ dɛna Arfasadɪ,
 tɪ Arfasadɪ sɔ dɛna Asem,
 tɪ Asem sɔ dɛna Anoe,
 tɪ Anoe sɔ dɛna Alemɛkɪ,
³⁷ tɪ Alemɛkɪ sɔ dɛna Amatusala,
 tɪ Amatusala sɔ dɛna A'enɔkɪ,
 tɪ A'enɔkɪ sɔ dɛna Azarɛdɪ,
 tɪ Azarɛdɪ sɔ dɛna Amalelɛlɪ,
 tɪ Amalelɛlɪ sɔ dɛna Akayinam,
³⁸ tɪ Akayinam sɔ dɛna A'enɔsɪ,
 tɪ A'enɔsɪ sɔ dɛna Asetɪ,
 tɪ Asetɪ sɔ dɛna Adam,
 la Nawɛnnɛ n nāam Adam.

Asūtāana makɛ Azezi

(Amatie 4:1-11, Amarkɪ 1:12-13)

4 Azezi daan ze'ele la Zurdɛ kulaam lebe, tɪ Nawɛnnɛ Sɪa la kɔ'ɔn bɔna la ɛ. La Nawɛnnɛ Sɪa la tarɪ ɛ sɛŋɛ la weem. ² Bilam tɪ Asūtāana makɛ ɛ dabsa pinaasɪ. La dabsa pinaasɪ la puam a ka di sela sela, tɪ a kɔm dɔnna. ³ Bela tɪ Asūtāana yele ɛ yetɪ: «Fu sɛn sɪrɪ dɛna la Nawɛnnɛ Dayua, fu yele kugre wā tɪ a lebge dia.» ⁴ Tɪ Azezi lerge ɛ yetɪ: «La gulɛ Nawɛnnɛ gɔŋɔ puam yetɪ:

«Nɛrsaala kɛn vɔa dia mā'a ŋyā.» »

⁵ Tɪ Asūtāana tarɪ ɛ sɛŋɛ ka zom tɛŋa zuo, pa'alɛ ɛ dūnia so'olum wuu nif-kabsɪɔ puam. ⁶ Dee yele ɛ yetɪ: «Bāna wuu de la mam n soe, bela mam tā wun bɔ nɛr-seka woo tɪ mam boorɪ mɛ. Mam wun bɔ fɔ dūnia wā na'am la wuu, la so'olum bāma wuu pɛka. ⁷ Fu sɛn ka dūma tɛŋa nā'ase mam, ba wuu wun dɛna la fɔn dɛn-nɛ.» ⁸ Tɪ Azezi lerge ɛ yetɪ: «La gulɛ Nawɛnnɛ yetɔga puam yetɪ:

«Nā'asra Zuudāana Nawɛnnɛ,
 dee sakra ɛŋa ayɪla mā'a.» »

⁹ Tɪ Asūtāana le tarɪ ɛ sɛŋɛ Zerizalɛm ka zom Wɛndɛkātɛ la zuo yele ɛ yetɪ: «Fu sɛn sɪrɪ dɛna la Nawɛnnɛ Dayua, fu ze'ele kalam ɛkɛ bisge tɛŋa, ¹⁰ tɪ la gulɛ yetɪ: «Nawɛnnɛ wun tɔm a malɛkadɔma tɪ ba gu fo.

¹¹ La ba wun kɔkɛ fɔ la ba nu'usi
 tɪ fu kɛn wɛ fu nā'arɛ la kugre.» »

¹² Tɪ Azezi lerge yetɪ: «Nawɛnnɛ gɔŋɔ yele tɪ:
 «Da makɛ fu Zuudāana Nawɛnnɛ bɪsɛ.» »

¹³ La Asūtāana n daan makɛ Azezi bela wuu zɪge kɔŋɛ la, a basɛ ɛ dee gu'ura la a sɛn le yɛ folle.

Azezi n pɪ'ilum a tɔoma Galile tɛŋa

(Amatie 4:12-17, Amarkɪ 1:14-15)

¹⁴ La Azezi daan lebe Galile la Nawɛnnɛ Sɪa la pɛŋa, tɪ a yu'urɛ kɔ'ɔn saage zɛ'a wuu. ¹⁵ La a ɛn zāsna la nɛrba Nawɛnnɛ yetɔga Zɪfdɔma wɛndɛto puam, tɪ ba wuu pɛgra ɛ.

Nazaretɪ nɛrba ka bɔ Azezi sɪra

(Amatie 13:53-58, Amarkɪ 6:1-6)

¹⁶ La Azezi daan sɛŋɛ la Nazaretɪ, ban daan uge ɛ tɛn-seka la. Tɪ Zɪfdɔma vo'osgo daare tɪ a kɛ ba wɛn-deem wu ɛŋa ɛn kɛ'era se'em na, yāŋa isge ze'ele tɪ a karɛŋɛ. ¹⁷ Tɪ ba dɪkɛ gɔn-seka tɪ Nawɛnnɛ nɔtɔ'ɔsa A'ezayi yuun gulɛ la bɔ ɛ. Tɪ a lake gɔŋɔ la yɛ zɛ'e-seka tɪ a boorɪ la, yāŋa karɛŋɛ wu zɛ'a la n yele se'em na:

¹⁸ «Zuudāana Nawɛnnɛ Sɪa n boe la mam,
 ɛŋa n looge mam bɔ mam pɛŋa,
 tɪ m buglɛ sū-sā'arɔ dɔma sūure,
 tɪ m mɔolɛ kɔ-yɛlga la bɔ nasdɔma,
 dee tɔm mam tɪ m tɔge bɔ yamsɪ tɪ ba wun yɛ yolsgo,
 dee tɔge bɔ fɔɔsɪ tɪ ba nini wun pike,
 dee yese sɛba n boe nāmsgo puam la base,
¹⁹ dee mɔolɛ tɪ wakate paage ya,
 tɪ Zuudāana wun ɛŋɛ nɛrba yel-sɔnnɛ.»

²⁰ La ɛn karɛŋɛ ba'ase la, a lebe laglɛ gɔŋɔ la mɛ bɔ sɛka n gu'uri gɔnnɔ la, dee zɪ'ire. Tɪ nɛr-seba wuu n boe wɛndeem na bɪsra ɛ zɪi. ²¹ Tɪ a yele ba yetɪ: «Zɪna, lɛɛɛ wā, sela tɪ ba gulɛ Nawɛnnɛ gɔŋɔ puam tɪ yāma wɔm wā, la ɛŋɛ wu lan yele se'em na.» ²² Tɪ ba tɔge pɛge ɛ, la a yetɔg-sɔma la tɪ a tɔge la di'ige ba mɛ. Dee tɪ ba sɔkra yetɪ, la ka de Azozɛfu dayua la n wāna? ²³ Tɪ Azezi yele ba yetɪ: «Mam pɔn mina tɪ ya wun makɛ makɛ ɛ-na bɔ mam yetɪ: «Tum dāana, tɪbɛ fu mɛŋa.» La ya wun ken yele mam yetɪ: «Bɔn-seba tɪ fu daan ɛŋɛ Kapernaum tɛŋam tɪ tɔma wɔm na, ɛŋɛ bela nɔo fu mɛŋa tɛŋam kalam mɛ.» » ²⁴ Tɪ Azezi le yele ba yetɪ: «Mam yetɪ ya la sɪra, tɪ ba ka nannɪ Nawɛnnɛ nɔtɔ'ɔsa baa ayɪla a mɛŋa tɛŋam. ²⁵ La de la sɪra tɪ mam yetɪ ya tɪ: Pɔkɔpa zozo'e yuun boe Israyɛlɪ tɛŋam A'eli wakatum na mɛ, la saaga ka ni yuuma atā la wɔr-sɪyoobɪ, tɪ kɔm yuun ba bɔna tɛŋa la wuu puam. ²⁶ La Nawɛnnɛ ka tɔm A'eli yetɪ a sɛŋɛ pɔkɔ-bāma zɛ'am. A tɔm ɛ na pɔkɔore n boe Sarepɪta n boe Sidɔ so'olum puam na zɛ'am. ²⁷ La kɔnkɔma zozo'e yuun boe Israyɛlɪ tɛŋam A'elɪze wakatum na mɛ, la baa ayɪla ka yɛ ŋmā'asum, la Anāamā sɛka n yese Siiri so'olum na mā'a n yɛ ŋmā'asum.» ²⁸ La ban wɔm bela la, sɛba n boe wɛn-deego la puam wuu sūure daan yɪige mɛ. ²⁹ Tɪ ba isge ve'ege Azezi tɛŋa la puam yese. Tɛŋa la boe la tɛŋa zuo. Tɪ ba tarɪ ɛ sɛŋɛ zɛ'e-seka n zāage la tɛŋa la, ba daan boorɪ tɪ ba zā'age ɛ basɛ mɛ tɪ a lui ki. ³⁰ La Azezi kɛ la nɛr-kuuŋɔ la tɛŋasuka fɔrge.

Buraaga ti kulkā'arga tari ē

(Amarki 1:21-28)

³¹ Bela poorum, Azezi sēŋe la Galile tēŋa ayēma yu'ure n de Kapernaum, ti Zifdōma vo'osgo daare daan paage, ti a sēŋe ba wēndeem ka zāsna nērba Nawēnne yetoga. ³² Ti a zāsŋa la daan di'ige ba, a yetoga la n tari pāŋa la iŷā. ³³ Ti bura daan bōna wēndeem na ti kulkā'arga tara ē, ti a tīi kaase yetu: ³⁴ «A! Azezi n de Nazareti nēra, fōn bēm yelle n boe la tōma? Fōn wa'am ti fu sā'am na tōma? Mam mi fōn de sēka, fōn de la pupeelem dāana n ze'ele Nawēnne zē'am.» ³⁵ Ti Azezi tāsē kulkā'arga la yetu: «Go'oge, yese dee base bura la!» Ti kulkā'arga la lubē ē nērba la wuu nēŋam, dee yese, la a ka pōglum ē. ³⁶ Ti ba wuu palēŋa ēke ti ba yele taaba yetu: «Yetoga ēna de la bēm? A tari la pāŋa la ke'engo, dee tāsra kulkā'arsi, ti ba yesra.» ³⁷ Ti Azezi yu'ure saage zē'e-bāma wuu.

Azezi boti nērba zozo'e yē īmā'asum

(Amatie 8:14-17, Amarki 1:29-34)

³⁸ Ti Azezi isge ba wēndeego la puam yese ka kē Asimō yire. Ti Asimō dēem-pōka bē'era, ti a iŷā ba tulge. Ti ba tōge a yelle bō Azezi, ³⁹ ti a sēŋe ka suure a zuo, dee tāsē bā'a la yetu a base ē. La ēn yele la, bā'a la base ē mē, ti a isge tōto ēŋe ba sāano.

⁴⁰ Ti wēnne daan bōna mī kē'era, ti ba tari bā'adōma ti bā'asi buuri to'oto'ore tari ba, sēŋe Azezi zē'am. Ti Azezi dīke a nu'usi pagle ba nēra woo zuo, ti ba wuu yē īmā'asum. ⁴¹ La kulkā'arsi daan yesu mē dee basra nērba zozo'e, dee kaasra yetu: «Fōn de la Nawēnne Dayua.» Ti Azezi tāsē ba, ka base ti ba tōge sela sela, se'ere n soe la, ba daan bāŋe ti a de la Krisi n de Fāagra la.

Azezi mōoli Nawēnne kō-yēlga Zifdōma wēndeto puam

(Amarki 1:35-39)

⁴² Ti beere wiige, ti Azezi yese tēŋa la puam sēŋe zē'e-sēka ti nēra ka boe mī. Ti nērba zozo'e ēera ē. La ba daan yē ē mē, bōra ti ba gu ē ti a da le yese ba zē'am. ⁴³ La Azezi yele ba yetu: «Dēni ti mam mōole kō-yēlga pa'alē Nawēnne so'olum n ān se'em tēnsi baseba mē puam, la de la bela iŷā ti Nawēnne tōm mam.» ⁴⁴ La a ēn mōola kō-yēlga la Zifdōma wēndeto puam mē.

Azezi wi a pōspōsi karēnbiisi

(Amatie 4:18-22, Amarki 1:16-20)

5 Daare ayula Azezi ze la Zenezareti mōgre nōorum, ti nēr-kuuŋa kaage ē mikra taaba bōra ti ba wōm Nawēnne yetoga. ² Ti a yē ōorno bayi n ze mōgre la nōorum, ti zūn-yōgriba sige pēera ba yugsi dee base. ³ La ōorno ayula daan de la Asimō bōno. Ti Azezi kē

ōorno la puam, dee yele Asimō yetu: «Mōm ōorno la ti a sēŋe nēŋa fēe.» La Azezi n yele bela la, Asimō mōm ōorno la mē, ti a lebe ko'om puam fēe. Ti Azezi zī'ire ōorno la puam pa'alē nērba la.

⁴ La ēn pa'alē ba ba'ase la, ti a yele Asimō yetu: «Mōm ōorno la ti a sēŋe kulko'om ti ya lobe yugsi la.» ⁵ Ti Asimō lerge ē yetu: «Zuudāana, tōma nāmse mē yu'uro wā wuu dee ka yōke sela sela. La fōn yele la iŷā, ti wun lobe ti yugsi la.» ⁶ Ti ba sēŋe kulko'om ka lobe ba yugsi la, yāŋa yōge zūma ba zo'oge, ti ba yugsi la zīgra la ba āasum. ⁷ Ti ba yūbse ba taaba ōorno ayula la puam yetu, ba wa'am sōŋe ba. La ba taaba la sēŋe mē ka sōŋe ba, ti ba pūre ōorno bayi la wuu la zūma, halu ti ba zīgra la ba mise. ⁸ La Asimō yu'ure ayula n de Apīyēeri n yē bela la, ti a ka dūma tēŋa Azezi nēŋam yele ē yetu: «Zuudāana, fōrge mam zē'am, se'ere n soe la, mam de la tōon-be'ero dāana.» ⁹ Se'ere n soe ti Apīyēeri yele bela la, ēŋa la a taaba la n daan yē zūma la ti ba yōge se'em na boti ba palēŋa n ēke. ¹⁰ La dabeem mē n daan kē Azebede dayoosi Azaki la Azā n daan ēn dōla la Asimō tōnna la. Ti Azezi yele Asimō yetu: «Da zoe dabeem, ti lan sēŋe zīna wē'esa wuu, fu wun ēera la nērba ti ba dōla mam wu yāma n yōgru zūma se'em na.» ¹¹ La Azezi n yele bela la, ba tari ōorno la dooge mē yāŋa base sela woo dee dōla Azezi.

Azezi boti kōnkonne yē īmā'asum

(Amatie 8:1-4, Amarki 1:40-45)

¹² La Azezi daan boe la tēŋa ayēma puam, ti bura mē bōna mī dena kōnkonne, la bā'a la kē a iŷā zo'oge mē. Ti a yē Azezi ka ka dūma Azezi nēŋam dīke a nēŋa vōgle tēŋa sose ē yetu: «Zuudāana, fu sān bōra, fu tā wun base ti m yē īmā'asum mē le āna sōŋa.» ¹³ Ti Azezi tēge a nu'ugo kalum ē dee yetu: «Mam bōra, yē īmā'asum le āna sōŋa.» Ti bā'a la base ē bilam mēŋa.

¹⁴ Ti Azezi yele ē yetu: «Da kān yele nēra nēra, la sēŋe Nawēnne kāabgo kēema zē'am ka pa'alē ē fu mēŋa ti a buse, dee bō Nawēnne sela ti Amoyisi yuun gulse yetu ba bō la, ti la pa'alē ba ti fu sūti yē īmā'asum.» ¹⁵ La bela wuu, Azezi yelle daan malun saage la zē'esi zozo'e, ti nērba zozo'e lagse ti ba selse a yetoga la, dee ti a boti ba bā'adōma yē īmā'asum. ¹⁶ La Azezi ēn sēnna la zē'e-sēka ti nērba ka boe la pu'usra Nawēnne.

Azezi boti kōorno isge sēnna

(Amatie 9:1-8, Amarki 2:1-12)

¹⁷ La daare ayula ti Azezi bōna mī pa'ala nērba Nawēnne yetoga, ti Farisi dōma, la Nawēnne loo karēn-sāandōma n ze'ele Galile, la Zude, la Zerizalem mē zēa mī selsra. Ti Zuudāana Nawēnne pāŋa daan bōna la Azezi, ti a boti bā'adōma yē īmā'asum. ¹⁸ Ti buraasi ze bura n de kōorno gā a bōn-gā'ala puam wa'am. La ba boori ti ba tari ē kē la de-sēka ti Azezi boe mī na

puam, ka bñje ã Azezi nẽnam. ¹⁹ La nẽba la mike me, ti ba ka ye folle taru ã kẽ. Bela ãya ti ba ze kãwã la zom gãsgã, ka lake gãsgã la bõbre ayula, doose bilam sike ã la a bõn-gã'ala la nẽba la sukam bñje ã Azezi nẽnam.

²⁰ Ti Azezi ye ban bõ ãna sra se'em na, yele kãwã la yetu: «M sũe, fu tãon-be'ero taale ka le bõna fu zuo.»

²¹ Ti Nawẽnne lã karẽnsãandõma, la Farisi dõma la tẽ'esra yetu: «A tẽ'esre ti ãna de la ãne tãgra pã'bra Nawẽnne. ãne n tã wun base nẽra tãon-be'ero taale, sãn dagna Nawẽnne mã'a?» ²² Ti Azezi bñje ban tẽ'esre se'em na, soke ba yetu: «Bẽm ti ya tẽ'esra wãna wã?

²³ Bẽm n de nãana gãnna, mam sãn yele kãwã la yetu, a tãon-be'ero taale ka le bõna a zuo n de nãana, bu mam sãn yele ã yetu, a isge sẽnna n de nãana? ²⁴ Bela m wun botu ya bñje ti Nẽrsaala Dayua la taru pãña dũnia zuo wun base nẽba tãon-be'ero taale.» A yele bela dee yele kãwã la yetu: «Mam yetu fu ti fu isge dũe fu bõn-gã'ala la kule.» ²⁵ Bilam mẽna ti kãwã la isge ba wuu nẽnam dũe a bõn-gã'ala la kulla, dee pẽgra Nawẽnne. ²⁶ Ti nẽba la wuu palẽña ãke, ti dabeem kẽ ba, ti ba pẽgra Nawẽnne yetu: «Ti zĩna ye bõn-yãlma.»

Azezi wi Alevi ti a dõla ã

(Amatie 9:9-13, Amarku 2:13-17)

²⁷ Bela poorum ti Azezi yese sẽje ka ye lampo-tã'wãa yu'ure n de Alevi, ti a zĩ lampo to'osgo deem. Ti a yele ã yetu: «Isge dõla mam.» ²⁸ Ti a isge base sela woo dee dõla ã. ²⁹ Ti Alevi dũe dia zo'oge ãje kibsa a yire bõ Azezi, ti ãna la lampo-tã'wãruba, la nẽba zozo'e zẽa dita. ³⁰ Ti Farisi dõma baseba, la ba lã karẽnsãandõma yõnna Azezi karẽnbiisi la yetu: «Bẽm ãya ti yãma lagum na lampo-tã'wãruba, la tãon-be'ero dõma dita?»

³¹ Ti Azezi lerge ba yetu: «Nẽr-seba n taru ãmã'asum ka eeru tũba. Seba n bẽ'eru n eeru tũba. ³² Mam ka wa'am dũnia zuo seba dõma n yetu bãma mase ya la ãya, mam wa'am ti m yele la tãon-be'ero dõma ti ba teege yem base tãon-be'ero.»

Ba soke Azezi nõorlua yelle

(Amatie 9:14-17, Amarku 2:18-22)

³³ Ti nẽba la yele Azezi yetu: «Azã karẽnbiisi, la Farisi dõma karẽnbiisi ãn luta nõore me dee pu'usra Nawẽnne, dee ti fõn karẽnbiisi dita dee yũura.» ³⁴ Ti a lerge ba yetu: «Nẽra n di pãka ãje kibsa, ti a tadãandõma bõna mĩ ti ba naage la ã di kibsa la, yãma wun sake ti ba lu nõore me dee ti pãgdita la ken bõna ba zẽ'am bu?

³⁵ Ayel. La wakatẽ wun wa'am ti ba wun yese pãgdita la ba zẽ'am, wakat-ẽna ti ba yãna wun lu nõore.» ³⁶ Ti Azezi le make makre bõ ba yetu: «Nẽra kãn ãage fu-paale dũe lige fu-keka. A sãn ãje bela, a wun sã'am fu-paale la me, la tãn-paale la kãn mase la fu-keka la. ³⁷ La nẽra mẽ kãn dũe dã-paalga sũm wã-kegsi puam. A sãn ãje bela, dã-paalga la sãn kella, ba wun botu wãwã

la tãse me. Bela dãam na wun ka'age me sã'am, ti wãwã la mẽ sã'am.

³⁸ La mase ti ba dũe dã-paalga sũm na wã-paalsi puam. ³⁹ La nẽra sãn yũ dã-keka n kele la, a ka le bõbra dã-paalga. A wun yetu, dã-keka la n ãn sõja.»

Vo'osgo daare yelle

(Amatie 12:1-8, Amarku 2:23-28)

⁶ Zifdõma vo'osgo daare ayula ti Azezi la a karẽnbiisi dõla vato puam tãlla, ti a karẽnbiisi kã si wẽena bõbra. ² Ti Farisi dõma nẽba baseba ye ban ãje bela la, yele ba yetu: «Bẽm ti yãma ãje sela n sisri tõma vo'osgo daare?»

³ Ti Azezi lerge soke ba yetu: «Yãma ka karẽje Adavidi la a nẽba la kãm n yuun dõnnu ti Adavidi ãje se'em na? ⁴ A yuun kẽ la Nawẽnne deego puam dũe borboru seba ti ba bñje bõ Nawẽnne na obe. La sisri me, nẽra nẽra ka obru ba, sãn dagna Nawẽnne kãabgã kẽma la mã'a. La Adavidi yuun obe borboru bãma me, dee bõ a nẽba la ti ba obe.» ⁵ La Azezi ken yele ba me yetu: «Nẽrsaala Dayua la n soe vo'osgo daare.»

Buraa nu'ugo n ki, ti Azezi botu a ye ãmã'asum

(Amatie 12:9-14, Amarku 3:1-6)

⁶ Vo'osgo daare ayẽma ti Azezi kẽ Zifdõma wẽndeem zãsna nẽba Nawẽnne yetãga. Ti buraa daan bõna mĩ, ti a zuugo nu'ugo ki. ⁷ Ti Nawẽnne lã karẽnsãandõma, la Farisi dõma la daan bũra Azezi wun botu nẽra la ye ãmã'asum vo'osgo daare la bu, a kãn botu a ye ãmã'asum. Se'ere n soe la, ba daan eeru la so-seka ti ba wun yetu a sã'am bãma sisgo dõre ã. ⁸ Ti Azezi bñje ba tẽ'esgo la, yele buraa la nu'ugo n ki la yetu: «Isge ze'ele nẽba la tẽnasuka.» Ti a isge ze'ele. ⁹ Ti Azezi yele ba yetu: «Mam yetu m soke ya me bũse, sore boe ti nẽra ãje sõja vo'osgo daare bu, a ãje be'em? Sore boe ti a fãage nẽra vo'osgo daare bu, a ku ã?» ¹⁰ Dee bũse ba wuu kaage, dee yele buraa la yetu: «Tẽege fu nu'ugo la.» Ti a tẽege a nu'ugo la, ti a nu'ugo la yãna tẽege ãna sõja. ¹¹ Ti ba sũnsõa yĩge halu ti ba bãnna ban wun ãje Azezi se'em.

Azezi looge a karẽnbiisi pia la ayi

(Amatie 10:1-4, Amarku 3:13-19)

¹² La wakat-ẽna ti Azezi daan sẽje ka zom tãna zuo ti a pu'use Nawẽnne, bõna bilam pu'usra Nawẽnne yu'ũgã wuu. ¹³ Ti beere wiige, ti a wi a karẽnbiisi la, ti ba wa'am a zẽ'am. Ti a looge karẽnbiisi pia la ayi bãma puam. Bãma n de nẽr-seba ti a wun tãm na. ¹⁴ Ba daan de la Asimõ ti Azezi si a yu'ure ti Apyẽeri, la Aãndre n de Apyẽeri yũbga, la Azaku, la Azã, la Afilipi, la Abatele-mi, ¹⁵ la Amatie, la Atoma, la Azaku seka n de Alfe bia la, la Asimõ seka n daan de Zelbu nẽra ayula la, ¹⁶ la Azu-

daasi n de Azaki bia la, la Azudaasi Iskariyo seka n wun zām Azezi la.

¹⁷ La Azezi la a karēnbiisi la ze'ele la tāŋa la zuo sige zē'e-seka n naage taaba. La a karēnbiisi baseba zozo'e, la nēr-kuuŋɔ zozo'e n yese Zude, la Zerizalem, la Tiiri la Sidō so'olum n boe ko-kāte nōorum na n lagse bilam. ¹⁸ Ba wa'am ti ba selse la Azezi yetɔga, dee ti a bɔ ba bā'adōma īmā'asum. La nērba baseba n daan boe mī ti kulkā'arsi dɔla ba, ti ba daan yē īmā'asum. ¹⁹ Ti nēr-kuuŋɔ la wuu ɛera ti ba kalum ē, se'ere n soe la, pāŋa n yesɾi a puam bɔ'ɔra ba wuu īmā'asum.

Zu-yēlga la toogo yelle

(Amatie 5:1-12)

²⁰ Ti Azezi gorge bise a karēnbiisi la yeti: «Yāma seba n de nasdōma la tarɔ zu-yēlga, se'ere n soe la, Nawēnne so'olum de la ya bōnɔ. ²¹ Yāma seba kɔm n dōnni lēle wā tarɔ zu-yēlga, se'ere n soe la, ya wun ka di seke. Yāma seba n kaasɾi lēle wā tarɔ zu-yēlga, se'ere n soe la, ya wun ka la'ara. ²² Yāma seba ti nērba sisri ya, dee bɔkra ya, tuura ya, dee ka nanna ya wu ya de la tōon-be'ero dōma, mam n de Nērsaala Dayua la īyā la, tarɔ zu-yēlga. ²³ Wakat-seka ti ba itɔ yāma bela la, ēŋe-ya sū-yēlga sirum, se'ere n soe la, ya wun yē yɔɔɔɔ zo'oge mē Nawēnne yire. Bāŋe-ya ti ba yaabdōma yuun ēŋe Nawēnne nōtɔ'ɔsrɔba la bela.

²⁴ La yāma seba n de bōntatba la wun yē toogo, yāma n pōn yē bōn-sōma la īyā. ²⁵ La yāma seba n tarɔ sela woo lēle wā ti la seke la, wun yē toogo, se'ere n soe la, ya wun ka sēnna la kɔm. La yāma seba n la'arɔ lēle wā wun yē toogo, se'ere n soe la, ya sūure wun ka sā'am ti ya kaase. ²⁶ La yāma seba ti nērba wuu pēgrɔ ya la, wun yē toogo. Bāŋe-ya ti ba yaabdōma mē yuun pēgrɔ nōtɔ'ɔs-seba n de pōmpɔrndōma la bela.»

Nōŋe-ya ya be'eba

(Amatie 5:38-48;7:12)

²⁷ Azezi le yele ba yeti: «La mam yeti yāma seba n sel-sɾi mam wā ti, ya nōŋe ya be'eba, la seba n sisri ya la, ya ita ba sōŋa. ²⁸ La ya kā'ara kā'a-sōma bɔ'ɔra seba n kā be'em bɔ'ɔra ya la, dee pu'usra Nawēnne bɔ'ɔra seba n itɔ ya be'em na. ²⁹ Nēra sǎn wē fu pēka ayula, fu base ti a wē ayēma la pa'ase. La nēra sǎn fāage fu fu-kāte, fu base ti a to'oge fu fu-pika pa'ase. ³⁰ La nēra sǎn sose fu sela, fu bɔ ē. La nēra sǎn dɔke sela n de fu bōnɔ, fu da yeti a bɔ fu fu bōnɔ na. ³¹ La yāma n boori ti nērba ita bōn-seba bɔ'ɔra ya la, ya mē ita bela bɔ'ɔra ba.

³² La ya sǎn nōŋe seba n nōŋe ya la mā'a, Nawēnne wun bɔ ya sela mē bu? Baa la tōon-be'ero dōma nōŋe seba n nōŋe ba mē. ³³ La ya sǎn ita seba n itɔ ya sōŋa la mā'a sōŋa, Nawēnne wun bɔ ya sela mē bu? Baa la tōon-be'ero dōma itɔ la bela. ³⁴ La ya sǎn pēŋra seba ti ya tē'sɾi ti ba wun yē lebse ya la, Nawēnne wun bɔ ya

sela mē bu? Baa la tōon-be'ero dōma pēŋɾi tōon-be'ero dōma mē dee le tɔ'ɔsra bela.

³⁵ La, la sǎn dēna yāma, nōŋe-ya ya be'eba, dee ēŋe ba sōŋa. Pēŋe-ya nērba dee da tē'esra ti ba le bɔ ya. Ya sǎn ēŋe bela, ya yɔɔɔɔ wun zo'oge mē, la ya wun dēna Nawēnne n gǎnni sela wuu kɔma, se'ere n soe la, a itɔ seba n ka mi yel-sōnne, la putuul-dōma sōŋa mē. ³⁶ Zɔ-ta-ya nērba ninbāalga, wu ya Sɔ Nawēnne n zotɔ nērba ninbāalga se'em na.»

Da zēgrɔ-ya taaba

(Amatie 7:1-5)

³⁷ «Da tɔgrɔ-ya nēra yelle yeti a ēŋe be'em, ti Nawēnne mē kǎn tɔge ya yelle yeti a ēŋe be'em. Da zēgrɔ-ya nērba, ti Nawēnne mē kǎn zerge ya. Base-ya taaba taale, ti Nawēnne mē wun base ya taale. ³⁸ Bɔ-ya ya taaba, ti Nawēnne mē wun bɔ ya. Nawēnne wun bɔ ya zo'oge wu ban dɔke wan-kāte make pɔre sōŋa ti la saara. Bōn-seka ti yāma dɔke make bɔ ya taaba la, bōn-ēŋa ti Nawēnne mē wun dɔke make bɔ ya.»

³⁹ Ti Azezi daan make makre bɔ ba yeti: «Fua tā wun ve'ege fua mē ti ba wuu kǎn lui boko puam? ⁴⁰ Karēnbia ka gǎnni a karēnsāama, la karēnbia sǎn zāsum sela woo ba'ase, a ān wu a karēnsāama la.

⁴¹ Bēm ti fu bɔsra sɔkɔ n boe fu sɔbia nifum, dee ka bɔsra dɔɔɔɔ n boe fu mēŋa nifum na? ⁴² Fōn ēŋe la wāne yeta fu sɔbia yeti, a base ti fu yese sɔkɔ a nifum, dee ka bɔsra dɔɔɔɔ n boe fu mēŋa nifum? Pulibsum dāana, dēŋe yese dɔɔɔɔ la fu mēŋa nifum, dee yāŋa tā'age yē sōŋa yese sɔkɔ la n boe fu sɔbia nifum na.»

Tɔ woo la a bie

(Amatie 7:16-20;12:33-35)

⁴³ «Ti-sōŋɔ ka wɔnni bie be'ero. Ti-be'ego mē ka wɔnni bie sōma. ⁴⁴ Ba bāŋɾi tɔsɔ wuu la ba bie puam. Gō'osɔ kǎn wɔm kēnkāma, la kēkɔ mē kǎn wɔm tā'ama.

⁴⁵ Nēr-sōŋɔ sūure n ān sōŋa botɔ a tɔgrɔ la bōn-sōma, la nēr-be'ego sūure n ka ān sōŋa botɔ a tɔgrɔ la bōn-be'ero. Se'ere n soe la, bōn-seba n boe nērsaala sūurum n yesɾi a nōorum.»

Nawēnne yetɔga sakre yelle

(Amatie 7:24-27)

⁴⁶ «Bēm īyā ti yāma wi'ira mam ti «Zuudāana, Zu-udāana», dee ka ita mam n yeti ya ita se'em na? ⁴⁷ Nēr-seka woo n sēm mam zē'am, dee selsra mam yetɔga, dee sakra ita mam n yele se'em na, mam wun pa'ale ya ēŋa dāana n ān se'em: ⁴⁸ A ān wu nēra n boori ti a mē a yire, tū paage tāmpīa, ēebe a yire tāmpīa la zuo. Ti saaga ni, ti ko'om pɔre kulsɔ zoe wē yire la, ti a ka lui, ēn mē sōŋa la īyā. ⁴⁹ La nēr-seka n wōnni mam yetɔga, dee ka ita mam n yele se'em na, ān wu nēra n mē a yire tēntōnnɔ zuo, dee ka tū ēebe. Ti saaga ni, ti ko'om

pure kulsı zoe wa wě yire la, tı a k'ɔn lui saam saam.»

Azezi botı Rom suda-ke'ema tōntōnna yě ĩmā'asum
(Amatie 8:5-13)

7 Azezi tɔge bela wuu bɔ nērba la ba'ase, dee sēje la Kapernaum. ² Tı Rom suda-ke'ema bɔna mĩ tara a tōntōnna tı a nōje. Tı tōntōnna la bē'era dee la a ki. ³ Tı suda-ke'ema la wōm Azezi yelle, tōm Zıfđōma kēma baseba a zē'am tı ba sose ē yetı, a wa'am wa botı a tōntōnna la yě ĩmā'asum. ⁴ Tı ba sēje Azezi zē'am ka tĩ belem ē yetı: «Bura la de la nēr-sōjɔ. ⁵ A nōje tōma buuri mē, la ēja n mē wēndeege bɔ tōma. Bela ĩyā, mōrge sōje ē.» ⁶ Tı Azezi dɔla ba wē'sa ka lem yire la, tı suda-ke'ema la le tōm a sırdōma tı ba yele ē yetı: «Zuudāana, da nāmse fu mēja. Mam ka narı tı fu wa'am mam yire, ⁷ bela ĩyā tı mam tē'se yetı mam mēja ka narı tı m wa'am fōn zē'am. Wen tɔge yetɔga mā'a, tı m tōntōnna la wun yě ĩmā'asum. ⁸ Se'ere n soe la, nērba n soe mam, la mam mē soe la sudaası baseba. Mam sãn yele suda-seka yetı: «Sēje», a we'esı mē. La mam sãn yele ayēma yetı: «Wa'am», a sēm mē. Mam sãn yele m tōntōnna yetı: «Ĕje wāna», a ıtı mē.» ⁹ Azezi n wōm bela la, la daan di'ige ē mē, tı a wērgē yele nēr-seba n doli ē na yetı: «Mam yetı yāma mē tı mam nãn ka yě nēra n bɔ mam sɔra wu bura-ēna wā, baa lɔrayelı buuri la puam mam ka yě.» ¹⁰ Tı suda-ke'ema la n tōm seba la lebe a yire ka yě tı tōntōnna la tarı ĩmā'asum.

Azezi botı pɔkōore bia vo'oge

¹¹ Bela poorum, Azezi we'esı la tēja ayıla yu'ure n de Nayin, tı a karēnbiisi, la nērba zozo'e dɔla ē. ¹² La Azezi paage tēja la nōorum, tu'use la nērba n zēerı budibla n ki we'sa tı ba ka laage. Budibla la ma de la pɔkōore. La a bia de la ēja mā'a. Tı tēja la nērba zozo'e daan kɔlge ē dɔla we'sa. ¹³ La Zuudāana Azezi n yě pɔkōore la, tı a ninbāalga yōke ē, tı a yele ē yetı: «Da kella.» ¹⁴ A yele bela dee sēje paage kalum na sãjande la, tı nēr-seba n zēerı kũm na ze'ele, tı a yele kũm na yetı: «Budib-polle, mam yetı fu tı fu isge.» ¹⁵ Tı seka n ki la vo'oge isge zĩ'ire, yãja tɔgra. Tı Azezi yele a ma la yetı: «Fu bia n bela.» ¹⁶ Tı dabeem kē ba wuu, tı ba pēgra Nawēnne yetı: «Nawēnne nōtɔ'ɔs-kāte n wa'am tōma zē'am.» Dee le yetı: «Nawēnne n wa'am tı a sōje a nērba.» ¹⁷ Tı yetɔga la saage Zude so'olum, la tēn-seba n lem na wuu, tı ba wōm Azezi n ēje se'em.

Azā n mise nērba ko'om puam tōm a karēnbiisi Azezi zē'am

(Amatie 11:2-19)

¹⁸ Tı Azā karēnbiisi tɔge bōn-bāma wuu pa'ale ē. Tı Azā wi a karēnbiisi bayı ¹⁹ tōm ba Zuudāana Azezi zē'am, tı ba ka soke ē yetı: «Fōn de la seka tı Nawēnne yetı a wun wa'am na bu, tı gu'ura nēra ayēma?» ²⁰ Tı

karēnbiisi la sēje ka paage Azezi zē'am yele ē yetı: «Azā seka n mise nērba ko'om puam na n tōm tōma yetı, tı soke fu bıse, fōn de seka tı Nawēnne yuun yetı a wun wa'am na bu, tı gu'ura nēra ayēma?» ²¹ Wakat-ēja Azezi daan botı bā'adōma zozo'e tı bā'ası to'oto'ore tarı ba, la seba tı kulkā'arsı doli ba n yě ĩmā'asum, dee botı fɔɔsı zozo'e nini yēta. ²² Tı Azezi lerge seba tı Azā tōm na yetı: «Sēje-ya ka yele Azā yāma n yě bōn-seba, dee wōm se'em na wuu: Fɔɔsı nini yēti mē, tı kɔɔrɔ sēnna, tı kōnkoma yě ĩmā'asum le āna sōja, tı wansı wōnna, tı kũm vɔ'ɔra, tı nasdōma wōnna Nawēnne kō-yēlga. ²³ La nēr-seka n ka lebrı poorum mam ĩyā tarı zu-yēlga.»

²⁴ Seba tı Azā tōm na lebe kule mē. Tı Azezi yãja tɔge nērba la Azā yelle yetı: «Yāma daan sēje mōom tı ya ka bıse la bēm? Yāma sēje ka bıse la mōogɔ tı kusebgo mĩni bu? Ayel. ²⁵ La bēm tı yāma sēje ka bıse? Yāma sēje ka bıse la nēra n ye fu-sōma bu? Ayel. Nēr-seba n yeerı fu-sōma dee tarı bōn-sōma la, kē'erı la na'adōma yie puam. ²⁶ La yāma sēje ka bıse la bēm? Ya sēje ka bıse la Nawēnne nōtɔ'ɔsa bu? Ĕe. La mam yetı ya tı a de la nēra n gãnı Nawēnne nōtɔ'ɔsa. ²⁷ La de la ēja yelle tı la gulse Nawēnne gōjɔ puam tı Nawēnne yetı:

«Mam tōntōnna n wāna

tı mam tōm tı a dēje fu nēja malge sore bɔ fɔ.»

²⁸ Mam yetı ya tı nērsaalba tı ba dɔge la wuu puam, nēra ka boe n gãnı Azā, la nēr-seka n de pıka Nawēnne so'olum na puam gãnı Azā mē.

²⁹ La nērba la wuu, baa la lampo-tɔ'ɔsrıba la n wōm Azā yetɔga la, ba base tı Azā mise ba ko'om puam mē. Bela pa'alı mē tı ba sake mē tı Nawēnne n tarı sɔra.

³⁰ La Farisi dōma, la Nawēnne ıɔɔ karēnsāandōma n zagse tı Azā ka mise ba ko'om puam na, ba zagse la bōn-seba tı Nawēnne yetı a ēje bɔ ba la.»

³¹ Tı Azezi le yetı: «Bēm tı mam wun dıke make la zamāan-ēna wā nērba n ıtı se'em na. Ba ırgɔ wōn na bēm? ³² Ba ān wu koma n zĩ da'am wi'ira taaba yetı: «Tōma peebe wırsı mē, tı yāma zagse ka wa. Tı tōma yōom kuure yōoma, tı yāma ka kella.» ³³ Se'ere n soe la, Azā n misri nērba ko'om puam na wa'am mē wa luta nōore, dee ka yūura dāam, tı ba yetı kulkā'arga n doli ē. ³⁴ Tı Nērsaala Dayua la wa'am wa dita dee yūura, tı ba yetı, a de la dita, la dā-yūura, la lampo-tɔ'ɔsrıba la tōon-be'ero dōma sɔre. ³⁵ Nēr-seba n sakrı Nawēnne yem n boorı se'em na n mĩ tı a tarı yem.»

Azezi boe Asimō yire

³⁶ Farisi nēra ayıla yu'ure n de Asimō n daan wi Azezi tı a wa'am ēja yire tı ba di. Tı Azezi sēje yire la ka zĩ'ire bɔna mĩ tı a di. ³⁷ La pɔka n boe tēja la puam tōnna yalsı tōoma. La pɔka la n wōm tı Azezi boe Farisi nēra la yire dita la, tı a tarı albatrı dugla n pıre la tıdare

kaam yũunjo n ʼān sōŋa wa'am Azezi zē'am. ³⁸ Yāŋa ze'ele lem Azezi nāma boba kella. Tɪ a nintām yesra tɔ-gra Azezi nāma zuo. Tɪ pɔka la suure duuse Azezi nāma la, la a zomto, dee kɔke a nāma la, sōoge ba la tɪ dare kaam na.

³⁹ Tɪ Farisi nēra la n wi Azezi la yē bela, tē'ese yeti: «Bura-ēna sān dena Nawēnne nōtɔ'ɔsa, a wun bāŋe nɪ pɔg-ēna n kalum ē wā n de nēr-seka, a wun bāŋe nɪ tɪ a tōnnɪ la yalsɪ tōoma.»

⁴⁰ Tɪ Azezi yele ē yeti: «Asimō, mam tartɪ la sela tɪ m yele fo.» Tɪ Asimō lerge ē yeti: «Karēnsāama, yele!» ⁴¹ Tɪ Azezi yele ē yeti: «Nēra n daan boe tɪ nērba bayi tara a sānne. Nēra ayɪla sānne de la lig-kōba kɔbsnuu. Tɪ ayēma la mē sānne dena lig-kōba pinuu. ⁴² Tɪ ba daan ka tāna wun yɔ ē a ligri la. Tɪ a base ligri la bɔ ba. Bāma bayi la, āne n wun nōŋe ligri la dāana gānna?» ⁴³ Tɪ Asimō lerge ē yeti: «Mam tē'ese tɪ seka sānne n zo'oge la.» Tɪ Azezi yele ē yeti: «Fōn lerge se'em na de la sɪra.» ⁴⁴ Dee gelge bɪse pɔka la, yele Asimō yeti: «Fōn yē pɔka wā? Mam n kē fōn yire la, fōn ka bɔ mam ko'om tɪ mam peege m nāma. La pɔka la peege mam nāma mē la a nintām, dee duuse ba la a zomto. ⁴⁵ Fōn ka kɔke mam tɪ la pa'ale tɪ fu to'oge mam sōŋa. La mam n kē'em na, pɔka la kɔke mam nāma mē ka base. ⁴⁶ La fōn ka nā'ase mam ēŋe kaam mam zuugo, la a sōoge mam nāma mē la tɪ dare kaam. ⁴⁷ Bela īyā tɪ mam yele fu yeti, Nawēnne base a tōon-be'ero n zo'oge la taale mē. Bela n soe tɪ a nōŋre la zo'oge. La nēr-seka tɪ Nawēnne base a tōon-be'ero taale fēfēe la, a nōŋre mē de la fēe.»

⁴⁸ Azezi yele bela, dee yele pɔka la yeti: «Fu tōon-be'ero taale ka le bɔna fu zuo.» ⁴⁹ Tɪ seba n daan diti la ē na tɔgra la taaba sakra yeti: «A tē'ese tɪ ēŋa de la āne base nērba tōon-be'ero taale?» ⁵⁰ Tɪ Azezi yele pɔka la yeti: «Fōn bɔ mam sɪra la īyā n fāage fɔ base. Sēŋe la sũ-mā'asum.»

Pɔgsɪ n doli Azezi

8 Bela poorum, Azezi sēŋe la tēn-kāra, la tēn-pɔgsɪ puam ka mōola Nawēnne so'olum kō-yēlga. Tɪ a karēnbiisi pia la ayi la dɔla ē. ² La pɔgsɪ baseba n mē daan doli ē. La kulkā'arsɪ, la bā'asɪ n daan nāmsrɪ pɔg-bāma, tɪ Azezi botɪ ba yē īmā'asum. Pɔgsɪ la ayɪla yu'ure de la Amaari n yese Magdala, ēŋa tɪ kulkā'arsɪ bayopɔɪ daan yese dee base ē na. ³ La ayēma yu'ure de la Azanɪ. ēŋa de la Asuza n bɪsrɪ naba A'erɔɔɪ yire yelle la pɔga. La ayɪla yu'ure de la Asuzanɪ. Pɔg-bāna, la pɔgsɪ zozo'e n tarɪ ba mēŋa lɔgrɔ sōŋra Azezi la a karēnbiisi la.

Nēra n yese tɪ a lobge a bōnbuuri makre

(Amatie 13:1-23, Amarkɪ 4:1-20)

⁴ La nērba n ze'ele tēnsɪ to'oto'ore sēnna Azezi zē'am. Nērba la n daan lagse zo'oge pāɪ la, tɪ Azezi make makre bɔ ba yeti: ⁵ «Kaara n daan yese tɪ a lobge a bōnbuuri. ēŋa n boe mī lɔbgra la, tɪ bōnbuuri la baseba lui sore zuo tɪ nērba nē ba, dee tɪ niinto mē wa'am wa di ba. ⁶ Tɪ baseba lui tāmpīa zuo bule, la mā'asre n ka boe mī na īyā tɪ ba zēke ki. ⁷ Tɪ bōnbuuri baseba lui gō'osɪ zē'a, tɪ bāma la gō'osɪ la wuu lagum yese, tɪ gō'osɪ la fure ba. ⁸ Tɪ baseba lui zē'e-sōŋɔ zē'a yese, wɔm biē zo'oge paage kɔbga kɔbga.» Azezi n tɔge bela la, dee yeti: «Seka n wōm yetɔga wā, a selse sōŋa sōŋa.»

⁹ Tɪ a karēnbiisi la soke ē makre la vōore. ¹⁰ Tɪ a lerge ba yeti: «Nawēnne botɪ yāma bāŋe a so'olum yelle n sugē la mē, la seba n ka boe tōma puam na, mam makrɪ la magsa bɔ'ɔra ba.

«Bela tɪ ba wun bɪsra,
dee ka yēta,
ba wun wōnna,
dee ka bāŋra ba vōore.»

¹¹ Makre la vōore n wāna: Bōnbuuri la de la Nawēnne yetɔga. ¹² Sore la zuo tɪ bōnbuuri seba lui la, ān wu nēr-seba n wōm yetɔga la, tɪ Asūtāana wa'am wa yese yetɔga la ba sūure puam, botɪ ba kān sake yē fāare. ¹³ La tāmpīa la zuo tɪ bōnbuuri seba lui la, ān wu nēr-seba n wōm yetɔga la, dee sake la sũ-yēlga, la yetɔga la ka kē ba sūure puam sōŋa. Ba sake la wakate fēe, tɪ yelle sān paage ba, tɪ ba base. ¹⁴ La gō'osɪ la zē'a tɪ bōnbuuri seba lui la, ān wu nēr-seba n wōm Nawēnne yetɔga, tɪ ba yem yɔɔra la ba wɔm yelle, tɪ bōntarsōm la dūnia yēlum yemleego botɪ ba ka tāna wun bɪ Nawēnne sore la puam. ¹⁵ La zē'e-sōŋɔ la tɪ bōnbuuri seba lui la, ān wu nēr-seba n wōm yetɔga la, dee sakra dɪkra yetɔga la ita ba sūure puam sōŋa sōŋa, mōrge ze kāŋkāŋe Nawēnne sore la puam wu bōnbuuri la n wɔm biē se'em na.»

Mōrge-ya bāŋe yāma n selsrɪ se'em na vōore

(Amarkɪ 4:21-25)

¹⁶ Azezi le yeti: «Nēra ka yō'orɪ fitla dɪke lɔkɔ vuge ē, buɪ dɪke ē sugē gɔrgɔ tilum. A wun dɪke ē zoole la sela zuo, tɪ a nēege peelem tɪ seba n kē'erɪ la yēta. ¹⁷ Bōn-seka woo n lile la wun lilge mē, la bōn-seka woo n sugē wun wa puke mē tɪ nērba bāŋe. ¹⁸ Mōrge-ya bāŋe yāma n selsrɪ se'em na vōore. Se'ere n soe la, nēr-seka n tarɪ sela, ba wun bɔ ē pa'ase, la nēr-seka n ka tarɪ sela, bōn-seba fēe tɪ a tē'ese tɪ a tara la, ba wun to'oge ba.»

Azezi ma, la a yibsi

(Amatie 12:46-50, Amarki 3:31-35)

¹⁹ Azezi ma, la a yibsi n daan wa'am ti ba yē ē. La nērba zo'oge me ti ba ka tā'age paage a zē'am. ²⁰ Ti ba ye Azezi yeti: «Fu ma, la fu yibsi n boe yēja bɔɔra ti ba yē fɔ.» ²¹ Ti a lerge ba yeti: «Nēr-seba wuu n wōnni Nawēnne yetɔga, dee sake ita lan ye se'em na, n de mam ma, la mam yibsi.»

Azezi boti kusebgo yōke

(Amatie 8:23-27, Amarki 4:35-41)

²² Daare ayila ti Azezi la a karēnbiisi kē ðorɔɔ, ti a ye ba yeti: «Base-ya ti dooge ya mōgre la ke bɔba doone.» Ti ba mōnna ðorɔɔ la we'esa. ²³ La ban mōnni we'esa la, ti gēem yōke Azezi, ti a gīse. Ti kuseb-kāte isge ko'om na zuo vugra, ti ko'om kē'era ðorɔɔ la puam, ti la lebge pakre bɔ ba. ²⁴ Ti ba paage nēge Azezi, ye ē yeti: «Karēnsāama, karēnsāama, tōma yeti ti ki me.» Ti a isge tāse kusebgo, la ko-mī'isi ti ba āna sīm. Ti kusebgo la ko-mī'isi la yōke, ti la āna sīm. ²⁵ Ti a soke a karēnbiisi la yeti: «Bēm ti ya ka bɔ mam sira?» Ti dabeem kē ba. Ti ba palēja ēke, ti ba sokra taaba yeti: «Āne n de ēna tā'age tāsra kusebgo la ko'om, ti ba sakra a nōore?»

Kulkā'arsi n doli buraaga, ti Azezi dige ba

(Amatie 8:28-34, Amarki 5:1-20)

²⁶ La ba paage la Geraza dōma tēja. Mōgre la boe la tēn-ēja la Galile tējasuka. ²⁷ Ti Azezi ze'ele ðorɔɔ puam sige. Ti tēja la buraaga ayila ti kulkā'arsi doli ē sēnna tu'usra ē. A ka ye'eri fuugo, hal ti la yuuge, la a ka kē'eri yire, a boe la zē'e-seba ti yɔɔɔ boe mī na. ²⁸⁻²⁹ Nōor-faa ti kulkā'arga la ēn girge ē. Ti ba gu'ura ē, dee ba a nāma, la a nu'usi wuu la bānsi. Ti a kɔ'ɔra bānsi la. La kulkā'arga la ēn tarɔ ē sēje la mōom.

La buraaga la n yē Azezi la, a kaase me ka dūma tēja a nējam, tīi tɔgra yeti: «Azezi, Nawēnne n gānni wuu Dayua, bēm boe mam la fōn tējasuka? M sosri fu me ti fu da nāmse mam.» Azezi dēje ye kulkā'arga la me ti a yese dee base buraaga la, bela n soe ti kulkā'arga la ye bela. ³⁰ Ti Azezi soke ē yeti: «Fōn yu'ure?» Ti a lerge yeti: «Mam yu'ure de la Atusa.» Se'ere n soe ti a ye bela la, kulkā'arsi la n doli ē na zo'oge me. ³¹ Ti kulkā'arsi la sose Azezi yeti, a da boti ba sēje bug-tēja bog-ko'ogo la puam.

³² La kurkurdōma n daan zo'oge bɔna tēja zuo ɔbra yɔnnɔ. Ti kulkā'arsi la belem Azezi yeti, a bɔ ba nōore ti ba kē kurkurdōma la. Ti Azezi sake ban ye se'em na. ³³ Ti kulkā'arsi la base buraaga la, dee sēje ka kē kurkurdōma la. Ti ba wuu zoe sige ka lui mōgre puam ki.

³⁴ La seba n gu'uri kurkurdōma la n yē bōn-seka n ēje la, ba zoe sēje la tēja puam, la kēnkersi wuu ka

yele sela n ēje la. ³⁵ Ti nērba sēje ti ba ka bise lan ēje se'em na. La ban paage Azezi zē'am na, ba yē buraaga la ti kulkā'arsi la yese dee base ē na, ti a ye la futo zēa Azezi nējam, dee tarɔ yem sōja sōja. Ti dabeem kē ba. ³⁶ Ti seba n yē bōn-seka n ēje la, ye ba lan ēje se'em ti kulkā'arsi la yese dee base buraaga la. ³⁷ Ti Geraza tēja nērba la wuu belem Azezi yeti, a fōrge dee base ba tēja, se'ere n soe la, dabeem n ba kē ba. Ti Azezi kē'era ðorɔɔ la ti a fōrge. ³⁸ Ti buraaga la ti kulkā'arsi la yese dee base ē na, sose Azezi ti a base ti a doose ē. Ti Azezi zagse, dee ye ē yeti: ³⁹ «Lebe kule ya yire, ka pa'ale bōn-seba wuu ti Nawēnne ēje bɔ fu la.» Ti a doose tēja la wuu puam, mōola pa'ala Azezi n ēje bōn-seba wuu bɔ ē na.

Azayirusi pɔyua, la pɔka n kalum Azezi fuugo yelle

(Amatie 9:18-26, Amarki 5:21-43)

⁴⁰ Azezi daan lebe dooge la mōgre la ke bɔba. La nērkuuɔɔ n pōn lagse bilam ze gu'ura ē. Azezi n daan paage mī na, ba to'oge ē me sōja sōja. ⁴¹ La buraaga ayila n boe mī ti a yu'ure dena Azayirusi, a de la Zifdōma wēndeego nējadāana, wa'am wa ka dūma tēja Azezi nējam sose ē yeti: «Wa'am mam yire, ⁴² ti mam pɔyua n tarɔ yuuma pia la ayi n dee la a ki.» Buraaga la bia de la ēja ayila mā'a.

Ti Azezi dola ē we'esa, ti nērkuuɔɔ la mikra ē. ⁴³ La pɔka n daan boe mī luta sukēja yuuma pia la ayi ti la ka gɔ'ɔra. Ti a daan dīke ēn tarɔ sela la wuu sā'am tɔb-dōma zē'am, la baa ayila ka yāje boti a yē īmā'asum. ⁴⁴ Ti a paage Azezi poorum, kalum Azezi fuugo nōore. La bilam mēja ti a zum na ze'ele ka le yesra. ⁴⁵ Ti Azezi soke yeti: «Āne n kalum mam?» Ti nēra woo si'ise. Ti Apɔye'eri yeti: «Zuudāana, nērba wā wuu n lagum gilge fōn mikra se'em wā ti fōn sokra?» ⁴⁶ Ti Azezi yeti: «Nēra n kalum mam, se'ere n soe la, mam bāje me ti pāja n yese mam zē'am.» ⁴⁷ La pɔka la n bāje ti a kān yāje sugē la Azezi la, ti a gōgra wa'am wa ka dūma tēja Azezi nējam, ye ē nērba la wuu nējam se'ere n soe ti ēja kalum ē, la ēja n yē īmā'asum bilam mēja se'em. ⁴⁸ Ti Azezi ye pɔka la yeti: «M bia, fōn bɔ mam sira la īyā n boti fu yē īmā'asum. Sēje la sū-mā'asum.»

⁴⁹ La Azezi n nān boe mī tɔgra la, ti nēra ze'ele Zifdōma wēndeego nējadāana la yire wa'am wa ye ē yeti: «Fu pɔyua la ki me, da le nāmse karēnsāama la.» ⁵⁰ La Azezi n wōm bela la, ti a ye Azayirusi yeti: «Da zoe dabeem, wen bɔ mam sira, ti fu pɔyua la wun yē īmā'asum.» ⁵¹ Ti Azezi sēje ka paage a yire, la a ka boti nēra nēra doose ē kē, sān dagna Apɔye'eri, la Azaki, la Azā, la bia la sɔ, la a ma mā'a. ⁵² La nērba la wuu daan kelli me fabla bia la īyā. Ti Azezi ye ba yeti: «Da kaasra-ya, bia la ka ki, a gīsri me.» ⁵³ Ti ba la'ara Azezi, ban mi ti bia la ki me na īyā. ⁵⁴ Ti Azezi gure bia la nu'ugo, tīi tɔge ē yeti: «Bia, isge.» ⁵⁵ Ti bia la wɔm leme, ti a isge bilam mēja. Ti Azezi ye ba yeti: «Bɔ-ya bia la dia ti a

di.» ⁵⁶ Tɪ la daan di'ige bia la sɔ, la a ma. Tɪ Azezi kã'an ba yetɪ, ba da yele nêra nêra sela n êɲe la.

**Azezi tɔm a karênbiisi pia la ayi tɪ ba sêɲe ka moolé
Nawênne yetɔga**

(Amatie 10:5-15, Amarkɪ 6:7-13)

9 Azezi daan wi a karênbiisi pia la ayi la lagse mɛ, bɔ ba pãɲa, la nõore tɪ ba dige kulkã'arsɪ dee botɪ bã'adõma yê ãmã'asum. ² Dee tɔm ba yetɪ ba moolé Nawênne so'olum yelle, dee botɪ bã'adõma yê ãmã'asum. ³ La a yele ba yetɪ: «Da dɪke-ya sela sela sêɲe. Da dɪke-ya dasaare, bu tãmpɔkɔ, bu dia, bu ligri. Da dɪke ya futo bayi bayi. ⁴ La yi-seka tɪ ya paage tɪ ba to'oge ya, bɔna-ya yi-êɲa puam ka paage daar-seka tɪ ya wun fõrge tēja la. ⁵ La zê'e-seka tɪ nêrba ka to'oge ya, yese-ya tẽn-êɲa puam, dee pɪse ya nãma tẽntõnn base. Ya sãn êɲe bela, la wun pa'alé ba tɪ ba ka êɲe sõɲa.» ⁶ Azezi n yele bela la, karênbiisi la yese mɛ sêɲe tẽn-pɪgsɪ wuu puam ka moola Nawênne kô-yêlga, dee botɪ bã'adõma yêta ãmã'asum.

A'ercɔɔ boorɪ tɪ a bãɲe Azezi n de nêr-seka

(Amatie 14:1-12, Amarkɪ 6:14-29)

⁷ Galile Naba A'ercɔɔ n daan wõm bõn-seba wuu n itɪ la, a palēja n êke, se'ere n soe la, nêrba baseba n daan yele ê tɪ Azezi de la Azã seka n daan misri nêrba ko'om puam na n vo'oge. ⁸ Tɪ nêrba baseba yetɪ, Nawênne nõtɔ'ɔsa A'eli n le wa'am dũnia zuo, tɪ nêrba baseba yetɪ, kurum kurum Nawênne nõtɔ'ɔsa ayêma n vo'oge. ⁹ Tɪ A'ercɔɔ yetɪ: «Mam daan botɪ ba wike Azã zuugo mɛ, dee tɪ ãne n de êna wã tɪ mam wõm a yelle wãna wã?» La a daan boorɪ tɪ a yê Azezi mɛ.

Azezi bɔ nêr-kuuɲɔ dia

(Amatie 14:13-21, Amarkɪ 6:30-44, Azã 6:1-14)

¹⁰ Azezi karênbiisi pia la ayi la tɪ a daan tɔm na, lebe mɛ ka tɔge pa'alé ê bãma n êɲe se'em na wuu. Tɪ Azezi botɪ ba doose la ê yese kênkernja ka lem tēja yu'urɛ n de Betisayida. ¹¹ Tɪ nêr-kuuɲɔ la bãɲe ên sêɲe zê'am na, babse ê. Tɪ a to'oge ba, tɔge Nawênne so'olum yelle bɔ ba, dee botɪ bã'adõma yê ãmã'asum.

¹² La wênne n daan boe mĩ tɪ a kê, tɪ karênbiisi pia la ayi la wa'am a zê'am wa yele ê yetɪ: «Botɪ nêrba la sêɲe tẽn-pɪgsɪ, la yiɛ n lem na ka ε dia, la gã'a-zê'a, se'ere n soe la, tɪn boe zê'e-seka wã de la moom.» ¹³ Tɪ Azezi yele ba yetɪ: «Yãma mēja bɔ ba dia tɪ ba di.» Tɪ ba lerge yetɪ: «Tõma tarɪ la borborɪ banuu, la zũma bayi mã'a, sãn dagna tɪ tɪ sêɲe ka da dia wa'am wa bɔ nêr-bãna wuu.» ¹⁴ La buraasɪ n daan boe mĩ de wu tusanuu. Tɪ Azezi yele karênbiisi la yetɪ: «Base-ya tɪ nêrba la welse zĩ'ire pinu-nu.» ¹⁵ Tɪ karênbiisi la botɪ nêrba la wuu zĩ'ire bela. ¹⁶ Tɪ Azezi dɪke borborɪ banuu, la zũma bayi la gorge bɪse saazuum pu'use Nawênne

dia la ãyã, dee fiise borborɪ la zũma la bɔ a karênbiisi la tɪ ba to'oge puɪ nêrba la. ¹⁷ Tɪ ba wuu di tɪge, dee tɪ karênbiisi la vaage bõn-gito n dege pɪre pɪtɔ pia la ayi.

Apiyɛɛɪ yetɪ Azezi de la Kriɪ tɪ Nawênne tɔm

(Amatie 16:13-21, Amarkɪ 8:27-31)

¹⁸ Daare ayɪla Azezi daan boe la kênkernja pu'usra Nawênne, tɪ a karênbiisi la bɔna a zê'am, tɪ a soke ba yetɪ: «Nêrba yetɪ mam de la ãne?» ¹⁹ Tɪ ba lerge yetɪ: «Nêrba baseba yetɪ fõn de la Azã seka n daan misri nêrba ko'om puam na, tɪ nêrba baseba yetɪ, fõn de la Nawênne nõtɔ'ɔsa A'eli, tɪ baseba yetɪ, fõn de la kurum kurum Nawênne nõtɔ'ɔsa ayêma n vo'oge.» ²⁰ Tɪ a soke ba yetɪ: «Dee yãma yetɪ mam de la ãne?» Tɪ Apiyɛɛɪ lerge yetɪ: «Fõn de la Kriɪ tɪ Nawênne tɔm na.»

²¹ Tɪ Azezi kã'an ba yetɪ, ba da yele nêra nêra, ²² dee yetɪ: «Dẽnɪ tɪ mam n de Nêrsaala Dayua la nãmse zo-zo'e. Tēja wã kêma, la kãabgo kêma nêɲadõma, la lɔɔ karẽnsãandõma nifo wun kê mam mɛ, tɪ ba ku mam, la dabsa atã daare mam wun vo'oge mɛ.»

Azezi doosgo yelle

(Amatie 16:24-28, Amarkɪ 8:34—9:1)

²³ Azezi yele bela dee yele nêrba la wuu yetɪ: «Nêra sãn bɔɔra tɪ a doose mam, dẽnɪ tɪ a base a mēja n boorɪ se'em, dee sake nãmsgɔ daare woo wu nêra n buke a kũm dɔ-puurnja dɔla mam. ²⁴ Nêr-seka woo n boorɪ tɪ a gu a vɔm, a wun koɲe ê, la nêr-seka n sake tɪ a koɲe a vɔm mam ãyã, a wun yê vɔm. ²⁵ Nêra sãn yê dũnia sela woo dee koɲe vɔm Nawênne zê'am, a yõoro de la bẽm? ²⁶ Nêr-seka n zoe yãnnɛ mam ãyã, la mam yetɔga la ãyã, mam n de Nêrsaala Dayua la mẽ wun zoe yãnnɛ la ê wakat-seka tɪ mam wun leme wa'am la m na'am pãɲa, la Nawênne, la a malekadõma na'am pãɲa la. ²⁷ Mam yetɪ ya la sɪra sɪra, tɪ yãma nêr-seba n boe kalam wã baseba kãn ki, sãn dagna tɪ ba wa yê la Nawênne so'olum.»

Azezi nēja teere

(Amatie 17:1-18, Amarkɪ 9:2-8)

²⁸ Yetɔg-bãma poorum, la daan êɲe wu dabsa anii, tɪ Azezi botɪ Apiyɛɛɪ, la Azakɪ, la Azã doose ê zom tãɲa zuo tɪ a ka pu'use Nawênne. ²⁹ La ên boe mĩ pu'usra la, tɪ a nēja teege, tɪ a futo pelge yêgra. ³⁰ Tɪ buraasɪ bayi dare ze tɔgra la ê. Ba de la Amoyisi, la A'eli ³¹ n puke ba mēja nêge la Nawênne na'am peelem tɔgra la Azezi, êɲa n wun ki Zerizalem se'em tɪ bõn-seka tɪ a wa'am tɪ a êɲe la, êɲe ba'ase yelle. ³² La gẽem n daan tarɪ Apiyɛɛɪ la a taaba la tɪ ba gĩse, yãɲa nêge yê Azezi n yêgrɪ, tɪ nêrba bayi la ze a zê'am. ³³ Tɪ nêrba bayi la daan bɔna mĩ tɪ ba fõrge, tɪ Apiyɛɛɪ yele Azezi yetɪ: «M Zuudãana, tõma n boe kalam wã, la ãn sõɲa mɛ. Base

ti ti tĩ pōnsi batā, ayula bō fōn, ayula bō Amoyisi, la ayula bō A'eli.» A daan wen tōge mē, a ka mi ēn tōgru se'em na. ³⁴ La ēn daan boe mĩ tōgra bela la, ti sawatē wa'am wa lile ba la a mā'asum. La sawatē la n lile ba la, dabeem n yōkē karēnbiisi la. ³⁵ Ti kōa ze'ele sawatē la puam yeti: «Ēna de la mam Dayua ti mam looge. Selse-ya ē.» ³⁶ La kōa la n tōge la, ba yē la Azezi mā'a n ze. Ti ba daan sīna wakat-ēja ka yele nēra nēra bāma n yē sela la.

Kulkā'arga n tarī bia, ti Azezi boti a yē īmā'asum

(Amatie 17:14-18, Amarkī 9:14-27)

³⁷ Ti beere daan wiige, ti Azezi la a karēnbiisi la ze'ele tāja la zuo sige, ti nēr-kuuḡ daan tu'use ē. ³⁸ La buraa ayula n daan boe nēr-kuuḡ la puam tīi tōge yeti: «Karēnsāama, mam belni fu mē, bise m bia wā. A de la mam bi-yēja, la kulkā'arga n doli ē. ³⁹ Kulkā'arga la sān ēn girge ē, a boti a kaasra mē, dee luta kinki'ire, ti nōtōorum yesra a nōorum. Kulkā'arga la ēn nāmse ē zo'oge mē, pōglum ē dee base ē. ⁴⁰ Bela ti mam belem fu karēnbiisi yeti, ba dige ē ti a yese, ti ba ka yāḡe.» ⁴¹ Ti Azezi yeti: «Zamāan-ēna nērba, ya ka bō'wī mam sūra, la ya ka itī sōja. Mam wun mā'age m mēja la yā-ma yuuge paage la wakat-kāna? A yele bela dee yele buraa la yeti: «Tarī bia la wa'am.» ⁴² La bia la n paari Azezi zē'am na, ti kulkā'arga la lubē ē ti a gōgra. Ti Azezi tāse kulkā'arga la ti a base bia la. Ti kulkā'arga la base bia la, ti a yē īmā'asum, ti Azezi dīke ē lebse a sō. ⁴³ La nērba la wuu n yē Nawēnne pān-kāte la, la di'ige ba mē.

Azezi tōge a kūm yelle

(Amatie 17:22-23, Amarkī 9:30-32)

Nērba la wuu daan ken ze la yerī la bōn-seba wuu ti Azezi ēḡe la. Ti Azezi yele a karēnbiisi la yeti: ⁴⁴ «Selse-ya yetōg-ēna ti mam yeti m tōge wā sōja: Ba wun yōkē Nērsaala Dayua la sēḡe ka ēḡe la nērsaalba nu'usum.» ⁴⁵ La ba daan ka bāḡe a yetōga la vōore. Yetōga la daan suḡe mē ti ba ka tā'age bāḡe a vōore, dee zōta dabeem ka soke ē.

Āne n wun dēna nēr-kāte Nawēnne zē'am?

(Amatie 18:1-5, Amarkī 9:33-37)

⁴⁶ Azezi karēnbiisi la daan wē'erī la nōke'ene la taaba, bōora ti ba bāḡe bāma puam nēr-seka n wun dēna nēr-kāte gānna. ⁴⁷ Ti Azezi bāḡe ban tē'esrī se'em na, yōkē bia ze'ele lēm a mēja, ⁴⁸ dee yeti: «Nēr-seka woo n to'oge bi-pīka n ān wu ēna mam yu'urē īyā, a to'oge la mam, la seka n mē to'oge mam, a to'oge la seka n tōm mam na. Nēr-seka n de pīka ya zē'am na, ēja n de nēr-kāte.»

Nēr-seka n ka sisri yāma, a de la ya nēra

(Amarkī 9:38-40)

⁴⁹ Ti Azā yele Azezi yeti: «Zuudāana, tōma yē la buraa n digri kulkā'arsī la fōn yu'urē ti ba yesra, la ēja n ka po dēna tōma nēra la īyā, ti tōma gu ē yeti a base.»

⁵⁰ Ti Azezi lerge ba yeti: «Da gu-ya ē, nēr-seka n ka sisri yāma, a de la ya nēra.»

Samaari tēja nērba ka bō Azezi sūra

⁵¹ Dabs-seba ti Azezi daan wun zēke sēḡe Nawēnne yire la n daan lēm, ti a kō'wī yeti, dēni ti ēja sēḡe Zerizalem. ⁵² A daan tōm na nērba yeti ba dēḡe nējam. Ti nērba la daan dēḡe sēḡe ka kē Samaari tēn-pīka puam ti ba māasna sela woo dee gu'ura ē. ⁵³ Ti tēja la nērba zagse ti bāma kān to'oge ē, ēn we'est Zerizalem na īyā. ⁵⁴ La a karēnbiisi Azakī la Azā n bāḡe bela la, ti ba soke Azezi yeti: «Zuudāana, fōn boorī ti ti wi bugum ti ba ze'ele saazuum wa di ba mē bu?» ⁵⁵ Ti Azezi wēḡe, gi ba [yeti: «Yāma ka mi sī-seka n tarī ya la. ⁵⁶ Nērsaala Dayua la ka wa'am ti a sā'am nērba wōm, a wa'am ti a fāage ba mē.»] Ti ba wē'esa tēja ayēma.

Azezi doosgo yelle

(Amatie 8:19-22)

⁵⁷ Ban boe sore wē'esa la, ti buraaga yele Azezi yeti: «Mam wun dōla fō sēnna zē'e-seba wuu ti fu wun sēnna.» ⁵⁸ Ti Azezi lerge ē yeti: «Piuna tarī yogro mē, ti ni-into mē tara tugrō, la Nērsaala Dayua la ka tarī zē'a wun gā'are vo'ose.» ⁵⁹ Dee le yele buraa ayēma mē yeti: «Doose mam.» Ti buraa la lerge ē yeti: «Base ti m sēḡe ka laage m sō dee wa'am wa dōla fō.» ⁶⁰ Ti Azezi lerge ē yeti: «Base ti seba n ka tarī wōm Nawēnne zē'am na laage ba kūm. Dee ti fōn sēḡe ka mōole Nawēnne so'olum kō-yēlga la.» ⁶¹ Ti buraa ayula yele ē yeti: «Zuudāana, mam wun doose fō, la base ti m sēḡe ka keese m yir-dōma.» ⁶² Ti Azezi lerge ē yeti: «Nēr-seka n gurē nii-kūure kōora dee bīsra poorum, ka tā wun tōm Nawēnne so'olum tōoma.»

Azezi tōm a karēnbiisi pisyopōi la ayi ti ba sēḡe ka mōole Nawēnne kō-yēlga

10 Bela poorum, Azezi looge la karēnbiisi baseba pisyopōi la ayi ti a tōm ba bayi bayi ti ba dēḡe nēja sēḡe tēn-seba, la zē'e-seba wuu ti ēja mēja wun sēḡe la. ² A yele ba yeti: «Va'am na bōnkōla lagsgo zo'oge mē, la tōntōnība n wun lagse bōnkōla la pō'wī mē. Bela īyā sose-ya va'am na dāana ti a tōm tōntōnība pa'ase ti ba lagse bōnkōla la.» ³ Dee yāja yele ba yeti: «Sēḡe-ya, yāma ān wu piisi ti mam tōm saasaadōma tējasuka. ⁴ Da dīke-ya putmāane, bu tāmpōkō, la da dīke-ya tagra pa'ase, da ze'ele-ya sore bō nēra gā'a. ⁵ La ya sān yeti ya kē yire puam, ya dēḡe pu'use yire la

dōma yeti: «Nawēnne wun bɔ ya sū-mā'asum.» ⁶ Nēra sǎn bɔna mī bɔɔra sū-mā'asum, ya sū-mā'asum wun bɔna la ē. La nēra sǎn ka bɔna mī bɔɔra sū-mā'asum, ya sū-mā'asum wun leme ya mēŋa zē'am. ⁷ Da lɔsna-ya yie, bɔna-ya yire ayila puam, yūura dee dita bōn-seba tɪ ba bɔ ya la, se'ere n soe la, la mase mɛ tɪ tōntōnna to'oge a yɔɔɔ. ⁸ Ya sǎn paage tēn-seka woo puam tɪ ba to'oge ya, di-ya bōn-seba tɪ ba bɔ ya la, ⁹ la ya botɪ tēn-ēŋa bǎ'adōma yē īmā'asum, dee yele nērba la yeti: «Wakate lem mɛ tɪ Nawēnne wun di na'am ya tēŋasuka.» ¹⁰ La tēn-seka woo puam tɪ ya kē tɪ ba ka to'oge ya, ya yese sore dee yele tēŋa la nērba wuu yeti: ¹¹ «Tōma pusu la ya tēŋa tēntōnnɔ n tabe tōma nāma la, tɪ la pa'ale tɪ ya ka ēŋe sōŋa. La bǎŋe-ya tɪ wakate lem mɛ tɪ Nawēnne wun di na'am nērba tēŋasuka.» ¹² Mam yeti ya mɛ tɪ sariyadia daare, Sodom nērba kǎn ba yē toogo wo tēn-ēŋa nērba n wun yē toogo se'em na.

¹³ Korazē dōma, ya wun yē toogo! Betisayida dōma, ya wun yē toogo! Se'ere n soe la, tōon-yālma seba n tōm ya tēnsɪ puam na, daan sǎn tōm nɪ na Tiiri, la Sidō tēnsɪ puam, ba wun teege nɪ yem base tōon-be'ero halɪ kurum kurum, ye bɔra futo ēŋe tǎmpeglum ēŋe ba zuto tɪ la pa'ale tɪ ba teege yem. ¹⁴ La sariyadia daare, la wun dɛna toogo bɔ yāma gǎnna Tiiri, la Sidō dōma.

¹⁵ La yāma Kapernaum dōma, yāma tē'ese tɪ ya wun zēke mɛ ka paage saazuum bɪ? Ayel, ya wun sige mɛ ka paage bug-tēŋa.»

¹⁶ La Azezi le yele a karēnbiisi la yeti: «Seka n selsɪ ya yetɔga, a selsɪ la mam yetɔga, la seka n zagse ya, a zagse la mam. La seka n zagse mam, a zagse la seka n tōm mam na.»

¹⁷ La karēnbiisi pisyopɔɪ la ayi la sēŋe mɛ dee leme wa'am la sū-yēlga wa yeti: «Zuudāana, baa la kulkā'arsɪ sakɪ tōma nōore mɛ, ban zotɪ fōn yu'ure la īyǎ.» ¹⁸ Tɪ Azezi yele ba yeti: «Mam yē la Asūtāana n ze'ele saazuum lui tēŋa wu saaga n yǎke la. ¹⁹ Bǎŋe-ya tɪ mam bɔ ya pǎŋa mɛ tɪ ya nē bōnse'edōma, la nǎnsɪ, dee yǎŋe Asūtāana la a pǎŋa wuu, la sela sela ka tā wun ēŋe ya be'em. ²⁰ La da ita-ya sū-yēlga kulkā'arsɪ n sakɪ ya nōore la īyǎ, ita-ya sū-yēlga ya yu'ura n gulse Nawēnne yire vɔm gōŋɔ puam na īyǎ.»

Azezi tɪ sū-yēlga

(Amatie 11:25-27; 13:16-17)

²¹ Wakat-ēŋa tɪ Nawēnne Sla botɪ Azezi sūure ēŋe yēlum, tɪ a yeti: «Mam Sɔ Nawēnne n de saazuum la tēŋa wǎ Zuudāana, mam pēgrɪ fɔ, se'ere n soe la, fōn sugɛ bōn-bǎna wǎ mɛ tɪ yem dōma la bǎŋɪɪba ka mina, dee pa'ale nēr-seba n ān wu kɔm-pɪgsɪ la. Ēe, mam Sɔ, la de la fōn boorɪ bela la īyǎ.»

²² «Mam Sɔ dɪke sela woo ēŋe la mam nu'usum. La nēra ka mi mam n de Nawēnne Dayua la n de seka, sǎn dagna mam Sɔ la, la nēra mē ka mi mam Sɔ la n de

se'em, sǎn dagna mam n de a Dayua la, la seba tɪ mam wun botɪ ba bǎŋe ē na.»

²³ Azezi yele bela dee wērgɛ la a karēnbiisi la bɔba, yele bǎma mā'a yeti: «Yāma seba n yētɪ sela tɪ ya yētɪ wǎ, tarɪ zu-yēlga. ²⁴ La mam yeti ya tɪ Nawēnne nōtɔ'ɔsrɪba, la na'adōma zozo'e yuun boorɪ tɪ ba yē yāma n yē sela la mɛ, la ba ka yē, ba yuun boorɪ tɪ ba wōm sela tɪ yāma wōm na mɛ, la ba ka wōm.»

Samaari nēra n sōŋe a tadāana makre

²⁵ Tɪ lɔɔ karēnsāama isge tɪ a di Azezi yem bɪse, soke ē yeti: «Karēnsāama, mam wun ēŋe la wǎne yē vɔm n ka ba'asɪ?» ²⁶ Tɪ Azezi lerge ē yeti: «La gulse Nawēnne lɔɔ gōŋɔ la puam yeti bēm? Fōn karēŋɪ ē na, a yeti bēm?» ²⁷ Tɪ a lerge yeti: «La yeti: Nōŋe fu Zuudāana Nawēnne la fu sūure wuu, la fu sla wuu, la fu pǎŋa wuu, la fu yem wuu, dee nōŋe fu tadāana wu fōn nōŋe fu mēŋa se'em na.» ²⁸ Tɪ Azezi yele ē yeti: «Fu yele sōŋa. Ēŋe bela tɪ fu wun yē vɔm na.»

²⁹ La ēŋa n boorɪ tɪ a bɔ a mēŋa buurɔ la, tɪ a soke Azezi yeti: «Āne n de mam tadāana?» ³⁰ Tɪ Azezi lerge ē yeti: «Nēra n daan yese Zerizalem wɛ Zeriko, tɪ fǎarba yōke ē fǎ a lɔgrɔ wuu, dee wē ē tɪ a dee la a ki, tɪ ba base ē dee fōrgɛ. ³¹ Tɪ Nawēnne kǎabgɔ kēema ayila dɔla so-ēŋa tɔlla, yē ē, lɔke tole dee base ē. ³² Tɪ Leviti nēra mē wa'am tɔlla, yē ē, burge tole dee base ē. ³³ La Samaari nēra n mē daan dolɪ so-ēŋa tɔlla yē ē, tɪ a ninbǎalga yōke ē. ³⁴ Tɪ a paage a zē'am dɪke dāam peege a nōtɔ la, ēŋe kaam īmɪ vile. Yǎŋa yōke ē bǎ a bōŋa zuo, tarɪ ē sēŋe sāama yire ka bɪse a yelle. ³⁵ Tɪ beere wiige tɪ a dɪke lig-kōba bayi bɔ nēr-seka n bɪsrɪ sāama yire yelle la, dee yele ē yeti: «Bɪsra a yelle, ligri la sǎn pɔ'ɔgɛ, mam sǎn leme, mam wun yɔ fɔ.» ³⁶ Azezi tɔge bela kɪ'ulum dee soke ē yeti: «Nērba batǎ wǎ, fōn tē'ese tɪ āne n de nēra la tɪ fǎarba yōke la tadāana?» ³⁷ Tɪ lɔɔ karēnsāama la lerge yeti: «Seka n zoe a ninbǎalga sōŋe ē na.» Tɪ Azezi yele ē yeti: «Sēŋe mē ka ēŋe bela.»

Amartɪ la Amaari yelle

³⁸ Azezi la a karēnbiisi daan sēnnɪ mɛ ka kē tēŋa ayila puam. Tɪ pɔka yu'ure n de Amartɪ bɔna tēn-ēŋa puam to'oge ē a yire. ³⁹ Amartɪ tarɪ la yɪbga tɪ a yu'ure dɛna Amaari. Tɪ Amaari zēa Zuudāana Azezi nǎma bɔba sel-sra a yetɔga.

⁴⁰ La Amartɪ tōoma yelle n daan mō'oge a nini, tɪ a sēŋe ka yele Azezi yeti: «Mam Zuudāana, mam yɪbga la n base tɪ mam m yɪla mā'a tōnna la, fōn yeti bēm? Yele ē tɪ a wa'am wa sōŋe ma.» ⁴¹ Tɪ Zuudāana Azezi lerge ē yeti: «Amartɪ, Amartɪ, fōn botɪ fu yem n yɔɔra la yela zozo'e yelle. ⁴² La bōnɔ ayila mā'a n de yel-kǎŋkǎŋe. Amaari looge la bōn-sōŋɔ, la nēra nēra kǎn tā'age to'oge bōn-ēŋa a zē'am.»

Azezi pa'ale a karēnbiisi ba wun pu'usra se'em

(Amatie 6:9-13;7:7-11)

11 Azezi daan boe la zē'a ayila pu'usra Nawēnne. La ēn pu'use kɪ'ulum na, tɪ a karēnbia ayila yele ē yetu: «Zuudāana, pa'ale tɔ tōma n wun pu'usra Nawēnne se'em, wu Azā n pa'ale a karēnbiisi se'em na.» ² Tɪ a yele ba yetu: «Ya sǎn pu'usra, ya yetu: «Tōma Sɔ, botɪ fu yu'ure yēta pēka, wa'am wa di na'am nēba tējasuka, ³ bɔ'ɔra tɔ daare woo la a dia. ⁴ Base tɪ tōon-be'ero taale, tɪ tōma mē basɪ seba n ēn tōma be'em taale mē. Da base tɪ yelle paage tɔ tɪ tɪ lui.» ⁵ Dee le yele ba yetu: «Tē'esē-ya bise, yāma nēr-seka sǎn tara sɪrē, tɪ a wa'am a zē'am yu'urɔ wa sose ē yetu: «M sɪrē, bɔ ma borborɪ batā, ⁶ mam sɪrē n ze'ele sore wa'am, tɪ mam ka tara sela wun bɔ ē tɪ a di.» ⁷ Tɪ a sɪrē la bɔna deem dee lerge ē yetu: «Da dāam mam, mam yu m zanōrē mē, tɪ mam la m kɔma gā, mam kǎn yānē isge bɔ fɔ fɔn boorɪ sela la.» ⁸ Mam yetu ya mē tɪ, baa a sǎn pǔn kǎn isge bɔ ē sela ban de sɪtɔ la īyā, a wun isge bɔ ē ēn boorɪ sela la mē, ēn bulē ē na īyā. ⁹ Bela mam yetu ya mē tɪ ya sose Nawēnne, tɪ a wun bɔ ya, ya ē, tɪ ya wun yē, ya wē kuluja, tɪ a wun yo'oge bɔ ya. ¹⁰ Se'ere n soe la, nēr-seka woo n sosɪ Nawēnne, a wun bɔ ē. La nēr-seka n eerɪ, wun yē. La nēr-seka n wē'eri kuluja, ba wun yo'oge bɔ ē. ¹¹ Āne n boe yāma puam tɪ a bia wun sose ē zūfo, tɪ a dɪke bōnsela bɔ ē? ¹² Bu a sǎn sose ē zelle, tɪ a dɪke nǎn bɔ ē? ¹³ Yāma n de tōon-be'ero dōma la sǎn mina tɪ ya bɔ ya kɔma bōnsōma, Nawēnne n de ya Sɔ n boe saazuum n ān sōja la wun bɔ nēr-seba n sosɪ ē a Sɪa la gǎnna.»

Azezi pǎnna gǎnnɪ Asūtāana

(Amatie 12:22-30, Amarkɪ 3:22-27)

¹⁴ La Azezi daan dige la kulkā'arga n tarɪ buraa tɪ a dēna muko, tɪ kulkā'arga la daan yese, dee tɪ buraa la n de muko la yānna tā'age tɔgra, tɪ la di'ige nērba la. ¹⁵ Tɪ nērba la baseba yele ē yetu: «Ēn digri kulkā'arsɪ la, la de la Abelzebuli n de kulkā'arsɪ naba la pǎnna tɪ a tarɪ digra ba.» ¹⁶ Tɪ nērba baseba bɔɔra tɪ ba make ē bise, yele ē yetu, a tōm tōon-yālma n pa'ale tɪ a pǎnna la ze'eti la Nawēnne zē'am. ¹⁷ Tɪ Azezi bānē ban tē'esɪ se'em na, yele ba yetu: «So'olum seka woo nērba n welge wērgē zebra la taaba, so'olum na wun sā'am mē. La so'olum ēnna yie mē wun lui mē. ¹⁸ La Asūtāana sǎn welge zebra la a mēnna, a so'olum na kǎn tā'age ze'ele. Yāma n yetu mam digri kulkā'arsɪ la Abelzebuli pǎnna la īyā tɪ mam yele bela. ¹⁹ Yāma n yetu mam digri kulkā'arsɪ la Abelzebuli pǎnna la, yāma nērba tarɪ la ān pǎnna digri kulkā'arsɪ? Bela, ya nērba la mēnna n wun pa'ale tɪ ya ka tarɪ buurɔ. ²⁰ La de la Nawēnne pǎnna tɪ mam tarɪ di-

gra kulkā'arsɪ, bela pa'ale tɪ Nawēnne wa'am mē wa di-ta na'am ya tējasuka. ²¹ Pǎnna dāana sǎn māasum sōja la a budaan-lɔgrɔ gu'ura a yire, sela kǎn ēnē a bōn-tarsōm. ²² La nēra n tarɪ pǎnna gǎnna ē sǎn wa'am wa zēbe yānē ē, a wun fāage la a zēbre lɔg-seba tɪ a te'ege la yien, dee yānna vaage a yire lɔgrɔ la pul.

²³ Nēr-seka n ka boe la mam, sisri mam mē, la nēr-seka n ka lagum na mam lagsra, a wurgrɪ mē.»

Kulkā'arga n yese dee leme makre

(Amatie 12:43-45)

²⁴ Azezi le yetu: «Kulkā'arga sǎn yese dee base nēra, a sēnē la pɔgētɪsɪ puam ka ēera zē'a tɪ a vo'ose, la a sǎn ē zē'a kɔnē, a yetu mē tɪ: «Mam wun lebe la m yi-seka tɪ m yese dee base la puam.» ²⁵ La a sǎn lebe ka yē tɪ a puse mē malge āna sōja, ²⁶ a wun lebe mē ka tarɪ kulkā'arsɪ bayopɔ n de wēensɪ gǎnna ēnna mēnna wa'am, tɪ ba kē lagum bɔna mī. Bela, nēr-ēnna toogo yānna wun gǎnna a kurum toogo la mē.»

Nēr-seba n sakrɪ Nawēnne yetɔga tarɪ zu-yēlga

²⁷ Azezi n tɔge bela kɪ'ulum na, tɪ pɔka ze'ele nērba la tējasuka tī tɔge yetu: «Pɔg-seka n dɔge fɔ, tɪ fu mōge a bī'isum na, tarɪ zu-yēlga.» ²⁸ Tɪ Azezi lerge yetu: «Nēr-seba n wōnnɪ Nawēnne yetɔga, dee sakra ita lan yele se'em na, n tōn tarɪ zu-yēlga.»

Nērba boorɪ tɪ ba yē la bōn-yālma

(Amatie 12:38-42)

²⁹ Nēr-kuurɔ n lagse Azezi zē'am zo'oge, tɪ a yele ba yetu: «Zamāan-ēna wā nērba de la nēr-be'esɪ. Ba eerɪ la bōn-yālma n wun pa'ale Nawēnne pǎnna, la ba kǎn yē bōn-yālma ayēma, sǎn dagna bōn-yālma seka n yuun ēnē Nawēnne nōtɔ'ɔsa Azonaasɪ la. ³⁰ Bōn-seka n yuun ēnē Azonaasɪ la, pa'ale Niniivi dōma la Nawēnne pǎnna, bela Nērsaala Dayua la mē de la seka n pa'alɪ zamāan-ēna dōma Nawēnne pǎnna. ³¹ Sarɪyadia daare, na-pɔka la n yuun yese wēntulle gɔbga bɔba la wun isge mē zerge zamāan-ēna wā dōma ba tōon-be'ero la īyā. Se'ere n soe la, a yuun ze'ele la zē'a n zāage wa'am wa selse naba Asalomō yem yetɔga la, la seka n gǎnnɪ Asalomō n boe kalam, dee tɪ yāma ka selsra ē. ³² Sarɪyadia daare, Niniivi dōma mē wun isge zerge zamāan-ēna wā dōma mē ba tōon-be'ero la īyā. Se'ere n soe la, Azonaasɪ n yuun mōole Nawēnne yetɔga bɔ ba la, ba yuun teege yem mē base tōon-be'ero. La seka n gǎnnɪ Azonaasɪ n boe kalam, dee tɪ yāma ka teege yem.»

Peelem yelle

(Amatie 5:15;6:22-23)

³³ «Nēra kǎn yō fitla sugē, bu dɪke pɪ'igɔ vuge ē, a wun dɪke ē zoole la sela zuo tɪ a nēge bɔ seba n kē'eri

la. ³⁴ Fu nini n nēerɪ peelem bɔ'ɔra fu ɪyā wu fɪtla la, bela fu nini sǎn āna sōŋa, fu ɪyā wuu tarɪ peelem mɛ. La fu nini sǎn ka āna sōŋa, fu ɪyā wuu boe la lika puam. ³⁵ Bela ɪyā, guuse tɪ bōn-seka n de peelem fu puam na, da dɛna lika. ³⁶ La fu ɪyā wuu sǎn tara peelem sōŋa, tɪ baa bɔbrɛ ayɪla ka tara lika, fu ɪyā wuu tarɪ peelem mɛ wu fɪtla n tarɪ peelem nēera bɔ'ɔra nēr-ba se'em na.»

Azezi zerge Farisi dōma la ɔɔ karēnsāandōma

(Amatie 23:1-36, Amarkɪ 12:38-40)

³⁷ Azezi n daan tɔge kɪ'ɪlɪm na, tɪ Farisi nēra ayɪla wi ɛ tɪ a wa'am ēŋa yire tɪ ba di. Tɪ a sēŋe ka kē zɪ'ire bɔna mɪ tɪ a di. ³⁸ Tɪ Farisi nēra la yē tɪ Azezi ka peege nu'usi wu ban ɪtɪ ba sisgo se'em na, dee yetɪ a di, tɪ la di'ige ɛ. ³⁹ Tɪ Zuudāana Azezi yele ɛ yetɪ: «Yāma Farisi dōma peerɪ ya wama la ya laasi pɔa mɛ, la yāma mēŋa puam purɛ la dēgrɔ n de fāaga la putuulgɔ. ⁴⁰ Ya de la geto! La dagɪ Nawēnne n ēŋe poorum na, n ken ēŋe puam na? ⁴¹ Dɪkɛ-ya yan tarɪ sela la bɔ nasdōma la ya sūure wuu, tɪ sela woo wun āna sōŋa bɔ ya.

⁴² Farisi dōma, ya wun yē toogo. Se'ere n soe la, yāma bɔ'ɔrɪ Nawēnne zēvōɔɔ buuri wuu pia purɛ mɛ, baa ba sǎn āna pɪka pɪka, la ya ka ɪtɪ sela n mase, la ya ka nōŋe Nawēnne. La de la bōn-bāna tɪ ya wun dēŋe ɪta, dee yāŋa ɪta sela tɪ ya ɪtɪ la pa'ase.

⁴³ Farisi dōma, ya wun yē toogo. Se'ere n soe la, yāma eerɪ la zē'esɪ nēŋa tɪ ya zɪ'ire wēndeto puam, dee bɔɔra tɪ ba nā'asra ya da'asɪ puam. ⁴⁴ Ya wun yē toogo. Se'ere n soe la, ya ān wu ɔɔɔɔ n naage la tēŋa tɪ nērba nēera ba zuto tɔlla, dee ka mina tɪ ɔɔɔɔ n boe mɪ.»

⁴⁵ Tɪ ɔɔ karēnsāama ayɪla yele ɛ yetɪ: «Karēnsāama, fu sǎn tɔgra bela fu po pɔ'ɔra la tōma wuu.» ⁴⁶ Tɪ Azezi lerge yetɪ: «Yāma ɔɔ karēnsāandōma mē wun yē toogo. Se'ere n soe la, yāma n botɪ nērba la ɪta se'em na, ān wu ze-tɪbsa tɪ ya zelgrɪ nērba la, la yāma mēŋa ka boorɪ tɪ ya kalum ba la ya nu'ubiire. ⁴⁷ Ya wun yē toogo. Se'ere n soe la, yāma mētɪ la ɔɔɔɔ bɔ'ɔra Nawēnne nōtɔ'ɔsrɪba la. La yāma yaabdōma n yuun ku ba. ⁴⁸ La yāma n mētɪ seba tɪ ya yaabdōma ku la ɔɔɔɔ la, la pa'ale tɪ ya sake tɪ ban yuun tōm se'em na ān sōŋa mɛ.

⁴⁹ Bela ɪyā tɪ Nawēnne n tarɪ yem na yuun yetɪ: «Mam wun tōm nōtɔ'ɔsrɪba, la Tōntōnɪba bɔ ba, la ba wun ku baseba, dee nāmse baseba.» ⁵⁰ Bela Nawēnne wun sɪbgɛ zamāan-ēna wā dōma wu la de la bāma n ku nōtɔ'ɔsrɪba la halɪ dūnia pɪ'ɪlɪŋɔ, wa paam lɛɛɛ wā, ⁵¹ lan pɔse la Abɛlɪ kua, halɪ wa paage Azakari tɪ ba ku kǎabgɔ bɪmbɪnne, la Nawēnne zē'e-sōŋɔ tēŋasuka la. Mam yetɪ ya la sɪra, tɪ tōon-be'ero bāma wuu taale boe la zamāan-ēna nērba zuo.

⁵² Yāma ɔɔ karēnsāandōma la wun yē toogo. Se'ere n soe la, yāma n gu'uri nērba tɪ ba ka bāŋra Nawēnne sɪra. Yāma mēŋa ka sakɪ Nawēnne sɪra la, dee mē gu'ura nēr-seba n boorɪ tɪ ba sake la.»

⁵³ La Azezi n ze'ele bilam fōrge la, tɪ ɔɔ karēnsāandōma la Farisi dōma sūure ba isge la ɛ. Tɪ ba bɔɔra tɪ ba bēre ɛ, sɔkra ɛ sokɪsɪ zozo'e ⁵⁴ bɔɔra tɪ a tɔge tuuge tɪ ba yōke ɛ.

Da dɛna-ya pulibsum dōma

(Amatie 10:26-27)

12 Wakat-ēŋa nēr-kuuŋɔ n lagse zo'oge mikra taa-ba, nēera taaba nāma, tɪ Azezi dēŋe yele a karēnbiisi la yetɪ: «Guuse ya mēŋa la Farisi dōma pulibsum na n ān wu dābulɛ n botɪ dāam wuu kella la. ² Bōn-seka woo n lile wun lilge, la bōn-seka woo n sugɛ wun puke. ³ Bela, bōn-seka woo tɪ ya tɔge lika puam, ba wun tɔge ɛ na peelem puam tɪ nērba wuu wōm, la bōn-seka tɪ ya waasum deem na, ba wun zom na gɔsgɔ mōole tɪ nērba wuu wōm.»

La mase tɪ ya zɔta la Nawēnne

(Amatie 10:28-31)

⁴ «M sɪrdōma, mam yetɪ ya tɪ ya da zɔta dabeem la seba n kuurɪ ɪyā mā'a, dee ka tāna wun ēŋe sela pa'ase la. ⁵ Mam wun pa'ale ya lan mase tɪ ya zɔta seka. Zɔta-ya Nawēnne n tā wun ku, dee tara pāŋa wun kē'esɛ ya bug-tēŋa la. Asura, zɔta-ya Nawēnne. ⁶ Ba ka koosɪ mōom niinto banuu la lig-kōba bayi mā'a? La Nawēnne ka yinni baa ayɪla yelle. ⁷ La baa yāma zuugo zomto, Nawēnne mi ba wuu kǎlle mɛ. Bela ɪyā, da zɔta-ya dabeem, tɪ yāma tarɪ yōɔɔ gǎnna niinto zozo'e mɛ.»

Seka n sakɪ Azezi, Nawēnne Sɪa wun sōŋe ɛ mɛ

(Amatie 10:32-33;12:32;10:19-20)

⁸ «La mam yetɪ ya tɪ nēr-seka woo n ze'ele nērba nēŋam yetɪ ēŋa de la mam nēra, mam n de Nērsaala Dayua la mē wun ze'ele Nawēnne malekadōma nēŋam yetɪ a de la mam nēra. ⁹ La nēr-seka woo n sɪ'ɪse nērba nēŋam tɪ ēŋa dagɪ mam nēra, mam mē wun sɪ'ɪse Nawēnne malekadōma nēŋam tɪ a dagɪ mam nēra. ¹⁰ La nēr-seka woo n tɔge Nērsaala Dayua la be'em, Nawēnne wun base a tōon-be'ero taale, la nēr-seka woo n pɔ'ɔge Nawēnne Sɪa, Nawēnne kǎn base a tōon-be'ero taale.

¹¹ Ba sǎn yōge ya sēŋe ba wēndeto puam, bu na'adōma nēŋam, bu ke'endōma nēŋam tɪ ba di ya sarɪya, da fabla-ya yan wun lerge se'em, bu yan wun tɔge se'em to'oge ya mēŋa. ¹² Se'ere n soe la, Nawēnne Sɪa n wun pa'ale ya wakat-ēŋa yan wun tɔge se'em.»

Bōntarsa n ka tarɪ yem makre

¹³ Azezi n tɔge kɪ'ɪlɪm na, tɪ nēra ayɪla n boe nēr-kuuŋɔ la puam yele ɛ yetɪ: «Karēnsāama, yele m kēema tɪ a dɪkɛ tōma sɔ n ki dee bōn-seba la, puɪ bɔ ma m bōnɔ.» ¹⁴ Tɪ Azezi soke ɛ yetɪ: «Āne n bɔ mam nōore tɪ m dɛna ya sarɪyadita, bu m puta ya bōntarsōm bɔ'ɔra

ya?»¹⁵ Dee yele nērba la wuu yeti: «Guusra-ya ya mēṇa, da ɛera bōntarsōm zozo'e, se'ere n soe la, la dagi nēra n tarɪ bōntarsōm zo'oge iŷā tɪ a tarɪ yōvore.»

¹⁶ A yele bela, dee make la makre bɔ ba yeti: «Buraa-ga n daan boe dena bōntarsa, tɪ a vatɔ bōnkɔɔla māale sōṇa, ¹⁷ tɪ a tē'ese a putē'erum yeti: «Zē'a ka boe tɪ m wun sūm m bōnkɔɔla la. Bela iŷā, mam wun ɛṇe la wāne?» ¹⁸ Yāṇa yele a mēṇa yeti: «Mam mi mam wun ɛṇe se'em. Mam wun wōre m bā la mɛ, malge mē bā-kāra, sūm m bōnkɔɔla, la m sela woo. ¹⁹ Dee yele m sūurum yeti: M tarɪ bōntarsōm zo'oge, la wun seke ma paage yuuma zozo'e. Bela m wun vo'ose mɛ di dee yū, dee ɛṇe sū-yēlga.» ²⁰ Tɪ Nawēnne yele ɛ yeti: «Gergo wā, yu'uh-ēna wā m wun to'oge fu vɔm na. La āne n wun sɔna bōn-seba tɪ fu bīṇe la?» » ²¹ La Azezi le yeti: «La de la bela la nēr-seka woo n lagsrɪ bōntarsōm bīṇra a mēṇa iŷā, dee ka tara sela sela Nawēnne zē'am.»

Nawēnne n bɪsrɪ tɪ yelle

(Amatie 6:25-34)

²² Bela poorum, Azezi yele a karēnbiisi la yeti: «Bela iŷā, mam yeti ya tɪ ya da fabla ya vɔm yelle, ya wun di sela, bu ya wun ye fu-seba la yelle. ²³ Vɔm yelle gānnɪ dia mɛ, tɪ iŷā yelle mē gānna futo. ²⁴ Bɪse-ya gōorɔ, ba ka butɪ, ba ka lagsrɪ bōnkɔɔla, la ba ka tarɪ bāare bu dia bīṇre zē'a, la Nawēnne n bɔ'ɔrɪ ba dia. La yāma ka tarɪ yōorɔ gānna bōn-ēgla zo'oge sɪra? ²⁵ Āne n boe ya puam n tā wun pa'ase a vɔm woglum fēfēe ɛn fablɪ la iŷā? ²⁶ La yāma sān ka tāna wun ɛṇe bela n de bōn-pɪ-ka, bēm iŷā tɪ yāma fabla bōn-seba n weege la yelle? ²⁷ Bɪse-ya mō-puuro n ān sōṇa se'em, ba ka tōnnɪ, ba mē ka wugrɪ futo. La mam yeti ya mɛ tɪ, baa naba Asa-lomō na'am n yuun tarɪ pāṇa la, a yuun ka tā'age ye fu-ugo n ān sōṇa wu mō-puugo ayula. ²⁸ La Nawēnne sān botɪ mōorɔ n boe zīna dee tɪ ba wun yō ba bugum beere āna sōṇa bela, a kān bɪse ya yelle sōṇa gānna bela mɛ bu? Bēm tɪ yāma ka bɔ Nawēnne sɪra zo'oge? ²⁹ Da base-ya tɪ yan wun di sela, bu yan wun yū sela yelle pake ya. ³⁰ La de la nēr-seba n ka mi Nawēnne n eerɪ bōn-bāma wuu. La yāma Sɔ Nawēnne mi tɪ yāma boorɪ bōn-bāma wuu mɛ. ³¹ ɛ-ya Nawēnne so'olum na gānna wuu, tɪ a wun bɔ ya bōn-bāma pa'ase.»

Bōntarsōm n ka sā'anɪ

(Amatie 6:19-21)

³² «M nērba, ya ka zo'oge, la da zɔta-ya dabeem, se'ere n soe la, la paage ya Sɔ Nawēnne yem mɛ tɪ a yeti a bɔ ya a so'olum. ³³ Koose-ya yāma n tarɪ sela la dɪke ligri la bɔ nasdōma. Ya sān ɛṇe bela, ya eerɪ la bōntarsōm n ka sā'anɪ. ɛ-ya bōntarsōm tɪ ba bɔna Nawēnne yire wakate wuu, bilam tɪ nayigba kān tā'age zū, tɪ bōn-mōgla mē kān tā'age sā'am ba. ³⁴ Se'ere n

soe la, ya bōntarsōm n boe zē'a na, ya putē'era mē boe la bilam.»

Māasum-ya gu'ura

³⁵ Azezi le yeti: «Māasum-ya lu ya sagāna ya sɪsrɪ tɪ ya wun tā'age tōm, dee yō ya fitladōma, ³⁶ āna wu nēr-ba n gu'uri ba zuudāana n wun ze'ele pɔgdire kibsa wa'am, tɪ a sān wa'am wa wi, tɪ ba yo'oge yaṇa tɔtɔ bɔ ɛ. ³⁷ Tōntōn-seba tɪ ba zuudāana wun paam tɪ ba ze gu'ura ɛ, tarɪ zu-yēlga. Mam yeti ya la sɪra tɪ, a wun base tɪ ba zī'ire, tɪ zuudāana la mēṇa māasum wa puɪ ba dia. ³⁸ A sān wa'am sōnsua, bu bewiine, wa yē tɪ ba ken gu'ura ɛ, ba tarɪ zu-yēlga. ³⁹ Bāṇe-ya tɪ yidāana sān mina wakat-seka tɪ nayiga wun wa zū ɛ, a wun gu'ura a yire mɛ kān base tɪ nayiga la kē zū ɛ. ⁴⁰ Bela, yāma mē māasum ze sōṇa, tɪ Nērsaala Dayua la sēm na wakat-seka tɪ yāma ka tē'esrɪ tɪ a wun wa'am na.»

Tōntōnna mase mɛ tɪ a ita a zuudāana n boorɪ se'em na

(Amatie 24:45-51)

⁴¹ Tɪ Apɪyɛerɪ soke ɛ yeti: «Zuudāana, fōn make makre ɛna wā la tōma mā'a bu, nērba wuu?» ⁴² Tɪ Zu-udāana Azezi lerge ɛ yeti: «Āne n de tōntōn-sōṇɔ n tarɪ yem? La de la ɛṇa tɪ a zuudāana wun yeti a bɪsra a yire yelle, bɔ'ɔra a tōntōnɪba dia wu lan mase, dee sēṇe sore. ⁴³ Zuudāana la sān leme wa yē tɪ tōntōnna la tōm wu ɛṇa n yele se'em na, tōntōnna la tarɪ zu-yēlga. ⁴⁴ Mam yeti ya la sɪra tɪ, a zuudāana la wun dɪke ɛṇa n tarɪ sela la wuu bɔ ɛ mɛ tɪ a bɪsra.

⁴⁵ La tōntōnna la sān tē'ese yeti, ɛṇa zuudāana la yu-urɪ mɛ ka kulna, yāṇa wē'era tōntōn-buraasɪ, la tōntōn-pɔgsɪ, dita, dee yūura bugra, ⁴⁶ a zuudāana la wun kulum na daar-seka tɪ a ka tē'esrɪ tɪ a wun wa'am, la wakat-seka tɪ a ka mi, wa di'ige ɛ. La a wun dɪge ɛ mɛ botɪ a lagum na seba n ka bɔ ɛṇa sɪra la yē sɪbgrɛ. ⁴⁷ Tōntōn-seka n mi a zuudāana n boorɪ se'em, dee ka māasum bu ka tōm ɛn boorɪ se'em na, ba wun wē ɛ mɛ zozo'e. ⁴⁸ La tōntōn-seka n ka mi a zuudāana n boorɪ se'em, dee ɛṇe sela n mase tɪ ba wē ɛ, ba wun wē ɛ na fēe. Seka tɪ ba bɔ ɛ zo'oge, ba mē wun soke ɛ yela zozo'e yelle mɛ, la seka tɪ ba gu'ule ɛ zo'oge, ba mē wun soke ɛ halɪ yela zozo'e yelle gānna mɛ.»

Nēr-seba n ka dolɪ Azezi wun welge mɛ la seba n dolɪ Azezi

(Amatie 10:34-36)

⁴⁹ «Mam wa'am tɪ m tuure la bugum dūnia wā zuo, la mam boorɪ nɪ mɛ zozo'e tɪ bugum na pōn dare dita. ⁵⁰ La dēnɪ tɪ mam yē nāmsgɔ zozo'e wu mam mise la ko'om puam na, la a yelle la wun nāmse mam mɛ halɪ tɪ la wa ɛṇe ba'ase. ⁵¹ Ya tē'ese tɪ mam wa'am tɪ m botɪ nērba nōore n dena ayula dūnia zuo bu? Ayel, mam

yetu ya ti mam taru la welgre wa'am. ⁵² La, lan pɔse leeɛ wã we'esa, nêrba banuu sãn bɔna yire ayila puam, nêrba batã wun welge me sira nêrba bayi la, ti nêrba bayi la mẽ sira nêrba batã la. ⁵³ La so wun sise a dayua, ti dayua mẽ sise a so. La ma wun sise a pɔyua, ti pɔyua mẽ sise a ma. La dayua pɔga wun sise a sira ma, ti sira ma mẽ sise a dayua pɔga.»

Bãñe-ya bõn-seba n uti leeɛ wã vòore bɔke

(Amatie 16:2-3)

⁵⁴ Ti Azezi yele nêr-kuuɔɔ la yetu: «Ya sãn yẽ ti wara sobge bɔbre ayẽma, ya yetu me tɔtɔ ti saaga wun ni me, ti a siri ni. ⁵⁵ La ya sãn le yẽ ti kusebgo vugri bɔbre ayẽma, ya yetu me ti wɔlɔɔ lem me, ti wɔlɔɔ wun siri paage. ⁵⁶ Pulibsum dõma wã! Yãma bɔsɔ me mina tẽja, la saazuum yela n ãn se'em. La bẽm ti yãma ka mina bõn-seba n uti leeɛ wã vòore bɔke?»

Malge fu yela la Nawẽnne

(Amatie 5:25-26)

⁵⁷ «Bẽm ti ya mẽja ka tẽ'ese bãñe sela n mase ti ya wun ẽñe bɔke? ⁵⁸ Fu sãn tara yelle la nêra, ti a taru fu we'esa sarlyadia zẽ'am, mɔrge ti ya mãale yelle la sore, ti a da dɔke fu bɔ sarlyadita, ti a tɔge fu yetɔga la dɔke fu bɔ gu'ura, ti a kẽ'ese fu yu'a deem. ⁵⁹ Mam yetu fu la sira, ti fu kãn yẽ sore yese yu'a deem na, halu ti fu wun wa yɔ fu sãnne na wuu ba'ase.»

Teege-ya yem base tɔon-be'ero

13 La wakat-ẽja nêrba baseba n wa'am wa tɔge pa'ale Azezi, gɔmna Apilatɔ n daan botu ba ku Galile nêrba baseba wakat-seka ti ba boe mĩ kãabra bɔ'ɔra Nawẽnne, ti ba zum yese gaam na kãabgo la zum. ² Ti Azezi lerge ba yetu: «Yãma tẽ'ese ti Galile nêr-bãma n daan yẽ nãmsgɔ ẽja la, bãma n de tɔon-be'ero dõma gãnna Galile dõma baseba la bu? ³ Mam yetu ya ti ayɛi, yãma sãn ka teege yem base tɔon-be'ero, yãma wuu mẽ wun sã'am na bela. ⁴ La nêrba pia la anii ti de-tugma yuun lui ku ba Silo tẽja la, yãma tẽ'ese ti bãma n de tɔon-be'ero dõma gãnna Zerizalem nêrba baseba la bu? ⁵ Mam yetu ya ti ayɛi, yãma sãn ka teege yem base tɔon-be'ero, yãma wuu mẽ wun sã'am na bela.»

Kẽnkãja n ka wɔnni makre

⁶ Azezi le make la makre ẽna wã yetu: «Buraaga n taru kẽnkãja n sele a va'am puam, yãja wa'am ti a bɔse a sãn tara bie, ka yẽ sela sela. ⁷ Ti a yele va'am na gu'ura yetu: «Bɔse, yuuma atã n wãna ti mam sɛnni dee ka yẽta bie kẽnkãja wã zuo. Se ẽ base, ti a yẽre la zẽ'a.» ⁸ Ti gu'ura la lerge ẽ yetu: «Zuudãana, base ẽ yuun-ẽna mã'a, ti mam wun kɔ gilge a tille, ẽñe bugulgo base ẽ,

⁹ la yuune sãn kaage ti a wɔm, la ãn sɔɔja, la a sãn ken ka wɔm, fu yãja se ẽ base.» »

Azezi botu pɔka yẽ ãmã'asum vo'osgo daare

¹⁰ Azezi daan boe la Zifdõma wẽndeem vo'osgo daare zãsna nêrba, ¹¹ ti pɔka ayila bɔna mĩ ti kulkã'arga tara ẽ botu a dena kobgo paage yuuma pia la anii, yũre ka tãna wun dɔ'ɔge. ¹² Ti Azezi yẽ pɔka la, wi ẽ yetu: «Pɔka, fu yẽ yolsgo, fu bã'aga la base fu.» ¹³ Dee dɔke a nu'usi pagle pɔka la zuo, ti bã'aga la base pɔka la bilam mẽja, ti a tã'age dɔ'ɔra, yãja pẽgra Nawẽnne. ¹⁴ Ti wẽndeego la naba sũure isge la Azezi, ẽja n botu pɔka la yẽ ãmã'asum vo'osgo daare la ãyã. Ti a yele nêrba la yetu: «Dabsa ayoobɔ n boe ti ya tãna wun tɔm. Wa'am-ya dabs-bãma puam wa tɔbe ya mẽja, dee da senna vo'osgo daare tɔbra ya mẽja.» ¹⁵ Ti Zuudãana Azezi lerge ẽ yetu: «Pulibsum dõma wã! Yãma nêra woo ka lorgɔ a bɔlga, bu a bõja senna yũula ko'om vo'osgo daare me bu? ¹⁶ Ti pɔg-ẽna wã n de Abraham yũja ti Asũtãana lu ẽ yuuma pia la anii wã, la ka nari ti mam lorge ẽ vo'osgo daare?» ¹⁷ La ẽja n yele bela la, ti yãñ-ne yõke a be'eba la wuu, ti nêr-kuuɔɔ la wuu sũure ẽñe yẽlum la a tɔon-yãlma seba wuu ti a ẽñe la.

Nawẽnne so'olum wõn na bẽm?

(Amatie 13:31-33, Amarkɔ 4:30-32)

¹⁸ Ti Azezi yele ba yetu: «Nawẽnne so'olum wõn na bẽm? La mam wun dɔke la bẽm make la ẽ? ¹⁹ A ãn wu sɔ'ɔɔ biire ti nêra bure a va'am puam, ti a bɔ lebge ti-kãte. Ti niinto senna te'era ba tugɔ a wila zuo.»

²⁰ La a le yetu: «Mam wun le dɔke la bẽm make la Nawẽnne so'olum? ²¹ A ãn wu dãbulle ti pɔka dɔke gaam na borborɔ zom la-kãra batã wẽ, ti dãbulle la botu ba wuu uke.»

Nêrba n wun ẽñe se'em kẽ Nawẽnne so'olum

(Amatie 7:13-14,21-23)

²² Azezi daan we'esi la Zerizalem dɔla tẽn-kãra la tẽn-pugɔ puam zãsna nêrba. ²³ Ti nêra soke ẽ yetu: «Zu-udãana, nêrba fẽe mã'a n wun yẽ fãare bu?» Ti a lerge ba yetu: ²⁴ «Narge-ya pãja doose zanõre n ãn mika kẽ Nawẽnne so'olum puam, ti mam yetu ya me ti nêrba zozo'e wun wa ẽera me ti ba kẽ, la ba kãn yãñe. ²⁵ La wakate sãn paage, yidãana wun isge yu yãja la me, la ya sãn weege yẽja, ya wun wẽ'era me kɔkɔ yetu: «Zu-udãana, yo'oge ti ti kẽ.» La a wun lerge ya yetu: «Mam ka mi yãma n ze'ele zẽ'a.» ²⁶ La ya wun yele ẽ yetu: «Dagɔ tɔma la fɔn n daan lagum dita, dee yũura, ti fu senna tɔma tẽjam zãsna nêrba?» ²⁷ La a wun le lerge ya yetu: «Mam ka mi yãma n ze'ele zẽ'a, fɔrge ya mam zẽ'am, yãma de la tɔon-be'ero dõma.» ²⁸ La ya wun ka yẽ Abraham, la A'izakɔ, la Azakɔbɔ, la Nawẽnne nɔtɔ'ɔs-riɔba wuu, ti ba boe Nawẽnne so'olum puam, la yãma

wun weege la yēŋa kella dee dūke ya nu'usi gi nōorum.
²⁹ La nērba wun yese dapɔ-bɔba, la zanɔ-bɔba, la zuugo bɔba, la gɔbga bɔba wa'am wa zī'ire Nawēnne so'olum puam di. ³⁰ Bāŋe-ya tɪ nērba baseba n de poorum dōma wun lebge nēŋam dōma, tɪ baseba n mē de nēŋam dōma wun wa lebge poorum dōma.»

Azezi sūure sā'am mē Zerizalem dōma īyā

(Amatie 23:37-39)

³¹ La wakat-ēŋa tɪ Farisi dōma baseba sēŋe ka yele Azezi yeti: «Base kalam dee sēŋe zē'a ayēma, tɪ Naba A'eroɔɔl eeri fu mē tɪ a ku.» ³² Tɪ a lerge ba yeti: «Sēŋe-ya ka yele yem be'ero dāana la yeti: «Zīna la beesā, mam wun dige kulkā'arsɪ mē tɪ ba yese, dee botɪ bā'adōma yē īmā'asum, la dabsa atā daare tɪ mam wun ba'ase m tōoma la wuu.» ³³ La dēnɪ tɪ mam sēŋe m sēnne na zīna, la beesā, la dabsa atā daare, se'ere n soe la, la ka mase tɪ Nawēnne nōtɔ'ɔsa ki zē'a ayēma, sān dagna Zerizalem puam.

³⁴ Zerizalem nērba, Zerizalem nērba, yāma kuuri la Nawēnne nōtɔ'ɔsrɪba, dee lɔbra seba tɪ Nawēnne tōm ba ya zē'am la kuga kuura. Nōore faa tɪ mam boori tɪ m lagse ya wu nō-yā'ŋa n lagsɪ a koma ūna a kem-pagsɪ puam se'em na, tɪ ya ka bɔɔra. ³⁵ Bela, Nawēnne wun base ya tēŋa bɔ ya, tɪ a lebge daboto. Mam yeti ya tɪ ya kǎn le yē mam, halɪ tɪ ya wun wa yeti: «Pēge-ya seka n sēm na Zuudāana Nawēnne yu'ure la.» »

Azezi botɪ buraaga yē īmā'asum vo'osgo daare

14 Vo'osgo daare ayɪla tɪ Azezi daan sēŋe Farisi dōma naba ayɪla yire tɪ ba di. Tɪ nērba la n boe mɪ na bɪsra ēn wun ēŋe se'em. ² La buraaga ayɪla n boe mɪ tɪ ī-fuusɔŋ bā'aga tara ē, tɪ a zē Azezi nēŋam. ³ Tɪ Azezi soke lɔ karēnsāandōma, la Farisi dōma la yeti: «Sore boe tɪ nēra botɪ nērba yē īmā'asum vo'osgo daare bu, sore ka boe?» ⁴ Tɪ ba sīna. Tɪ Azezi botɪ buraaga la yē īmā'asum, base ē tɪ a kule. ⁵ Dee soke ba yeti: «Āne n boe yāma puam tɪ a dayua, bu a lɔlga wun lui lua puam vo'osgo daare tɪ a kǎn zoe tɔtɔ sēŋe ka yaage ē?» ⁶ Tɪ ba make tɪ ba lerge ē koŋe.

Dēna-ya sik-m-mēŋa dōma

⁷ Tɪ Azezi yē nēr-seba tɪ ba wi tɪ ba wa'am wa di la n loosɪ zē'e-sōma zī'ita, tɪ a make makre yele ba yeti: ⁸ «Nēra sǎn ēŋe pɔgdire kibsa wi fo, da kǎn sēŋe ka zī'ire zē'e-sōŋ, tā tɪ a mē wi la nēra n gǎnnɪ fōn. ⁹ Tɪ seka n wi ya wuu la, da wa'am wa yele fu yeti: «Isge, dee tɪ ēna zī'ire.» Tɪ fu yāŋa isge sēŋe ka zī'ire poorum poorum la yānne. ¹⁰ Nēra sǎn wi fo, sēŋe ka zī'ire poorum, tɪ seka n wi fu la sǎn wa'am yē fɔ, a wun yeti: «M sɪrē, wa'am wa zī'ire nēŋam.» Bela tɪ fu wun yē nā'asgo nēr-seba tɪ fu zī la ba la zē'am. ¹¹ Nēr-seka woo

n zēkrɪ a mēŋa, Nawēnne wun sike ē, la nēr-seka n sikri a mēŋa, Nawēnne wun zēke ē.»

¹² La Azezi yele seka n wi ē na yeti: «Fu sǎn yeti fu ēŋe dia wuntēŋa, bu yu'uhɔ wi nērba tɪ ba wa'am wa di, da wi'ira fu sɪrdōma, bu fu sɔbiisi, bu fu nērba, bu fu sawiiba n de bōntatba, se'ere n soe la, ba mē wun wa ēŋe bela daar-seka mē wi fo lebse bela sǎnne. ¹³ Fu sǎn yeti fu ēŋe dia wi nērba tɪ ba wa'am di, wi nasdōma, la kɔɔrnɔ, la wɔbsɪ, la fɔɔsɪ. ¹⁴ Fu sǎn ēŋe bela, fu wun tara zu-yēlga, se'ere n soe la, ba kǎn yāŋe ēŋe lebse fo. Bela, wakat-seka tɪ Nawēnne wun botɪ nēr-seba n ēŋe sela n mase a yem na vo'oge la, fu wun yē yɔɔɔ.»

Kibs-kāte makre

(Amatie 22:1-10)

¹⁵ La nērba la n lagse zēa dia zē'a la Azezi la, ba wōm ēn yele se'em na mē, tɪ nēra ayɪla yele ē yeti: «Nēr-seka woo n wun po di dia Nawēnne so'olum puam na tarɪ zu-yēlga.» ¹⁶ Tɪ Azezi make makre bɔ ē yeti: «Buraayɪla n daan boe, ēŋe dia zozo'e, wi nērba zozo'e tɪ ba wa'am wa di. ¹⁷ Tɪ dia la wakate paage, tɪ a tōm a tōntōnna yeti, a sēŋe ka yele nērba la tɪ ēŋa yeti: «Wa'am-ya tɪ mam māasum ba'ase mē gu'ura ya.» ¹⁸ Tɪ ba nēra woo yeta lan pake ēŋa se'em, tɪ ēŋa sɔsra sugri. Pɔspɔsɪ dāana la yele ē yeti: «Mam da la va'am, tɪ m sēŋe ka bɪse lan ān se'em, bela tɪ mam sɔsra ē sugri.» ¹⁹ Tɪ ayɪla yeti: «Mam da la nii-kɔɔrsɪ pia bɔɔra tɪ m make ba bayi bayi kɔ bɪse, bela tɪ mam sɔsra ē sugri.» ²⁰ Tɪ ayēma mē yeti: «Mam di la pɔg-sāana, bela tɪ mam kǎn yāŋe wa'am.»

²¹ Tɪ tōntōnna la lebe ka tɔge bela bɔ a zuudāana la. Tɪ a zuudāana la sūure yīige, tɪ a yele a tōntōnna la yeti: «Yese tɔtɔ sēŋe tēŋa la sorɔɔɔ zuto ka tarɪ nasdōma, la kɔɔrnɔ, la fɔɔsɪ, la wɔbsɪ wa'am tɪ ba di.» ²² Tɪ tōntōnna la sēŋe ka ēŋe a zuudāana la n yele se'em na, dee yele ē yeti: «M zuudāana, fōn yeti mam ēŋe se'em na, mam ēŋe mē, la zē'a ken dee mē.» ²³ Tɪ zuudāana la le yele a tōntōnna la yeti: «Yese tēŋa la puam sēŋe sorɔ-pɪgsɪ la wuu zuo, ka mōrge tarɪ nērba la wa'am tɪ ba kē tɪ mam yire pɪrē.»

²⁴ La mam yeti yāma mē tɪ nēr-seba tɪ mam dēŋe yele ba tɪ ba wa'am, tɪ ba zagse la, ba nēra nēra kǎn le malun di mam dia la.»

Azezi karēnbia n mase tɪ a ēŋe se'em

(Amatie 10:37-38; 5:13, Amarkɪ 9:50)

²⁵ Azezi daan sēnnɪ mē, tɪ nēr-kuuŋɔ dɔla ē, tɪ a gelge yele ba yeti: ²⁶ «Nēra sǎn yeti a doose mam dee ka nōŋe mam gǎnna a sɔ, la a ma, la a pɔga, la a koma, la a sɔbiisi, la a tāpa, bu a sǎn ka nōŋe mam gǎnna a mēŋa vɔm, a kǎn tā'age dēna mam karēnbia. ²⁷ La seka woo n ka sake nāmsgɔ wu nēra n zēeri a kūm dɔ-pu-urŋa dɔla mam, a kǎn tā'age dēna mam karēnbia.

²⁸ Ya mi ti nēra sǎn bɔna ya puam bɔɔra ti a mē de-tugma, a wun dēŋe zī'ire mē geele bise, ēn tarɪ se'em na wun seke ti a yǎŋe mē ba'ase, bu la kǎn seke? ²⁹ La sǎn dagna bela, a sǎn ēebe ēbre dee ka yǎŋe mē ba'ase, seba wuu n yē bela la wun la ē mē ³⁰ yeti: «Nēr-ēna ēebe la deego, dee ka yǎŋe mē ba'ase.» ³¹ Bu naba sǎn wē'esa ti a zebe la a na-tadāana, dēni ti a dēŋe tē'ese bise, ēŋa n tarɪ nērba tuspia la, a wun tā'age zebe la na-seka n tarɪ nērba tuspisiyi, bu a kǎn tā'age? ³² La a sǎn bǎŋe ti a kǎn tā'age, naba ayēma la n ken zāage la, a wun dēŋe tōm na a tōntōnɪba ti ba sēŋe naba la zē'am ka soke ē bise, bāma wun ēŋe la wāne ti zebre la ba'ase. ³³ Bela mē, yāma nēr-seka woo n ka basri bōn-seba wuu ti a tarɪ la, ka tā wun dena mam karēnbia.

³⁴ Yaarum ān sōŋa mē, la a sǎn sabge, ba wun ēŋe la wāne boti a le āna yēlum? ³⁵ A ka le tara yōoro la tēŋa, la a ka tā wun dena bugulgo mē, ba lobri ē basra mē. Seka n wōm yetɔga wā, a selse sōŋa sōŋa.»

Pesgo, la lagfɔ n bɔi makre

(Amatie 18:12-14)

15 Lampo-tɔ'ɔsrɪba, la tōon-be'ero dōma zozo'e n daan sēŋe Azezi zē'am ti ba selse a yetɔga. ² Ti Farisi dōma, la bɔ karēnsāandōma la yōnna yeti: «Bura-ēna wā to'ori la tōon-be'ero dōma, dee dita la ba.» ³ Ti Azezi make makre wā soke ba yeti: ⁴ «Bura-kāna n boe ya puam tara piisi kɔbga, ti ayɪla sǎn bɔi, ti a kǎn lagse piisi piswɛi la awɛi la base dūnsēkam, dee sēŋe ka ε ayēma n bɔi la halɪ yǎŋa yē ē? ⁵ La a sǎn yē ē, a wun yōke ē mē buke la sū-yēlga. ⁶ La a sǎn kule yire, a wun wi a sɪrdōma, la a sawiiba mē yele ba yeti: «Naage-ya la mam ti ti ēŋe sū-yēlga, se'ere n soe la, mam yē m pesgo la n bɔi la mē.» ⁷ Bela mam yeti ya ti tōon-be'ero dāana ayɪla sǎn teege yem base tōon-be'ero, sū-yēlga boe Nawēnne yire puam la bela gǎnna nēr-sōma piswɛi la awɛi n ka eerɪ ti ba teege yem.

⁸ Bu, pɔg-kāna n boe wun tara lig-kōba pia, ti ayɪla sǎn bɔi, ti a kǎn yō ftɪla pɪuse deego la ε lagfɔ la sōŋa halɪ wa yē ē? ⁹ La a sǎn yē ē, a wun wi a sɪrdōma, la a sawiiba mē yele ba yeti: «Naage-ya la mam ti ti ēŋe sū-yēlga, se'ere n soe la, mam yē m lagfɔ la n bɔi la mē.»

¹⁰ Bela mam yeti ya ti tōon-be'ero dāana ayɪla sǎn teege yem base tōon-be'ero, sū-yēlga boe Nawēnne malekadōma zē'am na bela.»

Budibla n base a sɔ yire, la a kēema makre

¹¹ Ti Azezi le yele ba yeti: «Bura n daan boe tara a dayɔɔsi bayi. ¹² Ti yɪbga la yele a sɔ yeti: «M sɔ, puɪ fu bōntarsōm na bɔ mam m bōnɔ.» Ti a sɔ puɪ a bōntarsōm na bɔ ba. ¹³ Ti la ēŋe dabsa fēe, ti yɪbga la lagse a bōntarsōm na wuu yese sēŋe tēŋa n zāage, ka tōm tōon-yooro sǎ'am ēn tarɪ sela la wuu. ¹⁴ La ēn sǎ'am a

bōntarsōm na wuu ba'ase la, kɔm kǎte n wa'am tēŋa la puam, ti a ka le tara sela wun di. ¹⁵ Ti a sēŋe tēŋa la nēra ayɪla zē'am ti a dɪke ē ti a tōnna. Ti nēra la dɪke ē boti a sēŋe mōom ka gu'ura a kurkurdōma. ¹⁶ Ti a kɔm dōnna ti a bɔɔra ti a di kurkuri dia. Ti nēra nēra ka bɔ ē. ¹⁷ Ti a tē'ese a sūurum yeti: «Mam sɔ tarɪ tōntōnɪba zo'oge mē ti ba dita tɪgra dee basra, dee ti mam bɔna kalam kiira la kɔm.» ¹⁸ Yǎŋa yeti: «Mam wun lebe kule la m sɔ yire ka yele ē yeti, mam tōm na Nawēnne la fōn be'em, ¹⁹ mam ka le mase ti ba wi mam ti fu bia. lta mam wu fu tōntōnɪba la ayɪla.» ²⁰ Dee isge kulla a sɔ yire. La ēn nǎn boe zāazāare la, ti a sɔ la yē ē, ti a nin-bāalga yōke ē, ti a zoe tu'use kɔke ē, mōbge ē. ²¹ Ti bia la yele ē yeti: «M sɔ, mam tōm na Nawēnne la fōn be'em. Mam ka mase ti ba le wi'ira mam ti fu bia.» ²² Ti a sɔ la yele a tōntōnɪba yeti: «Sēŋe-ya tɔtɔ ka tarɪ fu-se-ka n ān sōŋa gǎnna la wa'am wa ye ē, dee dɪke nutua pire a nu'ubiire, dee dɪke tagra pire ē. ²³ La ya yōke lɔl-polle n nōbe wa'am wa ku ti ti ēŋe dia di, dee ēŋe sū-yēlga. ²⁴ Se'ere n soe la, mam bia wā daan wōn na a ki mē, dee le vo'oge. A daan bɔi mē, ti ti le yē ē.» Ti ba yǎŋa lta sū-yēlga.

²⁵ Wakat-ēŋa ti a dayɔ-kēema la boe la va'am. La ēn lebe kulna wa lɛm yire la, a wōm na duursi ti ba wē'eri wa'ara. ²⁶ Ti a wi a sɔ tōntōnna ayɪla soke ē yeti: «Bēm n ēŋe?» ²⁷ Ti tōntōnna la lerge ē yeti: «Fu yɪbga la n wa'am, ti fu sɔ ku lɔl-polle n nōbe, ēŋa n yē fu yɪbga la ti a tarɪ īmǎ'asum na īyǎ.» ²⁸ Ti kēema la sūure yīge halɪ. Ti a zagse ti ēŋa kǎn kē yire. Ti a sɔ yese belem ē yeti, a wa'am wa kē. ²⁹ Ti a lerge a sɔ la yeti: «Bise, yuu-ma zozo'e ti mam tōnnɪ fu tōoma, dee ka zagse fu nōore baa daare ayɪla, la fōn ka bɔ mam bulla baa daare ayɪla ti m ku ti mam la m sɪrdōma ēŋe sū-yēlga. ³⁰ La fu bi-ēna wā n dɪke fu bōntarsōm sēŋe ka tōm yal-sɪ tōoma sǎ'am ba wuu dee kulum wā, fu ku la lɔl-polle bɔ ē.» ³¹ Ti a sɔ lerge ē yeti: «M bia, fōn boe la mam zē'am daare woo. La mam n tarɪ sela wuu la de la fōn bōnɔ. ³² La, la mase mē ti ti ēŋe sū-yēlga sɪrum, se'ere n soe la, fu yɪbga wā daan wōn na a ki mē, dee le vo'oge. A daan bɔi mē. Ti ti le yē ē.» »

Tōntōnna n de yem dāana makre

16 Ti Azezi le yele a karēnbiisi la yeti: «Buraaga n daan boe dena bōntarsa, tara tōntōnna ti a bis-ra a yire yelle. Ti ba wa'am wa yele bōntarsa la yeti, tōntōnna la sǎ'anɪ a bōntarsōm na mē. ² Ti zuudāana la wi a tōntōnna la yeti: «Bēm ti ba tɔgra fōn yelle ti mam wōnna wāna? Geele pa'ale ma fōn ēŋe mam bōntarsōm na se'em. Fu kǎn le bisra mam yire yelle.» ³ Ti tōntōnna la yele a mēŋa yeti: «Mam zuudāana la yeti a dige mam a tōoma la puam mē, mam wun ēŋe la wāne? Kua? Mam ka tarɪ pǎŋa wun kɔ. La yǎnne n wun tara mam la sosgo. ⁴ Mam mi mam wun ēŋe se'em, ti a

sān wa dige ma, m tara sɪrdōma n wun to'oge mam ba yie sōŋa.» ⁵ Tɪ a wi a zuudāana sānditba ayɪla ayɪla, soke pɔspɔsɪ dāana la yetɪ: «Fōn tarɪ mam zuudāana sānne la wāne?» ⁶ Tɪ a lerge yetɪ: «Mam tarɪ a sānne na kaam dugl-kāra kɔbga.» Tɪ a yele ē yetɪ: «To'oge fu sānne gōŋɔ tɔtɔ zī'ire gulɛ yetɪ, kaam dugl-kāra pinuu.»

⁷ Dee soke ayēma yetɪ: «Fōn tarɪ mam zuudāana sānne na wāne?» Tɪ a lerge yetɪ: «Mam tarɪ a sānne na mui bɔra kɔbga.» Tɪ a yele ē yetɪ: «To'oge fu sānne gōŋɔ gulɛ yetɪ pinii.» ⁸ Baa la tōntōnna wā ɪrgɔ n ka doose sore la, a zuudāana pēge ē mɛ, ēn tōm na yem na ɪyā. Dūni-ēna wā dōma tarɪ la yem tōnna la taaba gānna nēr-seba n bāŋe Nawēnne peelem.

⁹ Bela ɪyā, mam yetɪ ya tɪ ya dɪke dūnia bōntarsōm yōge sɪrdōma, tɪ dūnia bōntarsōm na sān wa ba'ase, ba wun to'oge ya tɪ ya bɔna Nawēnne yire wakate n ka ba'asɪ.»

Bōntarsōm sɪra sɪra

¹⁰ «Nēr-seka woo n de sɪra dāana bōn-pɪgsɪ puam, mē de la sɪra dāana bōn-kāra puam. La sɛka n ka de sɪra dāana bōn-pɪgsɪ puam, mē ka de sɪra dāana bōn-kāra puam. ¹¹ Bela, ya sān ka dena sɪra dōma dūnia wā bōntarsōm puam, āne n wun dɪke bōntarsōm sɪra sɪra gu'ule ya? ¹² La ya sān ka dena sɪra dōma la bōn-seba n dagɪ ya mēŋa bōnɔ, āne n wun dɪke bōnɔ bɔ ya tɪ la dena ya mēŋa bōnɔ? ¹³ Tōntōnna ka tā wun sake zuudāandōma bayi. A wun sise ayɪla mɛ, dee nōŋe ayɪla, bu a wun nanna ayɪla la mɛ, dee pɔ'ɔra ayɪla la. Bela, yāma ka tā wun sake Nawēnne n de ya Zuudāana, dee botɪ bōntarsōm mē dena ya zuudāana.»

Nawēnne ɪɔɔ, la a so'olum yelle

(Amatie 11:12-13; 5:31-32, Amarkɪ 10:11-12)

¹⁴ Farisi dōma n nōŋe ligri la n wōm bela la, ba la'arɪ Azezi mɛ. ¹⁵ Tɪ Azezi yele ba yetɪ: «Yāma pa'alɪ ya mēŋa nērba nēŋam wu ya de la nēr-sōma. La Nawēnne mi ya putē'era n ān se'em mɛ. Bōn-seka tɪ nērsaalba pēgrɪ la, de la bōn-dēgrɔ Nawēnne zē'am.

¹⁶ Amoyisi ɪɔɔ, la Nawēnne nōtɔ'ɔsrɪba n yuun pa'alɪ nērba ban wun āna se'em, ka paage wakat-seka tɪ Azā wa'am na. Lan pɔse Azā n misri nērba ko'om puam na, ba mōole Nawēnne so'olum kō-yēlga mɛ, tɪ nēra woo nargra pāŋa tɪ a kē. ¹⁷ La, la de la nāana tɪ saazuum la dūnia tole gānna tɪ Nawēnne ɪɔɔ la bōn-pɪka ayɪla bɔɔ.

¹⁸ Nēr-seka woo n base a pɔga, dee le di pɔka ayēma, a ēŋe la be'em wu nēra n gā'arɪ la a tadāana pɔga, la sɛka woo n di pɔka tɪ a sɪra base mē ēŋe la be'em.»

Bōntarsa, la nasa Alazaarɪ makre

¹⁹ Tɪ Azezi yetɪ: «Bōntarsa n daan boe, yēera futo n ba āna sōŋa, dee tara sela woo daare woo tɪ la seke. ²⁰ Tɪ nasa ayɪla mē daan bɔna, tɪ a yu'ure dena Alazaarɪ, tɪ a

ɪyā wuu tara nōtɔ. A daan ēn gā la bōntarsa la zanōrum, ²¹ bɔɔra tɪ a di bōntarsa la n diti tɪ di-zōra lu-ta la. Tɪ baasɪ sēnna lēela a nōtɔ la. ²² Tɪ Alazaarɪ wa ki. Tɪ Nawēnne malekadōma tarɪ ē sēŋe Nawēnne yire Abraham zē'am. Tɪ bōntarsa la mē wa ki, tɪ ba laage ē.

²³ Tɪ bōntarsa la daan bɔna bug-tēŋa nāmsra, yāŋa gorge yē Abraham halɪ zē'a n zāage, tɪ Alazaarɪ zēa a sakukɔ. ²⁴ Tɪ bōntarsa la wi Abraham yetɪ: «M sɔ Abraham, zoe m ninbāalga, dee tōm Alazaarɪ tɪ a dɪke a nu'ubiire tē'ege ko'om mā'ale m zɪlŋa, se'ere n soe la, mam boe la bugum puam nāmsra.» ²⁵ Tɪ Abraham yele ē yetɪ: «M bia, tēege tɪ fōn daan boe dūnia zuo wakat-seka la, fōn daan tarɪ bōn-sōma mɛ, dee tɪ Alazaarɪ yēta toogo. La lēele wā, a sūure mā'age mɛ, dee tɪ fōn yāŋa nāmsra. ²⁶ La bōn-seka n pa'ase, bog-ko'ogo n beŋe tōma la yāma, tɪ nēra sān bɔɔra tɪ a ze'ele kalam sēŋe yāma zē'am, a kān tā'age. La nēra mē sān bɔɔra tɪ a ze'ele yāma zē'am wa'am tōma zē'am, a kān tā'age.» ²⁷ Tɪ a lerge Abraham yetɪ: «M sɔ Abraham, la sān dena bela, mam sosɪ fu mɛ tɪ fu tōm Alazaarɪ tɪ a sēŋe mam sɔ yire, ²⁸ tɪ mam tarɪ la sɔbiisi banuu, a sēŋe ka kā'an ba, tɪ ba mē da wa'am nāmsgɔ zē'a wā.» ²⁹ Tɪ Abraham yele ē yetɪ: «Ba tarɪ Amoyisi la Nawēnne nōtɔ'ɔsrɪba n gulɛ gōn-seba la mɛ. La mase tɪ ba sake la gōn-bāma yetɔga.» ³⁰ Tɪ a lerge ē yetɪ: «M sɔ, ayelɪ, nēra sān vo'oge lebe sēŋe ba zē'am, ba wun teege yem base tōon-be'ero.» ³¹ Tɪ Abraham lerge ē yetɪ: «Ba sān kān sake Amoyisi, la Nawēnne nōtɔ'ɔsrɪba la nōore, baa nēra n ki sān vo'oge lebe, ba kān sake.» »

Tɪ da botɪ nēra base Nawēnne sore, la tɪ base taaba tōon-be'ero taale

(Amatie 18:6-7, 21-22, Amarkɪ 9:42)

17 Tɪ Azezi yele a karēnbiisi la yetɪ: «La ka tā tɪ bōn-seba n pā'asɪ nērba tɪ ba basra Nawēnne sore la ka wa'am. La nēr-seka n wun botɪ bōn-bāma wa'am na wun yē toogo. ² Ba sān dɪke nēere kug-kāte lu yulɛ a yugla lobe ē base ko-kāte puam, n sōɪ ēŋa n wun botɪ bi-pɪka ayɪla base Nawēnne sore. ³ Guuse-ya ya mēŋa.

Fu sɔbia sān tōm be'em, fu kā'an ē. La a sān teege yem base tōon-be'ero la, fu base ē taale. ⁴ La a sān ēŋe fu be'em nōore ayopɔɔ daare ayɪla, dee leme fu zē'am nōore ayopɔɔ wa yetɪ: «Mam tōm na be'em, bɔ mam sugri», dēnɪ tɪ fu base ē taale.»

Tɪ bɔ Azezi sɪra

⁵ Tɪ Zuudāana Azezi karēnbiisi pia la ayi la yele ē yetɪ: «Botɪ tɪ bɔ fɔ sɪra zo'oge.» ⁶ Tɪ Zuudāana la yele ba yetɪ: «Ya sān bɔ mam sɪra fēe wu sɔ'ɔɔ biire la, ya tā wun yele kēnkāŋa wā tɪ a vōoge sēŋe ka sele mōgre puam ke, la a wun sake ya nōore mɛ.»

Töntōnna mase me ti a tōm a tōone

⁷ «Tē'ese-ya bise, nēra sān bōna yāma puam tara tōn-tōnna ti a kōra, bu gu'ura a dūnsi, ti tōntōnna la sān ze'ele va'am wa'am, a wun yele ē me yeti, wa'am wa di bu? ⁸ Ayel, a wun yele ē yeti: «Duge m dia, dee teege fuugo ye, tari dia la wa'am wa bō ma ti m di. M sān di dee yū ba'ase, ti fu mē yāna di dee yū.» ⁹ La zuudāana la n yele tōntōnna la ti a ēne se'em, ti a ēne la, zu-udāana la kān pu'use ē. ¹⁰ Bela mē, ya sān ēne sela woo ti Nawēnne yele ya ti ya ēne la, ya yeti: «Tōma wen de-na la tōntōnba, tōma ka nari pu'usgo, se'ere n soe la, la de la ti tōoma, la mase me ti ti tōm.» »

Azezi boti kōnkoma pia yē īmā'asum

¹¹ Azezi daan boe la sore we'esa Zerizalem dola Samaari la Galile tēnasuka, ¹² paage tēna ayula puam, ti kōnkoma pia tu'usra ē, ze'ele kēnkerna ¹³ kaasra yeti: «Zuudāana Azezi, zoe ti ninbāalga.» ¹⁴ La ēn yē ba la, ti a yele ba yeti: «Sēne-ya kāabgo kēma la zē'am ti ba ka bise ya īyā la n ān se'em.» La ban sēnni we'esa la, ti bā'asi la base ba, ti ba āna sōna. ¹⁵ La ba nēra ayula n yē ti a kōnkoma na base ē na, ti a lebra Azezi zē'am dee tōgra ke'enke'em pēgra Nawēnne, ¹⁶ sēne ka ka dūma dūke a nēna vōgle tēna Azezi nēnam pu'use ē. A daan de la Samaari nēra. ¹⁷ Ti Azezi yeti: «La dagi bāma pia n yē īmā'asum? Ti bawel la bōna la be? ¹⁸ Bēm ti ēna n de sāana la mā'a n leme wa'am ti a pu'use Nawēnne a yel-sōnne?» ¹⁹ Dee yele ē yeti: «Fōn bō mam sira la n boti fu yē fāare, isge sēne.»

Nawēnne n diti na'am se'em

(Amatie 24:23-28,37-41)

²⁰ Farisi dōma soke Azezi me ti ba bāne wakat-seka ti Nawēnne wun di na'am nēba sukam. Ti a lerge ba yeti: «Nawēnne sān wa dita na'am, la ka de sela ti nēba tā wun yē la nini. ²¹ La nēra kān yeti: «Bise-ya, a boe la kalam», bu «a boe la ke». Bāne-ya ti Nawēnne boe la ya tēnasuka dita na'am.»

²² La Azezi yele a karēnbiisi la yeti: «Wakate sēm me ti ya wun bōra ti ya yē Nērsaala Dayua la, baa la sān de-na daare ayula, la ya kān yē ē. ²³ La nēba wun yele ya yeti: «Bise-ya, a boe la ke», bu «bise-ya, a boe la kalam.» Da kān sēne-ya, da doose-ya ba. ²⁴ Se'ere n soe la, daar-seka ti Nērsaala Dayua la wun leme na, la wun āna wu saaga n ēn yāke saazuum ti la nēge zē'a wuu se'em na. ²⁵ La, lan dēne ti bōn-bāma wun ēne, dēni ti a nāmse zozo'e ti zamāan-ēna wā dōma zagse ē.

²⁶ Wakat-seka ti Nērsaala Dayua la wun leme wa'am na, la wun āna wu Anoe wakate ti la yuun ān se'em na. ²⁷ Nēba yuun diti me, dee yūura, ti buraasi dita pōgba, ti pōgsi mē ella sirba, ti la wa paage daar-seka ti Anoe kē ōorj-kāte la puam, dee ti ko'om yāna wa'am wa

pure zē'a wuu libe nēba wuu ti ba ki. ²⁸ La mē wun āna wu Aloti wakate n yuun ān se'em na. Ba yuun diti me, dee yūura, dee da'ara, dee kōksra, dee buta, dee mēta, ²⁹ ka paage daar-seka ti Aloti fōrge Sodom tēna la, dee ti bugum n diti kidibre ze'ele saazuum lui tēna ku ba wuu. ³⁰ Nērsaala Dayua la lemgo daare la mē wun di'ige ba la bela. ³¹ Daar-ēna, nēr-seka n boe gōsgo dee ti a lōgro bōna deego puam, a da sige bōra ti a ze'ele dūke ba zoe. La nēr-seka n boe a va'am, da lebe kule. ³² Tēge-ya lan yuun ēne Aloti pōga se'em na. ³³ Nēr-seka woo n boori ti a gu a vōm, a wun kōne ē, la nēr-seka n sake ti a kōne a vōm, a wun yē ē.

³⁴ Mam yeti ya ti nēba bayi sān gā sōng ayula puam yu'uhj, ba wun dūke ayula, dee base ayēma. ³⁵ La pōgsi bayi sān bōna nērum nēena, ba wun dūke ayula, dee base ayēma. ³⁶ [Buraasi bayi sān bōna va'am, ba wun dūke ayula, dee base ayēma.]»

³⁷ Ti karēnbiisi la soke Azezi yeti: «Zuudāana, bōn-ē-na wun ēne la be?» Ti a lerge yeti: «Zē'e-seka ti bōn-ki'isi boe la, zē'e-ēna ti zōa lagsri taaba.»

Pōkōore, la sarlyadita makre

18

Ti Azezi make makre pa'ale ba ti ba sōsra Nawēnne wakate wuu da base, ² yele ba yeti: «Sarlyadita n daan boe tēna ayula ka zōta Nawēnne, dee ka nanna nēba. ³ Ti pōkōore mē bōna tēna la puam sēnna a zē'am wakate wuu yeta ē ti: «Sōne ma ti m yē buuro m be zē'am.» ⁴ La pōkōore la sēne ka sose ē na nōor-faa, ti sarlyadita la ka sōne ē. La pōkōore la ēn ken sēnna sōsra ē na, sarlyadita la wa yele a put'erum me yeti: «Baa mam ka zoti Nawēnne, dee ka nanna nēba la, ⁵ pōkō-ēna n sēnni dāana mam se'em wā, mam wun isge me sōne ē. La sān dagna bela, a wun sēnna me nāmsra mam, a kān base.» »

⁶ Ti Zuudāana Azezi le yeti: «Bise-ya sarlyadita la n de nēr-be'ego la n yele se'em. ⁷ La sān dena bela, Nawēnne kān sōne nēr-seba ti a looge la n sosri ē wuntēna la yu'uhj la, bō ba buuro gānna bela? A wun yuuge me dee sōne ba bu? ⁸ Mam yeti ya me ti a wun wa sōne ba me tōtō. La Nērsaala Dayua la sān wa leme dūnia zuo, a wun yē nēba n bō ē sira me bu?»

Farisi nēra, la lampo-t'ōsa makre

⁹ Azezi le make la makre ayēma bō nēr-seba n tē'esri ti bāma de la nēr-sōma nē'esra nēba baseba la, yeti:

¹⁰ «Buraasi bayi n sēne Wēnde-kātum na ti ba ka pu'use Nawēnne, ayula de la Farisi nēra, ti ayēma dena lampo-t'ōsa. ¹¹ Ti Farisi nēra la ze saazuo pu'usra a sūurum yeti: «Nawēnne, mam pu'usri fu, mam n ka wōn na nēba baseba la n ān se'em na, n de nayigba, bu nēr-be'ero, bu nēba n tōnni yalsi, la mam n ka wōn na lampo-t'ōs-ēna wā la īyā. ¹² Dabsa ayopō woo puam, mam luti nōore la buyi, la bōn-seba wuu ti mam

yěti la, pia puam woo mam loori ayila bɔ'ɔra fɔn mɛ.»
¹³ La lampo-tɔ'ɔsa la ze'ele la kɛnkɛrɛna pɔn ka gorge a nɛŋa saazuum, dee wɛ nupu'ugɔ yeti: «Nawɛnne, zoe m ninbāalga, mam de la tɔon-be'ero dāana.» »

¹⁴ Azezi yele bela dee yeti: «Mam yeti ya mɛ ti bura-ɛ-na wā n kule la, a yelle masɛ mɛ Nawɛnne zɛ'am, dee ti Farisi nɛra la yelle ka masɛ. Se'ere n soe la, nɛr-seka woo n zɛkri a mɛŋa, Nawɛnne wun sike ɛ mɛ, la nɛr-seka n sikri a mɛŋa, Nawɛnne wun zɛkɛ ɛ.»

Ti āna wu kɔm-pɔgsɪ ti ti tā'age kɛ Nawɛnne so'olum
 (Amatie 19:13-15, Amarki 10:13-16)

¹⁵ Nɛrba baseba n daan tarɪ kɔm-pɔgsɪ wa'am Azezi zɛ'am ti a dɪkɛ a nu'usi paglɛ ba zuto. La a karɛnbiisi la n yɛ bela la, ba zɛbɛ nɛrba la mɛ. ¹⁶ Ti Azezi wi a karɛnbiisi la yele ba yeti: «Base-ya kɔma la ti ba wa'am mam zɛ'am, da gu'ura-ya ba, se'ere n soe la, Nawɛnne so'olum de la nɛr-seba n ān wu kɔma wā bɔnɔ. ¹⁷ Mam yeti ya la sɪra, ti nɛr-seka woo n ka sake ti Nawɛnne so-na ɛ wu bia la, a kān kɛ Nawɛnne so'olum puam.»

Bɔntarsa yelle

(Amatie 19:16-30, Amarki 10:17-31)

¹⁸ Zifdōma nɛrzuo ayila n daan soke Azezi yeti: «Karɛnsāama, fɔn de la nɛr-sɔŋɔ, mam wun ɛŋɛ la wāne yɛ wɔm n ka ba'asɪ?» ¹⁹ Ti Azezi yele ɛ yeti: «Bɛm ti fɔn wi mam ti nɛr-sɔŋɔ? Nɛra ka boe n ān sɔŋa, sān dagna Nawɛnne mā'a. ²⁰ Fɔn mi Nawɛnne n bɔ nɔore ti ba ita se'em na: «Da gā'arɛ la fu tadāana pɔga, da ku nɛra, da zū, da tɔge pɔmpɔrɔŋ kaseto, nanna fu sɔ la fu ma.» ²¹ Ti a lerge yeti: «Halɪ mam bɔnbɪ'ulum ti mam pɔn sakra bɔn-bāma wuu.» ²² Azezi n wɔm ɛn yele bela la, ti a yele ɛ yeti: «Sela ayila n deege dɛna fu ɛŋɛ: Koose fɔn tarɪ sela la wuu dɪkɛ ligri la pui nasdōma, ti fu wun yɛ bɔntarsɔm Nawɛnne yire, dee wa'am wa dɔla mam.» ²³ La buraa la n wɔm bela la, ti a sūure ba sā'am, se'ere n soe la, a daan ba dɛna la bɔntarsa.

²⁴ Azezi n yɛ ti a sūure sā'am bela la, ti a yeti: «La tɔ mɛ bɔ bɔntatba ti ba kɛ Nawɛnne so'olum puam. ²⁵ La de la nāana ti yugne doose fupɪim yoko puam yese, gānna bɔntarsa n wun kɛ Nawɛnne so'olum puam.» ²⁶ Ti seba n wɔm bela la yele yeti: «La sān dɛna bela, āne n wun tā'age yɛ fāare?» ²⁷ Ti a yele ba yeti: «Bɔn-seka ti nɛrsaalba ka tā wun ɛŋɛ la, Nawɛnne tā wun ɛŋɛ mɛ.»

²⁸ Ti Apyɛɛɪ yele ɛ yeti: «Tōma base tōma n tarɪ sela mɛ dee dɔla fɔn.» ²⁹ Ti Azezi yele ba yeti: «Mam yeti ya la sɪra, ti nɛr-seka n base a yire, bu a pɔga, bu a sɔbiisi, bu a sɔ la a ma, bu a kɔma, Nawɛnne so'olum na iŷā, ³⁰ a wun to'oge zo'oge gānna ɛn base sela la dūnia wā zuo, dee wun yɛ wɔm n ka ba'asɪ wakat-seka n sɛm na.»

Azezi le tɔge a kūm, la a vo'ore yelle

(Amatie 20:17-19, Amarki 10:32-34)

³¹ Azezi daan tarɪ a karɛnbiisi pia la ayi la mɛ yese kɛnkɛrɛna, ka yele ba yeti: «Ya yɛ ya, ti we'esɪ la Zeriza-lɛm, la bɔn-seba wuu ti Nawɛnne nɔtɔ'ɔsrɪba yuun gul-se Nawɛnne gɔŋɔ puam Nɛrsaala Dayua la yelle la, wun sɪrɪ ɛŋɛ mɛ. ³² Ba wun yɔkɛ ɛ mɛ ka ɛŋɛ bu-zāŋsɪ nu'usum, ti ba la ɛ, yaale ɛ, tubse nɔtɔorum mɪ ɛ, ³³ wɛ ɛ na ka'asa, dee ku ɛ. La dabsa atā daare a wun vo'oge.» ³⁴ La ba ka bāŋɛ ɛn yele se'em na vɔore baa fɛɛ, yetɔga la daan sugɛ mɛ, ti ba ka tā'age bāŋɛ yetɔga la vɔore n boori ti la yele se'em.

Azezi boti fua yēta

(Amatie 20:29-34, Amarki 10:46-52)

³⁵ Azezi daan we'esɪ ka lɛm na Zeriko, ti fua zɛa sore kɛnkɛrɛna sɔsra, ³⁶ wɔm nɛr-kuuŋɔ la n tollɪ la dāmne, soke yeti: «Bɛm ɛŋɛ?» ³⁷ Ti ba yele ɛ yeti: «Azezi n de Nazaretɪ nɛra la n tollɪ.» ³⁸ Ti a tɪi tɔgra yeti: «Adavidi yuŋa Azezi, zoe m ninbāalga.» ³⁹ Ti nɛr-seba n boe a nɛŋam na tāse ɛ yeti a sɪna. Ti a malɪn tɪi tɔge yeti: «Adavidi yuŋa, zoe m ninbāalga.» ⁴⁰ Ti Azezi ze'ele, yeti ba tarɪ ɛ wa'am. La ɛn lɛm Azezi la, ti Azezi soke ɛ yeti: ⁴¹ «Fɔn boori ti m ɛŋɛ la bɛm bɔ fɔ?» Ti a lerge ɛ yeti: «Zuudāana, mam boori ti m le yēta mɛ.» ⁴² Ti Azezi yele ɛ yeti: «Le yēta, fɔn bɔ mam sɪra la iŷā n boti fu yɛ laafe.» ⁴³ Bilam mɛŋa ti a le yēta dɔla Azezi pɛgra Nawɛnne. Ti nɛrba la wuu n yɛ bela la, mɛ nā'asra Nawɛnne.

Azezi la Azase yelle

19 Azezi daan dɔlɪ la Zeriko tɛŋa puam tɔlla, ² ti buraa bɔna mɪ ti a yu'ure dɛna Azase. A de la lampo-tɔ'ɔsrɪba naba, dee dɛna bɔntarsa. ³ A daan boori ti a bāŋɛ la Azezi n de nɛr-seka. A de la nɛr-gulga, la nɛrba la n zo'oge la iŷā, a ka tā wun yɛ Azezi. ⁴ Ti a zoe tole nɛŋam sɛŋɛ Azezi n we zɛ'am bɔba la ka zom kɛnkāŋa ti a bɪsɛ Azezi. ⁵ Ti Azezi sɛŋɛ ka paage zɛ'e-ɛŋa, gorge bɪsɛ kɛnkāŋa la zuo yɛ ɛ, yele ɛ yeti: «Azase, sigɛ tɔtɔ, se'ere n soe la, dɛnɪ ti mam gā'arɛ fɔn yire zɪna.» ⁶ Ti Azase sigɛ tɔtɔ, to'oge ɛ sɛŋɛ a yire la sū-yɛlga.

⁷ La nɛrba la n yɛ bela la, ba wuu yɔnnɪ mɛ yeti: «A sɛŋɛ ka kɛ ti a bɔna la tɔon-be'ero dāana la yire.» ⁸ Ti Azase zɛ Azezi nɛŋam, yele ɛ yeti: «M Zuudāana, mam wun dɪkɛ m bɔntarsɔm pusuka pui bɔ nasdōma. La mam sān pā'asɛ nɛrba to'oge ba sela, mam wun lebse bɔ ba nɔor-anaasɪ.» ⁹ Ti Azezi yele ɛ yeti: «Zɪna yi-ɛna dōma yɛ fāare, se'ere n soe la, ɛna mɛ sɪrɪ de la Abraham yuŋa. ¹⁰ Nɛrsaala Dayua la wa'am dūnia zuo ti a ɛ la nɛr-seba n bɔl la, fāage ba.»

Nabia, la a tōntōnɩba makre

(Amatie 25:14-30)

¹¹ Nērba la n daan selsrɩ Azezi yetɔga la, tɩ a make makre bɔ ba, se'ere n soe la, a daan lem na Zerizalem, tɩ nērba la tē'esra tɩ wakat-ēja tɩ ba wun yē tɩ Nawēnne diti na'am ba tējasuka. ¹² Bela tɩ a make bɔ ba yetu: «Nabia n yuun yetu a sēje tēja n zāage ka di na'am leme wa'am. ¹³ Ēn yuun yetu a sēje la, a wi la a tōntōnɩba pia bɔ ba sālma lag-kōbre ayɩla ayɩla, yele ba yetu: «Dike-ya ligri la lēebra, tɩ m sēje dee leme wa'am.» ¹⁴ La a so'olum na nērba nifo kē ē mē, tɩ ēn fōrge la, tɩ ba tōm tōntōnɩba tɩ ba babse ē ka yetu, bāma ka boori tɩ a dena bāma naba.

¹⁵ La baa la bela a di na'am na mē, lebe kule ka base tɩ ba wi tōntōn-seba tɩ a daan bɔ ba ligri la, tɩ ba wa'am tɩ a soke ba bāje, nēra woo n leebe yē yōorɔ se'em.

¹⁶ Tɩ pɔspɔst dāana la yele ē yetu: «M zuudāana, mam dike fu sālma lag-kōbre la leebe yē la yōorɔ sālma lig-kōba pia pa'ase.» ¹⁷ Tɩ a yele ē yetu: «Fu ēje sōja, fu de la tōntōn-sōja! Fōn ēje sira la bōnɔ fēe la ĩyā, fu wun sɔna tēnsɩ pia bɩsra.» ¹⁸ Tɩ buyi dāana la mē wa'am wa yele ē yetu: «M zuudāana, mam dike fu sālma lagfɔ la leebe yē la yōorɔ sālma lig-kōba banuu pa'ase.» ¹⁹ Tɩ a yele ē mē yetu: «Fōn wun sɔna tēnsɩ banuu bɩsra.» ²⁰ Tɩ ayēma mē wa'am wa yetu: «M zuudāana, fu lagfɔ la n wāna, mam vile ē na tānne suge, ²¹ mam zoti fōn mē, se'ere n soe la, fōn de la nēra yelle n tɩ. Fōn to'ori la bōn-seba tɩ fu mēja ka tōm na yōorɔ, dee lagsra bōnkɔɔl-seba tɩ fōn ka bure.» ²² Tɩ a yele ē yetu: «Fu de la tōntōn-be'ego, mam wun dike la fu nōore yetɔga la di fu sarɩya. Fōn mi tɩ mam de la nēra yelle n tɩ, tɔ'ora bōn-seba tɩ mam ka tōm na yōorɔ, dee lagsra bōnkɔɔl-seba tɩ mam ka bure la, ²³ bēm ĩyā tɩ fu ka tarɩ m ligri la ka bīje bānkɩ puam, tɩ m sāl leme wa'am tɩ m to'oge m ligri la, la yōorɔ?» ²⁴ Dee yele seba n boe bilam na yetu: «To'oge-ya lagfɔ la bɔ seka n tarɩ ligri pia la.» ²⁵ Tɩ ba yele ē yetu: «Zuudāana, a pōn tarɩ la ligri pia.» ²⁶ Tɩ a lerge ba yetu: «Mam yetu ya tɩ seka woo n tarɩ, a wun to'oge pa'ase. La seka woo n ka tarɩ, a wun kōje sēla fēe tɩ a tarɩ la. ²⁷ La sāl dena mam be'eba la n ka boori tɩ mam di na'am na, tarɩ-ya ba wa'am wa ku ba mam nējam.» »

Azezi kē'erɩ Zerizalem la na'am

(Amatie 21:1-11, Amarkɩ 11:1-11, Azā 12:12-19)

²⁸ La Azezi n daan tɔge bela ba'ase la, a tole la nērba la nēja tɩ ba we'esa Zerizalem. ²⁹ La ēn daan sēje ka lem Betɩfaazɩ, la Betani n boe Oliivi tāja zē'am na, a tōm na a karēnsāandi bayi ³⁰ yetu: «Sēje-ya tēn-seka n boe nēja la puam. Ya sāl paage mī, ya wun yē bōn-biire tɩ ba lu ze'ele, tɩ nēra nēra nān ka bā ē. Ya lorge ē

tarɩ wa'am. ³¹ La nēra sāl soke ya yetu: «Wāne tɩ ya lɔrgra ē?», ya lerge yetu: «Zuudāana la n boori ē.» »

³² La ēja n tōm seba la sēje ka paage, yē sēla woo wu ēn yele ba se'em na. ³³ Tɩ ba lorge bōn-biire la, tɩ bōja la dōma soke ba yetu: «Bēm tɩ ya lɔrgra bōja la?»

³⁴ Tɩ ba lerge ba yetu: «Zuudāana la n boori ē.» ³⁵ Tɩ ba tarɩ bōja la sēje Azezi zē'am, ka dike ba futo pagle a zuo, tɩ Azezi bā. ³⁶ La ēn daan we la, nērba la yerge la ba futo sore la zuo. ³⁷ Ēn daan lem Zerizalem na, a doli la Oliivi tāja sore la sigra, tɩ nēr-kuuɔ la wuu n de a karēnsāandi la ita sū-yēlga zēke ba kōosi pēgra Nawēnne ke'enke'em, a tōon-yālma tɩ ba yē la ĩyā, ³⁸ yeta tɩ:

«Pēge-ya na-seka n sēm na

Zuudāana Nawēnne yu'ure la.

Sū-mā'asum boe la Nawēnne yire,

nā'ase-ya Nawēnne n boe saazuum.»

³⁹ La Farisi dōma baseba n boe nērba la puam yele Azezi yetu: «Karēnsāama, tāse fu karēnsāandi la tɩ ba sīna.» ⁴⁰ Tɩ a lerge ba yetu: «Mam yetu ya mē tɩ ba sāl sīna, kuga wun kaase tagurga.»

Azezi kellɩ Zerizalem nērba ĩyā

⁴¹ Azezi n daan lem Zerizalem yē tēja la, a kellɩ mē tēja la nērba ĩyā, ⁴² yetu: «Ya sāl mi ni zīna wā bōn-seka n wun bɔ ya sū-mā'asum, la wun ān nɩ sōja! La, la suge mē, tɩ ya nini ka yēta ē. ⁴³ La wakate sēm mē, tɩ ya be'eba wun wa'am wa mē lalga gilge ya tēja wā wuu gu, tɩ ya nērba kān tā'age yese. ⁴⁴ Ba wun sā'am tēja la wuu mē, dee ku yāma seba wuu n boe a puam na. Ba wun sā'am ē saam saam mē, tɩ kugre kān weege a tadāana zuo. Bōn-bāna n wun ēje la, de la yan ka bāje wakat-seka tɩ Nawēnne wa'am tɩ a fāage ya la ĩyā.»

Azezi dige leebdōma Wēnde-kātum na

(Amatie 21:12-17, Amarkɩ 11:15-19, Azā 2:13-22)

⁴⁵ Azezi n tɔge bela ba'ase la, a kē la Wēnde-kāte la zēnzakam digra seba n koosrɩ la tɩ ba yesra, ⁴⁶ dee yele ba yetu: «La gulse Nawēnne gōja puam tɩ Nawēnne yetu: «Mam deego wā wun dena la pu'usgo deego.» La yāma dike ē ēje la nayigba lagsgo zē'a.»

⁴⁷ La daare woo a boe la Wēnde-kātum na zāsna nērba Nawēnne yetɔga. Tɩ kāabgo kēma nējadōma, la lɔɔ karēnsāandōma, la tēja la nērzo to daan eera sore tɩ ba ku ē. ⁴⁸ La ba ka mi ba wun ēje se'em, se'ere n soe la, nērba la wuu daan ān na selɩ selsra a yetɔga la.

Āne n bɔ Azezi nōore tɩ a tōnna?

(Amatie 21:23-27, Amarkɩ 11:27-33)

20 Daare ayɩla Azezi boe la Wēnde-kātum na zāsna nērba, dee mōola kō-yēlga la bɔ'ora ba. Tɩ kāabgo kēma nējadōma, la lɔɔ karēnsāandōma, la tēja la kēma ² wa'am wa yele ē yetu: «Yele to, fōn yē nōore la be ita bōn-bāna, bu āne n bɔ fōn nōore tɩ fōn

ita?»³ Tl a lerge ba yetl: «Mam mẽ wun soke ya sokre ayila tl ya lerge ma: ⁴ Azã n daan misri nërba ko'om puam na, la de la Nawënne n tõm ã bu, la de la nër-saalba?»⁵ Tl ba bãm na taaba yetl: «Tl sãn yetl la de la Nawënne n tõm ã, a wun yetl, bëm iyã tl tõma ka sake ã?»⁶ La tl sãn yetl la de la nër-saalba, nërba la wuu wun lobe tl la kuga ku, se'ere n soe la, nërba la sake tl Azã daan de la Nawënne nõt'w'sa.»⁷ Tl ba konje lerge ã yetl: «Tõma ka mi seka n tõm ã.»⁸ Tl Azezi yele ba yetl: «Bela, mam mẽ kãn yele ya mam n yẽ nõore la zẽ'e-se-ka ita bõn-bãna wã.»

Nërba n bısrl va'am makre

(Amatie 21:33-46, Amarkl 12:1-12)

⁹ Tl Azezi make makre ãna bõ nërba la yetl: «Buraaga n daan ko a va'am sele tıslı yu'ure n de viinye, dıke va'am na bõ nërba tl ba bısa, dee sêñe tēja n zãage ka yuuge.

¹⁰ Tl viinye la biẽ go'osgo wakate paage, tl a tõm a tõntõnna tl a sêñe seba n bıslı va'am na zẽ'am ka to'oge a pure wa'am wa bõ ã. Tl seba n bıslı va'am na wẽ ã, dee botl a lebe kule zãña. ¹¹ Tl a le tõm a tõntõnna ayila ba zẽ'am, tl ba wẽ ã, dee yaale ã, botl a mẽ lebe kule zãña. ¹² Tl a le maln tõm ayila butã puam, tl ba wẽ ã pıglum, dee dige ã va'am na puam. ¹³ Tl va'am na dãana la tẽ'ese yetl: «Mam wun êñe la wãne? M yãña wun tõm na m mẽña bi-nõñre, tã tl ba wun nã'ase êña.» ¹⁴ La seba n bıslı va'am na n yẽ va'am na dãana mẽña dayua la, tl ba bãm na taaba yetl: «Ëna n wun wa sãoge sãna a sã bõntarsõm na, base-ya tl tl ku ã tl bõntarsõm na lebge tõma bõñ.» ¹⁵ Tl ba yõke ã ve'ege yese va'am na kẽnkerña ka ku ã.

Bela, va'am na dãana yãña wun êñe nër-bãna la wãne? ¹⁶ A wun wa'am wa ku nërba la me, dee to'oge va'am na bõ nërba baseba tl ba bısa.»

La nërba la n wõm bela la, ba yetl: «La kãn êñe bela baa fẽfẽe.» ¹⁷ Tl Azezi bısa ba, dee yetl: «La bela võore de la bëm tl ba gulse Nawënne gõñ puam yetl:

«Kug-seka tl tõnmõtba zagse la, lebge la kugre n botl deego la tara pãña?»

¹⁸ La nër-seka n lui kug-êña zuo, a wun ko ko me, la kugre la sãn lui nër-seka zuo, a wun mẽrgẽ ã me.»

¹⁹ Tl lã karẽnsãandõma, la kãabgo kẽma nẽñadõma la ẽera sore wakat-êña tl ba yõke ã, se'ere n soe la, ba bãnje me tl la de la bãma iyã tl a make makre la. La ba zotl la nërba la.

Lampo yua yelle

(Amatie 22:15-22, Amarkl 12:13-17)

²⁰ Tl lã karẽnsãandõma, la kãabgo kẽma nẽñadõma la pigra Azezi. Bela tl ba tõm nërba n ãn wu ba de la nër-sõma la tl ba sêñe ka bẽre Azezi la yetoga, tl a sãn toge tuuge, tl ba yẽ sore yõke ã sêñe ka êñe gõmna n

soe nõore nu'usum. ²¹ Tl nërba la sêñe ka soke Azezi yetl: «Karẽnsãama, tõma mi tl fõn togrı se'em na, la fõn zãsnı se'em na mase me, la fõn ka tũ'usri nërba, dee zãsna nërba Nawënne sore yela sira sira. ²² Bela, lã la bõ sore tl tl yõ lampo bõ Rom na-keko bu, a ka bõ sore?»

²³ Tl a bãnje ba yemkẽgsıga la, yele ba yetl: ²⁴ «Tarl-ya lagfı ayila wa'am.» Tl ba tarl wa'am. Tl a soke ba yetl: «Ãne yinyisña, la ãne yu'ure n gulse a zuo?» Tl ba lerge yetl: «La de la Rom na-keko la.» ²⁵ Tl Azezi yele ba yetl: «Bõ-ya na-keko la êña n soe bõn-seka, dee mẽ bõ Nawënne êña n soe bõn-seka.»

²⁶ Azezi n daan toge se'em nërba la nẽñam na, ba ka tã'age yõke ã, a lergre la di'ige ba me, tl ba sına.

Kũm vo'ore yelle

(Amatie 22:23-33, Amarkl 12:18-27)

²⁷ Saduse dõma n daan yetl nẽra sãn ki a kãn vo'oge la, bãma nërba baseba n wa'am Azezi zẽ'am wa ²⁸ soke ã yetl: «Karẽnsãama, Amoyisi yuun gulse yetl: «Seka sãbia sãn tara poga, ki dee tl a ka tara bia, a di a pãkõore la dõge koma bõ seka n ki la.» ²⁹ La buraası bayopı n daan boe dena sãbiisi, tl pãspãsl dãana la di poga tl a ka dõge, dee tl a ki, ³⁰ tl buyi dãana la mẽ di pãkõore la ki, dee tl a ka dõge. ³¹ Tl butã dãana la mẽ êñe bela. La bãma bayopı la wuu lagum di pãkõore la me ki, tl ba nẽra nẽra ka dõge bia. ³² Bela poorum tl poka la mẽ ki. ³³ Bela, bãma bayopı la wuu n di poka la, ba sãn wa vo'oge kũm vo'ore daare, ãne n wun sãna poka la?»

³⁴ Tl Azezi lerge ba yetl: «Dũni-ẽna nërba diti pãgsı me dee ulla sırba, ³⁵ la nër-seba tl Nawënne bıse tl ba mase tl ba vo'oge kẽ dũnia seka n sëm puam na ka diti pãgba, la ba ka elli sırba. ³⁶ La ba ka tã wun le ki, se'ere n soe la, ba ãn wu malekadõma la. Ba de la Nawënne koma, ban vo'oge dee base kũm na iyã. ³⁷ La Amoyisi yuun põn pa'ale tl nër-seba n ki la wun vo'oge me, zẽ'e-seka n togrı tũntuugo n diti bugum yelle la, Amoyisi yetl Zuudãana Nawënne n de Abraham, la A'izakı, la Azakıbı Nawënne. ³⁸ Bela pa'ale tl bãma vãa me, se'ere n soe la, Zuudãana Nawënne dagı seba n ki Nawënne, a de la nër-seba n vãa Nawënne. Nawënne zẽ'am nërba la wuu vãa me, baa la seba n ki la.»

³⁹ Tl lã karẽnsãandõma baseba lerge ã yetl: «Karẽnsãama, fu toge sõña.» ⁴⁰ La ba daan ka le saage soke ã sela sela.

Krisi de la naba Adavidi Zuudãana

(Amatie 22:41-46, Amarkl 12:35-37)

⁴¹ Tl Azezi yele ba yetl: «Wãne tl ba yetl Krisi de la Adavidi yuñña? ⁴² Dee tl Adavidi yuun põn dẽñe yele yõoma gõñ puam yetl: «Zuudãana Nawënne yele

mam Zuudāana yeti,
 zī'ire m zuugo boba,
⁴³ halu ti m ēṅe fu be'eba la
 ti ba bōna fu nāma tēṅa.»
⁴⁴ La Adavidi mēṅa sǎn wi ē yeti «Zuudāana», la wun
 ēṅe la wāne ti a dena Adavidi yuṅa?»

Azezi yele a karēnbiisi ti ba guuse da āna wu bō karēn- sāandōma

(Amatie 23:1-36, Amarku 12:38-40)

⁴⁵ La nēba la wuu n selsu Azezi la, ti a yele a karēn-
 biisi la yeti: ⁴⁶ «Guuse ya mēṅa la bō karēnsāandōma n
 eeru gilgra la fu-wogro, bōra ti nēba pu'usra nā'asra
 ba da'asum, dee bōra nā'asgo zē'esi wēndeto puam,
 la dia zē'esum ti ba zēa la. ⁴⁷ Ba to'osru la sela wuu ti
 pōkōpa taru, dee pu'usra Nawēnne pu'us-wogro ti nē-
 ba bōra ba. Ba wun yē subgre gānna wuu.»

Pōkōre bō'a yelle

(Amarku 12:41-44)

21 Azezi daan boe la Wēnde-kātum na, bise yē
 bōntatba n taru ba bō'a ita ligri daka puam, ² dee
 yē pōkōre n de nasa n ēṅe lig-kōb-pūgsu bayi mā'a. ³ Ti
 Azezi yeti: «Mam yeti ya la sira, ti pōkōre ēna n de
 nasa la ēṅe zo'oge gānna ba wuu mē. ⁴ Bāma wuu
 looge la bōntarsōm seba ti ba taru zo'oge la puam
 wa'am wa ēṅe mī. La ēṅa n de nasa la, dīke la a dia ligri
 wuu wa ēṅe mī.»

Dūnia ba'asgo nāmsgo, la Zerizalem sā'ango yelle

(Amatie 24:1-28, Amarku 13:1-23)

⁵ La nēba baseba n daan tōge Wēnde-kāte la yelle
 yeti, ba dīke la kug-sōma mē ē, dee dīke bō'a ti ba bō
 Nawēnne malge ē, ti a āna sōṅa sōṅa. ⁶ Ti Azezi yele
 ba yeti: «Wakate sēm mē ti ba wun lobe bōn-seba ti ya
 yēti wā wuu saam saam, ti kugre baa ayula kǎn weege
 a tadāana zuo.»

⁷ Ti ba soke ē yeti: «Karēnsāama, bōn-bāna wun ēṅe
 la dabure? La bēm wun pa'ale tōma ti ti bāṅe ti bōn-
 bāna wun ēṅe?» ⁸ Ti Azezi lerge ba yeti: «Guuse-ya ti
 nēra da pā'ase ya ti ya tuuge. Nēba zozo'e n wun dīke
 mam yu'ure wa'am wa pā'asra ya, ti ba nēra woo yeti:
 «Mam n de Krisi», bu ba wun yeti: «Wakate lem mē.» Da
 doose-ya nēr-bāma. ⁹ La ya sǎn wōm zebre, la tēn-
 dāmṅo yela, da base-ya ti dabeem yōke ya, dēni ti bōn-
 bāma dēṅe ēṅe, la, la nǎn ka de dūnia ba'asgo.»

¹⁰ Dee yele ba yeti: «Buuri ayula wun isge zebra la bu-
 uri ayēma, ti so'olum ayula dōma isge zebra la so'olum
 ayēma, ¹¹ la tēṅa wun tī mīim mē, la kōm, la bā'a-
 loṅṅu n wun wa'am zē'esi zozo'e, la yel-kāra n kē'esru
 nēba dabeem, la bōn-yālma n wun ēṅe saazuum.

¹² La, lan dēṅe bōn-bāna wā n wun ēṅe, ba wun yōge
 ya mē, nāmse ya, taru ya sēṅe ka sām ba wēndetum

sariyaditba zē'am, ti ba yu ya, la ba wun botu ya ze'ele
 na'adōma, la gōmnadōma nēṅam mam yu'ure iya. ¹³ La
 wun doose la bela ti ya yē folle tōge mam yelle pa'ale
 ba. ¹⁴ Bela, ēṅe ya sūurum ti la dagi ya fabla yan wun
 lerge se'em po'oge ya mēṅa. ¹⁵ Mam mēṅa wun bō ya
 yem ti ya tōge ti ya be'eba kǎn yāṅe lerge su'ise ya yeto-
 ga. ¹⁶ Baa la ya sōdōma, la ya madōma, la ya sōbiisi, la
 ya sūdōma wun yōge ya sēṅe ka bō, ti ba ku ya nēba
 baseba. ¹⁷ Nēba wuu wun sise ya mam iya. ¹⁸ La ya
 zomto baa ayula kǎn bō. ¹⁹ Ya sǎn ze'ele kǎṅkǎṅe, ya
 wun yē wōm Nawēnne zē'am.

²⁰ Ya sǎn wa yē ti sudaasu gilgri Zerizalem, ya bāṅe ti
 a sā'ango lem mē. ²¹ Bela, nēr-seba n boe Zude tēṅa zoe
 zom tānsi zuto, ti nēr-seba n boe Zerizalem puam na
 yese zoe, la seba n boe vatum na da kē tēṅa puam.
²² Dabsa bāma de la tōon-be'ero subgre dabsa ti bōn-
 seba wuu n gulse Nawēnne gōṅo puam na wun ēṅe.
²³ Wakat-ēṅa, la wun dena la toogo bō pōg-seba n taru
 pua, la seba n taru bileesi ti ba mōgra la. Se'ere n soe
 la, nāmsgo kǎte n wun wa'am tēṅa wā puam, la
 Nawēnne sūure wun yīge mē la tēṅa wā nēba. ²⁴ Ba
 wun ku baseba mē la sukōro, la ba wun yōge baseba
 mē taru sēṅe bu-zāṅsu tēnsu ka ēṅe yamsi. Bu-zāṅsu
 wun sā'am Zerizalem mē, halu ti ba wakate wun wa
 ba'ase.»

Azezi n de Nērsaala Dayua la lemṅo

(Amatie 24:29-35,42-44, Amarku 13:24-31)

²⁵ «Bōn-yālma n wun ēṅe wēntulle, la wōrga, la wōr-
 bie puam. La dūnia nēba buuri wuu wun fabla mē ze
 yeti, ko-kāte ko-mī'isi n wun tī wē'era ita voole la iya.
²⁶ La nēba wun tē'esra la bōn-seka n wun ēṅe dūnia
 wuu zuo la, ti dabeem wun botu ba palēṅa ēke ti ba
 yem bō, se'ere n soe la, bōn-seba n boe saazuum wun
 mīim mē. ²⁷ Wakat-ēṅa ba wun yē ti Nērsaala Dayua la
 boe wara puam sēna la pǎn-kāte, ti a na'am pāṅa
 peelem nēge. ²⁸ La ya sǎn yē ti bōn-bāna pōse ita,
 gorge-ya bise saazuum, ti ya fāare lem mē.»

²⁹ Azezi make la makre bō ba yeti: «Bise-ya kēnkāṅa,
 la tūsi wuu. ³⁰ Ya sǎn yē ti ba vōoro pusra, ya mēṅa mi
 ti sigre lem mē. ³¹ Bela mē, ya sǎn yē ti bōn-bāna ita,
 ya bāṅe ti wakate lem mē ti Nawēnne wun di na'am
 nēba tēṅasuka. ³² Mam yeti ya la sira, ti bōn-bāna
 wun ita mē dee ti zamāan-ēna yāṅa tole. ³³ Saazuum la
 tēṅa wun tole mē, la mam yetoga la kǎn malun tole.

³⁴ Guuse ya mēṅa ti ya yem da yōra la di tige, la dā-
 yūure, la dūni-ēna wōm yela, ti Nērsaala Dayua la
 lemṅo daare da wa di'ige ya ³⁵ wu bērgo la. Se'ere n
 soe la, daare ēṅa wun wa di'ige nēba wuu n boe tēn-
 gōṅo wā zuo mē. ³⁶ Bela, da gīsra-ya, pu'usra-ya
 Nawēnne wakate wuu, ti ya wun yē pāṅa tā'age pōse
 bōn-seba wuu n wun wa ēṅe la, dee tā'age ze'ele Nēr-
 saala Dayua la nēṅam.»

³⁷ Azezi daan ěn zāsna la nērba Wēnde-kātum na wuntɛɛŋa, tɪ yu'ɔŋɔ tɪ a ěn yese tēŋa la puam sēŋe ka gā'are Oliivi tāŋa la zuo. ³⁸ La nērba wuu lagsɪ la a zē'am Wēnde-kātum na bulika yu'ɔŋɔ yu'ɔŋɔ selsra a yetɔga.

Azudaasɪ boorɪ tɪ a botɪ Zɪfdōma nēŋadōma yōke Azezi
(Amatie 26:1-5,14-16, Amarkɪ 14:1-2, Amarkɪ 14:10-11, Azā 11:45-53)

22 Borborɪ n ka tarɪ dābulɛ kibsa yu'ɔre n de Zɔɔg-base la daan dee la fēe la a paage. ² Tɪ kāabgɔ kēma nēŋadōma, la ɔɔ karēnsāandōma la ɛera bāma n wun ēŋe se'em ku Azezi, dee zɔta nērba la dabeem.

³ Tɪ Asūtāana kē Azudaasɪ tɪ ba wi'iri Iskariyo n de Azezi karēnbiisi pia la ayi la nēra ayɪla sūurum. ⁴ Tɪ a sēŋe kāabgɔ kēma nēŋadōma, la Wēnde-kāte la gu'ur-ba nēŋadōma zē'am, ka yele ba ēŋa n wun ēŋe se'em botɪ ba yōke Azezi. ⁵ Tɪ ba sūure ēŋe yelum, tɪ ba yetɪ bāma wun bɔ ē ligri, ⁶ tɪ Azudaasɪ sake, ɛera sore tɪ a botɪ ba yōke Azezi tɪ nēr-kuɔŋɔ la da bāŋe.

Azezi diti Zɔɔg-base kibsa la a karēnbiisi
(Amatie 26:17-30, Amarkɪ 14:12-26, Azā 13:21-30, 1 Korēntɪ 11:23-25)

⁷ Borborɪ n ka tarɪ dābulɛ kibsa la daare tɪ ba kuurɪ pebilsɪ dita Zɔɔg-base kibsa la n daan paage. ⁸ Tɪ Azezi tōm Apɪyɛɛɪ la Azā yetɪ: «Sēŋe-ya ka māasum kibsa la dia tɪ tɪ wa'am wa di.» ⁹ Tɪ ba soke ē yetɪ: «Bɛ tɪ tɪ wun sēŋe ka māasum?» ¹⁰ Tɪ Azezi yele ba yetɪ: «Selse-ya, ya sān ka kē'era tēŋa la puam, ya wun tu'ɔse buraaga n tu yooɛ la ko'om, ya doose ē kē yi-seka tɪ a wun kē la puam. ¹¹ La ya sān kē, ya yele yidāana la yetɪ: «Karēnsāama la yetɪ, de-seka tɪ ēŋa la a karēnbiisi la wun di Zɔɔg-base kibsa la boe la bɛ?» ¹² A wun pa'ale ya de-kāte n boe ayēma zuo, tɪ ɔɔgrɔ wuu bɔna mɪ. Māasum-ya bilam gu'ura to.» ¹³ Tɪ ba sēŋe ka yē sela woo wu Azezi n yele ba se'em na, tɪ ba māasum Zɔɔg-base kibsa la.

¹⁴ Tɪ wakate la paage, tɪ Azezi zɪ'ire la a karēnbiisi pia la ayi la tɪ ba di. ¹⁵ Tɪ a yele ba yetɪ: «Mam ba bɔɔra me la m sūure wuu tɪ mam na yāma di Zɔɔg-base kibs-ēna wā dee tɪ m yāŋa nāmsɛ. ¹⁶ La mam yetɪ ya mɛ tɪ, mam kān le di Zɔɔg-base kibsa halɪ tɪ a vōore wa ēŋe ba'ase Nawēnne so'olum puam.» ¹⁷ Dee dɪke bōn-yūula pu'ɔse Nawēnne, dee yetɪ: «To'oge-ya bāna wā puɪ taaba yū. ¹⁸ La mam yetɪ ya mɛ tɪ lɛɛɛ wā kɔ'ɔn wɛ'esa wuu, mam kān le yū viinye biɛ bōn-yūula wā halɪ ka paage wakat-seka tɪ Nawēnne wun wa'am wa dita na'am nērba tēŋasuka.» ¹⁹ Dee dɪke borborɪ pu'ɔse Nawēnne, dee fi-ise bɔ ba yetɪ: «Ēna de la mam iŷā tɪ mam dɪke bɔ yāma iŷā. lta-ya wāna tēra mam yelle.» ²⁰ La ban di ki'ɪlɪm na, a dɪke la bōn-yūula yetɪ: «Bōn-yūul-bāna pa'alɪ tɪ Nawēnne bɪŋe la nōor-paalga, mam zum n wun yese saage bɔ yāma la iŷā. ²¹ La bɪse-ya, seka n yetɪ a botɪ ba yōke mam na lagum na mam kalam dita. ²² Nērsaala Dayua la wun ki wu Nawēnne n boorɪ tɪ la

ēŋe se'em na. La nēr-seka n wun botɪ ba yōke ē na wun yē toogo.» ²³ Tɪ karēnbiisi la sɔkra taaba tɪ ba bāŋe nēr-seka n de ē bāma puam n yetɪ a ēŋe bela.

Āne n gānnɪ?

²⁴ Karēnbiisi la daan wē'eri la nōke'ene bɔɔra tɪ ba bāŋe bāma puam nēr-seka n mase tɪ a dɛna nēr-keko gānna. ²⁵ Tɪ Azezi yele ba yetɪ: «Dūni-ēna na'adōma soe nērba la pāŋa, la seba n tarɪ ke'engo la botɪ nērba wi'ira ba tɪ: «Sōm-ɪtba». ²⁶ La yāma puam, la kān dɛna bela. Seka n de nēr-keko yāma puam, a āna wu bōn-pɪ-ka la, la seka n de nēŋadāana āna wu tōntōnna. ²⁷ La āne n de nēr-keko gānna, seka n zɪ dita la bu, seka n tōnnɪ bɔ'ɔra ē na? La dagɪ seka n zɪ dita la? La mam boe ya puam wu tōntōnna la.

²⁸ Yāma de la nērba n mōrgɛ weege bɔna la mam, yel-seba n paage mam na puam. ²⁹ Bela mam wun bɔ ya so'olum, wu mam Sɔ Nawēnne n bɔ mam so'olum se'em na, ³⁰ tɪ ya wun wa zɪ'ire mam so'olum puam dita dee yūura la mam, dee zɪ'ire na'am bɪmbɪna zuto di ls-rayelɪ dōma buuri pia la ayi la sarɪya.»

Azezi yetɪ Apɪyɛɛɪ wun sɪ'ɪse ēŋa
(Amatie 26:31-35, Amarkɪ 14:27-31, Azā 13:36-38)

³¹ La Azezi yele Asimō-pɪyɛɛɪ yetɪ: «Asimō, Asimō, bāŋe tɪ Asūtāana sose la sore tɪ a make ya bɪse, wu nēra n yeele si yesra urgo la. ³² La mam pu'ɔse Nawēnne mɛ bɔ fɔ, tɪ fōn bɔ mam sɪra la, fu da base. La fu sān wa leme wa dɔla mam, fu bɔ fu sɔbiisi la buraane tɪ ba ze'ele kāŋkāŋe.» ³³ Tɪ Apɪyɛɛɪ lerge ē yetɪ: «Zuudāana, mam sake mɛ tɪ m kē yu'a deem la fōn, bu m ki la fōn.» ³⁴ Tɪ Azezi yele ē yetɪ: «Apɪyɛɛɪ, mam yetɪ fu mɛ tɪ yu'ɔŋɔ ēna wā, fu wun sɪ'ɪse la nōore atā tɪ fōn ka mi mam, dee tɪ nō-rɔɔɔ kaase.»

Azezi yele a karēnbiisi tɪ ba māasum tɪ nāmsgɔ n wun wa'am

³⁵ La Azezi soke a karēnbiisi la yetɪ: «Mam n daan tōm yāma tɪ ya sēŋe ka mōole Nawēnne yetɔga, tɪ yāma ka dɪke putmāane, la tāmpɔkɔ, la tagra la, sela daan pɔ'ɔge ya mɛ bu?» Tɪ ba lerge yetɪ: «Ayɛɪ.» ³⁶ Tɪ a yele ba yetɪ: «Lɛɛɛ wā, la ka le dɛna bela. Seka n tarɪ putmāane, a dɪke, la seka n mē tarɪ tāmpɔkɔ, a dɪke. La seka n ka tarɪ sukɔbɔ, a koose a fuugo da sukɔbɔ. ³⁷ Se'ere n soe la, la gulɛ Nawēnne gōŋɔ puam yetɪ: «Ba dɪke ē naage la tōon-be'ero dōma». Mam yetɪ ya tɪ la de la mam tɪ bōn-ēŋa wun ēŋe. Asura, bōn-seka n gulɛ tɔgra mam yelle la, yāŋa wun ēŋe mɛ.» ³⁸ Tɪ ba yetɪ: «Zuudāana, bɪse sukɔbɔ bayi n wāna.» Tɪ a yele ba yetɪ: «Base-ya tɪ la seke ya.»

Azezi pu'use Nawēnne Oliivi tājam

(Amatie 26:36-46, Amarkı 14:32-42)

³⁹ Tı Azezi yese sēŋe Oliivi tājam wu ēŋa ēn ita se'em na, tı a karēnbiisi la doose ē. ⁴⁰ La ēn paage mĩ na, a yele ba yeti: «Pu'use-ya Nawēnne tı yelle da paage ya tı ya lui.» ⁴¹ Dee base ba sēŋe zāage fēe mase wu nēra n wun lobe kugre se'em, ka ka dūma tēŋa pu'usra Nawēnne yeti: ⁴² «M Sɔ, fu sǎn bɔɔra, base tı nǎmsgɔ ē- na tole dee base ma. La, da kǎn ēŋe mam n boori se'em, ēŋe fōn boori se'em.» [⁴³ Tı maleka ze'ele saazum wa'am wa pa'ase ē pǎŋa. ⁴⁴ Tı Azezi sūure ba sǎ'am halı, tı a malun tĩ pu'usra tı a mōrgre tɔgra tēŋa wu zum na.] ⁴⁵ Ēn daan pu'use kıl'ılum na, a lebe ka paage a karēnbiisi la zē'am, tı ba gĩsri me, ba sūure n sǎ'am ĩyǎ, ⁴⁶ tı a soke ba yeti: «Bēm tı yǎma gĩsra? Isge-ya pu'use Nawēnne tı yelle da paage ya tı ya lui.»

Ba yōke Azezi

(Amatie 26:47-56, Amarkı 14:43-50, Azǎ 18:3-11)

⁴⁷ Azezi n daan ken tɔgra la, tı nērbā zozo'e sēnna paana. Tı Azudaası n de a karēnbiisi pia la ayi la nēra ayıla bɔna ba nēŋa, sēŋe lem Azezi tı a kɔke ē, pu'use ē. ⁴⁸ Tı Azezi yele ē yeti: «Azudaası, fōn yeti fu kɔke Nērsaala Dayua la me botı ba yōke ē?»

⁴⁹ Tı a karēnbiisi la n ze a zē'a, yē lan yeti la ēŋe se'em na yeti: «Zuudāana, tı dıke tı sukɔbrɔ la zebe bul?» ⁵⁰ Tı ba nēra ayıla dıke a sukɔbrɔ se kǎabgɔ kēma nēŋadāana tōntōnna zuugɔ tubre fiige. ⁵¹ Tı Azezi yeti: «Base-ya bela.» Dee kalum buraaga la tubre la, tı a lebe table. ⁵² Dee yele kǎabgɔ kēma nēŋadōma, la Wēnde-kǎte la gu'urba nēŋadōma, la kēma n yeti ba yōke ē na yeti: «Yǎma tarı la sukɔbrɔ, la dasa sēna tı ya yōke mam wu mam de la fǎara la? ⁵³ Mam daan boe la ya le me Wēnde-kātum na daare woo, tı ya ka yōke mam. La wakat-ēna wǎ ya tǎ wun ēŋe yan boori se'em, se'ere n soe la, la de la lika pǎŋa dāana wakatē.»

Apıyεrı sı'ıse tı ēŋa ka mi Azezi

(Amatie 26:57-58,69-75, Amarkı 14:53-54,66-72, Azǎ 18:12-18,25-27)

⁵⁴ La ba yōke Azezi me tarı ē sēŋe ka kē kǎabgɔ kēma nēŋadāana yire, tı Apıyεrı bɔna zǎazāare li'isra dɔla. ⁵⁵ La ba tuure la bugum yire la zēnzaka tēŋasuka lagse zēa, tı Apıyεrı mē lagum na ba zēa. ⁵⁶ Tı tōntōn-pɔka ayıla yē Apıyεrı n zı bugum na zē'am, bısra ē zıi dee yeti: «Bura-ēna mē dolı la Azezi.» ⁵⁷ Tı Apıyεrı sı'ıse yeti: «Pɔka, mam ka mi ē.» ⁵⁸ Tı la le ēŋe fēe, tı nēra ayēma le yē ē yeti: «Fōn mē de la ba nēra ayıla.» Tı Apıyεrı yeti: «Buraaga, mam dagı ba nēra.» ⁵⁹ Tı la le ēŋe fēe mase wu karf-ayıla, tı nēra ayıla le yeti: «Asıra, bura-ēna ēn dɔla ē me, a mē de la Galile nēra.» ⁶⁰ Tı Apıyεrı yeti: «Buraaga, mam ka bǎŋe fōn tɔge se'em na vōore.» La ēn ken bɔna mĩ tɔgra la, tı nō-rɔɔɔɔ kɔ'ɔn

kaase. ⁶¹ Tı Zuudāana la gelge bıse Apıyεrı. Tı Apıyεrı tēge Zuudāana n yele ē yeti: «Fu wun sı'ıse mam nōore atǎ me zına, dee tı nō-rɔɔɔɔ kaase la.» ⁶² Tı Apıyεrı yese yēŋa ka kella la sū-sǎ'anjɔ zozo'e.

Ba la Azezi me, dee wē ē

(Amatie 26:67-68, Amarkı 14:65)

⁶³ Bura-seba n gu'uri Azezi la daan la ē me, dee wē ē, ⁶⁴ dıke fuugo vile a nēŋa wē ē, dee yele ē yeti: «Bǎŋe pa'ale tɔ seka n wē fɔ.» ⁶⁵ La ba tu ē na tuure baseba zozo'e pa'ase.

Ba tarı Azezi sēŋe Zıfdōma sarıyadıtba zē'am

(Amatie 26:59-66, Amarkı 14:55-64, Azǎ 18:19-24)

⁶⁶ La beere n daan wiige, tı Zıfdōma kēma, la kǎabgɔ kēma nēŋadōma, la ɔɔ karēnsǎandōma wuu lagse tı ba tarı Azezi sēŋe ba sarıyadia zē'am, dee yele ē yeti: ⁶⁷ «Fu sǎn sırı dena la Krisi tı Nawēnne bıŋe nōore tı a wun wa'am na, fu yele to.» Tı a lerge ba yeti: «Mam sǎn yele ya, ya kǎn sake, ⁶⁸ la mam sǎn soke ya sokre, ya mē kǎn lerge mam. ⁶⁹ La lεεε wǎ kɔ'ɔn we'esa wuu, Nērsaala Dayua la wun zı'ire Nawēnne n de pǎn-kǎte dāana la zuugɔ.» ⁷⁰ Tı ba wuu soke ē yeti: «Bela fōn sırı de la Nawēnne Dayua?» Tı a lerge ba yeti: «Yǎma n yele se'em na, mam de la bela.» ⁷¹ Tı ba yeti: «Tı le εera la bēm kaset-dōma? Tōma mēŋa wōm a nōore yetɔga me.»

Ba tarı Azezi sēŋe gɔmna Apılatı zē'am

(Amatie 27:1-2,11-14, Amarkı 15:1-5, Azǎ 18:28-38)

23 Tı ba wuu tarı Azezi sēŋe Apılatı zē'am ² ka dōre ē yeti: «Tōma yē bura-ēna tı a boe mĩ dāmna la tı tēŋa wǎ dee yeti ba da yɔɔra lampo bɔ'ɔra Rom nakeko, dee ken yeti ēŋa de la Krisi, ēŋa de la naba.» ³ Tı Apılatı soke ē yeti: «Fōn de la Zıfdōma naba?» Tı Azezi lerge ē yeti: «La de la fōn yele se'em na.» ⁴ Tı Apılatı yele kǎabgɔ kēma nēŋadōma la, la nēr-kuuŋɔ la yeti: «Mam ka yē buraaga wǎ yel-seka n wun botı tı di a sarıya.» ⁵ Tı ba sına dee bula yeti: «A zǎsŋɔ la tı a pɔse zǎsum Galile la Zude wa paam kalam na, tarı la dāmŋɔ sēna nērbā puam.»

Ba tarı Azezi sēŋe A'ercdı zē'am

⁶ Apılatı n wōm bela la, a soke me tı a bǎŋe, bura-ēna sǎn dena Galile nēra. ⁷ La ēn bǎŋe tı a ze'ele la Galile n de naba A'ercdı so'olum puam na, tı a botı ba tarı ē sēŋe ka bɔ naba A'ercdı. A'ercdı mē daan boe la Zerizale m wakat-ēŋa. ⁸ La A'ercdı n yē Azezi la, a sūure ēŋe yēlum me halı, se'ere n soe la, a wōm Azezi yelle tı la yuuge me, tı a bɔɔra tı a yē ē. A tarı putē'ere tı a wun tōm na tōon-yǎlma tı a yē. ⁹ A'ercdı daan soke Azezi la sokrı sı zozo'e, tı a ka lerge ē. ¹⁰ Tı kǎabgɔ kēma nēŋadōma, la ɔɔ karēnsǎandōma n boe mĩ na dōre ē

zozo'e yeti, a tōm na be'em. ¹¹ Tl A'erɔdi la a sudaasi yaale ē, dike fu-sōŋɔ ye ē, tl ba la ē, dee tarl ē lebe ka bɔ Apilatɔ. ¹² Daar-ēŋa, A'erɔdi la Apilatɔ n de be'eba la taaba la, lebge la sitɔ.

Apilatɔ di Azezi sarɔya tl ba ku ē

(Amatie 27:15-26, Amarkɔ 15:6-15, Azā 18:39—19:16)

¹³ Tl Apilatɔ wi kãabgɔ kēma nēŋadōma, la tēŋa la kēma, la nērba wuu ¹⁴ yele ba yeti: «Yāma tarl bura-ēna wa'am wa bɔ mam yeti a tarl la dāmŋɔ sēna nērba puam. La mam n soke ē yāma nēŋam kalam wā, mam ka yē a yel-seka n botɔ yāma dōre ē na. ¹⁵ La A'erɔdi mē ka yē a yelle, bela tl a tarl ē leme wa'am wa bɔ tōma. Buraaga wā ka tōm be'em n masɛ tl ba ku ē. ¹⁶ Mam wun botɔ ba wē ē mɛ la ka'asa dee basɛ ē tl a fōrgɛ.» [¹⁷ Zɔɔg-basɛ kibsa wakate woo dēnɔ tl Apilatɔ yese seba n boe yu'a deem nēra ayɔla basɛ.] ¹⁸ Tl ba wuu kɔ'ɔn lagum tāsra yeti: «Ku bura-ēna, dee yese Abarabasɔ bɔ tɔ.» ¹⁹ Abarabasɔ daan dāme na tēŋa, ku nēra, tl ba yōke ē yu. ²⁰ Tl Apilatɔ le tɔgra la nēr-kuuŋɔ la bɔɔra tl a basɛ Azezi. ²¹ Tl ba zagse, dee kaasra yeti: «Ka ē dɔ-puurnɔ zuo, ka ē dɔ-puurnɔ zuo.» ²² Tl Apilatɔ le yele ba nōor-atā puam yeti: «Bēm be'em tl a tōm? Mam ka yē yel-seka tl a tōm tl la masɛ tl ba ku ē. Mam wun botɔ ba wē ē na ka'asa dee basɛ ē.» ²³ Tl ba ken kaasra ke'enke'em yeti: «Ka ē dɔ-puurnɔ zuo.» Tl ba kaasga la zo'oge gāŋɛ. ²⁴ Tl Apilatɔ sake ēŋɛ ban boorɔ se'em na, ²⁵ yese bura-seka n daan dāme tēŋa ku nēra la basɛ, ēŋa tl nērba la boorɔ tl a basɛ, dee dike Azezi bɔ sudaasi tl ba ēŋɛ ē nērba la n boorɔ se'em na.

Ba ka Azezi dɔ-puurnɔ zuo

(Amatie 27:32-44, Amarkɔ 15:21-32, Azā 19:17-27)

²⁶ Ban tarl Azezi wɛ'esa la, ba tu'usɛ la Sireni tēŋa buraaga yu'urɛ n de Asimō n ze'ele va'am lɛmna, tl ba yōke ē botɔ a to'oge dɔ-puurnɔ la buke dɔla Azezi poore. ²⁷ La nēr-kuuŋɔ n doli ē, tl pɔgsɔ kella fabla wē'era nupu'urɔ a ūyā. ²⁸ Tl Azezi wērgɛ ba bɔba yele ba yeti: «Zerizalem pɔgsɔ, da kella-ya mam ūyā, kella-ya ya mēŋa la ya kɔma ūyā. ²⁹ Se'ere n soe la, dabsa sēna tl ba wun yeti: «Pɔg-kōndɔgrɔba, la seba n ka dɔge, seba tl kɔma ka mōge ba bī'isum tarl zu-yēlga.» ³⁰ La nērba wun wa yele tānsɔ tl ba lui dī ba, dee yele künkūma yeti, ba lile ba. ³¹ Se'ere n soe la, ba sãn ita dɔ-mā'asa wāna, la wun ēŋɛ dɔ-ke'esi la wāne?»

³² La ba tarl la tōon-be'ero dōma bayi sēŋɛ tl ba lagum ba la Azezi ku. ³³ La ba paage la zē'a tl ba wi'iri tl Zuwanŋɛ, bilam tl ba ka Azezi dɔ-puurnɔ zuo, dee ka tōon-be'ero dōma bayi la dɔ-puursi zuto, ayɔla a zuugo bɔba, ayɔla a gɔbga bɔba. ³⁴ Tl Azezi yeti: «M Sɔ, basɛ ba tōon-be'ero taale, tl ba ka mi ban itɔ sɛla.» Tl ba dike a futo tl ba puɔ taaba, pɔsɛ tl ba bāŋɛ nēra woo n wun to'oge fu-seka. ³⁵ La nērba la ze la bilam bɔsra ē, tl

Zifdōma kēma la la'ara ē yeti: «A fāage nērba baseba mɛ, a sãn sɔrɔ dɛna la Krisi tl Nawēnne looge la, a fāage a mēŋa.» ³⁶ Tl sudaasi la mē la'ara ē, lɛm dike dā-mī'is-go bɔ ē ³⁷ yeti: «Fu sãn dɛna Zifdōma naba, fāage fu mēŋa.» ³⁸ La ba gulɛ la gulsgɔ lable a zuum yeti:

«Éna wā de la

Zifdōma naba la.»

³⁹ Tl tōon-be'ero dōma la n boe dɔ-puursi zuto la ayɔla tu Azezi yeti: «Dagɔ fōn de Krisi la? Fāage fu mēŋa dee fāage tōma.» ⁴⁰ Tl ayēma la tāsɛ a tadāana la yeti: «Fōn ka zotɔ Nawēnne? Ba wun ku tōma wuu mɛ. ⁴¹ La sãn dɛna tōma, tōma n tōm tōon-be'ero la, la masɛ mɛ tl ba ku tōma, la nēr-ēna wā ka ēŋɛ sɛla n de be'em.» ⁴² Dee yele Azezi yeti: «Fu sãn wa dita fu na'am na, fu tēge m yelle.» ⁴³ Tl Azezi yele ē yeti: «Mam yeti fu la sɔra, tl zīna nōo fu wun bɔna la mam Nawēnne yire.»

Azezi kūm

(Amatie 27:45-56, Amarkɔ 15:33-41, Azā 19:28-30)

⁴⁴⁻⁴⁵ La daan de wu wuntɛŋa zuu-tēŋasuka, tl tēŋa la wuu lebge lika, tl wuntɛŋa ka le yēke halɔ ka paage za-anōore karf-atā. Tl fuugo la n yuli Wēnde-kātɛ la puam berje zē'e-sōŋɔ la āage pusuka. ⁴⁶ Tl Azezi tɔge ke'enke'em yeti: «M Sɔ, mam basɔ m sɔla la fōn nu'usum.» A yele la bela dee ki.

⁴⁷ Tl Rom sudaasi ke'ema yē lan ēŋɛ se'em na, nā'asra Nawēnne yeti: «Asɔra, buraaga wā de la nēr-sōŋɔ.»

⁴⁸ La nēr-kuuŋɔ la wuu n wa'am tl ba bɔsɛ lan wun ēŋɛ se'em na, yē lan ēŋɛ se'em na mɛ. Tl ba lebe kulla, dee wē'era nupu'urɔ. ⁴⁹ La nēr-seba wuu n mi Azezi, la pɔg-seba n doose ē halɔ Galile wa'am na, ze la kēnkernɔ bɔsra lan itɔ se'em na.

Azezi laare

(Amatie 27:57-61, Amarkɔ 15:42-47, Azā 19:38-42)

⁵⁰ Buraaga ayɔla yu'urɛ n daan de Azozefu. A de la Ari-mate tēŋa nēra, dee dɛna Zifdōma sarɔyaditba nēra ayɔla. A de la nēr-sōŋɔ tl a urgɔ wuu masɛ, ⁵¹ la a daan gu'uri mɛ tl Nawēnne wa'am wa di na'am nērba tēŋasuka. La ba sarɔyaditba la n daan looge yɛm tl ba ēŋɛ se'em na, a daan ka sake. ⁵² Azezi n ki la, ēŋa n sēŋɛ Apilatɔ zē'am ka sose Azezi kūm na, tl Apilatɔ sake. ⁵³ Tl a sike kūm na vile ē na tãnnɛ tarl ka bīŋɛ yɔɔgɔ tl ba tū tãmpīa ūyā nãn ka laage nēra mī puam. ⁵⁴ La de la daar-ēŋa tl Zifdōma māsɔnɔ ba vo'osgo daare. Wēnne sãn kē tl ba vo'osgo daare wun pɔsɛ.

⁵⁵ Tl pɔg-seba n doose Azezi Galile wa'am na, doose Azozefu sēŋɛ ka yē yɔɔgɔ la, dee yē ban bīŋɛ Azezi kūm na se'em, ⁵⁶ dee lebe kule ka māsasum tudare kaam bu-urɔ to'oto'ore tl ba tarl wa ēŋɛ kūm na. La vo'osgo daare la ba vo'ose wu Amoyisi lɔɔ la n bɔ nōore se'em na.

Azezi vo'ore

(Amatie 28:1-10, Amarku 16:1-8, Azã 20:1-10)

24 Lasrı daare bulika yu'uhq yu'uhq ti pɔgsı la isge dıke kaam na ti ba m̄asum na tarı s̄eɲe yɔɔm na. ² Ban paage la, ba yē ti kugre la ti ba dıke lige yɔɔɔɔ n̄ore la bilge m̄e gā k̄enker̄a. ³ Tı ba k̄e yɔɔɔɔ la puam bise ka yē Zuudāana Azezi k̄um na. ⁴ Tı ba ze yerı, bilam m̄eɲa ti ba yē buraasi bayi n ze lem ba, ye futo ti ba yēgra. ⁵ Tı pɔgsı la palēɲa ēke, ti ba suure ba zuto tēɲa. Tı buraasi la soke ba yetı: «Bēm ti yāma ēera n̄er-seka n vɔı seba n ki zē'am? ⁶ A ka boe kalam. A vo'oge m̄e. Tēegē-ya ēɲa n daan nān boe Galile dee yele ya se'em na, ⁷ a yetı, ba wun yōke N̄ersaala Dayua la m̄e tarı ka bɔ t̄oon-be'ero dōma, ti ba ka ē dɔ-pu-urɲa zuo, la dabsa atā daare, a wun vo'oge m̄e.» ⁸ Tı ba yāɲa tēegē a yetɔɔa la, ⁹ ze'ele yɔɔm na lebe kule ka yele a karēnbiisi pia la ayıla la, la n̄erba baseba la wuu lan ēɲe se'em na wuu.

¹⁰ Ba daan de la Amaari n ze'ele Magdala, la Azanı, la Azakı ma Amaari, la pɔgsı baseba, bāma n daan tɔge yel-bāna bɔ Azezi karēnbiisi pia la ayıla la. ¹¹ La ba daan tē'esē ti pɔgsı la n yele ba se'em na ka tarı v̄ore, ti ba ka sake ti la de s̄ura. ¹² La Apıyēerı isge m̄e zoe s̄eɲe yɔɔm na ka veese bise, yē tāna la mā'a, lebe kule ka ze yerı b̄on-seba n ēɲe la ĩyā.

Karēnbiisi tu'usē Azezi Emayusi sore zuo

(Amarku 16:12-13)

¹³ Daar-ēɲa m̄eɲa ti Azezi karēnbiisi bayi wē'esa tēɲa ayıla yu'urē n de Emayusi. Bilam na Zerizalem zāage mase wu kilomētrı pia la ayıla. ¹⁴ Ba daan tɔgrı la taaba b̄on-seba wuu n ēɲe la yelle. ¹⁵ La ban daan s̄osrı la taaba la, ti Azezi lem ba, ti ba lagım s̄enna. ¹⁶ La ba yem lige m̄e, ti ba ka bāɲe ē. ¹⁷ Tı a soke ba yetı: «Bēm yelle ti yāma s̄enna dee tɔgra la taaba?» Tı ba ze'ele zūɲe ba n̄ensı. ¹⁸ Tı ba n̄era ayıla yu'urē n de Akleopası soke ē yetı: «F̄on mā'a n boe Zerizalem ka bāɲe b̄on-seka n ēɲe dabsa wā puam?» ¹⁹ Tı a soke ba yetı: «Bēm ēɲe?» Tı ba yele ē yetı: «Azezi n ze'ele Nazaretı la, a de la Nawēnne n̄otɔ'sruba n tarı pāɲa a t̄ooma la a yetɔɔa puam, Nawēnne la n̄erba wuu nifum. ²⁰ Tı tōma k̄aabgɔ k̄ema n̄eɲadōma, la tēɲa la k̄ema botı ba yōke ē, di a sarıya yetı ba ku ē, ti ba ka ē dɔ-puurnɲa zuo, ti a ki. ²¹ La tōma daan tarı put̄'ere ti la de la ēɲa n wun f̄aage lsrayelı dōma la. La zīna de la dabsa atā n wāna ti yel-ēna wā ēɲe. ²² La tōma pɔgsı baseba n botı tōma palēɲa ēke. Ba isge la bulika yu'uhq yu'uhq s̄eɲe yɔɔm na, ²³ leme wa yele tōma yetı bāma ka yē k̄um na, bāma yē la malekadōma, ti ba yele bāma yetı a vo'oge m̄e. ²⁴ Tı tōma n̄erba baseba m̄e s̄eɲe yɔɔm na, ka yē ti la s̄urı ān wu pɔgsı la n yele se'em na. La ba ka yē Azezi.»

²⁵ Tı Azezi yele ba yetı: «Yem-ka-like dōma, bēm ti ya ka bɔ Nawēnne n̄otɔ'sruba n yuun yele se'em na wuu s̄ura tɔtɔ? ²⁶ La ka mase nı ti Krisi nāmse la b̄on-bāna wuu, dee yāɲa di a na'am na?» ²⁷ Tı a yāɲa pa'alē ba b̄on-seba wuu n gulse tɔgra ēɲa yelle Nawēnne gōnnɔ la puam, a p̄ose pa'alē la Amoyisi, la Nawēnne n̄otɔ'sruba la wuu n gulse la v̄ore n de se'em.

²⁸ La ban daan s̄eɲe ka lem t̄en-seka ti ba we la, a ēɲe wu a boorı ti a tole m̄e na. ²⁹ Tı ba sose ē yetı: «Doose tōma k̄e gā'are, se'ere n soe la, wēnne k̄e m̄e, zē'a boe m̄ı s̄obra m̄e.» Tı a sake doose ba k̄e. ³⁰ La ba daan zī're m̄e ti ba di, ti Azezi dıke borborı pu'usē Nawēnne, dee fiise bɔ ba. ³¹ Tı ba yem yāɲa like, ti ba bāɲe ēɲa n de n̄er-seka. Tı a bɔı ba n̄eɲam bilam m̄eɲa. ³² Tı ba yetı taaba yetı: «Éɲa n tɔge yetɔɔa la pa'alē tōma, dee tɔgra yel-seba n boe Nawēnne gōɲɔ puam pa'ala tōma sore zuo la, tōma sūure ka ēɲe ȳelum zo'oge s̄ura?»

³³ Tı ba isge wakat-ēɲa lebe Zerizalem ka yē a karēnbiisi pia la ayıla la, la seba n boe ba zē'am na ti ba lagse taaba m̄e. ³⁴ Tı ba yele ba yetı: «Tı Zuudāana la s̄urı vo'oge m̄e, Asimō yē ē m̄e.» ³⁵ Tı n̄erba bayi la m̄e yele ba b̄on-seba n ēɲe sore la zuo, la ēɲa n fiisri borborı la, bāma n bāɲe ē se'em.

Azezi puke a m̄eɲa pa'alē a karēnbiisi

(Amatie 28:16-20, Amarku 16:14-18, Azã 20:19-23, Tōoma 1:6-8)

³⁶ Ban boe m̄ı tɔgra bela la, ti Azezi dare wa'am wa ze ba tēɲasuka, yele ba yetı: «Sū-mā'asum bɔna la ya.»

³⁷ Tı dabeem yōke ba, ti ba palēɲa ēke, ti ba tē'esē ti bāma yē la ki-isgne. ³⁸ Tı a yele ba yetı: «Bēm ti ya palēɲa ēke, ti ya tē'esra put̄'era buyi buyi? ³⁹ Bise-ya mam nu'usi, la mam nāma, la de la mam. Sa'abe-ya mam bise, ki-isgne ka tarı n̄ennɔ, la kōba, wu yāma n yē mam n tarı se'em wā.» ⁴⁰ A tɔge bela dee pa'alē ba la a nu'usi, la a nāma. ⁴¹ Ba sūure n ān ȳelum dee ti la di'ige ba, ti ba ken ka bɔ s̄ura, ti a soke ba yetı: «Yāma tarı sela wun di kalam m̄e bu?» ⁴² Tı ba dıke zūn-sē'ene bɔ ē. ⁴³ Tı a to'oge obe ba nifum bilam.

⁴⁴ Bela poorum, a yele ba yetı: «Mam n daan ken bɔna la yāma la, mam n yele ya b̄on-seba la n wāna. Mam daan yele ya yetı: Dēnı ti b̄on-seba wuu n gulse mam yelle Amoyisi lɔɔ gōnnɔ puam, la Nawēnne n̄otɔ'sruba gōnnɔ puam, la yōoma gōnnɔ puam na ēɲe.» ⁴⁵ Tı Azezi like ba yem ti ba bāɲe b̄on-seba n boe Nawēnne gōnnɔ puam na v̄ore, ⁴⁶ yele ba yetı: «La gulse yetı, Krisi la wun nāmse m̄e ki, la dabsa atā daare a wun vo'oge m̄e. ⁴⁷ Éɲa yu'urē ĩyā ti ba wun p̄ose Zerizalem m̄oolē bɔ buuri wuu yetı, ba teege yem base t̄oon-be'ero, ti Nawēnne wun base ba t̄oon-be'ero taale. ⁴⁸ Yāma n de b̄on-bāma wuu kaset-dōma wun pa'alē n̄erba wuu. ⁴⁹ La mam wun t̄om seka ti mam Sɔ daan bīɲe n̄ore bɔ ya la, ti a wa'am wa bɔna la ya. Bɔna-ya Zerizalem gu'ura halı ti a ze'ele saazuum wa'am wa bɔ ya pāɲa.»

Azezi zom Nawěnnε yire

(Amarki 16:19-20, Tōoma 1:9-11)

⁵⁰ Bela poorum, Azezi tarı ba me tēja la puam yese sēja ka lem Betani, zēja a nu'usi saazuum kã kã'a-sõ-

ma bɔ ba. ⁵¹ Ęja n boe mĩ kã'ara kã'a-sōma bɔ'ɔra ba la, a base ba me dee zom Nawěnnε yire. ⁵² Tı karěnbisi la ka dũma tēja nã'ase ě, dee lebe Zerizalem la sũ-yěl-ga zozo'e. ⁵³ Ba daan boe la Wěnde-kātum na daare woo pēgra Nawěnnε.

Azã

Bilgre

Azã yuun de la Azezi karēnbiisi pia la ayi puam nēra ayula (Amatie 10:2).

Azã pa'ale tɪ Azezi de la seka tɪ Nawēnne tōm, wu ēn pōn bīŋe a nōore kurum kurum se'em na, a de la Nawēnne Dayua. Azezi n de sore tɪ nēra wun doose yē vɔm n ka ba'asrɪ. Ēŋa n de sɪra dāana, la peelem dāana n pa'alɪ nērba Nawēnne yela sɪra sɪra. Ēŋa n bɪsrɪ tōma yelle, wun tarɪ tɪ paage tɪ Sɔ Nawēnne zē'am.

A dēŋe pa'ale tɪ Azezi de la Nawēnne Yetɔga n boe wakate wuu, n lebge nērsaala kē'era tōma tēŋasuka. A yetɪ Azã seka n yuun misri nērba ko'om puam na tɔge Azezi yelle me vēelga vēelga (sapɪtrɪ 1).

Dee pa'ale Azezi n to'ose nērba buuri to'oto'ore se'em. Azã gulse la bōn-yālma bayopɔɪ n pa'ale Azezi n de nērseka (sapɪtrɪ 2 - 12), dee pa'ale ēn zāsum a karēnbiisi se'em yu'uhɔ seka tɪ ba yōke ē na (sapɪtrɪ 13 - 17).

Gōŋɔ la ba'asgɔ, a pa'ale la ban yōke Azezi di a sarɪya se'em, botɪ ba ka ē dɔ-puurnɔ zuo, tɪ a ki dee vo'oge, la ēn puke a mēŋa pa'ale a karēnbiisi la se'em (sapɪtrɪ 18 - 21).

Azã ka gulse bōn-seba wuu tɪ Amatie, la Amarkɪ, la Alukɪ gulse la.

Ēŋa mā'a n tɔgrɪ Azezi n ēŋe se'em Kana pɔgdire kibsa la (2:1-12),

la ēn sōse la Anikodem (3:1-21),

ēn sōse la Samaari pɔka la (4:1-26),

ēn botɪ kɔɔŋɔ yē ĩmā'asum Betesda (5:1-18),

la ēn botɪ Alazaari vo'oge la (11:1-44).

Nawēnne Dayua Azezi-krisi n de Yetɔga n bɔ'wɪ nēr-saalba vɔm

¹ Pī'ilunɔ wakate, Yetɔga la pōn bɔna me. La Yetɔga la yuun boe la Nawēnne zē'am. Ēŋa la Nawēnne de la buyɪla. ² A pōn bɔna la Nawēnne zē'am pī'ilunɔ wakate. ³ Nawēnne la ēŋa n yuun nāam sela woo. Sela sela ka boe tɪ Nawēnne la ēŋa ka nāam. ⁴ Ēŋa n de vɔm dāana. La de la ēŋa n botɪ nērsaalba yēta peelem.

⁵ Peelem na nēege lika puam me, la lika ka yāŋe kīŋe ē.

⁶ Nawēnne daan tōm na nēra ayula, a yu'ure de la Azã. ⁷ A wa'am tɪ a tɔge la peelem na yelle pa'ale nērba tɪ ba wuu wun tā'age bɔ ē sɪra. ⁸ Azã mēŋa dagɪ peelem na, la a wa'am tɪ a tɔge la seka n de peelem na yelle pa'ale nērba.

⁹ Seka n de peelem sɪra sɪra la, ze'ele la Nawēnne zē'am wa'am dūnia zuo. Ēŋa n nēege tɪ nērsaalba wuu yēta peelem. ¹⁰ Seka n de peelem na daan wa bɔna la dūnia zuo. Nawēnne la ēŋa n yuun nāam dūnia. Baa la bela, nērsaalba ka boorɪ tɪ ba bāŋe ē. ¹¹ A daan wa'am na a mēŋa tēŋa puam, la a nērba la ka to'oge ē. ¹² La seba wuu n to'oge ē bɔ ē sɪra la, a bɔ ba nōore me tɪ ba lebge Nawēnne kɔma. ¹³ Ba ka lebge Nawēnne kɔma wu nērsaalba n dɔgrɪ se'em na, la ka de ĩyā n boorɪ se'em, bu nērsaala n boorɪ se'em. La de la Nawēnne mēŋa n botɪ ba lebge a kɔma.

¹⁴ Seka n de Yetɔga la daan lebge la nērsaala, kē'era tōma tēŋasuka. Tōma yē a na'am pāŋa me, na'am pāŋa n de Nawēnne Bi-yēŋa n ze'ele a Sɔ zē'am na'am pāŋa. La Nawēnne yel-sōnne, la a sɪra wuu boe la a zē'am.

¹⁵ La de la ēŋa yelle tɪ Azã daan tɔge ke'enke'em yetɪ: «Ēna n de seka tɪ mam pōn tɔge a yelle yetɪ, nēra ayēma n boe mam poorum sēna, ēŋa gānnɪ mam me, se'ere n soe la, a dēŋe mam me bɔna.»

¹⁶ Ēŋa n botɪ tōma wuu yēta yel-sōnne woo yel-sōnne, ēn ba tara Nawēnne yel-sōnne na ĩyā.

¹⁷ Nawēnne bɔ a kɔ la Amoyisi, tɪ a bɔ tōma. La, la sān dena Nawēnne yel-sōnne, la a sɪra la, la doose la Azezi-krisi tɪ a bɔ tōma. ¹⁸ Nēra nēra nān ka yē Nawēnne. La de la Nawēnne Bi-yēŋa la n boe la ē le n botɪ tōma bāŋe ē, ēŋa la Nawēnne de la buyɪla.

Azã bɔ Azezi kaseto

(Amatie 3:1-12, Amarkɪ 1:1-8, Alukɪ 3:1-17)

¹⁹ Azã n daan bɔ kaseto se'em n wāna: Zifdōma nēŋadōma seba n kē'erɪ Zerizalem na daan tōm na ba kāabgɔ kēma, la Leviti dōma tɪ ba sēŋe Azã zē'am, ka soke ē yetɪ: «Fōn de la āne?» ²⁰ Tɪ Azã tɔge ba vēelga yetɪ: «Mam dagɪ Krisi tɪ Nawēnne tōm na.»

²¹ Tɪ ba le soke ē yetɪ: «Fōn de la āne? Fōn de la A'eli bu?» Tɪ a lerge ba yetɪ: «Mam dagɪ A'eli.» Tɪ ba le soke ē yetɪ: «Fōn de la Nawēnne nōtɔ'ɔsa la n yetɪ a wa'am na bu?» Tɪ a yetɪ: «Ayel.»

²² Tl ba le soke ã yetu: «Bela fõn de la ãne? Tl tl tarl fõn lerge se'em na, sêñe ka tãge pa'ale seba n tõm tõma la. Fõn mẽña yetu fõn de la ãne?»

²³ Ban soke ã bela la, tl Azã lerge ba yetu: «Mam de la seka n moolle weem tãgra ke'enke'em yetu:

«Malge-ya sore tl a dena tẽntẽa bɔ Zuudãana la» », wu Nawẽnne nõtw'ɔsa A'ezayi n yuun põn yele se'em na.

²⁴ Nẽr-seba n daan sêñe Azã zẽ'am na, Farisi dõma n daan tõm ba. ²⁵ Tl ba daan soke ã yetu: «Fõn sãn dagna Krisi la, bu A'eli, bu Nawẽnne nõtw'ɔsa la, bẽm tl fõn misra nẽrba ko'om puam?» ²⁶ Tl Azã lerge ba yetu: «La sãn dena mam, mam misri ya la ko'om puam, la nẽra ayula n boe ya tẽñasuka tl ya ka mina ã. ²⁷ Ëña wa bõna la mam poorum, la mam ka mase tl m pirge a tagra.»

²⁸ Bõn-bãna wuu daan ãñe la Betani, Zurdẽ kulaa la doone, zẽ'e-seka tl Azã daan misri nẽrba ko'om puam na.

Azã pa'ale tl Azezi n de Nawẽnne Pebila

²⁹ Tl beere wiige, tl Azã yẽ Azezi n sẽm a zẽ'am. Tl a yetu: «Bise-ya, ãna n de Nawẽnne Pebila n yesri nẽr-saalba tõon-be'ero basra. ³⁰ La de la ãña yelle tl mam daan yele yetu: «Nẽra n wa bõna mam poorum dena nẽr-keko gãnna mam na, se'ere n soe la, a dẽñe mam me bõna.» ³¹ Mam daan ka mi ãn de seka, la mam wa'am wa misra la nẽrba ko'om puam, tl m botl lsrayeli dõma bãñe ã.»

³² Azã le tãge yetu: «Mam yẽ tl Nawẽnne Sia n ze'ele Nawẽnne yire sagra ãna wu na'adawenne, wa zoole a zuo. ³³ La mam daan ka mi ã, la Nawẽnne n tõm mam tl m mise nẽrba ko'om puam na, yele mam tl: «Fu sãn wa yẽ Nawẽnne Sia n sige zoole seka zuo la, la de la ãña n misri nẽrba Nawẽnne Sia la puam.» ³⁴ La mam yẽ ã me, bɔ kaseto yetu, ãña n de Nawẽnne Dayua la.»

Azezi pɔspɔst karẽnbiisi

³⁵ Tl beere wiige, tl Azã daan le ze bilam la a karẽnbiisi bayi, ³⁶ yẽ Azezi n sẽnni, tl a yetu: «Nawẽnne Pebila la n wãna.» ³⁷ Tl a karẽnbiisi bayi la wõm ãn yele se'em na, isge dola Azezi. ³⁸ Tl Azezi gelge yẽ ban doli ã, soke ba yetu: «Yãma eerl la bẽm?» Tl ba soke ã yetu: «Rabi, fõn kẽ'erl la bẽ?» (Rabi vooe de la karẽnsãama.) ³⁹ Tl Azezi lerge ba yetu: «Wa'am-ya tl ya wun yẽ.» Tl ba doose sêñe ka yẽ ãn kẽ'erl zẽ'a na, daan weege bõna a zẽ'am daar-ẽña, la daan de wu wẽngelña karf-anaasi.

⁴⁰ Nẽrba bayi la n wõm Azã n tãge Azezi yelle se'em doose ã na, ayula yu'ure de la A'andre, a de la Asimõ-piyẽerl yibga. ⁴¹ Tl A'andre dẽñe sêñe ka yẽ a kẽema Asimõ-piyẽerl, yele ã yetu: «Tõma yẽ Mesi la. La boort tl la yetu Krisi.» (A vooe de la seka tl Nawẽnne looge.)

⁴² Tl a daan tarl Asimõ sêñe Azezi zẽ'am, tl Azezi bise ã,

dee yetu: «Fõn de la Azã bia Asimõ. Ba wun wi'ira fu tl Asefast, bu Apiyẽerl.» (A vooe de la tãmpãa.)

Azezi wi Afilipi, la Anatanayeli

⁴³ Tl beere wiige, tl Azezi bɔɔra tl a sêñe Galile, yẽ Afilipi yele ã yetu: «Dola mam.» ⁴⁴ Afilipi ze'ele la Beti-sayida tẽña, A'andre la Apiyẽerl mẽ ze'ele la bilam. ⁴⁵ Tl Afilipi sêñe ka yẽ Anatanayeli, yele ã yetu: «Tõma yẽ se-ka tl Amoyisi yuun gulse a yelle bɔ gõnnɔ puam, tl a yelle ken gulse Nawẽnne nõtw'ɔsrɔba gõnnɔ puam na. A de la Azezi n ze'ele Nazareti tẽña, Azozefu dayua.»

⁴⁶ Tl Anatanayeli yele ã yetu: «Bõn-sõñɔ tã wun ze'ele Nazareti?» Tl Afilipi lerge ã yetu: «Yi wa'am wa bise.»

⁴⁷ Tl Azezi yẽ Anatanayeli n sẽm a zẽ'am, tl a tãge a yelle yetu: «Ëna de la lsrayeli nẽra sira sira n ka tarl yelle.» ⁴⁸ Tl Anatanayeli yele ã yetu: «Fõn ãñe la wãne mina mam?» Tl Azezi lerge ã yetu: «Fõn boe kẽnkãña la tẽña, lan dẽñe Afilipi n wun wi fu la, mam yẽ fu me.»

⁴⁹ Tl Anatanayeli lerge ã yetu: «Karẽnsãama, fõn de la Nawẽnne Dayua, la lsrayeli dõma naba.» ⁵⁰ Tl Azezi yele ã yetu: «Mam n yele fõn tl mam yẽ fõn boe kẽnkãña tẽña la ãyã, tl fu bɔ mam sira? Fu wun yẽ bõn-kãra n gãnni bõn-bãna.» ⁵¹ Dee yele ã yetu: «Mam yetu ya la sira, tl ya wun yẽ Nawẽnne yire n yo'oge, tl Nawẽnne malekadõma zɔnna dee sagra Nẽrsaala Dayua la zuo.»

Pɔgdire kibsa n boe Kana tẽña

2 La dabsa atã daare, pɔgdire kibsa n daan boe Kana, Galile so'olum puam. Tl Azezi ma daan bõna mĩ. ² Tl ba mẽ wi Azezi la a karẽnbiisi, tl ba wa'am kibsa la. ³ Tl dãam daan pɔ'ɔge, tl Azezi ma yele ã yetu: «Dãam na pɔ'ɔge me.» ⁴ Tl Azezi lerge ã yetu: «M ma, dagl fõn wun yele mam, mam n wun ãñe se'em. Mam wakate nãn ka paage.» ⁵ Tl Azezi ma la yele tõntõnɔba la yetu: «Ëña n yetu ya ãñe se'em wuu, ya ãñe.»

⁶ La kuga dugrɔ bayoobi n daan boe mĩ tl Zifdõma daan tara pẽera ba mẽña wu ba sisgo n yetu ba ita se'em na. Ko'om litrl pinii bu kɔbga n daan pitl dukɔ ayula. ⁷ Tl Azezi yele ba yetu: «Ãge-ya ko'om pure dugrɔ la.» Tl ba ãge pure ba. ⁸ Tl Azezi yele ba yetu: «Kãbge-ya tarl ka bɔ seka n bɔsrɔ dia yelle la.» Tl ba kãbge tarl ka bɔ ã. ⁹ La seka n bɔsrɔ dia la yelle la n leme ko'om na, ba lebge la dãam, tl a ka mina ban ze'ele zẽ'a. La tõntõnɔba la n ãge ko'om na mi me. Tl seka n bɔsrɔ dia la yelle la wi pɔgdita la, ¹⁰ yele ã yetu: «Nẽra woo ãn dẽñe bɔ la dã-sõma, tl ba sãn wa yũ tige, tl ba yãña bɔ'ɔra dã-seba n ka ba ãna sõña la. La fõn duke la dã-sõma ze'ele bɔ'ɔra poorum.»

¹¹ Ëna n de Azezi pɔspɔst tõon-yãlma tl a ãñe. A ãñe ã na Kana Galile so'olum puam, pa'ale a na'am pãña, tl a karẽnbiisi la bɔ ã sira.

¹² Bela poorum, êña la a ma, la a yĩbsi, la a karēnbiisi la sēñe la Kapernaum. Ba kē bilam na dabsa fēe.

Azezi dige leebdōma Wēnde-kātum

(Amatie 21:12-13, Amarku 11:15-17, Aluki 19:45-46)

¹³ La Zifdōma Zɔɔg-base kibsa daare n daan lem, ti Azezi sēñe Zerizalem, ¹⁴ ka kē Wēnde-kāte la zēnzakam yē nēba n koosri niigi, la piisi, la na'adawema, la lig-tēerba n zĩ mĩ. ¹⁵ Ti a dıke mĩ'isi ēñe ka'asre dige ba, la niigi, la piisi la wuu Wēnde-kāte la zēnzakam ti ba yese, dee zā'age lig-tēerba la taablūdōma lubē, ti ba ligri la ka'ase. ¹⁶ Dee yele seba n koosri na'adawema la yeti: «Tari-ya ba yese. Da dıke-ya mam so deego la ēñe leebgo zē'a.» ¹⁷ Ti a karēnbiisi la tēege ti la gulse yeti: «Nawēnne, fōn deego la nōñlum ti mam tari la, wun di mam wu bugum na.»

¹⁸ Ti Zifdōma nēñadōma soke ē yeti: «Tōon-yālma kãna ti fōn wun ēñe pa'ale tōma ti fōn tari nōore ti fu ēñe wãna?» ¹⁹ Ti Azezi lerge ba yeti: «Sã'am-ya Wēnde-kāte wã, ti mam wun le mē ē dabsa atã puam.» ²⁰ Ti ba lerge ē yeti: «Ba dıke la yuuma pinaasi la ayoobi mē Wēnde-ēna wã, ti fōn yeti, fōn wun mē ē dabsa atã puam?»

²¹ La Azezi n tɔgru Wēndeego yelle la, la de la a mēña iŷã yelle ti a tɔgru. ²² La Azezi n daan wa ki dee vo'oge la, ti a karēnbiisi la tēege ti a daan yele la wãna, ti ba bɔ Nawēnne gōñɔ yetɔga, la Azezi n daan yele se'em na sira.

Azezi mi nērsaala woo tagsgɔ

²³ La Azezi n daan boe Zerizalem Zɔɔg-base kibsa la, nēba zozo'e n daan yē ti a tōnni tōon-yālma, ti ba bɔ ē sira. ²⁴ La Azezi daan ka dıke a sūure wuu pa'ale ba, se'ere n soe la, a mi ba wuu mē. ²⁵ A ka eeru ti nēra tɔge nērsaalba yelle bɔ ē, se'ere n soe la, a mi bōn-seka n boe nērsaalba sūure puam mē.

Azezi la Anikodem

3 Buraa ayila n daan boe Farisi dōma puam ti a yu'ure dena Anikodem. A daan de la Zifdōma nēñadāana. ² Bura-ēña daan wa'am na Azezi zē'am yu'urɔ wa yele ē yeti: «Karēnsāama, tōma mi ti Nawēnne n tōm fōn ti fu dena karēnsāama, se'ere n soe la, nēra ka tã wun ēñe bōn-yālma wu fōn uti se'em wã wuu, sãn dagna Nawēnne n boe la a dāana.» ³ Ti Azezi lerge ē yeti: «Mam yeti fu la sira sira, ti nēra sãn ka yē dɔg-paalga, a ka tã wun yē Nawēnne so'olum.» ⁴ Ti Anikodem soke ē yeti: «Nēra n kurge wun ēñe la wãne ti ba le tã'age dɔge ē paalga? A wun le tã'age mē kē a ma puurum ti ba le dɔge ē bu?» ⁵ Ti Azezi lerge ē yeti: «Mam yeti fu la sira sira, ti nēra sãn ka dɔge la ko'om, la Nawēnne Sia, a ka tã wun kē Nawēnne so'olum puam. ⁶ Nērsaala n dɔge seka la de la nē-

saala, la Nawēnne Sia n dɔge seka la tari la Nawēnne Sia vɔm. ⁷ Da base ti la di'ige fo, mam n yeti: Dēni ti ba le dɔge ya la iŷã. ⁸ Kusebgo vugri la ēn boori zē'a, ti fu wōnna a dāmne, dee ka mina ēn ze'ele zē'a sēna, la ēn we'esti zē'a. Nawēnne Sia n dɔge seka la āna bela.»

⁹ Ti Anikodem le soke ē yeti: «Bōn-ēña wun ēñe la wãne ēñe?» ¹⁰ Ti Azezi lerge ē yeti: «Fōn de Israyeli karēnsāam-ke'ema dee ken ka mina bōn-ēna? ¹¹ Mam yeti fu la sira sira, ti tōma tɔgru la sela ti tōma mi, dee yeti sela ti tōma yē. La ya ka sake tōma yetɔga la.

¹² Mam sãn tɔge dūnia wã yela pa'ale ya, ti ya ka sake, mam sãn tɔge Nawēnne yire yela pa'ale ya, ya wun ēñe la wãne sake? ¹³ Nēra nēra nãn ka zom Nawēnne yire, sãn dagna Nērsaala Dayua la n ze'ele Nawēnne yire sige. ¹⁴ Wu Amoyisi n yuun zēke bōnsela dɔɔɔ zuo weego puam se'em na, dēni ti ba zēke Nērsaala Dayua la mē bela. ¹⁵ Ti nēr-seka woo n bɔ ē sira wun tara vɔm n ka ba'asri.»

¹⁶ Nawēnne nōñe nērsaalba mē halı, ti a tōm a Bi-yēña dūnia zuo, ti nēr-seka woo n bɔ ē sira kãn sã'am, la a wun yē vɔm n ka ba'asri. ¹⁷ Nawēnne ka tōm a Dayua la dūnia ti a di nēba sariya sɔbge ba, a tōm ē ti a fãage ba mē base. ¹⁸ La seka n bɔ ē sira, ba kãn di a sariya. La seka n ka bɔ ē sira la, a pōn kɔñe buurɔ mē, ēn ka bɔ Nawēnne Bi-yēña la sira la iŷã. ¹⁹ Bōn-ēna n de sariyadia la: Peelem wa'am dūnia puam mē, la nērsaalba nōñe la lika gãnna peelem na, ba tōoma n de tōon-be'ero la iŷã. ²⁰ Nēr-seka woo n tōnni tōon-be'ero sisri peelem mē, a ka sēm peelem puam, a zoti mē ti a tōoma la wun puke. ²¹ La nēr-seka woo n tōnni sira sēm na peelem zē'am, ti a tōoma la pa'ale ti a sakri la Nawēnne.

Azã tɔge Azezi yelle

²² Bela poorum, Azezi la a karēnbiisi sēñe la Zude so'olum ka bɔna bilam misra nēba ko'om puam. ²³ Ti Azã mē daan bɔna Enō tēña n lem Salim tēña la misri nēba ko'om puam, se'ere n soe la, ko'om n daan boe mĩ zo'oge. Ti nēba sēnna, ti a misra ba. ²⁴ Wakat-ēña ba daan nãn ka kē'ese Azã yu'a deem.

²⁵ Ti Azã karēnbiisi baseba, la Zifdōma nēra daan wē'era nōke'ene, Zifdōma sisgo n yeti ba pēera ba mēña malgra la yelle. ²⁶ Ti ba sēñe Azã zē'am ka yele ē yeti: «Karēnsāama, seka n daan boe la fōn Zurdē doone ke bɔba la, seka ti fōn daan tɔge a yelle la, ēn wãna n misri nēba ko'om puam, ti nēba wuu sēnna a zē'am.» ²⁷ Ti Azã lerge ba yeti: «Nēra ka tã wun to'oge sela ti la sãn dagna Nawēnne n bɔ ē. ²⁸ Yãma mēña tã wun bɔ kaseto mē ti mam yeti: «Dagı mam n de Krisi la. La, ba tōm mam mē ti m dēñe a nēña wa'am.» ²⁹ La ān wu nēra n di pɔga: Pɔgdita la n soe pɔka la, la pɔgdita la sire n ze dee selsra a yetɔga la, a tari sũ-yēl-

ga me zozo'e. Bela mam tarı sũ-yêlga me zozo'e.

³⁰ Dêni ti êŋa lebge kãte dee ti mam lebge pıka.

³¹ Seka n yese saazuum wa'am n gãnnı wuu, la seka n yese dũnia de la dũnia nêra, la a tɔgrı la dũnia yelle. Seka n yese Nawênnê yire wa'am na n gãnnı wuu, ³² la a tɔgrı la ên wôm dee yê sela la, la nêra nêra ka to'oge a yetɔga la. ³³ Nêr-seka n to'oge a yetɔga la sake me ti Nawênnê de la sira dãana. ³⁴ Se'ere n soe la, seka ti Nawênnê tøm na tɔgrı la Nawênnê yetɔga, Nawênnê n bɔ ẽ a Sia pãŋa zozo'e la iŷã.

³⁵ Sɔ Nawênnê nõŋe a Dayua la me, ti a dıke sela woo êŋe a nu'usum. ³⁶ Seka n bɔ a Dayua la sira tarı la vɔm n ka ba'asrı. La seka n ka sake a Dayua la kãn yê vɔm n ka ba'asrı, la Nawênnê sũ-isgre boe a dãana zuo.»

Azezi tɔgrı la Samaari pɔka

4 Azezi daan bãŋe me ti Farisi dõma wôm ti êŋa yetı karênbiisi gãnna, dee misri ba ko'om puam gãnna Azã. ² La, la daan dagı Azezi mênja n misri ba ko'om puam, la de la a karênbiisi la. ³ La Azezi n daan bãŋe ban tɔgrı se'em na, ti a ze'ele Zude so'olum İebra Galile. ⁴ La daan de la a doose Samaari so'olum puam tole. ⁵ Ti a daan sêŋe ka paage Samaari tēja yu'ure n de Sisaarı n İem va-seka ti Azakɔbı yuun bɔ a bia Azozefu la. ⁶ Azakɔbı lua n daan boe bilam, ti Azezi sêŋe targe zı'ire lua la nõorum. La daan de wu wun-tēja zuu-têŋasuka.

⁷ Ti Samaari pɔka wa'am ti a äke ko'om. Ti Azezi yele ẽ yetı: «Êŋe ko'om bɔ ma ti m yũ.» ⁸ (Dee ti a karênbiisi la daan sêŋe tēja puam ti ba ka da dia.) ⁹ Ti pɔka la soke ẽ yetı: «Bêm ti fõn dena Zıfu sosra mam n de Samaari pɔka yetı, m bɔ fu ko'om ti fu yũ?» Se'ere n soe la, Zıfdõma la Samaari dõma daan nê'esrı la taaba.

¹⁰ Ti Azezi yele ẽ yetı: «Fu sãn mina Nawênnê n bɔ'ırlı sela, la seka n yetı fu ti «bɔ ma ko'om ti m yũ» la, fu wun sose nı ẽ, la a wun bɔ fu ko'om n bɔ'ırlı vɔm.»

¹¹ Ti pɔka la lerge yetı: «M Zuudãana, fõn ka tarı luwanne, dee ti lua la kɔ, fõn wun yê vɔm ko-bãma la be? ¹² Tõma yaaba Azakɔbı n bɔ tõma lua la, êŋa la a kɔma, la a dũnsi yũ lua la ko'om me. Fõn tẽ'ese ti fõn gãnnı tõma yaaba la bu?» ¹³ Ti Azezi lerge ẽ yetı: «Seka woo n yũ İ-êna ko'om na, koyũuro wun le tarı ẽ. ¹⁴ La seka n wun yũ ko-seba ti mam wun bɔ ẽ na, koyũuro kãn le malın tarı ẽ. La ko-seba ti mam wun bɔ ẽ na wun lebge wu bulga, bulla a puam bɔ'ıra ẽ vɔm n ka ba'asrı.»

¹⁵ Ti pɔka la lerge ẽ yetı: «M Zuudãana, bɔ ma ko-seba ti m wun yũ ti koyũuro kãn le tara mam na, ti m da le wa'am kalam wa äke ko'om.»

¹⁶ Ti Azezi yele ẽ yetı: «Sêŋe ka wi fu sira ti ya wa'am.» ¹⁷ Ti pɔka la lerge ẽ yetı: «Mam ka tarı sira.» Ti Azezi yele ẽ yetı: «Fu tarı buuru, fõn yetı fõn ka tarı

sira la. ¹⁸ Fu ele la sırba banuu, la fõn boe la seka İeele wã dagı fu sira, bela fu tɔge la asıra.»

¹⁹ Ti pɔka la yele Azezi yetı: «M Zuudãana, İeele wã mam bãŋe ti fõn de la Nawênnê nõtɔ'ısa. ²⁰ Tõma yaabdõma yuun pu'usrı Nawênnê na tãn-êna zuo. Ti yãma Zıfdõma yetı, dênı ti nêrba pu'usra Nawênnê Zerizalem.» ²¹ Ti Azezi yele ẽ yetı: «Pɔka, bɔ mam yetɔga wã sira ti wakate n sêm ti ya kãn pu'use Nawênnê n de ti Sɔ la tãn-êna zuo, bu Zerizalem. ²² Yãma Samaari dõma pu'usrı la seka ti ya ka mi. La tõma Zıfdõma pu'usrı la seka ti tõma mi, se'ere n soe la, fãare ze'ele la Zıfdõma zê'am. ²³ La wakate sêna, la a paam me, ti seba n pu'usrı Nawênnê sira sira la, wun pu'use ẽ la a Sia pãŋa, la sira. Ti Sɔ Nawênnê n boorı ti ba pu'usra ẽ se'em n bela. ²⁴ Nawênnê de la Sia, dênı ti seba n pu'usrı ẽ na, pu'usra ẽ la a Sia pãŋa, la sira.»

²⁵ Ti pɔka la lerge ẽ yetı: «Mam mi ti Mesi la sêm me, seka ti Nawênnê looge, ti ba wi'ira ti Krisi la. Êŋa sãn wa'am, a wun pa'ale tɔ sela woo.» ²⁶ Ti Azezi yele ẽ yetı: «Mam n de êŋa n tɔgrı la fõn wã.»

²⁷ Bela mã'a ti a karênbiisi la wa'am, ti la di'ige ba, ên tɔgrı la pɔka la. La baa bela, nêra nêra ka soke ẽ yetı: «Fõn boorı la bêm?» bu: «Fõn tɔgrı la pɔka la ti bêm?»

²⁸ Ti pɔka la base a yoore la, dee sêŋe tēja puam ka yele nêrba yetı: ²⁹ «Wa'am-ya wa bıse buraa n yele mam sela wuu ti mam êŋe. A nõo kãn dena la Krisi la?»

³⁰ Ti ba yese tēja la puam sêŋe a zê'am.

³¹ Wakat-êŋa ti a karênbiisi la mörgra ẽ yetı: «Karên-sãama, di we!» ³² Ti Azezi yele ba yetı: «Mam tarı la dia dita ti yãma ka mina.» ³³ Ti a karênbiisi la daan sokra taaba yetı: «Nêra n tarı dia wa'am wa bɔ ẽ bu?» ³⁴ Ti Azezi yele ba yetı: «Mam dia de la m êŋe seka n tøm mam na n boorı se'em, dee tøm a tõe na ba'ase.

³⁵ Yãma yetı: «La deege la wör-sınaası ti bõnkɔla lagsgo paage.» La mam yetı ya me ti ya gorge bıse vatɔ la, ba bı me paage lagsgo. ³⁶ Seka n lagsrı la põn tara la yɔɔɔ. Lagsgo la de la nêrba ti a lagsrı ti ba tara vɔm n ka ba'asrı. Bela ti seka n bure, la seka n lagsı la lagum ita sũ-yêlga. ³⁷ Yetɔg-êna wã de la sira: «Ayêma n butı, ti ayêma lagsra.» ³⁸ Mam tøm ya ti ya sêŋe ka lagsı la nêrba, wu va'am ti yãma ka tøm dee lagsra a bõnkɔla. La de la nêrba baseba n tõi ti yãma po dita tõe na yõɔɔ.»

³⁹ Samaari tẽn-êŋa nêrba zozo'e bɔ Azezi sira me, pɔka la n yele ba yetı: «A yele mam na sela wuu ti mam êŋe» la iŷã. ⁴⁰ Bela ti Samaari dõma la wa'am Azezi zê'am wa sose ẽ yetı, a bɔna bãma zê'am. Ti a bɔna ba zê'am dabsa ayi.

⁴¹ Ti nêrba zozo'e daan le bɔ ẽ sira pa'ase, a yetɔga la iŷã. ⁴² La ba daan yele pɔka la yetı: «La ka le dena fõn yele la iŷã ti tõma bɔ ẽ sira. Tõma mênja wôm a yetɔga me, la tõma mi ti êna sırlı de la dũnia Fãagra la.»

Azezi boti naba tóntón-ke'ema bia yě ĩmã'asum

⁴³ La dabsa ayi la poorum, Azezi yese bilam sêñe la Galile. ⁴⁴ Azezi mēña daan yeti: «Ba ka nannu Nawēnne nōtɔ'ɔsa a mēña tēña.» ⁴⁵ La ēn paage Galile la, ba to'oge ē mē sōña sōña, se'ere n soe la, ba mēña daan sēñe Zerizalem Zɔɔg-base kibsa la wakate ka yě ēn ēñe se'em na wuu mē.

⁴⁶ La Azezi daan le sēñe la Kana n boe Galile so'olum na, zē'e-seka ti a daan boti ko'om lebege dāam na. La naba tóntón-ke'ema n daan boe Kapernaum ti a dayua bē'era. ⁴⁷ Ti a wōm ti Azezi ze'ele la Zude wa'am Galile, ti a sēñe a zē'am ka sose ē yeti, ēña bia n boe mī ti a ki, a wa'am wa boti a yě ĩmã'asum. ⁴⁸ Ti Azezi yele ē yeti: «Ya sãn ka yě bōn-yālma, la yel-kirsu, ya ka bɔ'ɔru mam sɔra.» ⁴⁹ Ti naba tóntón-ke'ema la yele ē yeti: «M Zuudāana, wa'am tɔtɔ ti m bia la nãn ka ki.» ⁵⁰ Ti Azezi yele ē yeti: «Sēñe, fu bia la yeege mē.» Ti buraa la daan bɔ Azezi yetɔga la sɔra, kulla. ⁵¹ La ēn boe sore kulla la, ti a tóntónba to'use ē, yele ē yeti: «Fu bia la yeege mē.» ⁵² Ti a soke ba ti: «Wakat-kāna ti la sōt?» Ti ba lerge ē yeti: «Zaam wuntēñe karf-ayila ti a ɔɔɔ la base ē.» ⁵³ Ti a sɔ la bāñe ti la de la wakat-ēña ti Azezi yele ēña ti a bia la yeege mē na. Ti ēña la a yir-dōma wuu bɔ Azezi sɔra. ⁵⁴ Ēna de la bōn-yālma buyi dāana ti Azezi ēñe Galile, ēn daan ze'ele Zude lebe Galile la.

Azezi boti kɔɔrɔ yě ĩmã'asum

5 Bela poorum, Azezi sēñe la Zerizalem ti a ka di Zifdōma kibsa. ² La kulga n daan boe Zerizalem ti a yu'ure la Ebre yetɔga dena Betesda, a lem na piisi zanōre, ti pōnsi banuu bɔna mī. ³ Ti bā'adōma zozo'e daan gā pōnsi la tēña, fɔɔsɔ la wɔbsɔ, la kɔɔrɔ. [Ba daan gu'ura la ko'om na sãn wa dāme. ⁴ Se'ere n soe la, Nawēnne maleka n daan sigri kulga la puam wakat-wakate dāmna ko'om na. La maleka la sãn dāme ko'om na, nēr-seka n dēñe sige ko'om na puam, a yēti ĩmã'asum mē, baa bā'a-seka n taru ē.]

⁵ La buraa ayila n daan boe mī ti bā'a tara ē yuuma pitā la anii. ⁶ Ti Azezi yě ē gāi, bāñe ti a bē yuuge mē, yele ē yeti: «Fu boori ti fu yě ĩmã'asum?» ⁷ Ti bā'ara la lerge ē yeti: «Zuudāana, mam ka tara nēra ti ko'om na sãn wa dāme ti a wun yōke mam base kulga la puam. Mam sãn yeti m sige, ayēma n dēñe mam sige.» ⁸ Ti Azezi yele ē yeti: «Isge, dıke fu bōn-gā'ala sēñe.» ⁹ Bilam zē'am ti buraa la daan yě ĩmã'asum, dıke a bōn-gā'ala sēñe.

La daar-ēña daan de la Zifdōma vo'osgo daare.

¹⁰ Bela ti Zifdōma nēñadōma yele buraa la n yě ĩmã'asum na yeti: «La de la vo'osgo daare, la sisri mē ti fu tu bōn-gā'ala.» ¹¹ Ti a lerge ba yeti: «Seka n boti mam yě ĩmã'asum na, yele mam ti m dıke m bōn-gā'ala sēñe.» ¹² Ti ba soke ē yeti: «Nēr-kāna n yele fōn

yeti, fu dıke fu bōn-gā'ala sēñe?» ¹³ Ti seka n yě ĩmã'asum na ka mina ēn de seka, se'ere n soe la, Azezi daan kē la nēr-kuuɔɔ n boe bilam na puam fōrge.

¹⁴ Bela poorum ti Azezi yě buraa la Wēnde-kātum na, yele ē yeti: «Bıse, fu yě ĩmã'asum. Da le tōm tōon-be'ero, ti sela n de be'em gānna bela da paage fɔ.» ¹⁵ Ti buraa la sēñe ka yele Zifdōma nēñadōma la, ti nēr-seka n boti ēña yě ĩmã'asum na de la Azezi. ¹⁶ Ti ba daan eera ti ba nāmse Azezi, ēn boti kɔɔrɔ yě ĩmã'asum vo'osgo daare la ĩyā.

Nawēnne Dayua Azezi taru a Sɔ nōore mē

¹⁷ Ti Azezi yele ba yeti: «Mam Sɔ tōnnu mē wa paam nānanne wā, ti mam mē tōnna.» ¹⁸ Ti Zifdōma nēñadōma daan maln eera ti ba ku ē, la dagi ēn sã'am vo'osgo daare sisgo la mā'a ĩyā, la de la ēn ken wi'ira Nawēnne ti ēña Sɔ, ita a mēña wu Nawēnne na ĩyā.

¹⁹ Ti Azezi yele ba yeti: «Mam yeti ya la sɔra sɔra, ti Dayua la ka tā ita sela sela la a mēña nōore. A itı la ēn yě ti a Sɔ itı se'em na. Sɔ la n itı se'em na, a Dayua la mē itı la bela mēña. ²⁰ Se'ere n soe la, Sɔ la nōñe a Dayua la mē, pa'ale ē sela wuu ti ēña mēña itı, la a wun pa'ale ē na tōon-kāra n gānnu bāna wā ti la di'ige ya. ²¹ La wu Sɔ la n vo'ori kūm bɔ'ɔra ba vɔm na, Dayua la mē bɔ'ɔra seba ti a boori vɔm na bela. ²² La Sɔ la ka diti nēra nēra sarıya, a base sarıyadia la wuu bɔ la a Dayua la, ²³ ti nēba wuu wun nã'asra Dayua la, wu ba nã'asrı a Sɔ la se'em na. La seka n ka nã'asrı Dayua la, a ka nã'asrı Sɔ la n tōm ē na.

²⁴ Mam yeti ya la sɔra sɔra, ti seka n selse mam yetɔga dee bɔ seka n tōm mam na sɔra, a taru la vɔm n ka ba'asrı. La ba kãn di a sarıya. La a yese la kūm puam tara vɔm n ka ba'asrı. ²⁵ Mam yeti ya la sɔra sɔra, ti wakate sēm mē, la a paam mē, ti seba n ka taru vɔm na wun wōm Nawēnne Dayua la kōa, la seba n wōm na wun vɔa. ²⁶ Se'ere n soe la, Sɔ Nawēnne n taru vɔm a mēña bɔ'ɔra se'em na, a bɔ a Dayua la mē vɔm na bela, ti a tara bɔ'ɔra. ²⁷ La a bɔ ē nōore mē ti a dita sarıya, ēn de Nērsaala Dayua la ĩyā. ²⁸ Da base-ya ti mam n tɔge se'em na di'ige ya, se'ere n soe la, wakate sēm mē ti seba wuu n boe yɔɔm wun wōm a kōa, ²⁹ vo'oge ze'ele yɔɔɔ puam yese. Ti seba n ēñe sōña yě vɔm Nawēnne zē'am, la seba n ēñe be'em, a wun di ba sarıya.

³⁰ Mam ka tā wun ēñe sela sela la m mēña nōore. Mam diti sarıya wu mam n wōm se'em Nawēnne zē'am na. La mam sarıyadia mase mē. Se'ere n soe la, mam ka eerı ti m ēñe mam mēña n boori se'em, la de la seka n tōm mam na n boori se'em.

³¹ Mam sãn bɔ m mēña kaseto, a kãn dena kaseto asıra. ³² La nēra ayēma n boe bɔ'ɔra mam kaseto, la mam mi ti a kaseto la ti a bɔ'ɔru mam yelle la de la sɔra. ³³ La yāma tōm nēra mē Azã zē'am, ti a tɔge sɔra kaseto bɔ ya. ³⁴ Sãn dena mam, mam kaseto ka ze'eti

nërsaala zë'am, la mam yele bela ti ya tä'age yë la fäare. ³⁵ Azã daan än wu fitla n lanje nëege, la yäma daan sake me ti ya ënge sü-yëlga wakate fëe mä'a la a peelem na. ³⁶ La mam tarı kaseto me gänna Azã dënne na. La de la tōon-seba ti mam So bo mam ti m tōm na, tōon-bāma ti mam tōnnı na n bo'wı mam kaseto pa'ala ti mam So Nawēnne n tōm mam. ³⁷ La mam So la n tōm mam na bo'wı mam kaseto me. Yäma nän ka wōm a kōa, la ya nän ka yë ë. ³⁸ La a yetoga la ka boe ya süure puam, bela n soe ti ya ka bo seka ti a tōm na sira. ³⁹ Yan eerı ti ya bānje Nawēnne gōnjo yetoga la vōore la, ya tē'ese ti ya wun yë la vōm n ka ba'asrı a puam. La de la gōn-ēja n tōgrı mam yelle. ⁴⁰ La ya ka boorı ti ya wa'am mam zë'am wa yë vōm na.

⁴¹ Mam ka eerı nā'asgo nërsaalba zë'am. ⁴² La mam mi ya, mam mi ti ya ka nōnje Nawēnne. ⁴³ Mam wa'am na m So yu'ure, ti ya ka to'oge mam. La ayēma sän wa'am na a mēnja yu'ure, ēja ti ya to'orı. ⁴⁴ Yäma to'osrı la pēka taaba zë'am, dee ka era pēka n ze'eti Nawēnne ayıla mä'a zë'am. Yäma wun ēnje la wāne bo mam sira? ⁴⁵ Da tē'ese-ya ti mam n wun yetı ya ka tarı buurı mam So la zë'am, la de la Amoyisi n wun yetı ya ka tarı buurı, ēja ti ya te'ege. ⁴⁶ Ya sän bo nı Amoyisi sira, ya wun bo mam mē sira me, se'ere n soe la, a gul-se mam yelle me. ⁴⁷ La ya sän ka bo ēja n gulse bōn-seba la sira, ya wun ēnje la wāne bo mam yetoga la sira?»

Azezi bo nēr-kuuŋjo dia

(Amatie 14:13-21, Amarkı 6:30-44, Aluki 9:10-17)

6 Bela poorum, Azezi daan sēnje la Galile mögre ti ba ken wi'ira ti Tiberiadı mögre la doone. ² Ti nēr-kuuŋjo doose ë, ban yë ti a tōnnı tōon-yälma botı bā'adōma yēta imā'asum na iŷā. ³ Ti Azezi la a karēnbiisi zom tānja zuo ka zēa. ⁴ La Zifdōma kibsa n de Zōog-base la daan lem me. ⁵ Ti Azezi zēke zuugo yë nēr-kuuŋjo n sēm a zë'am, ti a soke Afilipi yetı: «Ti wun yë dia la be da bo nēr-bāna wā ti ba di?»

⁶ A daan yele wāna ti a di la a yem bise, bēm iŷā, a mēnja daan pōn mina ēja n wun ēnje se'em me. ⁷ Ti Afilipi lerge ë yetı: «Baa ti sän da dia lig-kōba kōbsyi, la ka tä wun seke ti nēra woo to'oge fēfēe.» ⁸ Ti Azezi karēnbıa ayıla yu'ure n de Aāndre n de Asimō-pıyεrı yıbga yele ë yetı: ⁹ «Budibla n boe kalam tara borborı banuu, la zūn-pıgsı bayi. La bāna de la bēm, ti ti wun dıke bo nērba n zo'oge wāna?»

¹⁰ Ti Azezi yetı: «Base-ya ti nērba la zı'ire.» La möogo n daan boe zē'e-ēja zo'oge. Ti ba zı'ire, la buraası källe daan de wu tusanuu. ¹¹ Ti Azezi to'oge borborı la pu'use Nawēnne, dee puı bo nērba la n zı la, la a daan ken ēnje zūma la mē na bela. Ti nēra woo to'oge ēn boorı se'em di tıge.

¹² La ban daan di tıge la, ti Azezi yele a karēnbiisi la yetı: «Lagse-ya borbor-gito la n deege la, ti sela da sā'am.» ¹³ Ti ba lagse borborı banuu la ti ba di deege

la gito, ti ba pıre pıto pia la ayi. ¹⁴ Nērba la n yë Azezi n ēnje bōn-yälma la, ti ba yetı: «Éna wā sırı de la Nawēnne nōtō'usa la ti ba yetı a sēm dūnia zuo la.» ¹⁵ La Azezi daan bānje me ti ba boorı ti ba pērgε ēja me ti a di na'am, ti a lebe sēnje tānja la zuo ēja ayıla mä'a.

Azezi sēnnı ko'om zuo

(Amatie 14:22-33, Amarkı 6:45-52)

¹⁶ Ti zaanōore daan paage, ti Azezi karēnbiisi la sige mögrum, ¹⁷ ka kē ōorŋjo pārgıa ko'om na we'esa Kapernaum, mögre la ke bōba. Ti wēnne daan sobe, dee ti Azezi nän ka sēnje ba zë'am. ¹⁸ Ti kuseb-kāte vugra ti ko'om na wē'era ke'enke'em. ¹⁹ Ti ba sēnje mase wu kilomētrı anuu bu kilomētrı ayoobı, yë ti Azezi sēnnı ko'om na zuo lenna ōorŋjo la, ti dabeem yōke ba. ²⁰ Ti Azezi yele ba yetı: «La de la mam. Da zoe-ya dabeem.» ²¹ Ti ba bōcra ti a kē ōorŋjo la puam. Ti ōorŋjo la dare paage zē'e-seka ti ba we'esi la.

Azezi de la dia n bo'wı vōm

²² Ti beere daan wiige, ti nēr-seba n weege mögre la doone ke bōba la bānje ti ōorŋjo ayıla mä'a n zaam boe. La ba yë ti Azezi ka kē ōorŋjo la puam la a karēnbiisi la, a karēnbiisi la mä'a n förgε. ²³ Ti ōorŋjo baseba ze'ele Tiberiadı wa'am wa lem zē'e-seka ti Zuudāana Azezi daan pu'use Nawēnne dia la iŷā, dee ti ba di la. ²⁴ La nēr-kuuŋjo la n yë ti Azezi, la a karēnbiisi la ka boe zē'e-ēja la, ti ba kē ōorŋjo sēnje Kapernaum ti ba ka ε ë.

²⁵ La ba daan sēnje ka yë Azezi la mögre la doone ke bōba, soke ë yetı: «Karēnsāama, wāne mä'a ti fōn wa'am kalam?» ²⁶ Ti a lerge ba yetı: «Mam yetı ya la sira sira, ti yan eerı mam na, dagı ti ya bānje la mam bōn-yälma la vōore, la de la yan di tıge la iŷā. ²⁷ Da tōn-na-ya dia n wun sā'am iŷā, tōnna-ya di-seba n bo'wı vōm n ka ba'asrı iŷā, Nërsaala Dayua n wun bo ya vōm ēja. Se'ere n soe la, la de la ēja ti Nawēnne n de So la bo ë a nōore.» ²⁸ Ti ba soke Azezi yetı: «Ti wun ēnje la wāne tōm tōon-seba ti Nawēnne boorı?» ²⁹ Ti Azezi lerge ba yetı: «Tōon-seka ti Nawēnne boorı ti ya tōm, de la ya sake seka ti a tōm na.» ³⁰ Ti ba yele ë yetı: «Tōon-yälma kāna ti fōn wun ēnje ti tōma yë, bo fu sira? Tōon-kāna ti fōn wun tōm? ³¹ Ti yaabdōma yuun di la dia ti ba wi'iri ti mannı weem, wu lan gulse se'em na, a yuun bo ba la dia n ze'ele Nawēnne yire, ti ba di.»

³² Ti Azezi lerge ba yetı: «Mam yetı ya la asıra, ti la dagı Amoyisi n yuun bo ya dia n ze'ele Nawēnne yire la, la de la mam So Nawēnne n bo'wı ya dia sira sira n ze'ele Nawēnne yire. ³³ Dia sira sira ti Nawēnne bo ya la, de la seka n ze'ele Nawēnne yire sige dūnia bo'wı nērba vōm na.» ³⁴ Ti ba yele ë yetı: «Zuudāana, bo'wıa to di-ēja daare woo.»

³⁵ Ti Azezi lerge ba yetı: «Mam n de dia n bo'wı vōm na. Nēr-seka woo n sēm mam zë'am, kōm kän malın

yõke ë, la seka n bɔ mam sɪra, koyũuro kãn malɪn tara ë. ³⁶ La mam yele yãma mɛ, tɪ ya yẽ mam mɛ, la ya ka bɔ mam sɪra. ³⁷ Seba wuu tɪ mam Sɔ Nawẽnnɛ bɔ'wɪ mam, sɛm mam zẽ'am mɛ. La seka n sɛm mam zẽ'am, mam kãn dige nẽra baa ayɪla base. ³⁸ Se'ere n soe la, mam ka ze'ele Nawẽnnɛ yire sigum tɪ m ẽɲɛ mam n boorɪ se'em, mam sigum tɪ m tɔm na seka n tɔm mam na n boorɪ se'em. ³⁹ La seka n tɔm mam na n boorɪ se'em de la m da botɪ nẽr-seba wuu tɪ a bɔ mam na baa ayɪla sã'am, la de la m vo'oge ba wuu dũnia ba'asgo daare. ⁴⁰ Mam Sɔ la n tɔm mam na n boorɪ se'em de la seka woo n yẽ a Dayua la, dee bɔ ë sɪra wun yẽ vɔm n ka ba'asɪ. Mam wun vo'oge ë dũnia ba'asgo daare.»

⁴¹ Tɪ Zɪfdõma yõnna Azezi, ẽn yetɪ, ẽɲa n de dia n ze'ele Nawẽnnɛ yire sigum na ãyã. ⁴² Tɪ ba daan yetɪ taaba yetɪ: «Bura-ẽna dagɪ Azoɛfɪ bia Azezi, seka tɪ tɔma mi a sɔ, la a ma la? La bẽm tɪ a yetɪ, ẽɲa ze'ele la Nawẽnnɛ yire?» ⁴³ Tɪ Azezi yele ba yetɪ: «Da yõnna-ya. ⁴⁴ Nẽra ka tã wun wa'am mam zẽ'am tɪ la sãn dagna mam Sɔ n tɔm mam na n tarɪ ë wa'am. La mam n wun vo'oge ë dũnia ba'asgo daare. ⁴⁵ La gulɛ Nawẽnnɛ nɔtɔ'wɪba gõnnɔ puam yetɪ: «Nawẽnnɛ n wun pa'ale ba wuu.» La seka woo n selse mam Sɔ la, dee to'oge a pa'algo la, sɛm mam zẽ'am mɛ. ⁴⁶ Nẽra nãn ka yẽ Sɔ Nawẽnnɛ, sãn dagna seka n ze'ele a zẽ'am na mã'a n yẽ ë. ⁴⁷ Mam yetɪ ya la asɪra, tɪ seka n bɔ mam sɪra tarɪ la vɔm n ka ba'asɪ. ⁴⁸ Mam n de dia n bɔ'wɪ vɔm na. ⁴⁹ Yãma yaabdõma yuun di mannɪ mɛ weego puam, la ba ki mɛ. ⁵⁰ La di-seka n ze'ele Nawẽnnɛ yire sigum na, de la dia tɪ nẽr-seka n di kãn ki. ⁵¹ Mam n de di-seka n bɔ'wɪ vɔm n ze'ele Nawẽnnɛ yire sigum, tɪ nẽra sãn di di-ẽna, a wun vɔa wakate wuu. La di-seka tɪ mam wun bɔ dũnia dõma tɪ ba yẽ vɔm na, de la mam ãyã.»

⁵² Tɪ Zɪfdõma la wẽ'era nõke'ene la taaba yetɪ: «Nẽr-ẽna wã wun ẽɲɛ la wãne bɔ tɔma a ãyã tɪ tɔma di?» ⁵³ Tɪ Azezi yele ba yetɪ: «Mam yetɪ ya la sɪra sɪra, tɪ ya sãn ka di Nẽrsaala Dayua la ãyã, la ya sãn ka yũ a zum, ya ka tarɪ vɔm na ya puam. ⁵⁴ Seka n diti mam ãyã dee yũura mam zum tarɪ la vɔm n ka ba'asɪ, la mam wun vo'oge ë dũnia ba'asgo daare. ⁵⁵ Se'ere n soe la, mam ãyã de la dia mẽɲa mẽɲa, la mam zum de la bõn-yũula mẽɲa mẽɲa. ⁵⁶ Seka n diti mam ãyã, dee yũura mam zum boe la mam mɛ, tɪ mam bɔna la ë. ⁵⁷ Mam Sɔ n tɔm mam na, de la vɔm dãana, ẽɲa ãyã tɪ mam tara vɔm, bela, seka n diti mam ãyã mẽ wun vɔa mam ãyã. ⁵⁸ Ẽna de la dia n ze'ele Nawẽnnɛ yire sigum, a ka ãn wu di-seka tɪ ya yaabdõma yuun di ki la. Seka n di di-ẽna wun vɔa wakate wuu.» ⁵⁹ Azezi n daan zãsnɪ nẽrba Kapernaum wẽndeego la puam na, tɪ a tɔge yetɔg-bãna.

⁶⁰ La a karẽnbiisi baseba zozo'e n daan wõm bela la, tɪ ba yele taaba yetɪ: «Yetɔg-ẽna to'ore tɔ mɛ, әне n wun tã'age sake yetɔg-ẽna wã?» ⁶¹ Tɪ Azezi bãɲɛ tɪ a karẽnbiisi la yõnnɪ mɛ bõn-ẽna yelle, tɪ a yele ba yetɪ:

«Bõn-ẽna botɪ yãma lebra la poorum kãn le doose mam? ⁶² La ya sãn yẽ tɪ Nẽrsaala Dayua la zonni ẽn daan boe zẽ'a na, ya wun ẽɲɛ la wãne? ⁶³ La de la Nawẽnnɛ Sɪa n bɔ'wɪ vɔm na, nẽrsaala ka tã wun ẽɲɛ sela sela. Yetɔg-seba tɪ mam tɔge bɔ ya la, ze'ele la Nawẽnnɛ Sɪa zẽ'am bɔ'wɪ vɔm. ⁶⁴ La baseba n boe ya tẽɲasuka ka bɔ mam sɪra.» Se'ere n soe tɪ Azezi yele bela la, a daan dẽɲɛ bãɲɛ mɛ halɪ pɔspɔsɪ seba n kãn bɔ ẽɲa sɪra, la seka n wun pa'ale tɪ ba yõke ẽɲa. ⁶⁵ Tɪ a le yele ba yetɪ: «Bela n soe tɪ mam yetɪ, nẽra ka tã wun wa'am mam zẽ'am, tɪ la sãn dagna mam Sɔ la n bɔ ë sore.»

⁶⁶ Azezi n tɔge bela la poorum, a karẽnbiisi la zozo'e base ë mɛ dee fõrge ka le doose ë. ⁶⁷ Tɪ Azezi soke a karẽnbiisi pia la ayi la yetɪ: «Yãma mẽ boorɪ tɪ ya base mam dee fõrge mɛ bu?» ⁶⁸ Tɪ Asimõ-pɪyɛɛɪ lerge ë yetɪ: «Zuudãana, tɔma wun base fõn dee sɛɲɛ la ãn zẽ'am? Fõn tarɪ la yetɔga n bɔ'wɪ vɔm n ka ba'asɪ. ⁶⁹ La tɔma bɔ sɪra mɛ dee bãɲɛ tɪ fõn de la Pupeelem Dãana tɪ Nawẽnnɛ tɔm.» ⁷⁰ Tɪ Azezi lerge ba yetɪ: «Mam n looge yãma pia la ayi la. La ya nẽra ayɪla de la Asũtãana nẽra.» ⁷¹ A daan tɔgrɪ la Asimõ bia Azudaasɪ Iskariyo yelle. Se'ere n soe la, ẽɲa n daan de a karẽnbiisi pia la ayi la nẽra ayɪla n wun wa pa'ale tɪ ba yõke ë.

Azezi yɪbsɪ ka bɔ ë sɪra

7 Bela poorum, Azezi daan gilgrɪ la Galile, a ka boorɪ tɪ a gilge Zude, Zɪfdõma nẽɲadõma n eerɪ ë tɪ ba ku la ãyã. ² Tɪ Zɪfdõma põnsɪ kibsa daan lɛm, ³ tɪ Azezi yɪbsɪ yele ë yetɪ: «Base kalam dee sɛɲɛ Zude tɪ fu karẽnbiisi mẽ yẽ fu tɔoma la tɪ fu tõnnɪ na. ⁴ Se'ere n soe la, nẽra sãn bɔ'wɪ tɪ nẽrba bãɲɛ ë, a ka sugrɪ a tɔoma. Fõn tõnnɪ tõon-bãna wã, botɪ nẽrba wuu bãɲɛ fɔ.» ⁵ La a yɪbsɪ la daan ka bɔ ë sɪra. ⁶ Tɪ Azezi yele ba yetɪ: «Mam wakate nãn ka paage, la wakate woo ãn sõɲa mɛ bɔ yãma. ⁷ Dũnia dõma kãn tã'age sise yãma, la ba sisri mam mɛ, mam n tɔgrɪ pa'ala tɪ ba tɔoma de la be'em na ãyã. ⁸ Yãma sɛɲɛ kibsa la, tɪ mam nãn kãn sɛɲɛ, se'ere n soe la, mam wakate nãn ka paage.» ⁹ A yele ba bela dee weege la Galile.

Azezi boe la põnsɪ kibsa

¹⁰ La a yɪbsɪ la n daan sɛɲɛ kibsa la, a mẽ sɛɲɛ mɛ, la a ka botɪ nẽrba yẽ ë. ¹¹ Tɪ Zɪfdõma nẽɲadõma ɛɛra ë kibsa la puam, sɔkra yetɪ: «A boe la be?» ¹² Tɪ nẽrba waasna tɔgra a yelle nẽr-kuuɲɔ la puam zozo'e, tɪ seba yetɪ: «A de la nẽr-sõɲɔ», tɪ baseba yetɪ: «Ayɛɪ, a pã'asɪ la nẽrba.» ¹³ La nẽra nẽra daan ka saage tɔge a yelle nẽrba la zẽ'am, ban zotɪ Zɪfdõma nẽɲadõma la ãyã.

¹⁴ La kibsa la daan paage la pusuka, tɪ Azezi kẽ Wẽnde-kãtum na zãsna nẽrba. ¹⁵ Tɪ la di'ige Zɪfdõma, tɪ ba yetɪ: «Bura-ẽna ẽɲɛ la wãne mina Nawẽnnɛ gõɲɔ sõɲa, dee ka yẽ zãsɲɔ?» ¹⁶ Tɪ Azezi yele ba yetɪ: «Mam

zäsñj la ka ze'ele mam mēña zē'am, la ze'ele la sēka n tōm mam na zē'am. ¹⁷ Nēra sãn bɔɔra tɪ a ēñe Nawēnne n boorɪ se'em, a wun bāñe zäsñj la sãn ze'ele la Nawēnne zē'am, bu mam sãn tɔgra la mam mēña pāña. ¹⁸ Nēr-seka n tɔgrɪ la a mēña pāña, eerɪ la a mēña pēka. La nēr-seka n eerɪ sēka n tōm ē na pēka, ēña de la sɪra dāana, la sēla n ka mase ka boe a puam. ¹⁹ Amoyisi n bɔ ya lɔɔ la, dagɪ belɔ? La ya nēra nēra ka tɪ lɔɔ la n ye'le se'em na. Bēm tɪ ya ēera mam tɪ ya ku?» ²⁰ Tɪ nēr-kuuñj la lerge ē yetɪ: «Kulkā'arga n dolɪ fo! Ān eerɪ fu tɪ a ku?» ²¹ Tɪ Azezi lerge ba yetɪ: «Mam daan tōm tōon-yālma ayɪla mē, tɪ la di'ige ya. ²² Amoyisi n yuun bɔ ya nōore yetɪ, ya wāta ya budimto. La, la dagɪ Amoyisi n pɔse ēñe belɔ, la de la tɪ sɔ-yaabdōma. La yāma wātɪ mē baa vo'osgo daare. ²³ Yāma sãn wāta ya budimto vo'osgo daare tɪ la ka sām Amoyisi lɔɔ la, bēm tɪ yāma sūnsōa yīige la mam, mam n daan botɪ buraa la yē īmā'asum vo'osgo daare la īyā. ²⁴ Da kãn dɪke-ya nini n yē se'em mōñe nēra buurɔ, bɔ-ya buurɔ wu lan mase se'em na.»

²⁵ Tɪ Zerizalem nērba baseba soke yetɪ: «Dagɪ bura-ēna tɪ ba eerɪ tɪ ba ku la? ²⁶ Bɪse-ya, a tɔgrɪ la nēr-kuuñj puam, dee tɪ ba ka ye'le ē se'ere. Nēñadōma la na'an bāñe mē tɪ a de la Krisi tɪ Nawēnne tōm na bu? ²⁷ Tōma mi bura-ēna n ze'ele zē'a, la Krisi la sãn wa sēna, nēra kãn bāñe ēn ze'ele zē'a.»

²⁸ Belɔ tɪ a Azezi daan tɔge ke'enke'em ēn zāsɪ nērba Wēnde-kātum na yetɪ: «Ya tē'ese tɪ ya mi mam mē dee bāñe mam n ze'ele zē'a, la mam ka wa'am na m mēña nōore. La sēka n tōm mam na de la sɪra dāana, yāma ka mi ē. ²⁹ La mam nōo mi ē, se'ere n soe la, mam ze'ele la ēña zē'am, ēña n tōm mam.» ³⁰ Tɪ ba ēera sore tɪ ba yōke ē, la nēra nēra ka kalum ē, se'ere n soe la, a wakate daan nãn ka paage. ³¹ La nēr-kuuñj la nērba zozo'e daan bɔ ē sɪra mē, dee yeta tɪ: «Krisi la sãn wa wa'am, a kãn yāñe ēñe bōn-yālma gānna bura-ēna n ēñe wā.»

Farisi dōma tōm nērba tɪ ba yōke Azezi

³² Tɪ Farisi dōma wōm nērba la n waasɪ Azezi yelle, tɪ bāma la Nawēnne kāabgɔ kēma nēñadōma tōm gu'urba tɪ ba ka yōke Azezi.

³³ Tɪ Azezi ye'le yetɪ: «Mam wun ken bɔna la ya la wakate fēe, dee lebe sēka n tōm mam na zē'am. ³⁴ Ya wun ēera mam, la ya kãn yē mam, la mam n boe zē'a na, ya kãn tā'age wa'am bilam.» ³⁵ Belɔ tɪ Zifdōma ye'le taaba yetɪ: «Bura-ēna wun wa sēñe la be tɪ tōma kãn yē ē? A yetɪ a sēñe la Zifdōma n wɪrge bɔna Grēkɪdōma tēñasuka la zē'am, ka zāsum Grēkɪdōma bu? ³⁶ Yetɔg-ēna wā vōore de la bēm tɪ a yetɪ: «Ya wun ēera mam, la ya kãn yē mam, la mam n boe zē'a na, ya kãn tā'age wa'am bilam?» »

Nawēnne Sɪa n bɔ'ɔrɪ vɔm

³⁷ La kibsa la ba'asgo daare n de a dabs-kāte daare, tɪ Azezi daan isge ze'ele tɔgra ke'enke'em yetɪ: «Koyūuro sãn tara nēr-seka, a wa'am mam zē'am wa yū. ³⁸ Nēr-seka n bɔ mam sɪra, ko'om n bɔ'ɔrɪ vɔm wun bulla a puam, wu Nawēnne gōñj n ye'le se'em na.» ³⁹ Azezi n ye'le belɔ la, la de la Nawēnne Sɪa tɪ sēba n bɔ'ɔrɪ ē sɪra la wun wa to'oge. Se'ere n soe la, Nawēnne daan nãn ka bɔ a Sɪa la, Azezi n daan nãn ka yē a na'am pāña la īyā.

Nērba la welse mē Azezi īyā

⁴⁰ Nēr-kuuñj la n wōm yetɔg-bāna la, tɪ baseba yetɪ: «Ēna sɪrɪ de la Nawēnne nōtɔ'ɔsa la.» ⁴¹ Tɪ baseba yetɪ: «Ēna de la Krisi la.» Tɪ baseba daan yetɪ: «Krisi la wun ze'ele la Galile bu? ⁴² Nawēnne gōñj la ye'le tɪ Krisi la wun dena la naba Adavidi yuñja, a wun ze'ele la Betelem, tēn-seka tɪ Adavidi yuun boe la.» ⁴³ Belɔ tɪ welgre wa'am nērba la puam Azezi īyā. ⁴⁴ Tɪ ba nērba baseba daan bɔɔra tɪ ba yōke ē, la nēra nēra ka kalum ē.

⁴⁵ La gu'urba la tɪ kāabgɔ kēma nēñadōma, la Farisi dōma la tōm na lebe ba zē'am mē, tɪ ba soke ba yetɪ: «Bēm tɪ ya ka yōke ē wa'am?» ⁴⁶ Tɪ ba lerge yetɪ: «Nēra nãn ka tɔge wu bura-ēna wā.» ⁴⁷ Tɪ Farisi dōma la soke ba yetɪ: «A pā'ase yāma mē yāñe mē? ⁴⁸ Tōma nēñadōma nēra ayɪla, bu Farisi nēra bɔ ē sɪra mē bu? ⁴⁹ La de la nēr-kuuñj la n ka mi lɔɔ la, ba wun yē la kā'a-be'ero.» ⁵⁰ Tɪ Anikodem n de ba nēra ayɪla n daan sēñe ka yē Azezi la, ye'le ba yetɪ: ⁵¹ «Tōma lɔɔ la bɔ sore tɪ tɪ mōñe nēra buurɔ, dee ka selse ē bāñe ēña n ēñe sēla?» ⁵² Tɪ ba lebse ye'le ē yetɪ: «Fōn mē de la Galile nēra bu? E bɪse, fu wun bāñe tɪ Nawēnne nōtɔ'ɔsa ka ze'etɪ Galile.» [⁵³ Tɪ nēra woo daan kule a yire.

Pɔka n ēñe yalsɪ

8 La Azezi sēñe la Oliivi tāña zuo. ² Tɪ beere wiige bulika yu'urñj yu'urñj, tɪ a le lebe Wēnde-kātum na, tɪ nērba wuu daan sēñe a zē'am, tɪ a zēa zāsna ba. ³ Tɪ lɔɔ karēnsāandōma, la Farisi dōma tarɪ pɔka tɪ ba kuke tɪ a boe mɪ ita yalsɪ wa'am wa botɪ a ze'ele nērba la tēñasuka, ⁴ dee ye'le Azezi yetɪ: «Karēnsāama, tōma kuke la pɔka wā tɪ a boe mɪ ita yalsɪ. ⁵ Amoyisi bɔ tōma nōore lɔɔ gōñj la puam yetɪ, pɔka sãn ēñe wāna, tɪ lobe ē na kuga ku. La fōn yetɪ bo?»

⁶ Ba ye'le belɔ tɪ ba di la a yem bɪse, tā'age dōre ē. Tɪ Azezi suure tara a nu'ubiire gulsra tēña. ⁷ Tɪ ba ken sɔkra ē, tɪ a dɔ'ɔge ye'le ba yetɪ: «Sēka n boe yāma tēñasuka ka tōm tōon-be'ego, a dēñe dɪke kugre lobe ē.» ⁸ Dee le suure gulsra tēña. ⁹ La ban wōm belɔ la, bōnkegsɪ n dēñe yese ayɪla ayɪla, tɪ ba wuu yese, dee base Azezi mā'a la pɔka la, tɪ a ze a nēñam.

¹⁰ Tl Azezi dɔ'wɛ soke ẽ yetu: «Pɔka, seba n yõke fu wa'am na beɛ? Nẽra nẽra ka di fu sarɩya sɩbɛ fɔ?» ¹¹ Tl pɔka la lerge Azezi yetu: «Ayɛi, Zuudãana.» Tl Azezi yele ẽ yetu: «Mam mẽ kãn di fu sarɩya. Sẽɛ, la da le tòm tɔon-be'ero.»]

Azezi de la dũnia peelem

¹² Tl Azezi le tɔɛ la nẽba la yetu: «Mam de la dũnia peelem. Nẽr-seka n doli mam, a kãn malun senna lika puam, a wun yẽ peelem n bɔ'wɩ wɩm.»

¹³ Tl Farisi dõma yele ẽ yetu: «Fõn mẽɲa n bɔ'wɩ fu mẽɲa kaseto, la dagɩ kaseto asura.» ¹⁴ Tl Azezi lerge ba yetu: «Baa mam sãn bɔ'wɩ m mẽɲa kaseto, mam kaseto de la sɩra. Se'ere n soe la, mam mi mam n ze'ele zẽ'a wa'am, la mam n we'esɩ zẽ'a. La yãma ka mi mam n ze'ele zẽ'a, la mam n we'esɩ zẽ'a. ¹⁵ Yãma diti sarɩya la nẽrsaala n boori se'em. La mam ka diti nẽra nẽra sarɩya. ¹⁶ La baa mam sãn dita sarɩya, mam sarɩyadia de la sɩra, se'ere n soe la, mam ka de m yula. La de la mam, la mam Sɔ n tòm mam na. ¹⁷ La yãma bɔ la puam la gulɛ yetu: «Nẽba bayi kaseto de la sɩra.»

¹⁸ Mam mẽɲa n bɔ'wɩ m mẽɲa kaseto, la mam Sɔ la n tòm mam na mẽ bɔ'wɩ mam kaseto mɛ.» ¹⁹ Tl ba soke ẽ yetu: «Fõn Sɔ la boe la be?» Tl Azezi lerge ba yetu: «Yãma ka mi mam, la ya ka mi mam Sɔ la. Ya sãn mi ni mam, ya wun mi ni mam Sɔ la mẽ.»

²⁰ Azezi n daan zãsnɩ nẽba Wẽnde-kãtum na ligri lagsgɔ dagsɩ zẽ'am na, tɩ a tɔɛ yetɔɔ-bãna. La nẽra nẽra ka yõke ẽ, a wakate n nãn ka paage la ãyã.

Azezi pa'ale ẽɲa n de sɛka

²¹ Tl Azezi le yele ba yetu: «Mam wun fõrgɛ mɛ, la ya wun ɛ mam koɲɛ, la ya wun ki la ya tɔon-be'ero la puam. Mam n we'esɩ zẽ'a na, ya kãn tã'age wa'am bilam.» ²² Tl Zifdõma sɔkra taaba yetu: «Ën yetu: «Mam n we'esɩ zẽ'a na, ya kãn tã'age wa'am bilam» na, a yetu a ku la a mẽɲa bu?» ²³ Tl Azezi yele ba yetu: «Yãma ze'ele la tẽɲa, la mam ze'ele la saazuum wa'am. Yãma de la dũnia wã nẽba, la mam dagɩ dũnia wã nẽra. ²⁴ Bela ãyã tɩ mam yetu, ya wun ki la ya tɔon-be'ero la puam. Se'ere n soe la, ya sãn ka bɔ sɩra tɩ mam de la sɛka tɩ mam de la, ya wun ki la ya tɔon-be'ero la puam.» ²⁵ Tl ba soke ẽ yetu: «Fõn de la ãne?» Tl a lerge ba yetu: «Mam de la sɛka tɩ mam yetu ya halɩ pɔspɔsɩ la. ²⁶ Mam tarɩ nɩ yela zozo'e mɛ n wun tɔɛ yãma yelle, dee di ya sarɩya. La sɛka n tòm mam na de la sɩra dãana, la sela tɩ mam wõm a zẽ'am n bela tɩ mam tɔgrɩ bɔ'wɩ dũnia dõma.» ²⁷ La ba ka bãɲɛ tɩ a tɔgrɩ ba la a Sɔ Nawẽnne yelle. ²⁸ Bela tɩ Azezi yele ba yetu: «Ya sãn wa zẽke Nẽrsaala Dayua la, ya wun bãɲɛ tɩ mam de la sɛka tɩ mam de la. La ya wun bãɲɛ tɩ mam ka ɩtɩ sela sela la m mẽɲa nõore, mam Sɔ Nawẽnne n pa'ale mam se'em na mã'a tɩ mam tɔgrɩ. ²⁹ La sɛka n tòm mam na boe la mam mɛ,

a ka base mam m yula, se'ere n soe la, mam ɩtɩ la sela n ãn a sũure yelum daare woo.» ³⁰ Ën tɔɛ bela la, tɩ nẽr-ba zozo'e bɔ ẽ sɩra.

Sɩra wun to'oge ya base

³¹ Tl Azezi yele Zifdõma seba n daan bɔ ẽ sɩra la yetu: «Ya sãn sakra mam yetɔɔa la ka base, ya sɩrɩ de la mam karẽnbiisi. ³² La ya wun bãɲɛ sɩra, la sɩra la wun to'oge ya base.» ³³ Tl nẽba la lerge ẽ yetu: «Tõma de la Abraham yusɩ, tõma ka de nẽra nẽra yamsɩ. La wãne tɩ fõn yetu, tɩ wun to'oge tɩ mẽɲa?» ³⁴ Tl Azezi lerge ba yetu: «Mam yetu ya la sɩra sɩra, tɩ nẽr-seka woo n tõnnɩ tɔon-be'ero de la tɔon-be'ero yamɲa. ³⁵ Yamɲa dagɩ yire la nẽra wakate wuu, la yire la dayua de la yire la nẽra wakate wuu. ³⁶ Bela ãyã, Nawẽnne Dayua la sãn to'oge ya base, ya sɩrɩ to'oge ya mẽɲa. ³⁷ Mam mi tɩ ya de la Abraham yusɩ. La yãma eerɩ mam mɛ tɩ ya ku, yãma n ka to'orɩ mam yetɔɔa la ãyã. ³⁸ Mam tɔgrɩ la sela tɩ mam yẽ m Sɔ zẽ'am na. La yãma mẽ ɩtɩ la sela tɩ ya wõm ya sɔ zẽ'am na.» ³⁹ Tl ba lerge ẽ yetu: «Abraham n de tõma sɔ.» Tl Azezi yele ba yetu: «Ya sãn de nɩ na Abraham kɔma, ya wun tòm nɩ wu Abraham n tòm se'em na. ⁴⁰ La yãma eerɩ mam mɛ lɛɛɛ wã tɩ ya ku, mam n tɔɛ yãma sɩra la tɩ mam wõm Nawẽnne zẽ'am na ãyã. Abraham ka ẽɲɛ bela. ⁴¹ Ya tõnnɩ na ya sɔ n tõnnɩ se'em na.» Tl ba yele ẽ yetu: «Tõma dagɩ tãmpɩba. Tõma tarɩ la sɔ ayula, n de Nawẽnne.» ⁴² Tl Azezi yele ba yetu: «Nawẽnne sãn de nɩ ya sɔ, ya wun nõɲɛ nɩ mam, se'ere n soe la, mam ze'ele la Nawẽnne zẽ'am wa'am. Mam ka wa'am m mẽɲa, ẽɲa n tòm mam. ⁴³ Bẽm tɩ yãma ka wõnna mam yetɔɔa la vooore? La de la yãma n ka boori tɩ ya sake mam yetɔɔa la ãyã. ⁴⁴ Ya sɔ de la Asũtãana, la ya boori tɩ ya ẽɲɛ la ya sɔ la n boori se'em na. A de la nẽr-kuura halɩ pɩ'iluɲo. A ka boe sɩra puam, sɩra n ka boe a puam na ãyã. A sãn parna, ẽn ãn se'em n bela, se'ere n soe la, a de la põmpɔrma, la põmpɔrɲɔ wuu sɔ. ⁴⁵ La, mam n tɔgrɩ sɩra la ãyã tɩ ya ka bɔ'wɩ mam sɩra. ⁴⁶ Yãma nẽr-kãna n tã wun pa'ale tɩ mam tòm tɔon-be'ego? La mam n tɔgrɩ sɩra la, bẽm tɩ ya ka bɔ'wɩ mam sɩra? ⁴⁷ Sɛka n de Nawẽnne nẽra selsɩ la Nawẽnne yetɔɔa. La yãma n dagɩ Nawẽnne nẽba la ãyã, bela tɩ ya ka selsra.»

⁴⁸ Tl Zifdõma la yele ẽ yetu: «Tõma tarɩ buurɔ tɩ tõma yetu, fu de la Samaari nẽra, kulkã'arga n doli fo.» ⁴⁹ Tl Azezi lerge ba yetu: «Kulkã'arga ka doli mam, mam nã'asɩ la m Sɔ, la yãma ka sake tɩ ya nã'asra mam.

⁵⁰ Mam ka eerɩ m mẽɲa nã'asgɔ. Nẽra ayula n boe n eerɩ mam nã'asgɔ, dee dita sarɩya. ⁵¹ Mam yetu ya la sɩra sɩra, tɩ nẽra sãn sake mam yetɔɔa, a kãn malun ki.»

⁵² Tl Zifdõma yele ẽ yetu: «Nãnanne wã tõma bãɲɛ mɛ tɩ kulkã'arga n sɩrɩ doli fo. Abraham la Nawẽnne nõtɔ'csɩba la ki mɛ. Tl fõn yetu, nẽra sãn sake fõn yetɔɔa, a kãn malun ki. ⁵³ Fõn gãnnɩ tõma yaaba Abraham

n ki la me bu? Nawënne nõtɔ'srɪba la mē ki mē. Fõn tē'ese ti fõn de la āne?» ⁵⁴ Tɪ Azezi lerge ba yeti: «Mam sãn nã'asra m mēŋa, mam nã'asgo la de la zãŋa. La de la mam so la n nã'asrɪ mam, seka ti ya wi'iri ya Nawënne na. ⁵⁵ La yãma ka mi ē. La mam nõo mi ē. Mam sãn yeti, mam ka mi ē, mam wun dēna la pōmpɔrma wu yãma la. La mam mi ē mē, dee sakra a yetoga. ⁵⁶ Ya so Abraham yuun ēŋe la sũ-yēlga sɪrum ti a wun wa yē mam daare la, la a yē mē, ēŋe sũ-yēlga.» ⁵⁷ Tɪ Zifdõma la yele Azezi yeti: «Fõn nãn ka paage yuuma pinuu mēŋa dee yē Abraham?» ⁵⁸ Tɪ Azezi yele ba yeti: «Mam yeti ya la sɪra sɪra, ti Abraham n yuun nãn ka boe la, mam boe mē.» ⁵⁹ Tɪ ba pĩise kuga ti ba lobe ē. Tɪ Azezi li'ise Wēnde-kātum na yese.

Azezi boti fua yēta

9 La Azezi daan sēnnɪ tɔlla mē, yē buraa ti ba dɔge ē ti a dēna fua. ² Tɪ a karēnbiisi soke ē yeti: «Karēsãama, nēr-kãna n tōm tōon-be'ero? Buraa wã bu a so bu a ma n tōm tōon-be'ero, ti ba dɔge ē ti a dēna fua?» ³ Tɪ Azezi lerge yeti: «La dagɪ buraa wã bu a so bu a ma tōon-be'ero iŷã, ti a dēna fua. La de la Nawënne n yeti a tōm na ē pa'ale a tōoma. ⁴ Dēnɪ ti tōma tōm seka n tōm mam na tōoma, la nãn ken dēna wuntēŋa wã. Yu'urɔ sēm mē ti nēra kãn le tã'age tōm. ⁵ Mam n nãn boe dũnia puam wã, mam de la dũnia peelem.» ⁶ A yele bela dee tubse la nõtōorum tēŋa bũn tēntōnnɔ bɪ fua la nini, ⁷ dee yele ē yeti: «Sēŋe ka wire fu nēŋa Silowe kulgam.» (Silowe vōore de la «seka ti ba tōm».) Tɪ a sēŋe ka wire a nēŋa, dee lebra, ti a nini na yēta.

⁸ Tɪ a sawiiba, la seba n mi ē kurum ti a sosrɪ mē na yeti: «Dagɪ ēna n daan zĩ sɔsra la?» ⁹ Tɪ seba yeti: «La de la ēŋa.» Tɪ baseba yeti: «Ayɛɪ, a wõn na ēŋa dee la dagɪ ē.» Tɪ a mēŋa yeti: «La de la mam.» ¹⁰ Tɪ ba soke ē yeti: «La ēŋe la wãne ti fõn nini na yãŋa yēta?» ¹¹ Tɪ a lerge ba yeti: «Buraa la yu'urɛ n de Azezi la n bũn tēntōnnɔ bɪ mam nini, dee yele mam ti m sēŋe Silowe kulgam ka wire. Tɪ mam sēŋe ka wire, yãŋa yēta.» ¹² Tɪ ba soke ē yeti: «A boe la be?» Tɪ a lerge yeti: «Mam ka mi.»

Farisi dõma soke fua lan ēŋe se'em ti ēŋa yēta

¹³ Tɪ ba tarɪ seka n daan de fua la sēŋe Farisi dõma zē'am. ¹⁴ La Azezi n daan bũn tēntōnnɔ bɪ fua la nini daar-seka ti a yēta la, daan de la Zifdõma vo'osgo daare. ¹⁵ Tɪ Farisi dõma la mē le soke ē yeti: «La ēŋe la wãne ti fõn yēta?» Tɪ a lerge ba yeti: «A bũn na tēntōnnɔ bɪ mam nini, ti mam wire, yãŋa yēta.» ¹⁶ Tɪ Farisi dõma baseba yeti: «Nēr-ēna wã ka ze'ele Nawënne zē'am wa'am, se'ere n soe la, a ka sakrɪ vo'osgo daare sisgo.» Tɪ baseba yeti: «Nēra n de tōon-be'ero dāana wun ēŋe

la wãne tōm tōon-yãlma wãna?» Tɪ welgre kē Farisi dõma la tēŋasuka.

¹⁷ Tɪ ba le soke buraa la yeti: «Fõn wun yele a yelle ti bēm, ēn base ti fõn nini yēta la?» Tɪ a lerge ba yeti: «A de la Nawënne nõtɔ'ɔsa.» ¹⁸ Tɪ Zifdõma nēŋadõma la ka bɔɔra ti ba sake ti a daan de la fua dee yãŋa yēta, ti ba wi a so la a ma, ¹⁹ soke ba yeti: «Ēna de la yãma dayua la ti yãma yeti yãma dɔge ē ti a dēna la fua la? La ēŋe la wãne ti a yãŋa yēta?» ²⁰ Tɪ a so la a ma lerge yeti: «Tōma mi ti a de la tōma dayua, la tōma daan dɔge ē ti a dēna la fua. ²¹ La tōma ka mi lan ēŋe se'em ti a yãŋa yēta, bu seka n botɪ a nini na yēta. Soke-ya ē, ti a ka le dēna bia, a mēŋa wun tɔge.» ²² A so la a ma la n zotɪ Zifdõma nēŋadõma la iŷã ti ba yele bela. Zifdõma nēŋadõma la daan dēŋe tɔge ku mē yeti, nēra sãn sake ti Azezi de la Krisi, bãma wun yese ē mē ba wēndeego la puam. ²³ Bela n soe ti a so la a ma la yeti: «Soke-ya ē ti a ka de bia.»

²⁴ Tɪ ba le wi bura-seka n daan de fua la nõore ayi puam, yele ē yeti: «Tɔge sɪra Nawënne iŷã. Tōma mi ti bura-ēna de la tōon-be'ero dāana.» ²⁵ Tɪ a lerge yeti: «A sãn dēna tōon-be'ero dāana, bu a dagɪ tōon-be'ero dāana, mam ka mi. Mam n mi sela de la, mam daan de la fua, la lelele wã mam yēti mē.» ²⁶ Tɪ ba soke ē yeti: «A ēŋe fõn na bēm? A ēŋe la wãne botɪ fõn yēta?» ²⁷ Tɪ a lerge ba yeti: «Mam põn dēŋe yele ya mē, ti ya ka selse, bēm ti ya le bɔɔra ti ya wõm? Yãma mē boorɪ ti ya lebege la a karēnbiisi bu?» ²⁸ Tɪ ba tu ē, dee yeti: «Fõn de a karēnbia, tōma de la Amoyisi karēnbiisi. ²⁹ Tōma mi ti Nawënne yuun tɔge bɔ la Amoyisi, la ēna, tōma ka mi ēn ze'ele zē'e-seka.»

³⁰ Tɪ buraa la yele ba yeti: «Ēna de la yel-di'inja, yãma ka mi ēn ze'ele zē'a, la ēŋa n botɪ mam nini yēta. ³¹ Tōma mi ti Nawënne ka selsrɪ tōon-be'ero dõma sosgo, la nēra sãn pu'usra ē, dee ita ēn boorɪ se'em, a selsrɪ la ēŋa dāana sosgo. ³² Halɪ pĩilurɔ, ba nãn ka wõm ti nēra botɪ nēra ti ba dɔge ē ti a dēna fua nini yēta. ³³ Bura-ēna sãn ka ze'ele nɪ Nawënne zē'am, a kãn yãŋe nɪ ēŋe sela sela.» ³⁴ Tɪ ba lerge ē yeti: «Ba dɔge fõn na tōon-be'ero puam, ti fõn yeti fu pa'ale tōma?» Tɪ ba digē ē ba wēndeem na.

Seba n mi dee ka bɔɔra ti ba sake ān wu fɔɔsɪ la

³⁵ Tɪ Azezi wõm ti ba digē ē mē, yãŋa wa yē ē, soke ē yeti: «Fõn bɔ Nērsaala Dayua la sɪra mē?» ³⁶ Tɪ a lerge yeti: «Zuudāana, Nērsaala Dayua la de la āne? Yele ma ti m bɔ ē sɪra.» ³⁷ Tɪ Azezi yele ē yeti: «Fu yē ē mē, ēŋa n tɔgrɪ la fu le wã.» ³⁸ Tɪ buraa la yeti: «Zuudāana, mam bɔ fu sɪra mē», dee ka dũma Azezi nēŋam.

³⁹ Tɪ Azezi yele yeti: «Mam wa'am dũnia wã zuo ti welgre n bɔna, ti fɔɔsɪ yēta, dee ti seba n yēti la lebege fɔɔsɪ.» ⁴⁰ Tɪ Farisi dõma seba n daan boe mĩ na n wõm bela la, soke ē yeti: «Tōma mē de la fɔɔsɪ bu?» ⁴¹ Tɪ

Azezi lerge ba yeti: «Ya sãn de nɪ ʃɔɔsɪ, ya tōon-be'ero taale ka boe ya zuo. La lɛɛɛ wã, yãma yeti yãma yēti mɛ, bela tɪ ya tōon-be'ero taale bɔna ya zuo.»

Dũnsiina la a piisi makre

10 La Azezi daan yeti: «Mam yeti ya la sɪra sɪra, tɪ nēr-seka n ka doli zanōre kē'era piisi denne puam, dee dɔla lalga kē'era, ɛɲa de la nayiga la fāara. ² La nēr-seka n doli zanōre la kē'era, ɛɲa n de piisi la dũnsiina. ³ La zanōre la gu'ura yo'oru mɛ bɔ'ɔra ɛɲa. Tɪ piisi la mina a kōa, tɪ a wi'ira ɛn soe seba la yu'ura, boti ba dɔla ɛ yesra. ⁴ La a sãn tarɪ a piisi la wuu yese, a tolli la ba nēɲa sēnna, tɪ ba dɔla ɛ, ban mi a kōa la iŷã. ⁵ La ba kãn malun doose sãana, ba wun zoe mɛ fōrge dee base ɛ, ban ka mi a kōa la iŷã.»

⁶ Azezi make la makre ɛna wã bɔ ba, la ba ka bãɲe ɛn tɔge se'em bɔ ba la vōore.

Azezi n de zanōre

⁷ Tɪ Azezi le yele ba yeti: «Mam yeti ya la sɪra sɪra, tɪ mam n de piisi denne na zanōre. ⁸ Seba wuu n dēɲe mam wa'am na de la nayigba la fāarba, la piisi la ka selse ba. ⁹ Mam n de zanōre la. La nēr-seka n doli mam zē'am kē'era, a wun yē fāare. La a wun kē'era dee yesra, yēta a dia. ¹⁰ Nayiga sēm tɪ a zũ mɛ, la a ku, la a sã'am mā'a, la mam wa'am tɪ nērba n yē vɔm sōɲa sōɲa.»

Azezi n de dũnsiin-sōɲɔ

¹¹ Tɪ Azezi le yele ba yeti: «Mam n de dũnsiin-sōɲɔ. Dũnsiin-sōɲɔ sake kũm mɛ a piisi iŷã. ¹² La nēra n tōnni tɪ ba yɔɔra ɛ, tɪ a ka sɔna piisi la, a ka bɪsɪ ba sōɲa, la a sãn yē saasaa n sēm, a basɪ piisi la mɛ dee zɔta. La saasaa la wun yōge piisi la mɛ, boti ba wɪrge. ¹³ Se'ere n soe la, a tōnni tɔ'ɔra la yɔɔɔ, a ka fabli piisi la yelle. ¹⁴ Mam n de dũnsiin-sōɲɔ la, la mam mi m piisi la mɛ, tɪ ba mē mina mam, ¹⁵ wu mam Sɔ Nawēnne n mi mam, tɪ mam mē mina ɛ se'em na. Mam sake kũm mɛ m piisi la iŷã.

¹⁶ La mam tarɪ piisi baseba mɛ n ka boe denne wã puam. Dēnɪ tɪ mam tarɪ ba wa'am, tɪ ba wōm mam kōa, lagum na bāna tɪ ba dēna ayɪla, tɪ dũnsiina ayɪla bɪsra ba.

¹⁷ Mam Sɔ nōɲe mam mɛ, mam n dɪke m vɔm bɔ'ɔra nērsaalba, dee wun le to'oge ɛ na iŷã. ¹⁸ Nēra nēra ka to'oru mam vɔm. Mam mēɲa n wun dɪke ɛ bɔ. Mam tarɪ pãɲa mɛ wun dɪke m vɔm bɔ, dee tara pãɲa wun le to'oge ɛ. Mam Sɔ n bɔ mam nōore tɪ m ɛɲe se'em n bela.»

¹⁹ Yetɔg-bāna iŷã tɪ welgre daan le wa'am Zifdōma la tēɲasuka. ²⁰ Tɪ baseba zozo'e yeti: «Kulkā'arga n doli ɛ, a de la zɔlɔ, bēm tɪ ya selsra ɛ?» ²¹ Tɪ baseba yeti:

«Yetɔg-bāna wã dagɪ kulkā'arga n doli nēra yetɔga. Kulkā'arga tā wun boti fua nini yēta?»

Azezi la Nawēnne de la ayɪla

²² Wakat-ɛɲa Zifdōma Wēnde-kāte la malgre tēere kibsa n daan boe Zerizalem. La daan de la ɔɔɔ wakate. ²³ Tɪ Azezi sēɲe Wēnde-kātum na ka gilgra zē'e-seka tɪ ba wi'iri tɪ Asalomō vōnana la. ²⁴ Tɪ Zifdōma lagse gilge ɛ, yele ɛ yeti: «Fōn wun base tɪ tōma sē'ena ka paage la dabure? Fu sãn dēna la Krisi la, seka tɪ Nawēnne tōm na, fu yele to sɪra sɪra.» ²⁵ Tɪ Azezi lerge ba yeti: «Mam pōn yele ya mɛ, tɪ ya ka bɔ mam sɪra. Tōon-seba tɪ mam tōnni na m Sɔ yu'ure la, pa'alɪ mam n de seka mɛ. ²⁶ La yãma ka bɔ mam sɪra, yãma n dagɪ mam piisi la iŷã. ²⁷ Mam piisi la wōnni mam kōa mɛ, mam mi ba mɛ, la ba doli mam mɛ. ²⁸ Mam bɔ'ɔru ba la vɔm n ka ba'asɪ, tɪ ba kãn malun sã'am, la nēra ka tā wun fāage ba mam nu'usum. ²⁹ Mam Sɔ la n bɔ mam bāma la, a gānni sela woo mɛ, nēra ka tā wun fāage ba mam Sɔ la nu'usum. ³⁰ Mam, la mam Sɔ la de la ayɪla.»

³¹ Tɪ Zifdōma le pɪise kuga tɪ ba lobe ɛ ku. ³² Tɪ Azezi yele ba yeti: «Mam Sɔ boti mam tōm tōon-sōma zozo'e mɛ pa'alɛ ya. Tōon-sōma bāma puam, tōon-kāna iŷã tɪ ya bɔɔra tɪ ya lobe mam na kuga?» ³³ Tɪ Zifdōma la lerge ɛ yeti: «La dagɪ tōon-sōma yelle tɪ tōma bɔɔra tɪ tɪ lobe fu la kuga ku, la de la Nawēnne yu'ur-sā'arɔ la iŷã, fōn de nērsaala dee ɛɲe fu mēɲa tɪ fōn de la Nawēnne na iŷã.» ³⁴ Tɪ Azezi yele ba yeti: «La gulse ya ɔɔ gōɲɔ la puam tɪ Nawēnne yeti: «Ya de la wēna.» ³⁵ Tɪ mi tɪ Nawēnne gōɲɔ yetɔga la de la sɪra, la a ka tā wun sã'am. A wi'iri seba tɪ a tɔge yetɔga bɔ ba la tɪ wēna. ³⁶ La mam tɪ Nawēnne looge tōm dũnia zuo wã, yãma yele mam tɪ m sã'anɪ la Nawēnne yu'ure, mam n yele tɪ mam de la Nawēnne Dayua la iŷã? ³⁷ Mam sãn ka tōnna m Sɔ tōoma, ya da bɔ mam sɪra. ³⁸ La mam sãn tōnna a tōoma, baa ya sãn ka bɔ mam sɪra, ya bɔ m tōoma la sɪra, tɪ ya tā'age bãɲe, la ya sake sɪra tɪ mam Sɔ la boe la mam lɛ mɛ, tɪ mam mē bɔna la ɛ.» ³⁹ Tɪ ba le zɪgra tɪ ba yōke ɛ, tɪ a pōse.

⁴⁰ La ɛn pōse la, a le dooge la Zurdē kulaa la doone, zē'e-seka tɪ Azã daan pɔse bɔna mĩ misri nērba ko'om puam na, ka bɔna bilam. ⁴¹ Tɪ nērba zozo'e daan sēɲe a zē'am. Ba daan tɔgrɪ yeti: «Azã ka tōm tōon-yālma baa ayɪla, la Azã n daan tɔge bura-ɛna yelle se'em wuu la de la sɪra.» ⁴² La nērba zozo'e bɔ ɛ sɪra mɛ bilam.

Alazaari vo'ore

11 Buraa ayɪla n daan boe Betani tɪ a yu'ure dēna Alazaari, tɪ bā'a yōke ɛ. A tāpa Amaari la a Amartɪ daan kē'erɪ la tēn-ɛɲa puam. ² La de la Amaari ɛɲa n daan ka'age tudare kaam ɛɲe Azezi nāma, dɪke a zomto duuse ba la. ɛɲa tā n de Alazaari n bē'erɪ la. ³ Tɪ a tāpa la daan tōm tɪ ba ka yele Azezi yeti: «Zuudāana,

fu sɪrɛ la bɛ'ɛrɪ mɛ.» ⁴ La Azezi n wõm bela la, tɪ a yetɪ: «Bã'a-ɛna ba'asgɔ kãn dena kũm. La de la tɪ Nawɛnnɛ yu'urɛ yɛ zɛkrɛ, la tɪ Nawɛnnɛ Dayua la yu'urɛ wun zɛkrɛ bõn-ɛŋa puam.»

⁵ La Azezi daan nõŋɛ Amartɪ la a yɪbga, la Alazaarɪ mɛ. ⁶ La ɛn wõm tɪ Alazaarɪ bɛ'ɛrɪ mɛ na, a ken weege ɛn daan boe zɛ'e-seka la dabsa ayi. ⁷ Bela poorum tɪ a yele a karɛnbiisi la yetɪ: «Tɪ lebe-ya Zude.» ⁸ Tɪ a karɛnbiisi la yele ɛ yetɪ: «Karɛnsãama, lɛɛɛ wã tɪ Zɪfdõma daan eerɪ fõn tɪ ba lobe la kuga ku. Dee tɪ fõn le yetɪ fu lebe bilam?» ⁹ Tɪ Azezi yele ba yetɪ: «Bulika tɪ la ka paage zaanõore, la de la karf-pia la ayi tɪ wuntɛɛŋa boe. Nɛra sãn sɛnna wuntɛɛŋa, a ka wɛ'ɛrɪ a nãma, se'ere n soe la, dũnia peelem boe mɛ, tɪ a yɛta. ¹⁰ La nɛra sãn sɛnna yu'urɔ, a wɛ'ɛrɪ a nãma mɛ, se'ere n soe la, peelem ka boe tɪ a yɛta.»

¹¹ Azezi yele bela dee yele ba yetɪ: «Tɪ sɪrɛ Alazaarɪ gɪsri mɛ, la mam wun sɛŋɛ ka nɛegɛ ɛ.» ¹² Tɪ a karɛnbiisi la yele ɛ yetɪ: «Zuudãana, a sãn gɪsra, a wun yɛ ãmã'asum.» ¹³ Azezi tɔgɛ ba la Alazaarɪ kũm yelle. La ba tɛ'esɛ tɪ a tɔgrɪ la gɛem yelle. ¹⁴ Bela tɪ Azezi tɔgɛ ba vɛelga yetɪ: «Alazaarɪ ki mɛ. ¹⁵ La mam n daan ka boe mĩ na, mam ɪtɪ sũ-yɛlga mɛ yãma ãyã, tɪ ya wun bɔ mam sɪra. Tɪ sɛŋɛ-ya a zɛ'am.» ¹⁶ Tɪ Atoma (seka tɪ ba wi'iri tɪ «Luba» la) yele a karɛnbi-taaba yetɪ: «Tɪ mɛ sɛŋɛ-ya tɪ tɪ ka lagum ki.»

¹⁷ Azezi n daan paage la, tɪ ban laage Alazaarɪ de la dabsa anaasɪ. ¹⁸ La Betani daan lem Zerizalem mase wu kilomɛtrɪ atã. ¹⁹ Tɪ Zɪfdõma zozo'e wa'am tɪ ba pu'usɛ Amartɪ, la Amaari ba tã la kũm.

²⁰ La Amartɪ n wõm tɪ Azezi sɛm mɛ na, a daan yese mɛ tu'usɛ ɛ. Dee tɪ Amaari weege zɛa yire. ²¹ Tɪ Amartɪ yele Azezi yetɪ: «Zuudãana, fõn daan sãn boe nɪ kalam, mam tã wã kãn ki. ²² La lɛɛɛ wã, mam ken mina tɪ bõn-seka woo tɪ fõn wun sose Nawɛnnɛ, a wun bɔ fɔ.» ²³ Tɪ Azezi yele ɛ yetɪ: «Fu tã la wun vo'oge base kũm.» ²⁴ Tɪ Amartɪ lerge ɛ yetɪ: «Mam mi tɪ a wun vo'oge dũnia ba'asgɔ daare, tɪ kũm wuu wun vo'oge la.» ²⁵ Tɪ Azezi yele ɛ yetɪ: «Mam n de kũm vo'ore dãana, la vɔm dãana. Seka n bɔ mam sɪra, baa a sãn ki, a wun vo'oge. ²⁶ La seka woo n vɔa dee bɔ mam sɪra, kũm kãn tã'age ɛ wakate wuu. Fõn bɔ bõn-ɛna sɪra?» ²⁷ Tɪ Amartɪ lerge ɛ yetɪ: «Ee, Zuudãana, mam bɔ sɪra tɪ fõn de la Krisi, Nawɛnnɛ Dayua la n sɛm dũnia zuo la.»

²⁸ La ɛn yele bela la, a fõrgɛ mɛ, sɛŋɛ ka wi a yɪbga Amaari, sugɛ yele ɛ yetɪ: «Karɛnsãama wa'am mɛ, dee wi'ira fõn.» ²⁹ La Amaari n wõm bela la, a isge mɛ tɔtɔ wɛ'ɛsa a zɛ'am. ³⁰ La Azezi daan nãn ka paage tɛŋa la puam, a ken bɔna la Amartɪ n daan tu'usɛ ɛ zɛ'e-seka la. ³¹ Tɪ Zɪfdõma seba n wa'am wa pu'usɛ kũm na, dee bɔna la Amaari lɛ yire la puam na, yɛ tɪ a isge tɔtɔ yes-ra, tɪ ba tɛ'esra tɪ a wɛ'esɪ la yɔɔm tɪ a ka kaasɛ, tɪ ba dɔla ɛ.

³² La Amaari n paage Azezi n boe zɛ'e-seka la, yɛ ɛ na, a yigle mɛ a nɛŋam, yele ɛ yetɪ: «M Zuudãana, fõn daan sãn boe nɪ kalam, mam tã wã kãn ki.» ³³ La Azezi n daan yɛ tɪ a kelli mɛ, la Zɪfdõma la n doli ɛ na mɛ kelli mɛ na, tɪ a sũure sã'am halɪ, tɪ la dãam ɛ zozo'e, ³⁴ tɪ a soke ba yetɪ: «Yãma laage ɛ na bɛ?» Tɪ ba yele ɛ yetɪ: «Zuudãana, wa'am wa bɪsɛ.» ³⁵ Tɪ Azezi kella. ³⁶ Tɪ Zɪfdõma la n yɛ bela la, yetɪ: «Bɪsɛ-ya ɛn nõŋɛ ɛ se'em.» ³⁷ Tɪ baseba yele yetɪ: «Dagɪ bura-ɛna n daan botɪ fua la nini yɛta la, a ka tã wun base nɪ tɪ ɛna mɛ da ki?»

³⁸ Tɪ Azezi sũure le sã'am halɪ, tɪ a wɛ'ɛsa yɔɔm na. Yɔɔgɔ la daan de la tãmpɪa yoko, tɪ kugre lige a nõore. ³⁹ Tɪ Azezi yetɪ: «Lake-ya kugre la.» Tɪ seka n ki la tã Amartɪ yele Azezi yetɪ: «M Zuudãana, a põn põ'oge mɛ, se'ere n soe la, la de la dabsa anaasɪ n wãna tɪ a boe yɔɔm.» ⁴⁰ Tɪ Azezi soke ɛ yetɪ: «Mam ka yele fu yetɪ, fu sãn bɔ mam sɪra, fu wun yɛ Nawɛnnɛ na'am pãŋa?» ⁴¹ Tɪ ba lake kugre la. Tɪ Azezi gorge saazuum yetɪ: «M Sɔ, mam pu'usɪ fɔ, fõn selse mam pu'usgɔ la. ⁴² Mam mi tɪ daare woo fu selsɪ mam pu'usgɔ mɛ. La mam yele bela la nɛr-kurɔgɔ wã ãyã, tɪ ba wun bɔ sɪra tɪ fõn tõm mam.» ⁴³ A yele bela dee tɔgɛ la ke'enke'em yetɪ: «Alazaarɪ, yese!» ⁴⁴ Tɪ seka n daan ki la isge yese. Tɪ tã-na vile a nãma la a nu'usɪ, la tãnnɛ ayɛma n vile a nɛŋa. Tɪ Azezi yele ba yetɪ: «Lorge-ya tãna la, dee base ɛ tɪ a fõrgɛ.»

Zɪfdõma nɛŋadõma eerɪ sore tɪ ba ku Azezi

(Amatie 26:1-5, Amarkɪ 14:1-2, Alukɪ 22:1-2)

⁴⁵ La Zɪfdõma seba n daan wa'am Amaari zɛ'am wa yɛ Azezi n ɛŋɛ se'em na, ba zozo'e bɔ ɛ sɪra mɛ. ⁴⁶ Tɪ baseba sɛŋɛ Farisi dõma zɛ'am ka yele ba Azezi n ɛŋɛ se'em na.

⁴⁷ Tɪ kãabgɔ kɛma nɛŋadõma, la Farisi dõma lagɛ ba sariyaditba kɛma yetɪ: «Tɪ wun ɛŋɛ la wãne? Bura-ɛna wã tõnnɪ la tõon-yãlma zozo'e. ⁴⁸ Tɪ sãn base ɛ tɪ a ɪta bela, nɛrba wuu wun bɔ ɛ sɪra mɛ, la Rom dõma wun wa'am wa sã'am tɪ Wɛnde-kãte wã, la tɪ so'olum wã wuu mɛ.»

⁴⁹ Tɪ ba nɛra ayɪla yu'urɛ n de Akayifu n daan de kãabgɔ kɛma nɛŋadãana yuun-ɛŋa, yele ba yetɪ: «Yãma ka mi sela sela. ⁵⁰ Ya ka mi tɪ buraa ayɪla sãn ki nɛrba la ãyã, n sɔɪ tɪ buuri la wuu n wun sã'am?» ⁵¹ La, la dagɪ a mɛŋa yɛm tɪ a yele bela, la de la ɛn daan de kãabgɔ kɛma nɛŋadãana yuun-ɛŋa la tɪ a to'oge Nawɛnnɛ yetɔga tɔgɛ yetɪ, dɛnɪ tɪ Azezi wa ki bɔ bãma buuri la. ⁵² La, la dagɪ bãma buuri la mã'a ãyã tɪ la mase tɪ a ki, la de la Nawɛnnɛ kɔma n wurge zɛ'esɪ wuu la ãyã, tɪ a yetɪ a lagɛ ba tɪ ba lebge buuri ayɪla.

⁵³ La sɛŋɛ la daar-ɛŋa, tɪ Zɪfdõma nɛŋadõma ɛŋɛ nõore ayɪla tɪ ba ku ɛ. ⁵⁴ Bela ãyã tɪ Azezi ka le ɛera Zɪfdõma tɛŋasuka tɪ ba yɛta ɛ. A fõrgɛ bilam sɛŋɛ la

tënsi n lem mōom, ka kē'era tēja yu'ure n de Efrayim la a karēnbiisi la.

⁵⁵ La Zifdōma Zɔɔg-base kibsa n daan lem, ti nērba zozo'e ze'ele tēn-pɔgsi puam sēje Zerizalem lan dēje Zɔɔg-base kibsa la, ti ba ka malge ba mēja wu ba sisgo n yeti ba ita se'em na. ⁵⁶ Ti ba ɛera Azezi, sēje ka ze Wēnde-kātum na sokra taaba yeti: «Yāma tē'ese la dēna? A sɔrɔ kǎn wa'am kibsa wǎ?» ⁵⁷ La kǎabgo kēma nējadōma, la Farisi dōma la daan bo la nōore ti nēra sǎn mina ɛn boe zē'a, a pa'alɛ ti ba yōke ɛ.

Amaari ka'age tudare kaam ɛje Azezi

(Amatie 26:6-13, Amarku 14:3-9)

12 Zɔɔg-base kibsa daan deege la dabsa ayoobi la a paage, ti Azezi sēje Betani, ɛn vo'oge Alazaaru tēn-seka la. ² Ti ba daan ɛje dia bilam bo ɛ, ti Amartu daan puta dia la. La Alazaaru daan lagum na nērba la zēa la Azezi dita. ³ Ti Amaari dɛke tudare ka-sōma ligri n zo'oge, ti ba wi'iri ti «naaru» n paage lɛtrɔ pusuka wa'am wa ka'age ɛje Azezi nāma, dɛke a zomto duuse ba. Ti yire la wuu lebge tudare kaam na yūuŋo. ⁴ Ti Azezi karēnbia ayɔla yu'ure n de Azudaasi Iskariyo, seka n wun wa pa'alɛ ti ba yōke ɛ na, yeti: ⁵ «Ti sǎn koose nɔ tudare kaam wǎ lig-kōba kɔbstǎ, ti kǎn dɛke ligri la bo nasdōma?» ⁶ ɛn yele bela la, dagɔ ti a fabɔ la nasdōma yelle, la de la ɛn de nayiga, la ɛja n tarɔ ba ligri tǎmpɔkɔ, zūura sela ti ba sūm a puam na. ⁷ Ti Azezi yeti: «Base-ya poka la bǎalam, ti a dēje ɛje la ba wun ɛje mam se'em mam laare daare. ⁸ Nasdōma boe la ya le mɛ daare woo, la mam kǎn bɔna la ya daare woo.»

⁹ Ti Zifdōma zozo'e wōm ti Azezi boe la Betani. Ti ba sēje mɛ, la dagɔ Azezi mā'a iŷǎ ti ba sēje, ba sēje ti ba mē ka yē la Alazaaru ti Azezi daan vo'oge la. ¹⁰ Ti kǎabgo kēma nējadōma la bām yeti, bāma mē wun ku Alazaaru mɛ, ¹¹ ti la de la ɛja iŷǎ ti Zifdōma zozo'e base bāma dee bo Azezi sɔra.

Azezi kē'eri Zerizalem la na'am

(Amatie 21:1-11, Amarku 11:1-11, Aluki 19:28-40)

¹² Ti beere wiige, ti nēr-kuuŋo la n wa'am kibsa la wōm ti Azezi sēm Zerizalem. ¹³ Ti ba kɔ karkɔnsɔ vōoro tu'usra ɛ, dee tɔgra ke'enke'em yeti:

«Ozaana! Pēge-ya nēr-seka n sēm na Zuudāana Nawēnne yu'ure la,
ɛja n de Israyeli dōma naba la.»

¹⁴ Ti Azezi yē bōn-biire bǎ ɛ wu lan gulse Nawēnne gōŋo puam se'em yeti:

¹⁵ «Siyō nērba, da zɔta-ya dabeem.

Bise-ya, ya naba n bǎ bōn-biire sēna la.»

¹⁶ La Azezi karēnbiisi la daan nǎn ka bǎje yel-ɛja vōore. La Azezi n yǎja wa yē na'am pǎja Nawēnne zē'am na, ti ba tēge ti bōn-ɛja n gulse a yelle, la ba daan ɛje la bela bo ɛ.

¹⁷ La nēr-seba n wa bɔna Azezi zē'am, wakat-seka ti a wi Alazaaru ti a vo'oge ze'ele yɔɔgo puam yese la, daan pa'alɛ nērba la ɛn daan ɛje se'em mɛ. ¹⁸ Bela n soe ti nēr-kuuŋo la tu'use ɛ, ban wōm ti a tōm na tōon-yǎlm-ɛja la iŷǎ. ¹⁹ Bela ti Farisi dōma yeta taaba yeti: «Ya yē ya, ya ka tǎ wun ɛje sela sela. Bise-ya, nērba wuu doli ɛ mɛ.»

Grɛkɔdōma eerɔ ti ba yē Azezi, ti Azezi tɔgra a kūm yelle

²⁰ La Grɛkɔdōma n daan boe nēr-seba n sēje Zerizalem kibsa ti ba pu'use Nawēnne na puam. ²¹ Bāma n sēje Afilipi n ze'ele Betisayida n boe Galile so'olum puam na zē'am, ka yele ɛ yeti: «Kɛ'ema, tōma boori ti ti yē la Azezi.» ²² Ti Afilipi sēje ka yele A'āndre, ti A'āndre la Afilipi doose taaba sēje ka yele Azezi. ²³ Ti Azezi lerge ba yeti: «Wakate la paage mɛ ti Nērsaala Dayua la wun yē a na'am pǎja. ²⁴ Mam yeti ya la sɔra sɔra, ti ba sǎn ka bure ke-biire ti a yem bule yese dee ti a mēja pō'oge, ke-bi-ɛja ayɔla mā'a n wun bɔna, la ba sǎn bure ɛ ti a yem na bule yese dee ti a mēja ki, a wun wɔm biɛ zozo'e. ²⁵ Nēr-seka n nōje a wɔm, a wun kɔje wɔm, la nēr-seka n ka nōje a wɔm dūnia wǎ zuo, a wun tara wɔm n ka ba'asɔ. ²⁶ La nēra sǎn bɔɔra ti a tōm bo mam, dēni ti a dɔla mam. La mam n boe zē'e-seka la, mam tōntōnna mē wun bɔna la bilam. La nēra sǎn tōnna bɔ'ɔra mam, mam sɔ wun pēge ɛ.

²⁷ Lɛɛɛ wǎ mam sūure sǎ'am mɛ, la m wun yeti bēm? Mam wun yeti: M sɔ, sōje ma ti m pōse nǎmsgɔ ɛna wǎ bu? Ayɛɛ, la de la yel-ɛna iŷǎ ti mam wa'am ti m nǎmse.» ²⁸ A yele bela dee yeti: «Mam sɔ, nǎ'ase fu yu'ure.» Ti kōa ze'ele saazuum yeti: «Mam nǎ'ase m yu'ure mɛ, la mam wun le nǎ'ase ɛ.»

²⁹ Ti nēr-seba n ze bilam na wōm, yeti: «Saaga n dǎmɛ.» Ti baseba yeti: «Malɛka n tɔge la ɛ.» ³⁰ Ti Azezi yele yeti: «La dagɔ mam iŷǎ ti kō-ɛja tɔge, la de la yǎma iŷǎ. ³¹ Lɛɛɛ wǎ de la dūnia wǎ sarɔyadia wakate. Lɛɛɛ wǎ ba wun dige dūnia wǎ naba base yēja. ³² La ba sǎn wa zēke mam saazuum, mam wun tarɔ nērba wuu wa'am mam zē'am.» ³³ Azezi yele bela pa'alɛ la ɛja wun ki se'em. ³⁴ Ti nēr-kuuŋo la lerge ɛ yeti: «La gulse ɔɔ gōŋo puam pa'alɛ tōma yeti, Krisi wun bɔna la wakate wuu, la bēm ti fōn yeti, dēni ti ba zēke Nērsaala Dayua la saazuum? Āne n de Nērsaala Day-ɛja?» ³⁵ Ti Azezi yele ba yeti: «Peelem ken bɔna la ya le mɛ wakate fēe. Peelem wǎ n ken bɔna la ya wakat-seka la, sēnna-ya ti lika da wa liŋe ya. Seka n sēnnɔ lika puam ka mi ɛn we'esɔ zē'a. ³⁶ Wakat-seka ti peelem ken bɔna la yāma la, bo-ya seka n de peelem na sɔra, ti ya lebge peelem na kɔma.»

Azezi yele la bela dee fōrge ba zē'am, sēje ka sugɛ.

³⁷ Baa la Azezi n ɛje bōn-yǎlma zozo'e nērba la nējam

na, ba ka bɔ ẽ sɪra. ³⁸ Bela tɪ Nawẽnnẽ nɔtɔ'ɔsa A'ezayi n yuun yele se'em na ẽɲɛ. A yuun yetɪ:

«Zuudãana, әне n bɔ tɔma kɔa la sɪra?

La Zuudãana la pãɲa puke pa'ale la әне?»

³⁹ Ba ka tã wun bɔ sɪra, se'ere n soe la, A'ezayi yuun le yetɪ:

⁴⁰ «Nawẽnnẽ pĩ ba nini mɛ,

tɪ ba da yẽta la ba nini na,

dee lige ba putẽ'era,

tɪ ba da wɔm a yetɔga la vɔɔrɛ.

Sãn dagɪ nɪ bela,

ba wun teege nɪ yɛm

tɪ a bɔ ba laafe.»

⁴¹ A'ezayi yuun yele la bela, se'ere n soe la, a yuun yẽ la Azezi na'am pãɲa, tɪ a yuun tɔge a yelle. ⁴² Baa la bela wuu, Zifdõma nẽɲadõma la puam nẽrba zozo'e bɔ ẽ sɪra mɛ, la Farisi dõma la ãyã ba ka sake yele, ba zotɪ mɛ tɪ ba wun dige ba ba wẽndeego la puam. ⁴³ Ba daan nɔɲɛ la nẽrsaalba pẽka gãnna Nawẽnnẽ pẽka.

Azezi yetɔga n diti nẽrba sarɪya

⁴⁴ Azezi tɔge ke'enke'em yetɪ: «Seka n bɔ'ɔrɪ mam sɪra, la dagɪ mam mã'a tɪ a bɔ'ɔrɪ sɪra, a bɔ'ɔrɪ la seka n tɔm mam na sɪra. ⁴⁵ La seka n yẽ mam, yẽ la seka n tɔm mam na. ⁴⁶ Mam de la peelem n wa'am dũnia zuo, tɪ nẽr-seka n bɔ'ɔrɪ mam sɪra kãn bɔna lika puam. ⁴⁷ La nẽra sãn wɔm mam yetɔga, dee ka sake yetɔga la, la dagɪ mam n wun di a sarɪya, se'ere n soe la, mam ka wa'am tɪ m di dũnia dõma sarɪya, mam wa'am tɪ m fãage ba mɛ. ⁴⁸ Seka n zagse mam, ka sake mam yetɔga la, a tarɪ seka n wun di a sarɪya. La de la yetɔga la tɪ mam tɔge la n wun pa'ale tɪ a ka tarɪ buurɔ dũnia ba'asgo daare. ⁴⁹ Se'ere n soe la, mam ka tɔgrɪ la m mẽɲa putẽ'erɛ. La de la mam So n tɔm mam na mẽɲa n bɔ mam nɔɔrɛ mam wun yele se'em, la mam wun tɔge sɛla yelle. ⁵⁰ La mam mi tɪ seka n sake a nɔɔrɛ la tarɪ la wɔm n ka ba'asɪ. La bɔn-seba tɪ mam yetɪ la, la de la mam So n yele mam se'em na n bela tɪ mam yele.»

Azezi peege a karẽnbiisi nãma

13 Lan dẽɲɛ Zɔɔg-base kibsa la, Azezi mi mɛ tɪ ẽɲa wakate paage mɛ tɪ ẽɲa wun fɔrge dũnia sɛɲɛ a So zẽ'am. La a daan nɔɲɛ a nẽrba la n boe dũnia mɛ, a nɔɲɛ ba la halɪ nɔɲlum zɔnzɔnnɔ.

² Azezi la a karẽnbiisi la daan boe mĩ dita la zaanɔɔrɛ dia. La Asũtãana daan pɔn botɪ Asimõ dayua Azudaasɪ Iskariyo tẽ'esɛ a sũurum tɪ ẽɲa wun pa'ale tɪ ba yɔkɛ Azezi. ³ La Azezi daan mi tɪ ẽɲa ze'ele la Nawẽnnẽ zẽ'am wa'am, la ẽɲa lebrɪ la Nawẽnnẽ zẽ'am, la a mi tɪ ẽɲa So Nawẽnnẽ dɪke sɛla woo ẽɲɛ la ẽɲa nu'usum. ⁴ Tɪ a isge dia la zẽ'am yɛɛge a fu-seka n boe zuum na, dee dɪke tãnnɛ lu a sɪa. ⁵ Yãɲa purge ko'om ẽɲɛ laaga

puam, pɛɛra a karẽnbiisi la nãma, dɪke tãnnɛ la n lu a sɪa la duusra ba.

⁶ Tɪ a daan paage Asimõ-pɪyɛɛrɪ zẽ'am, tɪ a soke ẽ yetɪ: «M Zuudãana, fɔn yetɪ fu peege la mam nãma?»

⁷ Tɪ Azezi lerge ẽ yetɪ: «Fɔn ka mi mam ɪtɪ se'em wã vɔɔrɛ lɛɛɛ, la fu wun wa bãɲɛ.» ⁸ Tɪ Apiyɛɛrɪ yele ẽ yetɪ: «Ayɛ! Fɔn kãn peege mam nãma.» Tɪ Azezi lerge ẽ yetɪ: «Mam sãn ka peege fo, fu ka le tara purɛ la mam.» ⁹ Tɪ Asimõ-pɪyɛɛrɪ yele ẽ yetɪ: «M Zuudãana, da peege m nãma la mã'a, po peege m nu'usi la m zuugo.» ¹⁰ Tɪ Azezi yele ẽ yetɪ: «Seka n sɔ ãyã ka le bɔɔra tɪ a sɔ, sãn dagna a nãma mã'a tɪ a wun peege, se'ere n soe la, a ãyã wuu dẽke mɛ sɔɲa sɔɲa. Ya dẽke mɛ әне sɔɲa sɔɲa, la, la dagɪ ya wuu.» ¹¹ Azezi daan mi seka n yetɪ a pa'ale tɪ ba yɔkɛ ẽ na mɛ, bela ãyã tɪ a yetɪ, dagɪ ya wuu n әне sɔɲa.

¹² La Azezi n peege ba nãma kɪ'ɪlɪm na, a le yɛ la a fu-ugo la, lebe ka zĩ're dia la zẽ'am, yele ba yetɪ: «Yãma bãɲɛ mam n ẽɲɛ se'em na vɔɔrɛ? ¹³ Yãma wi'iri mam tɪ Karẽnsãama, la Zuudãana, ya yele sɔɲa. Mam de la bela. ¹⁴ Mam n de ya Zuudãana, la ya Karẽnsãama la sãn peege ya nãma, yãma mẽ mase mɛ tɪ ya pɛɛra taaba nãma. ¹⁵ Se'ere n soe la, la de la mãmsgɔ tɪ mam ẽɲɛ bɔ ya, tɪ ya mẽ ɪta wu mam n ẽɲɛ ya se'em na.

¹⁶ Mam yetɪ ya la sɪra sɪra, tɪ tɔntɔnna ka gãnɪ a zuudãana, la seka tɪ ba tɔm na ka gãnɪ seka n tɔm ẽ na.

¹⁷ Yan mi bɔn-bãma la, ya sãn ẽɲɛ bela, ya de la zu-yɛlum dõma. ¹⁸ La dagɪ ya wuu yelle tɪ mam tɔgrɪ, mam mi seba tɪ mam looge la mɛ, la dɛnɪ tɪ bɔn-seba n gulɛ Nawẽnnẽ gɔɲɔ puam na ẽɲɛ. La yetɪ: «Nẽr-seka n diti la mam na, wẽrge mɛ zebra la mam.» ¹⁹ Mam dẽɲɛ yeta ya mɛ lɛɛɛ wã, tɪ la nãn ka ẽɲɛ. Tɪ la sãn wa ẽɲɛ, ya wun bɔ sɪra tɪ mam de la seka tɪ mam de la.

²⁰ Mam yetɪ ya la sɪra sɪra, tɪ seka n to'orɪ seka tɪ mam tɔm na, a to'orɪ la mam. La seka n to'orɪ mam na, a to'orɪ la seka n tɔm mam na.»

Azezi yetɪ nẽra n wun pa'ale tɪ ba yɔkɛ ẽɲa

(Amatɛ 26:20-25, Amarkɪ 14:17-21, Alukɪ 22:21-23)

²¹ Azezi n tɔge bela la, sũ-sã'arɔ n tarɪ ẽ zozo'e, tɪ a yetɪ: «Mam yetɪ ya la sɪra sɪra, tɪ ya nẽra ayɪla n wun wa pa'ale tɪ ba yɔkɛ mam.» ²² Tɪ a karẽnbiisi la daan bɪsra taaba, ka mina ẽn tɔgrɪ nẽr-seka yelle. ²³ La Azezi karẽnbiisi la ayɪla, seka tɪ a nɔɲɛ la daan zĩ la Azezi sakukɔ. ²⁴ Tɪ Asimõ-pɪyɛɛrɪ kãbɛ ẽ tɪ a soke Azezi bãɲɛ la de la әне yelle tɪ a tɔgrɪ la. ²⁵ Tɪ karẽnbi-ẽɲa dente Azezi, soke ẽ yetɪ: «Zuudãana, әне de ẽ?» ²⁶ Tɪ Azezi lerge yetɪ: «A de la seka tɪ mam wun suke borborɪ girgo bɔ ẽ na.» A dɪke borborɪ girgo la suke bɔ la Azudaasɪ n de Asimõ Iskariyo dayua. ²⁷ Tɪ Azudaasɪ to'oge borborɪ la, tɪ Asũtãana kɛ a sũurum. Tɪ Azezi yele ẽ yetɪ: «Fɔn yetɪ fu ẽɲɛ se'em na, ẽɲɛ ẽ tɔɔɔ.» ²⁸ La seba n daan lagum bɔna mĩ dita la, nẽra nẽra ka bãɲɛ se'ere n soe tɪ a yele ẽ bela. ²⁹ La Azudaasɪ n daan zɛɛrɪ ligri

tãmpoko la, nërba baseba tē'ese ti Azezi yele ē ti a sēŋe ka da la bōn-seba ti ba boori ti ba dīke ēŋe kibsa la, bu a bō nasdōma sela. ³⁰ Azudaasi n daan to'oge borbori la, dee kō'ɔn yese. La daan de la yu'ɔŋ.

Azezi bō a karēnbiisi nōor-paalga

³¹ Azudaasi n yese la, ti Azezi yeti: «Lēle wā Nērsaala Dayua la wun yē a na'am pāŋa, la Nawēnne wun yē nā'asgo a īyā. ³² Nawēnne sãn yē nā'asgo a īyā, Nawēnne mēŋa wun nā'ase ē. Lēle wā ti a wun nā'ase ē. ³³ M kōma, mam ken bōna la ya la wakate fēe mā'a. La ya wun ε mam, la mam yeti ya lēle wā wu mam n daan yele Zīfdōma se'em na: Ya ka tā wun wa'am zē'e-seka ti mam we'esi la.

³⁴ Mam bō'ɔri ya la nōor-paalga: Nōŋe-ya taaba. Wu mam n nōŋe ya se'em na, ya mē nōŋe taaba bela. ³⁵ Ya sãn nōŋe taaba, nērba wuu wun bāŋe ti ya de la mam karēnbiisi.»

Azezi dēŋe tōge ti Apiyēeri wun si'ise ēŋa

(Amatie 26:31-35, Amarki 14:27-31, Aluki 22:31-34)

³⁶ Ti Asimō-piyēeri soke Azezi yeti: «Zuudāana, fōn we'esi la be?» Ti a lerge ē yeti: «Mam n we'esi zē'a na, fu ka tā wun doose mam sēŋe lēle wā. La fu wun wa doose mam poore wa'am.» ³⁷ Ti Apiyēeri soke ē yeti: «Zuudāana, bēm ēŋe ti mam kãn tā'age doose fōn sēŋe lēle wā? Mam sake ti m ki mē fōn īyā.» ³⁸ Ti Azezi lerge ē yeti: «Fōn wun sake ti fu ki mam īyā? Mam yeti fu la sira sira, ti lan dēŋe nō-ɔɔɔɔ n wun kaase, fu wun si'ise nōore atā ti fōn ka mi mam.»

Azezi n de sore n we'esi Nawēnne zē'am

14 Azezi le yele ba yeti: «Da base-ya ti ya sūure sã'am. Bō-ya Nawēnne sira, la ya bō mam mē sira. ² Kē'a zē'esi boe mam Sō Nawēnne yire zo'oge mē. Mam we'esi ti m ka malge la zē'a ya īyā. La sãn dagi nɩ bela, mam kãn yele nɩ ya. ³ La mam sãn sēŋe ka malge zē'a la ya īyā, mam wun leme wa'am wa tarɩ ya sēŋe mam zē'am, ti mam n boe zē'a na, yāma mē bōna bil-am. ⁴ La mam n we'esi zē'e-seka la, ya mi a sore la.» ⁵ Ti Atoma yele ē yeti: «Zuudāana, tōma ka mi fōn we'esi zē'a na, tōma wun ēŋe la wāne tā'age bāŋe a sore?» ⁶ Ti Azezi lerge ē yeti: «Mam n de sore, la sira, la wɔm dāana. Nēra nēra ka tā wun wa'am mam Sō zē'am, ti la sãn ka doose la mam. ⁷ Ya sãn mi ni mam, ya wun mi ni mam Sō la mē. La lēle wā, ya mi ē, la ya yē ē.»

⁸ Ti Afilipi yele ē yeti: «Zuudāana, pa'ale tɔ fu Sō la, ti bela seke tōma mē.» ⁹ Ti Azezi lerge ē yeti: «Afilipi, mam boe la ya yuuge mē, ti fōn nãn ken ka mina mam? Seka n yē mam, yē mam Sō mē. La ēŋe la wāne ti fōn yeti, m pa'ale ya m Sō la? ¹⁰ Fōn ka bō sira ti mam boe la mam Sō la lē, ti mam Sō la bōna la mam lē? Yetɔg-seba ti mam tɔgrɩ la yāma la, ka ze'eti mam

mēŋa zē'am, la de la mam Sō la n boe la mam lē la n tōnnɩ a tōoma. ¹¹ Bō-ya mam sira, mam n yeti mam boe la m Sō la lē, ti mam Sō la bōna la mam lē la. La ya sãn ka sake bela, ya bō mam sira m tōoma la īyā.

¹² Mam yeti ya la sira sira, ti seka n bō'ɔri mam sira la, a mē wun tōm tōon-seba ti mam tōnnɩ na, la a wun tōm tōon-kāra n gānnɩ bela, se'ere n soe la, mam we'esi la m Sō zē'am. ¹³ La bōn-seba wuu ti ya wun sose la mam yu'ure, mam wun ēŋe bō ya ti m Sō la yē nā'asgo a Dayua la īyā. ¹⁴ Ya sãn sose sela la mam yu'ure, mam wun ēŋe.»

Nawēnne Sira wa'anɔ

¹⁵ «Ya sãn nōŋe mam, ya wun sake mam nōore la mē. ¹⁶ La mam wun sose m Sō la, ti a bō ya Sōŋra ayēma ti a bōna la ya lē wakate n ka ba'asri. ¹⁷ A de la sira Sira ti dūnia dōma ka tā wun to'oge ē, se'ere n soe la, ba ka tā wun yē ē, la ba ka mi ē. La yāma mi ē, se'ere n soe la, a boe la ya zē'am, la a wun bōna la ya lē.

¹⁸ Mam kãn base ya kubsi, mam wun leme wa'am ya zē'am. ¹⁹ La sãn ēŋe fēe, dūnia nērba kãn le yē mam. La yāma nōo wun yē mam, se'ere n soe la, mam n vɔa la, yāma mē wun vɔa mē. ²⁰ La daar-ēŋa daare, ya wun bāŋe ti mam boe la m Sō la lē, ti yāma bōna la mam, ti mam bōna la yāma.

²¹ Seka n bāŋe mam nōore la ti mam bō la, dee sakra ita bela, la de la ēŋa n nōŋe mam. Mam Sō la wun nōŋe seka n nōŋe mam na mē. La mam wun nōŋe ēŋa dāana, dee dīke m mēŋa pa'ale ē.»

²² Ti Azudaasi ayēma n dagi Azudaasi Iskariyo la soke ē yeti: «Zuudāana, la ēŋe la wāne ti fōn wun dīke fu mēŋa pa'ale tōma, dee kãn pa'ale dūnia nērba?» ²³ Ti Azezi lerge ē yeti: «Nēra sãn nōŋe mam, a wun sake ita mam n yele se'em na, la mam Sō wun nōŋe a dāana. La tōma wun wa'am a zē'am wa bōna la ē. ²⁴ Seka n ka nōŋe mam, a ka sake ita mam yetɔga n yele se'em na. La yetɔga la ti ya wōnnɩ wā dagi mam mēŋa yetɔga, la de la mam Sō la n tōm mam na yetɔga.

²⁵ Mam ken bōna la ya zē'am dee tōge yetɔg-bāna bō ya. ²⁶ La Sōŋra la, mam Sō Nawēnne Sira la ti a wun tōm na mam yu'ure ti a wa'am ya zē'am na, ēŋa n wun zāsum ya sela woo, dee tēege ya bōn-seba wuu ti mam yele ya la.

²⁷ Mam basri sū-mā'asum bō ya, mam mēŋa sū-mā'asum ti mam bō'ɔri ya. Mam ka bō'ɔri ya wu dūnia n bō'ɔri se'em na. Da base-ya ti ya sūure sã'am, da zɔ-ta-ya dabeem. ²⁸ Ya wōm mam n yele ya ti mam we'esi mē, la mam wun leme wa'am ya zē'am. Ya sãn nōŋe nɩ mam, ya wun ēŋe nɩ sū-yēlum mam n we'esi m Sō zē'am na īyā. Se'ere n soe la, mam Sō la n gānnɩ mam. ²⁹ Lēle wā, mam tōge ya mē ti la nãn ka paage, ti la sãn wa paage, ya wun bō mam sira. ³⁰ Mam kãn le tōge la ya lē zo'oge, se'ere n soe la, dūnia naba sēm mē. La

a ka tarı pãña la mam. ³¹ La dëni ti dũnia dõma bãñe ti mam nõñe m So la me, la mam itı wu mam So la n bo mam nõore ti m ññe se'em na. Isge-ya, ti fõrge kalam.»

Viinye tua, la a wila yelle

15 Azezi zãsum ba yetı: «Mam de la viinye tua mēña mēña. La mam So Nawēñne n de viinye tua la dāana. ² Wil-seka n puse mam zuo dee ka wõnna biē, a wāarı ē me basra. La wil-seka woo n wõnnı biē, a yorsrı ē me ti a āna sõña malın wõnna biē zɔ'ora. ³ Yã-ma põn āna sõña me, yetɔg-seba ti mam tɔge bo ya la ãyã. ⁴ Bõna-ya la mam le, ti mam wun bõna la ya. Wu tua wille n ka tã wun wõm biē a to'ore ti a sãn ka bõna la tua la, bela, ya mē sãn ka bõna la mam, ya ka tã wun wõm biē.

⁵ Mam n de tua la, ti yãma dena wila la. Seka n boe la mam, ti mam bõna la ē, ñña dāana tõnnı tõon-sõma zɔ'ora me, se'ere n soe la, ya ka tã wun ññe sela sela, ti ya sãn ka bõna la mam. ⁶ Nēra sãn ka bõna la mam le, ba wun lobe ē base wu tua wille la, ti a kuı. La ba vaarı wil-seba n kuı la ita la bugum puam, ti bugum dita ba. ⁷ Ya sãn bõna la mam, ti mam yetɔga la bõna ya puam, ya sose yan boorı sela wuu, ti ya wun yē. ⁸ Ya sãn tõm tõon-sõma zo'oge pa'ale ti yãma de la mam karēñbiisi, bela ya wun nã'ase mam So.

⁹ Mam nõñe ya wu mam So n nõñe mam se'em na. Tara-ya mam nõñlum na ya sũure puam. ¹⁰ Ya sãn sake mam nõore la, ya wun tara mam nõñlum na ya sũure puam, wu mam sake m So nõore tara a nõñlum se'em na. ¹¹ Mam tɔge ya wãna ti ya tara la mam sũ-yēlga, ti ya sũ-yēlga wun zo'oge pãl.

¹² Mam nõore n wãna: Nõñe-ya taaba, wu mam n nõñe ya se'em na. ¹³ Nēra ka boe n tarı nõñlum gãnna nēra n sake ti a ki a surdõma ãyã. ¹⁴ Ya sãn ññe mam n yele ya se'em na, ya de la mam surdõma. ¹⁵ Mam ka le wi'ira ya ti m tõntõnıba, se'ere n soe la, tõntõnna ka mi a zuudāana n itı sela. Mam wi'iri ya ti m surdõma, se'ere n soe la, mam botı yãma bãñe bõn-seba ti mam So yele mam na wuu me. ¹⁶ Dagı yãma n looge mam, mam n looge ya, dıke m tõone na ññe ya nu'usum ti ya sēñe ka tõm tõon-sõma wu tia n wõnnı biē la, ti ya tõon-sõma la wun bõna wakate wuu. Bela, bõn-seka woo ti ya wun sose mam So la, la mam yu'ure, a wun bo ya. ¹⁷ Mam n bo ya nõore ti ya ññe se'em de la ya nõñe taaba.»

Dũnia nēba sise Azezi la a karēñbiisi

¹⁸ Ti Azezi le yele yetı: «Dũnia nēba sãn sise ya, ya bãñe ti ba dēñe sise la mam. ¹⁹ Ya sãn de nı na dũnia n soe ya, dũnia nēba wun nõñe nı ya, se'ere n soe la, ya de la dũnia bõnɔ. La mam loose ya la dũnia puam yese, la dagı dũnia n soe ya, bela ti dũnia nēba sısra ya. ²⁰ Tēege-ya yetɔg-seka ti mam yele ya ti: «Tõntõnna

ka gãnna a zuudāana la.» Ba sãn nãmse mam, ba mē wun nãmse yãma me. La ba sãn sake mam yetɔga, ba wun sake yãma mē yetɔga. ²¹ La ba wun ññe ya bõn-bãma wuu mam yu'ure ãyã, se'ere n soe la, ba ka mi se-ka n tõm mam na. ²² Mam sãn ka wa'am nı, la mam sãn ka tɔge nı la ba le, ba tõon-be'ero taale ka boe ba zuo. La leele wã, ba ka tã wun yetı bãma tarı buurɔ. ²³ Seka n sisri mam na, a mē sisri mam So la me.

²⁴ Mam sãn ka tõm nı tõon-seba ti nēra baa ayıla nãn ka tõm ba tēñasuka, ba tõon-be'ero taale ka boe ba zuo. La leele wã, ba yē mam tõoma me, dee sise mam na m So la. ²⁵ Bela puam ti bõn-seka n gulse Nawēñne gõñɔ puam na ññe. La yetı: «Ba sise mam na zãña.»

²⁶ Sõñra la wun wa'am ya zē'am, a de la sıra Sıa ti mam wun tõm, ti a ze'ele mam So Nawēñne zē'am wa'am ya zē'am. Ñña wun tɔge mam yelle bo ya. ²⁷ La yãma mē wun tɔge mam yelle, se'ere n soe la, halı p'ılunjo ti ya boe la mam le.

16 Mam tɔge bela bo ya ti sela da wa botı ya base ka le dɔla mam. ² Ba wun wa dige ya ba wēndeto puam, la wakate sēna ti nēba wun ku ya, dee tē'esē ti bãma tõm na Nawēñne tõone. ³ Ba wun ññe la bela, se'ere n soe la, ba ka mi mam So la, la mam mēña. ⁴ La mam yele ya bela ti wakat-ñña sãn wa paage, ya tēege ti mam põn yele ya.»

Nawēñne Sıa tõoma

«Mam ka yele ya bela pɔspɔsı, se'ere n soe la, mam daan boe la ya le me. ⁵ La nãnanne wã mam we'esı la seka n tõm mam na zē'am, la ya nēra baa ayıla ka sokrı mam yetı, mam we'esı la be? ⁶ La mam n yele ya bõn-ēna wã ãyã, sũ-sã'arɔ n tarı ya zozo'e. ⁷ La mam yetı ya la sıra, ti la ãn sõña bo ya ti mam sēñe. Se'ere n soe la, mam sãn ka sēñe, Sõñra la kãn wa'am ya zē'am, la mam sãn sēñe, mam wun tõm ē bo ya. ⁸ La a sãn wa'am, a wun botı dũnia nēba bãñe ti ba tuuge me tõon-be'ero yelle, la sela n mase yelle, la sarıyadia yelle. ⁹ A wun botı ba bãñe ti ba tõon-be'ero la de la ban ka bo mam sıra la. ¹⁰ A wun botı ba bãñe sela n mase, se'ere n soe la, mam we'esı la m So zē'am, la ya kãn le yē mam. ¹¹ A wun botı ba bãñe sarıyadia yelle, se'ere n soe la, Nawēñne di dũnia wã naba sarıya me, ti a konje buurɔ.

¹² Mam ken tara la yela zozo'e ti m tɔge bo ya, la ya kãn tã'age to'oge ba nãnanne wã. ¹³ La Nawēñne Sıa n de sıra dāana la sãn wa'am, a wun pa'ale ya sıra wuu, se'ere n soe la, a yetɔga la ka ze'eti a mēña zē'am, a wun tɔge la sela ti a wõm na wuu bo ya, dee yele ya sela n boe nēña sēna. ¹⁴ A wun nã'ase mam, se'ere n soe la, a wun dıke la sela n boe mam zē'am na tɔge bo ya. ¹⁵ Mam So la n tarı sela wuu la de la mam bõnɔ. Bela ãyã ti mam yetı, a wun dıke la sela n boe mam zē'am na tɔge bo ya.»

Sũ-sã'anjɔ wun lebge sũ-yêlga

¹⁶ «La sãn êŋe fêe, ya kãn le yê mam, la, la sãn le êŋe fêe, ya wun le yê mam.» ¹⁷ Tɪ karẽnbiisi baseba sokra taaba yeti: «Êŋa n yeti, la sãn êŋe fêe, tɪ kãn le yê êŋa, la, la sãn le êŋe fêe, tɪ wun le yê êŋa, dee le yeti, êŋa we'esɪ la a So zẽ'am na, a vɔore de la bẽm?» ¹⁸ Bela tɪ ba daan yeta tɪ: «Ên yeti la sãn êŋe fêe la, a vɔore de la bẽm? Tɔma ka mi bõn-seka yelle tɪ a tɔgrɪ la.» ¹⁹ La Azezi n daan mi tɪ ba boori tɪ ba soke ẽ mɛ na, tɪ a yele ba yeti: «Mam n yeti, la sãn êŋe fêe, ya kãn le yê mam, la, la sãn le êŋe fêe, ya wun le yê mam na yelle tɪ yãma sokra taaba?» ²⁰ Mam yeti ya la sɪra sɪra, tɪ ya wun kaase fable, la dũnia dõma sũure wun ɔna yêlum. Ya sũure wun sã'am, la ya sũ-sã'anjɔ la wun wa lebge sũ-yêlga. ²¹ Poka sãn bɔna mĩ virgra, sũ-sã'anjɔ n tarɪ ẽ, a nãmsgɔ wakate n paage la ãyã. La a sãn dɔge bia la kɪ'ulum, a ka le tẽra a nãmsgɔ la yelle, a sũure ɔn yêlum mɛ, ẽn dɔge bia la ãyã. ²² Bela nãnanne wã yãma mẽ tarɪ la sũ-sã'anjɔ, la mam wun le wa yê ya, la ya sũure wun êŋe yêlum. La nẽra baa ayɪla kãn tã'age sã'am ya sũ-yêlga la. ²³ La daar-ẽŋa daare, ya kãn le soke mam sela baa ayɪla yelle.

Mam yeti ya la sɪra sɪra, tɪ bõn-seka tɪ ya wun sose mam So la mam yu'ure, a wun bɔ ya. ²⁴ Ya nãn ka sose sela la mam yu'ure. Sose-ya tɪ ya wun to'oge tɪ ya sũ-yêlga zo'oge pãl.

²⁵ Mam make la makre tɔge bɔ ya. La wakate sẽm me tɪ mam wun tɔge m So la yelle vêelga vêelga bɔ ya, kãn le make makre tɔge. ²⁶ Daar-ẽŋa daare ya wun sose mam So Nawẽnne la mam yu'ure, mam ka yeti mam wun sose ẽ bɔ ya. ²⁷ Mam So la mẽŋa nõŋe yãma mɛ, se'ere n soe la, yãma nõŋe mam mɛ, dee bɔ mam sɪra tɪ mam ze'ele la Nawẽnne zẽ'am wa'am. ²⁸ Mam ze'ele la m So Nawẽnne zẽ'am wa'am dũnia zuo, la mam fõrgɪ dũnia zuo we'esa la m So la zẽ'am.»

²⁹ Tɪ a karẽnbiisi la yele ẽ yeti: «Nãnanne wã, fõn yãŋa tɔgrɪ la vêelga vêelga, dee ka le makra makre. ³⁰ Tɔma yãŋa mi tɪ fõn mi sela woo mɛ, fõn ka le ɛera tɪ nẽra soke fo. Bela tɔma sake tɪ fõn ze'ele la Nawẽnne zẽ'am wa'am.» ³¹ Tɪ Azezi lerge ba yeti: «Ya yãŋa sake ya? ³² Tɔ. Wakate sẽna, la a põn paam mɛ, tɪ ya wuu wun wurge tɪ ya nẽra woo bɔna a yire dee base mam m yɪla. La mam ka de m yɪla, se'ere n soe la, mam So la boe la mam mɛ. ³³ Mam yele ya bela tɪ ya tara la sũ-mã'asum mam yetɔga la ãyã. Dũnia wã puam ya tarɪ la nãmsgɔ, la kenje ya sũure, tɪ mam yãŋe dũnia mɛ.»

Azezi pu'use Nawẽnne a nẽrba ãyã

17 Azezi n tɔge bela kɪ'ulum na, a gorge bise la saazuum yeti: «M So, mam daare paage ya, nã'ase mam n de fu Dayua la, tɪ mam mẽ nã'ase fɔ. ² La de la fõn bɔ mam nõore tɪ m sɔna nẽrsaalba wuu, dee

bɔ seba tɪ fõn bɔ mam na wuu vɔm n ka ba'asrɪ. ³ La vɔm n ka ba'asrɪ la de la ba bãŋe fõn, fu yɪla mã'a n de Sɪra Dãana Nawẽnne na, la ba bãŋe mam Azezi-krisi tɪ fu tɔm na. ⁴ Mam base tɪ fõn yê nã'asgɔ tẽŋa wã zuo mɛ. Mam tɔm tɔon-seba tɪ fõn bɔ mam tɪ m tɔm na ba'ase mɛ. ⁵ Lɛɛɛ wã, m So, botɪ m yê nã'asgɔ fu zẽ'am, wu mam n daan tarɪ na'am pãŋa fu zẽ'am se'em, lan dẽŋe dũnia n daan nãn ka nãam na.

⁶ Mam botɪ seba tɪ fõn looge dũnia nẽrba puam bɔ mam na bãŋe fõn mɛ. Ba daan de la fõn nẽrba, tɪ fõn dɪke ba bɔ mam, la ba sake fu yetɔga la mɛ. ⁷ Lɛɛɛ wã ba bãŋe tɪ fõn bɔ mam sela la wuu ze'ele la fõn zẽ'am. ⁸ Se'ere n soe la, mam tɔge ba la yetɔg-seba tɪ fõn bɔ mam na, tɪ ba to'oge, dee bãŋe sɪra sɪra tɪ mam ze'ele la fõn zẽ'am. La ba bɔ sɪra tɪ fõn tɔm mam.

⁹ Mam pu'usrɪ la bãma ãyã, mam ka pu'usrɪ dũnia nẽrba ãyã, la de la nẽr-seba tɪ fu bɔ mam na ãyã, se'ere n soe la, bãma de la fõn nẽrba. ¹⁰ La mam bõnɔ de la fõn bõnɔ, tɪ fõn bõnɔ dena mam bõnɔ, la mam yê nã'asgɔ mɛ ba zẽ'am. ¹¹ Mam ka le bɔna dũnia zuo, la bãma boe la dũnia zuo dee tɪ mam sẽna fõn zẽ'am. M So n de pupeelem dãana, gu'ura ba la fu yu'ure la tɪ fu bɔ mam na pãŋa, tɪ ba wun dena ayɪla wu mam la fõn n de ayɪla se'em na. ¹² Mam n daan boe la ba lɛ la, mam daan gu'uri ba la yu'ur-seka tɪ fõn bɔ mam na pãŋa. Mam bise ba yelle mɛ sõŋa sõŋa, tɪ nẽra baa ayɪla ka bɔl, sãn dagna seka n de a sã'am, tɪ fõn gõŋɔ n yele se'em na ẽŋe la.

¹³ La lɛɛɛ wã mam sẽm na fõn zẽ'am, la mam tɔgrɪ la wãna mam nãn ken bɔna dũnia zuo, tɪ ba wun tara mam sũ-yêlga, tɪ ba sũ-yêlga zo'oge pãl. ¹⁴ Mam tɔge fõn yetɔga la bɔ ba mɛ, la dũnia nẽrba sisri ba mɛ, se'ere n soe la, ba dagɪ dũnia bõnɔ, wu mam mẽ dagɪ dũnia nẽra se'em na. ¹⁵ Mam ka sosrɪ tɪ fu yese ba dũnia wã zuo, la de la tɪ fu gu ba la be'em dãana. ¹⁶ La bãma dagɪ dũnia nẽrba, wu mam mẽ n dagɪ dũnia nẽra se'em na. ¹⁷ Botɪ fõn sɪra la wun base tɪ ba welge to'ore tara pupeelem dena fu nẽrba. Fõn yetɔga la n de sɪra. ¹⁸ Mam mẽ tɔm ba dũnia puam wu fõn tɔm mam dũnia zuo se'em na. ¹⁹ La bãma ãyã tɪ mam welge m mẽŋa to'ore dɪke m mẽŋa bɔ fõn, tɪ fõn sɪra la wun botɪ ba mẽ welge ba mẽŋa to'ore tara pupeelem dena fu nẽrba.

²⁰ La dagɪ bãma mã'a ãyã tɪ mam pu'usrɪ, la de la seba n wun wa bɔ mam sɪra ba yetɔga la ãyã la mẽ yelle. ²¹ Mam pu'usrɪ fõn tɪ fu botɪ ba lagum dena buyɪla, wu fõn de mam So n boe la mam lɛ, tɪ mam mẽ bɔna la fõn se'em na, tɪ ba mẽ wun lagum dena buyɪla la tɔma, tɪ dũnia nẽrba la wun bɔ sɪra tɪ fõn tɔm mam. ²² La mam bɔ ba na'am pãn-seka tɪ fõn bɔ mam na mɛ tɪ ba dena ayɪla, wu tɔma n de ayɪla se'em na. ²³ Tɪ mam wun bɔna la ba, tɪ fõn bɔna la mam, tɪ ba wun sɪrɪ dena ayɪla, tɪ dũnia nẽrba wun bãŋe tɪ la de la fõn tɔm mam, la fõn nõŋe ba wu fõn nõŋe mam se'em na.

²⁴ M So, mam boori ti nêr-seba ti fu bo mam na, mē bōna la mam le zē'e-seka ti mam wun bōna la, ti ba wun yē mam na'am pānja, na'am pān-seka ti fōn bo mam na, se'ere n soe la, fōn nōje mam me, ti dūnia yuun nān ken ka bōna. ²⁵ M So, fōn de seka n mase. Dūnia nēba ka bāje fōn, la mam nōo bāje fōn me, la nēr-bāma bāje me ti la de la fōn tōm mam. ²⁶ Mam boti ba bāje fōn me, la mam wun ken boti ba bāje fu, ti nōjlum seka ti fōn nōje mam na, wun bōna la ba, ti mam mē bōna la ba.»

Ba yōke Azezi

(Amatie 26:47-56, Amarku 14:43-50, Aluki 22:47-53)

18 Azezi n tōge bela ba'ase la, ēja la a karēnbiisi la yese dooge la Sedrō kulga ke bōba, gaare n daan boe mī, ti ba sēje ka kē bilam. ² La Azudaasi n de seka n wun pa'ale ti ba yōke ē na daan mi zē'a la me, se'ere n soe la, Azezi la a karēnbiisi la daan ēn lagsra taaba bilam me. ³ Bela ti kāabgo kēma nējadōma, la Farisi dōma daan tōm gu'urba ti ba doose la sudaasi, ti Azudaasi taru ba sēje mī. Ba daan taru la zebre lōgru, la fitladōma, dee lasum bugum zēera.

⁴ La Azezi mi bōn-seba wuu n wun ēje ē me, bela ti a sēje lem ba soke ba yetu: «Yāma eeri la āne?» ⁵ Ti ba lerge ē yetu: «Tōma eeri la Azezi n de Nazareti nēra la.» Ti Azezi yele ba yetu: «La de la mam.» La Azudaasi n daan yetu a pa'ale ti ba yōke ē na daan ze mī me. ⁶ La Azezi n yetu: «La de la mam» na, ba sēje la abilimpooore lebe lui tēja. ⁷ Ti Azezi le soke ba yetu: «Āne ti yāma eeri?» Ti ba yetu: «Azezi n de Nazareti nēra la.» ⁸ Ti Azezi lerge ba yetu: «Mam yele ya ti la de la mam. La sān dēna la mam ti ya eeri, base-ya nēr-bāna ti ba fōrge.» ⁹ A yele bela ti a yetoga ti a tōge la n ēje, a yetu: «Nēr-seba ti fōn bo mam na, nēra baa ayula ka bōl.»

¹⁰ La Asimō-piyēri daan taru la sukōbgo, fooge sukōbgo la se kāabgo kēma nējadāana tōntōnna zuugo tubre fiige. Tōntōnna la yu'ure de la Amalkusi.

¹¹ Ti Azezi yele Apiyēri yetu: «Lebe sūm fu su'a la a fuugo puam. Fōn tē'ese ti mam kān sake nāmsgo seka ti mam So bo mam na me bu?»

¹² Ti sudaasi la, la ba ke'ema, la Zifdōma gu'urba la yōke Azezi lu ē, ¹³ taru ē dēje sēje A'annu zē'am. A'annu daan de la Akayifu n de kāabgo kēma nējadāana yuun-ēja la dēem-buraa. ¹⁴ La de la Akayifu n daan yele Zifdōma ti nēra ayula sān ki nēba wuu iya n sōl.

Apīyēri si'ise ti ēja ka mi Azezi

(Amatie 26:69-70, Amarku 14:66-68, Aluki 22:55-57)

¹⁵ La Asimō-piyēri la karēnbia ayula n daan doli Azezi. La kāabgo kēma nējadāana la daan mi karēnbi-ēja me, ti a po doose la Azezi kē kāabgo kēma nējadāana la yire. ¹⁶ La Apīyēri weege ze la yēja,

yaña nōorum, ti karēnbi-seka ti kāabgo kēma nējadāana mi la, yese ka tōge la pōka la n gu'uri zanōre la, dee boti Apīyēri kē. ¹⁷ Ti tōntōn-pōka la n gu'uri zanōre la, soke Apīyēri yetu: «Fōn dagi la bura-ēna karēnbia ayula?» Ti Apīyēri lerge yetu: «Mam dagi a karēnbia.»

¹⁸ La ɔɔɔ n daan boe, ti tōntōnba, la gu'urba la tuure bugum kaage ɔɔsra. Ti Apīyēri daan po bōna mī ɔɔsra bugum na.

Kāabgo kēma nējadāana soke Azezi a zāsja la yelle

(Amatie 26:59-66, Amarku 14:55-64, Aluki 22:66-71)

¹⁹ Ti kāabgo kēma nējadāana la soke Azezi a karēnbiisi la, la a zāsja la yelle. ²⁰ Ti Azezi lerge ē yetu: «Mam tōge la nēr-kuurja la puam bo nēba, mam zāsum nēba Zifdōma wēndeto puam, la Wēnde-kātum na, zē'e-seba ti Zifdōma wuu ēn lagsru taaba la me, mam ka sugē tōge sela sela. ²¹ Bēm ti fu ɔɔkra mam? Soke seba n wōm mam yetoga la, bāma mi mam n yele se'em na me.» ²² Azezi n tōge bela la, ti tōntōnna n ze mī, wē a pēka, dee yetu: «Fōn lerge la kāabgo kēma nējadāana la bela?» ²³ Ti Azezi yele ē yetu: «Mam sān tōge la be'em, pa'ale sela ti mam tōge be'em na, la mam sān tōge la sōja, bēm ti fu wē'era ma?» ²⁴ Ti A'annu boti ba taru ē ban lu ē se'em na, sēje kāabgo kēma nējadāana Akayifu zē'am.

Apīyēri le si'ise ti ēja ka mi Azezi

(Amatie 26:71-75, Amarku 14:69-72, Aluki 22:58-62)

²⁵ La Asimō-piyēri daan ken ze ɔɔsra la bugum na. Ti ba soke ē yetu: «Fōn mē dagi la bura-ēna karēnbia ayula?» Ti a si'ise yetu: «Mam dagi a karēnbia.» ²⁶ Ti kāabgo kēma nējadāana tōntōnna ayula n de nēr-seka ti Apīyēri daan se a tubre fiige la ɔɔbia, soke ē yetu: «Dagi fōn ti mam yē la buraa la gaare la puam na?» ²⁷ Ti Apīyēri le si'ise. Wakat-ēja mēja ti nō-ɔɔɔɔ kaase.

Ba taru Azezi sēje gōmna Apilatı zē'am

(Amatie 27:1-2, 11-31, Amarku 15:1-20, Aluki 23:1-5, 13-25)

²⁸ Ti ba daan taru Azezi Akayifu yire sēje gōmna yire. La daan de la bulika yu'urja yu'urja. La Zifdōma la mēja ka kē gōmna la yire, ba ēje bela ti ba da dēge la ba mēja, tā'age di ɔɔɔg-base kibsa la. ²⁹ Ti Apilatı yese sēje ba zē'am ka soke ba yetu: «Bēm yelle ti yāma taru bura-ēna wā wa'am?» ³⁰ Ti ba lerge ē yetu: «A sān ka ēje ni be'em, tōma kān yōke ē wa'am wa bo fōn.» ³¹ Ti Apilatı yele ba yetu: «Tara-ya ē ya mēja sēje ka di a sariya wu ya ɔɔɔ la n de se'em na.» Ti Zifdōma la yele ē yetu: «Tōma ka taru nōore ti ti ku nēra.» ³² La de la bela ti Azezi n daan tōge pa'ale kūm seka buuri ti ēja wun ki la ēje.

³³ Tl Apilatı lebe kē deem ka wi Azezi soke ē yetu: «Fōn de Zifdōma naba la?» ³⁴ Tl Azezi lerge ē yetu: «Fōn mēnja putē'ere tı fōn sokra bela bu, la de la nēnba base-ba n tōge mam yelle bela bō fōn?» ³⁵ Tl Apilatı lerge ē yetu: «Mam dagı Zifu. Fu mēnja buuri, la ba kāabgo kēma nējadōma n yōke fu tarı wa bō mam. Bēm tı fōn ēnje?» ³⁶ Tl Azezi lerge ē yetu: «Mam so'olum dagı dūnia wā bōnɔ. Mam so'olum sãn de nı dūnia wā bōnɔ, mam tōntōnıba la wun zebe nı me tı ba da yōke mam bō Zifdōma la. La lēle wā, mam so'olum dagı dūnia wā bōnɔ.» ³⁷ Tl Apilatı soke ē yetu: «Bela fōn de la naba?» Tl Azezi lerge yetu: «La de la fōn yele se'em na, mam de la naba. Mam dōge wa'am dūnia wā tı m tōge la sra kaseto. La seka woo n dolı sra selsrı la mam kōa.» ³⁸ Tl Apilatı soke ē yetu: «Sra de la bēm?» Apilatı n yele bela la, a le yese sēnje la Zifdōma la zē'am ka yele ba yetu: «Mam ka yē sela n de be'em buraa wā zē'am.» ³⁹ La yāma malum me tı Zōog-base kibsa wakate woo m yese yu'a deem nēra ayıla base. Yāma boorı tı m yese la Zifdōma naba la base bu?» ⁴⁰ Tl ba tōgra ke'enke'em yetu: «Da kãn base ēnja. Tōma boorı tı fu base la Abarabası.» La Abarabası daan de la fāara.

19 Bela tı Apilatı botı ba tarı Azezi sēnje ka wē ē na ka'asa. ² Tl sudaası dıke gō'osı wuge mūnja vuge ē, dee ye ē fuugo n de gomusga, ³ sēnje lem ē yeta tı: «Zifdōma naba, naa», dee wē'era a pegsı.

⁴ Tl Apilatı le yese nēnba la zē'am ka yele ba yetu: «Bıse-ya, mam wun tarı ē yesem na ya zē'am tı ya bānje tı mam ka yē sela n de be'em bura-ēna zē'am.» ⁵ Tl Azezi vuge gō'osı mūnja la, dee ye fuugo la n de gomusga la yese yēnja. Tl Apilatı yele ba yetu: «Nēra la n wāna.»

⁶ La kāabgo kēma nējadōma la, la ba tōntōnıba la n yē ē na, ba kaasrı la tagurga yetu: «Ka ē, ka ē dō-puurnja zuo ku.» Tl Apilatı yele ba yetu: «To'oge-ya ē ka ka ya mēnja, se'ere n soe la, mam ka yē sela n de be'em a zē'am.» ⁷ Tl Zifdōma la yele ē yetu: «Tōma tarı lɔɔ, la lɔɔ la puam la mase me tı a ki, se'ere n soe la, a ēnje a mēnja tı ēnja de la Nawēnne Dayua.»

⁸ Apilatı n wōm yetōg-ēna la, dabeem n malın yōke ē.

⁹ Tl a le kē deem ka soke Azezi yetu: «Fōn ze'ele la be?» Tl Azezi ka lerge ē. ¹⁰ Tl Apilatı soke ē yetu: «Mam tı fōn sım ka lergra? Fu ka mi tı mam tarı nōore wun botı ba base fɔ, bu ba ka fu dō-puurnja zuo ku?» ¹¹ Tl Azezi lerge ē yetu: «Nōore la sãn ka ze'ele nı saazuum, fu ka tarı nı nōore wun ēnje mam sela. Bela n soe tı seka n tarı mam wa'am wa bō fu la, tōm tōon-be'ego gānna fōn.» ¹² Apilatı n daan wōm bela la, a eeri la sore tı a base Azezi, tı Zifdōma la daan kaasra tagurga yetu: «Fu sãn base bura-ēna, fu dagı Rom na-keko sɔre. Nēr-seka woo n itı a mēnja naba, a de la na-keko la be.»

¹³ La Apilatı n wōm yetōg-bāma la, a tarı Azezi yese la yēnja, dee zı'ire sarıyadia la zē'am tı ba wi'iri tı kug-

palagsı zē'a, tı a yu'ure la Ebre yetōga dena Gabata la. ¹⁴ La daan de la beere n wun wiige tı Zōog-base kibsa la di, la daan mase wu wunteɛnja zuu-tēnasuka. Tl Apilatı yele Zifdōma la yetu: «Ya naba la n wāna.» ¹⁵ Tl ba kaasra tagurga yetu: «Ku ē, ku ē, ka ē dō-puurnja zuo ku.» Tl Apilatı soke ba yetu: «M ka ya naba la dō-puurnja zuo?» Tl kāabgo kēma nējadōma la lerge ē yetu: «Tōma ka tarı naba ayēma, sãn dagna Rom na-keko la.» ¹⁶ Bela tı Apilatı bō ba Azezi tı ba tarı ē ka ka dō-puurnja zuo.

Ba tarı Azezi sēnje ka ka dō-puurnja zuo

(Amatie 27:32-44, Amarkı 15:21-32, Aluki 23:26-43)

Tl ba yōke Azezi, ¹⁷ botı a mēnja tu dō-puurnja la yese tēnja la puam wē'esa zē'e-seka tı ba wi'iri zuwanje zē'a, tı a yu'ure la Ebre yetōga dena Golgota. ¹⁸ Bilam tı ba ka ē dō-puurnja zuo. Dee mē ka nēnba bayi dō-puursi zuto, ayıla a gōbga bōba, ayēma a zuugo bōba, tı Azezi bōna ba tēnasuka. ¹⁹ Tl Apilatı botı ba gulse dō-palaka zuo lable dō-puurnja la zuo. Ba gulse yetu:

«Azezi n ze'ele Nazareti,
Zifdōma naba la.»

²⁰ Zifdōma zozo'e daan karēnje gulsgo la me, se'ere n soe la, zē'e-seka tı ba daan ka Azezi dō-puurnja zuo la lem na tēnja la. La ba daan gulse la Ebre, la Latē, la Grekı yetōga. ²¹ Tl Zifdōma kāabgo kēma nējadōma yele Apilatı yetu: «Da gulse yetı <Zifdōma naba>, gulse yetu: «A yetı ēnja de la Zifdōma naba.» ²² Tl Apilatı lerge ba yetu: «Sela tı mam gulse la, mam gulse me.»

²³ La sudaası la n ka Azezi kılum na, ba dıke la a futo pul zē'esi banaası, tı sudaaga woo daan to'oge pure ayıla, deege fu-woko. La fu-woko la daan ka tarı pe'esōm, ba daan wuge a wuu la munne. ²⁴ Tl ba daan yele taaba yetı, ba da āasum ē, ba pōse bıse seka n wun to'oge ē. Tl ba ēnje bela. La de la wāna tı Nawēnne gōnja n gulse yele se'em na ēnje. La gulse yetu: «Ba pul mam futo bō taaba, dee pōse mam fu-woko la yelle.»

²⁵ Azezi ma, la a ma yıbga, la Amaari n de Akleopası pōga, la Amaari n ze'ele Magdala daan ze me lem dō-puurnja la. ²⁶ Tl Azezi yē a ma la, la a karēnbi-seka tı a nōnje la n ze lem ē, tı a yele a ma la yetu: «M ma, fu bia n wāna.» ²⁷ Dee yele a karēnbıa la yetu: «Fu ma n wāna.» Lan sēnje wakat-ēnja, karēnbıa la tarı Azezi ma la me kule a yire.

Azezi kūm

(Amatie 27:45-56, Amarkı 15:33-41, Aluki 23:44-49)

²⁸ Bela poorum, Azezi mi me tı sela woo ēnje ba'ase me, tı a yetu: «Koyūuro n tarı mam.» A yele bela tı Nawēnne gōnja n gulse yele se'em na n ēnje. ²⁹ La lɔkɔ n daan ze pure la dā-mı'isgo. Tl ba dıke sıpɔɔm luse dā-mı'isgo la puam zēke la dōɔɔg ēnje Azezi nōorum. ³⁰ Tl a yū dā-mı'isgo la, dee yetu: «Sela woo ēnje ba'ase», dee suure a zuugo ki.

³¹ La daan de la beere n wun wiige Zifdōma vo'osgo daare, daar-ēṇa daan de la dabs-kāte, tɪ Zifdōma la ka bɔɔra tɪ ba base tɪ kũm na weege bɔna dɔ-puursi la zuto daar-ēṇa. Tɪ ba sose Apilatɪ yetɪ, a botɪ ba kɔ ba nãma dee sike ba dɔ-puursi la zuto. ³² Tɪ sudaastɪ la sēṇe ka kɔ pɔspɔsɪ dāana la tɪ ba ka lɛm Azezi la nãma, le kɔ ayēma la mē nãma. ³³ La ban paage Azezi zē'am na, ba yē tɪ a dare ki mɛ, tɪ ba ka kɔ a nãma. ³⁴ Tɪ sudaaga ayɪla lu a lugre la kãnnɛ, tɪ zɪum la ko'om yese.

³⁵ Nēr-seka n yē bōn-bāna la n tɔgrɪ pa'ala ya. La a kaseto la de la sura, la a mi tɪ ēṇa tɔgrɪ la sɪra, tɪ yāma mē wun bɔ sɪra.

³⁶ Yel-bāna ēṇe tɪ Nawēnnɛ gōṇɔ n gulse se'em na n ēṇe. La yetɪ: «A kōbrɛ baa ayɪla kãn kɔ'ogɛ.» ³⁷ La ken gulse yetɪ: «Ba wun bɪse seka tɪ ba lu la.»

Azezi laare

(Amatie 27:57-61, Amarkɪ 15:42-47, Alukɪ 23:50-56)

³⁸ Bela poorum tɪ Arimate buraa Azozefu n daan de Azezi karēnbɪa dee sugra, ēn zotɪ Zifdōma nēṇadōma la ŷyā, daan sēṇe ka sose Apilatɪ sore tɪ a dɪke Azezi kũm na, tɪ Apilatɪ sake, tɪ Azozefu sēṇe ka dɪke kũm na. ³⁹ Tɪ Anikodem, seka n daan sēṇe Azezi zē'am yu'uhɔ la po doose Azozefu. A tarɪ la bōnɔ yu'ura n de miiri, la alowe n lagum taaba gāṇe wu kilo pitā tɪ ba yūuhɔ āna sōṇa wa'am. ⁴⁰ Tɪ ba dɪke Azezi kũm na, ēṇe bōnɔ na n tarɪ yūuhɔ la ēṇe, vile ē na tāna wu Zifdōma n ēn ita ba kũm se'em na.

⁴¹ La gaare n daan boe zē'e-seka tɪ ba daan ka Azezi dɔ-puurnɔ la zuo la, la yɔ-paale n tũ tāmpɪā ŷyā n daan boe mɪ tɪ ba nān ka laage nēra a puam. ⁴² La beere n wun wiige vo'osgo daare la, la yɔɔɔ la n daan lɛm na ŷyā, ba daan laage Azezi kũm na bilam.

Azezi vo'ore

(Amatie 28:1-8, Amarkɪ 16:1-8, Alukɪ 24:1-12)

20 Lasrɪ daare bulika yu'uhɔ yu'uhɔ, tɪ Amaari n ze'ele Magdala sēṇe yɔɔm na. Ēn paage la, a yē tɪ kugre la bilge mɛ dee base yɔɔɔ la nōore. ² Tɪ a zoe sēṇe Asimō-pɪyɛrɪ la karēnbɪ-seka tɪ Azezi nōṇe la zē'am, ka yele ba yetɪ: «Ba dɪke Zuudāana la yɔɔɔ la puam yese mɛ, tōma ka mi ban bɪṇe ē zē'e-seka.»

³ Tɪ Apɪyɛrɪ la karēnbɪa ayɪla la yese wɛ'esa yɔɔm na. ⁴ Bāma bayi daan lagum zɔta mɛ wɛ'esa, tɪ karēnbɪa ayēma la zoe gāṇe Apɪyɛrɪ dēṇe paage yɔɔm na, ⁵ veese bɪse, yē tāna la n gā mɪ, dee ka kē. ⁶ Tɪ Asimō-pɪyɛrɪ daan paam poorum wa kē yɔɔɔ la puam, yē tāna la n gā mɪ. ⁷ La tān-seka tɪ ba daan dɪke vile Azezi zuugo la gā mɪ mɛ, la a ka naage la tāna baseba la, a kilim mɛ gā ayēma. ⁸ Tɪ karēnbɪa ayēma la n dēṇe paage la, mē kē yɔɔɔ la puam, yē bōn-seba n boe mɪ na, la a bɔ sɪra mɛ. ⁹ La karēnbɪa la daan nān ka wōm

Nawēnnɛ gōṇɔ n yetɪ, dēnɪ tɪ Azezi ki dee vo'oge la vōore. ¹⁰ Tɪ karēnbɪa bayi la daan lebe kule ba yie.

Azezi dɪke a mēṇa pa'ale Amaari n ze'ele Magdala

(Amatie 28:9-10, Amarkɪ 16:9-11)

¹¹ La Amaari daan ze la yɔɔɔ la nōorum yēṇa kella. A daan kelli mɛ dee veese tɪ a bɪse yɔɔɔ la puam, ¹² yē malekadōma bayi n ye fu-peelsɪ zēa zē'e-seka tɪ ba daan bɪṇe Azezi kũm na. Ayɪla zɪ la a zuugo bɔba, tɪ ayɪla zēa a nãma bɔba. ¹³ Tɪ malekadōma la yele ē yetɪ: «Pɔka, bēm n ēṇe tɪ fōn kella?» Tɪ a lerge ba yetɪ: «Ba dɪke la mam Zuudāana, tɪ mam ka mina ban bɪṇe ē zē'e-seka.»

¹⁴ Ēn tɔge bela la, dee gelge yē Azezi n ze, la a ka bāṇe tɪ la de la ēṇa. ¹⁵ Tɪ Azezi soke ē yetɪ: «Pɔka, bēm tɪ fōn kella? Āne tɪ fōn eerɪ?» Tɪ a tē'esɛ tɪ a de la gaare la dāana, yele ē yetɪ: «M kēema, la sãn dena la fōn dɪke ē, yele ma fōn bɪṇe ē zē'a tɪ m sēṇe ka dɪke ē.» ¹⁶ Tɪ Azezi yele ē yetɪ: «Amaari.» Tɪ Amaari gelge tɔge la Ebre yetɪ: «Rabuni.» A vōore de la karēnsāama. ¹⁷ Tɪ Azezi yele ē yetɪ: «Da kalum ma, mam nān ka zom m Sɔ la zē'am. Sēṇe m sɔbiisi la zē'am ka yele ba yetɪ: «Mam zonnɪ na mam Sɔ Nawēnnɛ n de yāma Sɔ, la yāma Nawēnnɛ na zē'am.» ¹⁸ Tɪ Amaari n ze'ele Magdala sēṇe ka yele karēnbɪa la yetɪ, ēṇa yē Zuudāana la, dee yele ba Azezi n yele ēṇa se'em.

Azezi dɪke a mēṇa pa'ale a karēnbɪa

(Amatie 28:16-20, Amarkɪ 16:14-18, Alukɪ 24:36-49)

¹⁹ La daar-ēṇa daan de la Lasrɪ daare wēnsobre, tɪ Azezi karēnbɪa la bɔna deem, la ba daan yu de-seka tɪ ba boe a puam na kulɪnsɪ mɛ, se'ere n soe la, ba daan zotɪ la Zifdōma nēṇadōma. Tɪ Azezi wa'am wa ze'ele ba tēṇasuka yele ba yetɪ: «Sũ-mā'asum wun bɔna la ya.» ²⁰ Azezi n yele ba bela la, a pa'ale ba la a nu'usi, la a lugre la. La karēnbɪa la n daan yē Zuudāana Azezi la, ba sũure ēṇe yēlum mɛ zozo'e. ²¹ Tɪ Azezi le yele ba yetɪ: «Sũ-mā'asum wun bɔna la ya. Mam mē tōnnɪ ya, wu mam Sɔ la n tōm mam se'em na.» ²² Ēn yele bela la, dee fuuse ēṇe ba zuo, yele ba yetɪ: «To'oge ya Nawēnnɛ Sɪa. ²³ Nēr-seka woo tɪ ya base a tōon-be'ero taale, a tōon-be'ero taale ka le bɔna a zuo. La nēr-seka woo tɪ ya zagse ka base a tōon-be'ero taale, a tōon-be'ero taale ken bɔna la a zuo.»

Azezi dɪke a mēṇa pa'ale Atoma tɪ ēṇa sɪrɪ vo'oge mɛ

²⁴ Atoma n de Azezi karēnbɪa pia la ayɪ la nēra ayɪla tɪ ba wɪ'iri tɪ «Luba» la, daan ka boe ba zē'am Azezi n daan wa'am mɪ na. ²⁵ Tɪ karēnbɪa baseba la yele ē yetɪ: «Tōma yē Zuudāana la.» Tɪ a yele ba yetɪ: «Mam sãn ka yē kuusa la tɪ ba ka a nu'usi, la yisa dɪke m nu'ubiire kalum ba, la mam sãn ka kalum a lugre la, mam kãn malun bɔ sɪra.»

²⁶ La bela poorum dabsa anii daare, ti karënbiisi la daan le lagse taaba deego la puam, ti Atoma bõna la ba le. La kulinsi la daan yu me, ti Azezi wa'am wa ze'ele ba tēnasuka yele ba yetu: «Sū-mā'asum wun bõna la ya.» ²⁷ Dee yele Atoma yetu: «Dike fu nu'ubiire kalum mam nu'usi la, dee tēge fu nu'ugo kalum mam lugre la bise. Da kã sē'ena, bõ sira.» ²⁸ Ti Atoma lerge ē yetu: «Fu de la mam Zuudāana la mam Nawēnne.» ²⁹ Ti Azezi yele ē yetu: «La de la fõn yē mam na iya ti fu bõ sira? Seba n ka yē dee bõ'ra sira la taru zu-yelum.»

Bõn-seka n soe ti gõnj wã gulse

³⁰ Azezi daan tõm tõon-yålma baseba me zozo'e a karënbiisi la zē'am, n ka gulse ēge gõn-ēna wã puam. ³¹ La bõn-bāna wã gulse ti ya bõ la sira ti Azezi n de Krisi, Nawēnne Dayua la, ti ya sãn bõ ē sira, ya wun yē yõvore a yu'ure iya.

Azezi dike a mēja pa'ale a karënbiisi Tiberiadu mögre nõorum

21 La bela poorum Azezi le dike a mēja me pa'ale a karënbiisi la Tiberiadu mögre nõorum. Ēn pa'ale ba a mēja se'em n wāna: ² Asimō-piyēri, la Atoma ti ba wi'iri ti luba la, la Anatanayeli n ze'ele Kana n boe Galile so'olum, la Azebede koma, la Azezi karënbiisi baseba bayi n daan lagum bõna la taaba. ³ Ti Asimō-piyēri yele ba yetu: «Mam we'esi ti m ka yõge la zūma.» Ti baseba la yele ē yetu: «Tõma mē wun doose la fu sēge.» Ti ba yese ka kē õorõj sēge. La yu'uh-ēja ba ka yõke sela sela.

⁴ Ti beere bõna mī yulura, ti Azezi ze mögre la nõorum, ti a karënbiisi la ka bāge ti la de la ēja. ⁵ Ti Azezi soke ba yetu: «M koma, yāma taru zūma?» Ti ba lerge ē yetu: «Ayei.» ⁶ Ti a yele ba yetu: «Lobe-ya yuka la õorõj la zuugo bõba, ti ya wun yõge zūma.» Ti ba lobe ba yuka la, yõge zūma zo'oge ka tãna wun ve'ege ēge õorõj la puam. ⁷ Ti karënbi-seka ti Azezi nõge la yele Apiyēri yetu: «La de la Zuudāana la.» La Apiyēri n wõm ti a de la Zuudāana la, ti a dike a fuugo ye, ēke lui ko'om puam dõra.

⁸ Ti karënbiisi baseba n daan boe õorõj la puam na ve'era yuka la n pure la zūma la sēna, ba daan ka zāage la doone, la daan mase wu kãntusi kobsyi. ⁹ La ban dooge doone na, ba yē la bugsāana n diti, ti zūma dõga ba zuo, la borbori. ¹⁰ Ti Azezi yele ba yetu: «Looge-ya zūn-seba ti ya yõge leele la baseba wa'am.» ¹¹ Ti Asimō-piyēri kē õorõj la puam ve'ege yuka la n pure la zūma la dooge. Zūn-kāra kõbga la pinuu la atã n daan boe a puam. La baa la zūma la n daan zo'oge

bela la, yuka la ka āage. ¹² Ti Azezi yele ba yetu: «Wa'am-ya wa di.» La karënbiisi la nēra baa ayula daan ka saage soke ē yetu: «Fõn de la āne?» Se'ere n soe la, ba daan bāge ti a de la Zuudāana la. ¹³ Ti Azezi paage dike borbori la pu ba, dee dike zūma la bõ ba, ti ba di.

¹⁴ Azezi n daan vo'oge la, nõore atã n bela ti a dike a mēja pa'ale a karënbiisi la.

Azezi tãgru la Apiyēri

¹⁵ Ban daan di ki'ulum na, ti Azezi soke Asimō-piyēri yetu: «Asimō, Azã bia, fõn nõge mam gāna bāna n nõge mam se'em na?» Ti a lerge ē yetu: «Ēe! Zuudāana, fõn mi ti mam nõge fõn me.» Ti Azezi yele ē yetu: «Gu'ura m pebilsu.» ¹⁶ Ti Azezi le soke ē nõore buyi yetu: «Asimō, Azã bia, fõn nõge mam?» Ti a lerge ē yetu: «Ēe! Zuudāana, fõn mi ti mam nõge fõn me.» Ti Azezi yele ē yetu: «Bisra m piisi.» ¹⁷ Ti Azezi le soke ē nõore atã yetu: «Asimō, Azã bia, fõn nõge mam?» Ti Apiyēri sūure daan sã'am, ěn soke ē nõore atã yetu: «Fõn nõge mam me bu» la. Ti a lerge ē yetu: «Zuudāana, fõn mi sela wuu me, fõn mi ti mam nõge fõn me.» Ti Azezi yele ē yetu: «Gu'ura m piisi la. ¹⁸ Mam yetu fu la sira sira, ti fõn daan de budib-paalga la, fu daan lutu fu sagānne me sēna fõn boori zē'a, la fu sãn wa kurge, fu wun zēke fu nu'usi ti nēra lu fu sagānne, dee taru fu sēge zē'e-seka ti fu ka boori.»

¹⁹ Azezi daan yele bela pa'ale la kũm seka buuri ti Apiyēri wun ki ti la nã'ase Nawēnne. La ěn yele bela la, a yele ē yetu: «Dõla mam!»

Karënbi-seka ti Azezi nõge la yelle

²⁰ La Apiyēri gelge me yē karënbi-seka ti Azezi nõge la n doli ba poore. La de la karënbi-ēja n daan dente Azezi dia la wakate, soke ē yetu: «Zuudāana, la de la āne n yetu a pa'ale ti ba yõke fõn?» ²¹ Apiyēri n yē ē na, ti a soke Azezi yetu: «Zuudāana, dee ēna wã, bēm n wun ēge ē?» ²² Ti Azezi lerge ē yetu: «Mam sãn bõra ti a vɔa, halu ti mam wa leme wa'am, bēm n pake fõn? Fõn wen dõla mam.» ²³ Ti yetõg-ēna wã saage sɔbiisi la zē'am ti karënbi-ēja kã ki. La Azezi ka yele ti a kã ki, a yetu: «Mam sãn bõra ti a vɔa halu ti mam wa leme wa'am, bēm n pake fõn?» ²⁴ La de la karënbi-ēja n bõ bõn-bāna kaseto, la ēja n gulse ba. La tõma mi ti a kaseto la de la sira.

²⁵ La Azezi daan ēge yela baseba zozo'e me. Ba sãn yetu ba gulse ni ba wuu ayula-yula, mam tēese ti zē'a kã bõna dũnia zuo n wun to'oge gõnnõ na ti ba wun gulse ni na.

Tōoma

Bilgre

Tōoma gōṇḡ wā de la Aluki gōṇḡ buyi dāana tɪ a gulɛ.

Aluki yuun doli la Apoli tōnna Nawēnne tōoma (Tōoma 16:10).

A ɔɔspɔsɪ gōṇḡ n de Azezi kō-yēlga la pa'ale la Azezi n yuun boe dūnia zuo ēṇe se'em. Tōoma Gōṇḡ wā tɔgrɪ tɪ Azezi zom na Nawēnne yire, tɪ a karēnbiisi ka le yē ē. La Azezi tōm na Nawēnne Sia tɪ a wa'am wa bɔna la ba le. Azezi yāṇa boe la ba le la Nawēnne Sia. Sia la n bɔ'ɔrɪ ba pāṇa tɪ ba saara dūnia zē'a woo mōola Azezi kō-yēlga la.

Tōoma gōṇḡ wā pa'ale tɪ Pāntekɔtɪ daare tɪ Nawēnne Sia wa'am Azezi karēnbiisi la zuo la pāṇa, botɪ Azezi nērba la zɔ'ɔra Zerizalem pa'asra (sapɪtrɪ 1 - 7), saage paage Zude, la Samaari tēnsɪ wuu (sapɪtrɪ 8 - 12).

Gōṇḡ wā pa'ale tɪ Apoli, la Azezi karēnbiisi baseba n yāṇa mōole sēṇe ka paage tēn-seba n kaage ko-kāte tɪ ba wi'iri tɪ Mediterane, tole ka paage Rom n de tēn-kāte, tɪ bu-zāṇsɪ mē bɔ Azezi sɪra, yē Nawēnne Sia pāṇa (sapɪtrɪ 13 - 28).

Azezi nērba la yuun yē toogo, la nāmsgɔ mē zozo'e. Tɪ Nawēnne Sia la sōṇe ba, pa'ale ba ban wun ēṇe se'em, dee tēege ba Azezi n de nēr-seka, ēn ēṇe se'em, la ēn ye se'em.

Bōn-seba wuu n gulɛ gōṇḡ wā puam na yetɪ Nawēnne nērba la mase mē tɪ ba mōole Azezi-krisi kō-yēlga la tɪ la paage dūnia so'olum wuu.

¹ Ateofili, mam ɔɔspɔsɪ gōṇḡ la puam mam tɔge pa'ale fōn Azezi n daan ɔɔse tōm se'em, dee pa'ale nērba se'em wuu halɪ ² ka paage daar-seka tɪ Nawēnne tarɪ ē zom a yire la mē. La ēn daan nān ka zom Nawēnne yire la, a daan tarɪ la Nawēnne Sia la pāṇa pa'ala Tōntōnɪba tɪ a looge la, bāma n wun tōnna se'em.

³ Azezi kūm na poorum, dabsa pinaasɪ puam tɪ a dɪke a mēṇa pa'ale a Tōntōnɪba, tōm tōon-yālma zozo'e n pa'alɪ tɪ ēṇa vo'oge mē, dee tɔge Nawēnne so'olum yela pa'ale ba. ⁴ La ban lagɛ bɔna la ē na, tɪ a bɔ ba nōore yetɪ: «Da yese-ya Zerizalem tēṇa puam, gu'ura-ya bōn-seka tɪ mam Sɔ daan bīṇe nōore tɪ a bɔ ya, tɪ mam ye le ya la. ⁵ Se'ere n soe la, Azā daan misri ya la ko'om puam, la, la kān yuuge dee tɪ Nawēnne mise ya a Sia puam.»

Azezi zom Nawēnne yire

⁶ La Tōntōnɪba la n lagɛ taaba la, soke Azezi mē yetɪ: «Zuudāana, la de la lēle wā tɪ fōn wun to'oge lɪrayelɪ dōma na'am le bɔ ba bu?» ⁷ Tɪ Azezi lerge ba yetɪ: «La ka de ya bāṇe wakate la dabs-seba tɪ mam Sɔ Nawēnne looge la a mēṇa pāṇa. ⁸ La Nawēnne Sia wun wa'am ya zuo, wa bɔ ya pāṇa. La ya wun dena mam kaset-dōma pa'ale mam yela Zerizalem, la Zude, la Samaari tēnsum, halɪ ka paage dūnia teka wuu.» ⁹ ēṇa n tɔge bela ba'ase la, dee zɔnna Nawēnne yire, tɪ ba bɪsra ē, tɪ wara lile ē.

¹⁰ La ēn zonnɪ na, ba ken bɪsra la saazuum zī, tɪ buraasɪ bayi ye fu-peelsɪ dare wa'am wa ze ba zē'am,

¹¹ dee soke ba yetɪ: «Galile nērba, bēm tɪ yāma ze bɪsra saazuum? Azezi n yese ya zē'am wē Nawēnne yire wā, a wun le leme wu yāma n yē ē tɪ a wē'esa se'em wā.»

Nēr-seka n wun sɔɔge Azudaasɪ zē'a

¹² La Azezi Tōntōnɪba la daan boe la Oliivi tāṇa zuo, yāṇa ze'ele bilam lēbra Zerizalem. Tāṇa la, la Zerizalem ka zāage gāṇe kilomētrɪ ayɪla. ¹³ La ban paage Zerizalem tēṇam na, ba zom na saazuum deego tɪ ba ēn bɔna mɪ na puam. La seba n daan boe mɪ na de la Apɪyēerɪ, la Azā, la Azakɪ, la A'āndre, la Afilipi, la Atoma, la Abatelemi, la Amatie, la Azakɪ n de Alfe bia, la Asimō seka n daan de Zelɪtɪ nēra, la Azakɪ bia Azudaasɪ. ¹⁴ Bāma wuu la ɔɔgsɪ, la Azezi ma Amaari, la Azezi yɪbsɪ n daan ēn lagɛ taaba pu'usra Nawēnne la putē'ere ayɪla wakate wuu.

¹⁵ La daare ayɪla, seba n bɔ Azezi sɪra la daan lagɛ mē, ba kālɪ daan de wu kɔbga la pisyi. Tɪ Apɪyēerɪ isge ze'ele ba tēṇasuka yetɪ: ¹⁶ «M sɔbiisi, la sān dena Azudaasɪ n pa'ale nērba sore tɪ ba yōke Azezi la, Nawēnne Sia yuun dēṇe botɪ naba Adavidi tɔge a yelle mē halɪ kurum kurum. Bōn-seka n ēṇe la mase la Nawēnne yetɔga n yuun tɔge se'em na. ¹⁷ Azudaasɪ, a daan de la tōma nēra ayɪla, Nawēnne n daan looge ē tɪ a tōnna a tōoma.»

¹⁸ (La ĕn daan tõm be'em na ti ba yõ ĕ, ti a da va'am la a tõon-be'ero la yõõõ, lui aliko, ti a puure pusge, ti a yõõõ wuu yurge. ¹⁹ Zerizalem tēja nērba wuu wõm bela me, ti ba wi'ira va'am na yu'ure la ba tēja yetõga yeti «Akeldama». A võore de la zum va'am.) ²⁰ Apıyeeɾı ken tõge yeti: «La gulse Nawēnne yõoma gõõõ puam yeti:

«A yire wun lebge daboogo,
ti nēra nēra da le kē'era mī.»

Dee ken gulse yeti:

«Nēra wun sõõge a zē'am tõm.»

²¹⁻²² Bela, dēni ti nēra ayula pa'ase tõma Tõntõnıba la puam pa'ale Azezi vo'ore la sira. La mase ti nēr-ēõa de-na la nēr-seka n daan põn bõna ti puam wakat-seka wuu ti Zuudāana Azezi daan boe la tõma la, lan pī'ilum la Azā n daan misri nērba ko'om puam na, wa paage wakat-seka ti Azezi daan yese tõma sukam zom Nawēnne yire la.» ²³ Ti ba bām yeti nērba bayi. Ayula de la Azozefu, ti ba wi'iri ti Abarsabası, dee ti a yu'ure ken dēna Azustusı. Ti ayēma la mē yu'ure dēna Amatıyası. ²⁴ Ti ba yāõa pu'use Nawēnne yeti: «Ti Zuudāana, fõn mi nērsaalba wuu sūure. Pa'ale tõ nērba bayi wā puam, fõn looge nēr-seka ²⁵ ti a wun sõõge Azudaası zē'am lagum na Tõntõnıba la, tõm tõon-seka ti Azudaası base dee sēõge lan mase ti a sēõge zē'am na.» ²⁶ Ba pu'use bela dee põse me, ti la yõke Amatıyası, ti ba botı a naage la Tõntõnıba pia la ayula la.

Nawēnne Sıa wa'arõ yelle

2 La Zıfdõma kibsa yu'ure n de Pāntekõtı daare n daan paage, ti Azezi karēnbiisi wuu daan bõna zē'a ayula. ² Ti voole dare ze'ele saazuum wa'am wu kuseb-kāte wa pıre de-seka ti ba zı mī na. ³ Ti ba yē sela n ān wu bug-zılısı n puı ayula ayula zõõla ba nēra woo zuo. ⁴ Ti Nawēnne Sıa daan wa'am ba wuu zē'am la pāõa, ti ba tõõra bu-zāõsı yetõga, wu Sıa la n bõ ba ti ba tõge se'em na.

⁵ La Zıfdõma n daan dolı Nawēnne sore sõõa n yese dūnıa so'olum wuu wa'am wa bõna Zerizalem. ⁶ La nērba la n daan wõm voole la, ba daan lagse zo'oge me, ti la daan di'ige ba, se'ere n soe la, nēra woo daan wõm ti ba tõõrı la a mēõa buuri yetõga. ⁷ Ti ba palēõa ĕke, ti ba ze yeri, sõkra taaba yeti: «Bıse-ya, nēr-bāna wā wuu n tõõrı wā de la Galile dõma. ⁸ La, la ēõge la wāne ti tõma nēra woo wõm ti ba tõõra a buuri yetõga? ⁹ Tõma nērba baseba yese la Partı, la Medi, la Elamı, la Mezopotamı tēnsım, ti baseba mē yese Zude, la Kapadõsı, la Põ, la Azi tēnsım, ¹⁰ ti baseba mē yese Frizi, la Pānfili, la Ezipti, la Libi tēnsı n lem Sireni, ti baseba yese Rom tēõam. ¹¹ Nērba la baseba de la Zıfdõma, la baseba dagı Zıfdõma dee sake dõla lõõ ti Nawēnne bõ Zıfdõma. Baseba mē de la Kretı dõma, la Araabı dõma. La baa bela wuu tõma wõm me ti ba tõõrı tõma buuri

yetõga pa'ala tõon-kāra ti Nawēnne ēõge.» ¹² Ti ba palēõa ĕke, ti ba ka mina ba wun tē'esē se'em, yāõa sõkra taaba yeti: «Yel-ēna võore de la bēm?» ¹³ Ti baseba la'ara ba yeti: «Nēr-bāna wā yū la dāam buge.»

Apıyeeɾı mõõle Nawēnne yetõga

¹⁴ Ti Apıyeeɾı la a Tõntõn-taaba pia la ayula la ze'ele saazuo, ti Apıyeeɾı tõge ke'enke'em yele nēr-kuuõõ la yeti: «Yāma Zıfdõma, la yāma seba n boe Zerizalem wā wuu, selse-ya mam n yeti m yele ya se'em wā, ti ya tã'age bāõge yel-ēna wā võore. ¹⁵ Yāma n tē'esrı ti nērba wā yū la dāam buge la, la dagı bela, la nān de la bulıka. ¹⁶ La bõn-ēna n ıtı wā de la Nawēnne nõõt'õsa Azuwelı n yuun yele se'em na n ıtı.»

¹⁷ A yuun yele ti Nawēnne yeti:

«Dūnıa ba'asõ sān lem,
mam wun base ti m Sıa sige nērsaalba buuri wuu zu-to.

A wun botı ya dayõõsı la ya põyõõsı to'oge mam yetõga tõge bõ nērba.

Dee botı ya kõmbı'ılsı bıse yē yela wu zāasõõ la,
dee botı ya bõnkegsı zāasum.

¹⁸ Asıra, wakat-ēõa mam wun base ti m Sıa la sige m tõntõn-buraası, la m tõntõn-põõsı zuto,
ti ba to'oge mam yetõga tõge bõ nērba.

¹⁹ Mam wun botı bõn-yālma ēõge saazuum,
dee botı yel-kırsı n pa'alı mam pāõa ēõge tēja zuo:
Zum, la bugum, la bug-zū'usi zozo'e n wun bõna.

²⁰ Wēntulle wun wa lebge la lika,
ti wõõga mõ'oge āna wu zum na,
dee ti Zuudāana daare n de na'am kāte daare paage.

²¹ La nēr-seka woo n wun wi Zuudāana yu'ure sose ti a fāage ē, a wun yē fāare.»

²² «Lsrayelı dõma, selse-ya mam n yeti m yele ya se'em wā. La de la Azezi n de Nazaretı nēra la yelle. Nawēnne n looge ē bõ ya, botı a tõm tõon-yālma la yel-kırsı ti tēõasuka, wu yāma n põn mina se'em na, pa'ale ti ēõa n tõm ē ti zē'am. ²³ Nawēnne n yuun põn tē'esē bõõra ti a ēõge se'em na ĩyā, ti a dıke Azezi ēõge ya nu'usum, ti ya botı nēr-seba n ka dolı Nawēnne lõõ la yõke ē tarı ka ka lable dõ-puurnõa zuo ku. ²⁴ Ti Nawēnne vo'oge ē, fāage ē kũm nāmsõõ puam base, kũm n ka tã'age tara ē na ĩyā. ²⁵ Adavidi yuun põn tõge a yelle yeti:

«Mam yēti mam Zuudāana la mam nēõam me daare woo.

A boe la mam zuugõ bõba sõõõra mam ti sela kān botı mam bike.

²⁶ Bela ĩyā mam tarı sũ-yēlga me,
dee tõõra sũ-yēlga yetõga.

La baa mam wun ki,
mam tarı putē'ere me,

²⁷ ti fõn Nawēnne kān base mam kı'un-tēõam,
fõn kān base ti fu pupeelem dāana põ'oge.

²⁸ Fōn boti mam bānje yōvore sore me.
Fōn wun wa boti mam yē sū-yēlga me zozo'e fōn nējam.» »

²⁹ «M sobiisi, base-ya ti m tōge ya vēelga vēelga ti yaa-ba naba Adavidi yelle. A yuun ki me, ti ba laage ē. Ti a yocog bōna ti tēnasuka kalam hal wa paam zīna.

³⁰ Adavidi yuun de la Nawēnne nōtō'c̄sa, la a bānje me ti Nawēnne bīnje la nōore p̄ci yeti, a wun wa boti a yusi la nēra ayula le di na'am wu ēn yuun diti na'am se'em na. ³¹ Adavidi dēnje yē Nawēnne n yeti a tōm se'em na me. Ti a tōge Krisi kūm vo'ore yelle yeti:

Nawēnne k̄an base ē ki'in-tējam,
a k̄an boti a iŷā pō'oge.»

³² Azezi ēja n wāna ti Nawēnne vo'oge. Ti tōma waa wuu dena kaset-dōma tōgra a yelle bō'c̄ra ya. ³³ Nawēnne yānja zēke ē me ka zī'ire a zuug bōba, ti a to'oge a So Nawēnne S̄ta la ti a yuun bīnje nōore ti a wun bō tōma wuu la. Bōn-ēja n wāna ti ya yēti dee wōnna lēelē wā. ³⁴ La dagi Adavidi n yuun zom Nawēnne yire. La a mēja yuun yeti:

«Zuudāana Nawēnne yele mam Zuudāana yeti:
Zī'ire m zuug bōba,

³⁵ halu ti m boti fu be'ēba bōna fu nāma tēja.»

³⁶ «Bela, l̄srayeli buuri wuu mase me ti ba bānje s̄ra s̄ra ti Azezi ti ya daan ka lable d̄-puurja zuo ku la, Nawēnne pa'ale ya ti ēja n de Krisi, dee dena ti Zuudāana.»

³⁷ Nērb̄a la n daan wōm yetoga wā la, la daan ba kē ba sūure me halu ti ba soke Apiyēri, la Tōntōnba baseba la yeti: «Ti sobiisi, ti wun ēnje la wāne?» ³⁸ Ti Apiyēri lerge ba yeti: «Teege-ya yem base tōon-be'ero, ti ya nēra woo boti ba mise ē ko'om puam la Azezi-krisi yu'ure, ti Nawēnne base ya tōon-be'ero taale dee bō ya a S̄ta la. ³⁹ Nawēnne n yuun bīnje a nōore la, de la yāma la ya kōma, la seba wuu n boe zē'a n zāage ti ti Zuudāana Nawēnne wun wa wi ba a zē'am na iŷā.»

⁴⁰ Apiyēri daan tōge la yetoga baseba zozo'e pa'ale ba s̄ra, dee siŷe ba yeti: «Base-ya ti Nawēnne fāage ya zamāan-ēna nēr-be'esi la puam.» ⁴¹ Ti nērb̄a la zozo'e daan sake Apiyēri yetoga la, boti ba mise ba ko'om puam. Nēr-seba n daan pa'ase ba puam daar-ēja mase wu nēr-tusatā. ⁴² La ba daan ba mōrge boti Tōntōnba la zāsna ba me, dee naage taaba la putē'ere ayula, lagsra dita la taaba, fiisra borbori dee pu'usra Nawēnne.

Seba n bō Azezi s̄ra la vōm n ān se'em

⁴³ La dabeem daan kē nērb̄a la wuu me, se'ere n soe la, Azezi Tōntōnba la tōm na tōon-yālma la yel-k̄irsi zozo'e. ⁴⁴ La nēr-seba n daan bō Azezi s̄ra la wuu daan lagim taaba la nōore ayula, ti ba bōntarsōm lebge ba wuu bōn̄, ⁴⁵ dee daan kōc̄sra ba lōgr̄ la ba bōn-tarsōm, puta bō'c̄ra nēr-seba wuu n bōc̄ra sōnje se'em

na. ⁴⁶ La daare woo ba ēn lagsra Wēnde-kātum na me, la taaba yie, dita dee fiisra borbori, tara sū-yēlga la yem ayula, ⁴⁷ pēgra Nawēnne, dee yēta yel-sōnne nērb̄a wuu zē'am. La daare woo Zuudāana boti nērb̄a n yēta fāare pa'asra seba n bō ē s̄ra la puam.

Kōc̄r̄ja yē iŷā'asum

3 Daare ayula zaanōore karf-atā, ti Apiyēri la Azā dōla taaba we Wēnde-kātum na, wakat-seka ti nēr-ba ēn sēnna pu'usra la. ² La buraa n boe ti ba dōge ē ti a dena kōc̄r̄ja. La daare woo ba ēn tara ē sēnna zī'ita la Wēnde-kāte la nō-seka ti ba wi'iri ti nō-sōr̄ja la, ti a s̄c̄sra nēr-seba n kē'eri Wēnde-kāte la puam na.

³ La kōc̄r̄ja la n yē Apiyēri la Azā n boe mī ti ba kē Wēnde-kātum na, ti a sose ba yeti, ba bō ē sela. ⁴ Ti ba b̄isra ē zīi, ti Apiyēri yele ē yeti: «B̄ise tōma.» ⁵ Ti a malun b̄isra ba, tē'esra ti ba wun bō ē sela. ⁶ Ti Apiyēri yele ē yeti: «Mam ka tar̄i ligri wun bō f̄. La sela ti mam tar̄i la, mam wun bō f̄. La Azezi-krisi n ze'ele Nazareti yu'ure iŷā, isge sēnna.» ⁷ La Apiyēri gur̄e la a zuug nu'ugo zēke ē ti a isge. Ti a nāma la zīila keŷe bilam mēja, ⁸ ti a vaage isge ze'ele saazuo, sēnna dōla ba kē'era Wēnde-kātum na, ēgra sisra, dee pēgra Nawēnne.

⁹ Ti nērb̄a la wuu yē ē ti a sēnni dee pēgra Nawēnne. ¹⁰ Ti ba bānje ti la de la ēja n ēn zēa Wēnde-kāte la nō-sōr̄jom na s̄c̄sra. La ban yē sela n ēnje ē na, la di'ige ba me zozo'e.

Apiyēri mōole Nawēnne yetoga Wēnde-kātum

¹¹ La nērb̄a la n yē bura-seka n daan de kōc̄r̄ja la n doli Apiyēri la Azā la, la di'ige ba wuu me, ti ba zoe ka lagse taaba ba zē'am zē'e-seka yu'ure n de «Asalomō vōnana» na. ¹² La Apiyēri n yē bela la, ti a soke nērb̄a la yeti: «l̄srayeli dōma, bēm ti bōn-ēna wā di'ige ya? La bēm ti ya b̄isra tōma, wu la de la tōma mēja pāja, bu tōma n ba dōla Nawēnne sōja la iŷā ti tōma boti bura-ēna isge sēnna? ¹³ La de la Nawēnne ti ti yaabdōma Abraham, la A'izaki, la Azak̄bi yuun pu'usri la, n zēke a tōntōnna Azezi la yu'ure. ēja ti ya daan yōke sēnje ka ēnje seba n soe pāja la nu'usum, ti baa gōmna Apilat̄i n daan boori ti a base ē na, ya daan zagse me a nējam. ¹⁴ La yan daan zagse Azezi la, ya zagse la pupeelem dāana, la s̄ra dāana, dee daan bōc̄ra ti Apilat̄i base nēr-kuura la bō ya. ¹⁵ Bela yāma boti ba ku la yōvore dāana, ēja ti Nawēnne vo'oge. Tōma daan yē bōn-ēna me, tōgra a yelle bō'c̄ra ya. ¹⁶ La de la Azezi yu'ure n tar̄i pāja la iŷā, la tōma n bō ē s̄ra la n boti bura-ēna ti yāma mi dee yē wā keŷe. La de la ēn bō Azezi s̄ra la n boti a yē iŷā'asum sōja ya wuu nējam wā.

¹⁷ Tō. M sobiisi, mam bānje ti yan ka mi la iŷā, ti yāma la ya nējadōma daan ēnje bela. ¹⁸ La bela puam ti

Nawēnne n yuun pōn dēje boti a nōt'w'srība wuu tōge yeti, dēni ti Kriisi wa nāmse la, ēje. ¹⁹ Bela, teege-ya yem base tōon-be'ero, dee wa doose Nawēnne, ti a wun base ya tōon-be'ero taale, ²⁰ dee bō ya sū-mā'asum, dee tōm Kriisi ti a daan pōn dēje looge la bō ya. Ēja n de Azezi. ²¹ Dēni ti a bōna Nawēnne yire hali ka paage wakat-seka ti sela wuu wun teege lebge paalsi, wu Nawēnne n yuun pōn boti a nōt'w'srība tōge kurum kurum se'em na.

²² Bela ti Amoyisi yuun yeti: «Ya Zuudāana Nawēnne wun boti nēra ayila ze'ele ya buuri puam dena a nōt'w'sa bō yāma, wu ēja n boti mam dena a nōt'w'sa se'em na. Dēni ti ya selse bōn-seba wuu ti a wun tōge bō ya la, ²³ la nēr-seka woo n ka selse Nawēnne nōt'w's-ēja, ba wun yese ē me Nawēnne nērba tējasuka ku.» ²⁴ Nawēnne nōt'w'srība, lan pī'ilum la Asāmweili la seba n tōge ēja poorum na wuu, yuun pōn tōge dabs-bāna yelle me. ²⁵ Yetōg-seba ti Nawēnne boti a nōt'w'srība yuun tōge la de la yāma iŷā, la ēn yuun bīje a nōore la ti yaabdōma la ken dena la yāma iŷā. A yele Abraham yeti: «Fu yūsī la iŷā ti mam wun ēje dūnia buuri wuu yel-sōnne.» ²⁶ Nawēnne looge a tōntōnna la, dēje tōm ē na ya zē'am ti a ēje ya yel-sōnne boti ya nēra woo base a tōon-be'ero.»

Apiyēeri la Azā ze sarīyaditba nējam

4 Apiyēeri la Azā ken tōgra la nērba la le, ti kāabgo kēma, la Wēnde-kāte gu'urba nējadāana, la Saduse dōma wa'am ba zē'am. ² Ti ba sūure yīge la Tōntōnība la n zāsnī nērba la, dee mōola Azezi kūm vo'ore yelle pa'ala ti nēr-seba n ki la wun vo'oge me na. ³ Ti ba yōge ba ka yu, gu'ura ti beere wiige, se'ere n soe la, wēnne daan sobe me. ⁴ La nēr-seba n daan wōm Nawēnne kō-yēlga la, ba zozo'e daan bō yetōga la sira me. Ba källe daan de wu tusanuu.

⁵ La beere n wiige, ti Zīfdōma nējadōma, la kēma, la lōo karēnsāandōma lagse taaba Zerizalem puam. ⁶ La A'anni n de kāabgo kēma nējadāana, la Akayifu, la Azā, la Alegsāndri, la seba wuu n de kāabgo kēma nējadāana yir-dōma boe mī me. ⁷ Ti ba boti ba tarī ba wa'am wa ze'ele ba nējam, ti ba soke ba yeti: «Āne n bō yāma pāja la nōore ti yāma ita bōn-bāna?» ⁸ Ti Nawēnne Sīa bō Apiyēeri pāja, ti a yele ba yeti: «Yāma Israyeli nējadōma, la kēma, ⁹ yāma n sokri tōma zīna daare wā tōon-sōn-seka ti tōma ēje bō kōwōja la yelle, la bōn-seka n boti a yē īmā'asum na, ¹⁰ dēni ti ya wuu, la Israyeli dōma wuu bāje ti la de la Azezi-kriisi n ze'ele Nazareti yu'ure iŷā ti nēra wā n ze ya nējam wā tarī īmā'asum. Ēja ti ya daan ka lable dō-puurja zuo ku, ti Nawēnne vo'oge ē. ¹¹ Ēja iŷā ti la gulse Nawēnne gōjo puam tōge yeti:

«Kug-seka ti yāma mētbā zagse la, lebge la kugre n boti deego la tara pāja.»

¹² Fāare ka boe nēra ayēma zē'am, sān dagna Azezi-kriisi mā'a n tā wun fāage nērba dūnia zuo base.»

¹³ Apiyēeri la Azā n yē buraane tōgra la, la di'ige nērba la me, ban mi ti ba nini ka yo'oge, dee ti ba dagna gōn-mitba la, ti ba bāje ti ba daan boe la Azezi le. ¹⁴ La ban yē bura la n yē īmā'asum ze ba zē'am na, ba ka mi ban wun lerge se'em bō ba. ¹⁵ Ti ba yele ba sarīyadia zē'am yeti ba yese. Ti ba yese. Dee ti ba bām yele taaba yeti: ¹⁶ «Ti wun ēje nēr-bāna la wāne? Nērba wuu n boe Zerizalem wā mi me ti bāma n ēje yel-kurga wā, tōma kān tā'age si'ise bōn-ēna. ¹⁷ La tōma n wun ēje se'em ti ba tōoma la da le saage sēje nēja, la de la ti zebe ba yeti, ba da le tōge Azezi yelle bō nēra nēra.» ¹⁸ Bela ti ba wi ba yeti, ba da le sake ti ba tōge, dee zāsum nērba Azezi yela.

¹⁹ La Apiyēeri la Azā lerge ba me yeti: «Tē'esē-ya bise, la mase Nawēnne nējam ti tōma sake yāma nōore gānna Nawēnne nōore me bi? ²⁰ Tōma ka tā wun base ka tōge sela ti tōma yē dee wōm na.» ²¹ Ti ba le gi'ile ba, dee base ba ti ba fōrge. Ba ka yē ba wun ēje se'em boti ba sūbge ba, se'ere n soe la, nērba la wuu pēgrī Nawēnne bōn-seka ti ba ēje la iŷā me. ²² Bura la ti yel-kurga la ēje ti a yē īmā'asum na, gāje yuuma pinaasi me.

Seba n bō Azezi sira sose me, ti Nawēnne bō ba buraane

²³ La ban base ba la, Apiyēeri la Azā sēje la ba taaba zē'am ka tōge pa'ale ba kāabgo kēma nējadōma, la kēma la n yele bāma se'em na wuu. ²⁴ La ban wōm bela la, ti ba naage taaba pu'use Nawēnne la yem ayila yeti: «Zuudāana, fōn nāam saazuum la tēja, la ko-kāte, la bōn-seba wuu n boe ba puam na. ²⁵ Fōn yuun boti tōma yaaba Adawidi n de fu tōntōnna la tōge la fu Sīa pāja yeti:

«Bēm n ēje ti dūnia buuri wuu sūure yīge, ti nērba tē'esra tē'es-yaalsi?

²⁶ Ti dūnia na'adōma māasum ze, ti tēja la nējadōma lagse taaba ti ba zebe la Zuudāana Nawēnne, la Kriisi ti a looge la?»

²⁷ La de la sira ti A'erōdi, la Apōnsī-pilatī, la bu-zājsī, la Israyeli nērba lagse taaba tēn-ēna wā puam zebe la fu tōntōn-sōnjo Azezi ti fu looge la. ²⁸ Bela ba ēje la bōn-seka ti fōn yuun pōn dēje looge yem la fu pāja bōwra ti la ēje se'em na. ²⁹ Ti Zuudāana, lēle wā bise ban zebri tōma n de fu tōntōnība la se'em, bela iŷā, bō ti pāja ti ti mōole fu kō-yēlga la buraane. ³⁰ La fu pāja, boti seba n bē'eri yē īmā'asum, dee ti tōon-yālma la yel-kursi ēje, Azezi n de fu tōntōn-sōnjo la yu'ure iŷā.»

³¹ Ban pu'use Nawēnne ba'ase la, zē'e-seka ti ba lagse la mīim me. Ti Nawēnne Sīa bō ba wuu pāja, ti ba tōge Nawēnne yetōga la buraane.

Seba n bɔ Azezi sira la, puti ban tarɪ sela wuu la taaba

³² Nēr-kuuŋɔ la n daan bɔ Azezi sira la lagum tara la yem ayɪla, la sūure ayɪla. Tɪ ba nēra baa ayɪla ka yetɪ, ēŋa n tarɪ sela la de la ēŋa mēŋa mā'a bōŋɔ, la de la ba wuu bōŋɔ. ³³ La Tōntōnɪba la tɔgrɪ Zuudāana Azezi kūm vo'ore yelle la pāŋa zozo'e, tɪ Nawēnne yel-sōnne bɔna ba wuu zuo. ³⁴⁻³⁵ La seba n daan tarɪ deto bu vato la, koose ba mē tarɪ ligri la wa'am wa ēŋe Tōntōnɪba la nu'usum. Tɪ ba yāŋa ēn puɪ bɔ nēra woo ēŋa n boori sōŋrɛ mase se'em. Tɪ nēra baa ayɪla ka bɔna ba puam tɪ sela pɔ'ɔge ē.

³⁶ La Azozeɸu n de Leviti nēra n yese Sipri so'olum tɪ Tōntōnɪba la sɪ a yu'urɛ tɪ Abarnabasɪ. A yu'urɛ la vōore de la: «Nēra n bɔ'ɔrɪ nēra buraane». ³⁷ Œŋa daan koose la a va'am dɪke ligri la tarɪ wa'am wa ēŋe Tōntōnɪba la nu'usum.

Ananiyasɪ la a pɔga Asafura yelle

5 Buraan daan boe tɪ a yu'urɛ dɛna Ananiyasɪ, tɪ a pɔga yu'urɛ dɛna Asafura. Tɪ ba koose ba va'am, ² tɪ a looge ligri la baseba sugɛ, dee tarɪ lig-seba n weege la tarɪ ka bɔ Azezi Tōntōnɪba la. La ēn ēŋe bela la, a pɔga la mi mē. ³ Tɪ Apɪyɛrɪ soke ē yetɪ: «Ananiyasɪ, bēm tɪ Asūtāana kē fu sūurum, tɪ fu parɪm bɔ Nawēnne Sɪa, looge fu va'am na tɪ fu koose la ligri baseba sugɛ? ⁴ Fōn nān ka koose nɪ ē na, a de la fu bōŋɔ. Fōn koose la mē, fu tā wun ēŋe fu yem n boori se'em mē. Bēm n ēŋe tɪ fōn tē'ese fu sūurum ēŋe yel-ē-na wā? Fu ka parɪm bɔ nērsaala, fu parɪm bɔ la Nawēnne.» ⁵ Ananiyasɪ n wōm yetɔg-ēna la, a lui la tēŋa ki. La seba wuu n wōm bōn-ēna la, dabeem n kē ba. ⁶ Tɪ budib-paalsɪ isge dɪke ē pōbe, zɛ sēŋe ka laage.

⁷ Tɪ la ēŋe fēe mase wu karf-atā, tɪ a pɔga mē wa'am, la a ka bāŋe bōn-seka n ēŋe la. ⁸ Tɪ Apɪyɛrɪ soke ē yetɪ: «Yele ma, yāma n koose ya va'am na, ligri la wuu n wā-na bɪ?» Tɪ a lerge yetɪ: «Ēe! Ba wuu n bela.» ⁹ Tɪ Apɪyɛrɪ yele ē yetɪ: «Bēm n ēŋe tɪ ya ēŋe nōore ayɪla tɪ ya make Zuudāana Nawēnne Sɪa bɪsɛ? Bāŋe tɪ seba n laage fu sira la boe la zanōrum. Ba wun zɛ fu mē yese.» ¹⁰ Tɪ pɔka la kɔ'ɔn lui tēŋa ki Apɪyɛrɪ nēŋam. Tɪ budib-paalsɪ la kē'em wa yē tɪ a ki mē, tɪ ba dɪke ē sēŋe ka laage yegle a sira la. ¹¹ Tɪ dabeem daan kē Azezi nēra ba la wuu, la seba wuu n wōm bōn-ēna la.

Azezi Tōntōnɪba la tōnnɪ la tōon-yālma

¹² Tɪ Azezi Tōntōnɪba la tōm tōon-yālma, la yel-kɪrsɪ zozo'e nēra ba la wuu sukam. Tɪ seba n bɔ Azezi sira la lagse taaba la yem ayɪla, zē'e-seka tɪ ba wi'iri tɪ «Asalomō vōnana» la. ¹³ Tɪ seba n ka bɔ ē sira la ka sake lagum na ba, la nēra pēgrɪ Azezi nēra ba la mē zozo'e. ¹⁴ La buraasɪ la pɔgsɪ zozo'e n daan bɔ'ɔrɪ Zuudāana Azezi sira pa'asra a nēr-kuuŋɔ la puam. ¹⁵ Halɪ tɪ nēra

tara bā'adōma sēnna gā'ata sorɔɔɔ zuto bōn-gā'ala puam, tɪ Apɪyɛrɪ sān wa dɔla bilam zē'a tɔlla, a yinyisŋa lile ba tɪ ba yē īmā'asum. ¹⁶ Tɪ nēra zozo'e yese tēn-seba n gilge Zerizalem na tarɪ bā'adōma, la seba tɪ kulkā'arsɪ dɔlɪ ba wa'am. La ba wuu yē īmā'asum mē.

Azezi Tōntōnɪba nāmsgɔ yelle

¹⁷ Tɪ kāabgɔ kēma nēŋadāana, la seba n de Saduse dōma n boe a zē'am na, daan isge ita sūure, ¹⁸ yōge Azezi Tōntōnɪba la kē'ese ba yu'a deego puam. ¹⁹ Tɪ Nawēnne maleka sēŋe yu'urɔ ka yo'oge yu'a deego la nōore, tarɪ ba yese yēŋa ka yele ba yetɪ: ²⁰ «Sēŋe-ya Wēnde-kātum na ka tɔge wɔm paalga wā yelle wuu bɔ nēra ba.» ²¹ Ban wōm bela la, tɪ ba sēŋe ka kē Wēnde-kātum na bewiine zāsna nēra.

Tɪ kāabgɔ kēma nēŋadāana la, la seba n boe a zē'am na, daan wi Zifdōma sarɪyaditba, la ba kēma wuu tɪ ba lagse taaba. Tɪ ba tōm nēra yetɪ, ba sēŋe yu'a deem na ka tarɪ Tōntōnɪba la wa'am. ²² La ban tōm seba la n paage yu'a deem na, ba ka yē ba, leme wa yele ba yetɪ: ²³ «Tōma n paage la, tōma yē tɪ yu'a deego la kulnsɪ la page mē sōŋa sōŋa, tɪ seba n gu'uri la zɛ deego la nōam, tɪ tōma yo'oge ka yē nēra nēra.» ²⁴ La Wēnde-kāte gu'urba nēŋadāana, la kāabgɔ kēma nēŋadōma la n wōm yel-ēna la, ba ze la yerɪ, tē'esra yel-ēna n de yel-seka. ²⁵ Tɪ nēra wa'am wa yele ba yetɪ: «Selse-ya, bura-seba tɪ ya kē'ese yu'a deego puam na ze la Wēnde-kātum na zāsna nēra.» ²⁶ Tɪ Wēnde-kāte la gu'urba nēŋadāana, la a nēra sēŋe ka yōge ba wa'am, dee ka le dāam ba, ba zotɪ mē tɪ nēra la wun lobe ba la kuga.

²⁷ Ban tarɪ ba wa'am wa ze'ele ba nēŋam na, kāabgɔ kēma nēŋadāana la soke ba yetɪ: ²⁸ «Tōma daan ka yele ya yetɪ, ya da le zāsum nēra la nēr-ēna wā yu'urɛ? La bɪsɛ-ya yāma n ēŋe se'em na, yāma zāsŋɔ saage Zerizalem wuu mē, dee bɔɔra tɪ ya dɪke bura-ēna kūm taale dɔgle tōma zuto.» ²⁹ Tɪ Apɪyɛrɪ la a Tōntōn-taaba la lerge ba yetɪ: «La mase mē tɪ tōma sake Nawēnne nōore gānna nērsaalba nōore. ³⁰ Nawēnne tɪ tōma yaabdōma yuun pu'usɪ la n vo'oge Azezi tɪ ya daan ka lable dɔ-puurnɔ zuo ku la. ³¹ Nawēnne zēke ē mē zī'ire a zuugɔ bɔba, botɪ a dɛna nēŋam dāana la Fāagra bɔ Israyelɪ dōma sore tɪ ba teege yem base tōon-be'ero tɪ Nawēnne base ba tōon-be'ero taale. ³² Tōma de la bōn-bāna kaset-dōma, Nawēnne Sɪa la tɪ a tarɪ bɔ'ɔra nēr-seba n sakɪ ē na, mē de la kaset-dāana.»

³³ Ban wōm yetɔg-ēna wā la, ba sūure yīge mē halɪ tɪ ba bɔɔra tɪ ba ku ba. ³⁴ Tɪ buraan ayɪla yu'urɛ n de Agamalyelɪ, a de la Farisi nēra, a zāsɪ la nēra Nawēnne bɔ yela, a de la nēra tɪ ba wuu nannɪ. Tɪ a isge ze'ele nēra ba n lagse la tēŋasuka, bɔ nōore yetɪ, ba yese Tōntōnɪba la yēŋa tɪ la ēŋe fēe. Tɪ ba yese ba. ³⁵ Tɪ a yele ba yetɪ: «Israyelɪ dōma, guuse ya mēŋa la yāma n

yetü ya ãñe nãr-bãna wã se'em na. ³⁶ La ka yuuge tü nãra ayüla yu'ure n de Atedasü daan isge zẽke a mẽña yetü, ãña de la nãrzuu. Tü nãrba n paage wu nãr-kõb-snaasü daan doose ã. Tü ba ku ã, tü nãr-seba n daan doli ã na wuu wurgẽ. Tü la lebge zãña. ³⁷ La bela poorum, Azudaasü n yese Galile mẽ daan isge me nãr-ba kãalgõ wakate, tü nãrba baseba dõla ã. Tü ba ku ã, tü nãr-seba n daan doli ã na mẽ wurgẽ. ³⁸ Bela ãyã, lãlã wã mam yetü ya me tü ya base nãr-bãna, da kã ãñe ba sela sela. La sã ãna nãrsaalba putẽ'era, la ba tõoma, la wun wa lebge zãña. ³⁹ La, la sã ãna Nawẽnne bõnõ, ya kã ãñe sã'am ba. Guuse-ya ya mẽña, tü ya da wa yẽ tü ya zebrü la Nawẽnne. Tü ba sake a yetõga la, ⁴⁰ dee wi Tõntõnba la, tü ba wa'am. Tü ba botü ba wẽ ba, dee yele ba yetü: «Da le tõge-ya Azezi yela bõ nãr-ba.» Dee yãña base ba yetü, ba fõrge. ⁴¹ Tü Tõntõnba la yese sarıyadia zẽ'am na sü-yẽlga, ban mase tü ba yẽ nãmsgõ Azezi ãyã la. ⁴² La daare woo ba boe la Wẽnde-kãtum na, la ba yie puam, ken zãsna nãrba, dee mõola Azezi kõ-yẽlga yetü, ãña n de Krisi tü Nawẽnne tõm.

Ba looge nãrba bayopõ tõoma ãyã

6 La dabs-bãma wakate karẽnbiisi la daan pa'asrü me zõ'õra, tü Zifdõma seba n tõgrü Grekü yetõga la daan yõnna la Zifdõma nãr-seba n tõgrü Ebre yetõga la yetü, ban sõñrü nãrba la dia daare woo la, ba ka bõ'õrõ bãma põkõpa la wu lan mase. ² Bela ãyã tü Tõntõnba pia la ayi la wi karẽnbiisi la wuu, yele ba yetü: «La ka mase tü tõma base Nawẽnne kõ-yẽlga mõolgo dee puta dia. ³ Bela tü sõbiisi, bise ya puam looge buraasü bayopõ n de nãr-sõma, dee ãna yem dõma, tü Nawẽnne Sia bõna la ba le zozo'e, tü tü dıke tõon-ãna wã ãñe ba nu'usum. ⁴ Dee tü tõma wısgẽ tü mẽña la Nawẽnne pu'usgõ, la a yetõga la mõolgo.» ⁵ Tü ban yele se'em na daan ãñe nãrba la wuu süure yẽlum. Tü ba looge A'etienü n bõ Azezi sira zozo'e tü Nawẽnne Sia bõna la ã le, la Afilipi, la Aprozõrõ, la Anikanõrõ, la Atimõ, la Aparmenasü, la Anikolasü n yese Antıyosü dee dõla Zifdõma pu'usgõ sore. ⁶ Tü ba tarı ba sãñe Tõntõnba la zẽ'am, tü ba dıke ba nu'usi pagle ba zuto pu'use Nawẽnne bõ ba.

⁷ La Nawẽnne yetõga la daan saarü zẽ'esü me pa'asra, tü karẽnbiisi la kãlle mẽ pa'asra Zerizalem puam zozo'e. Tü kãabgõ kẽma zozo'e daan bõ'õra Azezi sira.

A'etienü yõkre

⁸ La A'etienü n tarı Nawẽnne yel-sõnne la a pãña zozo'e la, daan tõnnü la tõon-yãlma la yel-kırsü nãrba tẽñasuka. ⁹ Tü Zifdõma baseba n daan de yamsü dee yãña to'oge ba mẽña, tü ba wi'ira ba wẽndeego tü soe m mẽña dõma wẽndeego, n yese Sirenü, la Alegsãndri, la Zifdõma baseba n yese Silisi, la Azi tẽnsü n wẽ'eri nõke'ene la A'etienü. ¹⁰ La Nawẽnne Sia n bõ'õrõ A'etienü

yem tü a tõgra, tü ba ka tã'age lerge ã. ¹¹ Tü ba ã nãrba botü ba dõre ã yetü: «Tõma wõm tü a tõge la Amoyisi la Nawẽnne tõg-be'ero.» ¹² Ban ãñe bela la, ba botü nãrba la, la ba kẽma, la ba bõ karẽnsãandõma la wuu süure isge me, tü ba yõke ã tarı sãñe sarıyaditba zẽ'am, ¹³ dee botü nãrba parım bõ ã yetü: «Bura-ãna wã tõgrü la Wẽnde-kãte la Nawẽnne bõ tü a bõ Amoyisi la tõg-be'ero ka gõ'õra. ¹⁴ Tõma wõm tü a yetü, Azezi n yese Nazaretü la wun sã'am Wẽnde-kãte la me, dee teege ır-seba tü Amoyisi yuun pa'ale tü yaabdõma yetü tü uta la.» ¹⁵ Tü sarıyaditba la wuu n zı la bısra A'etienü zıi, yẽ tü a nẽña ãn wu maleka nẽña la.

A'etienü yetõga

7 Tü kãabgõ kẽma nẽjadãana soke A'etienü yetü: «La de la bela bu?» ² Tü a lerge yetü: «M sõbiisi la m sõdõma, selse-ya. Nawẽnne n de na'am kãte dãana la yuun puke a mẽña pa'ale tü yaaba Abraham, ãn yuun nãn boe Mezopotami nãn ka sãñe ka zı'ire Haran tẽñam na, ³ a yuun yele ã yetü: «Yese dee base fu tẽña la fu yir-dõma, dee sãñe tẽn-seka tü mam wun pa'ale fu la.» ⁴ Tü Abraham yese Kalde dõma tẽñam sãñe ka zı'ire Haran. La a sõ kũm poorum tü Nawẽnne le botü a yese sãñe tẽn-seka tü ya boe mĩ zına wã puam. ⁵ La Nawẽnne yuun ka bõ ã zẽ'a tẽña la puam baa fẽe, dee bĩñe nõore yetü, ãña wun bõ ã tẽn-ẽña, la a kũm poorum tü a yusü wun wa sõna tẽña la. La wakat-ẽña a yuun nãn ka tõge bia. ⁶ Nawẽnne yuun yele ã na wãna: «Fu yusü la wun wa sãñe tẽña ayẽma ka kẽ'era mĩ wa lebge yamsü bilam, la ba wun nãmse ba me yuuma kõb-snaasü. ⁷ La mam wun wa sõbge so'olum seka n botü ba ãna yamsü la me. La bela poorum tü ba wun yese bilam leme wa pu'use mam kalam.» ⁸ Tü Nawẽnne bĩñe nõore la Abraham yetü, ãña la a yusü wuu wãta ba budimto tü la pa'ale tü ba de la ãña nãrba. Tü Abraham yuun wa tõge A'izakü, tü dabsa anii daare tü a wã ã. Tü A'izakü mẽ wa tõge Azakõbı ãñe bela. Tü Azakõbı mẽ wa tõge tü yaabdõma pia la ayi la mẽ ãñe bela.

⁹ Tü tü yaabdõma la yuun yũuna la ba yıbga Azozefu, koose ã bõ Ezipti dõma. La Nawẽnne yuun boe la ã le me, ¹⁰ yuun yese ã a nãmsgõ wuu puam, dee bõ ã yel-sõnne, la yem Afaarõ n de Ezipti naba la nẽñam. Tü naba la botü Azozefu ãna gõmna sõna Ezipti tẽña, la a yire wuu bısra. ¹¹ Tü kõm kãte wa'am Ezipti, la Kanaan so'olum halı tü la ãna toogo. Tü tõma yaabdõma yuun ka tara dia. ¹² Tü Azakõbı yuun wõm tü dia boe Ezipti, tü a tõm tü yaabdõma tü ba sãñe ka da. ¹³ La a le tõm ba me nõor-ayı puam, tü Azozefu botü a kẽendõma la bãñe ã. Tü Afaarõ mẽ bãñe Azozefu sõ yir-dõma yelle. ¹⁴ Tü Azozefu tõm tü ba wi a sõ Azakõbı, la a yir-dõma wuu tü ba wa'am. Ba kãlle yuun paage nãrba pisyopõ la anuu. ¹⁵ Tü Azakõbı isge sãñe Ezipti. Bilam tü ãña la tü yaabdõma yuun ki. ¹⁶ Tü ba ze ba sãñe Sisem ka laage ba yõ-se-

ka ti Abraham yuun da la ligri A'emõori koma zē'am na.

¹⁷ La Nawēnne n yuun bīnje a nõore la Abraham wakate n yuun lem na, nērba la yuun yurge me zo'oge Ezipti. ¹⁸ Hal ti nēra ayula wa di Ezipti na'am ka mina Azozefu yelle. ¹⁹ Ti naba la yuun ēnje yem wēenja la tōma yaabdōma nāmse ti buuri la, pēрге ba boti ba base ba bilēsi ti ba ki. ²⁰ Wakat-ēnja ti ba yuun dōge Amoyisi ti a dena bi-sōṇṇ Nawēnne nējam. Ti ba uge ē a so yire wōr-sitā, ²¹ dee taru ē sēnje ka base, ti Afaarō bipugla yuun dūke ē uge, ti a lebge wu a mēnja bia. ²² Ti Amoyisi zāsum Ezipti dōma yem wuu, yuun dena nēr-kāte a yetōga la a tōoma wuu puam.

²³ La ēn yuun paage yuuma pinaasi la, ti a yuun looge yem sēnje ka kaage bise a sōbiisi n de Israyeli yusi la, ²⁴ yānja yē ti Ezipti nēra nāmsri ba nēra ayula. Ti a po'oge ti nēra la, wē Ezipti nēra la ku lerge sānne. ²⁵ A tē'esri ti a buuri la wun bānje me ti Nawēnne boori ti a boti ēnja fāage ba Ezipti dōma nu'usum, la ba ka bānje. ²⁶ Ti beere wiige, ti a le yē a buuri nērba bayi ti ba zēbru la taaba. Ti a pāse ba, bōra ti ba sūure mā'age, soke ba yeti: «M surdōma, ya de la sōbiisi, la bēm n ēnje ti ya zebra la taaba?» ²⁷ Ti seka n uti a tādāana be'em na yele ē yeti: «Āne n bō fu nõore ti fu sōna ti bīsa, dee dena ti sarlyadita?» ²⁸ Fu boori ti fu ku mam wu fōn zaam ku Ezipti nēra se'em na?» ²⁹ Yetōg-ēna īyā ti Amoyisi zoe sēnje Madiyā ka kē'era. Bilam ti a dōge dayṇṇsi bayi.

³⁰ La yuuma pinaasi poorum, daare ayula a boe la weem lem Sinayi tānja, ti Nawēnne maleka ze'ele tūntu-ugo ti bugum boe mī dita puam puke a mēnja bilam, ti a yē ē. ³¹ Amoyisi n yē ē na, la di'ige ē me, ti a lem ti a bise. Ti Zuudāana Nawēnne yele ē yeti: ³² «Mam de la Nawēnne ti fu yaabdōma Abraham, la A'izaki, la Azakōbi yuun pu'usri la.» Ti Amoyisi gōgra dee ka tā'age bise. ³³ Ti Zuudāana la yele ē yeti: «Pirge fu tagra la, ti zē'e-seka ti fu ze la de la mam zē'e-sōṇṇ. ³⁴ Mam yē m nērba la n boe Ezipti nāmsgo la me, dee wōm ba fa-blgo la, ti mam sigum ti m fāage ba. Bela īyā mam yeti m tōm fu la Ezipti.» »

³⁵ Ti A'etien ken yeti: «Amoyisi ēna wā ti ba yuun zagse ē yele ē yeti: «Āne n bō fu nõore ti fu sōna tō, dee dena ti sarlyadita?» Ēnja ti Nawēnne yuun boti a maleka tōge bō ē tūntuum na. Ēnja ti Nawēnne tōm ti a sōna a nērba la dee yese ba nāmsgo la puam. ³⁶ Ēnja n tōm tōon-yālma la yel-kursi n pa'alī Nawēnne pānja Ezipti tējam yese ba bilam, dee tōm tōon-yālma taru ba pāрге mōg-mōlga la, dee bōna la ba weego la puam yuuma pinaasi. ³⁷ Amoyisi ēnja n yuun yele Israyeli dōma yeti: «Nawēnne wun boti nēra ayula ze'ele ya buuri puam dena a nōtō'ṇsa bō yāma wu ēnja n boti mam de-na a nōtō'ṇsa se'em na.» ³⁸ La ti yaabdōma n yuun lagse weem na, la de la ēnja n ze'ele ti yaabdōma, la maleka

n tōge la ē Sinayi tānja zuo tējasuka, to'oge Nawēnne wōm yetōga tōge bō tō.

³⁹ Ti ti yaabdōma yuun ka bōra ti ba sake a nõore, yuun zagse ē, dee tē'esē ba sūurum bōra ti ba lebe Ezipti. ⁴⁰ Ba yuun yele Aarō yeti: «Ēnje бага bō tō ti ba bōna ti nējam. Tōma ka mi bōn-seka n ēnje Amoyisi n yese tōma Ezipti tējam wa'am na.» ⁴¹ Bela ti ba yānja yagbe na-biire kāabra ē ti a dena ba bagre, ita sū-yēlga la ba mēnja nu'usi n ēnje sela la. ⁴² Bela īyā ti Nawēnne bure a poore bō ba, dee base ba ti ba pu'usra wōrbie n boe saazuum, wu lan gulse Nawēnne nōtō'ṇsriba gōn-ṇṇ puam yeti:

«Israyeli nērba, yāma tē'esri ti la de la mam ti ya yuun kuuri dūnsi, la kāabgo baseba weem yuuma pinaasi bō'ṇra la bu?»

⁴³ Ayel, ya yuun zēeri la ya bagre Amolōki fuu-deego, la ya bagre Arefā wōrbiire, bōn-bāma ti ya yuun ēnje pu'usra.

Bela īyā mam wun boti ba pe'ege ya sēnje zāage hal gānje Babilōni tējam.»

⁴⁴ Ti so-yaabdōma yuun taru la fuu-deego weem n pa'alī ti Nawēnne boe ba zē'am. Ba yuun ēnje ē ti a āna wu Nawēnne n tōge bō Amoyisi yeti, ba ēnje ē ti a āna wu ēn yē a wōnne se'em na. ⁴⁵ Ti yaabdōma yuun to'oge fuu-deego la ba mē sōdōma zē'am, ze ē doose la Azoze wa'am wa zēbe to'oge so'olum seka ti Nawēnne yuun dige nērba tēnja la puam ti ba yese ba nējam na. Ti fuu-deego la weege bōna wa paage naba Adavidi wakatum. ⁴⁶ Adavidi yuun yē yel-sōnne me Nawēnne nējam, dee sose ē yeti, a bō ē sore ti a mē pu'usgo deego bō ē ti a bōna la Azakōbi yusi le. ⁴⁷ La, la de la a bia Asalomō n yānja n mē deego la bō Nawēnne.

⁴⁸ La Nawēnne n gānni sela wuu ka kē'eri deto ti nēr-saalba mē puam, wu Nawēnne nōtō'ṇsa ayula n yuun yele se'em yeti:

⁴⁹ «Zuudāana Nawēnne yeti, saazuum de la mam na'am bīmīnne, dee ti dūnia dena mam nāma dōglgo zē'a. Bēm deego ti ya wun mē bō mam?

La bēm vo'osgo zē'a ti ya yeti ya ēnje bō mam?

⁵⁰ La dagi mam mēnja n ēnje sela woo bu?» »

⁵¹ A'etien ken yele ba yeti: «Ya de la si'isriiba, ya ka doli Nawēnne la ya sūure wuu, ya ka selsri Nawēnne yetōga la, dee kō'ṇ zagsra Nawēnne Si daare woo wu ya yaabdōma n mē yuun ēnje se'em na. ⁵² Nawēnne nōtō'ṇs-kāna ti ya yaabdōma la yuun ka nāmse ē? Bāma n yuun ku seba n dēnje mōole sūra dāana ti Nawēnne wun tōm ti a wa'am na yelle. La yāma n yānja dōre ē ku ē. ⁵³ Yāma yuun to'oge Nawēnne lō me malekadōma zē'am. La ya ka sake lō la.»

Ba lobe A'etienl la kuga ku

⁵⁴ Ban wõm bela la, ba sũnsõa yĩige me, ti ba obra yēna. ⁵⁵ La A'etienl daan tarl la Nawēnne Sia pāṇa, gorge bĩsra saazuum zĩi, yē Nawēnne na'am n puke yēgra, ti Azezi ze Nawēnne zuugo boba. ⁵⁶ Ti a yele ba yeti: «Bĩse-ya, mam yē ti Nawēnne yire yo'oge me, ti Nērsaala Dayua la ze Nawēnne zuugo boba.» ⁵⁷ Ti ba li ba tuba kaase tagurga, dee lagum zoe paage yōke ē, ⁵⁸ ve'ege ē tēṇa la puam yese ka lobra ē la kuga ti ba ku. Seba n lobri ē na kuga la yēse ba futo gu'ule la budib-polle yu'ure n de Asoli. ⁵⁹ La ban lobri A'etienl la kuga la, ti a pu'use yeti: «Zuudāana Azezi, to'oge m sia.» ⁶⁰ Dee dıke dūma ka tēṇa tĩi kaase yeti: «Zuudāana, da geele ba tōon-be'ego wā taale.» A yele la wāna dee ki.

8 La Asoli daan sake ti A'etienl kũm na mase me.

Azezi karēnbiisi nāmsgo yelle

La daar-ēṇa ti ba pōse nāmsra Azezi nēr-kuuṇṇ n boe Zerizalem na halı, ti ba wuu zoe wırge Zude, la Samaari so'olum puam, la Azezi Tōntōnlba pia la ayi la mā'a n weege. ² Ti nēr-seba n zoti Nawēnne daan dıke A'etienl sēṇe ka laage, dee kella zozo'e a kũm na iṇā.

³ La Asoli daan kō'ɔn nāmsra Azezi nēr-kuuṇṇ la me bōra ti a sã'am ba wuu, kē'era yie puam yōgra buraasi la pōgsı boti ba tara ba sēnna yu'ura.

Afilipi mōole Nawēnne kō-yēlga Samaari

⁴ Ti Azezi karēnbi-seba n daan wırge la daan sēnna zē'esı wuu mōola Nawēnne kō-yēlga. ⁵ Afilipi daan sēṇe la Samaari tēṇa ayıla puam ka mōole Krisi kō-yēlga la bō ba. ⁶ La nēr-kuuṇṇ la daan selsrı Afilipi n tōgrı ba se'em na me sōṇa sōṇa, ban wõm dee yē ēn ıtı bōn-yālma la. ⁷ La kulkā'arsı daan ēn tĩi kaase me, yese dee base ban tarl seba la. Ti nēr-seba n de kōrɔn la wōbsı zozo'e daan yē iṇā'asum. ⁸ Ti tēṇa la nērba tara sũ-yēlga zozo'e.

⁹ La buraa n daan boe tēṇa la puam ti a yu'ure dena Asimō. A daan de la tum dāana, tōnna tum tōoma boti Samaari so'olum nērba palēṇa ēgra. Dee pa'ala a mēṇa ti ēṇa de la nēr-kāte, ¹⁰ ti nērba wuu sakra a yetoga sōṇa, bōnbı'ıslı la bōnkegsı wuu yeta ti: «Buraēna de la seka ti ba wi'iri ti wēnne pān-kāte la n sige.» ¹¹ Ēn tōm a tum tōoma boti nērba la palēṇa ēgra yu-uge la, ba sake ē me sōṇa sōṇa. ¹² La Afilipi n mōole Nawēnne so'olum yelle, la Azezi-krisi yu'ure bō ba la, ba daan bō a yetoga la sira me, boti a mise ba ko'om puam, buraasi la pōgsı. ¹³ Ti Asimō mē sake yetoga la, boti ba mise ē ko'om puam, ti a dıke a mēṇa labıle Afilipi, la ēn yeti bōn-yālma la yel-kırsı seba n ıtı la, la ēke la a palēṇa.

¹⁴ Azezi Tōntōnlba la n daan boe Zerizalem na wõm me ti Samaari dōma to'oge Nawēnne yetoga me, ti ba tōm Apiyēerı la Azã ba zē'am. ¹⁵ La ban paage mĩ na, ba pu'use me bō ba ti ba to'oge Nawēnne Sia. ¹⁶ Se'ere n soe la, ba daan pōn mise ba la ko'om puam la Zuudāana Azezi yu'ure, dee ti Nawēnne Sia nān ka sige ba nēra nēra zuo. ¹⁷ Ti Apiyēerı la Azã dıke ba nu'usi pagıle ba zuto, ti ba yāṇa to'oge Nawēnne Sia la.

¹⁸ Asimō n yē ti Azezi Tōntōnlba la n dıke ba nu'usi pagıle ba zuto, ti ba to'oge Nawēnne Sia la, a daan boorı ti a bō ba la ligri, ¹⁹ yāṇa yele ba yeti: «Bō-ya mam pān-ēna wā ti nēr-seka woo ti mam wun dıke m nu'usi pagıle a zuo, a wun kō'ɔn to'oge Nawēnne Sia.»

²⁰ Ti Apiyēerı lerge ē yeti: «Fōn na fu ligri la wun sã'am, fōn tē'esı ti Nawēnne bō'a da'arı la ligri la iṇā.

²¹ Fu nēṇa ka boe yel-bāna puam, la fu ka tarı pure mĩ, se'ere n soe la, fu sũure ka mase Nawēnne nifum.

²² Teege yem base tōon-be'e-ēna wā, dee sose Zuudāana, ti tā ti a base fu tōon-be'ero ti fu tē'esrı fu sũurum na taale. ²³ Mam yē ti fu tarı la sũ-toogo, ti tōon-be'ero lu fı.» ²⁴ Ti Asimō lerge yeti: «Pu'use-ya Zuudāana bō ma ti bōn-seka ti ya yele mam na sela sela da paage ma.»

²⁵ Apiyēerı la Azã daan tōge Zuudāana Azezi yetoga la pa'ale nērba me, dee daan lebra Zerizalem. La sore zuo, ba mōole kō-yēlga Samaari tēnsı zozo'e puam me.

Afilipi la Etiopi buraa yelle

²⁶ Ti Nawēnne maleka tōge bō Afilipi yeti: «İsge sēṇe wēntulle gōbga boba, doose sorɔ-seka n ze'ele Zerizalem we Gaza la, sorɔ-ēṇa dolı la weego puam.» ²⁷ Ti a isge sēṇe. La Etiopi buraa n daan dolı sore la, a de la nēr-kāte, a gu'uri la Etiopi pōg-naba Akāndase bōn-tarsōm. A daan sēṇe la Zerizalem ka pu'use Nawēnne, ²⁸ dee zēa wiiri torko puam lebra kulla. A daan tarı la Nawēnne nōtɔ'ɔsa A'ezayi gōṇṇ karēṇra.

²⁹ Ti Nawēnne Sia yele Afilipi yeti: «Sēṇe lem torko wā.» ³⁰ Ti Afilipi zoe paage, wõm ti a karēṇrı la Nawēnne nōtɔ'ɔsa A'ezayi gōṇṇ. Ti Afilipi soke ē yeti: «Fōn wōnnı fōn karēṇe se'em wā vōore me bı?» ³¹ Ti a lerge yeti: «Mam wun ēṇe la wāne wõm, ti nēra sãn ka pa'ale mam?» Dee sose Afilipi yeti, a zom zĩ'ire ēṇa zē'am. Ti a zom zĩ'ire. ³² Nawēnne gōṇṇ zē'e-seka ti a daan karēṇrı la gulse yele la wāna:

«A ān wu pesgo
ti ba tarı we ti ba ku,
dee āna wu pebila
ti ba seerı a kōbrɔ
ti a ka kaasra,
dee mē pōn ka ya'ara nōore.

³³ Ba pō'ɔge ē me,
ka di a sarıya sōṇa.
Ti nēra ka bōna wun tōge a yıslı yelle,

se'ere n soe la,
ba yese a wɔm mɛ dũnia zuo.»

³⁴ Tɪ Etiopi buraa la soke Afilipi yeti: «Ǻn yelle tɪ Nawēnne nōtɔ'ɔsa la tɔgrɪ wāna? A tɔgrɪ la a mēŋa yelle bu, nēra ayēma yelle?» ³⁵ Tɪ Afilipi yāŋa dɪke Nawēnne gōŋɔ la zē'e-seka tɪ a karēŋe la pa'alɛ a vōore, dee doose bilam tɔge Azezi kō-yēlga bɔ ē.

³⁶ La ban sēnnɪ wɛ la, ba paage la zē'a tɪ ko'om boe mɪ. Tɪ Etiopi buraa la yele Afilipi yeti: «Bɪsɛ, ko'om n wāna n boe kalam. Bēm n wun gu mam ko'om misga?» [³⁷ Tɪ Afilipi yele ē yeti: «Fu sǻn bɔ Azezi sɪra la fu sũure wuu, fu tǻ wun to'oge ko'om misga mɛ.» Tɪ a lerge yeti: «Mam sake tɪ Azezi-krisi de la Nawēnne Dayua.»] ³⁸ Dee botɪ torko la ze'ele. Tɪ Afilipi la ēŋa sige ko'om na puam, tɪ Afilipi mise ē ko'om puam. ³⁹ La ban ze'ele ko'om na puam dɔɔra la, tɪ Zuudāana Nawēnne Sɪa zēke Afilipi fōrge. Tɪ Etiopi buraa la ka le yē ē, dee lebe dɔla a sore la wɛ'esa la sũ-yēlga.

⁴⁰ Tɪ nēba yē Afilipi Azɔtɪ tēŋam, tɪ a dɔla tēnsɪ la wuu puam mōola Nawēnne kō-yēlga halɪ ka paage Sezaare.

Asolɪ yem teere (Tööma 22:4-16;26:9-18)

9 Tɪ Asolɪ ken nǻmsra Azezi karēnbiisi la, yeti a ku ba, sēŋe kǻabgɔ kēma nēŋadāana zē'am ² ka sose ē yeti, a gulse gōnnɔ bɔ Zifdōma wēndeto n boe Damaasɪ tēŋam na yeti, ēŋa sǻn yē nēba n de buraasɪ, bu pɔgsɪ n doli Azezi sore, ēŋa wun yōge ba mɛ, lu ba tarɪ sēŋe Zerizalem.

³ La ēn to'oge nōore bɔna sore wɛ ka lɛm Damaasɪ la, tɪ peelem ze'ele saazuum darɛ wa nēge gilge ē. ⁴ Tɪ a lui tēŋa, wōm kōa n yele ē yeti: «Asolɪ, Asolɪ, bēm tɪ fu nǻmsra mam?» ⁵ Tɪ Asolɪ lerge yeti: «Zuudāana, fōn de la āne?» Tɪ kōa la lerge yeti: «Mam de la Azezi, seka tɪ fu nǻmsrɪ la. ⁶ La isge kē tēŋa la puam, tɪ ba wun yele fo fōn wun ēŋe se'em.» ⁷ Tɪ bura-seba n doli ē na ze yɛrɪ, ka yele se'ere. Ba wōm kōa la mɛ, dee ka yē nēra. ⁸ Tɪ Asolɪ isge pike nini ka le yēta. Tɪ ba ve'ege ē tarɪ sēŋe Damaasɪ. ⁹ La dabsa atǻ tɪ a nini ka yēti. La a ka di, bu yũ sela.

¹⁰ La Azezi karēnbia ayɪla n daan boe Damaasɪ, tɪ a yu'urɛ dɛna Ananiyasɪ. Tɪ Zuudāana Azezi puke a mēŋa pa'alɛ ē wu zǻasŋɔ la, wi ē yeti: «Ananiyasɪ.» Tɪ a lerge yeti: «M Zuudāana, mam n wāna.» ¹¹ Tɪ Zuudāana la yele ē yeti: «Isge doose sorɔ-seka tɪ ba wi'iri tɪ sorɔ-tēntēa la, sēŋe Azudaasɪ yire ka soke Tarsɪ tēŋa buraa yu'urɛ n de Asolɪ la yelle. A boe mɪ pu'usra mɛ. ¹² La a yē la buraa wu zǻasŋɔ la, buraa la yu'urɛ de la Ananiyasɪ, a yē ē tɪ a kē'em mɛ wa dɪke a nu'usi paglɛ ēŋa zuo tɪ ēŋa le yēta.» ¹³ Tɪ Ananiyasɪ lerge yeti: «Zuudāana, mam pōn wōm buraa wā yelle zozo'e mɛ, ēŋa n tōm fu nēba be'em se'em Zerizalem, ¹⁴ la a to'oge nōore kǻabgɔ kēma nēŋadōma zē'am mɛ wa'am kalam

tɪ a yōge seba wuu n pu'usrɪ la fōn yu'urɛ la.» ¹⁵ Tɪ Zuudāana la yele Ananiyasɪ yeti: «Sēŋe, mam looge ē mɛ tɪ m botɪ a tarɪ mam yu'urɛ sēŋe ka tɔge bɔ bu-zǻŋsɪ, la ba na'adōma, la Israyelɪ dōma mɛ. ¹⁶ Mam wun pa'alɛ ē ēn wun nǻmsɛ se'em mam yu'urɛ iŋyǻ.»

¹⁷ Tɪ Ananiyasɪ sēŋe ka kē yire la puam dɪke a nu'usi paglɛ Asolɪ zuo yele ē yeti: «M sɔbia Asolɪ, fōn daan boe sore zuo sēnna tɪ Zuudāana Azezi puke a mēŋa pa'alɛ fu la, ēŋa n tōm mam fu zē'am tɪ m botɪ fu nini le yēta, dee tɪ fu to'oge Nawēnne Sɪa pǻŋa.» ¹⁸ Tɪ Ananiyasɪ n yele belɪ la, selɪ n ān wu pɔgrɔ n kɔ'ɔn ze'ele Asolɪ ninum lui, tɪ a le yēta. Tɪ a isge, tɪ ba mise ē ko'om puam, ¹⁹ dee tɪ a di dia, tɪ a pǻŋa le wa'am.

Asolɪ mōole Nawēnne yetɔga Damaasɪ tēŋa puam

Asolɪ daan weege Damaasɪ Azezi karēnbiisi la zē'am na dabsa fēe, ²⁰ darɛ kē Zifdōma wēndetum mōola Nawēnne yetɔga yeti, Azezi de la Nawēnne Dayua. ²¹ Tɪ la di'ige seba wuu n wōm na. Tɪ ba yeti: «Dagɪ bura-ē-na wǻ n daan boe Zerizalem kɔ'ɔn nǻmsra nēr-seba n pu'usrɪ la Azezi yu'urɛ la? A nōo ka wa'am kalam tɪ a yōge ba lu mɛ tarɪ ba sēŋe kǻabgɔ kēma nēŋadōma zē'am?»

²² La Asolɪ daan yēti buraane mɛ pa'asra, tɔge yǻŋe Zifdōma seba n boe Damaasɪ la, pa'alɛ ba tɪ Azezi de la Krisi tɪ Nawēnne tōm.

²³ La dabsa faa n pa'asɛ tɪ Zifdōma lagum ēŋe nōore ayɪla yeti ba ku ē. ²⁴ Tɪ Asolɪ daan bǻŋe ban bām yeti ba ēŋe se'em na. Ba daan gu'uri tēŋa la yansɪ la wun-tɛŋa la yu'urɔ, bɔɔra tɪ ba ku ē. ²⁵ Tɪ daare ayɪla yu'urɔ, tɪ a karēnbiisi daan botɪ a sige pu'igɔ puam, tɪ ba dɪke ē sike lalga poorum, tɪ a fōrge.

Asolɪ boe Zerizalem

²⁶ La Asolɪ daan sēŋe la Zerizalem ka bɔɔra tɪ a lagum na Azezi karēnbiisi la. La ba daan zotɪ ē mɛ, ba daan ka sake tɪ a sɪrɪ de la Azezi karēnbia. ²⁷ Tɪ Abarnabasɪ daan tarɪ ē sēŋe Azezi Tōntōnɪba la zē'am ka pa'alɛ ba Asolɪ n daan yē Zuudāana Azezi Damaasɪ sore zuo, la Zuudāana la n tɔge ē se'em, la ēn daan kǻbe sũure mōole Azezi yelle Damaasɪ se'em. ²⁸ Tɪ Asolɪ yǻŋa daan bɔna la ba Zerizalem, ɛɛra tēŋa la puam wuu, kǻbe sũure mōola Zuudāana Azezi yelle. ²⁹ La a daan tɔgrɪ mɛ wē'era nōke'ene la Zifdōma seba n tɔgrɪ Grɛkɪ yetɔga la. Tɪ ba bɔɔra tɪ ba ku ē. ³⁰ La Azezi karēnbiisi la n bǻŋe belɪ la, ba tarɪ ē sēŋe la Sezaare, tɪ ba botɪ a sēŋe Tarsɪ.

³¹ Tɪ Azezi nēr-kuurɔ la n boe Zude, la Galile, la Samaari tēnsuɔm na, daan ka le yē nǻmsgɔ. Tɪ Nawēnne Sɪa sōŋra ba, tɪ ba kǻlle pa'asra, tɪ ba ze kǻŋkǻŋe nǻ'asra Zuudāana la ba sũure wuu.

Aene yē īmā'asum

³² La Aplyeeri daan eeri gilgra la zē'esī la wuu, ti daare ayula ti a sēñe Nawēnne nērba la n boe Lida la zē'am. ³³ La bilam a yē la buraa ayula yu'ure n de Aene, a daan bē me kōorum gā yuuma anii. ³⁴ Ti Aplyeeri yele ē yeti: «Aene, Azezi-krisi bō fu īmā'asum me. Isge vaage fu bōn-gā'ala la bīñe.» Ti a isge bilam zē'am. ³⁵ Ti Lida, la Saarō tēnsi nērba wuu yē ti buraa la yē īmā'asum me, ti ba teege yem dīke ba mēña bō Zu-udāana.

Atabita vo'ore

³⁶ La pōka ayula n daan boe Zope dēna Azezi karēnbīa ti a yu'ure dēna Atabita. (Ti Grekūdōma yeti, Adōrkasi, a vōore de la «mōlfō».) A daan tōnni la tōon-sōma sōñra nasdōma. ³⁷ La wakat-ēña bā'a n yōke ē, ti a ki. Ti ba sō ē, tarī ē zom deego n boe deego zuum ka gā'are ē. ³⁸ Zope ka zāage la Lida. La karēnbīisi la n wōm ti Aplyeeri boe bilam na, ti ba tōm buraasi bayi yeti, ba sēñe ka wi ē yeti, a wa'am, a da yuuge.

³⁹ Ti Aplyeeri isge doose ba sēñe. La ban paage la, ba tarī Aplyeeri zom na deego la n boe deego zuo la. Ti pōkōpa wuu lem Aplyeeri kella, dee pa'ala fu-sēba ti Adōrkasi daan pē bō ba, ēn daan vōa la. ⁴⁰ Ti Aplyeeri boti ba wuu yese yēña, dee ka dūma tēña pu'use, dee wērgē kūm na bōba yeti: «Atabita, isge.» Ti a pike nini yē Aplyeeri, isge zī'ire. ⁴¹ Ti Aplyeeri gurē a nu'ugo, ti a isge ze'ele, ti a wi Azezi nērba la, la pōkōpa la pa'ale ba ti a le vōa me.

⁴² La Zope tēña dōma wuu n daan wōm yel-ēna wā la, ba nērba zozo'e n bō Zuudāana Azezi sra.

⁴³ Aplyeeri daan yuuge Zope paage la dabsa se'em. A daan boe la Asimō n de gānzapa la yire.

Akōrneli wi Aplyeeri

10 Buraa n daan boe Sezaare, ti a yu'ure dēna Akōrneli. A daan de la suda-ke'ema, ba wi'iri su-da-sēba ti a de ke'ema ba puam na ti Itali dōma su-daasi. ² A daan de la nēr-sōñ, ti ēña la a yir-dōma wuu daan nanna Nawēnne. La a daan sōñri la Zifdōma nasdōma zozo'e, dee pu'usra Nawēnne daare woo. ³ Ti wēnne daan gelge, ti a yē Nawēnne maleka wu a zāasum me na, ti a wa'am wa kē a zē'am yele ē yeti: «Akōrneli!» ⁴ Ti a daan bīsra maleka la zīi, ti dabeem tara ē, ti a yeti: «M dāana, fu yeti bō?» Ti a lerge yele ē yeti: «Fu pu'usgo la, la fōn sōñri nasdōma la paage Nawēnne yem me, a tēri fu yelle me. ⁵ La nānanne wā, tōm nērba ti ba sēñe Zope ka yele Asimō-plyeeri ti a wa'am. ⁶ A de la sāana bōna Asimō n de gānzapa la yire. A yire la lem na ko-kāte la nōorum.» ⁷ La maleka la n tōge la Akōrneli dee fōrgē la, ti Akōrneli wi a tōntōn-ba bayi, la a suda-sōñ ayula n tōnni a tōoma, dee mē

nanna Nawēnne, ⁸ yāña tōge sela n ēñe la wuu pa'ale ba, dee tōm ba ti ba sēñe Zope.

⁹ La beere n wiige, ti ba bōna sore we ka lem Zope, ti Aplyeeri zom gōsgo ti a pu'use, la mase wu wuntēña zuu-tēñasuka. ¹⁰ Ti a kōm daan dōnna, ti a bōra ti a di. La ban nān boe mī ita dia ti ba bō ē na, ti a bīse yē wu a zāasum me na, ¹¹ a daan yē ti saazuum n yo'oge, ti sela n ān wu fu-kāte n lu zē'esī sīnaasi signa tēña. ¹² La dūnsi buuri wuu, la tēña bōn-vuula, la bōn-ēgla buuri wuu n boe a puam. ¹³ Ti a wōm kōa n yele ē yeti: «Aplyeeri, isge ku di.» ¹⁴ Ti Aplyeeri lerge ē yeti: «Ayel, Zuudāana, mam ken ka di sela n de sisgo bōnō bu bōn-dēgrō baa fēe.» ¹⁵ Ti kōa la le yele ē yeti: «Bōn-sēka ti Nawēnne yeti, a ān sōña, da kān yeti, a de la bōn-dēgrō.» ¹⁶ Bōnō la ēñe la nōor-atā, dee yāña lebe saazuum.

¹⁷ Ti Aplyeeri daan ze yeri, tē'esra a putē'erum bōn-ēña ti a yē la vōore. La wakat-ēña ti sēba ti Akōrneli daan tōm na soke Asimō yire n boe zē'a, wa'am wa ze yaña nōorum, ¹⁸ yāña wi soke yeti, Asimō-plyeeri boe la kalam bu? ¹⁹ La Aplyeeri ken tē'esra la bōnō la ti a yē la yelle, ti Nawēnne sīa yele ē yeti: «Buraasi batā n eeri fo, ban wāna. ²⁰ Isge sige doose ba, da sē'ena, ti mam n tōm ba.» ²¹ Ti Aplyeeri sige buraasi la zē'a ka yele ba yeti: «Mam ti ya eeri la. Bēm yelle īyā ti yāma wa'am kalam?» ²² Ti ba yele ē yeti: «Akōrneli, a de la suda-ke'ema, ti a urgō mase, ti a nanna Nawēnne, ti Zifdōma wuu tōgra a yelle sōña. Ti Nawēnne daan tōm a maleka ti a wa'am wa yele ē yeti, a boti fōn wa'am a yire wa yele ē fōn tarī yetōg-sēka la.» ²³ Ti Aplyeeri boti ba kē yire la gā'are.

Ti beere wiige, ti a isge dōla ba we, ti Azezi karēnbīisi baseba n boe Zope la kōlge ē ti ba sēñe. ²⁴ La dabsa ayi daare ti ba paage Sezaare. Ti Akōrneli daan wi a yir-dōma la a sūdōma lagse gu'ura ba. ²⁵ La Aplyeeri n paage kē'era la, ti Akōrneli tu'use ē ka dūma tēña a nēñam nā'ase ē. ²⁶ Ti Aplyeeri gurē ē yeti: «Isge, mam mē de la nērsaala wu fōn na.» ²⁷ Ti ba sōsra la taaba kē'era, ti Aplyeeri yē nērba n lagse zo'oge. ²⁸ Ti a yele ba yeti: «Ya mi ti Zifdōma sisri me, ba ka lagnī la nēra n de sāana, la ba ka kē'eri a yire. La Nawēnne pa'ale mam me ti m da yeti, nērsaala de dēgrō dāana, bu a ka narī m lagum na ē. ²⁹ Bela īyā ti fōn wi mam, ti mam wa'am ka zagse. La mam boori ti m bāñe la bēm yelle īyā ti yāma boti mam wa'am?»

³⁰ Ti Akōrneli lerge ē yeti: «La de la dabsa anaasi n wāna wēngelña wu wakat-ēna wā, ti mam daan boe m yire pu'usra, ti buraa kō'ōn ye fuugo n yēgrī ze mam nēñam, ³¹ dee yeti: «Akōrneli, Nawēnne to'oge fu pu'usgo la, la a tēri fōn sōñri nasdōma se'em na me. ³² Bela, tōm nērba ti ba sēñe Zope ka wi Asimō-plyeeri ti a wa'am. A boe la Asimō n de gānzapa la yire. A yire la lem na ko-kāte la nōorum.» ³³ Bela īyā ti mam tōm nērba tōtō ti ba wa'am wa wi fu ti fu wa'am. La fōn wa'am

wã, fu ãñe sõña. Tl wuu yãña boe la Nawënne nẽjam kalam tl tl selse bõn-seka wuu tl Zuudãana Nawënne yele fõn yeti, fu yele tõma la.»

Apiyëerl mõole Nawënne yetõga bõ Akõrneli

³⁴ Tl Apiyëerl yãña põse yele yeti: «Sira sira, mam yãña bãñe me tl Nawënne ka tũ'usri nẽrba. ³⁵ La buuri wuu puam nẽr-seka n nannl Nawënne dee ita sela woo tl la masra, ãña dãana n paage a yem. ³⁶ Tõ. Ya mi tl Nawënne tõm a yetõga la bõ la Israyeli dõma, a de la kõ-yëlga n pa'alil tl tl wun tara sũ-mã'asum la Nawënne Azezi-krisi ãyã, ãña n de nẽrsaalba wuu Zuudãana. ³⁷ Yãma mi yel-seba wuu n daan ãñe Zude la, la daan pĩ'ilum na Galile Azã n daan mõole Nawënne yetõga dee mise nẽrba ko'om puam na poorum. ³⁸ Ya ken mina Azezi n yese Nazareti la, la Nawënne n daan bõ ã a Sla pãña se'em, tl a daan sẽñe zẽ'esl wuu ãñe ur-sõma, botl Asũtãana n daan nãmsrl seba la wuu yẽ ãmã'asum. Se'ere n soe la, Nawënne daan boe la ã me. ³⁹ Tõma yẽ bõn-seba wuu tl a daan tõm Zerizalem la Zifdõma so'olum na wuu me, dee tl ba daan ka ã dõpuurña zuo ku. ⁴⁰ Tl Nawënne daan vo'oge ã dabsa atã daare, botl a dõke a mẽña pa'alẽ. ⁴¹ La a ka dõke a mẽña pa'alẽ nẽrba la wuu, a dõke a mẽña pa'alẽ la tõma seba n de kaset-dõma tl Nawënne daan põn dẽñe looge la. A vo'ore la poorum, tõma daan lagum na ã me di dee yũ. ⁴² A daan bõ tõma nõore yeti, tl mõole ãña yetõga, dee yele nẽrba, tl la de la ãña tl Nawënne looge tl a di nẽr-wõsl la kl'undõma sarlya. ⁴³ Nawënne nõtõ'õsrlba la wuu yuun tõge a yelle me yeti, seka woo n bõ ã sira, Nawënne wun base a dãana tõon-be'ero taale a yu'ure ãyã.»

Seba n dagl Zifdõma la to'oge Nawënne Sla

⁴⁴ Apiyëerl n daan ken tõgra yetõg-bãna la, tl Nawënne Sla sige seba wuu n wõm yetõga la zuto. ⁴⁵ La Nawënne n daan botl a Sla la mẽ sige bu-zãñsl la zuto la, la daan di'ige Zifdõma seba n bõ Azezi sira n doose Apiyëerl wa'am na me. ⁴⁶ Se'ere n soe la, ba daan wõm tl ba tõgrl la bu-zãñsl yetõga pẽgra Nawënne yu'ure. ⁴⁷ Tl Apiyëerl yeti: «Nẽr-bãna wã to'oge la Nawënne Sla wu tõma n daan to'oge se'em na. Bela, ãne n wun tã'age gu ba yeti, ba da to'oge ko'om misga?» ⁴⁸ Dee bõ nõore yeti, ba mise ba ko'om puam la Azezi-krisi yu'ure. Tl ba sose Apiyëerl yeti, a weege bãma zẽ'am ãñe dabsa fẽe pa'ase.

Apiyëerl tõge pa'alẽ lan ãñe se'em tl ãña sẽñe bu-zãñsl zẽ'am

11 La Azezi Tõntõntba, la a karẽnbi-seba n boe Zude so'olum na wõm me tl nẽr-seba n dagl Zifdõma la mẽ sake Nawënne yetõga me. ² La Apiyëerl daan lebe la Zerizalem, tl Zifdõma baseba n bõ Azezi

sira la wẽ'era nõke'ene la ã, ³ yele ã yeti: «Bẽm n ãñe tl fõn kẽ lagum na bu-zãñsl n ka wãtl la dita?»

⁴ Tl Apiyëerl yãña pa'alẽ ba yela la wuu n daan doose se'em na yeti: ⁵ «Mam daan boe la Zope pu'usra, yẽ sela wu zãasñõ la, tl sela la ze'ele saazuum sigrã wu fu-kãte n lu zẽ'esl sũnaasl sige wa paam mam boe zẽ'a la. ⁶ Tl mam bũsra bõnõ na zĩi, yẽ yire dũnsi, la we-dũnsi, la bõn-vuula, la bõn-ẽgla. ⁷ Tl mam wõm kõa n yeti: «Apiyëerl, isge ku di.» ⁸ Tl mam yeti: «Ayei, Zuudãana, sela n de sisgo bõnõ bu bõn-dẽgrõ ken ka kẽ mam nõorum.» ⁹ Tl kõa la le ze'ele saazuum tõge bõ mam yeti: «Bõn-seka tl Nawënne yeti, a ãn sõña, da kãn yeti, a de la bõn-dẽgrõ.» ¹⁰ La daan ãñe la nõore atã, dee viise lebe saazuum. ¹¹ Tl buraasl batã kã'õn paam yi-seka tl mam boe mĩ na. Ba daan tõm ba la Sezaare tẽjam yeti, ba wa'am mam zẽ'am. ¹² Tl Nawënne Sla yele mam yeti, m doose ba sẽñe, m da sẽ'ena. Tl tl scõbiisi bãna bayoobõ wã kõlge mam, tl tõma sẽñe ka kẽ Akõrneli yire. ¹³ Tl a yele tõma tl ãña daan yẽ la maleka n ze ãña yire, yele ãña yeti: «Tõm nẽrba tl ba sẽñe Zope ka wi Asimõ-piyëerl tl a wa'am. ¹⁴ ãña n wun tõge yetõg-seba n wun botl fõn na fu yir-dõma wuu yẽ fãare.» ¹⁵ Mam n boe mĩ tl m tõge la, tl Nawënne Sla sige ba zuto wu ãn daan sige tõma zuo se'em põspõsl la. ¹⁶ Bela tl mam tẽege Zuudãana n daan yeti: «Azã daan misri nẽrba la ko'om puam, la Nawënne wun mise ya a Sla puam.» ¹⁷ La sãn dena tl Nawënne bõ ba a Sla, wu ãn daan bõ tõma n bõ Zuudãana Azezi-krisi sira se'em na, mam de la ãne wun sl'ise Nawënne?» ¹⁸ Ban wõm bela la, ba sĩm me dee pẽgra Nawënne yeti: «Bela, Nawënne botl bu-zãñsl mẽ yẽ sore me tl ba teege yem base tõon-be'ero yẽ yõvore.»

Antlyõsl nẽrba bõ Azezi sira

¹⁹ La A'etlẽni kũm na poorum, nẽr-seba n yẽ nãmsgõ la wurge me, sẽñe halõ Fenisi, la Sipri, la Antlyõsl ka mõola Nawënne yetõga la bõ'õra Zifdõma mã'a. ²⁰ La ba buraasl baseba daan ze'ele la Sipri, la Sireni so'olum sẽñe Antlyõsl mẽ ka mõole bu-zãñsl, tõge Zuudãana Azezi kõ-yëlga la bõ ba. ²¹ La Zuudãana pãña daan boe la ba me. Tl nẽrba zozo'e daan bõ Zuudãana sira dõla ã.

²² La Azezi nẽr-kuurõ la n boe Zerizalem na n wõm bela la, ba tõm na Abarnabasl yeti a sẽñe Antlyõsl.

²³ La ãn paage yẽ tl Nawënne ãñe nẽrba la yel-sõnne se'em na, a sũure ãñe yẽlum me. Tl a pa'alẽ ba yeti, ba kenje ba mẽña dõla Zuudãana la ba sũure wuu da base.

²⁴ Se'ere n soe la, a daan de la nẽr-sõñõ, dee bõ Azezi sira zo'oge, tl Nawënne Sla bõna la ã. La nẽrba zozo'e n daan pa'ase dõla Zuudãana.

²⁵ La Abarnabasl babse me sẽñe Tarsl tl a ka ã Asoli.

²⁶ La ãn yẽ ã na, a tarl ã me wa'am Antlyõsl. La yuune tõre tl ba lagse la Azezi nẽr-kuurõ la, dee zãsum nẽrba

zozo'e. La de la Antıyosı tējam tı ba daan pɔsɛ wi karēnbiisi la tı Kisi nērba.

²⁷ La wakat-ēja tı Nawēnne nōtɔ'srıba daan ze'ele Zerizalem sēje Antıyosı. ²⁸ Tı ba nēra ayıla yu'ure n de Agabisi isge ze'ele tɔge la Nawēnne Sıa pāja yetı, kɔm kāte n wun wa'am dūnia wuu zuo. La kɔm ēja sırtı wa'am me na-keko Akloorı wakatı. ²⁹ Tı karēnbiisi la yetı, nēra woo looge ēn tarı sela bɔ tı ba to'oge sōje Azezi nēr-seba n boe Zude la. ³⁰ Tı ba daan ēje bela dıke ligri la ēje Abarnabası la Asolı nu'usum, tōm ba yetı, ba tarı sēje ka bɔ Azezi nēr-kuuɔ la kēma n boe Zerizalem na.

Ba ku Azakı, dee yu Apıyεrı

12 La mase la wakat-ēja tı naba A'erɔdı daan nām-sra Azezi nērba baseba, ² dee botı ba ku Azakı n de Azā sɔbia la sukɔbgɔ. ³ La ēn yē tı la ēje Zıfđōma sūure yēlum me na, a le botı ba yōke la Apıyεrı, wakat-seka tı Zıfđōma diti borborı n ka tarı dābille kibsa la. ⁴ La ēn yōke ē kē'ese yu'a deem na, a botı su-daası pia la ayoobı n puı bana-banaası gu'ura ē sɔɔsna taaba. A boorı tı Zɔɔg-base kibsa n tole, dee tı a tarı ē yese nērba la nējam ka di a sarıya. ⁵ Bela tı ba daan page Apıyεrı base yu'a deego la puam. Tı Azezi nērba la daan pu'usra Nawēnne a ıyā halı ka base.

Maleka yese Apıyεrı yu'a deem base

⁶ Be-seka n wun wiige tı A'erɔdı yese Apıyεrı la, daar-ēja yu'uuɔ Apıyεrı daan gā la sudaası bayi tējasuka gısrı. Ba daan ba ē me la bānsı bayi, tı gu'urba la bɔna zanōrum gu'ura yu'a deego la. ⁷ La haya! Tı Nawēnne maleka kɔ'ɔn wa'am. Tı peelem kɔ'ɔn nēge deego la puam. Tı maleka la wē Apıyεrı lugre nēge ē yetı: «İsge tɔtɔ.» Tı bānsı la ba'age lui tēja dee base a nu'usi la. ⁸ Tı maleka la yele ē yetı: «Ga fu sagānne, dee pire fu tagra.» Tı a ēje bela. Tı maleka la le yele ē yetı: «Ye fu fuugo dee doose mam.» ⁹ Tı Apıyεrı doose ē yese yēja, dee ka bāje tı maleka la n itı se'em na de la sra, a tē'ese tı la āna wu a zāasum me na. ¹⁰ La ban gāje pɔspɔsı gu'urba la, la gu'urba buyi dōma la, ba yāja paage la kut-yan-seka n yesrı kē'era tēja la puam na, tı yaŋa la yo'oge a mēja, tı ba yese yēja yāja dɔla sore wε. Bilam zē'am tı maleka la fōrge dee base Apıyεrı.

¹¹ Tı Apıyεrı yem yāja wa'am, tı a yetı: «Leele wā mam bāje sra sra, tı Zuudāana n tōm a maleka tı a wa'am wa fāage mam A'erɔdı nu'usum, la bōn-seka wuu tı Zıfđōma eerı tı ba ēje mam na.»

¹² La ēn bāje bōn-ēna vōore la, a sēje la Azā-markı ma Amaari yire. La nērba n lagse bilam zo'oge bɔna mı pu'usra. ¹³ La ēn paage mı na, a wē la yaŋa nōore, tı pɔɔɔ yu'ure n de Arode wa'am tı a bıse. ¹⁴ La ēn bāje Apıyεrı kōa la, tı a sūure ēje yēlum tı a ka yo'oge

yaŋa la, dee zoe kē ka yetı: «Apıyεrı ze yaŋa nōorum.» ¹⁵ Tı ba yele pɔɔɔ la yetı: «Fōn de la zɔlgɔ.» Tı a le yetı: «La de la ēja.» Tı ba lerge yetı: «La de la a sıa.» ¹⁶ Tı Apıyεrı ken wē'era yaŋa la. Tı ba yo'oge yē tı la de la ēja. Tı la di'ige ba. ¹⁷ Tı Apıyεrı yıbse nu'usi pa'ale ba yetı, ba āna sım. Dee tɔge pa'ale ba Zuudāana n ēje se'em tarı ēja yu'a deego la puam yese yēja. Dee yele ba yetı: «Yele-ya Azakı, la tı sɔbiisi la, sela n ēje la.» Dee yese sēje zē'a ayēma.

¹⁸ La beere n wiige la, dāmɔɔ zozo'e n wa'am sudaası la tējasuka, tı ba bɔɔra tı ba bāje, la ēje la wāne tı Apıyεrı ka bɔna. ¹⁹ Tı A'erɔdı botı ba ε Apıyεrı, ka yē ē. Tı a di gu'urba la sarıya, bɔ nōore yetı, ba ku ba. La bela poorum a yese Zude sēje la Sezaare ka bɔna bilam.

A'erɔdı kım yelle

²⁰ La naba A'erɔdı sūure daan yıge me halı la Tiiri la Sidō tēnsı nērba. Tı ba ēje nōore ayıla tı ba sēje ka yē ē, yāja lagse taaba dēje yōke Ablastisi n bısrı naba A'erɔdı yire yelle la sıa. Tı bāma la ēja yāja doose taaba sēje ka sose naba A'erɔdı yetı, a base tı sū-mā'asum wa'am bāma la ēja tējasuka. Se'ere n soe la, ba dia daan ze'etı la naba la tējam sēna.

²¹ La A'erɔdı looge la daare yetı, ba tɔge yetɔga la. La daare la n paage la, a ye la a na'am futo zı'ire a na'am kuka zuo tɔgra yetɔg-kāra bɔ'ɔra nērba la. ²² Tı ba kaase yetı: «Kōa wā de la Nawēnne kōa, la dagı nēr-saala kōa.» ²³ Tı Nawēnne maleka botı bā'a yōke A'erɔdı bilam zē'am, tı zūnzūa di ē, tı a ki, ēn ka pēge Nawēnne dee pēge a mēja la ıyā.

²⁴ Tı Nawēnne yetɔga la daan saage zē'a wuu, tı nērba zo'oge sakra yetɔga la pa'asra.

²⁵ La Abarnabası la Asolı n daan tōm ba tōoma Zerizalem ba'ase la, ba daan tarı Azā-markı me lebe Antıyosı.

Ba tōm Abarnabası la Asolı tı ba sēje ka mōole Nawēnne yetɔga

13 Azezi nēr-kuuɔ n boe Antıyosı la puam, Nawēnne nōtɔ'srıba, la karēnsāandōma n daan boe mı. Ba de la Abarnabası, la Asimeyō tı ba wi'iri tı nēr-sabga, la Alusiyusi n ze'ele Sirēnı, la Amanayenı tı ba daan uge ē la naba A'erɔdı, la Asolı. ² La daare ayıla ba daan lu la nōore pu'usra dee pēgra Nawēnne, tı Nawēnne Sıa yele ba yetı: «Looge-ya Abarnabası la Asolı tı ba tōm tōon-seka tı mam looge ba tı ba tōm na.» ³ Tı ba lu nōore dıke nu'usi pagle ba zuto pu'use, dee base ba tı ba sēje.

Se'ere n soe la,
tõon-seka ti mam wun tõm ya zamāana wā puam na,
ya kǎn nan ti la wun suri ēḡe,
baa nēra sǎn tōge pa'ale ya.» »

⁴² La Apoli la Abarnabas ti daan isge ti ba yese la, ti nēba la sose ba yeti, ba le wa'am vo'osgo daare wa tōge yetōg-seba ti ba tōge la. ⁴³ La ban yese ti ba fōrge la, ti Zifdōma zozo'e, la nēba baseba n dagi Zifdōma dee sake dola Nawēnne lo ti a bo Zifdōma, daan dola Apoli la Abarnabas. Ti Apoli dōma pa'ale ba yeti, ba mōrge bōna Nawēnne yel-sōnne na puam.

⁴⁴ Ti vo'osgo daare le paage, ti nēba lagse zozo'e wu la de la tēja la nēba wuu la, ti ba selse Nawēnne yetōga. ⁴⁵ La Zifdōma n yē nēr-kuuḡ la n zo'oge la, ti ba ēḡe sūure si'ise Apoli n tōge se'em na, dee tōgra tōg-be'ero. ⁴⁶ Ti Apoli la Abarnabas daan kǎbe sūure tōge ba yeti: «Tōma wun dēḡe n tōge Nawēnne yetōga wā bo la yāma. La yāma n zagse la, yāma pa'ale ti ya ka mase ti ya yē wōm n ka ba'asri. Bela iḡā tōma wun base yāma, dee sēḡe la bu-zǎḡsi zē'am. ⁴⁷ Se'ere n soe la, Zuudāana Nawēnne bo tōma nōore yeti:

«Mam looge fo ti fu āna wu peelem bo bu-zǎḡsi,
boti nēba yē fāare dūnia zē'esu wuu.» »

⁴⁸ La bu-zǎḡsi la n wōm bela la, ba sūure ēḡe yēlum me hal, ti ba pēgra Nawēnne yetōga la. La nēr-seba n mase ti ba yē wōm n ka ba'asri la daan sake bo Azezi sra me.

⁴⁹ Ti Zuudāana yetōga la saage tēja la wuu. ⁵⁰ Ti Zifdōma daan sa'ase pōgsi n pu'usri Nawēnne, dee de-na yu'ure dōma, la tēja la nēr-zuto, boti ba nāmse Apoli la Abarnabas dige ba ba tēja la puam ti ba yese. ⁵¹ Ti Apoli la Abarnabas pūse ba nāma tēntōnno base, pa'ale ti tēja la nēba ka ēḡe sōḡa, dee we'esa Ikonim. ⁵² La Azezi karēnbiisi la n boe Antiyōsi la daan taru sū-yēlga zo'oge me, dee ti Nawēnne si'a bōna la ba.

Apoli la Abarnabas boe Ikonim

14 Apoli la Abarnabas n paage Ikonim la, ba le kē la Zifdōma wēndeego puam tōge bo nēba. Ti nēr-kuuḡ zozo'e, Zifdōma la nēba baseba n dagi Zifdōma, bo Nawēnne sra. ² La Zifdōma nēr-seba n ka sake yetōga la, bāma n sa'ase bu-zǎḡsi boti ba sūure sā'am la Azezi karēnbiisi la. ³ La Apoli la Abarnabas daan yuuge Ikonim me, te'ege Zuudāana Azezi tōge a yetōga la buraane. Ti Zuudāana daan bo ba pǎḡa ti ba tõm tõon-yālma la yel-kursi n pa'al ti ēḡa yel-sōnne na ti ba tōgru la de la sra. ⁴ La tēja la nēba daan welse me, ti baseba bōna Zifdōma poorum, ti baseba bōna Azezi Tōntōnba la poorum.

⁵ Ti bu-zǎḡsi, la Zifdōma, la ba nēḡadōma bōra ti ba nāmse Apoli la Abarnabas lobe ba la kuga. ⁶ Ti ba bǎḡe, zoe sēḡe Likoni tēnsuḡ, Listri, la Derbi, la tēn-

pūgsi seba n lem bilam na puam. ⁷ Bilam ba daan mōole kō-yēlga la me.

Ba lobe Apoli la kuga Listri tēḡam

⁸ La buraa n daan boe Listri ka tāna sēnna. A ma dōge ē ti a dena la kōḡḡ. ⁹ Ti a daan zēa selsra Apoli n tōgru la. Ti Apoli būsra ē zīi, bǎḡe ti a bo Azezi sra me tāna wun yē iḡā'asum. ¹⁰ Ti Apoli tōge ke'enke'em yele ē yeti: «Isge ze'ele saazuo.» Ti kōḡḡ la vaage isge sēnna. ¹¹ La nēr-kuuḡ la n yē Apoli n ēḡe se'em na, ti ba tīi tōge la Likoni tēja yetōga yeti: «Wēna n lebge nērsaalba sigum tōma zē'am.» ¹² Ti ba daan wi'ira Abarnabas ti Azeyusi, dee wi'ira Apoli ti A'ermēs, ēḡa n taru yetōga la wa'am na iḡā. ¹³ Ba daan taru la deego tēja la zanō-bōba kǎabra Azeyusi. Ti kǎabgo kēema la taru lōsi, la tūsi puuro wa'am zanōrum na, ti ēḡa la nēr-kuuḡ la bōra ti ba kǎabe Abarnabas la Apoli.

¹⁴ La Tōntōnba Apoli la Abarnabas n wōm ban yeti ba ēḡe se'em na, ba sūure sā'am me, ti ba āasum ba futo, dee zoe kē nēr-kuuḡ la puam tīi tōge yeti:

¹⁵ «Nēba wā, bēm ti ya yeti ya ēḡe wāna? Tōma mē de la nērsaalba wu yāma n ān se'em na, la tōma mōoli la kō-yēlga pa'ala yāma ti ya base bōn-bāna wā n ka taru yōor, dee dola Nawēnne n de wōm dāana. ēḡa n nām saazuum la tēja, la ko-kāte, la bōn-seba wuu n boe ba puam na. ¹⁶ Kurum kurum, Nawēnne yuun base buuri wuu ti ba ita la ba mēḡa yem n boori se'em. ¹⁷ La baa bela wuu, Nawēnne itū sōḡa me pa'ale ēḡa n de seka. ēḡa n boti saaga niira bō'ra ya, ti ya bōnkōla bita, ti dia bōna zo'oge, ti ya sūure āna yēlum.» ¹⁸ Baa la Apoli n tōge bela la, la ēḡe la toogo bo ba, dee ti ba yǎḡe gu nēr-kuuḡ la ti ba ka kǎabe ba.

¹⁹ La Zifdōma n ze'ele Antiyōsi n boe Pisidi so'olum, la Ikonim wa'am wa sa'ase nēba la, boti ba lobe Apoli la kuga, vuuge ē tēja la puam yese base, dee tē'esē ti a ki me. ²⁰ Ti Azezi karēnbiisi la lagse gilge ē, ti a isge kē tēja la puam. Ti beere wiige, ti ēḡa la Abarnabas sēḡe Derbi.

Apoli la Abarnabas lebru Antiyōsi n boe Siiri so'olum

²¹ La Apoli la Abarnabas mōole kō-yēlga Derbi me, ti nēba zozo'e lebge Azezi karēnbiisi, dee ti ba yǎḡa lebe Listri, la Ikonim, la Antiyōsi n boe Pisidi so'olum. ²² La ba daan tōge pa'ale karēnbiisi la me, bo ba buraane yeti, ba mōrge bōna Azezi sra la puam da base. Dee yele ba yeti: «Ti wun yē la nāmsoḡ zozo'e dee kē Nawēnne so'olum puam.» ²³ La tēn-seba wuu ti ba sēḡe la, ba looge la kēma Azezi nēba la puam, lu nōore pu'use Nawēnne, dee dike ba base Zuudāana ti ba bo sra la nu'usum. ²⁴ La ban doose Pisidi la, ba paage Pānfili so'olum.

²⁵ La ba mōole Nawēnne yetōga Perzi me, dee sēḡe Atali. ²⁶ La ba kē la ḡorḡ bilam sēḡe Antiyōsi, tēn-seka

ti ba daan dike ba ɛ̃ɛ Nawēnne nu'usum ti a sōɛ ba ti ba tōm tōon-seka ti ba tōm ba'ase wā. ²⁷ La ban paage la, ba boti Azezi nērba la lagse me, ti ba tɔge pa'ale ba Nawēnne n tōm la bāma se'em, la a yo'oge sore me bo bu-zāɛsi ti ba tāna wun bo ɛ̃ sira. ²⁸ La ba boe la karēnbiisi la le bilam yuuge me.

Ba tigse Zerizalem sōse bu-zāɛsi yelle

15 Nērba baseba n ze'ele Zude wa'am Antiyosi wa zāsna Azezi karēnbiisi la yeti: «Ya sān ka wāta ya budimto wu Amoyisi lo la n zāsni se'em na, ya kān tā'age yē fāare.» ² Ti Apoli la Abarnabasi daan ka sake ban yele se'em na, daan tii wē'era nōke'ene la ba. Ti karēnbiisi la ku nō-yēnne yeti, Apoli la Abarnabasi, la bāma nērba baseba sēɛ Tōntōnba la, la kēma n boe Zerizalem na zē'am nōke'ene ɛ̃ɛ yelle.

³ La Azezi nērba la n tōm ba yeti ba sēɛ la, ba doose la Fenisi la Samaari tēnsu tɔge pa'ale bu-zāɛsi n teege yem sake Nawēnne se'em. Bela boti Fenisi la Samaari tēnsi karēnbiisi la sūure ɛ̃ɛ yelum me zozo'e.

⁴ La ban paage Zerizalem na, Azezi Tōntōnba la, la Azezi nērba, la ba kēma la wuu to'oge ba me sōɛ sōɛ. Ti ba tɔge pa'ale Nawēnne n ɛ̃ɛ se'em wuu la bāma. ⁵ Ti Farisi nērba baseba n bo Azezi sira la isge yeti: «Dēni ti ba wāta bu-zāɛsi la, dee zāsum ba ti ba sake Amoyisi lo la wuu.»

⁶ Ti Tōntōnba la, la kēma la lagse ti ba bise ba wun ɛ̃ɛ yelle la se'em. ⁷ La ban wē'eri nōke'ene zo'ra la, ti Apiyēri isge yele ba yeti: «M sōbiisi, yāma mi me ti Nawēnne looge la mam kurum kurum yāma puam, ti m tɔge a kō-yēlga la bo bu-zāɛsi ti ba sake. ⁸ La Nawēnne n mi nērsaala putē'era la, bo ba a Sia me, wu ɛ̃ɛ n daan bo tōma se'em na, pa'ale ti ɛ̃ɛ fāage ba me. ⁹ La a ka welge tōma la bāma. La ban bo Azezi sira la iya ti a yese be'em ba sūure puam base. ¹⁰ Bela, bēm ti ya makra Nawēnne bo'ra ti ya zelge karēnbiisi la zeero ti tōma yaabdōma, la tōma ka yāɛ tu? ¹¹ La ka ān sōɛ, tōma mi ti la de la Zuudāana Azezi yel-sōnne na iya ti tōma yē fāare, wu bāma n mē yē fāare se'em na.»

¹² Ti nēr-kuuɛ la wuu āna sīm selsra Abarnabasi la Apoli n tɔgru pa'ala tōon-yālma, la yel-kirsi seba ti Nawēnne ɛ̃ɛ la bāma bu-zāɛsi tēnasuka la.

¹³ La ban tɔge ki'ulum na, ti Azaki yeti: «M sōbiisi, selse-ya. ¹⁴ Asimō-piyēri tɔge pa'ale la Nawēnne n dēɛ bise bu-zāɛsi yelle se'em, looge ba nērba baseba ti ba dena a mēɛ nērba. ¹⁵ La bōn-bāma mase wu Nawēnne nōt'osruba n yele se'em na. Ba yuun gulse ti Nawēnne yeti:

¹⁶ «Bela poorum, mam wun leme wa'am, wa le mē naba Adavidi deego la n lui la me. Mam wun le malge ɛ̃ me, mē a daboogo la zuo.

¹⁷ Bela ti nēr-seba n weege la wuu, la bu-zāɛsi wuu ti mam looge ti ba dena mam nērba la,

wun ɛ̃ mam n de ba Zuudāana.»

¹⁸ Zuudāana Nawēnne n yele se'em n wāna, ɛ̃ɛ n ɛ̃ɛ bōn-bāma ti ba pōn mina halı kurum kurum.»

¹⁹ Ti Azaki ken yeti: «Bela ti mam tē'ese ti ti da nāmse seba n dagi Zifdōma dee teege yem dola Nawēnne na.

²⁰ Ti gulse gōɛ bo ba yeti, ba da di di-seba ti ba kāabe bo бага la, ti ba wun dēge ba, ba da tōnna yalsi tōoma, ba da di sela ti ba tēge ku, la ba da di zum.

²¹ Se'ere n soe la, halı kurum kurum ba karēɛri Amoyisi gōnno Zifdōma wēndeto la puam ba vo'osgo dabsa wuu me, dee mōola ba tēnsi la wuu puam.»

Ba gulse gōɛ bo bu-zāɛsi

²² Bela ti Tōntōnba la, la kēma, la Azezi nērba la wuu tē'ese yeti, la ān sōɛ ti ba looge nērba bāma puam tōm ba ti ba doose la Apoli la Abarnabasi sēɛ Antiyosi. Ti ba looge Azudi seka yu'ure n ken dena Abarsabasi la, la Asilaasi. Bāma ti ba daan nannı. ²³ La ba daan gulse la gōɛ bo ba yeti:

«Tōma n de Azezi Tōntōnba, la Azezi nērba la kēma n pu'usri yāma bu-zāɛsi n de ti sōbiisi n boe Antiyosi, la Siiri, la Silisi so'olum.

²⁴ Tōma wōm ti tōma nērba baseba n wa'am wa dāana yāma la yetɔga boti yāma yem yō'ra, tōma ka bo ba nōore. ²⁵ Bela iya ti tōma lagse taaba ku nōore ayila, tē'ese ti la ān sōɛ ti tōma looge nērba baseba tōm ba ti ba doose la ti sir-nōɛrısı Abarnabasi la Apoli wa'am yāma zē'am. ²⁶ Bāma n pōse ba yōore tōma Zuudāana Azezi-krisi tōoma la iya. ²⁷ Bela ti tōma tōm Azudi la Asilaasi ti ba wa'am wa tɔge bōn-bāma pa'ale ya. ²⁸ Nawēnne Sia, la tōma tē'ese me ti la ān sōɛ ti ti da zelge ya zeero baseba pa'ase, sān dagna yel-seba n de kāɛkāɛ wā. ²⁹ La de la ya da di di-seba ti ba dike kāabe bo бага, ya da di zum, la ya da di sela ti ba tēge ku, la ya da tōnna yalsi tōoma. Ya sān guuse ya mēɛ ka ɛ̃ɛ bōn-bāna, ya ɛ̃ɛ sōɛ. Nawēnne wun bo ya imā'asum.»

³⁰ Ba daan keese seba ti ba tōm na me, ti ba sēɛ Antiyosi. La ban paage bilam na, ba lagse Azezi nēr-kuuɛ la me, dike gōɛ la bo ba. ³¹ La ban daan karēɛ gōɛ la, la bo ba buraane me, boti ba sūure ɛ̃ɛ yelum zo-zo'e. ³² Ti Azudi la Asilaasi n daan de Nawēnne nōt'osruba la tɔge zozo'e keɛ ba sōbiisi la sūure, pa'ase ba pāɛ. ³³ La ba daan yuuge mī na fēe, dee ti ba sōbiisi la base ba ti ba lebe seba n tōm ba la zē'am la sū-mā'asum. [³⁴ Ti Asilaasi daan looge yem weege bilam.]

³⁵ La Apoli la Abarnabasi daan weege la Antiyosi bilam, ti bāma la nērba baseba zozo'e zāsna nērba Zuudāana Nawēnne yetɔga dee mōola a kō-yēlga la.

Apoli la Abarnabası welge taaba

³⁶ La daare ayula ti Apoli yele Abarnabası yetu: «Ti lebe ka kaage ti sɔbiisi la n boe tɛn-sɛba wuu ti ti daan mōole Zuudāana yetɔga bɔ ba la, bise ba ɛn se'em.»
³⁷ Ti Abarnabası daan bɔɔra ti Azā sɛka yu'ure n ken dɛna Amarkı la po doose ba sɛɛ. ³⁸ La Apoli daan tɛ'esɛ ti la ka ɛn sɔɲa ti a doose bāma, se'ere n soe la, a daan base ba mɛ Pānfili, ka le doose la ba tōm. ³⁹ Ti ba daan wɛ nōke'ene welge taaba. Ti Abarnabası daan boti Amarkı doose ɛ, ti ba kɛ ɔorɲ sɛɛ Sipri. ⁴⁰ La Apoli daan looge la Asılaası ti a doose ɛ. Ti Azezi karɛnbiisi la dıke ba ɛɛ Nawɛnne nu'usum ti a ɛɛ yel-sɔnnɛ. ⁴¹ Ti ba yāna sɛɛ Siiri la Silisi tɛnsuɔm ka pa'ase Azezi nɛr-kuuɲ la pāɲa.

Atimōti doose Apoli la Asılaası, ti ba tōm Nawɛnne tōoma

16 La Apoli dōma sɛɛ ka paage la Derbi la Listri tɛnsuɔm. Ti Azezi karɛnbia daan bɔna mɛ ti a yu'ure dɛna Atimōti, a ma de la Zifu n sake bɔ Azezi sɛra. Dee ti a sɔ dɛna Grɛkl. ² Ti Azezi karɛnbiisi n boe Listri la Ikonim tɛnsuɔm na daan tɔgra a yelle sɔɲa. ³ Ti Apoli bɔɔra ti a dɔla la ba le tōnna, daan wā ɛ Zıfđōma sɛba n boe tɛn-bāma la ıyā, se'ere n soe la, ba wuu daan mi ti a sɔ de la Grɛkl. ⁴ La ba daan dolı la tɛnsı puam bısra Azezi nɛr-kuuɲ la, dee tɔgra pa'ala ba Azezi Tōntōnıba la, la kɛma la n boe Zerizaleɔm na n looge yɛm se'em, dee yeti ba ti ba sake bōn-sɛba ti ba looge la. ⁵ Bela ti Azezi nɛr-kuuɲ la daan yɛ pāɲa Nawɛnne doosgo la puam, ti ba källe pa'asra daare woo.

Apoli boe la Truası zāasum ti ba wi ɛ Maseduanı

⁶ Ti Apoli dōma daan bɔɔra ti ba sɛɛ Azi tɛnsuɔm ka mōole Nawɛnne yetɔga, ti Nawɛnne Sıa gu ba, ti ba doose Frizi la Galatı so'olum. ⁷ La ban sɛɛ ka lɛm Mizi so'olum na, ba boori ti ba sɛɛ la Bitini, ti Azezi Sıa la ka bɔ ba sore. ⁸ Ti ba doose Mizi tole sɛɛ Truası. ⁹ La yu'urɲ ti Apoli bise yɛ Maseduanı nɛra wu zāasɲ la, ti bura la ze a zɛ'am belna ɛ yeti: «Wa'am Maseduanı wa sɔɛ tɔ.» ¹⁰ La Apoli n daan yɛ bela la, tōma māasum mɛ tɔtɔ ti ti sɛɛ Maseduanı, bɛm ıyā, tōma tɛ'esɛ bāɛ mɛ ti la de la Nawɛnne n wi tōma yeti, ti sɛɛ ka mōole kō-yɛlga la bɔ ba.

Alidi bɔ Azezi sɛra Filipi tɛɲam

¹¹ Ti tōma kɛ ɔorɲ bilam kɔ'ɔn sɛɛ Samotrasi. Ti beere wiige, ti tōma paage Neapolisi. ¹² La tōma yāɲa ze'ele la bilam sɛɛ Filipi n de Maseduanı tɛn-kāra la tɛɲa ayula. Filipi tɛɲa de la Rom dōma n soe ɛ. Tōma ɛɛ bilam na dabsa faa. ¹³ Ti vo'osgo daare ti tōma yese tɛɲa la puam sɛɛ kulaa nōorum, tōma tɛ'esɛ mɛ

ti zɛ'e-ɛɲa de la Zıfđōma pu'usgo zɛ'a. Ti tōma zı'ire bilam tɔgra bɔ'ɔra pɔgsı n lagse. ¹⁴ La pɔka ayula n daan boe mɛ pu'usra Nawɛnne, ti a yu'ure dɛna Alidi, a ze'ele la Tiyaıiri. A daan koosrı la fu-sōma n de gomusga. Ti a selsra tōma yetɔga la, ti Zuudāana boti a bāɛ Apoli yetɔga la vōore dee sake. ¹⁵ Ti tōma daan mise ɛɲa la a yir-dōma ko'om puam. Ti a sose tōma yeti: «Ya sān sake ti mam sırı bɔ Zuudāana sıra mɛ, ya wa'am kɛ'era mam yire.» La a pɛrge tōma mɛ, ti tōma sake.

Apoli dōma boe la yu'a deem Filipi tɛɲam

¹⁶ Ti daare ayula ti tōma wɛ pu'usgo zɛ'am, ti pugla n de yamɲa ti kulkā'arga dolı ɛ daan tu'use tōma. Kulkā'arga la daan boti a yɛta la yel-sɛba n boe nɛɲam sɛnna tɔgra bɔ'ɔra nɛrba, la sɛba n soe ɛ na daan yeti ligri zozo'e mɛ a zɛ'am. ¹⁷ Ti a dɔla Apoli la tōma tıi tɔgra yeti: «Nɛr-bāna wā de la Nawɛnne n gānnı sɛla wuu la tōntōnıba, ba mōoli la fāare sore pa'ala ya.»
¹⁸ La a ɛɛ bela la dabsa faa. Ti Apoli sūure sā'am la ɛ, ti a wɛrge yele kulkā'arga la yeti: «Mam yeti fu la Azezi-krisi yu'ure, ti fu yese dee base pugla wā.» Ti kulkā'arga la yese bilam zɛ'am dee base ɛ.

¹⁹ Ti sɛba n soe ɛ na n bāɛ ti bāma kān le yɛ ligri a zɛ'am na, ti ba yōke Apoli la Asılaası ve'ege ba kɛ da'am ka sām ba tɛɲa la nɛɲadōma zɛ'am. ²⁰ Ti ba tarı ba paage sɛba n diti sarıya la zɛ'am ka yeti: «Nɛr-bāna wā de la Zıfđōma, bāma n dāmı ti tɛɲa wā. ²¹ Ba pa'alı la bōn-sɛba n sisri, ti tōma n de Rom nɛrba kān sake ɛɛ.» ²² Ti nɛr-kuuɲ la lagum zɛbra Apoli la Asılaası, ti sɛba n diti sarıya la boti ba ve ba futo la yɛsɛ, dee bɔ nōore yeti, ba wɛ ba la ka'asa. ²³ Ti ba wɛ ba zozo'e dee kɛ'esɛ ba yu'a deem, dee yele gu'ura la ti a gu'ura ba sɔɲa. ²⁴ Ban yele bela la, ti a kɛ'esɛ ba yu'a de-sɛka n boe puam puam na, lu ba nāma lable la dɔɔɔ.

²⁵ Ti sōnsua ti Apoli la Asılaası pu'usra dee yōona yōoma pɛgra Nawɛnne, ti sɛba n po bɔna yu'a deem na selsra. ²⁶ Ti tɛɲa dare mıim zozo'e, ti yu'a deego la mıim la a ɛbre waa wuu, ti kulınsı la wuu yo'ose, ti bānsı la wuu ba'ase. ²⁷ Ti yu'a deego gu'ura la nɛge isge yɛ ti kulınsı la yo'ose mɛ, ti a tɛ'esɛ ti ba yese mɛ, ti a fooge su'a ti a ku a mɛɲa. ²⁸ Ti Apoli tɔge ke'enke'em yeti: «Da kān ɛɛ fu mɛɲa sɛla, tōma wuu boe la kalam.» ²⁹ Ti yu'a deego gu'ura la wi yeti, ba tarı bugum wa'am. Dee ɛɛ tɔtɔ kɛ deego la puam ka lui Apoli la Asılaası nɛɲam gōgra la dabeem, ³⁰ isge tarı ba yese, soke ba yeti: «Buraası, mam wun ɛɛ la wāne yɛ fāare?» ³¹ Ti ba lerge ɛ yeti: «Bɔ Zuudāana Azezi sɛra, ti fōn na fu yir-dōma wuu wun yɛ fāare.» ³² Ti ba tɔge Zuudāana yetɔga bɔ ɛɲa la sɛba wuu n boe a yire la. ³³ La wakat-ɛɲa mɛɲa ti a tarı ba ka pe ba nōto la. La bilam zɛ'am ti ba mise ɛɲa la a yir-dōma wuu ko'om puam la Azezi yu'ure. ³⁴ Ti a tarı Apoli la Asılaası sɛɛ a

yire ka bɔ ba dia. Tɪ ɛŋa la a yir-dõma la wuu sũure daan ɛna yɛlum zozo'e, ban bɔ Nawɛnnɛ sɪra la ɪyã.

³⁵ La beere n wiige, tɪ seba n diti sarɪya la tɔm ba tɔn-tɔnɪba yetɪ, ba sɛŋɛ ka yele sɛka n gu'uri yu'a deego la yetɪ, a base buraasɪ la. ³⁶ Tɪ yu'a deego gu'ura la tɔge bɔ Apolɪ yetɪ: «Sariyaditba la bɔ nõore yetɪ, m base tɪ ya yese. Bɛla yese-ya fõrge la sũ-mã'asum.» ³⁷ Tɪ Apolɪ yele tɔntɔnɪba la yetɪ: «Tõma n de Rom tɛŋa nu'ugo nɛrba, tɪ ba ka di tõma sarɪya dee wɛ tõma, kɛ'esɛ tõma yu'a deem, yãŋa yetɪ ba li'ise base tõma? Ayɛɪ, ba mɛŋa wa'am wa yese to.» ³⁸ Tɪ tɔntɔnɪba la sɛŋɛ ka yele sariyaditba la bɛla. Tɪ dabeem kɛ ba, ban wõm tɪ Apolɪ la Asɪlaasɪ de la Rom tɛŋa nu'ugo nɛrba la ɪyã. ³⁹ Tɪ ba mɛŋa wa'am wa belem ba, botɪ ba yese, dee sose ba yetɪ, ba fõrge dee base ba tɛŋa. ⁴⁰ La ba yese yu'a deem na sɛŋɛ la Alidi yire ka tɔge bɔ Azezi karɛnbi-isi la buraane dee fõrge.

Yel-seba n ɛŋɛ Tesaloniki tɛŋam

17 Apolɪ la Asɪlaasɪ doose la Amfipoli, la Apoloni tɛnsum tole sɛŋɛ Tesaloniki, zɛ'e-ɛŋa Zifdõma wɛndeego n daan boe mɪ. ² Tɪ Apolɪ daan kɛ mɪ wu ɛ ɛn ita se'em na, tɔge bõn-seba n boe Nawɛnnɛ gõŋɔ puam na pa'ale ba vo'osgo dabsa atã. ³ A tɔge pa'ala ba yetɪ, la mase mɛ tɪ Krisi nãmse ki dee vo'oge. Dee yetɪ: «Azezi tɪ mam mõolɪ a yelle bɔ'ɔra ya wã de la Krisi la.» ⁴ Tɪ ba nɛrba baseba, la Grɛkɪdõma nɛrba zozo'e n pu'usɪ Nawɛnnɛ, la pɔgsɪ zozo'e n de nɛrzuto daan sake po dɔla Apolɪ la Asɪlaasɪ.

⁵ Tɪ Zifdõma daan ɛŋɛ sũure, sɛŋɛ da'am ka ɛ nɛrba n ka tarɪ võore lagse tɪ ba dãm tɛŋa la. Tɪ ba sɛŋɛ Aza-sõ yire ka ɛera Apolɪ la Asɪlaasɪ tɪ ba tarɪ ba sɛŋɛ tɛŋa la nɛrba zɛ'am. ⁶ La ba sɛŋɛ ka ɛ ka yɛ ba, yõkɛ Azasõ la Azezi karɛnbiisi baseba sɛŋɛ tɛŋa la kɛ'endõma zɛ'am ka tɪ tɔge yetɪ: «Nɛr-bãna wã eerɪ dãmna la dũnia wuu. La ban wãna n wa'am kalam, ⁷ tɪ Azasõ to'oge ba. Nɛr-bãna wã wuu sɪ'usɪ la Rom na-keko nõore yetɪ, naba ayɛma n boe tɪ a yu'ure dɛna Azezi.» ⁸ La kɛ'endõma la, la nɛr-kuuŋɔ la n wõm bɛla la, ba sũure isge mɛ. ⁹ Tɪ ba botɪ Azasõ la seba n dolɪ ɛ na bɪŋɛ ligri, dee tɪ ba base ba.

Apolɪ la Asɪlaasɪ sɛŋɛ Beere

¹⁰ La wɛnnɛ n daan sobe, tɪ Azezi karɛnbiisi la botɪ Apolɪ la Asɪlaasɪ sɛŋɛ Beere. La ban paage la, ba sɛŋɛ mɛ ka kɛ Zifdõma wɛndeem. ¹¹ La bãma tarɪ putɛ'e-sõnnɛ mɛ gãnna Zifdõma seba n boe Tesaloniki la, sake to'oge Nawɛnnɛ yetɔga la ba sũure wuu, dee daan karɛŋra Nawɛnnɛ gõŋɔ la daare woo tɪ ba bɪsɛ Apolɪ n yele se'em na de la sɪra bu la dagɪ sɪra. ¹² La ba nɛrba zozo'e, la Grɛkɪdõma pɔgsɪ n de yu'ure dõma, la buraasɪ zozo'e sake bɔ Azezi sɪra mɛ.

¹³ Tɪ Zifdõma seba n boe Tesaloniki la wõm tɪ Apolɪ mõolɪ Nawɛnnɛ yetɔga Beere, tɪ ba sɛŋɛ mɪ ka dãm nɛrba la, sa'ase ba la Apolɪ la Asɪlaasɪ. ¹⁴ Tɪ karɛnbiisi la ɛŋɛ tɔtɔ botɪ nɛrba baseba kɔlge Apolɪ sɛŋɛ ko-kãtɛ la nõorum. Dee tɪ Asɪlaasɪ la Atimõti weege Beere. ¹⁵ La seba n kɔlge Apolɪ la tarɪ ɛ paage la Atenɪ, tɪ Apolɪ soolum ba yetɪ, ba sãn paage, ba yele Asɪlaasɪ la Atimõti yetɪ, ba wa'am tɔtɔ.

Apolɪ boe Atenɪ mõola Nawɛnnɛ yetɔga

¹⁶ La Apolɪ daan boe la Atenɪ gu'ura Asɪlaasɪ la Atimõti. La a daan yɛ la бага n boe tɛŋa la puam zo-zo'e, tɪ a sũure sã'am. ¹⁷ Tɪ a sɛŋɛ Zifdõma wɛndeem ka tɔgra la Zifdõma, la seba n dagɪ Zifdõma dee pu'us-ra Nawɛnnɛ, dee tɔgra daare woo la nɛrba n boe da'am. ¹⁸ Tɪ bãŋrɪba daan bɔna mɪ tɔgra la Apolɪ, base-ba dolɪ la A'epikiri zãŋɔ, dee tɪ baseba dɔla Astoyisi zãŋɔ. Tɪ nɛrba baseba soke yetɪ: «Yetɔg-tɔgsa wã boorɪ tɪ a yetɪ bɛm?» Tɪ baseba yetɪ: «La ɛn wu a mõolɪ la wɛn-paalsɪ yelle la.» Se'ere n soe la, Apolɪ mõolɪ la Azezi kɔ-yɛlga, la kũm vo'ore yelle. ¹⁹ Tɪ ba tarɪ ɛ sɛŋɛ Arewopaazɪ zɛ'am ka yetɪ: «Tõma boorɪ la tɪ bãŋɛ zãŋɔ paalga sɛka tɪ fõn tɔgrɪ la võore. ²⁰ Fõn tɔge yel-seba tɪ tõma wõm wã de la yel-sãasɪ bɔ tõma, bɛla tɪ tõma bɔɔra tɪ bãŋɛ a võore.» ²¹ Wakatɛ wuu Atenɪ dõma, la nɛr-seba n kɛ'erɪ bilam na, tɔgrɪ la yel-paala dee selsra yel-paala.

²² Tɪ Apolɪ isge ze'ele Arewopaazɪ la tɛŋasuka yetɪ: «Atenɪ tɛŋa nɛrba, mam yɛ tɪ ya de la nɛrba n nã'asɪ бага zozo'e sela woo puam. ²³ Mam n gilge ya tɛŋa wã puam na, mam yɛ bõn-seba tɪ ya ɛŋɛ nã'asra mɛ, la mam yɛ la kãabgɔ bĩmbĩnne zuo tɪ la gulɛ yetɪ: «Wɛn-seka tɪ tõma ka mi.» Wɛn-seka tɪ yãma nã'asɪ dee ka mina ɛ na, tɪ mam mõolɪ bɔ'ɔra ya. ²⁴ Nawɛnnɛ ɛŋa n nãam dũnia la sela wuu n boe ba puam, ɛŋa n soe saazuum la tɛŋa. A ka kɛ'erɪ deego tɪ nɛrsaalba mɛ puam. ²⁵ Sela ka pɔ'ɔge ɛ tɪ a bɔɔra tɪ nɛrsaalba tɔm bɔ ɛ. ɛŋa n bɔ'ɔrɪ sela woo yõvore, la vo'osum, la sela woo. ²⁶ A nãam la nɛra ayɪla botɪ nɛrba buuri wuu n boe dũnia zuo ze'ele la ɛŋa zɛ'am. ɛŋa n make wakat-seba la zɛ'e-seba tɪ ba wun bɔna. ²⁷ A ɛŋɛ bɛla tɪ ba ɛ ɛ mɛ, ba sãn ɛera babla, tã tɪ ba wun yɛ ɛ. La a ka zãage la tɪ nɛra baa ayɪla. ²⁸ ɛŋa n botɪ tɪ bɔna, sɛnna dee tara vɔm, wu yãma Atenɪ so'olum nɛrba baseba n daan yetɪ:

«Tõma mɛ de la a kɔma.»

²⁹ Tõma n de a kɔma la, tɪ da tɛ'esɛ tɪ Nawɛnnɛ wõn na bõn-nãanɪsɪ tɪ nɛrsaalba dɪkɛ sãlma bu zũuro bu kuga tɛ'esɛ mãale la nu'usi. ³⁰ Nawɛnnɛ ka geele wakat-seka tɪ tõma daan ka mi la. La lɛɛɛ wã, a bɔ nõore zɛ'a woo yetɪ, nɛrba wuu teege yɛm base tɔon-be'ero. ³¹ Se'ere n soe la, a looge la daare tɪ a di dũnia nɛrba sarɪya, a

dēŋe looge la nēra, ēŋa n wun di nēba la wuu sariya la sira. A vo'oge nēr-ēŋa pa'ale ti la de la sira.»

³² Ban wōm ti Apoli tōgru kūm vo'ore yelle la, ti seba la'ara ē, dee ti baseba yetu: «Tōma wun le selse fu yetōg-bāna la da-se'ere.» ³³ Ti Apoli ze'ele ba zē'am fōrge. ³⁴ La nēba baseba daan doose ē me bō Azezi sira. Nēr-seba n daan bō sira la de la Adenisi, ēŋa de la Arewopaazi sariyaditba nēra ayula, la pōka ayula yu'ure n de Adamarisi, la nēba baseba.

Apoli boe Korēnti

18 Bela poorum, Apoli isge Ateni sēŋe la Korēnti. ² Ēn paage bilam na, a yē la Zifdōma buraa yu'ure n de Akila ti ba dōge ē Pō, ti ēŋa la a pōga Aprisili ze'ele Rom n boe Itali so'olum sēŋe paam, se'ere n soe la, na-keko Akloori n bō nōore ti Zifdōma wuu n boe Rom tēŋam fōrge. Ti Apoli sēŋe ba zē'am. ³ La bāma la Apoli tōoma daan de la buyula, ba pe'eri la futo ti ba da'ara tī'ira fuu-deto, bela iŋā ti Apoli kē'era bilam, ti ba lagum tōnna. ⁴ La Zifdōma vo'osgo daare woo Apoli sēnni ba wēndeem me tōgra Nawēnne yetōga bō'ora ba, mōrgra ti a boti Zifdōma, la Grekudōma sake Nawēnne yetōga la.

⁵ La Asilaasi la Atimōti n daan ze'ele Maseduanu paage la, Apoli daan base a tōoma la me, dee mōola Nawēnne yetōga la pa'ala Zifdōma ti Azezi n de Krisi ti Nawēnne tōm. ⁶ Ti ba si'ise dee tōgra ē tōg-be'ero. Ti a pīsūm a futo pa'ale ti ba ka ēŋe sōŋa, dee yele ba yetu: «Ya sān yē nāmsgo, ya yelle boe la ya mēŋa zuo, la dagi mam yelle. La zīna teka mam wun sēŋe la seba n dagi Zifdōma la zē'am.» ⁷ Apoli daan yele bela, dee yese me, sēŋe ka kē'era nēra ayula yu'ure n de Atitiyusi-zustusi yire. A de la bu-zāŋka dee pu'usra Nawēnne, ti a yire lem Zifdōma wēndeego la. ⁸ La Akrispusi n de wēndeego la nējadāana, la a yir-dōma wuu daan bō Zuudāana Azezi sira me. La Korēnti nēba zozo'e n daan selsi kō-yēlga la, mē bō sira me, ti ba mise ba ko'om puam.

⁹ Ti daare ayula yu'urō, ti Apoli yē wu zāasŋo la, ti Zuudāana yele ē yetu: «Da zoe dabeem sīna, ken tōgra, ¹⁰ ti mam boe la fu me, nēra nēra kān tā'age ēŋe fu be'em. Se'ere n soe la, tēŋa wā puam nēba zozo'e de la mam nēba.» ¹¹ Apoli zī'ire bilam na yuune la wōrsyoobi zāsna nēba Nawēnne yetōga.

¹² La wakat-seka ti Agaliyō daan de Akayi so'olum gōmna la, Zifdōma daan isge naage la taaba dōre Apoli taru ē sēŋe sariyadia zē'am, ¹³ ka yetu: «Ēna wā n mōrgru nēba ti ba pu'use Nawēnne se'em na si'isri la tōma loo.» ¹⁴ Ti Apoli daan bōna mī ti a tōge, ti Agaliyō yele Zifdōma la yetu: «La sān de ni na sela n ka mase bu tōon-be'ero ti a ēŋe, mam wun mōrge selse yāma Zifdōma. ¹⁵ La, la sān dena ya wē'eri la nōke'ene la yetōga, la yu'ura, la ya mēŋa loo yela, ya mēŋa bise

bōn-bāma yelle. Ti mam kān di bōn-ēŋa sariya.» ¹⁶ A yele bela, dee dige ba sariya zē'am na me ti ba yese. ¹⁷ Ti ba wuu yōke Asosteni n de Zifdōma wēndeego nējadāana wē ē sariyadia la zē'am. La Agaliyō toogo ka boe la ban ēŋe se'em na.

Apoli lebe Antiyōsi n boe Siiri

¹⁸ La Apoli ken zī'ire Korēnti la dabsa zozo'e la karēnbiisi la le, dee keese ba ti ba sēŋe Siiri. Ti Aprisili la Akila doose ē. La ban daan paage Sānkre la, Apoli dēŋe siige la a zuugo, se'ere n soe la, a bīŋe la nōore la Nawēnne. Dee ti ba yāŋa kē ōorŋo sēŋe ¹⁹ ka paage Efēezi, ti Apoli base Aprisili la Akila bilam. A sēŋe ka kē la Zifdōma wēndeem tōge la ba. ²⁰ Ti ba sose ē yetu, a weege ba zē'am yuuge. Ti a zagse, ²¹ dee keese ba yetu: «Nawēnne sān sake, m wun leme ya zē'am.»

La a daan kē la ōorŋo Efēezi, ²² sēŋe Sezaare ka sige bilam, sēŋe Zerizalem ka pu'use Azezi nēr-seba n boe bilam na, dee sēŋe Antiyōsi. ²³ La a yuuge bilam me fēe, dee yese e Galati la Frizi pa'ase karēnbiisi la wuu pāŋa.

Apolōsi boe Efēezi la Korēnti tēnsu

²⁴ La Zifu buraa yu'ure n de Apolōsi ti ba dōge ē Alegsāndri n wa'am Efēezi, a de la tōg-mita dee mina Nawēnne gōŋo sōŋa. ²⁵ Ba daan pa'ale ē Zuudāana Azezi sore yela me, ti a daan zāsna nēba so-ēŋa yela sōŋa la a sūure wuu. La a daan mi la Azā ko'om misga la mā'a. ²⁶ Ti a daan tōgra Zifdōma wēndeem la buraane. La Aprisili la Akila n wōm ēn tōgru la, ti ba taru ē sēŋe ka pa'ale ē Nawēnne sore la yela sōŋa pa'ase.

²⁷ Ti a bōora ti a sēŋe Akayi, ti Azezi karēnbi-seba n boe Efēezi la gulse gōŋo bō Azezi karēnbiisi la n boe Akayi la yetu, ba to'oge ē sōŋa. La ēn paage bilam na, a sōŋe seba ti Nawēnne daan bō ba a yel-sōnne ti ba bō ē sira la me zozo'e. ²⁸ La a daan dūke la Nawēnne gōŋo tōge yāŋe Zifdōma nēba wuu nēŋam, pa'ale ba ti Azezi de la Krisi ti Nawēnne tōm.

Apoli boe Efēezi

19 La Apolōsi n daan nān boe Korēnti la, Apoli doose la tānsi zuo tēnsi la wuu puam tole, sēŋe ka paage Efēezi yē karēnbiisi baseba bilam, ² soke ba yetu: «Yāma n bō Azezi sira la, yāma to'oge Nawēnne Sia me bu?» Ti ba lerge yetu: «Ayei, tōma nān ka wōm ti Nawēnne Sia boe.» ³ Ti Apoli soke ba yetu: «Ko'om misga kāna ti yāma to'oge?» Ti ba lerge yetu: «Tōma to'oge la Azā ko'om misga.» ⁴ Ti Apoli yele ba yetu: «Azā daan misri nēba ko'om puam pa'ala ti ba teege la yem base tōon-be'ero. A daan yetu nēba la, ti nēra n weege ēŋa poorum sēna, ba doose ēŋa. Nēr-ēŋa de la Azezi.» ⁵ La ban wōm bela la, ba boti ba mise ba ko'om puam me Zuudāana Azezi yu'ure iŋā. ⁶ Ti Apoli dūke a

nu'usi pagle ba zuto, ti Nawēnne Sia wa'am ba zuo, ti ba tōgra yetōg-zāṅsi dee to'oge Nawēnne yetōga tōge bō nērba. ⁷ Ba daan de wu nērba pia la ayi.

⁸ Apoli daan kē Efēzi la wōr-sitā, daan kē'era Zifdōma wēndeem mōola Nawēnne yetōga la buraane bō'ora nērba, dee mōrge pa'ale ba Nawēnne so'olum yela ti ba sake. ⁹ Ti baseba daan ke'em ba sūure ka sake, dee tōgra Zuudāana sore la tōg-be'ero nērba nēṅam. Ti Apoli base ba dee welge karēnbiisi la fōrge. Ti daare woo ti a zāsna ba Atiranusi karēndeego puam. ¹⁰ A ēṅe bela la yuuma ayi. La nēr-seba wuu n boe Azi tēnsu na wōm Zuudāana yetōga me, Zifdōma, la bu-zāṅsi wuu.

Aseewa dayccsi yelle

¹¹ La Nawēnne daan base ti Apoli tōm na tōon-yālm-kāra. ¹² La ba daan sān ēn dīke ānkura bu futo n kalum a iṅā taru sēṅe ka kalum bā'adōma, ba yeti iṁā'asum me, ti kulkā'arsi yesra dee basra ba.

¹³ Ti Zifdōma baseba n daan gilgri digra kulkā'arsi nērba zē'am, daan make ti ba dige kulkā'arsi la Zuudāana Azezi yu'ure, yele ba yeti: «Mam yeti ya la Azezi seka ti Apoli mōoli la yu'ure ti ya yese.» ¹⁴ Ba daan de la Aseewa n de Zifdōma kāabgo kēma nēṅadāana dayccsi bayopci n iti bela. ¹⁵ Ti kulkā'arga lerge ba yeti: «Mam mi Azezi me, dee mina Apoli n de seka, la yāma de la āndōma?» ¹⁶ Ti kulkā'arga la n taru seka la isge zēbe ba la pāṅa yāṅe ba wuu, ti ba ze'ele yire la zoe yese beela la pōgluṅ.

¹⁷ Ti Zifdōma, la bu-zāṅsi la wuu n boe Efēzi la wōm yel-ēna wā. Ti dabeem kē ba wuu, ti ba pēgra Zuudāana Azezi yu'ure. ¹⁸ Ti nērba zozo'e bō Azezi sira wa'am wa pelge ba pua tōge ba tōon-be'ero nērba nēṅam. ¹⁹ Ti ba zozo'e n taru ba gōṅṅo tōṅna tum tōoma la, lagse ba yō la bugum nērba la wuu nifum. Ti ba geele gōṅṅo na wuu ligri, ti ba de la lig-kōba tuspinnu. ²⁰ La Zuudāana n pa'ale a pāṅa bela la, ti a yetōga la saara zē'a wuu dee yetā pāṅa.

Efēzi dōma dāmṅo yelle

²¹ Bela poorum ti Apoli tē'ese a sūurum yeti, ēṅa wun sēṅe la Maseduanu, la Akayi ka ze'ele bilam sēṅe Zerizalem, dee yeti: «Mam sān paage bōna Zerizalem, dēni ti mam paage Rom.» ²² La a tōm na Atimōti, la A'erasti n de a sōṅrība ti ba sēṅe Maseduanu, dee weege a mēṅa Azi yuuge fēe.

²³ La wakat-ēṅa dāmṅo zozo'e n isge Efēzi Zuudāana Azezi sore la doosgo yelle. ²⁴ La bura n daan de kuta, ti a yu'ure dena Ademetrisi. A daan taru la zūuro kuta bōndōma ti ba wōna la ba wēnne Artemisi deego la. Ti zūuro tōntōnība la daan yē yōro zozo'e tōon-ēṅa puam. ²⁵ Ti Ademetrisi lagse ba, la seba wuu n tōnni tōon-ēṅa buuri, yele ba yeti: «Buraasi wā, ya mi ti

tōon-ēna wā puam ti ti yeti bōntarsōm. ²⁶ Ya mēṅa wōm dee yē Apoli n iti se'em. A pa'ali nērba ti wēn-seba ti nērsaalba ēṅe la ba mēṅa nu'usi la dagi wēna sira sira. A ēṅe bela mōrge teege nērba zozo'e putē'era me Efēzi kalam, la, la dee la fēe ti a paage Azi tēnsi wā wuu puam. ²⁷ Bōn-ēna wun boti tōma tōone na sā'am me. La sela n pa'ase, wēn-kāte Artemisi deego la wun lebge la zāṅa, la Artemisi mēṅa ti Azi nērba, la dūnia nērba wuu nā'asri la, pāṅa wun sā'am me.»

²⁸ La ban wōm yetōg-bāna la, ba sūa yīge me ti ba tīi tōge yeti: «Efēzi dōma wēnne Artemisi n taru pāṅa.»

²⁹ Ti tēṅa la wuu dāme. Ti nērba la yōke Agayusi la Aristarku taru ba zoe sēṅe lagsgo zē'am, bāma bayi de la Maseduanu nērba n doli Apoli. ³⁰ Ti Apoli bōora ti a kē nēr-kuuṅo la zē'am, ti karēnbiisi la ka sake. ³¹ Ti Azi tēṅa nēṅadōma baseba n de a sirdōma tōm nērba yeti, ba wa'am a zē'am wa belem ē yeti, a da sēṅe lagsgo zē'am na. ³² Ti nēr-kuuṅo la lagum vōola zozo'e, ti nēra woo tōgra ēṅa n tē'ese se'em, ti ba zozo'e ka mina bōn-seka n boti ba lagse. ³³ Ti Zifdōma looge Aleṅsāndru ti a sēṅe nērba la nēṅam ka tōge, ti nērba la baseba pa'ale ē yelle la vōore. Ti Aleṅsāndru ylbse la nu'usi ti a tōge yelle la pa'ale nērba la. ³⁴ La ban bāṅe ti a de la Zifu la, ti ba wuu lagum taaba tīi kaase yeti: «Efēzi dōma wēnne Artemisi n taru pāṅa.» Ba kaase bela paage karf-ayi.

³⁵ Ti tēṅa la gōn-gulsa boti ba go'oge, ti a yele ba yeti: «Efēzi nērba, dūnia nērba wuu mi me ti wēn-kāte Artemisi pu'usgo deego la boe la Efēzi kalam, la tōma n de a pu'usgo deego la gu'urba, la kugre la n wōn na Artemisi ze'ele saazuum lui la gu'urba. ³⁶ Nēra nēra kān yāṅe si'ise yel-ēna. Bela iṅā, go'oge-ya voole, da lōge-ya ēṅe sela n ka mase. ³⁷ Yan taru nēr-bāna wa'am kalam wā, ba ka yele ti wēnne na yel-be'ego, la ba ka kē a pu'usgo deem na ēṅe sela n de be'em. ³⁸ La Ademetrisi la a tōntōnība la sān tara yelle la nēr-seka, sarlyadia daare boe me, la sarlyaditba mē boe me. A sān bōora, a taru ba sēṅe bilam ka sām. ³⁹ La ya sān yē la yel-seka ti ya bōora ti ya malge, tēṅa la nērba lagsgo daare, ti wun malge. ⁴⁰ Yāma n ēṅe sela zīna wā wun wa'am na yelle, ti ba wun dōre ti yeti, ti gire la tēṅa. La ti kān yāṅe pa'ale sela n boti ti lagse gire girga la. La ti kān yāṅe tōge la vōore sōṅa.» ⁴¹ Eṅa n yele bela ki'ulum na, dee yele ba ti ba wurge.

Apoli sēṅe Maseduanu

20 Lan daan gire mā'age la poorum, ti Apoli boti Azezi karēnbiisi la lagse, ti a tōge bō ba buraane, keese ba dee we'esa Maseduanu. ² La ēn daan doli so'olum ēṅa tēn-seba puam tōlla la, a tōge yetōga zozo'e me bō karēnbiisi la buraane. Dee yāṅa tole ka paage Gresi. ³ La ēn paage bilam na, a zī'ire mī na wōr-sitā, māasum ti a kē ōorṅo sēṅe Siiri, wōm ti Zifdōma

doli la a nāma. Tl a tē'ese yetl, ēnja wun lebe doose la Maseduanl.

⁴ Sēba n daan doli ē na de la: Apirusi bia Asopatēerl n ze'ele Beere, la Aristarkl la Asekōndusi n ze'ele Tesa-loniki, la Agayusi n ze'ele Derbl, la Atisiki la Atrofim n ze'ele Azi, pa'ase la Atimōtl. ⁵ Nēr-bāna wā daan dēnje tole la nēnja ka gu'ura tōma Truasl. Dee tl tōma sēnje Filipi tējam. ⁶ La borborl n ka tarl dābille kibsa la poorum, tl tōma kē ōorŋj Filipi, tl dabsa anuu daare tl tōma paage sēba n boe Truasl gu'ura tōma la zē'am, zī'ire bilam dabsa ayopɔl.

Apoli boe Truasl

⁷ La vo'osgo daare ayula yu'urŋj, tl tōma lagse tl tl di, dee fiise borborl. Tl Apoli daan isge tɔgra Nawēnne yetɔga la nērba la hal ka paage sōnsua, se'ere n soe la, a boorl tl beere sāl wiige, a fōrge mē. ⁸ La fitladōma zozo'e n daan boe saazuum deto batā dāana la tl tōma lagse a puam na. ⁹ Tl budib-polle yu'ure n de A'etikusi zēa deego la takolle zuo. La Apoli n tɔge yu-uge la, tl gēem yōke ē, tl a gīse. La a gīse la gē-bergo ze'ele saazuum deego la tl tōma boe mī na lui tēnja. Tl ba zēke ē, tl a ki mē.

¹⁰ Tl Apoli sige yigle ōbge ē zāla a nu'usum, dee yetl: «Da fabla-ya, a vɔa mē.» ¹¹ A yele bela dee lebe zom ka fiise la borborl obe, dee tɔge la ba yuuge hal ka paage bewiine, dee yānja fōrge. ¹² La budibla la vɔa mē, tl ba tarl ē kule. Tl la ēnje nērba la sūure yēlum hal zozo'e.

Apoli sēnje Miletl

¹³ La tōma kē la ōorŋj dēnje Apoli sēnje Asɔsl, a daan yetl a sēnje la nāma wa yake tōma bilam. ¹⁴ La ēn yake tōma Asɔsl la, a kē la ōorŋj, tl tōma sēnje Mitilenl. ¹⁵ La tōma ze'ele la bilam doose ko'om na puam, tl beere wiige, tl tōma paage Kiyo zanō-bɔba. Tl beere le wiige, tl tōma doose Samōsl. Tl beere le wiige, tl tōma paage Miletl. ¹⁶ La Apoli daan looge yem tl a ka gōlge sēnje la Efēezl, se'ere n soe la, a daan ka boorl tl a gu'um a mēnja Azi so'olum na puam, a daan kābl mē tl a paage Zerizalem dee tl Pāntekɔtl daare la paage.

Apoli tɔge bɔ Efēezl kēma

¹⁷ Tl Apoli ze'ele Miletl soolum Efēezl yetl, ba wi Azezi nēr-kuurŋj la kēma tl ba wa'am. ¹⁸ La ban paage a zē'am na, a yele ba yetl: «Yāma mi mam daan ān se'em, wakat-seka wuu tl mam daan boe la yāma la mē, lan pī'ilum na daar-seka tl mam wa'am Azi so'olum puam na. ¹⁹ Mam sike m mēnja mē tōm Nawēnne tōoma la nintām, baa nāmsgɔ seka tl mam yē Zifdōma n doli mam nāma la puam. ²⁰ Mam mōole bōn-seba n wun sōnje ya mē pa'ale ya nērba sukam la ya yie puam, ka suge sela sela. ²¹ Mam tɔge pa'ale Zifdōma, la bu-zāŋsl mē yetl, ba teege yem base tōon-be'ero, sake

doose Nawēnne, dee bɔ tl Zuudāana Azezi sira. ²² La lēele wā, mam sake Nawēnne Sla nōore mē yetl m sēnje Zerizalem, la mam ka mi bōn-seka n wun ka ēnje mam mī. ²³ La mam n mi se'em na, Nawēnne Sla pa'ale mam mē tēn-seba wuu puam tl mam sēnje la, tl ba wun nāmse mam mē dee kē'ese mam yu'a deem. ²⁴ La mam ka geele m mēnja yōvore la tl a tarl yōorɔ bɔ mam, sela n tarl yōorɔ bɔ mam de la mam yānje tōm m tōone na tl Zuudāana Azezi bɔ mam na ba'ase. Tōon-ēnja de la mam mōole Nawēnne yel-sōnne na kō-yēlga.

²⁵ La lēele wā, mam mi tl ya kām le yē mam, yāma se-ba wuu tl mam mōole Nawēnne so'olum yela ya zē'am na. ²⁶ Bela īyā mam yetl ya mē zīna, tl ya nēr-seka sāl kōnje vɔm Nawēnne zē'am, a taale ka boe mam zuo.

²⁷ Se'ere n soe la, mam mōole Nawēnne n boorl se'em na wuu bɔ ya mē, ka suge sela sela. ²⁸ Tara-ya ya mēnja, la nēr-seba wuu tl Nawēnne Sla gu'ule ya la sōnja. Bɔs-ra-ya Nawēnne nērba la tl a fāage la a Bia zum tl ba dena a mēnja nērba la sōnja. ²⁹ Mam mi tl mam sāl fōrge deege, nēr-be'esl n wun wa'am ya zē'am wa sāl'am ya, wu saasaadōma n yōgrl dūnsi se'em na. ³⁰ La nērba baseba wun wa isge ya puam tɔgra pōmpɔrŋj yetɔga, pā'ase karēnbiisi la tl ba doose ba. ³¹ Bela īyā, guuse-ya ya mēnja, dee tēra tl yuuma atā, mam kā'an ya nēra woo wunteenja la yu'urŋj mē, la nintām ka base.

³² La lēele wā, mam dke ya ēnje la Nawēnne nu'usum, la a yel-sōnne yetɔga la puam. ēnja n tā wun sōnje ya tl ya yē pānja pa'ase, dee wun botl ya po lagum to'oge bōn-sōma tl a bīnje tl a bɔ a nērba la. ³³ Mam daan ka tarl yemleego la nēra nēra ligri, la a sālma, bu a futo. ³⁴ Ya mēnja mi tl mam dke la m nu'usi tōm bise m mēnja la seba n doli mam na. ³⁵ Mam ēnje bela wuu pa'ale ya tl dēnl ya tōm sōnje tarumdōma. La ya tēra Zuudāana Azezi n yele se'em na, a daan yetl: «Seka n bɔ'ɔrɔ tarl sū-yēlga zozo'e gānna seka n to'orl.»

³⁶ La Apoli n daan tɔge kɔ'ulum na, ēnja la ba wuu ka la dūma tēnja, tl a pu'use Nawēnne. ³⁷ Tl ba wuu tīi kella, dee kōke Apoli mōbge ē. ³⁸ Ba sūure n daan sāl'am zo-zo'e, ēn yetl ba kām le yē ē na īyā. La ba kōlge ē mē sēnje ka paage ōorŋj la zē'am.

Apoli we'esl Zerizalem

21 Tl tōma keese ba, dee kē ōorŋj sēnje tēntēa ka paage Kɔsl. Tl beere wiige, tl tōma paage Rɔdl ze'ele bilam sēnje Patara. ² La bilam tl tōma yē ōorŋj ayēma n we Fenisi. Tl tōma kē sēnje. ³ La tōma daan sēnje mē ka tūule yēta Sipri, la tōma daan base Sipri tēnja la gɔbga bɔba, dee tole ka paage Siiri so'olum sige Tiiri. Bilam tl ba yetl ba sike ōorŋj la lɔgrɔ.

⁴ Tl tōma sige sēnje ka yē Azezi karēnbiisi bilam, zī'ire la ba lē dabsa ayopɔl. Tl ba yele Apoli la Nawēnne Sla pānja yetl, a da sēnje Zerizalem. ⁵ La dabsa ayopɔl la daare, tl tōma isge tl tl tole, tl bāma la ba pɔgba, la ba

kõma wuu kõlge tõma yese tõnja la kēnkernja. Tl tõma wuu ka dūma ko-kāte la nõorum pu'use Nawēnne, ⁶ dee keese taaba. Tl tõma yānja kē õorņ, dee tl ba lebe kulla.

⁷ La tõma ze'ele Tiiri sēnje la Tolemas ka pu'use Azezi karēnbi-seba n boe bilam na, dee ēnje daare ayļa ba zē'am. ⁸ Tl beere wiige, tl tõma ze'ele bilam sēnje Sezaare ka sige Afilipi yire kē'era bilam. Afilipi daan de la nērba bayopci la tl ba daan looge Zerizalem na nēra ayļa, a daan mõoli la Azezi kõ-yēlga. ⁹ A daan tarl la poyccsi banaasi n ka mi buraasi, ba daan to'osri la Nawēnne yetoga tōgra bō'ora nērba.

¹⁰ Tõma daan ēnje bilam na dabsa faa, tl Nawēnne nōtō'usa yu'ure n de Agabisi ze'ele Zude wa'am, ¹¹ wa paam tõma zē'am wa fooge Apoli sagānne lu a mēnja nāma la a nu'usi, dee yetu: «Nawēnne Sia yele la wāna yetu: «Zifdōma wun lu sagān-ēna wā dāana la wāna Zerizalem, dūke ē ēnje bu-zāņsi nu'usum.»» ¹² La tõma n wōm bela la, tl tõma la nēr-seba n boe bilam na, daan belna Apoli yetu, a da sēnje Zerizalem. ¹³ Tl a lerge tõma yetu: «Bēm tl ya kaasri sā'ana m sūure? Mam sake me tl ba lu ma, la dagi bela mā'a, baa mam sān wun ki Zerizalem Zuudāana Azezi yu'ure iŷā, mam ken sake me.» ¹⁴ La tõma n kān yānje boti a sake bō tõma la iŷā, tl tõma koņe yele ē yetu: «Zuudāana n boori se'em ēnje.»

¹⁵ Bela poorum tl tõma daan yānja māasum we'esa Zerizalem. ¹⁶ Tl Sezaare tõnja karēnbiisi baseba kõlge tõma sēnje Aminasō yire, bilam tl tõma wun ka gā'are. Aminasō de la Sipri nēra, a de la Azezi karēnbia hal kurum kurum.

Apoli sõse la kēma Azaki yire

¹⁷ La tõma n paage Zerizalem na, tl sobiisi la to'oge tõma la sū-yēlga. ¹⁸ Tl beere wiige, tl tõma doose Apoli sēnje Azaki yire. Tl Azezi nēr-kuuņ kēma la wuu wa'am mī. ¹⁹ Tl Apoli pu'use ba, dee tōge pa'alē ba bōn-seba wuu tl Nawēnne ēnje bu-zāņsi la tēņasuka ēnja tōone na puam. ²⁰ La ban wōm bela la, ba pēge Nawēnne me, dee yele Apoli yetu: «Tl sobia, fōn yē Zifdōma tusa tusa n bō Azezi sira se'em dee mōrge sakra Amoyisi lō sōņa sōņa. ²¹ Ba wōm tl ba yetu, fōn zāsnl Zifdōma seba wuu n boe bu-zāņsi tēnsum na, yeta tl ba base Amoyisi lō, la ba da wāta ba kōma, la ba da dōla Zifdōma dōgmike. ²² Ba wun wōm tl fōn wa'am me, tl wun ēnje la wāne? ²³ Ēnje tõma n wun yetu fu ēnje se'em na. Nērba banaasi n boe tõma zē'am kalam bīnje nõore la Nawēnne. ²⁴ Tarl ba sēnje ka lagim na ba malge fu mēnja Nawēnne zē'am, dee yō, ba wun yō se'em na bō ba tl ba siige ba zuto. Bela wun boti nērba wuu bānje tl fōn mēnja doli la Amoyisi lō la, la ban tōge fu yelle se'em na wuu dagi sira. ²⁵ La sān dena bu-zāņsi la n bō Azezi sira la yelle, tõma daan looge yem gulse gōņ yele ba yetu: «Ba da

dita di-seba tl ba kāabe bō бага, la ba da di zūm, la ba da di sela tl ba tēge ku. La ba da tōnna yalsi tõoma.»»

²⁶ Ban yele bela la, tl beere wiige, tl Apoli tarl nērba banaasi la sēnje tl ba ka lagim malge ba mēnja Nawēnne zē'am, dee tl a sēnje ka kē Wēnde-kātum na, tōge pa'alē dabsa se'em n deege tl ba wun malge ba mēnja kī'ulum, dee tl ba yānja kāabe bō Nawēnne nēra woo iŷā.

Ba yōke Apoli Wēnde-kātum

²⁷ La dabsa ayopci la n dee fēe la a ba'ase la, tl Zifdōma ze'ele Azi so'olum wa'am wa yē Apoli Wēnde-kātum na, boti nērba la sūnsōa yīige la Apoli, tl ba yōke ē, ²⁸ dee tīi tōgra yetu: «Israyeli dōma, sōņe-ya tō! Bura-ē-na wā gilgri la tēnsi wuu zāsna nērba tl ba si'isra Israyeli dōma ka dōla Amoyisi lō, dee tōgra Wēnde-kāte la tōg-be'ero. A tarl la nērba n dagi Zifdōma wa'am wa kē Wēnde-kāte la puam dēge Nawēnne zē'e-sōņ la.» ²⁹ Se'ere n soe la, ba daan yē la Efēzli nēra Atrofim n doli Apoli tēnja la puam, tl ba tē'esē tl a doose ē kē la Wēnde-kāte la puam. ³⁰ Tl tēnja la daan gire, tl nērba wuu zoe lagse taaba yōke Apoli ve'ege ē Wēnde-kātum na yese. Dee yu zanōa la tōtō.

³¹ Tl ba daan zūgra tl ba ku Apoli. Tl Rom sudaasi ke'endōma ke'ema wōm tl Zerizalem tēnja wuu gire me. ³² Tl a kō'cn doose sudaasi, la ba ke'endōma tl ba zoe sēnje nērba la zē'am. La ban yē sudaasi ke'endōma ke'ema, la sudaasi la, tl ba base ka le wē'era Apoli. ³³ Tl sudaasi ke'endōma ke'ema la paage yōke Apoli, dee bō sudaasi la nõore yetu, ba ba ē na bānsi bayi. Dee tl a soke bānje ēn de nēr-seka, la ēnja n ēnje sela. ³⁴ Tl nēr-kuuņ la tāsra yēma yēma, hal tīi vōla tl sudaasi ke'endōma ke'ema la ka tā'age wōm sela n ēnje, tl a bō sudaasi la nõore yetu, ba tarl ē sēnje bāma yi-kāte la puam. ³⁵ La ban tarl ē paage bīmīna la n zonn kē'era deego la puam na, ba buke ē me, nērba la n ba gita la iŷā. ³⁶ Tl ba wuu dōla tōgra ke'enke'em yetu: «Ku-ya ē.»

Apoli tōge tl a to'oge a mēnja

(Tõoma 9:1-19;26:9-18)

³⁷ La ban yetu ba kē'esē Apoli sudaasi la yire la, tl Apoli soke suda-ke'ema la yetu: «Mam tarl nõore tl m yele fu sela me bu?» Tl ke'ema la soke ē yetu: «Fōn wōnni Greki yetoga me? ³⁸ Bela fōn dagi Ezipti nēr-seka n daan sa'ase nērba la gōmna, dee daan doose nēr-kuurba tusanaasi sēnje weem na?» ³⁹ Tl Apoli lerge ē yetu: «Ayel, mam de la Zifu, mam ze'ele la Tarsi n boe Silisi so'olum. Mam de la tēn-ēnja n tarl yōorj la nēra. Mam sosri fu me, bō mam sore tl m tōge la nērba la.» ⁴⁰ Tl ke'ema la bō ē nõore. Tl Apoli ze'ele bīmīna la zuo zēke a nu'ugo. Tl nērba la āna sīm. Tl a tōge Ebre n de ba mēnja yetoga bō ba.

22 A yele ba yetu: «M sɔdõma la m sɔbiisi, selse-ya mam n yetu m tɔge se'em to'oge m mēŋa ya nēŋam.»

² Ban wõm tɪ a tɔgrɪ la Ebre yetɔga bɔ'ɔra ba la, tɪ ba go'oge malun selsra ē. Tɪ a yetu: ³ «Mam de la Zifu, ba dɔge mam na Tarsɪ n boe Silisi so'olum puam na, uge mam Zerizalem kalam. Tɪ Agamalyelɪ zāsum mam tɪ yaabdõma lɔɔ la sõŋa sõŋa. Mam daan wɪsge m mēŋa mē la Nawēnne tōone, wu yāma n wɪsge ya mēŋa se'em zīna wā. ⁴ La mam daan nāmse seba n doli Azezi sore la mē zozo'e, yōge buraasi la pɔgsɪ botɪ ba kē'ese ba yu'a deem, dee ku baseba. ⁵ Nawēnne kāabgɔ kēma nēŋadāana, la kēma la wuu n tā wun yetu, mam n tɔge se'em na de la sɪra. Mam daan to'oge gōnɔ mē ba zē'am wē'esa tɪ m ka bɔ Zifdõma seba n boe Damaasi la, dee yōge so-ēŋa karēnbiisi la n boe mī na, tarɪ ba sēŋe Zerizalem ka nāmse ba.

⁶ La mam daan boe la sore wē'esa ka lem Damaasi, la daan mase wu wunteŋa wēnne zuu-tēŋasuka, tɪ peelem daan ze'ele saazuum dare wa nēge zozo'e gilge mam. ⁷ Tɪ mam lui tēŋa, wõm kōa n yele mam yetu: «Asoli, Asoli, bēm tɪ fu nāmsra mam?» ⁸ Tɪ mam lerge yetu: «Zuudāana, fõn de la āne?» Tɪ a lerge mam yetu: «Mam de la Azezi n de Nazaretɪ nēra la tɪ fu nām-sɪ.» ⁹ Tɪ nēr-seba n daan doli mam na yē peelem na, dee ka wõm kōa la n tɔgrɪ la mam na. ¹⁰ Tɪ mam soke yetu: «Zuudāana, fõn yetu m ēŋe la wāne?» Tɪ Zuudāana la yele mam yetu: «Isge sēŋe Damaasi, tɪ ba wun ka yele fo sela wuu tɪ Nawēnne bɔ nõore yetu fu ēŋe.» ¹¹ La peelem na yālge mam nini mē tɪ mam ka yēta. Tɪ seba n daan doli mam na ve'ege mam tɪ tõma sēŋe Damaasi.

¹² La buraa n daan boe mī tɪ a yu'ure dena Ananiyasi. A daan sakɪ la Nawēnne lɔɔ sõŋa sõŋa, tɪ Zifdõma seba n boe Damaasi la wuu tɔgra a yelle sõŋa. ¹³ Tɪ a wa'am wa ze'ele lem mam zē'a yele mam yetu: «M sɔbia Asoli, le yēta.» Tɪ mam nini le yēta wakat-ēŋa mēŋa, tɪ mam yē ē. ¹⁴ Tɪ a yele mam yetu: «Nawēnne tɪ tõma yaabdõma yuun pu'usɪ la n looge fo tɪ fu bāŋe ēn boorɪ se'em, la fu yē sɪra dāana la, dee tɪ a tɔge la a mēŋa nõore bɔ fɔ, ¹⁵ tɪ fu wun dena a kaset-dāana yele nērba wuu, fõn yē dee wõm se'em na. ¹⁶ La lēle wā, bēm tɪ fõn gu'una? Isge pu'use la Azezi yu'ure, botɪ ba mise fu ko'om puam tɪ Nawēnne base fu tōon-be'ero taale.»

¹⁷ La bela poorum mam daan lebe la Zerizalem ka bɔ-na Wēnde-kāte la puam pu'usɪra, yē Zuudāana wu zāasŋa la, ¹⁸ tɪ a yele mam yetu: «Ŋe tɔtɔ yese Zerizalem, se'ere n soe la, tēŋa la nērba kān sake fõn wun tɔge mam yelle bɔ ba la.» ¹⁹ Tɪ mam lerge ē yetu: «M Zuudāana, nērba wā mi mē tɪ mam n daan sēnnɪ ba wēndeto puam yōgra nēr-seba n bɔ fõn sɪra la, botɪ ba wē'era ba, dee kē'esra ba yu'a deto puam. ²⁰ La wakatseka tɪ ba daan ku A'etienɪ n tɔge fõn yela bɔ nērba la,

mam daan boe mī mē sake tɪ a kūm na mase mē, dee daan gu'ura seba n ku ē na futo.» ²¹ Tɪ Zuudāana la yele mam yetu: «Sēŋe, mam yetu m tõm fu la bu-zāŋsɪ zē'am zāazāare.» »

²² La nērba la daan selsɪ Apolɪ yetɔga la mē, la ēn wa tɔge bu-zāŋsɪ yelle la, tɪ ba tɔgra ke'enke'em yetu: «Kuya ē, nēr-ēna ka narɪ a bɔna dūnia zuo.» ²³ Tɪ ba kaasra tagursi yeesra ba futo lɔbra, dee vaara tēntōnnɔ lɔbra saazuum.

²⁴ Tɪ sudaasi ke'endõma ke'ema la bɔ sudaasi la nõore yetu, ba botɪ Apolɪ kē bāma yi-kāte la puam tɪ ba wē ē na ka'asa, dee soke ē bāŋe, bēm n soe tɪ ba tīi kaasra ēŋa īyā bela. ²⁵ Tɪ ba lu ē yetu ba wē ē na ka'asa, tɪ a soke suda-ke'ema la n ze mī na yetu: «Sore boe tɪ ba wē Rom tēŋa nu'ugo nēra dee nān ka di a sarɪya?»

²⁶ La suda-ke'ema la n wõm bela la, tɪ a sēŋe sudaasi ke'endõma ke'ema la zē'am ka soke ē yetu: «Fu wun ēŋe la wāne? Buraa wā de la Rom tēŋa nu'ugo nēra.»

²⁷ Tɪ sudaasi la ke'endõma ke'ema la sēŋe Apolɪ zē'am ka soke ē yetu: «Yele ma: Fõn sɪrɪ de la Rom tēŋa nu'ugo nēra?» Tɪ a lerge yetu: «Ēe!» ²⁸ Tɪ sudaasi ke'endõma ke'ema la yetu: «Mam mēŋa yɔ la ligri zozo'e dee lebge Rom tēŋa nu'ugo nēra.» Tɪ Apolɪ yetu: «Ba kɔ'ɔn dɔge mam tɪ mam dena la Rom tēŋa nu'ugo nēra.» ²⁹ Tɪ seba n yetu ba wē ē na ka'asa la vuta lɔbra poorum. Tɪ dabeem yōke sudaasi ke'endõma ke'ema la, ēŋa n bāŋe tɪ Apolɪ de la Rom tēŋa nu'ugo nēra dee tɪ ēŋa botɪ ba ba ē na bānsɪ la īyā.

Apolɪ ze Zifdõma kēma nēŋam

³⁰ La sudaasi ke'endõma ke'ema la daan boorɪ tɪ a bāŋe la sɪra sɪra yel-seka n botɪ Zifdõma la dõre ē. Tɪ beere wiige, tɪ a ba'age Apolɪ base. Dee bɔ nõore yetu, Nawēnne kāabgɔ kēma nēŋadõma, la kēma n po dita sarɪya la wuu lagse. Tɪ ba lagse. Tɪ a tarɪ ē sēŋe ka ze'ele ba nēŋam.

23 Tɪ Apolɪ bɪsra sarɪyaditba la zīi, dee yele yetu: «M sɔbiisi, mam n tõm m tõoma la wuu Nawēnne nēŋam wa paam zīna, mam bāŋe m sūure puam mē tɪ la ān sõŋa.»

² Tɪ kāabgɔ kēma nēŋadāana Ananiyasi bɔ nõore yetu, seba n ze lem Apolɪ la wē a nõore. ³ Tɪ Apolɪ yele ē yetu: «Nawēnne wun wē fɔ. Fu ān wu dagoone tɪ ba saase, tɪ a zuum mā'a āna sõŋa la, fõn zɪ tɪ fu di mam sarɪya wu lɔɔ n yele se'em na, la fõn sā'am lɔɔ la mē, fõn bɔ nõore yetu, ba wē mam na.» ⁴ Tɪ seba n ze lem Apolɪ la yele ē yetu: «Fõn tuurɪ la Nawēnne kāabgɔ kēma nēŋadāana?» ⁵ Tɪ a lerge yetu: «M sɔbiisi, mam ka mi tɪ a de la Nawēnne kāabgɔ kēma nēŋadāana. Se'ere n soe la, Nawēnne gōŋɔ puam la gulse yetu: «Da tɔge fu buuri nēŋadāana be'em.» »

⁶ Tɪ Apolɪ bāŋe tɪ sarɪyaditba la baseba de la Saduse dõma, dee tɪ baseba mē dena Farisi dõma, tɪ a tɔge

ke'enke'em yele ba wuu yetu: «M sobiisi, mam de la Farisi nēra, mam so de la Farisi mēṇa mēṇa. Mam n tarı putē'ere tı seba n kiiri la wun le vo'oge me na, bela iṇā tı ba sām mam.» ⁷ Ēn yele bela la, tı Farisi dōma la Saduse dōma wē'era nōke'ema la taaba, tı nēba la welse. ⁸ Se'ere n soe la, Saduse dōma la ka sake tı kūm wun vo'oge, la ba ka sake tı malekadōma la sūsı bōna, la Farisi dōma sake bela wuu me. ⁹ Tı ıw karēnsāandōma baseba n de Farisi dōma la isge yābra ke'enke'em yetu: «Tōma ka yē bura-ēna wā tōon-be'ego. Tā tı la de-na la sia, bu maleka n tōge bō ē.»

¹⁰ Tı nōke'ene na wē'a daan zo'oge gāṇḡ. Tı sudaası ke'endōma ke'ema la zōta dabeem yetu, ba na'an wun āasum Apolı. Bela tı a bō sudaası la nōore yetu, ba sēṇe ka to'oge ē nēba la zē'am, tarı ē wa'am wa yu sudaası la yire.

¹¹ Tı daar-ēṇa yu'uṇḡ, tı Zuudāana Azezi wa'am Apolı zē'am wa yele ē yetu: «Keṇe fu sūure, tı fōn tōge mam yela Zerizalem kalam se'em na, dēnı tı fu ken tōge mam yela Rom tēṇam bela.»

Ba eerı sore tı ba ku Apolı

¹² Tı beere wiige, tı Zifdōma baseba lagse taaba ēṇe nōore ayıla pıı yetu, bāma kān di dia bu yū ko'om, sān dagna bāma ku la Apolı. ¹³ Seba n daan lagse ēṇe nōore ayıla bela la, daan gānnı nēba pinaası me. ¹⁴ La ba daan sēṇe la kāabgō kēma nēṇadōma, la kēma la zē'am ka yetu: «Tōma lagse me pıı yetu, tōma kān di sela, sān dagna tı tōma ku la Apolı. ¹⁵ Bela iṇā, yāma sarıyaditba la wuu, tōm-ya tı ba ka yele suda-ke'ema la tı a tarı Apolı wa'am ya zē'am, dee ēṇe-ya wu ya boorı tı ya soke bāṇe la a yelle la pa'ase, tı tōma māasum me tı ku ē tı a nān ka paam.»

¹⁶ Tı Apolı tā dayua bāṇe ban bām yele se'em na, sēṇe sudaası la yire ka yele Apolı. ¹⁷ Tı Apolı wi suda-ke'endōma la ayıla yele ē yetu: «Tarı budib-ēna wā sēṇe ya ke'ema la zē'am, tı a tarı la sela tı a yele ē.» ¹⁸ Tı suda-ke'ema la tarı ē sēṇe ba ke'ema la zē'am ka yele ē yetu: «Apolı tı ba yu la n wi mam yetu, m tarı budib-ēna wā wa'am fu zē'am, tı a tarı la sela tı a yele fo.» ¹⁹ Tı ke'ema la gure a nu'ugo tarı ē yese kēnkēṇa ka soke ē yetu: «Fōn tarı la bēm yelle tı fu yele mam?» ²⁰ Tı a lerge ē yetu: «Zifdōma n bām yetu, bāma wun sose fōn beesā tı fu tarı Apolı wa'am ba sarıyadia zē'am, wu bāma boorı tı ba bıse la a yelle la pa'ase. ²¹ La, da sake ban wun yele se'em na, tı ba nēba n gāṇḡ pinaası n sugē gu'ura Apolı. Ba wuu pıı me yetu, bāma kān di dia bu yū ko'om, sān dagna tı bāma ku la Apolı. Ba māasum gu'ura la fōn wun lerge se'em.» ²² Tı ke'ema la yele budibla la yetu: «Da yele nēra tı fōn yele mam sela.» Dee botı a lebe.

Ba tarı Apolı sēṇe ka ēṇe gōmna Afeligsi nu'usum

²³ Tı sudaası ke'endōma ke'ema la wi a suda-ke'endōma bayi yele ba yetu: «Base-ya tı sudaası kōbsyi, la wi-bā'arba pisyopıı, la kān-lōbrıba kōbsyi māasum. Tı yu'uṇḡ ēna wā karf-awel ya sēṇe Sezaare. ²⁴ Māasum-ya wiiri bō Apolı tı a bā tı ya tarı ē sēṇe gōmna Afeligsi zē'am la iṇā'asum.» ²⁵ Dee gulse gōṇḡ yetu:

²⁶ «Mam Akloorı-lisiası n gulse gōṇḡ wā bō'ıra fōn gōmna sōṇḡ Afeligsi. Mam pu'usrı fō.

²⁷ Zifdōma n daan yōke bura-ēna wā bō'ıra tı ba ku ē. Tı mam wōm tı a de la Rom tēṇa nu'ugo nēra, tı mam sēṇe la sudaası ka fāage ē, ²⁸ dee bō'ıra tı m bāṇe bōn-seka n soe tı ba dōre ē tarı ē sēṇe ba sarıyadia zē'am. ²⁹ La mam daan yē tı la de la Zifdōma ıw yela iṇā, dee a ka ēṇe sela n narı ba ku ē, bu ba yu ē yu'a deem. ³⁰ Tı ba yele mam yetu, Zifdōma bām me tı ba ku ē, bela iṇā tı mam ēṇe tōtō tōm tı ba tarı ē wa'am fōn zē'am, dee bō nōore yetu, seba n sām ē na wa'am fōn zē'am wa tōge ēn ēṇe se'em.»

³¹ Tı sudaası la ēṇe ēn yele ba se'em na, tarı Apolı yu'uṇḡ ēṇa sēṇe Antipatrisi. ³² Tı beere wiige, tı suda-seba n sēnnı nāma la lebe ba yire la, dee tı seba n bā wiiri la tarı Apolı sēṇe. ³³ La ban paage Sezaare la, ba dıke gōṇḡ la me bō gōmna la dee dıke Apolı ēṇe a nu'usum. ³⁴ Tı a karēṇe gōṇḡ la, dee soke yetu, ēṇa yese la so'olum kāna? Tı Apolı pa'ale ē tı ēṇa yese la Silisi so'olum. ³⁵ Tı gōmna la yele ē yetu: «Seba n tarı fu wa'am sām na sān paam, mam wun soke bāṇe lan ēṇe se'em.» A yele bela dee bō nōore yetu, ba kē'ese ē naba A'erdı yire tı ba gu'ura ē.

Zifdōma dōre Apolı Afeligsi nēṇam

24 La dabsa anuu daare, tı kāabgō kēma nēṇadāana Ananiyası doose la kēma baseba, la yetōg-mita yu'ure n de Atertuli wa'am Sezaare. Tı ba dıke Apolı yelle la tı ba tōge bō gōmna la. ² Tı ba wi Apolı tı a wa'am. Tı Atertuli yāṇa tōgra dōta Apolı yetu: «Gōmna sōṇḡ Afeligsi. La de la fōn bısrı tōma sōṇa la iṇā tı tēṇa la tara laafe, tı yela zozo'e teege tı tēṇa la malge. ³ Fōn ēṇe sela wuu zē'esı wuu bō tōma la, tōma to'oge me pu'usra fu zozo'e. ⁴ La mam ka boorı tı m gu'um fō, bela mam sosrı fu me tı fō ēṇe sugrı dee selse m yetōga wā fēfēe. ⁵ Tōma yē nēr-ēna tı a de la tēn-wā'ara, ēṇa n sa'asrı Zifdōma dūnia wuu zuo tı ba gita tēnsı. A de la Nazaretı dōma pōmpōṇḡ sore la nēṇadāana. ⁶ A zıgrı tı a sā'am la Wēnde-kāte la sisgo, tı ba yōke ē. [La tōma daan boorı tı tı di a sarıya la tōma mēṇa ıw. ⁷ Tı suda-ke'ema Alisiası wa'am wa fāage ē tōma zē'am la pāṇa, ⁸ dee bō nōore yetu, seba n sām ē na wa'am fōn zē'am.] Fu sān soke ē fu mēṇa, fu wun wōm bōn-seba wuu n botı tōma sām ē.» ⁹ Atertuli n

tõge ba'ase la, ti Zifdõma la lagum sake yeti, la de la bela.

Apoli tõge po'oge a mēnja Afeligi nējam

¹⁰ Zifdõma la n tõge k'ulum na, ti gōmna la bō Apoli nõore ti a tõge. Ti Apoli yeti: «Mam mi ti fōn de la sarlyadita so'olum ēna wā puam halu yuuma n zo'oge. Bela mam sūure ān yēlum ti m tõge to'oge m mēnja.

¹¹ Fōn tā wun bānje me ti la ka gānje dabsa pia la ayi ti mam sēnje Zerizalem ti m ka pu'use Nawēnne. ¹² La Zifdõma la ka yē mam ti mam wē'eru nōke'ene la nēra Wēnde-kātum na, la ba ken ka yē ti mam sa'asru nēba ba wēndeto la puam bu tēnja la zē'e-seka. ¹³ La ba kān yānje yē sela pa'ale ti bāma n yeti mam ēnje se'em na de sira. ¹⁴ La mam yeti fu ti mam sru doli la so-seka ti ba yeti pōmpōrōrō sore la. La mam pu'usru la Nawēnne ti tōma yaabdõma yuun pu'usru la, dee sakra sela wuu n gulse bōna Amoyisi lō puam, la Nawēnne nōtō'csrība gōnnō puam na. ¹⁵ Mam taru putē'ere la Nawēnne wu bāma n taru putē'ere se'em na, ti nēba wuu, nēr-sōma la nēr-be'esu wun vo'oge me. ¹⁶ Bela ti mam mōrgra daare woo ti m bānje m sūure puam ti mam ka ēnje be'em Nawēnne la nēba nifum.

¹⁷ La de la yuuma zozo'e ti mam daan ka boe Zerizalem, dee yānja taru ligri leme ti m sōnje m tēnja nēba, dee bō bō'a ti ba kāabe bō Nawēnne. ¹⁸ Mam daan boe mī ita la bela, ti ba yē mam Wēnde-kātum na, ti mam daan pōn malge m mēnja Nawēnne zē'am k'ulum me, la nēba daan ka boe la mam mī zo'oge, la ba mē daan ka gire mī. ¹⁹ La Zifdõma baseba n ze'ele Azi so'olum n daan boe mī, ba sān tara nū na yelle la mam, ba mēnja n wun wa'am nū na yele fu mam n ēnje se'em. ²⁰ La nēr-bāna wā sān yē mam tōon-be'ego, wakat-seka ti mam daan boe ba sarlyadia zē'am na, ba yele. ²¹ La ba kān yē sela, sān dagna mam daan ze'ele ba tēnasuka tõge ba ke'enke'em yeti: «La de la mam n taru putē'ere ti seba n ki la wun vo'oge me na iŷā, ti mam ze ya nējam ti ya dita mam sarlyā zīna wā.»

²² La Afeligi n daan pōn mina kō-yēlga la sore yelle la, ti a viige yetōga la, dee yele ba yeti: «Suda-ke'ema Alisiasi sān paam, mam wun ku'uge yetōga la bō ya.»

²³ Dee bō suda-ke'ema la n gu'uri Apoli la nõore yeti, a bōsra ē, la a bō ē yolsgo, la a sirdõma sān tara sela bōora ti ba bō ē, a base ti ba bō ē.

Apoli ze Afeligi la Adrisili nējam

²⁴ La dabsa fēe n tole, ti Afeligi lagum na a pōga Adrisili n de Zifu boti ba wi Apoli, ti a wa'am wa tōgra nēra n wun bō Azezi-krisi sira se'em yelle, ti ba selsra.

²⁵ La Apoli n yānja wa tōgra urgō n mase, la yōk-m-mēnja, la sarlyadia n sēm yelle, ti dabeem yōke Afeligi, ti a yele Apoli yeti: «Base bela, mam sān wa yē nēnja, mam wun le wi fo.» ²⁶ A daan tē'esru ti Apoli

na'an wun bō ē na ligri, bela iŷā ti a ēn wi'ira ē sōsra la ē le. ²⁷ Ti yuuma ayi tole, ti Apōrsusi-festusi yānja sōoge Afeligi zē'am. La Afeligi daan boori ti a ēnje la sela n ān Zifdõma sūure yēlum, bela iŷā ti a base ti Apoli ken bōna yu'a deem.

Apoli sose yeti, ba base ti na-keko di a sarlyā

25 Afestusi n paage to'oge na'am a so'olum na puam na, a ēnje la dabsa atā Sezaare, dee ze'ele bilam sēnje Zerizalem. ² Ti kāabgō kēma nējadõma, la Zifdõma nējadõma wa'am a zē'am wa dōre Apoli. Dee sose ē mōrgra ³ yeti, a sōnje ba boti ba taru Apoli leme Zerizalem, se'ere n soe la, ba daan bām bōora ti ba sugē ku ē na sore. ⁴ Ti Afestusi lerge yeti: «Apoli boe la yu'a deem Sezaare, la mam mēnja wun lebe la bilam lēle wā. ⁵ La base-ya ti ya nējadõma doose mam sēnje Sezaare, ti a sān tōm na tōon-be'ego, ya tõge bilam.»

⁶ Afestusi daan ka ēnje gānje dabsa anii bu dabsa pia ba zē'am dee lebe Sezaare. Ti beere wiige, ti a kē zī'ire sarlyadia zē'am, dee bō nõore yeti, ba taru Apoli wa'am. ⁷ Ti Apoli kē, ti Zifdõma seba n ze'ele Zerizalem wa'am na isge gilge ē, dōta ē yeti, a tōm na tōon-be'ero zozo'e, la ba ka tā'age pa'ale ti bāma n yele se'em na de la sira. ⁸ Ti Apoli tõge ti a to'oge a mēnja yeti: «Mam ka ēnje sela n si'usru Zifdõma lō, bu Wēnde-kāte la, la mam mē ka ēnje Rom na-keko la be'em.» ⁹ Ti Afestusi bōora ti a ēnje sela n ān Zifdõma sūure yēlum, soke Apoli yeti: «Fōn boori ti fu sēnje Zerizalem ti m ka di fu yelle wā sarlyā bilam me bu?» ¹⁰ Ti Apoli lerge yeti: «Mam pōn bōna la nēr-seka ti Rom na-keko bō ē nõore la sarlyadia zē'am, bela la mase ti ba di mam sarlyā la Rom. Fōn mēnja mi ti mam ka ēnje Zifdõma be'em. ¹¹ Mam sān ēnje nū na be'em bu sela n mase ti ba ku mam, mam kān zagse. La ban dōre mam se'em na dagi sira, nēra ka tā wun dīke mam ēnje ba nu'usum. Mam boori ti Rom na-keko la n di m sarlyā.» ¹² Ti Afestusi la a poorum dõma yē taaba, dee ti a lerge Apoli yeti: «Fōn yeti, fōn boori ti Rom na-keko la n di fu sarlyā. Bela, fu wun sēnje la na-keko la zē'am.»

Apoli boe Agripa la Abernisi nējam

¹³ La dabsa fēe n tole, ti naba Agripa la a tā Abernisi sēnje Sezaare ti ba ka pu'use Afestusi. ¹⁴ La ba yuuge mī na fēe, ti Afestusi tõge Apoli yelle la bō naba la yeti: «Buraa n boe kalam ti Afeligi base ti a bōna yu'a deem. ¹⁵ La mam daan sēnje la Zerizalem, ti Zifdõma kēma, la kāabgō kēma nējadõma taru a yelle wa'am wa tõge bō mam, dee sose mam yeti, m di a sarlyā boti ba sūbge ē. ¹⁶ Ti mam lerge ba yeti, tōma Rom dõma ka dīkri nēra ita nēba nu'usum ti ba sūbge ē, dee ti a nān ka ze'ele seba n sām ē na nējam tõge a nõore. ¹⁷ La ba doose mam me wa'am kalam, la mam ka gu'um, beere n wiige, ti mam kē zī'ire sarlyadia zē'am,

dee bɔ nõore yeti, ba tarɪ buraa la wa'am. ¹⁸ La seba n sām ē na ka pa'alē tōon-be'ero seba tɪ a ēŋe, wu mam n tē'ese se'em na. ¹⁹ La de la nõke'ene tɪ ba wē'erɪ la ē, ba pu'usgɔ sore yela iŷā, la buraa yu'ure n de Azezi n ki, tɪ Apolɪ yeti a vo'oge mē iŷā. ²⁰ Tɪ mam ka tā'age bāŋe mam wun ēŋe yel-ēna wā se'em, tɪ mam soke Apolɪ yeti, ēŋa boorɪ tɪ a sēŋe la Zerizalem tɪ m sēŋe ka di a sarɪya la bilam? ²¹ Tɪ Apolɪ zagse dee yeti, ba base tɪ Rom na-keko la tɔge a yetɔga la. Tɪ mam bɔ nõore yeti, ba gu'ura ē tɪ m wa botɪ ba tarɪ ē sēŋe na-keko la zē'am. ²² Tɪ naba Agripa yele Afestusi yeti: «Mam mē boorɪ tɪ m wōm bura-ēna wā yetɔga.» Tɪ Afestusi lerge yeti: «Beere sān wiige, fu wun wōm a yetɔga.»

²³ Tɪ beere wiige, tɪ Agripa la Abērnisi ye fōŋɔ lɔgrɔ wa'am wa kē sarɪyadia deem na, la suda-ke'endōma, la tēŋa la nēŋadōma. Tɪ Afestusi bɔ nõore yeti, ba tarɪ Apolɪ wa'am. ²⁴ Dee yeti: «Naba Agripa, la seba wuu n lagse wā, bɪse-ya bura-ēna wā tɪ Zifdōma wuu wa'am wa tɔge a yelle la mam, Zerizalem la kalam, tī tɔgra yeti, la ka mase tɪ a ken vɔa. ²⁵ La mam yē tɪ a ka ēŋe sela n mase tɪ a ki. La a mēŋa yeti, ēŋa boorɪ tɪ ba tarɪ a yetɔga la sēŋe la na-keko zē'am. Tɪ mam tɔge ku yeti, mam wun botɪ a sēŋe. ²⁶ La mam ka tarɪ a yelle la zuo wun gulse bɔ na-keko la. Bela tɪ mam botɪ ba tarɪ ē wa'am ya zē'am, la fōn naba Agripa mēŋa nēŋam, tɪ ya sān sogse ē kɪ'ulum, mam wun yē yelle gulse. ²⁷ Se'ere n soe la, mam tē'ese tɪ la ka ān sōŋa tɪ mam tarɪ nēra ka bɔ na-keko la tɪ a di a sarɪya, dee ka pa'alē yel-seka iŷā tɪ ba yōke ē.»

Apolɪ tɔge tɪ a to'oge a mēŋa Agripa nēŋam

(Tõoma 9:1-19; 22:4-16)

26 Tɪ Agripa yele Apolɪ yeti: «Sore boe tɪ fu tɔge.» Tɪ Apolɪ zēke a nu'ugo tɪ a tɔge to'oge a mēŋa, yeti: ² «Naba Agripa, mam sūure ān yēlum, mam n boe fu nēŋam zīna wā tɪ m tɔge to'oge m mēŋa la bōn-seba wuu tɪ Zifdōma dōre mam na. ³ Lan gānnɪ wuu, mam tarɪ sū-yēlga, fōn mi Zifdōma dɔgmike, la ba nõke'ema la yelle sōŋa sōŋa la iŷā. Bela mam sosrɪ fu mē tɪ fu mā'age fu mēŋa selse m yetɔga wā.

⁴ Zifdōma wuu mi mam vɔm n ān se'em mē halɪ lan pɔse mam bōnbɪ'ulum, la ba mi mam n vɔa se'em mam mēŋa tēŋam, la Zerizalem mē. ⁵ Ban mi mam la yuuge mē, ba sān bɔɔra, ba tā wun ze'ele bɔ mam kaseto mē yeti, mam de la Farisi nēra, bāma n sakrɪ tɪ pu'usgɔ yela sōŋa gānna. ⁶ La lēle wā tɪ mam ze sarɪyadia zē'am kalam wā, la de la mam n tarɪ putē'ere la Nawēnne n bīŋe a nõore la tɪ yaabdōma la iŷā. ⁷ Tōma buuri pia la ayi la tōnnɪ mē bɔ'ɔra Nawēnne wuntēŋa la yu'urɔ, dee tara putē'ere gu'ura tɪ ēn bīŋe a nõore se'em na wun ēŋe mē. Naba Agripa, la de la putē'e-ēna wā iŷā tɪ Zifdōma dōre mam. ⁸ Bēm tɪ la dena toogo bɔ ya, tɪ ya sake tɪ Nawēnne vo'orɪ kūm?

⁹ Mam mēŋa daan tē'ese mē, tɪ dēnɪ tɪ mam ēŋe mam wun ēŋe se'em wuu sām Azezi n de Nazaretɪ nēra la yu'ure. ¹⁰ Mam tōm na bela Zerizalem, la mam daan to'oge nõore kāabgɔ kēma nēŋadōma zē'am mē, yōge Nawēnne nēra zozo'e botɪ ba kē'ese ba yu'a deem, di ba sarɪya yeti ba ku ba, tɪ mam daan sake.

¹¹ La wakate zozo'e tɪ mam daan nāmse ba Zifdōma wēndeto puam, mōrgra tɪ ba base ba sore la. Tɪ mam sūure daan yīge la ba halɪ tɪ mam doose tēnsɪ baseba nāmse ba. ¹² La de la bela iŷā tɪ mam daan to'oge nõore kāabgɔ kēma nēŋadōma zē'am tɪ m sēŋe Damaasɪ.

¹³ Naa, mam daan boe la sore wuntēŋa zuu-tēŋasu-ka wē'esa, yē peelem n ze'ele saazuum yēke nēege gānna wuntēŋa gilge mam, la seba n dolɪ mam na.

¹⁴ Tɪ tōma wuu lui tēŋa, tɪ mam wōm kōa n yele mam la Ebre yetɔga yeti: «Asolɪ, Asolɪ, bēm tɪ fu nāmsra mam? Fu sān ka sake mam, la wun āna toogo bɔ fu, wu dūŋa n ka nannɪ a dāana ka'asre.» ¹⁵ Tɪ mam soke yeti: «Zuudāana, fōn de la āne?» Tɪ Zuudāana la yele mam yeti: «Mam de la Azezi, seka tɪ fu nāmsrɪ la. ¹⁶ La isge ze'ele, mam dɪke m mēŋa pa'alē fɔ tɪ m botɪ fu lebge la mam tōntōnna. Fu wun dena la mam kaset-dāana yele nēra fōn yē mam se'em, dee ken pa'alē ba bōn-seba tɪ mam wun botɪ fu yē la. ¹⁷⁻¹⁸ La mam wun ken tōm fu la bu-zāŋsɪ zē'am, tɪ fu ka pike ba nini yese ba lika puam tɪ ba vɔa peelem puam, dee yese ba Asūtāana nu'usum lebse ba Nawēnne nu'usum, tɪ ba bɔ mam sɪra, tɪ Nawēnne base ba tōon-be'ero taale, tɪ ba lagum na Nawēnne nē-sōma yē pure. La mam wun fāage fu Zifdōma, la bu-zāŋsɪ nu'usum base.»

¹⁹ Tɪ Apolɪ yele bela dee yeti: «Naba Agripa, mam n daan yē Azezi wu zāasɔ, tɪ a ze'ele saazuum tɔge bɔ mam na, mam ka zagse. ²⁰ Bela tɪ mam pɔse Damaasɪ, la Zerizalem, la Zude so'olum wuu, la bu-zāŋsɪ zē'am mōole yeti, ba teege yem base tōon-be'ero, dee lebe sake Nawēnne, dee ēŋe sela n pa'alē tɪ ba teege yem.

²¹ Bela tɪ Zifdōma daan yōke mam Wēnde-kātum na yeti ba ku mam. ²² La Nawēnne sōŋe mam mē wa paam zīna, bela tɪ mam ze kalam tɔgra mam n yē sela bɔ'ɔra yāma, ke'endōma la tarumdōma wuu. Mam n yele sela wuu la, la de la Nawēnne nōtɔ'ɔsrɪba, la Amoyisi n yuun yeti sela wun ēŋe la. ²³ Ba yuun yeti, dēnɪ tɪ Krisi nāmse ki, la ēŋa n wun dena pɔspɔsɪ nēra n wun vo'oge, dee wun mōole kō-yēlga n de peelem bɔ Zifdōma la bu-zāŋsɪ.»

²⁴ La Apolɪ n tɔgrɪ bela tɪ a to'oge a mēŋa la, tɪ Afestusi tāse ē yeti: «Apolɪ, fōn zallɪ mē, fōn zāsum mē zo'oge tɪ la botɪ fu yirsra.» ²⁵ Tɪ Apolɪ lerge ē yeti: «Afestusi sōŋɔ, mam ka zallɪ. Mam tɔgrɪ la yel-sɪra, la yem yetɔga. ²⁶ Naba Agripa mi yel-bāna mē, mam tā wun tɔge mē la buraane a nēŋam. Mam mi tɪ a mi bōn-bāna wuu mē, se'ere n soe la, ba ka ēŋe lika puam.»

²⁷ A yele bela dee yeti: «Naba Agripa, fōn sake Nawēn-

ne nõõ'õsribā n yele se'em na me? Mam mi ti fõn sake me.»²⁸ Tl Agripa yele Apoli yeti: «Fõn tē'ese ti fu boti mam lebge la Krisi nēra wakate fēe wāna puam?»²⁹ Tl Apoli yeti: «La sān yuuge, bu la sān ka yuuge, mam pu'usri Nawēnne me ti fõn la seba wuu n selsri mam zīna wā wun lebge āna wu mam ān se'em na, sān dagna bānsi la mā'a ti mam ka boori ti ba ba ya.»

³⁰ Tl naba la, la gōmna Afestusi, la Abērnisi, la nērba la wuu isge yese, ³¹ ka yele taaba yeti: «Bura-ēna ka ēnje sela n mase ti a ki, bu ba kē'ese ē yu'a deem.»³² Tl Agripa yele Afestusi yeti: «Bura-ēna wā sān ka yele n ti ēnja boori ti a sēnje la na-keko la zē'am, ti tā wun base n ti ē.»

Ba tarl Apoli we'esa Rom

27 Tl ba daan looge yem ti ba boti tōma kē ḡorņ sēnje Itali, ti ba dīke Apoli la nērba baseba ti ba yu la, ēnje suda-ke'ema yu'ure n de Azuliyusi nu'usum, a daan de la suda-seba ti ba wi'iri ti na-keko sudaasī la ke'ema ayula. ² La ḡorņ n ze'ele Adramiti tēņam daan bōna bilam yeti a sēnje tēnsi baseba n boe Azi ko-kāte la nōorum. Tl tōma kē we'esa, ti Aristarki n ze'ele Tesa-loniki n boe Maseduanī so'olum, wa'am wa doose tōma. ³ Tl beere wiige, ti tōma paage Sidō tēņam, ti Azuliyusi ēnje Apoli sōņa bō ē nōore ti a sēnje ka bise a sirdōma, dee ti ba sōnje ē. ⁴ Tl tōma le kē ḡorņ bilam we'esa. Tl kusebgo vugra tu'usra tōma, ti tōma wērgē bēgle Sipri sēnje. ⁵ La tōma doose la ko-kāte la n lem Silisi la Pānfili la, sēnje ka paage Miira n boe Lisi so'olum sige. ⁶ Bilam ti suda-ke'ema la yē ḡorņ n ze'ele Alegsāndri ti a sēnje Itali. Tl a boti tōma kē.

⁷ La dabsa faa ti tōma nāmse la ḡorņ la sēnna fēfē halī ka lem Kinidi tēņam. La kusebgo la ka boti tōma yānje sēnje bilam bōba, ti tōma lōke sēnje lem Salmōni bēgle Kretī sēnje. ⁸ La tōma daan bēgle la ko-kāte la nōorum, daan nāmse halī, dee yāņa paage zē'a yu'ure n de ḡorņ ze'elgo zē'e-sōņ n lem Laze.

⁹ La dabsa zozo'e daan tole me, ti Zifdōma nōore lua daare tole. La wakat-ēņa la daan de la toogo bō nērba ti ba dīke ḡorņ doose ko'om na puam. Bela ti Apoli yele ba yeti: ¹⁰ «Buraasī wā, mam mi ti tōma sēnne wā wun wa dena la toogo. La dagi lōgrō, la ḡorņ la mā'a n wun sā'am, la de la tōma mēņa yōore pōsga.»¹¹ Tl suda-ke'ema la ka selse Apoli n yele se'em na, a selse la seka n bīsrī ḡorņ la sēnne yelle, la ḡorņ la dāana yetōga. ¹² La ḡorņ ze'elgo zē'a na ka ān sōņa ti ba wun gā'are ti kusebgo, la cōcō wakate la tole. Bela ti nērba la zozo'e yeti, ti base bilam dee wībe sēnje paage Fenigsi n mē boe Kretī so'olum. Zē'e-ēņa ḡorņ ze'elgo zē'am la tōgle la zanōre gōbga, la zuugo nu'ugo bōba. Bilam ti ba tā wun zī'ire ti kusebgo, la cōcō wakate la tole.

Kuseb-kāte vugri ko'om zuo

¹³ Tl kusebgo ze'ele gōbga bōba wa'am wa vugra fēfē. Tl ba tē'ese ti ba tā wun ēnje ban boori se'em, bela ti ba māasum ḡorņ la base zē'e-ēņa, dee bēgla Kretī ko-kāte la nōorum we'esa. ¹⁴ Tl la ka yuuge, ti kuseb-kāte ti ba wi'iri ti «Erakilō» ze'ele Kretī tēņa bōba, wa'am wa vugra ke'enke'em wē'era ḡorņ la. ¹⁵ Tl tōma ka yānje boti ḡorņ la sēnje nēņa bōba, ti tōma base ḡorņ la ti kusebgo la tarl ē we'esa. ¹⁶ Tl tōma sēnje ka lem tēn-pīka yu'ure n de Koda ti ko'om gilge ē, bēgla ē ti kusebgo la ka le vugra ke'enke'em tu'usra tōma. Tl tōma keņe ti mēņa ḡbge ḡorņ-pīka la zoole ḡorņ-kāte la zuo, la, la ka ēnje nāana. ¹⁷ Tl ba dīke mī'isi lu ḡorņ-kāte la kāņkāņe ti a tara pāņa. Ba zoti me ti, ti sān paage zē'e-seka yu'ure n de Sirti n dagi kulko'om ti tēntōnbīisgo bōna mī na, a wun fīre. Bela ti ba sike ḡorņ la fu-kāte, dee ti kusebgo la zā'ara ē sēnna fēfē. ¹⁸ La kusebgo la ken vugra la ke'enke'em nāmsra tōma, ti beere wiige, ti ba yese lōg-seba n boe ḡorņ la puam na, lobe base ko'om na puam. ¹⁹ Tl beere le wiige, ti ba mēņa yese ḡorņ la mēņa lōgrō lobe base ko'om na puam. ²⁰ Tl la ēnje dabsa se'em, ti tōma ka yē wēntulle la wōrbie, ti kusebgo la ken vugra ke'enke'em nāmsra tōma. Tl tōma kō'oge vōm putē'ere.

²¹ Tl la daan yuuge ti nērba la ka di. Tl Apoli ze'ele ba tēņasuka yeti: «Ya daan sān sake nī mam nōore la, daan ka fōrgē Kretī, ti kān yē nī nāmsgō la yel-bāna wā wuu. ²² La lēle wā, mam sosri ya ti ya keņe ya sūure. Tl nēra baa ayula kān ki ya puam, sān dagna ḡorņ la mā'a n wun sā'am. ²³ Zaam yu'urņ Nawēnne n soe mam ti mam dena a tōntōnna la, tōm a maleka ti a wa ze'ele mam zē'am ²⁴ yeti: «Apoli, da zoe dabeem. Dēni ti fu ka ze'ele na-keko la nēņam. La Nawēnne ēnje fu yel-sōnne me boti seba n boe ḡorņ puam na wuu vōa.»²⁵ Bela, buraasī wā, keņe-ya ya sūure, ti mam bō Nawēnne sira me ti la wun ēnje wu maleka la n yele mam se'em na. ²⁶ La kusebgo la wun pe'ege ti ka base la tēņa ti ko'om gilge.»

²⁷ La daan de la dabsa pia la anaasī yu'urņ, ti kusebgo la vugra pe'era tōma ko-kāte la yu'ure n de Adriyati-ki la zuo. Tl sōnsua ti nēr-seba n tōnni ḡorņ la tōoma la tē'ese ti ti lem na tēņa. ²⁸ Tl ba dīke mī'a lu bōn-tībsgo base ko'om na puam ti ba bise kulga la n kō zōna se'em, make ti la dena wu mētri pitā la ayopō. Tl la ēnje fēe, ti ba le make bise ti la dena wu mētri pisyi la anii. ²⁹ Tl ba zōta dabeem ti ḡorņ la wun wē tāmpīisi, ti ba dīke kuto n boti ḡorņ ze'eta banaasī base ko'om puam ḡorņ la poorum, dee kā'ara Nawēnne ti beere wiige. ³⁰ Tl nēr-seba n tōnni ḡorņ la tōoma la daan bōcra ti ba zoe dee base ḡorņ la, bela ti ba sike ḡorņ-pīka la ko'om puam, ēnje wu ba boori ti ba dīke la kuto n boti ḡorņ ze'eta baseba base ḡorņ la nēņam. ³¹ Tl

Apoli yele suda-ke'ema, la sudaasi la yeti: «Nër-bāna wā sān ka bōna ðorņo wā puam, yāma wuu kān yāņe pōse.» ³² Tl sudaasi la wā mī'i-seba n lu ðorņo-pika la, dee base ē tl ko'om tarl ē fōrge.

³³ Tl beere bōna mī wiira, tl Apoli belem ba wuu tl ba di dia, yele ba yeti: «Zīna de la dabsa pia la anaasi n wāna, tl ya tē'srī kūm la vōm, dee ka di sela. ³⁴ Bela mam belnī ya mē tl ya di dia yē pāņa vōa, tl ya zomto baa ayula kān bōl.» ³⁵ Ēn yele bela la, dee dīke borbori pu'use Nawēnne ba wuu nējam, dee fiise borbori la obe. ³⁶ Tl ba wuu yē buraane mē di dia la. ³⁷ La tōma wuu daan de la nērba kōbsyi la pisyopōl la ayoobi ðorņo la puam. ³⁸ Tl ba di tige, dee dīke bōnkōla n boe ðorņo la puam na, lobe base ko'om na puam, ba boori tl ðorņo la n fake.

Ðorņo sā'arņo yelle

³⁹ Tl beere wiige, tl ba ka bāņe tēņa la. La ba yē la zē'a n tā wun dooge, tl ba yeti, ba sān tāna, ba boti ðorņo la tōgle bilam. ⁴⁰ Tl ba lorge kuto la n boti ðorņo ze'eta la base ko-kāte la puam, dee lorge mī'isi la n lu dō-seba n wun boti ðorņo la sēņe ban boori zē'e-seka la base, dee zēke fuugo la n boe ðorņo la nējam na, tl kusebgo wē'era fuugo la, tl ðorņo la wē'esa doone. ⁴¹ Tl ðorņo la sēņe zē'a tl ko'om ka zo'oge mī ka zom tēn-tōnbī'isgo zuo, tl a nējam fūrē, tl a kōņe sēnne. Tl ko-mī'isi wē'era a poorum la pāņa, tl a sā'am.

⁴² Tl sudaasi la bōra tl ba ku nēr-seba tl ba yōge la, tl seka da lui ko'om puam pām dooge zoe fōrge. ⁴³ Tl suda-ke'ema la bōra tl a fāage Apoli base, ka sake tl ba ku nērba la, dee bō nōore yeti, seba n mi ko'om būņa la ēge lui ko'om puam yien pām dooge doone.

⁴⁴ Dee tl seba n ka mi būņa la dīke dō-palagsi, la ðorņo la bōn-seka n sā'am woo būn dooge. Bela tl tōma wuu daan pōse dooge doone.

Apoli dōma boe Malti

28 La tōma n daan pōse paage doone na, tl tōma bāņe tl tēņa la yu'ure de la Malti. ² Tl tēņa la nērba to'oge tōma sōņa sōņa. Tl saaga daan niira tl cōr bōna, tl ba tuure bugum bō tōma, tl tōma cōsra. ³ Tl Apoli vaage dōrō wa'am wa ēņe bugum puam, tl tuulgo wōņe bōnsela, tl a yese vile Apoli nu'ugo. ⁴ Tl tēņa la nērba yē bōnsela n vile a nu'ugo la, tl ba yele taaba yeti: «Bura-ēna wā sū de la nēr-kuura. Baa la ēn yāņe pōse ko'om puam na, wēnne ka sake tl a vōa.» ⁵ Tl Apoli mēse a nu'ugo, tl bōnsela la lui bugum puam, dee tl sela ka ēņe ē. ⁶ Tl nērba la gu'ura tl ba wun yē tl a īyā fuusum ya, bu a wun kō'ōn lui tēņa ki. Tl la yuuge, tl ba ka yē tl sela ēņe ē, tl ba teege putē'era yeti, a de la wēnne.

⁷ La zē'e-seka tl tōma daan boe mī na lem na tēņa la nējadāana va'am. A yu'ure de la Apubulsi, a daan

to'oge tōma mē la sū-yēlga. Tl tōma bōna a yire dabsa atā. ⁸ Tl a sō bē'era gā yē'era-waafō, dee tl cōrō tara ē. Tl Apoli kē a deem dīke nu'usi pagle a zuo, pu'use Nawēnne bō ē, tl a yē īmā'asum. ⁹ Lan ēņe bela la, tl tēņa la nēr-seba n de bā'adōma wuu sēnna, tl Apoli pu'use Nawēnne bō ba, tl ba yē īmā'asum. ¹⁰ Tl ba daan gōņe tōma sōņa sōņa, la tōma n daan fōrgrī la, ba bō tōma la bō'a n seke tōma sore la sēnne.

Apoli dōma tole wē'esa Rom

¹¹ La wōr-sitā n tole, tl tōma yē ðorņo n ze'ele Aļegsāndri wa'am bōna Malti tējam, tl cōrō la kuseb-kāte la wakate tole. ðorņo la yu'ure de la «Diyōskuri». Tl tōma kē ðorņo la wē'esa. ¹² La tōma sēņe paage la Sīrakusi zī're bilam dabsa atā, ¹³ le ze'ele bilam kē ðorņo sēņe paage Regio. Tl beere wiige, tl kusebgo ze'ele tōma poorum wa vugra zā'ara tōma. Tl tōma paage Puzōllī dabsa ayi daare sige. ¹⁴ Bilam tl tōma yē Azezi karēnbiisi baseba. Tl ba sose tōma, tl tōma zī're ba zē'am dabsa ayopōl, dee yāņa wē'esa Rom. ¹⁵ Tl karēnbi-seba n boe Rom na wōm tōma yelle. Tl baseba tu'use tōma halī «Apiyusi da'am», dee tl baseba mē tu'use tōma zē'e-seka yu'ure n de «sāama deto batā» la. La Apoli n yē ba la, tl a pu'use Nawēnne, le yē buraane. ¹⁶ Tl tōma paage Rom, tl ba bō Apoli nōore tl a kē'era ēn boori zē'e-seka, dee boti sudaaga gu'ura ē.

Apoli boe Rom mōola Nawēnne kō-yēlga

¹⁷ Tl dabsa atā poorum, tl Apoli wi Zīfdōma nējadōma seba n boe tēņa la puam lagse, yele ba yeti: «M sōbiisi, mam daan ka ēņe tl nērba la be'em, la mam ka sā'am lōc seba tl tl to'oge tl yaabdōma zē'am na, la baa bela ba daan yōke mam mē Zerizalem, tarl mam ka bō Rom sudaasi tl ba yu mam. ¹⁸ Tl ba sogse mam, dee bōra tl ba base mam, ban daan ka yē tl mam ēņe sela n mase kūm na īyā. ¹⁹ Tl Zīfdōma zagse tl ba da base mam, bela n pērge mam tl mam sose nōore yeti, mam boori tl m sēņe la Rom na-keko la zē'am tl a di m sarīya, la dagl mam n tarl yelle la m nērba la. ²⁰ Bela tl mam wi ya tl ya wa'am tl sōse la taaba. Ban lu mam na bānsi wā, la de la seka tl Israyeli dōma tarl a putē're gu'ura ē na īyā.»

²¹ Tl ba yele ē yeti: «Tōma ka to'oge gōnno Zude tējam n gulse fu yelle. Zīfdōma seba n sēnnī kalam na, ba nēra nēra mē ka tōge fu tōon-be'ero yelle. ²² La tōma boori tl tl wōm na fōn tē'srī se'em, la sān dena sore la tl fu dolī la, tōma mi tl zē'a woo ba sī'srī ē mē.»

²³ Tl ba bō Apoli daare. Tl daare la paage, tl nērba zo-zo'e lagse Apoli zē'am. Tl Apoli tōge Nawēnne so'olum yelle, la Azezi yelle n gulse Amoyisi lōc gōnno puam, la Nawēnne nōtō'cōsriba gōnno puam na, pa'alē ba bulika halī ka paage zaanōore, mōrgra tl a boti ba sake. ²⁴ Tl

baseba sake, dee ti baseba ka sake. ²⁵ Ti nërba la ka wõm taaba bɔɔra ti ba fõrge. Ti Apoli tɔge ba yetɔga ayila yeti: «Nawënnε Sia n yuun boti a nõɔ'ɔsa A'ezayi tɔge la ya yaabdõma la de la sira. ²⁶ A yuun yeti: «Sëñε bu-bãna wã zě'am ka yele ba yeti:

Ya wun selse,
la ya kãn wõm a võore.

Ya wun bise,
la ya kãn yě sela sela.

²⁷ Se'ere n soe la,
bu-bãna wã putě'era ka like,
la ba tuba li mε,
dee ti ba mũm ba nini.
Ti ba nini da yě,

ti ba tuba da wõm,
ti ba putě'era da like.
Sãn dagi ni bela,
ba wun teege ni yem,
ti mam bɔ ba laafe.» »

²⁸ Apoli daan tɔge bela dee yeti: «Bãñε-ya ti Nawënnε tòm fãare kō-yělgā la bɔ la bu-zãñsɪ. Bãma wun selse.»
[²⁹ Apoli n tɔge yetɔg-ěña la, ti Zifdõma wě'era nõke'ene la taaba fõrga.]

³⁰ Apoli daan kě zě'e-seka ti a boe mĩ na yuuma ayi,
daan yɔɔra deego la ligri, dee tɔ'ɔsra seba wuu n senni
a zě'am na, ³¹ mōola Nawënnε so'olum yelle, dee zāsna
ba Zuudãana Azezi-krisi yela. A daan tɔgrɪ la buraane,
ti nēra ka gu'ura ẽ ti a da tɔge.

Rom

Bilgre

Nawēnne n looge Apoli ti a dena a Tōntōnna bu-zāṅsi ūyā (Rom 1:5, Galatı 2:9). Ēṅa n gulse gōn-ēna wā bɔ Nawēnne nērba n boe Rom. Nērba baseba n mōole ba Azezi kō-yēlga, ti ba bɔ sɔra. Ti Apoli yāṅa gulse yeti ēṅa boori ti a sēṅe ba zē'am ka boti ba yē buraane, dee tole sēṅe nēṅa.

Gōn-ēna wā puam a pa'alē la a zāsṅɔ n de se'em.

A yeti nēra woo tōm na tōon-be'ero koṅe Nawēnne nā'asgo, Zifdōma, la bu-zāṅsi wuu, la Nawēnne nōṅe ba wuu me, bɔɔra ti ba teege yem base tōon-be'ero dee sake Azezi-krisi. Azezi n ki ba ūyā, ti ba sān bɔ ē sɔra, ba wun mase Nawēnne zē'am ēṅa ūyā. Bela de la Nawēnne yel-sōnne. Ti nēr-seka woo n bɔ Azezi sɔra wun yē fāare, yese tōon-be'ero, la kūm puam. La a dāana wun vɔa la a Zuudāana Azezi, ti Nawēnne Sɔa wun sōṅra ē (sapitri 1-8).

Apoli ken gulse tɔge la Zifdōma seba n zagse Azezi yelle. A yeti ba kān zagse Nawēnne wakate wuu, se'ere n soe la, Nawēnne yel-sōnne na tā sela woo me (sapitri 9-11).

A ken yeti lēle wā ti Nawēnne ēṅe bu-zāṅsi wuu sōṅa la, la mase me ti ba vɔa la pupeelem, ti la paara Nawēnne yem (sapitri 12-15).

Gōṅɔ la ba'asgo, Apoli yeti ēṅa boori ti a sēṅe la Rom, ti ba ka sōṅe ē bilam, ti a tole sēṅe Espayē so'olum. La a yeti ēṅa pu'usɔ nēr-seba wuu ti ēṅa mi n boe Rom na (sapitri 15-16).

1 Mam Apoli n de Azezi-krisi yamṅa n gulse gōṅɔ wā. Nawēnne n wi mam ti m dena Azezi-krisi Tōntōnna, welge mam to'ore ti m mōole a kō-yēlga.

² Nawēnne daan bīṅe la nōore halı kurum kurum ti a bɔ tɔ a kō-yēlga la, boti a nōtɔ'ɔsrıba gulse a gōṅɔ puam. ³ La de la Nawēnne Dayua n de ti Zuudāana Azezi-krisi la yelle. Ēṅa n lebge nērsaala la, a de la naba Adavidi yuṅa. ⁴ La Nawēnne Sɔa la boe a zē'am me la pāṅa, pa'alē ti a de la Nawēnne Dayua, ēṅa n ki dee vo'oge la. ⁵ Azezi-krisi ūyā ti Nawēnne ēṅe ti yel-sōnne, boti tōma dena a Tōntōnıba ti ti boti so'olum wuu nērba bɔ ē sɔra, sake a nōore a yu'ure nā'asgo ūyā. ⁶ Yāma mē po bɔna la nēr-bāma puam, yāma ti Nawēnne wi ti ya dena Azezi-krisi nērba la.

⁷ Mam gulse gōṅɔ wā bɔ'ɔra la yāma seba wuu n boe Rom, ti Nawēnne nōṅe ya, wi ya ti ya welge to'ore dena a nērba la.

Ti Sɔ Nawēnne, la ti Zuudāana Azezi-krisi wun ēṅe ya yel-sōnne, dee bɔ ya sū-mā'asum.

Apoli boori ti a sēṅe ka kaage Krisi nērba n boe Rom

⁸ Pɔɔpɔsı, Azezi-krisi ūyā mam pu'usɔ mam Zuudāana Nawēnne a yel-sōnne yāma wuu ūyā, se'ere n soe la, ba tɔgrı yāma n bɔ Azezi sɔra se'em me dūnia wā wuu.

⁹ Mam tēri ya yelle m pu'usgo puam me wakate wuu. Nawēnne ti mam tōnnı la m sūure wuu bɔ'ɔra ē, mōola a Dayua kō-yēlga la, mi ti sela ti mam yele la de la sɔra.

¹⁰ Wakat-seka woo ti mam pu'usɔ, mam sosɔ Nawēn-

ne me ti la sān dena ēṅa yem n boori se'em, a boti m yāṅe wa'am ya zē'am wa kaage ya yāṅa. ¹¹ Se'ere n soe la, mam boori la m sūure wuu ti m yē ya, ti m wun to'oge Nawēnne Sɔa bɔ'a bɔ ya ti ya yē pāṅa. ¹² La de la mam na yāma wun lagım yē buraane pa'ase, ti yāma n bɔ Azezi sɔra se'em na wun bɔ mam buraane, ti mam mē n bɔ Azezi sɔra se'em na wun bɔ yāma buraane.

¹³ M sɔbiisi, mam boori me ti ya bāṅe ti nōore faa ti mam make ti m wa'am ya zē'am. La gu'a n gu mam halı wa paam lēle wā. Mam boori me ti m wa'am ti m tōone na tara yōorɔ yāma zē'am, wu ēn tarı yōorɔ so'olum baseba puam se'em na. ¹⁴ Mam tōone de la m sēṅe nēr-seba yem n like, la nēr-seba yem n ka like, nēr-seba n zāsum tara bāṅre, la nēr-seba n ka mi sela zē'am ka mōole kō-yēlga la. ¹⁵ Bela n soe ti mam bɔɔra ti m mōole kō-yēlga la mē bɔ yāma seba n boe Rom la.

Nawēnne kō-yēlga pāṅa

¹⁶ Yānne ka tarı mam la kō-yēlga la mōolgo. A de la Nawēnne pāṅa n boti nēr-seba wuu n bɔ ē sɔra la yēta fāare, pɔɔpɔsı de la Zifdōma, pa'ase la seba n dagı Zifdōma. ¹⁷ Kō-yēlga la n pukri pa'ala tōma Nawēnne n ıtı se'em boti nērba mase a zē'am. La de la bɔ sɔra, tarı ka ba'ase la bɔ sɔra, wu lan gulse Nawēnne gōṅɔ puam se'em yeti: «Nēra n bɔ Nawēnne sɔra mase a zē'am wun vɔa, ēn bɔ ē sɔra la ūyā.»

Něrsaalba korje buurɔ me

¹⁸ Nawěnnε n boe saazuum pa'ale tɪ ɛŋa sūure yīge me la nērsaalba n tōnnɪ tōon-be'ero, la sela wuu tɪ ba ɪtɪ tɪ la ka dɔla ɛŋa sore, tɪ ba tōon-be'ero la gu'ura nēba tɪ ba ka mina sɪra la, tɪ ɛŋa wun sɪbge ba.

¹⁹ Se'ere n soe la, sore tɪ nērsaalba wun doose bāŋe Nawěnnε yelle de la vēelga bɔ ba, Nawěnnε mēŋa n puke ɛ pa'ale ba. ²⁰ Halɪ lan pɔse dūnia nāaŋɔ, Nawěnnε yela tɪ nērsaalba ka yēɪ n de a ke'εŋo n ka tarɪ ba'asgɔ, la ɛn de Nawěnnε na, nēba yē ba me a tōoma la puam. Bela tɪ nērsaalba ka tāna wun yetɪ bāma ka mi Nawěnnε. ²¹ Ba mi Nawěnnε me, la ba ka nā'asrɪ ɛ, la ba ka pu'usrɪ ɛ a yel-sōnnε wu lan narɪ ba ɛŋe se'em na. Ba tē'esgɔ la lebge la tē'es-yooro, tɪ ba putē'e-yooro la kē'ese ba lika puam. ²² Ba tē'ese yetɪ bāma de la yem dōma, la ba de la gɔɔɔɔ. ²³ Lan de ba nā'asra Nawěnnε n ka kiiri n tarɪ na'am pāŋa la, ba tōn nā'asra la bōna tɪ nēba māale n ɛn wu nērsaalba n kiiri, la bōn-ɛgla, la sela n tarɪ nāma anaasɪ, la bōn-vuula.

²⁴ Bela n soe tɪ Nawěnnε base ba, tɪ ba tōnna dēgrɔ tōoma, wu ba yem n boorɪ se'em, tōnna yānnε tōoma la taaba. ²⁵ Ba dɪke Nawěnnε yelle n de sɪra la base me, dee dɔla pōmpɔrɔŋɔ. Ba nā'asrɪ la bōn-seba tɪ Nawěnnε nāam na, tōnna bɔ'ora ba, dee base Nawěnnε mēŋa n de sɛka n nāam sela woo la. ɛŋa n mase pēka wakate n ka ba'asrɪ. Amina.

²⁶ Bela tɪ Nawěnnε base ba, tɪ ba ita ba mēŋa yemleego n de yānnε. Tɪ ba pɔgsɪ base lan de ba gā se'em na, dee gā la taaba. ²⁷ Tɪ buraasɪ mē base lan de ba gā la pɔgsɪ la. Tɪ ba bura-taaba yemleego tara ba. Tɪ buraasɪ ita sela n de yānnε gā la taaba. Bela tɪ ba yēta sɪbgre ba mēŋa, n mase la ba tuure la.

²⁸ Ban zagse ka bɔɔra tɪ ba bāŋe Nawěnnε na, tɪ Nawěnnε base ba ba tē'es-yooro la puam, tɪ ba ita sela n ka mase tɪ ba ita. ²⁹ Sela n ka mase wuu n boe ba sūa puam. La de la be'em, la nōŋe bōnɔ zozo'e, la putuulgɔ, la ita sūure la tadāana bōnɔ, la nēr-kua, la zεbre, la yem be'ero, la sū-toogo. Ba wā'arɪ la taaba, ³⁰ tɔgra be'em zεgrɔ taaba, ba de la wēn-sɪ'srɪba, ka nanna taaba, zēk-m-mēŋa dōma, wē'er-m-yō'ogɔ dōma, nērba n mi sɔa n wun doose tōm be'em, nēba n sɪ'srɪ ba madōma, la ba sɔdōma nōore. ³¹ Ba yem ka like, ba de la nōgōla dōma, ba ka tarɪ nōŋlum, ba ka zotɪ ninbāalga. ³² Ba mi tɪ Nawěnnε yetɪ nēr-seba n ɪtɪ bela la mase la kūm, la baa bela ba ken ita la bōn-bāma, dee yetɪ nēr-seba n ɪtɪ bela la ɪtɪ sōŋa me.

Nawěnnε sarɪyadia mase me

2 Fōn nēr-sɛka n zεgrɪ nēba baseba la, fu kǎn yē buurɔ, se'ere n soe la, fōn zεgrɪ nēba baseba dee ita bāma n ɪtɪ se'em na, fu mōŋrɪ la fu mēŋa

buurɔ. ² Tɪ mi tɪ Nawěnnε diti nēr-seba n tōnnɪ tōon-be'ero bāma sarɪya dɔla la sɪra. ³ Fōn tē'ese tɪ fōn zεgrɪ fu taaba, dee ita fu mēŋa bāma n ɪtɪ se'em na, fōn wun yāŋe pōse Nawěnnε n diti tōon-be'ero sarɪya la me bu? ⁴ Bu fōn ka nannɪ la Nawěnnε ɪr-sōŋɔ, la a sū-bugsum, la a sū-mā'are n zo'oge la? Fu mi tɪ Nawěnnε ɪr-sōŋɔ la boorɪ tɪ fu teege la yem base tōon-be'ero.

⁵ La fōn sūure ke'em me tɪ fu ka bɔɔra tɪ fu teege yem, bela tɪ fu lagsra sɪbgre bīŋra fu mēŋa zuo gu'ura daar-sɛka tɪ Nawěnnε wun pa'ale a sū-isgre di nēba sarɪya la sɪra la.

⁶ Nawěnnε wun bɔ nēra woo yɔɔɔ mase wu ɛn tōm se'em. ⁷ Nēr-seba n mōrgε ita sōŋa ɛera nā'asgɔ la pēka, la vɔm n ka ba'asrɪ Nawěnnε zē'am na, a wun bɔ ba la vɔm n ka ba'asrɪ. ⁸ La nēr-seba n ka sake bɔ, sɪ'sra sɪra, dee ita sela n ka mase la, wun yē Nawěnnε sū-isgre, la sɪbgre. ⁹ A wun botɪ toogo la sū-sā'ŋɔ n paage nēr-seba wuu n tōnnɪ tōon-be'ero la. Pɔspɔsɪ de la Zɪfdōma, pa'ase la seba n dagɪ Zɪfdōma. ¹⁰ La nēr-seba wuu n ɪtɪ sōŋa wun yē la na'am pāŋa, la nā'asgɔ, la sū-mā'asum. Pɔspɔsɪ de la Zɪfdōma, pa'ase la seba n dagɪ Zɪfdōma. ¹¹ Se'ere n soe la, Nawěnnε ka bɔkrɪ nēba.

¹² Nēr-seba n ka bāŋe Amoyisi lɔɔ la dee tōnna tōon-be'ero, ba wun sā'am ba tōon-be'ero la ŷyā tɪ la ka doose la lɔɔ la. La Zɪfdōma n tarɪ Amoyisi lɔɔ la dee tōnna tōon-be'ero la, Nawěnnε wun dɪke la lɔɔ la di ba sarɪya. ¹³ La dagɪ seba n selsrɪ lɔɔ la n mase Nawěnnε zē'am, la de la seba n sake ɪtɪ wu lɔɔ la n yeke se'em na n mase. ¹⁴ Seba n dagɪ Zɪfdōma n ka tarɪ Amoyisi lɔɔ la, ba sǎn ita ba mēŋa wu lɔɔ la n yeke se'em na, la pa'ale tɪ ba mēŋa mi sela n mase me, baa la ban ka tarɪ lɔɔ la. ¹⁵ Bela ba pa'alɪ tɪ sela tɪ lɔɔ la yetɪ ba ita la boe ba sūurum me, tɪ ba putē'ere n mi se'em na mē pa'ala tɪ bela de la sɪra. Bela tɪ ba putē'era ɛn yeta ba tɪ ba ka ɛŋe sōŋa, bu ba ɛŋe sōŋa. ¹⁶ Bōn-bāna wun puke la daar-sɛka tɪ Nawěnnε wun botɪ Azezi-krisi di nēba yela n sugε sarɪya, mase wu kō-yēlga la tɪ mam mōole n yetɪ se'em na.

Zɪfdōma, la lɔɔ

¹⁷ Fōn yetɪ fōn de la Zɪfu la, fōn te'ege la Amoyisi lɔɔ la yēsna tɪ fōn de la Nawěnnε nēra, ¹⁸ fōn mi Nawěnnε n boorɪ se'em me. Lɔɔ la zāsum fōn me tɪ fōn mina sela n ɛn sōŋa, la sela n ka ɛn sōŋa bɔke. ¹⁹ Fu tē'ese tɪ fōn mi me tāna wun pa'ale fɔɔsɪ sore. Fu tē'ese tɪ fōn de la peelem bɔ nēr-seba n boe lika puam na. ²⁰ Fu tē'ese tɪ fōn zāsɪ na seba n ka mi, dee dena kɔma karēnsāama, se'ere n soe la, fōn tē'ese tɪ lɔɔ la puam, fōn tarɪ bāŋre zōnzōnnɔ, la sɪra me. ²¹ Fōn zāsɪ fu taaba la, bēm tɪ fu ka zāsna fu mēŋa? Fōn mōolɪ yeta nēba tɪ ba da zūura, dee tɪ fōn mēŋa zūura. ²² Fōn yetɪ nēba tɪ ba da ita yalsɪ, dee ita yalsɪ fu mēŋa. Fōn nē'esrɪ бага tɪ ba māale nā'asra la tɪ ba de la bōn-pō'osa, dee

kě'era ba deto puam zūura ba yōoro dita. ²³ Fōn yēsni me la Nawēnne lɔ la, dee si'isra lɔ la n ye le se'em na, ita Nawēnne yānne. ²⁴ La gulse Nawēnne gōŋɔ puam yeti: «Yāma Zifdōma iŷā ti buuri baseba nērba tɔgra be'em pɔ'ɔra Nawēnne yu'ure.»

²⁵ Fu sǎn sakra lɔ la, wāaga la tarɔ yōoro me. La fu sǎn si'ise lɔ la, la de la zǎŋa, la ǎn wu fu ka wǎ me na. ²⁶ La buuri seka n ka wǎti, nēra sǎn sake ita lɔ la n yeti ba ita se'em na, Nawēnne wun geele ē wu nēra n wǎ. ²⁷ Nēr-seka n ka wǎ, dee sake ita lɔ la n ye le se'em na, wun zerge fu me fōn tarɔ lɔ gōŋɔ la, wǎ dee si'isra lɔ la.

²⁸ La dagɔ seka n iti Zifdōma ɔrgɔ ti nērba yēta n de Zifu. La dagɔ wāaga ti nērba yēti la n botɔ fu dena Nawēnne nēra. ²⁹ Zifu sira sira de la seka n de Zifu a sūure puam. Wāaga sira sira de la Nawēnne Sira n iti sūure puam, la dagɔ wāaga wu lɔ n gulse se'em na. Nawēnne n pēgrɔ nēr-ēŋa, la dagɔ nērsaalba.

3 La sǎn dena bela, Zifdōma tarɔ zu-yēlga la bēm puam gǎnna seba n dagɔ Zifdōma, la wāaga la yōoro de la bēm? ² Yōoro la zo'oge me. Pɔspɔsi, Nawēnne dɔke a yetɔga ēŋe la Zifdōma nu'usum. ³ La ba nērba baseba sǎn dagna sira dōma, bela wun botɔ Nawēnne kǎn dena sira dāana me bu? ⁴ Ayel, la dagɔ bela. Baa nērba wuu sǎn dena pōmpɔrndōma, Nawēnne ken dena la sira dāana wu lan gulse yeti:

«Fu yetɔga puam, nērba mi ti fōn mase me dena sira dāana.

Nērba sǎn zerge fɔ, fōn tarɔ buuro me.»

⁵ La tōma n iti sela n ka mase la sǎn botɔ nērba bǎŋe ti Nawēnne mase sela woo puam, ti wun yeti bēm? Ti wun yeti Nawēnne tōoma ka mase, ēn sɔbgrɔ ti la iŷā bu? Ayel, la dagɔ bela. Mam tɔgrɔ wu nērsaalba n tē'es-ri se'em na. ⁶ Nawēnne sǎn dagna sira dāana, a kǎn yǎŋe nɔ dita dūnia nērba sarɔya.

⁷ La mam pōmpɔrŋɔ sǎn botɔ Nawēnne sira pukra pa'asra, ti la dena nǎ'asgo bɔ'ɔra Nawēnne, bēm ti ba wun di mam sarɔya ti mam de la tōon-be'ero dāana?

⁸ La sǎn dena bela, bēm ti ti kǎn yeti: «Ti ita be'em ti la botɔ sela n de sōŋa wa'am?» Nērba baseba dōti mam ti mam n ye le bela. Nawēnne wun di nēr-bāma sarɔya wu lan mase.

Nēra ka boe n mase Nawēnne zē'am

⁹ Bela, tōma Zifdōma gǎnnɔ nēr-seba n dagɔ Zifdōma la me bu? Ayel! La dagɔ bela. Mam dēŋe pōn ye le ti Zifdōma, la seba n dagɔ Zifdōma, tōma wuu boe la tōon-be'ero yamne puam, ¹⁰ wu lan gulse Nawēnne gōŋɔ puam yeti:

«Nēra ka boe n mase, baa ayɔla.

¹¹ Nēra ka boe n tarɔ yem ɛera ti a bǎŋe Nawēnne, baa ayɔla.

¹² Nērba wuu bure la poore bɔ Nawēnne, ba wuu tu-uge me.

Nēra ka boe n iti sōŋa, baa ayɔla.

¹³ Ba nōa ǎn wu yɔɔgɔ n vuke.

Ba tarɔ ba zilisi la pǎ'asra la nērba.

Ba nōore yetɔga ǎn wu bōnsela zēlōm na.

¹⁴ Ba nōa pɔre la kǎ'a-be'ero, la yetɔg-be'ero.

¹⁵ Ba ka yagsnɔ la nērba kua.

¹⁶ Ban doose zē'e-seka woo tole, la de la sǎ'arɔ, la too-go ti ba basrɔ mɔ.

¹⁷ Ba ka mi sū-mǎ'asum sore.

¹⁸ Ba nēnsɔ ka boe ti ba zoe Nawēnne.»

¹⁹ Tōma mi ti sela wuu ti lɔ la yeti la, a yeti la seba n doli ē na. Bela ti nērba wuu nōa wun mūm, ti ba wun bǎŋe ti ba koŋe Nawēnne zē'am. ²⁰ Se'ere n soe la, nēra ka boe n tā wun sake lɔ la n ye le se'em na, mase Nawēnne zē'am. Lɔ la wen botɔ nēra bǎŋra me ti a de la tōon-be'ero dāana.

Nawēnne n botɔ nērba mase a zē'am se'em

²¹ La lɛɛɛ wǎ Nawēnne puke pa'ale ēŋa n iti se'em botɔ nērba mase a zē'am, ti lɔ la nēŋa ka bɔna mɔ. Lɔ gōŋɔ, la Nawēnne nōtɔ'ɔsrɔba dēŋe pōn tɔge a yelle me. ²² La de la nēra n bɔ Azezi-krisi sira iŷā, ti Nawēnne botɔ a mase a zē'am. A iti bela bɔ'ɔra la nēr-seba wuu n bɔ Azezi-krisi sira la, bɔkre ka boe. ²³ Se'ere n soe la, nērsaalba wuu tōm na tōon-be'ero koŋe Nawēnne nǎ'asgo. ²⁴ La Nawēnne yel-sōnne na iŷā, a botɔ ba mase a zē'am na zǎŋa, Azezi-krisi n fǎarɔ ba tōon-be'ero puam na iŷā.

²⁵ Nawēnne n looge Azezi ti a ki, ti a zum yese la iŷā, a wun base nēr-seba n bɔ ē sira la tōon-be'ero taale. Bela Nawēnne pa'ale ti ēŋa mase me dena sira dāana. Kurum, Nawēnne mǎ'age la a sūure ka sɔbge nērsaalba ba tōon-be'ero la iŷā. ²⁶ A ēŋe bela ti a pa'ale lɛɛɛ wǎ ti ēŋa de la sira dāana, ēŋa mēŋa mase me, dee botɔ nēr-seba n bɔ Azezi sira la mase ēŋa zē'am.

²⁷ Bela, bēm puam ti nēra tā wun wē yō'ogo? Sela ka boe. Bēm iŷā? La dagɔ nēra n sakrɔ lɔ la iŷā ti a mase, la de la ēn bɔ Azezi-krisi sira iŷā. ²⁸ Tōma yē ti la de la nēra n bɔ Krisi sira iŷā ti a mase Nawēnne zē'am, la dagɔ ēn sakrɔ lɔ la iŷā.

²⁹ Bu Nawēnne de la Zifdōma mǎ'a Nawēnne? A ka po dena nēr-seba n dagɔ Zifdōma la Nawēnne? A po dena la seba n dagɔ Zifdōma la Nawēnne. ³⁰ Nawēnne de la ayɔla, a wun botɔ Zifdōma mase a zē'am, ban bɔ sira iŷā, dee botɔ seba n dagɔ Zifdōma la mē mase a zē'am, ban bɔ sira iŷā. ³¹ Tōma n yeti nēra n bɔ sira iŷā n botɔ a mase la, bela boorɔ ti la yeti bɔ sira iŷā lɔ la ka le tara vōore me bu? Ayel, la dagɔ bela. Tōma pa'ale ti lɔ la tarɔ vōore me.

Abraham māmsgo

4 Tl wun yele Abraham n de tl yaaba la yelle yeti bo? A yuun yē la bēm? ² La sǎn de n Abraham tōoma ĩyǎ n botl a dēna nēra n mase Nawēnne zē'am, a yuun tā wun wē yō'ogo mē. La a ka tā wun wē yō'ogo Nawēnne zē'am. ³ La gulse Nawēnne gōṅṅ puam yeti: «Abraham bɔ la Nawēnne sira, tl Nawēnne yeti a de la nēra n mase ēṅa zē'am.» ⁴ Nēra sǎn tōnna tōoma, a to'ori la yɔɔɔ. Yɔɔɔ la dagl bɔ'a tl ba bɔ ē, la de la a bōnɔ. ⁵ La nēra sǎn ka tōm tōone, dee bɔ Nawēnne n botl tōon-be'ero dōma masra a zē'am na sira, Nawēnne wun botl a lebge la nēra n mase a zē'am ēn bɔ sira la ĩyǎ. ⁶ Bela tl naba Adavidi mē tɔge yeti, nēra tl Nawēnne yeti a mase a zē'am, tl la dagna a tōoma ĩyǎ, tarl sū-yēlga. ⁷ A yele yeti:

«Nēr-seba tl Nawēnne bɔ ba ba tuure sugri, seba tl a base ba tōon-be'ero taale tarl zu-yēlga.

⁸ Nēr-seba tl Zuudāana Nawēnne ka geele a tōon-be'ero la tarl zu-yēlga.»

⁹ Zu-yēlga ēṅa tl ba tɔge a yelle la, de la nēr-seba n wǎ la mā'a bōnɔ? Ayei, la po dēna la nēr-seba n ka wǎ la bōnɔ. Tōma dēṅe yeti: «Abraham n bɔ Nawēnne sira la ĩyǎ, tl Nawēnne yeti a mase ēṅa zē'am.» ¹⁰ Wakat-kāna tl bōn-ēṅa ēṅe? La de la Abraham n yuun wǎ la poorum bl, lan dēṅe a wāaga la? La de la ēn yuun nǎn ka wǎ la. ¹¹ Bela poorum tl Abraham yǎṅa yuun wǎ, tl la dēna dāalɔ pa'alē tl Nawēnne yeti a de la nēra n mase ēṅa zē'am, ēn bɔ sira la ĩyǎ, wakate seka tl a nǎn ka wǎ la. Bela tl Abraham dēna seba wuu n bɔ Nawēnne sira dee ka wǎ la sɔ-yaaba, tl Nawēnne yeti ba de la nērba n mase ēṅa zē'am. ¹² La Abraham ken dēna la nēr-seba n wǎ la sɔ-yaaba, la dagl nēr-seba n wen wǎ la mā'a, la de la seba n bɔ Nawēnne sira wu Abraham n yuun bɔ sira se'em, dee yuun nǎn ka wǎ la.

Nawēnne bīṅe nōore bɔ la seba n bɔ ē sira la

¹³ Nawēnne yuun bīṅe nōore bɔ la Abraham, la a yusl yeti ba wun wa sɔna dūnia. La dagl Abraham n sakrl lɔ la ĩyǎ tl a bīṅe nōore la, la de la ēn bɔ Nawēnne sira, tl Nawēnne yeti a mase ēṅa zē'am na ĩyǎ. ¹⁴ La sǎn de n nērba n sakrl lɔ la ĩyǎ tl ba tɔ'ora bōn-sōma seba tl Nawēnne bīṅe nōore la, bela bɔ sira la ka tarl yōorɔ, la Nawēnne nōor-bīṅre la ka tarl vōore. ¹⁵ Lɔ la sl'isgo botl Nawēnne sūure n isgra. La zē'e-seka tl lɔ la ka boe, sl'isgo mē ka boe.

¹⁶ Bela, la de la bɔ sira ĩyǎ, tl Nawēnne nōor-bīṅre la wun dēna yel-sōnne bɔ'a n tarl yōorɔ bɔ Abraham yusl la wuu. La, la ka de a yusl seba n doli lɔ la mā'a ĩyǎ, la de la nēr-seba wuu n bɔ Nawēnne sira wu Abraham n yuun bɔ sira se'em na. Abraham n de tl wuu sɔ-yaaba. ¹⁷ La gulse Nawēnne gōṅṅ puam yeti: «Mam wun botl fu lebge so'olum buuri zozo'e sɔ-yaaba.» A de la tōma

sɔ-yaaba Nawēnne tl a bɔ ē sira la zē'am. Nawēnne n botl kūm vɔ'ora, dee botl sela n ka boe bōna. ¹⁸ Abraham yuun bɔ la Nawēnne sira, tara putē'ere gu'ura sela tl a ka tarl nɔ putē'ere tl la tā wun ēṅe. Bela tl a lebge so'olum buuri zozo'e sɔ-yaaba, wu Nawēnne n yuun yeti a yusl wun zo'oge se'em na.

¹⁹ Abraham yuun kurge mē, tara wu yuuma kɔbga, dee la kūm, dee tl a pɔga Asaara yuun dēna kōndɔgre, dee kurge, la baa bela Abraham n bɔ Nawēnne sira la ka bo'oge. ²⁰ Nawēnne n yuun bīṅe nōore tl a ēṅe sela bɔ ē na, a yem yuun ka yɔɔɔ, a bɔ sira mē. La ēn yuun bɔ sira la base mē tl a yē pǎṅa nǎ'asra Nawēnne. ²¹ A sūure yuun ke'em mē tl a mina sōṅa sōṅa tl Nawēnne tā wun ēṅe ēn bīṅe a nōore tl a ēṅe se'em na mē.

²² Bela tl Nawēnne yeti a mase mē ēṅa zē'am, ēn bɔ sira la ĩyǎ. ²³ La dagl ēṅa mā'a ĩyǎ tl la gulse yeti:

«Nawēnne yeti a mase ēṅa zē'am.» ²⁴ La po dēna la tōma mē ĩyǎ. Tōma n bɔ Nawēnne n vo'oge tl Zuudāana Azezi sira la ĩyǎ, tl Nawēnne yeti tl mase ēṅa zē'am.

²⁵ Nawēnne daan base tl ba ku Azezi la tōma tōon-be'ero ĩyǎ, dee vo'oge ē tl a botl tōma dēna nērba n mase a zē'am.

Krisi n naage tōma la Nawēnne

5 Bela, Nawēnne botl tōma dēna seba n mase a zē'am na, tōma n bɔ ē sira la ĩyǎ. La tōma tarl sū-mǎ'asum mē naage la Nawēnne tōma Zuudāana Azezi-krisi ĩyǎ. ² Azezi-krisi n botl tl tāna wun kē Nawēnne zē'am yē a yel-sōnne, tōma n bɔ ē sira la ĩyǎ. Yel-sōnne ēṅa tl tōma te'ege ze kǎṅkǎṅe, dee ita sū-yēlga tara putē'ere gu'ura tl tl wun yē na'am pǎṅa Nawēnne zē'am. ³ La tōma ken ita la sū-yēlga nǎmsgo puam, tōma mi tl nǎmsgo botl tl mōrgra sēnna la nēṅa. ⁴ Tl sǎn mōrgra sēnna nēṅa, la botl tl ita la sira yǎṅra. Tl sǎn ita sira yǎṅra, la botl tl tara putē'ere gu'ura la sela tl tl bɔ sira la. ⁵ Putē'e-ēṅa tl tl tarl la kǎn ēṅe tl yǎnne, se'ere n soe la, Nawēnne Sira la tl a bɔ tōma la ēṅe la a nōṅlum tl sūa puam.

⁶ Se'ere n soe la, tōma n daan ka tā wun looge yelle la, Nawēnne n looge yem wakat-seka la n paage la, Krisi ki mē tōon-be'ero dōma ĩyǎ. ⁷ La de la toogo tl nēra ki nēra n mase ĩyǎ. La dase'ere, tā tl nēr-seka wun yē buraane sake ki nēr-sōṅɔ ĩyǎ. ⁸ La Nawēnne pa'alē ēṅa n nōṅe tōma zozo'e se'em mē, tl tōma n daan ken dēna tōon-be'ero dōma la, tl Krisi ki tōma ĩyǎ. ⁹ Krisi n ki tl a zum yese la ĩyǎ n botl tōma mase Nawēnne zē'am, bela, la de la sira tl Krisi n wun fāage tōma, tl tl pōse Nawēnne sū-isgre. ¹⁰ Tōma daan de la Nawēnne be'eba, la a Dayua la kūm ĩyǎ tl tōma naage la ē. Bela, tōma n naage la Nawēnne na, la de la sira tl Krisi n vɔa la ĩyǎ, tl wun yē fāare. ¹¹ Sela n pa'ase, tōma itl sū-yēlga mē la Nawēnne, tōma Zuudāana Azezi-krisi ĩyǎ, ēṅa n botl tōma naage la Nawēnne na.

Adam la Azezi-krisi yelle

¹² La de la nēra ayula n yuun tōm tōon-be'ero iŷā n boti tōon-be'ero wa'am dūnia. Tl tōon-be'ero la tarl kūm wa'am. Bela tl kūm kuura nērsaalba wuu, ban tōnni tōon-be'ero la iŷā. ¹³ Halı lan dēŷe Nawēnne n bō Amoyisi a ɔɔ la, tōon-be'ero yuun boe dūnia zuo mē. La ɔɔ la n yuun nān ka boe la, Nawēnne yuun ka geelt tōon-be'ero. ¹⁴ Halı lan pɔsē Adam wakate tarl ka paage Amoyisi wakate la, kūm pōn bōna mē tāna nē-ba. Baa la nēr-seba tōon-be'ero n ka ān wu Adam n yuun sɪ'ɩsē Nawēnne nōore se'em na wuu ki mē.

Adam yuun de la Azezi n yeti a wa'am na wōnne.

¹⁵ La ba dagi buyula. Adam tuure la, la Nawēnne bɔ'a la ka tā wun dıke make taaba. Nēra ayula tuure iŷā n boti nēba zozo'e kiira. La bāŷe-ya tl Nawēnne yel-sōnne n ān sōŷa gānna, la de la nēra ayula n de Azezi-krisi iŷā tl Nawēnne ēŷe nēba zozo'e yel-sōnne zo'oge gāŷe.

¹⁶ Nawēnne bɔ'a la n ɩtl sela la, de la to'ore la nēra ayula tōon-be'ero n ēŷe sela la. Nēra ayula tōon-be'ero la tarl la sarıyadia wa'am, tl la sēna la sɩbgrē. La nēba n tōm tōon-be'ero zozo'e la poorum, Nawēnne yel-sōnne tl a ēŷe bɔ nēba la boti ba mase mē a zē'am. ¹⁷ Lan de nēra ayula tuure iŷā tl kūm tāna nēba wuu la, bāŷe-ya tl nēra ayula n de Azezi-krisi mā'a iŷā, nēr-seba wuu tl Nawēnne ēŷe ba yel-sōnne zo'oge, boti ba mase a zē'am na, wun vɔa mē, dita na'am Azezi-krisi iŷā.

¹⁸ Bela, nēra ayula tuure n boti Nawēnne dita nēba wuu sarıya sɩbgra ba la, bela mē, nēra ayula mā'a tōone n mase la iŷā n boti nēba wuu mase Nawēnne zē'am tara vɔm. ¹⁹ Nēra ayula n sɪ'ɩsē Nawēnne nōore iŷā n boti nēba zozo'e dēna tōon-be'ero dōma la, bela mē, nēra ayula mā'a n sake Nawēnne nōore iŷā, tl Nawēnne boti nēba zozo'e dēna nēba n mase a zē'am. ²⁰ La sān dēna ɔɔ la, a wa'am mē tl tuure wun zo'oge pāɩ. La zē'e-seka tl tōon-be'ero zo'ori pa'asra, Nawēnne yel-sōnne zo'ori mē pa'asra gānna bela.

²¹ Bela, tōon-be'ero n tarl pāŷa boti nēba kiira la, bela mē, Nawēnne yel-sōnne n tarl pāŷa boti nēba mase a zē'am tara vɔm n ka ba'asɩ, tl Zuudāana Azezi-krisi iŷā.

Azezi-krisi iŷā tōma vɔa la vɔm paalga

6 Bela, tl wun yeti bēm? Tl wun ken tōnna la tōon-be'ero tl Nawēnne yel-sōnne pa'ase zo'oge bu?

² Ayēɩ, la dagi bela. La sān dēna tōon-be'ero ɩrgɔ yelle, tōma de la kūm, tōon-be'ero ka le sɔna tōma. Tl wun ēŷe la wāne le tōnna tōon-be'ero? ³ Yāma ka mi tl tōma wuu n mise ko'om lagum na Azezi-krisi dēna ayula la, tōma lagum na ē mē dēna ayula a kūm na puam? ⁴ Bela, ko'om misga la puam tōma po lagum na ē mē ki, tl ba laage tōma la ē ɩ. Nawēnne n de tl Sɔ na'am pāŷa n boti Krisi vo'oge la, tōma mē vɔa la vɔm paalga.

⁵ La de la sɩra tl tōma n lagum na Krisi dēna ayula a kūm puam na, bela, tōma mē wun lagum na ē dēna ayula, vo'oge wu ēŷa n vo'oge se'em na. ⁶ Tl mina-ya tl tōma n de se'em kurum na lagum na Krisi mē ki dɔ-pu-urŷa la zuo, tl tōma tōon-be'ero yemleego pāŷa wun sā'am ba'ase, tl tōma kān le dēna tōon-be'ero yamsɩ. ⁷ Se'ere n soe la, nēra sān ki, tōon-be'ero ka le tara pāŷa la ē. ⁸ La tōma sān lagum na Krisi ki, tōma mi sɩra sɩra tl tōma mē wun lagum na ē vɔa. ⁹ Tōma mi tl Krisi ki mē, tl Nawēnne vo'oge ē, tl a kān le ki. Kūm ka le tara pāŷa la ē. ¹⁰ Krisi n ki la, a ki la nōore ayula sā'am tōon-be'ero pāŷa wakate wuu iŷā. La ɩēɩe tl a vɔa wā, a vɔa bɔ'ɔra la Nawēnne nā'asgɔ. ¹¹ Bela mē, geele-ya ya mēŷa wu yāma ki mē tl tōon-be'ero ka le sɔna ya, dee vɔa bɔ'ɔra Nawēnne nā'asgɔ, yāma n lagum na Azezi-krisi dēna ayula la iŷā.

¹² Bela, da base-ya tl tōon-be'ero le sɔna ya vɔm wā n ba'asɩ la, boti ya sake a yemleego n de be'em na. ¹³ Da dıke-ya ya iŷā zē'esɩ to'oto'ore tl ba dēna tōon-be'ero tōoma ɩgrɔ tl ya tara ba tōnna be'em. Dıke-ya ya mēŷa bɔ Nawēnne wu nēba n ki dee vo'oge. Dıke-ya ya iŷā zē'esɩ to'oto'ore la wuu bɔ Nawēnne tl a tara ba tōnna sela n mase. ¹⁴ Tōon-be'ero kān le sɔna ya, se'ere n soe la, ɔɔ la ka le sɔna ya, la de la Nawēnne yel-sōnne n soe ya.

Dēna-ya sela n mase yamsɩ

¹⁵ Bela, tl wun yeti bō? Tl wun tōnna la tōon-be'ero, ɔɔ la n ka soe tōma, dee tl Nawēnne yel-sōnne sɔna tōma la iŷā bu? Ayēɩ, la dagi bela. ¹⁶ Ya mi tl ya sān dıke ya mēŷa bɔ nēra dēna a yamŷa sake a nōore, ya sɩɩ de la seka tl ya sakɩ la yamsɩ. Bela, ya sān sake tōon-be'ero, ya de la tōon-be'ero yamsɩ, tl la sēna la kūm. La ya sān sake Nawēnne nōore, ya de la a yamsɩ, tl a boti ya dēna nēba n mase a zē'am. ¹⁷ Tl pu'use Nawēnne a yel-sōnne: Kurum, yāma daan de la tōon-be'ero yamsɩ, la yāma to'oge sɩra zāsŷɔ la mē wu ban zāsɩm ya se'em na, sake ē la ya sūure wuu. ¹⁸ Nawēnne yese ya tōon-be'ero yamne puam mē, boti ya dēna sela n mase yamsɩ. ¹⁹ Mam dıke la nērsaalba yelle make bɔ ya, yāma n ka wōnnɩ sela vōore tɔtɔ la iŷā. Yāma n daan dıke ya iŷā zē'esɩ wuu bɔ tōon-dēgrɔ, la tōon-be'ero tl ba tara ba tōnna tōon-be'ero la, bela mē, ɩēɩe wā, dıke-ya ya mēŷa wuu bɔ, tōnna sela n mase, welge to'ore dēna pupeelem dōma.

²⁰ Yāma n daan de tōon-be'ero yamsɩ la, sela n mase daan ka soe ya. ²¹ Tōon-seba tl ya daan tōm na, ya yē la bēm yōɔɔ ba puam? ɩēɩe wā, la de la yānne bɔ ya, tōon-bāma ba'asgɔ de la kūm. ²² La ɩēɩe wā, Nawēnne yese ya tōon-be'ero puam mē, tl ya lebge Nawēnne yamsɩ. Ya yōɔɔ de la ya welge to'ore malgra ya mēŷa dēna pupeelem dōma. Bōn-ēŷa ba'asgɔ de la vɔm n ka ba'asɩ. ²³ Asɩra, tōon-be'ero yɔɔɔ de la kūm. La

Nawēnne yel-sōnne bɔ'a de la vɔm n ka ba'asɾɪ, tɪn lagum na tɪ Zuudāana Azezi-krisi dɛna ayɪla la ɪyā.

Amoyisi ɔɔ ka le sɔna tōma

7 M sɔbiisi, mam tɔgrɪ la yāma n mi ɔɔ la. Ya mi tɪ ɔɔ la soe nēra la wakat-seka tɪ a vɔa la. ² Tɪ dɪke makɾe: Pɔka sǎn ele, ɔɔ la lu ē mɛ lagum na a sɪra halɪ ka paage a sɪra la vɔm tɛka. La a sɪra la sǎn ki, pɔka la yese elle ɔɔ la n lu ē na a sɪra la puam mɛ. ³ Bela, a sǎn ele buraaga ayēma, dee tɪ a sɪra la ken vɔa, a ēɲɛ la yalsɪ. La a sɪra la sǎn ki, elga ɔɔ la ka le sɔna ē. Bela, a sǎn ele buraaga ayēma, a ka ēɲɛ yalsɪ.

⁴ M sɔbiisi, yāma zē'am la mē de la bela. La sǎn dɛna la Amoyisi ɔɔ la yelle, yāma de la kūm, tɪ ɔɔ la ka le sɔna ya, yāma n lagum na Krisi ki la ɪyā. Bela lɛɛɛ wǎ, yāma yǎɲa de la nēra ayēma n soe ya, la de la Krisi n ki tɪ Nawēnne vo'oge ē na n soe ya, tɪ tɪ wun tōnna tōon-sōma bɔ'ɔra Nawēnne. ⁵ Kurum, tōma n daan vɔa wu tōma mēɲa n boorɪ se'em na, ɔɔ la botɪ tōma yemleego bɔɔra la be'em, base tɪ tōma ɪyā zē'esɪ wuu ita sela n sēm na kūm. ⁶ La lɛɛɛ wǎ, tōma to'oge tɪ mēɲa ɔɔ la zē'am mɛ. Se'ere n soe la, tōma lebge la kūm ɔɔ la zē'am, a daan tarɪ tōma wu tōma boe la yu'a deego puam na. Bela lɛɛɛ wǎ, tōma dolɪ la so-paale tɪ Nawēnne Sɪa pa'alɛ tɔ, tōnna bɔ'ɔra Nawēnne, la ka le dɛna ɔɔ keka n gulse la tɪ tōma dolɪ.

ɔɔ n pa'alɛ tōon-be'ero n de bōn-seka

⁷ Bela, tɪ wun yetɪ bēm? Tɪ wun yetɪ ɔɔ la de la tōon-be'ero bu? Ayɛɪ, la dagɪ bela. La ɔɔ la daan sǎn ka boe nɪ, mam kǎn bǎɲɛ tōon-be'ero n de sela. ɔɔ la daan sǎn ka yele yetɪ: «Da ita sūure», mam kǎn bǎɲɛ nɪ sūure n de sela. ⁸ ɔɔ la n bɔ tōon-be'ero sore tɪ a botɪ mam ita sela n de sūure buuri wuu. Se'ere n soe la, ɔɔ la sǎn ka boe nɪ, tōon-be'ero de la bōn-ki'ɪɲa. ⁹ Kurum, mam n daan ka bǎɲɛ ɔɔ la, mam daan vɔa mɛ, tɪ yelle kana. La mam n yǎɲa bǎɲɛ ɔɔ la, tɪ tōon-be'ero tara pǎɲa tōnna, dee tɪ mam ki. ¹⁰ ɔɔ la n de nɪ a tarɪ nērba sēɲɛ vɔm zē'am na, a tarɪ mam sēɲɛ la kūm zē'am. ¹¹ Tōon-be'ero la n yē folle la, a dɪke la ɔɔ la pǎ'ase mam yǎɲɛ, botɪ mam ki.

¹² Bela, ɔɔ la de la bōn-sōɲɔ. Nōore tɪ Nawēnne bɔ la mē de la bōn-sōɲɔ, mase āna sōɲa. ¹³ Bela, sela n ān sōɲa la n botɪ mam lebge kūm bu? Ayɛɪ, la dagɪ bela. La de la tōon-be'ero la n soe bela, a dɪke la ɔɔ la n ān sōɲa la botɪ mam ki, tɪ la puke pa'alɛ tɪ a sɪrɪ de la tōon-be'ero. Bela tɪ ɔɔ la botɪ tōon-be'ero yǎɲa lebge sela n de tōon-be'e-kāte halɪ tɪ la yōsgɛ.

¹⁴ Tɪ mi tɪ ɔɔ la de la Nawēnne Sɪa yelle. La mam de la nērsaala tɪ tōon-be'ero tara mam ita ēɲa n boorɪ se'em. ¹⁵ Mam ka wōnnɪ mam n itɪ sela la vōore. Se'ere n soe la, mam ka itɪ mam boorɪ tɪ m ēɲɛ sela la, mam itɪ la sela tɪ mam ka boorɪ tɪ m ēɲɛ la. ¹⁶ Mam sǎn ita

sela tɪ mam ka boorɪ la, la pa'alɛ tɪ mam sake tɪ ɔɔ la ān sōɲa mɛ. ¹⁷ Bela, la dagɪ mam n itɪ bela, la de la tōon-be'ero n boe mam puam tōnna. ¹⁸ La de se'em na, mam mi tɪ sela n ān sōɲa ka boe mam puam. Mam boorɪ tɪ m yetɪ, sela n ān sōɲa ka boe mam n de nēr-saala mēɲa n vɔa se'em na puam. Mam boorɪ tɪ m ēɲɛ sela n ān sōɲa mɛ, la mam ka tarɪ pǎɲa wun ēɲɛ. ¹⁹ Bela, mam ka itɪ sōɲa la tɪ mam boorɪ tɪ m ēɲɛ la, dee ita be'em na tɪ mam ka boorɪ tɪ m ēɲɛ la. ²⁰ Mam sǎn ita sela tɪ mam ka boorɪ la, la dagɪ mam n itɪ bela, la de la tōon-be'ero la n boe mam puam tōnna.

²¹ Bela, mam bǎɲɛ bōn-ēɲa mɛ: Mam n boorɪ tɪ m ēɲɛ sela n ān sōɲa la, mam tā ita la sela n de be'em mā'a. ²² Mam sūure puam, mam itɪ sū-yēlga mɛ la Nawēnne ɔɔ la. ²³ La mam yē la bōnɔ ayēma n boe mam puam zebra la mam putē'e-sōɲɔ la, botɪ mam dɛna tōon-be'ero la n boe mam puam tōnna la yamɲa. ²⁴ La de la ninbāalga bɔ mam. Āne n wun fāage mam be'em n boe mam puam tara mam wē'esa kūm zē'am wǎ puam? ²⁵ Tɪ pu'use Nawēnne a yel-sōnne, ēɲa n fāage tɔ, tɪ Zuudāana Azezi-krisi ɪyā.

Bela, mam putē'ere puam mam sakɪ la Nawēnne ɔɔ la. La mam mēɲa n boorɪ se'em na n botɪ mam tōnna tōon-be'ero.

Vɔm tɪ Nawēnne Sɪa bɔ'ɔrɪ

8 Bela, subgre ka le bɔna nēr-seba n lagum na Azezi-krisi dɛna ayɪla la zuto. ² Se'ere n soe la, Nawēnne Sɪa pǎɲa n bɔ'ɔrɪ vɔm Azezi-krisi ɪyā la n fāage tɔ tōon-be'ero, la kūm pǎɲa puam. ³ ɔɔ la ka tā wun fāage nērsaalba base, se'ere n soe la, nērsaalba itɪ la ba mēɲa n boorɪ se'em botɪ a ka tarɪ pǎɲa. La sela tɪ ɔɔ la ka tā'age ēɲɛ la, Nawēnne ēɲɛ mɛ. A tōm na a mēɲa Dayua, tɪ a lebge nērsaala āna wu nērsaalba n de tōon-be'ero dōma, tɪ a ki yese tōon-be'ero. A kūm na puam tɪ Nawēnne di tōon-be'ero sarɪya sā'am a pǎɲa nērsaalba puam. ⁴ Nawēnne ēɲɛ bela tɪ tɪ mase ita wu ɔɔ la n yetɪ se'em na, tōma n vɔa wu Nawēnne Sɪa n boorɪ se'em, dee ka vɔa wu nērsaalba mēɲa n boorɪ se'em na. ⁵ Nēr-seba n vɔa wu nērsaalba n boorɪ se'em na, nērsaalba mēɲa yemleego n boorɪ se'em na n pake ba. La nēr-seba n vɔa wu Nawēnne Sɪa n boorɪ se'em na, Nawēnne Sɪa n boorɪ se'em na n pake ba. ⁶ Nēr-saala mēɲa yemleego n boorɪ se'em, sēm na kūm. La a sǎn dɔla Nawēnne Sɪa n boorɪ se'em na, la bɔ'ɔrɪ la vɔm, la sū-mā'asum. ⁷ Nēra sǎn dɔla nērsaalba mēɲa n boorɪ se'em na, la de la be'em la Nawēnne, se'ere n soe la, nērsaala mēɲa n boorɪ se'em na ka sakɪ Nawēnne ɔɔ la, la a pōn ka tāna wun sake ē. ⁸ Nēr-seba n dolɪ nērsaalba mēɲa n boorɪ se'em na ka tā wun paage Nawēnne yem.

⁹ La yāma ka le vɔa wu nērsaalba mēɲa n boorɪ se'em na, yāma vɔa wu Nawēnne Sɪa n boorɪ se'em na,

Nawēnne Sia n boe la yāma la ŷyā. Nēr-seka woo n ka tarɪ Kɪsi Sia la, a ka de Kɪsi nēra. ¹⁰ La Kɪsi sǎn bɔna la ya, Nawēnne Sia la bɔ'ɔrɪ ya la vɔm, Nawēnne n botɪ ya mase a zē'am na ŷyā. La ya ŷyā wun ki mē tōon-be'ero ŷyā. ¹¹ La Nawēnne n vo'oge Azezi la, a Sia la sǎn bɔna la ya lē, ēŋa n vo'oge Azezi-kɪsi n ki la, wun botɪ a Sia n boe la ya lē la, mē bɔ ya ŷyā n kiiri la vɔm paalga.

¹² Bela, m sɔbiisi, la de la pērgre tɪ tɪ vɔa wu Nawēnne Sia n boorɪ se'em na, la dagɪ tɪ vɔa wu tɪ mēŋa yem-leego n boorɪ se'em na. ¹³ Ya sǎn ɪta nērsaalba mēŋa n boorɪ se'em na, ya wun ki mē. La ya sǎn botɪ Nawēnne Sia pǎŋa ku tōon-seba tɪ nērsaala mēŋa boorɪ la, ya wun vɔa. ¹⁴ Nēr-seba wuu n doli sore tɪ Nawēnne Sia pa'alɪ ba la, de la Nawēnne kɔma. ¹⁵ Nawēnne Sia la tɪ a bɔ ya la ka botɪ ya dēna yamsɪ, le zɔta dabeem. A botɪ ya dēna la Nawēnne kɔma, tɪ a bɔ sore tɪ ya wi'ira Nawēnne yetɪ: «Abba», n boorɪ tɪ la yetɪ «tɪ Sɔ».

¹⁶ Nawēnne Sia la mēŋa tɔgrɪ la tōma sia pa'ala yetɪ tōma de la Nawēnne kɔma. ¹⁷ Tōma n de a kɔma la, tɪ wun po to'oge bōn-sōma seba tɪ a bīŋe tɪ a bɔ a kɔma la, tɪ wun lagum na Kɪsi po to'oge bōn-seba tɪ a wun to'oge la. Tōma n nāmsrɪ la Kɪsi lē la, tɪ mē wun po lagum na ē yē nǎ'asgo.

Nǎ'asgo sēka n boe nēŋa

¹⁸ Mam mi mē tɪ nāmsgɔ seba tɪ tōma tarɪ zīna wǎ de la fēe, ka tā wun dɪkē makē la nǎ'asgo sēka tɪ tōma wun wa yē la. ¹⁹ Bela n soe tɪ sela wuu tɪ Nawēnne nāam na gu'ura bɔɔra tɪ ba yē Nawēnne kɔma nǎ'asgo n wun puke la tɔtɔ. ²⁰ Nawēnne n nāam bōn-seba la wuu lebge la sela n ka le tara vōore. La dagɪ ba mēŋa n boorɪ bela, la de la Nawēnne n botɪ ba lebge bela, dee botɪ ba ken tara putē'ere gu'ura ²¹ tɪ Nawēnne wun fāage ba sǎ'arɔ tɪ ba boe a puam na mē, tɪ ba to'oge ba mēŋa, lagum na Nawēnne kɔma po yē nǎ'asgo. ²² Tɪ mi tɪ halɪ wa paam zīna, bōn-nāanɪsɪ la nāmsrɪ mē ōosra la toogo, wu pɔka n virgri la. ²³ La, la dagɪ bōn-nāanɪsɪ la mā'a, tōma mēŋa tɪ Nawēnne dēŋe bɔ tɪ a Sia pa'alē tɪ tɪ wun yē nǎ'asgo la, nāmsrɪ mē tɪ sūure puam gu'ura wakat-seka tɪ Nawēnne wun fāage tɪ ba'ase tɪ tɪ dēna a kɔma. ²⁴ Se'ere n soe la, tōma yē fāare mē, la tōma ken tara la putē'ere gu'ura. La fu sǎn yē sela tɪ fu tarɪ putē'ere gu'ura la, fu ka le tara putē'ere gu'ura. Āne n tarɪ putē'ere gu'ura sela tɪ a yē? ²⁵ La tōma n tarɪ putē'ere gu'ura sela tɪ tōma nǎn ka yē la, tōma mā'age la tɪ mēŋa gu'ura ē.

²⁶ Bela mē, Nawēnne Sia la sēnnɪ sōŋra tōma mē tɪ tɔrgɔ puam. Se'ere n soe la, tōma ka mi tōma n wun pu'usē Nawēnne se'em tɪ la mase. La Nawēnne Sia mēŋa sosrɪ Nawēnne bɔ'ɔra tōma mē, tɔgra yetɔga tɪ nēra ka tā wun tɔge. ²⁷ La Nawēnne n mi nērba sūure la, mi sela tɪ Sia la boorɪ mē. Se'ere n soe la, Sia la sos-

rɪ bɔ'ɔra Nawēnne nērba, wu Nawēnne n boorɪ se'em na.

²⁸ Tɪ mi tɪ sela woo puam, Nawēnne ɪtɪ sōŋa bɔ'ɔra la nēr-seba n nōŋe ē, seba tɪ a looge ba, mase wu ēn looge yem se'em na. ²⁹ Nēr-seba tɪ Nawēnne pōn dēŋe looge la, a pōn dēŋe looge la yem tɪ ēŋa wun botɪ ba āna wu a Dayua la, tɪ a Dayua la wun dēna kēema a sɔbiisi zozo'e zē'am. ³⁰ La nēr-seba ŷyā tɪ a pōn dēŋe looge yem na, a wi ba mē. La seba tɪ a wi ba la, a botɪ ba mase mē a zē'am. Ēn botɪ seba mase a zē'am na, a bɔ ba la nǎ'asgo.

Sela ka boe n wun welge tōma la Nawēnne nōŋlum

³¹ Bela tɪ wun yetɪ bēm? Nawēnne sǎn bɔna la tōma, āne n tā wun zēbe la tōma? ³² Nawēnne ka base a mēŋa Dayua la tɪ a pōse kūm. A base mē tɪ ba ku ē tōma wuu ŷyā. A wun ēŋe la wāne kǎn bɔ tōma sela wuu la a Dayua la? ³³ Āne n wun tā'age dōre nēr-seba tɪ Nawēnne looge la? La de la Nawēnne mēŋa n botɪ ba mase. ³⁴ Āne n wun di ba sarɪya sɪbge ba? Nēra ka boe. Azezi-kɪsi ki mē, dee vo'oge, sēŋe ka zēa Nawēnne zuugɔ, sɔsra tōma ŷyā. ³⁵ Āne n wun welge tōma la Kɪsi nōŋlum na? Toogo bu, sū-sǎ'arɔ bu, nāmsgɔ bu, kɔm bu, nōŋɔ bu, yel-pakre bu, bu kūm n wun yāŋe welge tōma? Sela ka boe. ³⁶ La de wu lan gulse Nawēnne gōŋɔ puam yetɪ:

«Nawēnne, fōn doosgo ŷyā tɪ tōma pōsra tɪ yōore daare woo.

Ba ɪtɪ tōma wu piisi tɪ ba tarɪ sēnna kɔɔrna.»

³⁷ La yel-bāma wuu puam, sēka n nōŋe tōma la n bɔ'ɔrɪ tōma pǎŋa tɪ tōma yāŋra. ³⁸ Mam mi sɪra sɪra, tɪ sela sela ka boe n wun yāŋe welge tōma la Nawēnne nōŋlum. La sǎn dēna kūm, bu vɔm, bu malekadōma, bu pǎnsɪ dōma, bu ke'engo dōma, bu sela n boe lēlē wǎ, bu sela n sēm, ³⁹ bu bōn-seba n tarɪ pǎŋa saazu-um, bu sela n tarɪ pǎŋa tēŋa, bōn-nāanɪŋa baa ayɪla ka tā wun welge tōma la Nawēnne nōŋlum tɪ a nōŋe tōma tɪ Zuudāana Azezi-kɪsi ŷyā la.

Nēr-seba tɪ Nawēnne looge

9 Mam yetɪ la sɪra, mam de la Kɪsi nēra, mam ka parɪ. Nawēnne Sia n botɪ mam mina m sūure puam tɪ mam n yetɪ m yele se'em na, de la sɪra. ² Mam tarɪ la sū-sǎ'arɔ zozo'e, la sū-dōoma daare woo m bu-urɪ la ŷyā. ³ La sǎn tā nɪ tɪ Nawēnne kǎ be'em bɔ mam, tɪ mam welge la Kɪsi, tɪ la sōŋe mam sɔbiisi la n de mam buurɪ la, mam boorɪ mē. ⁴ Ba de la Israyelɪ dōma, la de la Nawēnne n looge ba, botɪ ba lebge a kɔma, bɔ ba nǎ'asgo, bīŋe nōa la ba lē, bɔ ba kɔ, la sore tɪ ba nǎ'asra ē, dee yele ba ēŋa n wun ēŋe bōn-seba bɔ ba. ⁵ Ba buurɪ la ze'ele la tɪ sɔ-yaaba Abraham, la a yɪsɪ la puam. La Kɪsi n lebge nērsaala la, de la bāma buurɪ

něra. Ēŋa n de Nawēnne n gānni sela woo la n soe pē-ka wakate n ka tarī ba'asgo. Amina.

⁶ Mam n yele se'em na, la ka boori ti la yeti Nawēnne ka ēŋe ēn yeti a ēŋe se'em na. La, la dagi seba wuu n de Israyeli buuri la n de Israyeli dōma mēŋa mēŋa Nawēnne zē'am. ⁷ La dagi Abraham yusi la wuu n de a kōma mēŋa mēŋa. Se'ere n soe la, Nawēnne yele Abraham yeti: «La de la A'izaki kōma buuri n wun dēna fu yusi ti mam bīŋe nōore ti m bɔ fu la.» ⁸ La boori ti la yeti, la dagi kōm-seba ti Abraham dōge la wuu n de Nawēnne kōma. La de la kōm-seba n dōge ti la doose wu Nawēnne n bīŋe a nōore se'em na, n de Abraham yusi mēŋa mēŋa, bāma n de Nawēnne kōma. ⁹ Nawēnne bīŋe nōore la wāna yeti: «Wakat-ēna sān wa paage, mam wun leme wa'am, la Asaara wun tara dayua.»

¹⁰ La dagi bela mā'a, tōma yaaba A'izaki pɔga Arabeka yuun dōge la dayɔɔsi bayi, ti ba dēna luba.

¹¹⁻¹² Wakat-seka ti a yuun nān ka dōge ba la, ba nān ka ēŋe sela n de sōŋa bu be'em, ti Nawēnne yuun yele yeti: «Kēema la n wun lebge a yibga la tōntōnna, tōnna bɔ'ora ē.» La a yele bela ti ēn looge yem se'em na n sēŋe nēŋa. Nawēnne n looge nēr-seka la, la dagi a tōoma īyā, la de la Nawēnne n looge yem wi ē. ¹³ La gulse Nawēnne gōŋɔ puam yeti: «Mam nōŋe la Azakɔbi, dee base A'eso.»

¹⁴ Bela, ti wun yeti bo? Ti wun yeti Nawēnne n iti se'em na ka mase bu? Ayel, la dagi bela. ¹⁵ Nawēnne yuun yele Amoyisi yeti:

«Mam wun zoe la nēr-seba ti mam boori la ninbāalga.

La mam wun tara la nēr-seka ti mam boori la zīile.»

¹⁶ Bela, la dagi nērsaala n boori se'em, bu ēn mōgru se'em, la de la Nawēnne n zoti ninbāalga. ¹⁷ La Nawēnne gōŋɔ puam la gulse ti Nawēnne yele naba Afaarō yeti: «Mam n bɔ fu na'am ti m dīke fu pa'ale m pāŋa, ti m yu'ure wun yese dūnia wuu.» ¹⁸ Bela, Nawēnne zoti la nēr-seba ti a boori la ninbāalga, la ēn boori ti seka sūure ke'em na, a boti a sūure ke'em mē.

¹⁹ Dase'ere fu wun soke mam yeti: «La sān dēna bela, bēm ti Nawēnne zerga nērba ti ba ka ēŋe sōŋa? Āne n tā wun zagse Nawēnne n boori se'em na?» ²⁰ Nērsaala, fōn de la āne wē'era nōke'ene la Nawēnne? Yɔgrɔ lɔkɔ wun soke yagba n yagbe ē na yeti: «Bēm ti fu yagbe mam wāna?» ²¹ Yagba la tā wun ēŋe ēŋa n boori se'em la yɔgrɔ la mē. A tā wun dīke yɔgrɔ buyila mē, dīke ba pusuka yagbe lɔkɔ n tarī yōorɔ dēna tuulum bōnɔ, dee dīke pusuka yagbe lɔkɔ n dagi tuulum bōnɔ.

²² La de la bela ti Nawēnne ēŋe. Nawēnne boori ti a pa'ale la a sū-isgre, dee boti nērba wuu bāŋe a pāŋa. La a yōke a mēŋa mē, mā'age a sūure la seba n mase ti a sū-isgre sige ba zuto, dee nara ti a sā'am ba la. ²³ La a ken bɔɔra ti a pa'ale la a nā'asgo n zo'oge se'em nēr-seba ti a zoti ba ninbāalga la zē'am. Bāma de la seba ti a pōn māasum ti ba po yē a nā'asgo. ²⁴ La de la tōma

seba ti a looge la, la dagi Zīfdōma la mā'a, la po dēna la seba n dagi Zīfdōma la. ²⁵ La de wu A'oze gōŋɔ la puam ti la pōn gulse ti Nawēnne yeti:

«Nēr-seba n yuun dagi mam nērba la, mam wun wi ba ti ba dēna mam nērba. La buuri seka ti mam yuun ka nōŋe ba la, mam wun yeti mam nōŋe ba mē.

²⁶ La zē'e-seka ti ba yuun yeti ba ti ba dagi mam nērba la, zē'e-ēŋa ba wun wi'ira ba ti mam n de Nawēnne n vɔa la kōma.»

²⁷ La Nawēnne nōtɔ'ɔsa A'ezayi yuun tɔge Israyeli dōma yelle yeti:

«Baa Israyeli dōma sōore sān zo'oge wu tēntōnbī'isgo n boe ko-kāte nōorum na, ba nērba fēfēe mā'a n wun yē fāare.

²⁸ Se'ere n soe la, Zuudāana Nawēnne n yele se'em na, a wun ēŋe a wuu mē tɔtɔ tēŋa zuo.»

²⁹ La ken dēna wu A'ezayi n yuun pōn yele se'em yeti: «Zuudāana Nawēnne n de ke'engo wuu dāana la yuun sān ka deege nī yusi fēe bɔ tōma, tōma wun lebge nī wu Sodom dōma, dee āna wu Gomōori dōma.»

Nēr-seba n bɔ Azezi sira n mase Nawēnne zē'am

³⁰ Bela, ti wun yeti bo? Bu-zāŋsi n daan ka eerī ti ba dēna nērba n mase Nawēnne zē'am na, Nawēnne boti ba dēna la nērba n mase a zē'am, ban bɔ ē sira la īyā.

³¹ Dee ti Israyeli dōma n daan eerī ti lɔɔ la boti ba dēna nērba n mase Nawēnne zē'am na, ka yāŋe ēŋe lɔɔ la n yele se'em na. ³² Bēm īyā? Ba ka eerī ti ba mase Nawēnne zē'am bɔ sira īyā, ba tē'ese ti bāma tōoma mā'a īyā ti bāma wun mase Nawēnne zē'am. Ba wē ba nāma la kugre ti nērba wē'eri nāma luta, ³³ wu lan gulse Nawēnne gōŋɔ puam yeti:

«Bise ya!

Mam bīŋri la kugre n wē'eri nāma Siyō, a de la kugre n boti nērba wē'era nāma luta.

La nēr-seka n bɔ ē sira, yānne kǎn di ē.»

Israyeli dōma ka bɔ kō-yēlga la sira

10 M sɔbiisi, mam n boori se'em na m sūure wuu, dee sɔsra Nawēnne se'em de la mam buuri la yē fāare. ² Mam yeti mē ti ba wɔsge ba mēŋa mē la Nawēnne sore doosgo, la ba ka mi la so-seka ti ba wun doose. ³ Ba ka mi Nawēnne n iti se'em boti nērba masra a zē'am, dee bɔɔra ti ba ēŋe sɔa ba mēŋa mase Nawēnne zē'am. Bela, ba ka sake Nawēnne n iti se'em boti nērba masra a zē'am na. ⁴ Kisi n de lɔɔ la kuki'l, ti nēr-seka woo n bɔ ē sira wun mase Nawēnne zē'am.

⁵ Amoyisi yuun gulse tɔge nēra n wun ēŋe se'em ti lɔɔ la boti a mase Nawēnne zē'am yelle, yeti: «Nēr-seka n sake lɔɔ la n yeti se'em na, wun vɔa, ēn sake lɔɔ la īyā.»

⁶ La sãn dena nêra n wun bɔ Nawënnë sɪra tɪ a botɪ a mase a zẽ'am na yelle, la gulɛ yetɪ: «Da tẽ'esë fu sũure puam yetɪ, әне n wun zom Nawënnë yire?» La boorɪ tɪ la yetɪ, әне n wun zom Nawënnë yire botɪ Krisi sige.

⁷ «Dee da yetɪ, әне n wun sige kɪ'ɪn-tẽŋa?» La boorɪ tɪ la yetɪ, әне n wun sige botɪ Krisi vo'oge. ⁸ Bela, la ken gulɛ yetɪ bẽm? La yetɪ: «Nawënnë yetɔga la lẽm fu mɛ, a boe la fu nõorum, la fu sũurum.» La de la yetɔg-ẽŋa n bela tɪ tõma mõolɪ yetɪ nêrba tɪ ba bɔ sɪra. ⁹ Fu sãn tɔge la fu nõore nêrba zẽ'am tɪ Azezi de la Zuudãana, la fu sãn bɔ sɪra fu sũurum tɪ Nawënnë vo'oge ẽ mɛ, fu wun yẽ fãare. ¹⁰ La de la sũure puam tɪ nêra bɔ'ɔrɪ Azezi sɪra, tɪ Nawënnë botɪ a mase a zẽ'am, nêra tɔgrɪ la a nõore yetɔga yẽta fãare. ¹¹ La gulɛ Nawënnë gõŋɔ puam yetɪ: «Nêr-seka woo n bɔ ẽ sɪra, yãnnë kãn di ẽ.» ¹² Bela, welgre ka boe Zifdõma, la bu-zãŋsɪ tẽŋasuka. Ba lagɪm tara la Zuudãana ayɪla n ɪtɪ bõn-sõma bɔ'ɔra nêr-seba wuu n sosrɪ ẽ na. ¹³ Se'ere n soe la, la gulɛ yetɪ: «Nêr-seka woo n sosrɪ Zuudãana sõŋrɛ, a wun yẽ fãare.»

¹⁴ La ba wun ẽŋɛ la wãne sose ẽ sõŋrɛ, ba sãn ka bɔ ẽ sɪra? La ba wun ẽŋɛ la wãne bɔ ẽ sɪra, ba sãn ka wõm a kõ-yẽlga la? La ba wun ẽŋɛ la wãne wõm kõ-yẽlga la, tɪ nêra sãn ka mõole? ¹⁵ La kõ-yẽlga la wun ẽŋɛ la wãne mõole, Nawënnë sãn ka tõm nêrba? Wu Nawënnë gõŋɔ n yele se'em na: «La de la sũ-yẽlga, fu sãn yẽ nêr-seba n tarɪ kõ-yẽlga sɛna la.» ¹⁶ La, la dagɪ nêrba wuu n sake kõ-yẽlga la. Bela tɪ A'ezayi gulɛ Nawënnë gõŋɔ puam yetɪ: «Zuudãana, әне n bɔ kõ-yẽlga la tɪ tõma mõole la sɪra?» ¹⁷ Bela, la de la kõ-yẽlga la selsgo n sɛm na bɔ sɪra, la kõ-yẽlga la de la Azezi-krisi yelle tɪ ba tɔgrɪ.

¹⁸ Bela, mam sokrɪ ya yetɪ, yãma tẽ'esë tɪ ba ka wõm kõ-yẽlga la mɛ bu? Ba wõm mɛ. La de wu Nawënnë gõŋɔ n yele se'em na:

«Ba kõa la paage tẽŋa wã wuu mɛ,
ba yetɔga la saage dũnia teka wuu mɛ.»

¹⁹ Mam wun ken soke ya yetɪ, yãma tẽ'esë tɪ Israyelɪ dõma ka wõm a võore mɛ bu? Ba wõm mɛ. Amoyisi n yuun de pɔspɔsɪ dãana n yele tɪ Nawënnë yetɪ:

«Mam wun botɪ ya tara sũure la so'olum nêrba n dagɪ mam nêrba,

mam wun botɪ ya sũure isge la so'olum sɛka n ka mi sela võore.»

²⁰ La A'ezayi yẽ buraane mɛ yele tɪ Nawënnë yetɪ:

«Nêr-seba n daan ka eerɪ mam na, ba yẽ mam mɛ,
mam puke m mẽŋa mɛ pa'ale nêr-seba n daan ka sokrɪ mam yelle la.»

²¹ Dee yele Israyelɪ dõma yelle yetɪ:

«Mam tẽege m nu'usi mɛ daare la wuu teese nêrba n si'lsrɪ, dee ka sakra.»

Nawënnë ka zagɛ Israyelɪ dõma

11 Bela mam sokrɪ mɛ, Nawënnë zagɛ a nêrba la mɛ bu? Ayɛɪ, la dagɪ bela, mam mẽ de la Israyelɪ nêra, mam de la Abraham yuŋa, Abẽnzamẽ buuri.

² Nawënnë ka zagɛ a nêrba la tɪ a põn dẽŋɛ looge la. Ya mi Nawënnë gõŋɔ la puam zẽ'e-sɛka tɪ A'eli yuun yõnnɪ la Nawënnë Israyelɪ dõma yelle, yetɪ: ³ «Zu-udãana, ba ku fu nõtɔ'ɔsrɪba la mɛ, ba sirge fu kãabgɔ zẽ'esɪ la mɛ. Mam m yɪla mã'a n weege, tɪ ba bɔɔra tɪ ba mẽ ku mam.» ⁴ La Nawënnë yuun lerge ẽ yetɪ bẽm? A lerge ẽ yetɪ: «Mam botɪ nêrba tusa ayopɔɪ n weege dena mam nêrba, bãma ka ka dũma Baalɪ n de bagre la nẽŋam.» ⁵ Bela mẽ, lɛɛɛ wã, nêrba boe mɛ fẽe, tɪ Nawënnë looge ba a yel-sõnnë ãyã. ⁶ La de la a yel-sõnnë ãyã tɪ a looge ba, la dagɪ ba tõoma ãyã. Nawënnë loore la sãn de nɪ na nêrba tõoma ãyã, a yel-sõnnë na ka le dena yel-sõnnë.

⁷ Bela, bẽm ẽŋɛ? Israyelɪ nêrba ka yẽ bãma n eerɪ sela la. La de la seba tɪ Nawënnë looge fẽe ba puam na mã'a n yẽ. La nêrba baseba la lebge la nêrba n ka wõn-nɪ sela võore. ⁸ La ẽŋɛ wu Nawënnë gõŋɔ n yele se'em yetɪ:

«Halɪ wa paam zĩna,
Nawënnë n burɛ ba yem
tɪ ba ka wõnna sela võore,
botɪ ba nini ka yẽta,
tɪ ba tuba ka wõnna.»

⁹ Adavidi mẽ yele Nawënnë yetɪ:

«Botɪ ba dia la dena bẽrgɔ bɔ ba, yõke ba,
tɪ ba wẽ nãma lui yẽ nãmsgɔ n de ba yɔɔɔɔ.

¹⁰ Botɪ ba nini әне lim,
tɪ ba da yẽta,
botɪ ba nãmsra wakate wuu
wu nêra n tu zeero gõ'osra.»

¹¹ Bela mam sokrɪ ya yetɪ: Israyelɪ dõma n wẽ nãma lui la, la ba'ase mɛ bu? Ayɛɪ, la dagɪ bela. La ban tuuge la ãyã, tɪ bu-zãŋsɪ tã'age yẽ fãare. Nawënnë ẽŋɛ bela tɪ la botɪ Israyelɪ dõma n ɪta sũure. ¹² Israyelɪ dõma tuure la n tarɪ yõorɔ bɔ dũnia, botɪ bu-zãŋsɪ tara Nawënnë bõn-tarsõm na. Ba sãn yẽ fãare ba zõnzõnnɔ, la wun tara yõorɔ zo'oge gãnna.

Bu-zãŋsɪ, la Zifdõma fãare yelle

¹³ Mam yãŋa yetɪ m tɔge la yãma seba n de bu-zãŋsɪ la: Mam n de Krisi Tõntõnna tõnna bɔ'ɔra yãma n de bu-zãŋsɪ la, mam pẽgrɪ m tõone na mɛ. ¹⁴ Mam ɪtɪ bela tɪ m botɪ m buuri la n ɪta sũure, tɪ la botɪ ba nêrba baseba yẽ fãare. ¹⁵ Nawënnë n daan base ba kẽnkeŋa la, a botɪ dũnia nêrba wuu n naage la ẽŋa. La Nawënnë n wun wa le to'oge ba la, la wun әне la wãne? La wun әне wu nêra n ki dee vo'oge.

¹⁶ Fu sǎn dıke pɔspɔsı borborı la bɔ Nawēnne, borbor-seba n weege la wuu mē de la a bōnɔ. Tıa yēga sǎn dena Nawēnne bōnɔ, tıa la wila mē de la a bōnɔ.

¹⁷ Israyelı dōma la ǎn wu Oliivi tıa tı ba sele, tı ba ku'use a wila base. La fōn de bu-zǎnka la ǎn wu Oliivi tıa n boe weem wille tı ba ku'uge, dıke toŋe la tıa tı ba sele la wila. Fōn ǎn wu wille la n to'orı sōŋre tıa tı ba sele la yēga zē'am na. ¹⁸ Bela, da pɔ'cra wila tı ba ku'use base la. Da wē'era yō'ogo, tı la dagı fōn tarı yēga la, yēga la n tarı fōn.

¹⁹ Tǎ tı fu wun yele yetı: «Nawēnne ku'use wila la base, tı a dıke la mam toŋe.» ²⁰ La de la sıra, la de la ban ka bɔ Nawēnne sıra la ıyǎ tı a ku'use ba base. La fōn bɔ ē sıra la ıyǎ tı fu toŋe mī. Bela, da ita tıta'alum, zɔta dabeem. ²¹ Se'ere n soe la, Nawēnne n ka base tıa mēŋa wila la, bǎŋe tı a ken kǎn base fōn mē, fu sǎn ka bɔ ē sıra. ²² Bıse Nawēnne n ıtı sōŋa se'em, dee tɔı se'em. A tɔı me la seba n ka sakrı ē na, dee ita fu sōŋa, fu sǎn ken bɔna a sōŋa la puam. Sǎn dagna bela, a mē wun ku'uge fu base mē. ²³ La Zıfđōma la sǎn base ba sı'ısgo la, dee bɔ Nawēnne sıra, Nawēnne wun dıke ba me lebe toŋe la tıa la. Nawēnne tarı pǎŋa me wun dıke ba lebe toŋe. ²⁴ Fōn ǎn wu Oliivi tıa n boe weem wille, tı Nawēnne ku'uge toŋe Oliivi tıa tı ba sele n dagı fu zē'am. La bǎma n de tıa tı ba sele la mēŋa wila la, la de la nǎana tı Nawēnne dıke ba lebe toŋe la ba mēŋa tıa la ı.

²⁵ M sɔbiisi, mam boorı me tı ya bǎŋe yelle n sugı la, tı ya da bıse ya mēŋa tı yǎma de la yem dōma: Israyelı nērba baseba n ke'em ba sūure ka bɔ sıra la, la wun yu-uge me halı tarı ka paage wakat-seka tı bu-zǎnı wuu tı Nawēnne looge wun yē fǎare. ²⁶ Bela tı Israyelı buuri wuu wun yē fǎare, wu Nawēnne gōŋɔ puam la gulse tı Nawēnne yetı:

«Fǎagra la wun ze'ele la Siyō wa'am.

A wun botı Azakɔbı yııı da le sı'ısra.

²⁷ Mam nōore n bela tı mam wun bıŋe la ba, wakat-seka tı mam wun yese ba tōon-be'ero base la.»

²⁸ Bǎma n zagse kō-yēlga la, ba lebe la Nawēnne be'eba, tı la dena yǎma sōŋre. La, la sǎn dena Nawēnne n looge ba la, ba de la nēr-seba tı Nawēnne nōŋe ba, ba yaabdōma ıyǎ. ²⁹ Nawēnne ka teerı putē'ere la nēr-seba tı a looge, ēŋe yel-sōnne bɔ ba la. ³⁰ Kurum, yǎma bu-zǎnı la zagse Nawēnne me, la lele wǎ, a zoe yǎma ninbǎalga me, Israyelı dōma n zagse ē na ıyǎ. ³¹ Bela, bǎma n zagse Nawēnne lele wǎ, tı a zoe yǎma ninbǎalga la, la de la tı a mē wun zoe ba ninbǎalga.

³² Se'ere n soe la, Nawēnne base nērba wuu tı ba sı'ıse ē, tı a lagım zoe la ba wuu ninbǎalga.

³³ Nawēnne yel-sōnne, la a yem, la a bǎŋe la zo'oge me.

Nēra ka tǎ wun bǎŋe a putē'ere.

La nēra ka tǎ wun bǎŋe a sorɔɔɔ tı a dolı la vōore.

³⁴ La de wu Nawēnne gōŋɔ n gulse yetı:

«ǎne n mi Zuudǎana putē'ere?

Bı ǎne n tǎ wun kǎ'an ē?

³⁵ Bı ǎne n bɔ ē sela,

dee tı a wa lebe ē?»

³⁶ Sela woo ze'ele la Nawēnne zē'am.

Ēŋa ıyǎ tı sela woo bɔna,

dee dena a bōnɔ.

Ēŋa n soe nǎ'asgo wakate wuu.

Amina.

Nawēnne nērba vɔm paalga

12 M sɔbiisi, Nawēnne n zoe tōma ninbǎalga bela la, mam kǎ'anı ya tı ya dıke ya mēŋa bɔ ē tı la ǎna wu kǎabgo n vɔı, tı ya welge to'ore dena a nērba n paarı a yem. Bela n de pu'usgo sore n mase bɔ Nawēnne. ² Da ǎna-ya wu dūnia wǎ dōma n ǎn se'em na. Base-ya tı ya yem like dena paalga, tı ya teege, tǎ'age bǎŋe Nawēnne n boorı se'em: Sela n ǎn sōŋa, sela n paarı a yem, sela n mase sōŋa sōŋa.

³ Nawēnne yel-sōnne tı a ēŋe bɔ mam na ıyǎ, mam yetı ya wuu me, tı ya da tē'esē tē'esgo n gǎnnı ya mēŋa. La tara ya tē'esgo n mase, tı la doose wu Nawēnne bɔ'a tı a bɔ ya nēra woo, yǎma n bɔ ē sıra la. ⁴ Tōma ıyǎ de la ayıla, dee tara zē'esı zozo'e, tı zē'a woo tōoma dena to'oto'ore. ⁵ Bela mē, baa la tōma n zo'oge la, tōma lebe la ıyǎ ayıla, tōma n lagım na Krisi dena ayıla la. La tōma lagım na taaba ǎna wu ıyǎ ayıla zē'esı to'oto'ore la. ⁶ Tı to'oge la bɔ'a to'oto'ore, mase wu Nawēnne n ēŋe tı yel-sōnne bɔ nēra woo se'em na. Bela, seka n tarı bɔ'a n de a tɔ'ɔsra Nawēnne yetɔga tɔ-gra bɔ'cra nērba, a tɔ'ɔsra tɔgra tı la mase wu bɔ sıra n de se'em na. ⁷ Nēr-seka bɔ'a n de sōŋre tōonē, a sōŋra. Nēr-seka bɔ'a n de a zǎsna nērba, a zǎsna. ⁸ Nēr-seka bɔ'a n de a kǎ'ana nērba, a kǎ'ana. La seka bɔ'a n de a bɔ'cra, a bɔ'cra la a sūure wuu. La seka bɔ'a n de a dena nēŋadǎana, a wısgı a mēŋa tōnna sōŋa. Tı nēr-seka bɔ'a n de a zɔta nērba ninbǎalga, a ita la sū-yēlga.

⁹ Base-ya tı ya nōŋlum dena sıra nōŋlum, sise-ya be'em, la ya gure sela n ǎn sōŋa. ¹⁰ Nōŋe-ya taaba sɔbiisi nōŋlum. La ya nanna taaba, tē'esra taaba yelle.

¹¹ Wısgı-ya ya mēŋa, da zɔta-ya zēyǎgre. Tōnna-ya Nawēnne tōoma la ya sūure wuu. ¹² Ita-ya sū-yēlga yǎma n tarı putē'ere gu'ura sela la ıyǎ. Mǎ'age-ya ya sūure toogo puam, mōrgı-ya sēŋe nēŋa la Nawēnne pu'usgo wakate wuu. ¹³ Sōŋe-ya Nawēnne nēr-seba n boorı sōŋre la, la ya ita sǎama sǎano.

¹⁴ Pu'usra-ya Nawēnne bɔ'cra seba n nǎmsrı ya la. Pu'usra-ya tı Nawēnne ēŋe yel-sōnne bɔ ba, la ya da kǎ'ara kǎ'a-be'ero bɔ'cra ba. ¹⁵ Ita-ya sū-yēlga la nēr-seba n tarı sū-yēlga la. La ya kella la seba n kelli. ¹⁶ Tara-ya putē'ere ayıla la taaba. Da dena-ya pa'al-m-mēŋa dōma, sakra-ya lagna la tarumdōma. Da bısra ya mēŋa tı yǎma de la yem dōma.

¹⁷ Da lebse nēra be'em, be'em iŷā. Narge-ya pāŋa ita sela n ān sōŋa nēra wuu zē'am. ¹⁸ La sān dena la yā-ma, ya sān tāna, ya boti sū-mā'asum bōna yāma la nēra wuu tēŋasuka. ¹⁹ M sobi-nōŋrɪsɪ, da lebse-ya lerge be'em ya mēŋa. Base-ya tɪ Nawēnne sūure isge. Tɪ la gulse Nawēnne gōŋɔ puam tɪ Nawēnne yetɪ:

«Mam n de m lebse be'em,
la de la mam n wun ɔɔ.»

²⁰ La ken gulse yetɪ:

«Fu be kɔm sān dōnna,
bɔ ē dia tɪ a di,
koyūuro sān tarɪ ē,
bɔ ē ko'om tɪ a yū.

Fu sān ēŋe bela,
la ān wu bugsāana tɪ fu dɪke dɔŋle a zuugo la.»

²¹ Da base tɪ be'em yāŋe fɔ, ēŋe sōŋa yāŋe be'em.

Tɪ sakra tēŋa la sɔ'ɔnɪba

13 Nēra woo sake tēŋa la sɔ'ɔnɪba n soe ke'engo la. Se'ere n soe la, nēra ka tarɪ nōore tɪ la ka ze'ele Nawēnne zē'am. La de la Nawēnne n bɔ tēŋa la sɔ'ɔnɪba ke'engo. ² Bela, nēr-seka sān sɪ'ɪse tēŋa la sɔ'ɔnɪba nōore, a sɪ'ɪse la Nawēnne n boorɪ tɪ la dena se'em na. Nēr-seba wuu n sɪ'ɪsrɪ la, eerɪ la sɪbgrɛ bɔ'ɔra ba mēŋa. ³ Nēr-seba n ɪtɪ sōŋa la ka zotɪ dabeem la seba n bɪsrɪ tēŋa la, la de la nēr-seba n ɪtɪ be'em na n zotɪ dabeem. Fōn boorɪ tɪ fu da zɔta nēr-seba n soe ke'engo la mɛ bu? Ita sōŋa tɪ ba pēge fɔ. ⁴ Se'ere n soe la, seka n soe ke'engo la tōnnɪ la Nawēnne tōoma fu sōŋrɛ iŷā. La fu sān ēŋe be'em, zoe a dabeem, tɪ la dagɪ zāŋa tɪ a tara ke'engo wun sɪbge. A tōnnɪ la Nawēnne tōone sɪbgra nēr-seka n ēŋe be'em pa'ala Nawēnne sū-isgre. ⁵ Bela iŷā tɪ la nara tɪ nēra sakra nōore, la dagɪ ban wun sɪbge ya la mā'a iŷā, la de la yan mi ya sūure puam tɪ la ān sōŋa la iŷā. ⁶ La ken dena la bōn-ēŋa iŷā tɪ ya ɔɔra lampo. Seba n to'osrɪ lampo la, la de la Nawēnne n bɔ ba tōon-ēŋa tɪ ba tōnna sōŋa. ⁷ Bɔ-ya nēra woo sela n de ya bɔ ē. ɔɔ-ya lampo bɔ seka n de a to'oge lampo, ɔɔ-ya sela woo n de ya ɔɔ bɔ seka n de a to'oge. Zɔta-ya seka n de ya zɔta, la ya nā'asra seka n de ya nā'asra.

Tɪ nōŋe taaba dee vɔa la pupeelem

⁸ Da tara-ya nēra sānne. Sānne seka tɪ ya wun tara de la ya nōŋe taaba. Nēr-seka woo n nōŋe a tadāana sake Nawēnne ɔɔ la wuu mɛ. ⁹ Nawēnne yetɪ: «Da ita yalsɪ, da ku nēra, da zūura, da ita sūure la nēra bōnɔ.» Nawēnne nōa bāna, la baseba la wuu lagse taaba la yetɔg-ēna ayɪla puam n yetɪ: «Nōŋe fu tadāana wu fu mēŋa la.» ¹⁰ Nōŋlum base mɛ tɪ nēra ka ita a tadāana be'em. Bela, nēra n nōŋe a taaba sake la ɔɔ la wuu.

¹¹ Ūŋe-ya bela, yāma n mi wakat-seka tɪ tɪ boe wā la iŷā, wakate paage mɛ dena ya nēge dee base gēem.

Fāare la lem tōma mɛ leelee wā gānna wakat-seka tɪ tōma daan pɔse bɔ Azezi-krisi sura la. ¹² Tēŋa sutum mɛ tɪ beere deege wiire. Bela, base-ya lika tōoma, dee dɪke Nawēnne zebre ɔgrɔ tōnna peelem tōoma. ¹³ Base-ya tɪ tɪ tōnna la pupeelem wu nēra n sēnnɪ wuntēŋa. Tɪ base-ya puyā'an-yooro, la dāam buka, la tūulgo, la yalsɪ, la zebre, dee da ita sūure la taaba. ¹⁴ Ita-ya tɪ Zuudāana Azezi-krisi n ēŋe se'em na, da base-ya tɪ nēr-saala n boorɪ se'em yelle pake ya, tɪ ya bɔɔra tɪ ya ita yāma mēŋa yemleego n boorɪ se'em.

Seba n tarɪ pāŋa, la seba n ka tarɪ pāŋa Nawēnne doosgo puam

14 To'oge-ya nēr-seka n ka tarɪ pāŋa Nawēnne doosgo puam na sōŋa, la ya da wē'era nōke'ene la ē ɪe a tē'esgo puam. ² Nēr-seka tē'ese mɛ tɪ ēŋa tā wun di sela woo mɛ, tɪ seka pāŋa n pɔ'ɔrɪ la dita bōnkɔɔla la zēerɔ mā'a. ³ Bela, seka n diti sela woo la, da pɔ'ɔra nēr-seka n ka diti sela woo la. La seka n ka diti sela woo la, da zerge seka n diti sela woo la, se'ere n soe la, Nawēnne to'oge ē mɛ. ⁴ Fōn de la āne zergra nēra ayēma tōntōnna? A sān ze saazuo, bu a sān lui mɛ, bela pake la a zuudāana. La a wun ze la saazuo, se'ere n soe la, Zuudāana la tarɪ pāŋa mɛ wun botɪ a ze kāŋkāŋe.

⁵ Nēr-seka tē'esrɪ mɛ tɪ dabsa baseba ān sōŋa gānna dabsa baseba mɛ. Tɪ ayēma yetɪ ba wuu de la ayɪla. Dēnɪ tɪ nēra woo bāŋe tɪ ēŋa n tē'esrɪ se'em na mase mɛ. ⁶ Nēr-seka n tē'esrɪ dabsa n ān sōŋa yelle la, ɪtɪ bela nā'asra la Zuudāana. La nēr-seka n diti sela woo la, mē bɔ'ɔrɪ la Zuudāana nā'asgo, ēn pu'usrɪ Nawēnne a yel-sōnnɛ dia la iŷā la. La seka n ka diti dia baseba la, ɪtɪ bela mē bɔ'ɔra la Zuudāana nā'asgo, ēŋa mē pu'usrɪ la Nawēnne a yel-sōnnɛ. ⁷ La de se'em na, tōma nēr-seka ka vɔa a mēŋa iŷā, la nēr-seka ka kiiri a mēŋa iŷā.

⁸ Tōma sān vɔa, tɪ vɔa la Zuudāana iŷā. La tɪ sān ki, tɪ ki la Zuudāana iŷā. Bela, tɪ sān vɔa mɛ, bu tɪ sān ki mɛ, tɪ de la Zuudāana la nēra. ⁹ Se'ere n soe la, Krisi ki mɛ dee vo'oge, tɪ a dena seba n ki, la seba n vɔa Zuudāana.

¹⁰ La fōn, bēm tɪ fōn zergra fu sobia? La fōn mē, bēm tɪ fōn pɔ'ɔra fu sobia? Tɪ wuu wun ze'ele la Nawēnne na'am bīm bīmne nēŋam tɪ a di tɪ sarɪya. ¹¹ La gulse Nawēnne gōŋɔ puam yetɪ:

«Mam n de Zuudāana la vɔa mɛ,
nērsaalba wuu wun ka dūma mam nēŋam,
tɪ nēra woo wun nā'ase Nawēnne.»

¹² Bela, tōma nēra woo wun tɔge a mēŋa yelle bɔ Nawēnne.

¹³ Bela, base-ya tɪ tɪ da le zergra taaba. La de la tɪ looge yem, da ēŋe sela n wun botɪ tɪ sobia tuuge, bu n wun botɪ a base Nawēnne sore. ¹⁴ Mam n lagum na Zuudāana Azezi dena ayɪla la, mam mi sɪra sɪra tɪ sela ka boe dena dēgrɔ a mēŋa. La nēra sān tē'ese tɪ sela de la

dēgrɔ dee di, la de la dēgrɔ bɔ ē. ¹⁵ Bōn-seka tɪ fōn diti la sǎn botɪ fu sɔbia sūure sǎ'am, fu ka le ita wu nōŋlum n de se'em na. Da sake tɪ dia tɪ fu diti la botɪ fu sɔbia tɪ Krisi ki a ɪyǎ la sǎ'am. ¹⁶ Da base tɪ sela n ǎn sōŋa bɔ fōn na, lebge sela n wun dēna yu'ure sǎ'arɔ.

¹⁷ Bēm ɪyǎ, Nawēnne so'olum na dagɪ dia, la bōn-yūula yelle, la de la sela n mase, la sū-mǎ'asum, la sū-yēlga tɪ Nawēnne Sia bɔ'ɔrɪ. ¹⁸ Nēr-seka woo n dolɪ Krisi wǎna, ēŋa dǎana n paarɪ Nawēnne yem, la nērba mē yetɪ me tɪ ēn itɪ se'em na ǎn sōŋa. ¹⁹ Bela, tɪ ita-ya bōn-seba wuu n sēm na sū-mǎ'asum, dee sōŋra nērba baseba tɪ tɪ wuu lagum sēnna nēŋa Nawēnne doosgo puam.

²⁰ Da sǎ'am-ya Nawēnne tōone dia ɪyǎ. Dia wuu ǎn sōŋa me tɪ ba di. La nēra sǎn di sela n wun botɪ a tadǎana tuuge, la ka ǎn sōŋa. ²¹ La ǎn sōŋa tɪ fu da ēŋe bōn-seba wuu n wun botɪ fu sɔbia tuuge Nawēnne sore la zuo, la sǎn dēna nēnɔɔ ɔbga, bu dǎam yūa, bu sela woo n wun botɪ a tuuge. ²² Fōn mi sela la bōn-ēŋa yelle la, tara ē fōn mēŋa la Nawēnne mǎ'a zē'am. Nēr-seka n itɪ sela tɪ a bise tɪ la ǎn sōŋa, dee ka zerga a mēŋa, ēŋa dǎana n tarɪ zu-yēlga. ²³ La nēr-seka n zerga a mēŋa la sela tɪ a diti yelle, a koŋe buurɔ mē. Se'ere n soe la, a ka itɪ ēŋa n bɔ sɪra mina se'em na. La bōn-seka woo n ka dolɪ la bɔ sɪra de la tōon-be'ero.

Ita-ya sela n de ya taaba sōŋre

15 Dēnɪ tɪ tōma seba n tarɪ pǎŋa Nawēnne doosgo puam na, sōŋe nēr-seba n ka tarɪ pǎŋa la, ba tɔrgɔ puam. La tɪ da ɛera sela n ǎn tōma yēlum. ² Dēnɪ tɪ tōma nēra woo ɛera sela n wun ēŋe a tadǎana yēlum, tɪ la sōŋe ē tɪ a sēŋe nēŋa Nawēnne doosgo puam. ³ Azezi-krisi ka ɛ sela n ǎn a mēŋa sūure yēlum, wu lan gulse Nawēnne gōŋɔ puam yetɪ:

«Tuure seba tɪ ba tuurɪ Nawēnne na, sige la mam zuo.»

⁴ Sela wuu tɪ ba yuun gulse Nawēnne gōŋɔ puam na, gulse la tōma zāsŋɔ ɪyǎ, tɪ la wun botɪ tɪ mǎ'age sūure sēnna nēŋa, dee bɔ'ɔra tɪ buraane, tɪ tɪ wun tara putē'ere gu'ura sela tɪ Nawēnne yetɪ a bɔ tɪ la. ⁵ Nawēnne n bɔ'ɔrɪ sū-mǎ'are, la buraane la wun botɪ ya tara putē'ere ayɪla la taaba wu Azezi-krisi n boorɪ se'em na. ⁶ Tɪ ya wuu wun tara nōore ayɪla, la yem ayɪla nǎ'asra Nawēnne n de tɪ Zuudǎana Azezi-krisi Sɔ la.

⁷ Bela, tɔ'ɔsra-ya taaba wu Krisi n to'oge yǎma se'em na, tɪ la wun bɔ Nawēnne nǎ'asgɔ. ⁸ Mam yetɪ ya me tɪ Krisi lebge la Zifdōma tōntōnna, tɪ a ēŋe Nawēnne n yuun bīŋe a nōore la tɪ yaabdōma se'em na, pa'ale tɪ Nawēnne de la sɪra dǎana. ⁹ A ken wa'am me tɪ bu-zǎŋsɪ la wun nǎ'asra Nawēnne, ēn zotɪ ba ninbǎalga la ɪyǎ, wu lan gulse Nawēnne gōŋɔ puam yetɪ:

«Bela tɪ mam wun nǎ'asra fōn so'olum buuri wuu tēŋasuka, la mam wun ken yōom nǎ'ase fōn yu'ure.»

¹⁰ La ken gulse yetɪ:

«So'olum wuu nērba, lagum-ya la Nawēnne nērba ita sū-yēlga.»

¹¹ La le gulse yetɪ:

«So'olum wuu nērba, nǎ'ase-ya Zuudǎana, buuri wuu nērba, pēge-ya ē.»

¹² Aezayi mē gulse yetɪ:

«Azese yuŋa n wun wa'am, a wun sɔna la so'olum buuri wuu.

La so'olum buuri wuu wun tara putē'ere la ē le.»

¹³ Nawēnne n botɪ tōma tara putē'ere la ē na wun bɔ ya sū-yēlga, la sū-mǎ'asum zozo'e, yǎma n bɔ Krisi sɪra la ɪyǎ, tɪ a Sia pǎŋa wun botɪ yan tara putē'ere a zē'am na zo'oge gǎŋe.

Apolɪ tōoma, la ēn tarɪ putē'ere tɪ a ēŋe se'em

¹⁴ M sɔbiisi, mam mi me sɪra sɪra tɪ yǎma itɪ sōŋa me zozo'e, la ya tarɪ bǎŋre wuu zo'oge me tǎna wun kǎ'an taaba. ¹⁵ La baa bela, mam gulse yǎma me zē'esɪ baseba la sū-ke'ɛŋo tɪ m tēge ya yǎma n pōn zāsum mina sela la. La de la Nawēnne n ēŋe mam yel-sōnne, ¹⁶ botɪ mam dēna Azezi-krisi tōntōnna tɪ m tōnna a tōoma bɔ'ɔra bu-zǎŋsɪ la ɪyǎ. Nawēnne tōoma tɪ mam tōnnɪ na de la m mōole a kō-yēlga bɔ bu-zǎŋsɪ, tɪ Nawēnne Sia botɪ ba welge to'ore dēna bɔ'a n paarɪ Nawēnne yem. ¹⁷ Mam n lagum na Azezi-krisi dēna ayɪla la, mam itɪ sū-yēlga me mam n tōnnɪ bɔ'ɔra Nawēnne na ɪyǎ.

¹⁸ Mam kǎn saage tɔge sela yelle, sǎn dagna Krisi n botɪ mam ēŋe sela botɪ bu-zǎŋsɪ sake Nawēnne na mǎ'a. La de la mam yetɔga, la mam tōoma puam ¹⁹ tɪ Nawēnne Sia pǎŋa botɪ mam ēŋe bōn-yǎlma, la yel-kursɪ n tarɪ pǎŋa. Bela tɪ mam ze'ele Zerizalem mōole Azezi-krisi kō-yēlga la wuu zē'esɪ wuu halɪ ka paage Iliri so'olum.

²⁰ La mam n boorɪ se'em de la m mōole Krisi kō-yēlga la zē'e-seba tɪ ba nǎn ka wōm a yelle la, mam ka boorɪ tɪ m mōole zē'e-seka tɪ nēra ayēma dēŋe mōole la, tɪ m da mē nēra ayēma ēbre zuo. ²¹ La de wu lan gulse Nawēnne gōŋɔ puam yetɪ:

«Nēr-seba tɪ ba ka mōole ba a yelle la, wun bǎŋe.

La nēr-seba n nǎn ka wōm a yelle la, wun wōm a vōore.»

²² Bela n gu mam nōore faa, tɪ mam ka yǎŋe wa'am ya zē'am. ²³ La lēle wǎ, mam tōm m tōoma zē'e-bǎma ba'ase mē. La de la yuuma zozo'e tɪ mam boorɪ la m sūure wuu tɪ m wa'am wa bise ya. ²⁴ La mam tarɪ putē'ere tɪ mam sǎn wa we'esa ɛspayē, mam wun doose yē ya, dee bɔna ya zē'am wakate fēe tɪ m putē'ere kɔ'ɔge, dee tɪ ya yǎŋa sōŋe mam tɪ m tole.

²⁵ La lēle wǎ, mam we'esɪ la Zerizalem tɪ m sōŋe Nawēnne nērba n boe mǐ na. ²⁶ Se'ere n soe la, Nawēn-

ne nërba n boe Maseduanı, la Akayi so'olum na looge la yem lagse ligri ti ba sōŋe Nawēnne nërba n boe Zerizalem na tarımdōma. ²⁷ La de la ba mēŋa n looge yem, la, la de la ba ēŋe bela. Zıfdōma la n boti seba n dagi Zıfdōma po lagum to'oge bōn-sōma ti Nawēnne Sia bō ba la. Bela, dēni ti ba mē sōŋe Zıfdōma, la ban tarı sela. ²⁸ Mam sān tarı ligri la ti ba lagse la sēŋe ka bō ba kıl'ılum, mam wun wa'am wa kaage ya, dee tole Espayē. ²⁹ Mam mi ti mam sān wa wa'am ya zē'am, ti wun yē Azezi-krisi yel-sōnne zo'oge.

³⁰ M sōbiisi, ti Zuudāana Azezi-krisi iŷā, la Nawēnne Sia n bō'wı nōŋlum na iŷā, mam sosrı ya me, ti ya lagum na mam mōrge pu'use Nawēnne mam iŷā.

³¹ Pu'use-ya Nawēnne ti m yāŋe pōse la seba n boe Zude so'olum ka bō Azezi sıra la zē'am, la ti mam n tarı sōŋre la we'sa Zerizalem na, Nawēnne nërba la wun to'oge ba la sū-yēlga. ³² Bela, Nawēnne sān bōwra, mam wun wa'am ya zē'am la sū-yēlga, la mam wun yē vo'osgo yāma zē'am. ³³ Nawēnne n de sū-mā'asum dāana wun bōna la ya wuu le. Amina.

Pu'usgo, la kã'anŋ

16 Mam yeti ya ti ya to'oge ti sōbi-pōka Afeebe ya zē'am. A de la Sānkre Wēndeego yel-bısa.

² To'oge-ya ē sōŋa Zuudāana doosgo la puam, wu lan mase ti Nawēnne nërba ita se'em na. La sela sān wa bōna ti a bōwra ya sōŋre, ya sōŋe ē. Œŋa mēŋa sōŋe nërba zo'oge me, la mam mēŋa mē.

³ Pu'use-ya Apriska, la Akila n de mam tōntōn-taaba Azezi-krisi doosgo puam na. ⁴ Ba daan pōse ba yōore me mam iŷā fāage mam. La dagi mam m yla mā'a n pu'usrı ba ya yel-sōnne, bu-zāŋsı Wēndeto la wuu nërba mē pu'usrı ba. ⁵ Mam pu'usrı Azezi nërba la wuu n lagsrı ba yire la. Pu'use-ya m sır-nōŋre A'epayineti bō mam. Œŋa n de pōspōsı nēra n bō Azezi-krisi sıra Azi so'olum. ⁶ Pu'use-ya Amaari n daan tōm nāmse zo'oge bō ya la. ⁷ Mam pu'usrı A'āndronikusi, la Azuniası n de mam buuri n daan po lagum na mam bōna yu'a deem na. Ba de la nërba ti ba nannı Krisi Tōntōnıba la puam, la ba pōn dēŋe mam me lebge Krisi nërba. ⁸ Pu'use-ya Ampiliyatusi n de mam sıre ti mam nōŋe Zuudāana doosgo puam na. ⁹ Pu'use-ya A'urbē n de ti tōntōn-tadāana Krisi doosgo puam na, la m sır-nōŋre A'estakisi. ¹⁰ Pu'use-ya Apelesi n mōrge Krisi doosgo puam na. Pu'use-ya Aristobuli yir-dōma. ¹¹ Pu'use-ya A'erodiyō n de m buuri nēra la. Pu'use-ya nēr-seba n boe Anarsisi

yire dōla Zuudāana la. ¹² Pu'use-ya Atirfenı, la Atirfozı ti ba de la pōgsı n mōrgrı tōnna Zuudāana doosgo puam. Pu'use-ya m sōma Apersidi n mōrge tōm zozo'e bō Zuudāana la. ¹³ Pu'use-ya Arufusi ti nërba zozo'e bısrı Zuudāana doosgo puam na, la a ma n lebge wu mam ma la. ¹⁴ Pu'use-ya Asēnkriti, la Afelgō, la A'ermēsı, la Apatrobası, la A'erması, la sōbiisi seba wuu n boe la ba le la. ¹⁵ Pu'use-ya Afilolōgı, la Azuli, la Aneere la a tā, la A'olēmpası, la Nawēnne nēr-seba n boe la ba le la. ¹⁶ Pu'use-ya taaba la nōŋlum. Krisi Wēndeto nërba la wuu pu'usrı ya.

¹⁷ M sōbiisi, mam kã'anı ya ti ya guusra ya mēŋa la nēr-seba n tarı welgre sēnna ya zē'am, dee sı'ısrı zāsŋa seka ti ya to'oge, boti nërba basra Nawēnne sore la. Zāage ya mēŋa la ba le. ¹⁸ Se'ere n soe la, nēr-bāma buuri ka tōnnı bō'wra ti Zuudāana Azezi-krisi, ba tōnnı na ba mēŋa sōŋre iŷā. Ba tōgrı la nō-yēlum yetōga, la yetōg-yēl sı pā'asra nēr-seba yem n ka zo'oge la.

¹⁹ Nërba wuu bāŋe yāma n sakrı Zuudāana se'em me. Bela, mam itı sū-yēlga me yāma iŷā. La mam boorı me ti ya tara yem mina sela n ān sōŋa, la ya dena pupeelem dōma, da ita sela n de be'em. ²⁰ Nawēnne n de sū-mā'asum dāana la kãn yuuge dee sã'am Asūtāana pāŋa boti a bōna ya nāma tēŋa. Ti Zuudāana Azezi-krisi yel-sōnne wun bōna la ya le.

²¹ Mam tōntōn-tadāana Atimōti pu'usrı ya. Alusiyusi, la Azasō, la Asozipateeri n de mam buuri la mē pu'usrı ya. ²² Mam Atertiyusi n gulse gōŋa wā la, mam mē pu'usrı ya la Zuudāana yu'ure.

²³ Agayusi ti mam sēnnı sigra a yire la pu'usrı ya, la de la ēŋa yire ti Azezi nërba la wuu lagsrı. A'erastı n de tēn-ēŋa lig-gu'ura, la ti sōbia Akartusi pu'usrı ya. [²⁴ Ti Zuudāana Azezi-krisi yel-sōnne bōna la ya wuu. Amina.]

Nawēnne nã'asgo

²⁵ Pēge-ya Nawēnne, ēŋa n tā wun boti ya ze'ele kãŋkãŋe, wu kō-yēlga la ti mam mōole pa'ale ya Azezi-krisi yelle, boti ya bāŋe Nawēnne yelle n sugē la. Yel-ēŋa sugē me halı yuuma yuuma. ²⁶ La leele wā, Nawēnne nōtō'wsrıba gōnnı na yāŋa boti a puke me, wu Nawēnne n ka tarı ba'asgo n bō nōore se'em na. A boti so'olum buuri wuu nërba bāŋe ē me, ti ba wun bō ē sıra, sake ē. ²⁷ Nawēnne ayıla n de yem dāana la sōna nã'asgo wakate n ka ba'asrı, Azezi-krisi yu'ure iŷā. Amina.

1 Korēnti

Bilgre

Apoli yuun gulse gōŋɔ wā bɔ la Nawēnne nērba n boe Korēnti. Apoli yuun pɔse Nawēnne tōoma la bilam, la a kē bilam na yuune la pusuka (Tōoma 18:11).

Korēnti yuun de la tēn-kāte n boe ko-kāte yu'ure n de Mediterane nōorum, ti ðorno ze'elgo zē'esɪ bayi bɔna mī, ti nērba sēnna mī lēebra, ti tēŋa la tara bōntarsōm zozo'e. Nērba zozo'e n yuun boe tēŋa la puam n tarɪ mi'ilum, la bāŋɛ, la sisgo buuri to'oto'ore. La ba tɪ la yalsɪ, la tōon-be'ero buuri zozo'e, ti tōon-bāma mē lonje Azezi nērba la.

Wakat-ēŋa, Apoli yuun ka le bɔna ba zē'am, dee wōm ti welgre, la tōon-be'ero n kē ba tēŋasuka. Bela n botɪ a fabla ba yelle, gulse gōŋɔ bɔ ba.

A gōŋɔ la ti a gulse la, bayi n boe Nawēnne gōŋɔ la puam n sōŋɪ tōma, ti toogo sǎn paage tɔ, ti mē bāŋɛ ti wun ēŋe se'em.

Apoli gulse ba yetɪ: Nawēnne yem gǎnnɪ nērsaalba yem mɛ, dee kā'an ba yetɪ:

Ba base welgre (sapɪtrɪ 1-4),

la yalsɪ ɪrgɔ, (sapɪtrɪ 5),

la ba da le tara ba yela sēnna nēr-seba n ka dolɪ Nawēnne na zē'am māala (6:1-11).

Dee pa'alɛ ba ti la mase mɛ ti ba tara ba ŷǎ la tōnna bɔ'ɔra Nawēnne (6:12-20).

A ken lerge ba la sokɪsɪ ti ba soke ē:

La de la pɔgdire yelle (sapɪtrɪ 7),

la бага nēnnɔ yelle (sapɪtrɪ 8-10),

la Azezi kūm tēere dia yelle (sapɪtrɪ 11),

la Nawēnne Sɪa bɔ'a yelle (sapɪtrɪ 12-14),

la kūm vo'ore yelle (sapɪtrɪ 15).

Gōŋɔ la ba'asgɔ zē'am, a tɔge la ligri ti ba lagsɪ sōŋɪra Azezi nērba yelle, la ēŋa mēŋa sore sēnne yelle, dee pu'use ba (sapɪtrɪ 16).

Gōn-ēna puam, Apoli pa'alɛ ti Nawēnne bɔ'a la wuu puam, nōŋlum n gǎnnɪ ba wuu (sapɪtrɪ 13).

¹ Mam Apoli ti Nawēnne wi, botɪ mam dɛna Azezi-kɪsɪ Tōntōnna wu ēŋa n boorɪ se'em, la ti sobia Asostenɪ n gulse gōŋɔ wā ² bɔ'ɔra yāma seba n de Nawēnne nērba n boe Korēnti la. Nawēnne wi yāma ti ya welge la to'ore dɛna a nērba Azezi-kɪsɪ ŷǎ. Gōŋɔ la ken dɛna la seba wuu n boe zē'a woo pu'usra Azezi-kɪsɪ n de bāma la tōma Zuudāana la ŷǎ.

³ Tɪ Sɔ Nawēnne, la ti Zuudāana Azezi-kɪsɪ wun ēŋe ya yel-sōnnɛ, dee bɔ ya sū-mǎ'asum.

⁴ Mam pu'usrɪ Nawēnne wakate wuu ya ŷǎ, ēn bɔ ya a yel-sōnnɛ Azezi-kɪsɪ ŷǎ la. ⁵ Yāma n lagum na Kɪsɪ dɛna ayɪla la ŷǎ, ti Nawēnne bɔ ya bɔ'a wuu n de mi'ilum buuri wuu, la yetɔga mi'ilum wuu. ⁶ Kɪsɪ kō-yēlga la ti ba tɔge bɔ ya la, yāma gurɛ ē mɛ kǎŋkǎŋɛ.

⁷ Bela, yāma ka konje bɔ'a baa ayɪla, yāma n gu'uri ti ti Zuudāana Azezi-kɪsɪ wa'am wa puke a mēŋa la. ⁸ Ŋa n wun base ti ya ze'ele kǎŋkǎŋɛ ka paage dūnia ba'asgɔ. Ti ba kǎn tā'age dōre ya ti ya ēŋe be'em ti Zuudāana Azezi-kɪsɪ lemŋo daare. ⁹ Nawēnne n wi ya ti ya lagum

na a Dayua Azezi-kɪsɪ n de ti Zuudāana la dɛna ayɪla la, de la sɪra dāana.

Welgre Nawēnne nērba tēŋasuka

¹⁰ M sobiisi, mam sosɪ ya la ti Zuudāana Azezi-kɪsɪ yu'ure ti ya wuu sakra taaba nōore, ti welgre da bɔna ya tēŋasuka. Ŋe-ya nōore ayɪla, tara putē'ere ayɪla la taaba. ¹¹ M sobiisi, se'ere n soe ti mam yele bela la, Akolowe yir-dōma baseba n wa'am wa tɔge pa'alɛ mam ti ka-wōm-taaba n boe ya tēŋasuka. ¹² Mam wōm ti yāma nērba baseba yetɪ, bāma dolɪ la Apoli, ti baseba yetɪ, bāma dolɪ la Apolɔsɪ, ti baseba yetɪ, bāma dolɪ la Apyɛɛɪ, ti baseba mē yetɪ, bāma dolɪ la Kɪsɪ. ¹³ Yāma tē'esɛ ti Kɪsɪ welse mɛ bu? Bu yāma tē'esɛ ti Apoli n daan ki dɔ-puurŋa zuo yāma ŷǎ, bu ba mise yāma ko'om puam la Apoli yu'ure?

¹⁴ Mam pu'usrɪ Nawēnne, mam n ka mise ya nēra baa ayɪla ko'om puam sǎn dagna Akɪspusi la Agayusi la. ¹⁵ Bela, nēra kǎn tā'age yele yetɪ, ba daan mise ēŋa

ko'om puam la mam yu'ure. ¹⁶ Ēhē! Mam daan ken mise la Astefanas la a yir-dōma ko'om puam. La mam ka le mina mam sãn ken mise nēr-seka. ¹⁷ Kri si ka tōm mam ti m mise nērba ko'om puam, a tōm mam ti m mōole la Nawēnne kō-yēlga bō nērba, la, la dagi la nēr-saalba yem, ti la da base ti Kri si n ki kūm dō-puurnja zuo la pãña la lebge zãña.

Nawēnne yem gãnni dūnia yem

¹⁸ Kri si n ki kūm dō-puurnja zuo yetoga la de la yalne bō nēr-seba n ka yē fāare la. La tōma seba n yē fāare la mi ti la de la Nawēnne pãña. ¹⁹ La gulse Nawēnne gōñ puam ti Nawēnne yetu:

«Mam wun sã'am yem dōma yem, dee yese bãnri ba bãnre.»

²⁰ Yem dōma yem vōore de la bēm? Gōn-mitba mi'ilum vōore de la bēm? Dūnia wã nōke'en-dōma n wē'eri nōke'ema ti bāma mi yela zozo'e la vōore de la bēm? Nawēnne pa'ale ti dūnia wã yem de la yalne.

²¹ Nawēnne n ēñe sela la a yem na, nēr-saalba ka tã'age bãnje ē la ba mēña yem. Bela ti Nawēnne boti kō-yēlga la mōolgō ti nēr-saalba yetu la de la yalne la, fāage nēr-seba n bō ē sira la. ²² Zifdōma boori ti ba yē la bōn-yālma n pa'ale ti la de la sira, la Grēkidōma eeri la yem. ²³ Tōma nōo mōoli la Kri si n ki kūm dō-puurnja zuo la kō-yēlga, kō-yēlga ēña ti Zifdōma dīke ti a dena pō'ore yetoga, ti seba n dagi Zifdōma la dīke ti la dena yalne. ²⁴ La Nawēnne n looge seba la, seba n de Zifdōma, la seba n dagi Zifdōma la, mi ti Kri si de la pãña dāana la yem dāana n ze'ele Nawēnne zē'am. ²⁵ Bōn-seka ti Nawēnne ēñe, ti nēr-saalba dīke ti a dena yalne na, taru yem me gãnna nēr-saalba yem. La sela ti Nawēnne ēñe ti nēr-saalba tē'ese ti la ka taru pãña la, taru pãña me gãnna nēr-saalba pãña.

²⁶ M sobiisi, leelee wã, tē'ese-ya bise yãma ti Nawēnne wi la n ãn se'em. Nēr-seba n taru dūnia yem, la nēr-seba n taru pãña, la nēr-zuto ka zo'oge ya puam. ²⁷ La Nawēnne looge sela ti dūnia dōma tē'ese ti la de la yalne, ti a ēñe la yem dōma yãñe, la a ken looge la sela ti dūnia dōma tē'ese ti a ka taru pãña la, ti a boti pãnsi dōma n yē yãñe. ²⁸ La a looge la sela ti dūnia dōma ka bĩsri, la sela ti ba nē'sri, la sela ti ba tē'ese ti a de la zãña la, ti a sã'am sela ti dūnia dōma tē'ese ti a de la ninmō'ore bōno. ²⁹ A ēñe bela ti nēra n da yãñe zēke a mēña Nawēnne nēñam. ³⁰ La Nawēnne n base ti ya lagim na Azezi-kri si dena ayula la, ēña iŷã ti ti tara Nawēnne yem, dee mase Nawēnne nēñam, welge to'ore lebge a nērba n yese tōon-be'ero puam. ³¹ Bela ti la gulse Nawēnne gōñ puam yetu: «Seka n boori ti a wē yō'ogō, a wē yō'ogō la sela ti Zuudāana ēñe la.»

Apoli n mōole Azezi-kri si kō-yēlga se'em

² M sobiisi, mam n daan wa'am ya zē'am wa mōole Nawēnne kō-yēlga n sugē bō ya la, la dagi la yetog-mi'ilum, bu nēr-saalba yem ti mam mōole bō ya. ² Se'ere n soe la, mam daan looge yem ti mam kãn mōole sela sela yelle, sãn dagna Azezi-kri si yelle, ēña n ki dō-puurnja zuo la yelle. ³ Mam n daan boe ya zē'am na, mam daan ka taru pãña, ti dabeem daan tara mam, ti mam gōgra. ⁴ Mam n daan mōole dee zāsum kō-yēlga la, la daan dagi la nēr-saalba yem yetoga ti mam daan tōge bō ya ti ya sake, mam daan tōge me, ti Nawēnne Sia pa'ale a pãña, ⁵ ti yãma n bō Azezi-kri si sira la, la dagi nēr-saalba yem iŷã, la de la Nawēnne pãña iŷã.

Nawēnne yem n ãn se'em

⁶ La baa bela, tōma tōgru la yem yetoga bō'ora seba n bi Nawēnne sore la doosgo puam. La dagi dūnia wã yem, la mē ka de seba n soe dūnia wã yem. Bāma wun lebge la zãña. ⁷ Tōma mōoli la Nawēnne yem n daan sugē ti nērba ka mina. Nawēnne daan pōn looge yel-bāma me lan dēñe dūnia pĩ'ilunjo ti a boti ti yē nã'asgo a zē'am. ⁸ Seba n soe dūnia wã baa ayula ka mi yem ēna wã. Ba daan sãn mi nĩ ē, ba kãn ka nĩ Zuudāana n taru na'am pãña wuu la dō-puurnja zuo ku. ⁹ La de wu lan gulse Nawēnne gōñ puam se'em yetu:

«Bōn-seba ti Nawēnne māsūm ti a bō nēr-seba n nōñe ē na, gãnni bōn-seba wuu ti nēra nãn ka yē, bu wōm, bu tē'ese a putē'erum.»

¹⁰ Nawēnne boti a Sia la puke bōn-bāma pa'ale la tōma. Nawēnne Sia la mi sela woo me, baa la Nawēnne yel-seba n sugē. ¹¹ Āne n mi nēr-saala putē'ere? La de la nēr-saala mēña sia mǎ'a. Bela, nēra mē ka mi Nawēnne putē'ere, sãn dagna Nawēnne Sia la mǎ'a. ¹² La sãn dena tōma, tōma ka to'oge dūnia wã sia, tōma to'oge la Nawēnne Sia n ze'ele a zē'am, ti ti yãñe bãnje bōn-seba wuu ti a bō to.

¹³ La tōma n tōgru yel-bāna wã, la dagi nēr-saalba yem yetoga, tōma tōgru la yetog-seba ti Nawēnne Sia pa'ale tōma, tōma tōgru la yel-seba n ze'ele Nawēnne Sia zē'am bō'ora nēr-seba n taru Nawēnne Sia.

¹⁴ La nēr-seka n ka taru Nawēnne Sia la kãn tã'age to'oge sela n ze'ele Nawēnne Sia zē'am, la de la yalne bō ē, a kãn tã'age bãnje a vōore. Nēr-seka ti Nawēnne Sia boe la ē le mǎ'a n mi Nawēnne Sia la yelle. ¹⁵ Nēr-seka ti Nawēnne Sia boe la ē le n tã wun bãnje sela woo n ãn se'em bōke. La nēra ka tã wun bãnje ēña dāana yelle bōke. ¹⁶ La de wu lan gulse Nawēnne gōñ puam se'em yetu:

«Āne n mi Zuudāana putē'ere?

Āne n wun yãñe kã'an ē?»

La sãn dena tōma, tōma taru la Kri si putē'ere.

Seba n mōoli kō-yēlga la tōoma

3 M sōbiisi, mam daan ka tā'age tōge ya wu nērba n tarī Nawēnne Sīa. Mam daan tōge ya wu nērba n vāa wu ba mēja n boori se'em, wu ya de la bilēesi Krisi doosgo la puam. ² Yāma n daan ka tā wun to'oge zāsŋo ke'engo n ān wu di-ke'ene la īyā, mam daan tōge ya wu bilēesi n mōgri bī'isum dee ka paage di-ke'ene dia. La baa lēele wā, ya ken ka paage ya to'oge zāsŋo ke'engo, ³ yāma n ken vāa wu ya mēja n boori se'em na īyā. Ya sān ita sūure zebra la taaba, bela ka pa'alē tī ya vāa wu ya mēja n boori se'em, dee ita wu dūnia nērba n itī se'em na sira? ⁴ Ya nēra ayīla sān yeti: «Mam dolī la Apolī», tī ayīla yeti: «Mam dolī la Apolōsi», ya ka itī wu dūnia nērba la?

⁵ Apolōsi de la āne? Apolī de la āne? Tōma wen dena la Nawēnne tōntōniba n daan botī ya bō Azezi-krisi sira. Tōma nēra woo tōnni la tōon-seka tī Zuudāana la bō tī tī tōm. ⁶ Tōma ān wu kaarba la, mam sele mē, tī Apolōsi base ko'om. La Nawēnne n botī ba bita. ⁷ Seka n selli, la seka n basri ko'om na de la zāja. Nawēnne mā'a n botī ba bita. ⁸ Seka n selli, la seka n basri ko'om na de la ayīla. Nawēnne wun yō nēra woo wu ēn tōm se'em na. ⁹ Tōma lagum taaba tōnna la Nawēnne tōoma. La yāma ān wu Nawēnne va'am, la ya ān wu Nawēnne deego.

¹⁰ Nawēnne n ēje mam yel-sōnne na īyā, mam tōm wu tōnmēta n mī mēa sōja n ēebe ēbre, tī nēra ayēma mē dōgle a zuo. La nēra woo guuse a mēja la ēn mēti se'em na. ¹¹ Nawēnne dīke la Azezi-krisi tī a dena ēbre la. ēbre ayēma ka le bōna tī nēra wun ēebe. ¹² Nēr-seba n mēti dōgla ēbre la zuo la, baseba dīkri la sālma, bu zūuro, bu kug-sōma ligri n zo'oge mēta dōgla ēbre la zuo. Tī baseba dīkra dōwō, bu mōorō, bu kēnkā mēta dōgla. ¹³ La Azezi-krisi lemŋo daare, nēra woo n tōm se'em wun puke mē peelem puam. La de la bugum n wun make tōoma la, pa'alē nēra woo tōoma n ān se'em. ¹⁴ Bugum na sān ka di nēra tōoma, a dāana wun to'oge yōwō. ¹⁵ La bugum na sān di nēra tōoma, a dāana wun koŋe yōwō. La nēra la mēja wun yē fāare, la a wun āna wu a doose la bugum puam pōse.

¹⁶ Ya ka mī tī ya de la Nawēnne deego tī a Sīa bōna ya puam? ¹⁷ Nēra sān sā'am Nawēnne deego la, Nawēnne wun sā'am a dāana. Nawēnne deego de la a mēja mā'a bōnō, la yāma n de a deego la.

¹⁸ Nēra da pā'ase a mēja. Nēra sān bōna ya puam tē'ese tī ēja tarī dūnia wā yem, la mase mē tī a lebge gōwō dūnia wā puam, bela n wun base tī a lebge yem dāana. ¹⁹ Sela tī dūnia dōma tē'ese tī la de la yem na, de la yalne Nawēnne zē'am. La de wu lan gulse Nawēnne gōŋo puam se'em yeti: «Nawēnne bēti yem dōma mē yōgra ba ba yemkēgsīga la puam.» ²⁰ La ken gulse yeti: «Zuudāana mī yem dōma tē'esgo mē, a mī tī ba

de la zāja.» ²¹ Bela, nēr-seka da wē yō'ogo nērsaala īyā. Sela woo de la yāma bōnō. ²² Mam Apolī, bu Apolōsi, bu Apīyēerī, bu dūnia wā, bu yōvore, bu kūm, bu sela n boe lēele wā, bu sela n wun wa wa'am, yāma n soe ba wuu. ²³ La yāma, Krisi n soe ya, tī Nawēnne sōna Krisi.

Azezi-krisi tōntōniba

4 Bela, dēni tī ya bāje tī tōma de la Krisi tōntōniba, tī Nawēnne dīke a yela n daan sūge ēje tōma nu'usum tī tī tōge bō nērba. ² Ba sān dīke tōone ēje nēra nu'usum tī a bīsa, ba boori tī a dena la sira dāana. ³ La sān dena mam, yāma bu dūnia wā sarīya-ditba sān tōgra mam yelle se'em, la ka itī mam se'ere. Mam mē ka diti m mēja sarīya. ⁴ Mam mī m sūure puam tī mam ka ēje sela n ka ān sōja, la, la dagi bela n pa'alē tī mam mase ya. La de la Zuudāana n diti mam sarīya. ⁵ Bela, da dēje-ya di nēra sarīya dee tī Zuudāana la nān ka leme. A sān wa leme, a wun dīke sela n sūge lika puam yese peelem puam, dee botī bōn-se-ba wuu tī nērsaalba tē'esri ba sūure puam puke. Wakat-ēja, Nawēnne wun pēge nēra woo wu lan mase tī a pēge ē se'em.

⁶ M sōbiisi, mam n dīke m mēja la Apolōsi make bela wuu la, la de la yāma īyā, tī tōma n ēje se'em na wun dena zāsŋo bō ya. Tī ya «da ēje yōse lan gulse Nawēnne gōŋo puam se'em na.» Bela, ya nēra nēra da zēke a mēja wē'era yō'ogo la nēra ayīla dee pō'ra ayēma. ⁷ Bēm soe tī fōn tē'ese tī fōn gānni fu taaba? Bēm tī fōn tarī tī la dagna Nawēnne n bō fō? La fu sān to'oge, wāne tī fu pa'ala fu mēja wu fu ka to'oge mē na?

⁸ Ya tē'ese tī yāma pōn tara Nawēnne bōntarsōm na wuu tī la seke mē. La yāma lebge la na'adōma dee tī tōma ka pa'ase. Mam boori nī tī ya siri dena la na'adōma, tī tōma mē po di na'am na. ⁹ Mam tē'ese tī Nawēnne looge tōma seba n de a Tōntōniba la, tī tī bōna la nērba la wuu poorum, āna wu nērba tī ba di ba sarīya yeti ba ku ba, tī dūnia dōma wuu bīsa dee la'ara, nērsaalba, la malekadōma wuu. ¹⁰ Tōma ān wu zōllo Krisi īyā, la yāma tē'ese tī yāma de la yem dōma Krisi doosgo puam. Ya tē'ese tī tōma ka tarī pāja, la yāma tarī pāja. Nērba pō'wō tōma mē, la ba nā'asri yāma mē.

¹¹ Kōm la koyūuro tarī tōma mē, tī tōma ka tara fu-sōma, tī ba nāmsra tōma, tī tōma ēera ye'ena halī wa paam wakat-ēna. ¹² La tōma tōnni la tī yō'ogo pāja nāmsra yēta tī nōore dia. Ba sān tu tōma, tōma pu'usri la Nawēnne bō'wō ba. Ba sān nāmsra tōma, tōma wībri mē. ¹³ Ba sān tōge tōma yetōg-be'ero, tōma lebsri la yetōg-sōma. Dūnia dōma bīsa tōma, tī tōma āna wu sōgro la, ka tara vōore ba zē'am, halī wa paam zīna.

¹⁴ Mam ka gulse wāna bō ya tī m botī yānne yōke ya, mam yeti m kā'an ya mē wu m kōma tī m nōje la.

¹⁵ Baa ya sān tara nērba tuspia tī ba bīsa ya Krisi

doosgo la puam, ya tarɪ la sɔ ayɪla mǎ'a. Mam n de ya sɔ Azezi-krisi doosgo la puam, mam n wa'am wa mǔole kǔ-yǐlga la bɔ ya, tɪ ya yǐ wɔm na ɪyǎ. ¹⁶ Bela, mam bel-nɪ ya mɛ tɪ ya ita mam n ɪtɪ se'em na. ¹⁷ Bela tɪ mam tǔm Atimǔtɪ ya zǎ'am. A de la mam bi-nǔŋrɛ n de sɪra dǎana Zuudǎana doosgo la puam. Ɛŋa n wun tǔege ya mam n vɔa se'em Krisi doosgo la puam, la de la bǔn-bǎma tɪ mam zǎsɪ Azezi nǔrba n lagsɪ zǎ'a woo la.

¹⁸ Ya nǔrba baseba tǔ'esɪ tɪ mam kǎn leme wa'am ya zǎ'am, zǎkra ba mǔnsɪ. ¹⁹ La Zuudǎana la sǎn bɔɔra, la kǎn yuuge dee tɪ mam wa'am ya zǎ'am, la mam wun bǎŋe sɛla tɪ zǎk-m-mǔŋa dǔma la wun tǎ'age ɛŋe, tɪ la sǎn dagna ba yetɔga la mǎ'a. ²⁰ Se'ere n soe la, Nawǔnne so'olum dagɪ nǔore yetɔga, la de la pǎŋa. ²¹ Yǎma boorɪ la bǔm? Yǎma boorɪ tɪ m wa'am na kafǔbga bɪ? Bu m wa'am na nǔŋlum la sǔ-bugsum?

Krisi nǔra ka mase tɪ a ita yalsɪ

5 Ba tɔgrɪ tɪ ya ɪtɪ la yalsɪ, halɪ yalsɪ seka buuri tɪ baa seba n ka dolɪ Nawǔnne ka sake ita. Mam wǔm tɪ ba yetɪ nǔra ayɪla n boe ya puam gǎ la a sɔ pɔga. ² Dee tɪ yǎma zǎkra ya mǔŋa. La de nɪ na yǎma sǔure sǎ'am, tɪ ya yese bura-seka n ɛŋe yel-be'e-ɛŋa la ya tǔŋasuka.

³ Baa mam n ka boe yǎma zǎ'am, mam putǔ'ere boe la ya lɛ mɛ. La mam pǔn di bura-seka n ɛŋe yel-be'e-ɛŋa la sarɪya mɛ wu mam boe la yǎma lɛ, ⁴ yele la Zuudǎana Azezi yu'ure yetɪ: Yǎma n lagsɛ la taaba, tɪ mam putǔ'ere bɔna la yǎma, tɪ Zuudǎana Azezi pǎŋa bɔna la ya lɛ la, ⁵ ya yese nǔr-ɛŋa ya tǔŋasuka base Asǔtǎana nu'usum tɪ a sǎ'am a ɪyǎ, dee tɪ a sɪa wun yǐ fǎare tɪ Zuudǎana Azezi lemŋo daare.

⁶ Yǎma n zǎkrɪ ya mǔnsɪ la, la ka ǎn sǔŋa. Yǎma ka mi tɪ dǎbɪllɛ fǔe n botɪ borborɪ zom wuu ukra? ⁷ Yese-ya tǔon-be'e-ɛŋa n ǎn wu dǎbɪllɛ la ya tǔŋasuka, bela tɪ ya wun ǎna sǔŋa wu zom paalga tɪ ba ka ɛŋe dǎbɪllɛ ba puam. Ya pǔn ǎna sǔŋa wu borborɪ n ka tarɪ dǎbɪllɛ la. Se'ere n soe la, Krisi daan sake mɛ tɪ ba ku ɛ tǔma ɪyǎ wu Zɔɔg-base kibsa pebila la. ⁸ Bela, base-ya tɪ tɪ yese putǔ'e-be'ero, la tǔon-be'ero wuu tɪ wɔm puam, dee de-na pupeelem dǔma, la sɪra dǔma wu ba diti Zɔɔg-base kibsa la borborɪ n ka tarɪ dǎbɪllɛ la.

⁹ Mam n daan gulɛ gǔn-seka la, mam daan yele ya tɪ ya da lagum na seba n ɪtɪ yalsɪ. ¹⁰ Mam ka tɔgrɪ nǔr-seba wuu n boe dǔnia puam ita yalsɪ, bu nǔŋe bǔnɔ, bu dena nayigba, bu bag-kǎabrɪba n ka dolɪ Nawǔnne na yelle. Ya sǎn yetɪ ya welge ya mǔŋa la bǎma, dǔnɪ tɪ ya yese dǔnia wǎ puam. ¹¹ Mam daan gulɛ bɔ ya yetɪ, ya da dɔla la nǔr-seka n yetɪ a mǔŋa tɪ ɛŋa dolɪ la Nawǔnne dee ita yalsɪ, bu nǔŋe bǔnɔ, bu kǎabra бага, bu tuura nǔrba, bu yǔura dǎam bugra, bu zǔura. Da pǔn lagum-ya la nǔr-ɛŋa dǎana di.

¹²⁻¹³ La dagɪ mam n wun di seba n ka dolɪ Nawǔnne na sarɪya, Nawǔnne n wun di ba sarɪya. La de la yǎma seba n boe la taaba la n wun di taaba sarɪya, wu lan gulɛ Nawǔnne gǔŋɔ puam yetɪ: «Dige-ya tǔon-be'ero dǎana la ya puam.»

Sarɪyadia yelle

6 Ya nǔra ayɪla sǎn tara yelle la a tadǎana, bǔm tɪ a tarɪ ɛ wɛ'esa seba n ka dolɪ Nawǔnne zǎ'am tɪ ba ka mǎale yelle la, dee ka tarɪ ɛ wɛ'esa Nawǔnne nǔrba zǎ'am? ² Yǎma ka mi tɪ Nawǔnne nǔrba n wun wa di dǔnia dǔma sarɪya? La yǎma sǎn wun wa di dǔnia dǔma sarɪya, ya ka tǎ wun di yel-pɔg-bǎna wǎ sarɪya? ³ Yǎma ka mi tɪ tǔma n wun wa di malekadǔma sarɪya? Lan de bela la, bǔm tɪ yǎma ka tǎna wun di dǔnia wǎ yela sarɪya? ⁴ La yǎma sǎn tara yel-bǎna buuri la taaba, yǎma tarɪ sǔnna la seba n ka mi Nawǔnne sore yela la zǎ'am. ⁵ Mam yetɪ ya tɪ la de la yǎnne bɔ ya. Bela, nǔra baa ayɪla ka boe yǎma puam n tarɪ yem, wun tǎ'age mǎale yel-seba tɪ yǎma tarɪ la taaba la? ⁶ La ka mase tɪ yǎma n de sǔbiisi sǎn tara yelle la taaba, ya tara taaba sǔnna sarɪyaditba n ka dolɪ Nawǔnne zǎ'am.

⁷ Yǎma n tarɪ taaba sǔnna sarɪyadia zǎ'am na, la pǔn pa'ale tɪ ya tuuge mɛ zozo'e. Nǔra sǎn ɛŋe ya be'em, bu zǔ ya, bǔm tɪ yǎma ka ita sugri, dee tara taaba sǔnna sarɪyadia zǎ'am? ⁸ Yǎma malun ita taaba la be'em, zǔura taaba, yǎma n de sǔbiisi Nawǔnne doosgo puam na.

⁹ Yǎma ka mi tɪ tǔon-be'ero dǔma kǎn yǐ zǎ'a Nawǔnne so'olum puam? Da pǎ'ase ya mǔŋa. Nǔr-seba n ɪtɪ yalsɪ, bu seba n kǎabrɪ бага, bu seba n gǎ la taaba pɔgba la taaba sɪrba, bu bura-seba n gǎ la taaba, ¹⁰ bu nayigba, bu seba n nǔŋe bǔnɔ, bu seba n yǔuri dǎam bugra, bu seba n tuuri nǔrba, bu fǎarba, bǎma kǎn kǔ Nawǔnne so'olum puam. ¹¹ Yǎma nǔrba baseba daan ǎn na bela. La Nawǔnne sɪa peege yǎma tǔon-be'ero mɛ botɪ ya lebge Nawǔnne nǔrba, mase a zǎ'am Zuudǎana Azezi-krisi yu'ure ɪyǎ.

Dɪke ya ɪyǎ nǎ'ase Nawǔnne

¹² Yǎma nǔrba baseba yetɪ: «Mam tarɪ sore wun ɛŋe sɛla woo mɛ.» La mam yetɪ ya tɪ dagɪ sɛla woo n tarɪ yǔorɔ. Mam mǔ tarɪ sore wun ɛŋe sɛla woo mɛ. La mam kǎn sake lebge sɛla baa ayɪla yamŋa. ¹³ Yǎma yetɪ, dia boe la puure ɪyǎ, tɪ puure mǔ bɔna dia ɪyǎ. La de la sɪra, la Nawǔnne wun sǎ'am bǎma bayi la wuu mɛ. La nǔrsaala ɪyǎ ka boe yalsɪ ɪyǎ, a boe la Zuudǎana ɪyǎ. Tɪ Zuudǎana mǔ sɔna ɪyǎ la. ¹⁴ Nawǔnne n vo'oge tɪ Zuudǎana Azezi la, ɛŋa n wun ken vo'oge tǔma la a pǎŋa. ¹⁵ Yǎma ka mi tɪ ya ɪyǎ la de la Azezi-krisi ɪyǎ la zǎ'a ayɪla? Bela, la ǎn sǔŋa tɪ nǔra dɪke Krisi ɪyǎ zǎ'a ayɪla la sǔŋe ka lagum na pɔg-yalsɪ dǔma mɛ bu? Ayɛɪ, la pǔn ka mase. ¹⁶ Ya ka mi tɪ seka n lagum a mǔŋa la

pɔg-seka n ɪtɪ yalsɪ, ɛŋa la pɔka la lebge la ɪyā ayɪla? La gulɛ Nawēnne gōŋɔ puam yetɪ, buraaga la pɔka sǎn lagum taaba, bǎma bayi lebge la ayɪla. ¹⁷ La sɛka n lagum a mēŋa la Zuudāana la, Nawēnne Sia botɪ a lebge la ayɪla la Zuudāana. ¹⁸ Zoe-ya yalsɪ. Tōon-be'e-seba wuu tɪ nērsaala ɪtɪ la ka boe a ɪyā puam. La tōon-be'e-seka n de yalsɪ la boe la nērsaala ɪyā puam. ¹⁹ Ya ka mi tɪ ya ɪyā la de la Nawēnne Sia deego? Nawēnne Sia la tɪ a bɔ ya la boe ya puam mɛ, ya ka soe ya mēŋa. ²⁰ Nawēnne da ya la da'aga n de toogo, bela, dɪke-ya ya ɪyā, nǎ'asra Nawēnne.

Pɔgdire yelle

7 Mam yetɪ m lerge la yāma n daan gulɛ soke mam se'em na: «La ǎn sōŋa tɪ buraaga da di pɔga.» ² La, lan wun ɛŋe se'em tɪ ya da ɛŋe yalsɪ, buraaga woo di a pɔga, tɪ pɔka woo mē ele a sɪra. ³ La buraaga bɔ a pɔga lan mase tɪ a bɔ ɛ sɛla la, tɪ pɔka mē bɔ a sɪra lan mase tɪ a bɔ ɛ sɛla la. ⁴ Se'ere n soe la, pɔka ka soe a mēŋa ɪyā. La de la a sɪra n soe ɛ. La buraaga mē ka soe a mēŋa ɪyā. La de la a pɔga n soe ɛ. ⁵ Pɔka la a sɪra da zagɛ tɪ bǎma kǎn gǎ la taaba, sǎn dagna tɪ ya ɛŋe la nōore ayɪla looge wakate fēe tɪ ya pu'use Nawēnne, bela poorum ya le lagum na taaba tɪ Asūtāana da botɪ ya ɛŋe be'em, ya sǎn ka tā'age yōke ya mēŋa. ⁶ Mam n yele ya se'em wǎ, la dagɪ pēgre, la de la sore tɪ mam pa'alɛ ya. ⁷ La sǎn dena mam tē'esgo, nēra woo sǎn dena dakōore wu mam n ǎn se'em wǎ, la ǎn sōŋa. La nērsaala woo tarɪ la a bɔ'a tɪ Nawēnne bɔ ɛ. Ayɪla tarɪ la bɔ'a ayēma, tɪ ayēma mē tara bɔ'a ayēma.

⁸ Mam yetɪ seba n ka tara pɔgba bu n ka tara sɪrba, la pɔkɔpa yetɪ, ba sǎn ken bɔna bǎma bayɪla mā'a wu mam n ǎn se'em na, la ǎn sōŋa. ⁹ La ba sǎn ka tāna wun yōke ba mēŋa, ba di pɔgba, bu ba ele sɪrba. La ǎn sōŋa tɪ ya di pɔgba, bu ya ele sɪrba, sōna yāma n zɪ tɪ a yemleego tara ya nǎmsra. ¹⁰ La sǎn dena seba n tarɪ pɔgba bu n tarɪ sɪrba la, mam yetɪ ya la wǎna: La, la dagɪ mam mēŋa nōore, la de la Zuudāana Azezi nōore: Pɔka da base a sɪra. ¹¹ La a sǎn base a sɪra, a zēa, a da le bɔta buraasi, bu ɛŋa la a sɪra la māalɛ ba yelle la le naage taaba. Buraaga mē da lebse a pɔga.

¹² La sǎn dena nērba baseba la, mam yetɪ la wǎna: La de la mam mēŋa n yele, la dagɪ Zuudāana nōore: Buraaga n dolɪ Azezi sore sǎn tara pɔga n ka dolɪ Azezi sore, dee sake tɪ a bɔna la ɛ, a da lebse ɛ. ¹³ La pɔka n dolɪ Azezi sore sǎn tara sɪra n ka dolɪ Azezi sore, dee sake tɪ a bɔna la ɛ, a da base ɛ. ¹⁴ Sɪra n ka dolɪ Azezi sore ǎn sōŋa mɛ, a pɔga n de Nawēnne nēra la ɪyā. La pɔka n ka dolɪ Azezi sore ǎn sōŋa mɛ, a sɪra n de Nawēnne nēra la ɪyā. Bela ba kɔma wun ǎna sōŋa mɛ, sǎn dagna bela, ba kɔma wun ǎna wu nēr-seba n ka dolɪ Nawēnne kɔma. ¹⁵ La sɛka n ka dolɪ Azezi sore la, sǎn bɔɔra tɪ a base sɛka n dolɪ Azezi sore la, a base ɛ tɪ

a fōrge. La sǎn dena bela, la ka de pēgre tɪ pɔka bu buraaga n dolɪ Azezi sore bɔna la sɛka n ka dolɪ Azezi sore. Nawēnne wi to tɪ tɪ vɔa la sū-mǎ'asum la taaba. ¹⁶ Pɔka, fōn ɛŋe la wǎne bǎŋe fōn sǎn wun tā'age botɪ fu sɪra la yē fǎare? Bu buraaga, fōn ɛŋe la wǎne bǎŋe fōn sǎn wun tā'age botɪ fu pɔga la yē fǎare?

Sɛla n tarɪ yōɔɔ de la Nawēnne sakre

¹⁷ Sɛla n ǎn sōŋa de la nēra woo vɔa wu ɛn daan ǎn se'em tɪ Nawēnne wi ɛ na, wu Zuudāana n bɔ ɛ tɪ a vɔa se'em na. La de la bela tɪ mam pa'alɪ Nawēnne nērba n boe zē'esɪ wuu tɪ ba ɪta. ¹⁸ Nēr-seka sǎn wǎ, dee tɪ Nawēnne wi ɛ, a da ɛera tɪ a sugɛ wǎaga la. Nēr-seka n mē ka wǎ, dee tɪ Nawēnne wi ɛ, a da wǎ. ¹⁹ Sɛka n wǎ, bu sɛka n ka wǎ, ba wuu ka tarɪ yōɔɔ. Sɛla n tarɪ yōɔɔ de la Nawēnne nōore sakre. ²⁰ Nēra woo ken ǎna wu ɛn daan ǎn se'em tɪ Nawēnne wi ɛ na. ²¹ Fu daan sǎn dena la yamŋa tɪ Nawēnne wi fo, da base tɪ fu yem yɔɔra. La sore sǎn wa bɔna tɪ fu wun to'oge fu mēŋa, fu doose bilam to'oge fu mēŋa. ²² La nēr-seka n de yamŋa tɪ Zuudāana la wi ɛ, a de la nēra tɪ Zuudāana botɪ a to'oge a mēŋa. Bela mē, nēr-seka n dagɪ yamŋa tɪ Zuudāana Krisi wi ɛ, a de la Krisi yamŋa. ²³ Nawēnne da ya la toogo, bela da lebge-ya nērba yamsɪ. ²⁴ Bela ɪyā, m sɔbiisi, nēra woo vɔa Nawēnne nēŋam wu ɛn daan ǎn se'em tɪ Nawēnne wi ɛ na.

Apolɪ le tɔge pɔgdire yelle

²⁵ Mam yetɪ m tɔge la seba n ka tarɪ sɪrba bu pɔgba la yelle, mam ka to'oge nōore Zuudāana Azezi zē'am. La de la mam mēŋa putē'ere, la ya wun bɔ mam sɪra Zuudāana la n zoe mam ninbāalga la ɪyā. ²⁶ Yel-seba n boe lɛlɛ wǎ ɪyā, mam tē'esɛ tɪ la ǎn sōŋa tɪ nēra woo ken ǎna wu ɛn ǎn se'em na. ²⁷ Fu sǎn tara pɔga, da ɛera tɪ fu lebse ɛ. La fu sǎn ka tara pɔga, da ɛera tɪ fu di pɔga. ²⁸ La fu sǎn di pɔga, la dagɪ be'em. La pug-seka n mē ele sɪra, la dagɪ be'em. Nēr-seba n tarɪ pɔgba, bu sɪrba la wun yē la sū-sǎ'arɔ dūnia wǎ puam, bela tɪ mam ka bɔɔra tɪ yel-bǎma paage ya.

²⁹ M sɔbiisi, mam n yetɪ ya se'em n wǎna: Wakat-seka tɪ Nawēnne bɔ tɔ la ka le zo'oge. Lan pɔsɛ lɛlɛ wǎ, la ǎn sōŋa tɪ seba n tarɪ pɔgba la, ǎna wu ba ka tarɪ pɔgba, ³⁰ tɪ seba n kelli, ǎna wu ba ka kelli, tɪ seba n ɪtɪ sū-yēlga, ǎna wu ba ka ɪtɪ sū-yēlga, tɪ seba n da'arɪ, ǎna wu ba ka tarɪ sɛla tɪ ba da'arɪ la. ³¹ Tɪ seba n yētɪ dūnia bōntarsōm, ǎna wu ba ka yētɪ bōntarsōm. Se'ere n soe la, dūnia wǎ n ǎn se'em wǎ tollɪ mɛ.

³² Mam ka boorɪ tɪ ya yem yɔɔra la sɛla sɛla. Sɛka n ka tarɪ pɔga dɪkrɪ a putē'ere wuu tōnna la Zuudāana la tōoma, a eerɪ la ɛŋa n wun ɛŋe se'em tɪ la ǎna Zuudāana la sūure yēlum. ³³ La sɛka n di pɔga, dūnia yela n pake ɛ, a eerɪ la ɛŋa n wun ɛŋe se'em tɪ la ǎna a pɔga sūure yēlum. ³⁴ Bela, a putē'ere n boorɪ se'em na puɪ

mē. La poka bu pugla n mē ka tarı sira dıkrı a putē'ere wuu tōnna la Zuudāana la tōoma, a eerı la ēña n wun ēñe se'em, tı a iŷā, la a sira wun wa dena Nawēnne bōno. La seka n tarı sira, dūnia yela n pake ē, a eerı la ēña n wun ēñe se'em, tı la āna a sira sūure yelum. ³⁵ La de la yāma sōñre iŷā tı mam yele bela. Mam ka boorı tı m mōrgē ya dıke yelle dıgle ya zuto. Mam boorı tı ya tōm na sela n ān sōña, la ya dıke ya mēña wuu bō Zuudāana la, tōnna a tōoma.

³⁶ La sän dena seba n legri pugunto tı ba di la, seka sän tē'ese tı ēña sän base a zeba la ka di ē, ēña ēñe ē na be'em, dee tı a yemleego tara ē, a di ē wu ēn tē'ese se'em na, tı la dagı be'em. ³⁷ La nēr-seka sän tē'ese a putē'erum sōña sōña tı ēña kän di ē, tı pērgre ka bōna mī, a sän wun tā'age yōke a mēña, a ēñe wu ēn tē'ese se'em na, tı la ān sōña. ³⁸ Bela, nēr-seka n di pōga, a ēñe sōña. La nēr-seka n mē ka di pōga, a ēñe sōña gänna.

³⁹ Pōg-seka n ele, dēni tı a bōna la a sira le, ēn ken vca wakate la. La a sira la sän ki, sore boe mē tı a le ele nēr-seka tı a boorı, la dēni tı a dena nēra n doli Zuudāana Azezi sore. ⁴⁰ La mam tē'ese tı a sän ka le ele sira, a sūure wun āna yelum gänna ēn ele. Mam tē'ese tı mam tarı la Nawēnne Sua pa'ala ya.

Baga nēnno yelle

8 La sän dena bōn-seba tı ba dıke kääbe bō бага la nēnno yelle, tı mi tı tı wuu tarı bāñre mē, wu yāma n yele se'em na. La bāñre botı nēra zēkra la a mēña. La nōñlum sōñrı nērba mē. ² Nēr-seka sän tē'ese tı ēña mi sela, a ken ka mina wu lan mase tı a mina se'em. ³ La nēra sän nōñe Nawēnne, Nawēnne mi ē mē.

⁴ Bela, la sän dena бага nēnno na yelle, tı mi tı бага de la sela n de zāña dūnia wā zuo, dee ken mina tı Nawēnne ayıla mā'a n boe. ⁵ Bōndōma n boe saazuum bu tēña zuo, tı nērsaalba wi'iri tı wēna. Asıra, bōndōma zozo'e n boe tı nērsaalba wi'iri tı wēna, bu zuudāandōma. ⁶ La tōma mi tı Nawēnne ayıla n boe dena tı so n nāam sela woo, la ēña iŷā tı tı vca. La tōma ken mina tı Zuudāana ayıla mā'a n boe, a de la Azezi-krisi, la doose la ēña tı sela woo bōna, la ken doose la ēña tı tı tara vcm.

⁷ La, la dagı nēra woo n mi wāna. Nērba baseba malum бага mē, tı halı la zīna ba sän obe бага nēnno, ba ken tē'esra a yelle mē tı la sırı de la бага dia. La ban ka mi Nawēnne sore yela sōña la, ba tē'esrı ba sūure puam tı ba ēñe la be'em. ⁸ La dagı dia n wun botı tı lem Nawēnne. Tı sän ka di, sela ka pō'ırı tı, la tı sän di, a ka pa'asrı tı sela.

⁹ La guuse ya mēña, tı yan tarı nōore dita sela woo la, da base tı nēr-seba n ka tarı pāña Nawēnne sore doosgo puam na tōm tōon-be'ero. ¹⁰ Nēr-seka n ka mi Nawēnne sore yela sōña la, sän yē fōn tarı bāñre la n zı

baga kääbgo zē'am obra nēnno, la wun pā'ase ē tı a mē obe la бага nēnno. ¹¹ Bela, fōn bāñre la wun base tı nēr-ēña n ka tarı pāña Nawēnne sore doosgo puam na sā'am mē, a de la fu sōbia tı Krisi ki a iŷā. ¹² Fu sän tōm tōon-be'e-ēna sā'am fu sōbia n ka mi Nawēnne sore yela sōña putē'ere, fu ēñe la Krisi be'em. ¹³ Bela, la sän dena dia n wun base tı mam sōbia tōm tōon-be'ero, mam kän le malun di ē, tı m da base tı m sōbia tōm tōon-be'ero.

Apolı base ēn tarı sore wun ēñe sela

9 Mam ka soe m mēña tāna wun ēñe mam n boorı se'em mē bu? Mam dagı la Krisi Tōntōnna bu? Mam daan ka yē tı Zuudāana Azezi mē bu? La dagı tōon-seba tı mam tōnnı bō'ıra Zuudāana la n base tı yāma bō ē sira? ² Baa nērba baseba sän ka sake tı mam de Krisi Tōntōnna, yāma mase mē tı ya sake. Yāma n doli Krisi sore la, n de sela n pa'ale tı mam de Krisi Tōntōnna. ³ Seba n zergrı mam na, mam tıgrı la wāna lergra ba. ⁴ Tōma ka tarı sore tı ba bō tı dia la ko'om tı tōoma la iŷā? ⁵ Tōma ka tarı sore wun di pōg-ba n doli Nawēnne sore tı ba dıla tı eera wu tı Tōntōn-taaba, la Zuudāana yıbsı, la Apıyērı n ıtı se'em na bu? ⁶ Yāma tē'ese tı mam na Abarnabası mā'a n de tı tōnna tı mēña dita bu? ⁷ Āne n de sudaaga dee bırsra a mēña dia yelle? Āne n sele tırsı dee ka dita ba bıe? La āne n gu'uri dūnsı dee ka dita ba ılum?

⁸ Mam ka yele bela la nērsaala putē'ere mā'a. Nawēnne ıw la mē yele la bela. ⁹ La gulse ıw tı Nawēnne yuun bō Amoyisi gōnno la puam yetı: «Da ēñe-ya naafı n kōırı nōore yuka.» La de la niigi yelle mā'a tı Nawēnne yuun tıge bu? ¹⁰ Ayel, la de la tōma yelle tı la gulse bela. Bela nēr-seka n kōırı tarı putē'ere tı a wun yē mē, tı seka n wē'eri bōnkōla mē tarı putē'ere tı a wun yē, dēni tı ba wuu yē ba pure. ¹¹ Tōma n mōole Nawēnne yetıga la bō ya la, la ān wu bōnbuuri tı tōma bure. Bela, la mase mē tı ya looge ya bōntarsōm na sōñe tōma wu bōnkōla pure tı ya bō tōma. ¹² Nērba baseba sän tara nōore tı ba to'oge yāma bōntarsōm, tōma n tarı nōore tı tı to'oge yāma bōntarsōm gänna. La tōma ka to'oge ya sela wu tōma n tarı nōore se'em na, tōma sake nāmsgı mē sela woo puam, tōma ka boorı tı tı gu Krisi kō-yēlga la mōolgo.

¹³ Yāma ka mi tı seba n tōnnı Wēnde-kāte la puam, diti la bilam? La tı seba n kääbrı bō'ıra Nawēnne na, to'orı ba pure la kääbgo zē'a na? ¹⁴ Bela, Zuudāana la bō nōore mē tı seba n mōoli kō-yēlga la, mē tı'ıra ba dia bilam.

¹⁵ La mam ka to'oge ya sela baa ayıla wu mam n tarı nōore se'em na. La mam ka gulse bela mē yetı ya bō mam sela. Baa mam sän wun ki söl, tı nēra da wa base tı mam ka tara yēsōm. ¹⁶ Mam n mōoli Nawēnne kō-yēlga la, mam ka tā wun wē m yō'ogo a iŷā. La de la

pērgre ti mam mōole. Mam sãn ka mōole kō-yēlga la, mam wun yē la toogo. ¹⁷ La sãn de nɪ la mam mēŋa n looge yem mōola kō-yēlga la, mam wun to'oge nɪ la yɔɔɔ. La, lan de pērgre ti mam mōole la, la de la tōone ti Nawēnne dɪke dɔgle mam zuo. ¹⁸ Bela, bēm n de mam yɔɔɔ? La de la mam n mōoli kō-yēlga la bɔ'ɔra nērba zāŋa, dee ka tɔ'ɔra ba sela wu mam tarɪ nōore se'em na.

¹⁹ Mam soe m mēŋa mē, mam dagɪ nēra yamŋa. La baa bela, mam dɪke m mēŋa lebge la nērba wuu yamŋa, ti m tā'age botɪ ba nērba zozo'e dɔla Krisi.

²⁰ Mam sãn bɔna Zifdōma zē'am, mam vɔa wu Zifdōma la, ti m tā'age botɪ ba doose Azezi. Amoyisi ɔɔ la ka le tara nōore la mam, la mam sãn bɔna la nēr-bāma n doli ɔɔ la, mam sakrɪ ɔɔ wu bāma la, ti m botɪ seba n doli ɔɔ la doose Azezi. ²¹ La mam sãn bɔna nēr-seba n ka doli ɔɔ la zē'am, mam vɔa wu nēr-seba n ka doli ɔɔ la, ti m botɪ ba doose Azezi. La bela ka pa'alē ti mam ka doli Nawēnne ɔɔ la. Mam doli la Krisi ɔɔ. ²² Mam sãn bɔna la nēr-seba n ka tarɪ pāŋa Nawēnne sore doosgo puam, mam vɔa wu bāma, ti m sōŋe ba ti ba da base Nawēnne sore. Mam ɪti sela woo la bela bɔ'ɔra nērba buuri wuu, ɪta mam wun ēŋe se'em ti m tā'age fāage ba nērba baseba. ²³ Nawēnne kō-yēlga la ɪyā ti mam ɪta bela wuu ti m wa po to'oge a purē.

²⁴ Yāma mi ti zua puam, zɔtba la wuu lagum zɔta mē, la ba nēra ayɪla mā'a n wun zoe yāŋe to'oge bɔ'a. Bela, mōrgē-ya wu zɔtba n zoti se'em na, ti ya yāŋe to'oge bɔ'a Nawēnne zē'am. ²⁵ Zɔtba wuu yōkrɪ ba mēŋa mē sela woo puam ti ba to'oge bɔ'a n kãn yuuge dee sã'am. La tōma yōkrɪ ti mēŋa ti ti wa to'oge la bɔ'a n kãn malun sã'am. ²⁶ Bela n soe ti mam ka zɔta yoo yoo, la mam ka zebɪ yoo yoo wu nēra n wē'erɪ kusebgo. ²⁷ Mam mōrgɪ m ɪyā mē tara m mēŋa sōŋa sōŋa. Se'ere n soe la, mam ka boorɪ ti mam n mōoli kō-yēlga la bɔ'ɔra nērba la, mam mēŋa wa kōŋe yɔɔɔ Nawēnne zē'am.

Israyeli dōma māmsgo

10 M sɔbiisi, mam boorɪ ti ya tē'esē la ti yaabdōma n yuun doli Amoyisi la yelle. Ba wuu yuun boe la sawatē la tēŋa, la ba wuu yuun doose la ko-kātē la puam tole. ² La ān wu Nawēnne yuun mise ba mē sawatē la puam, la ko-kātē la puam ti ba dena ayɪla la Amoyisi. ³ Ba wuu yuun di la dia ayɪla, dee yū ko'om ayɪla n ze'ele Nawēnne zē'am. ⁴ Ba yuun yū la ko'om n yesɪ tãmpĩa ti Nawēnne bɔ ba puam. Tãmpĩ-ēŋa yuun de la Krisi n doli ba. ⁵ La baa bela, ba nērba zozo'e yuun ka ɪti sela n masē Nawēnne yem, ti a base ti ba ki weego la puam. ⁶ Bōn-bāna wuu ēŋe ti la pa'alē la tōma, ti ti da bɔɔra ti ēŋe be'em wu bāma la. ⁷ Da dɔla-ya бага wu bāma baseba n yuun ēŋe se'em na. La gulse Nawēnne gōŋɔ puam yetɪ: «Nērba la zĩ'ire mē di dee

yū, dee isge de'ena.» ⁸ Ti da ɪta yalsɪ wu bāma baseba n yuun ēŋe se'em, ti ba nērba tuspisi la atā ki daare ayɪla la. ⁹ Ti da make-ya ti Zuudāana la bɪsē wu bāma baseba n yuun ēŋe se'em, ti bōnse'edōma ku ba la. ¹⁰ Ti da yōnna-ya la Nawēnne wu bāma baseba n yuun yōm se'em, ti kūm maleka ku ba la.

¹¹ Bōn-bāma wuu yuun ēŋe ti yaabdōma ti la dena la māmsgo bɔ nērba baseba. La ba gulse bela, ti la dena la zāsŋɔ bɔ tōma seba n boe wakat-ēna ti dūnia lem ba'asgo wā. ¹² Bela, nēr-seka n tē'esē ti ēŋa ɪti sōŋa dee ze sōŋa, a guuse da lui. ¹³ Yel-seba n paarɪ ya la, la de la yel-bāma n mē paarɪ nērba baseba. La Nawēnne de la sɪra dāana, a kãn base ti yel-seka n gānnɪ ya pāŋa paage ya. La yelle puam, a wun bɔ ya pāŋa ti ya wibe, dee ēŋe sore ti ya yese.

Baga dia, la Zuudāana kūm tēere dia yelle

¹⁴ Bela m sɔbiisi, yese-ya ya mēŋa бага kãabgo puam. ¹⁵ Mam tɔgrɪ bɔ'ɔra ya wu ya de la nēr-seba n tarɪ yem. Ya mēŋa tē'esē mam n yetɪ ya sela la vōore. ¹⁶ Bōn-yūula la ti tōma ēn dɪke pu'usē Nawēnne dee yū la, pa'alē ti tōma lagum na Krisi dena ayɪla, a zum n yese bɔ tōma la ɪyā. La borborɪ la ti tōma ēn fiise pul taaba obe la, pa'alē ti tōma lagum na Krisi dena ɪyā ayɪla. ¹⁷ Borborɪ la n de ayɪla la, tōma mē de la ɪyā ayɪla, baa tōma n zo'oge la. Se'ere n soe la, ti wuu lagum ɔbra la borbor-ēŋa ayɪla.

¹⁸ Tē'esē-ya Israyeli dōma yelle. Seba n diti di-seba ti ba dɪke kãabe Nawēnne kãabgo bĩmbĩnne zuo la, ba lagum na Nawēnne. ¹⁹ Bēm ti mam yetɪ wāna? Yāma tē'esē ti mam yetɪ bagrē, bu di-seba ti ba kãabe bɔ bagrē la, de la sela bu? Ayel. ²⁰ Mam yetɪ ya mē ti ya bāŋe ti sela ti bag-kãabrɪba kãabrɪ la, ba kãabrɪ bɔ'ɔra la kulkā'arsɪ, dagɪ Nawēnne. Mam ka boorɪ ti ya lagum na kulkā'arsɪ. ²¹ Ya ka tā wun yū Zuudāana Azezi bōn-yūula, dee le yū kulkā'arsɪ bōn-yūula, ya ken ka tāna wun di Zuudāana kūm tēere dia, dee le di kulkā'arsɪ dia. ²² Ti sãn ɪta bela, ti wun botɪ Zuudāana sūure n isge. Yāma tē'esē ti tōma tarɪ pāŋa gānna ē mē bu?

Nā'asra-ya Nawēnne sela woo puam

²³ Yāma nērba baseba yetɪ: «Sore boe mē ti ti ēŋe sela woo.» Asura, la, la dagɪ sela woo n tarɪ yōorɔ. Ba yetɪ: «Sore boe mē ti ti ēŋe sela woo.» La, la dagɪ sela woo n sōŋrɪ. ²⁴ Nēra nēra da ēera a mēŋa sōŋrē mā'a, ēera-ya taaba sōŋrē.

²⁵ Ya tarɪ sore ti ya da nēn-seba wuu ti ba koosrɪ da'asɪ puam obe mē. Da base-ya ti la nāmsra ya putē'era ti ya soke nēnnɔ na n ze'ele zē'a. ²⁶ La gulse Nawēnne gōŋɔ puam yetɪ: «Dūnia, la bōn-seba wuu n boe a puam de la Zuudāana Nawēnne bōnɔ.»

²⁷ Nēra n ka bɔ Azezi sɪra sãn wi ya ti ya wa'am a yire wa di, ti ya sake sēŋe, di-ya di-seba wuu ti a tarɪ wa bɔ

ya la, da base-ya ti la nāmsra ya putē'era, ti ya soke nēnno na n ze'ele zē'a. ²⁸ La nēra sān ye'le ya yeti: «Di-bāna wā de la bagre dia», da di-ya, seka n ye'le ya bela la i'ya, ti la da nāmse a putē'ere. ²⁹ La dagi yāma mēja putē'era yelle ti mam ye'le, la de la nēr-seka n ye'le ya la putē'ere.

La yāma mē tā soke mam yeti: «Bēm soe ti nēra ayē-ma putē'ere wun gu mam, ti mam kām di sela ti mam taru nōore ti m di? ³⁰ Mam sām pu'use Nawēnne dia i'ya dee di, bēm ti nēra wun zerge mam la bōn-seka ti mam pu'use Nawēnne a i'ya?»

³¹ Lan de se'em na, ya sām dita mē, bu ya yūuri mē, bu sela woo ti ya iti, ita-ya ba wuu nā'asra Nawēnne. ³² Da ēje-ya sela Zifdōma, bu seba n dagi Zifdōma, bu Nawēnne nērba zē'am ti la gu ba Nawēnne sore doosgo. ³³ Ita-ya wu mam n iti se'em na. Mam mōrgri mē ti m ēje sela n ān nēra woo sūure yēlum sela woo puam, mam ka eeru m mēja sōjre, mam eeru la nērba zozo'e sōjre, ti ba tā'age yē fāare.

11 Ita-ya mam n iti se'em na, wu mam mē n iti wu Kriši n iti se'em na.

Buraaga la poka n wun āna se'em Wēndeto puam

² Mam pēgru ya, yāma n tēru mam yelle sela woo puam, dee dola bōn-seba wuu ti mam pa'ale ya la. ³ La mam boori ti ya bāje ti Kriši de la nēra woo zuudāana, ti sira mē dena a poga zuudāana, ti Nawēnne dena Kriši zuudāana. ⁴ Bela, bura-seka n pu'usru Nawēnne, bu n to'oge Nawēnne yetoga togra bō'ora nērba, dee vuge a zuugo, a pō'oru la a zuudāana. ⁵ La pōg-seka n pu'usru Nawēnne, bu n to'oge Nawēnne yetoga togra bō'ora nērba, dee ka vuge a zuugo, a pō'oru la a zuudāana. La ān wu ēn pōn a zuugo la. ⁶ Poka sām ka boora ti a vuge a zuugo, a yi se a zomto. La ti mi ti la de la yānne bō poka ti a pōn a zuugo, bu a se a zomto. Bela, dēni ti a vuge a zuugo. ⁷ Buraaga ka de a vuge a zuugo, se'ere n soe la, Nawēnne nām ē ti a wōna la a mēja, dena nā'asgo bō ē. La poka de la nā'asgo bō buraaga. ⁸ Nawēnne ka dīke poka kōbre nām buraaga, a daan dīke la buraaga kōbre nām poka. ⁹ La Nawēnne ka nām buraaga poka i'ya, la a nām poka la buraaga i'ya. ¹⁰ Bela i'ya, la malekadōma i'ya, la mase ti poka vugra a zuugo ti la pa'ale ti a taru nōore. ¹¹ La Zuudāana doosgo la puam, poka boe la buraaga nu'usum, ti buraaga mē bōna poka nu'usum. ¹² Nawēnne daan dīke la buraaga nām poka. Ti pōgsi mē dogra buraasi. Bela wuu ze'ele la Nawēnne zē'am.

¹³ Tē'ese-ya ya mēja bise. La mase ti poka pu'usra Nawēnne nēr-kūuḡ puam dee ka vuge a zuugo?

¹⁴ Nērba wuu mi mē ti buraaga sām base a zomto ti ba woge, la de la yānne. ¹⁵ La poka sām base a zomto ti ba woge, la de la pēka bō ē. A zomto la n woge la, de la sela bō ē ti a dīke vuge a zuugo. ¹⁶ La nēr-seka sām

boora ti a wē nōke'ene bōn-ēna wā yelle, dēni ti a bāje ti tōma, la Nawēnne nērba n boe zē'esu wuu la, ka taru urgo ayēma.

Zuudāana kūm tēere dia

(Amatie 26:26-29, Amarku 14:22-25, Aluki 22:14-20)

¹⁷ Mam n yeti m ye'le ya se'em wā, mam ka yeti m pēge ya, bēm i'ya, ya ēn lagse taaba la, ya ka iti sōja, ya iti la be'em. ¹⁸ Pōspōsi, mam wōm ti ya sām ēn lagse taaba ti ya pu'use Nawēnne, welgre n boe ya tējasuka. La mam sake ti yel-seba ti ba ye'le la, baseba de la sira. ¹⁹ Dēni ti welgre bōna ya tējasuka, ti ba bāje seba n siri doli Nawēnne bōke. ²⁰ Yāma ēn lagse taaba la, ya tē'ese ti ya diti la Zuudāana dia, la dagi bela. ²¹ Se'ere n soe la, ya sām lagse, nēra woo dēje ka dita la a mēja dia. Ti seba kom dōnna, dee ti baseba yū buge. ²² La sām dena bela, yāma ka taru yie wun di dee yū bilam? Bu yāma ka nannu la Nawēnne nērba la, dee ita nasdōma yānne? Mam wun ye'le ya ti bo? M pēge ya bela i'ya bu? Ayēi, mam kām pēge ya.

²³ Zāsḡ seka ti mam daan zāsum ya la, mam to'oge ē na Zuudāana la zē'am. La de la wāna: Yu'uḡ-seka ti ba wun yōke ti Zuudāana Azezi la, a dīke la borboru, ²⁴ pu'use Nawēnne a yel-sōnne dee fiise bō ba yeti: «Ē-na de la mam i'ya, ti mam bō'oru ya. Ita-ya wāna tēra mam yelle.» ²⁵ Ban daan di dia k'ulum na, a dīke la bōn-yūla yeti: «Bōn-yūul-bāna pa'al ti Nawēnne bīje la nōor-paalga la nērsaalba mam zum n wun yese la i'ya. Wakat-seka ti ya ēn yeti ya yū ba, ita-ya wāna tēra mam yelle.» ²⁶ Wakat-seka woo ti ya obru borboru wā, dee yūura bōn-yūla wā, ya pa'al la Zuudāana la kūm yelle, hal ti a wun wa leme wa'am.

²⁷ Bela, nēr-seka woo n obru borboru wā, dee yūura bōn-yūla wā, dee ka mase ti a obe dee yū, a tōnnu la tōon-be'ero pō'ora Zuudāana i'ya, la a zum na. ²⁸ Bela, nēra woo tē'ese bise a sām mase, deege obe borboru la, dee yū bōn-yūla la. ²⁹ Nēr-seka n ka nannu Zuudāana la i'ya, dee obe borboru la, dee yū bōn-yūla la, a eeru la sibgre bō'ora a mēja. ³⁰ Bela n soe ti ya puam, nērba zozo'e dena bā'adōma, ti seba ka tara pāja, ti baseba ki. ³¹ Ti sām tē'ese ti mēja bise ti sām mase, Nawēnne kām sibge to. ³² La Zuudāana la sām sibgra to, a pa'al ti mē ti ti ita sōja, ti a da wa lagum ti la dūnia nērba di ti sariya sibge to.

³³ Bela, m sobiisi, ya sām lagse taaba ti ya di Zuudāana kūm tēere dia la, ya gu'ura taaba. ³⁴ Nēra kom sām dōnna, a di a yire dee wa'am, ti ya da kām lagse taaba e sibgre bō ya mēja. La yel-seba n weege la, mam sām wa wa'am, mam wun māale.

Nawēnne Sīa bō'a yelle

12 Le'ele wā, mam yeti m toge ya la Nawēnne Sīa bō'a yelle. M sobiisi, mam boori ti ya bāje la

bõn-ēṇa yelle sōṇa. ² Ya mi ti yan daan nān ka bɔ Azezi sira la, ya daan taage la бага n de mugro la poore dola, ka tāna wun base. ³ Bela ti mam bɔɔra ti ya bāṇe ti Nawēnne Sia la sān bɔna la nēra, a ka tā wun tɔge Azezi yelle be'em. La nēra mē ka tā wun yeti, Azezi de la Zuudāana, ti la sān dagna Nawēnne Sia n boti a yele.

⁴ Nawēnne Sia bɔ'a la de la to'oto'ore, la, la de la Sia ayula mēṇa n bɔ'wɔ. ⁵ Tōoma la de la to'oto'ore, la, la de la Zuudāana ayula ti ti tōnni bɔ'wɔ. ⁶ Tōoma la n tōnni se'em na de la to'oto'ore, la, la de la Nawēnne ayula n tōnni ba wuu nērba wuu puam. ⁷ Nawēnne Sia la bɔ'wɔ nēra woo la bɔ'a nērba la wuu sōṇe iŷā. ⁸ Sia la bɔ'wɔ nēra ayula la bɔ'a ti a tɔgra yem yetɔga, la Sia ēṇa ayula n bɔ'wɔ nēra ayēma bɔ'a ti a tɔgra bāṇe yetɔga. ⁹ La Sia ēṇa mēṇa n bɔ'wɔ nēra ayula bɔ'a ti a bɔ'wɔ Nawēnne sira zozo'e, dee bɔ'wɔ ayēma pāṇa ti a boti bā'adōma yēta iŷā'asum. ¹⁰ Sia la n bɔ'wɔ nēra ayula pāṇa ti a tāna tōnna tōon-yālma, dee bɔ'wɔ ayēma bɔ'a ti a bɔ'wɔ Nawēnne yetɔga tɔgra bɔ'wɔ nērba, ēṇa n bɔ'wɔ nēra ayula yem ti a tāna wun bāṇe sela n ze'ele Nawēnne Sia zē'a, la sela n ka ze'ele Nawēnne Sia zē'a bɔke. Sia ēṇa n bɔ'wɔ nēra ayula bɔ'a ti a tāna tɔgra yetɔg-zāṇsi, dee bɔ'wɔ ayēma bɔ'a ti a tāna pa'ala yetɔg-zāṇsi la vōore. ¹¹ La de la Sia ēṇa ayula n iti bela wuu. Sia la bɔ'wɔ nēra woo la bɔ'a to'oto'ore wu ēṇa n boori se'em.

Azezi-krisi nērba ān wu nēra ayula iŷā la

¹² Azezi-krisi nērba ān wu iŷā ayula n tarɔ zē'esɔ to'oto'ore. La baa la zē'esɔ la n de to'oto'ore la, ba wuu de la iŷā ayula. ¹³ Tōma Zifdōma, la seba n dagɔ Zifdōma, la seba n de yamsɔ, la seba n dagɔ yamsɔ, tōma wuu n daan mise ko'om puam na, Nawēnne Sia boti ti lebge la iŷā ayula. Nawēnne tōm na Sia ayula bɔ ti wuu.

¹⁴ Nēra iŷā ka tarɔ zē'a ayula mā'a. A tarɔ la zē'esɔ to'oto'ore. ¹⁵ Nā'are sān yeti, ēṇa n dagɔ nu'ugo la, ēṇa ka po dēna iŷā la zē'a ayula, bela kān tā'age base ti a kān dēna iŷā la zē'a ayula. ¹⁶ La tubre mē sān yeti, ēṇa n ka de nifo la, ēṇa ka po dēna iŷā la zē'a ayula, bela kān tā'age base ti a kān dēna iŷā la zē'a ayula. ¹⁷ Ti iŷā la wuu sān de nɔ nifo, a yeti a ēṇe la wāne wōm yetɔga? La a wuu sān de nɔ tubre, a yeti a ēṇe la wāne wōm yūuṇo? ¹⁸ Bela ti Nawēnne ēṇe iŷā zē'a woo wu ēn boori se'em, lagim ba taaba. ¹⁹ Ba wuu sān de nɔ la zē'a ayula mā'a, iŷā kān boe nɔ. ²⁰ Bela ti zē'esɔ to'oto'ore bɔna, la ba de la iŷā ayula.

²¹ Bela nifo ka tā wun yele nu'ugo yeti, ēṇa ka boori a sōṇe. La zuugo mē ka tā wun yele nāma yeti, ēṇa ka boori ba sōṇe. ²² Lan pa'ase, iŷā la zē'e-seba n ān wu ba ka tarɔ pāṇa la, tarɔ yōoro mē. ²³ Zē'e-seba ti tōma bise ti ba ka tarɔ yōoro zo'oge la, ti bisɔ la bāma yelle sōṇa sōṇa. La zē'e-seba ti ti tē'ese ti ba ka mase ti nēr-

ba yē ba la, bāma ti ti malgrɔ sōṇa gānna. ²⁴ La ka de ti dɔke sela pɔ zē'e-sōma la. Nawēnne mēṇa n ēṇe ti iŷā la, base ti ti bisɔ zē'e-seba ti ti tē'ese ti ba ka tarɔ yōoro zo'oge la yelle sōṇa sōṇa, ²⁵ ti welgre da bɔna iŷā la puam. La ti iŷā la zē'esɔ to'oto'ore la wun sōṇa taa-ba. ²⁶ Bela, zē'a ayula sān nāmsra, zē'esɔ la wuu mē nāmsɔ mē. Zē'a ayula sān yē nā'asgo, zē'esɔ la wuu tarɔ la sū-yēlga.

²⁷ Ya wuu de la Krisi iŷā la. La nēra woo de la iŷā la zē'a ayula. ²⁸ Bela ti Nawēnne ēṇe nēra woo a zē'am a nēr-kuuṇo la puam. Pɔspɔsɔ de la seba ti Azezi mēṇa daan looge tōm ba la. Buyi dāana de la Nawēnne nōtɔ'wɔsɔba. Butā de la karēnsāandōma, la seba n tōnni tōon-yālma, la seba ti a bɔ ba pāṇa ti ba boti bā'adōma yēta iŷā'asum, la seba ti a looge ti ba sōṇa nērba, la seba n wun bɔna nērba nēṇa, la seba n tɔgrɔ yetɔg-zāṇsi. ²⁹ La dagɔ ti wuu n de seba ti Azezi mēṇa daan looge tōm na, dagɔ ti wuu n de nōtɔ'wɔsɔba, dagɔ ti wuu n de karēnsāandōma. La dagɔ ti wuu n tarɔ pāṇa tōnna tōon-yālma, ³⁰ la dagɔ ti wuu n boti bā'adōma yēta iŷā'asum, dagɔ ti wuu n tɔgrɔ yetɔg-zāṇsi, dagɔ ti wuu n tā wun pa'ale yetɔg-zāṇsi la vōore.

³¹ Eera-ya bɔ'a seba n gānni wuu.

La mam wun pa'ale ya so-seka n gānni ba wuu.

Nōṇlum yelle

13 Mam sān tɔgra nērsaalba buuri wuu yetɔga, la malekadōma yetɔga, dee ka tara nōṇlum, mam ān wu dēnɔṇo bu purga n wē'erɔ zāṇa. ² La mam sān tara bɔ'a bɔ'wɔ Nawēnne yetɔga tɔgra bɔ'wɔ nērba, dee tāna wun bāṇe yela n suge wuu vōore, dee tara mi'ilum wuu, la mam sān bɔ Nawēnne sira tāna wun boti tāṇa vurge, dee ka tara nōṇlum, mam de la zāṇa. ³ La mam sān dɔke mam n tarɔ sela wuu puɔ nasdōma, la baa mam sān sake ti ba yō mam iŷā bugum, dee ka tara nōṇlum, bela ka tarɔ yōoro bɔ mam.

⁴ Nēr-seka n tarɔ nōṇlum mā'arɔ la a mēṇa, dee sōṇa nērba, a ka iti sūure, a ka wē'erɔ yō'ogo, la a ka zēkrɔ a mēṇa. ⁵ Seka n tarɔ nōṇlum ka iti sela n ka mase, a ka eerɔ a mēṇa sōṇe mā'a, a sūure ka isgri, nēra sān ēṇe ē be'em, a ka tēri ē a sūure puam. ⁶ Seka n tarɔ nōṇlum ka iti sū-yēlga la tōon-be'ero, a iti sū-yēlga la sira. ⁷ Seka n tarɔ nōṇlum iti sugri mē sela woo puam. A bɔ sira mē sela woo puam, a tarɔ putē'ere mē gu'ura sela woo ti a bɔ sira la, a tā wibra mē sela woo puam.

⁸ Nōṇlum ka malun ba'asra. Nawēnne yetɔga ti ti to'osɔ tɔgra bɔ'wɔ nērba, la yetɔg-zāṇsi, la mi'ilum wun tole. ⁹ Tōma n mi se'em, la tōma n to'osɔ Nawēnne yetɔga tɔgra bɔ'wɔ nērba la, de la fēe. ¹⁰ La wakate sān wa paage ti Nawēnne malge sela woo ti la mase sōṇa sōṇa, sela fēe ti tōma mi la wun tole.

¹¹ Mam n daan de bia la, mam daan tɔgrɔ wu bia la, mam daan tē'esra wu bia la, la mam daan wōnni yela

vōore wu bia la. La mam yāŋa n bi la, mam base biyā'ate me. ¹² Tōma n mi sela leeē wā, ān wu tōma bī-s-rī la bīsga n ka yēti sōŋa puam. La wakat-ēŋa tī wun yē sela woo sōŋa. Mam n mi sela la, nān de la fēe. La mam wun wa bāŋe ē sōŋa sōŋa wu Nawēnne n mi mam sōŋa se'em na. ¹³ Bela, bōn-bāna batā n boe wakate wuu: La de la bō sira, la tī tara putē'ere gu'ura sela tī tī bō sira la, la nōŋlum. La bōn-bāna batā puam, nōŋlum n gānni ba wuu.

Tī wun ēŋe se'em tī Nawēnne Sīa bō'a la sōŋe nērba

14 E-ya nōŋlum, la ya ken ēera Nawēnne Sīa bō'a la, lan gānni, bō'a seka tī ya wun to'oge Nawēnne yetoga tōge bō nērba. ² Seka n tōgrī yetog-zāŋsī ka tōgrī bō'ora nērba, a tōgrī bō'ora la Nawēnne. Se'ere n soe la, nēra ka wōnni a yetoga la vōore, Nawēnne Sīa boti a tōgra la yela n sugē. ³ La seka n to'osrī Nawēnne yetoga tōgra bō'ora nērba, ēŋa tōgrī sōŋra la nērba, boti ba sēnna nēŋa Nawēnne sore doosgo la puam, dee kā'ana ba, bō'ora ba buraane. ⁴ Seka n tōgrī yetog-zāŋsī sōŋrī la a mēŋa. La seka n to'osrī Nawēnne yetoga tōgra bō'ora nērba sōŋrī la Nawēnne nērba. ⁵ Mam boorī nī tī ya wuu tōgra la yetog-zāŋsī, la mam boorī tī ya tō'wsra la Nawēnne yetoga tōgra bō'ora nērba gānna. Nēra sān tōge yetog-zāŋsī tī nēra ka bōna wun to'oge yetoga la tōge a vōore pa'ale nērba la tī la sōŋe ba, seka n to'osrī Nawēnne yetoga tōgra bō'ora nērba la n gānni.

⁶ M sōbiisi, mam sān wa'am ya zē'am wa tōgra yetog-zāŋsī, mam wun ēŋe la wāne sōŋe ya? A ka tarī vōore bō ya. Sela n wun sōŋe ya, de la mam sān pa'ale ya sela tī Nawēnne Sīa puke pa'ale mam, bu m boti ya bāŋe sela, bu m to'oge Nawēnne yetoga tōge bō ya, bu m zāsum ya. ⁷ La ān wu de'engo loŋro la: Wīa sān pēebra bura bura, bu kōlŋ sān wē'era bura bura, fu wun ēŋe la wāne bāŋe wīa la pēebgo vōore, bu kōlŋ la wē'a vōore? ⁸ Benkonne sān pēebe bura bura, ka pēebe zebre pēebgo, āne n wun māasum yese zebre? ⁹ Bela mē, ya sān tōgra yetog-zāŋka tī nēra ka wōnni a vōore, nēra wun ēŋe la wāne bāŋe yāma n boorī tī ya ye se'em? Ya yetoga la de la zāŋa. ¹⁰ Yetoga buuri zozo'e n boe dūnia zuo, la ayīla ka boe ka tara vōore. ¹¹ La mam sān ka wōnna yetoga, mam na seka n tōgrī la de la sāma la taaba. ¹² Bela, yāma n mōrge ēera Nawēnne Sīa bō'a la, ēera-ya bō'a seba n wun sōŋe Nawēnne nērba tī ba sēŋe nēŋa Nawēnne doosgo puam.

¹³ Bela īyā, seka n tōgrī yetog-zāŋka, a sose Nawēnne tī a boti a yāŋe tōge a vōore. ¹⁴ Mam sān pu'usra Nawēnne la yetog-zāŋka, mam sīa n pu'usrī, la mam ka wōnni a vōore la m mēŋa yem. ¹⁵ Bela, mam wun ēŋe la wāne? Mam wun pu'usra la m sīa, dee ken pu'usra la m yem, la m yōona la m sīa, dee ken yōona la m yem. ¹⁶ Fu sān pu'usra Nawēnne a yel-sōnne la

yetog-zāŋka, nēra wun ēŋe la wāne ze'ele nērba la n lagse la puam yeti: «Amina», dee ka wōm fōn ye se'em na vōore? ¹⁷ Baa fōn pu'usrī Nawēnne se'em na sān āna sōŋa, la ka tarī sōŋre bō nēr-ēŋa. ¹⁸ Mam pu'usrī Nawēnne a yel-sōnne, mam n tōgrī yetog-zāŋsī gānna yāma wuu la. ¹⁹ La Nawēnne nērba lagsgo zē'am, mam boorī tī m tōge la yetoga banuu la m yem tī nērba wōm ba vōore tī la zāsum ba, sōna mam wun tōge yetog-zāŋsī tuspia.

²⁰ M sōbiisi, da āna-ya wu kōma n tē'esrī se'em na. La, la sān dena be'em urgō yelle, āna-ya wu kōm-pīgsī n ka tī be'em na. La ya tē'esgo puam, āna-ya wu bōnkegsī la. ²¹ La gulse Nawēnne gōŋo puam tī Zuudāana Nawēnne yeti: «Mam wun base tī sāama n tōgrī yetog-zāŋsī mōole m kō-yēlga bō m nērba. Baa la wāna wuu, ba kān selse mam.» ²² Bela īyā, yetog-zāŋsī de la sela n pa'alī seba n ka bō sira Nawēnne pāŋa, la dagī seba n bō sira la īyā. La nēra n to'oge Nawēnne yetoga tōge bō nērba la, n de sela n pa'alī seba n bō sira Nawēnne pāŋa, la dagī seba n ka bō sira la īyā.

²³ Seba n bō sira la sān lagse taaba zē'a ayīla, tī nēra woo tōgra la yetog-zāŋsī, tī seba n ka mi, dee ka bō Nawēnne sira kē, ba kān yeti ya zallī me? ²⁴ La seba n bō sira la sān lagse taaba, tī nēra woo tō'wsra Nawēnne yetoga tōgra bō'ora nērba, tī nēra n ka mi, dee ka bō Nawēnne sira kē, ēn wōm sela woo la, wun base tī a bāŋe a tōon-be'ero, dee pa'ale ē a tuure. ²⁵ Yel-seba n sugē a sūure puam wun puke me peelem puam, tī a wun ka dūma dīke a nēŋa vōgle tēŋa nā'ase Nawēnne, dee yeti: «Nawēnne sīrī boe la ya lē.»

Ita-ya sela woo tī ba dōla sore

²⁶ Bela, m sōbiisi, tī wun ēŋe la wāne? Ya sān lagse taaba tī ya pu'use Nawēnne, ya nēra ayīla tā wun pure yōone, tī ayēma zāsum, tī ayēma pa'ale bōn-seka tī Nawēnne puke pa'ale ē, tī ayēma tōge yetog-zāŋka, tī ayēma tōge yetog-zāŋka la vōore pa'ale nērba. Ita-ya bela wuu tī la sōŋe Nawēnne nērba tī ba sēŋe nēŋa Nawēnne doosgo puam. ²⁷ La sān dena yetog-zāŋsī tī ya yeti ya tōge, nērba bayi bu nērba batā mā'a tōge ayīla ayīla, tī nēra ayīla tōge ba vōore pa'ale. ²⁸ La nēra sān ka bōna wun tā'age tōge yetog-zāŋsī la vōore pa'ale, seba n yeti ba tōge yetog-zāŋsī la sīna da tōge. Ba tōge ba sūure puam bō ba mēŋa, la Nawēnne. ²⁹ Seba n de Nawēnne nōtō'wsrība la, bayi bu batā tōge. Tī seba n weege la bīse ba yetoga la sān mase bu ka mase. ³⁰ La nēra ayīla sān tōgra, tī Nawēnne Sīa puke sela pa'ale nērba lagsgo la zē'am, nēr-seka n dēŋe tōgra la go'oge. ³¹ Ya wuu tā wun to'oge Nawēnne yetoga tōge bō nērba me, la ya tōgra ayīla ayīla, tī la wun zāsum nērba wuu, dee bō ba buraane. ³² Nēr-seba n tarī Nawēnne Sīa tō'wsra yetoga bō'ora nērba la tā wun yōke ba mēŋa me. ³³ Se'ere n soe la, Nawēnne boorī tī

sela woo dɔla la sore la sũ-mã'asum, a ka boori ti ti tɔnna yooro yooro.

³⁴ Pɔgsi sɪna Nawēnne nērba lagsɔɔ zē'am, wu ba ɪti se'em zē'esɪ wuu la. Sore ka boe ti ba dare tɔgra Nawēnne nērba lagsɔɔ zē'am. La ba sakra nōore wu Zifdōma ɔɔ n ye le se'em na. ³⁵ Sela sãn bɔna ti ba bɔɔra ti ba bāŋɛ, ba soke ba sɪrba ba yɪɛ. La ka narɪ ti pɔgsɪ tɔgra Nawēnne nērba lagsɔɔ zē'am.

³⁶ Yãma tē'esɛ ti la de la yãma zē'am ti Nawēnne kō-yēlga la pɔsɛ bu? Bu yãma mã'a n to'oge yetɔga la?

³⁷ Seka n tē'esɛ ti ɛŋa de la Nawēnne nōtɔ'ɔsa, bu ɛŋa de la seka ti Nawēnne Sɪa boe la ɛ ɛ, a sake ti sela ti mam gulɛ bɔ'ɔra ya wã de la Zuudãana la nōore ti a bɔ. ³⁸ La nēra sãn ka selse yel-ɛna, yãma mē da selse ɛ.

³⁹ Bela, m sɔbiisi, mōrgɛ-ya tɔ'ɔsra Nawēnne yetɔga tɔgra bɔ'ɔra nērba, dee da gu-ya nērba ti ba da tɔge yetɔg-zāŋɪ. ⁴⁰ La ɪta-ya sela woo ti la āna sōŋa, dee dɔla sore.

Azezi-krisi vo'ore

15 M sɔbiisi, lɛɛɛ wã mam boori ti m tēegɛ ya la kō-yēlga la ti mam daan mōolɛ bɔ ya ti ya bɔ sɪra zɛ kãŋkãŋɛ la yelle. ² Ya sãn gurɛ ɛ kãŋkãŋɛ wu mam n mōolɛ ya se'em na, ya wun yē fãare. La sãn dagna bela, yan bɔ sɪra la de la zãŋa.

³ Zãŋɔ seka n gãnnɪ ti mam daan to'oge n bela ti mam dēŋɛ zãsum ya:

Krisi ki la tōma tōon-be'ero ãyã,
wu lan gulɛ Nawēnne gōŋɔ puam se'em na.

⁴ Ti ba daan laage ɛ,
ti Nawēnne botɪ a vo'oge dabsa atã daare,
wu lan gulɛ Nawēnne gōŋɔ puam se'em na.

⁵ La a daan dēŋɛ dɪkɛ a mēŋa pa'alɛ la Apɪyɛɛɪ, dee yãŋa dɪkɛ a mēŋa pa'alɛ karēnbiisi pia la ayi la. ⁶ Bela poorum ti a dɪkɛ a mēŋa pa'alɛ a karēnbiisi n gãnnɪ kɔbsnuu wakate ayɪla. Ba nērba baseba zozo'e ken vɔa mɛ, la baseba ki mɛ. ⁷ Bela poorum ti a dɪkɛ a mēŋa pa'alɛ Azakɪ, dee yãŋa dɪkɛ a mēŋa pa'alɛ Tōntōnɪba la wuu.

⁸ Bela wuu poorum, a dɪkɛ a mēŋa pa'alɛ la mam n ān wu bia ti ba dɔgɛ ti a wakate ka paage la. ⁹ Mam de la pɪka Tōntōnɪba la wuu zē'am, dee ka nara ti ba wi'ira mam ti Tōntōnna, mam n daan nãmɛ Nawēnne nērba la ãyã. ¹⁰ La Nawēnne yel-sōnnɛ ãyã ti mam dɛna mam n de se'em lɛɛɛ wã. Yel-sōnnɛ na ti Nawēnne bɔ mam na dagɪ zãŋa. Mam tōm gãnna Tōntōnɪba baseba la wuu mɛ. La, la dagɪ mam mēŋa n tōnnɪ bela, Nawēnne yel-sōnnɛ na ãyã ti mam yãŋɛ tōnna bela.

¹¹ Bela, la sãn dɛna la mam n mōolɛ kō-yēlga la, bu bãma, ti wuu mōolɛ la kō-yēlga seka ti mam tēegɛ ya a yelle la, seka ti ya daan sake la.

Kūm vo'ore

¹² Tōma n mōolɪ ti Krisi ki mɛ dee vo'oge la, wãne ti ya nērba baseba yetɪ, seba n ki la kãn vo'oge? ¹³ La sãn dɛna sɪra ti nēr-seba n ki la kãn vo'oge, bela Krisi yi ka vo'oge. ¹⁴ La Krisi sãn ka vo'oge, kō-yēlga la ti tōma mōolɪ la de la zãŋa, ti yãma bɔ sɪra la mē dɛna zãŋa.

¹⁵ La sãn dɛna bela, tōma yi parɪ mɛ bɔ'ɔra Nawēnne, tōma n yetɪ, Nawēnne botɪ Krisi vo'oge mɛ, dee ti kūm kãn vo'oge la ãyã. ¹⁶ Seba n ki la sãn kãn vo'oge, bela, Krisi yi ka vo'oge. ¹⁷ La Krisi sãn ka vo'oge, yan bɔ sɪra la de la zãŋa, la ya tōon-be'ero taale ken bɔna la ya zu-to. ¹⁸ La seba n bɔ Krisi sɪra dee ki la mē yi bɔ mɛ. ¹⁹ Tōma n tarɪ putē'ere la Krisi la sãn dɛna la tōma n vɔa dūnia wã zuo mã'a ãyã, tōma n yi de ninbãal-dōma gãnna nērsaalba wuu.

²⁰ La, la dagɪ bela, Krisi ki dee vo'oge mɛ, ɛŋa n de pɔspɔsɪ dãana n vo'oge, pa'alɛ ti nērba baseba n ki la mē wun vo'oge. ²¹ La de la nēra ayɪla ãyã ti nērba kiira, bela, la mē de la nēra ayɪla ãyã ti kūm wun vo'oge.

²² Nērsaalba wuu de la Adam yɪsɪ, bela ti ba kiira. Bela ti nēr-seba wuu n mē de Krisi nērba wun vo'oge. ²³ La nēra woo tarɪ la a wakate, pɔspɔsɪ de la Krisi n vo'oge, la a lemɔ daare, seba n de a nērba la wun vo'oge mɛ.

²⁴ Bela poorum, Krisi wun sã'am seba wuu n soe ke'ɛŋo, la na'am, la pãŋa wuu, dee yãŋa dɪkɛ so'olum na lebɛ bɔ a Sɔ Nawēnne, dee ti sela woo ba'asɛ.

²⁵ Bela, dɛnɪ ti Krisi dɪ na'am halɪ ka paage wakat-sɛka ti Nawēnne wun botɪ a be'ɛba wuu bɔna a nãma tēŋa.

²⁶ Kūm n de be-sɛka ti a wun wa sã'am poorum. ²⁷ La gulɛ Nawēnne gōŋɔ puam yetɪ: «Nawēnne dɪkɛ sela woo ɛŋɛ la a nãma tēŋa.» Lan yetɪ Krisi n soe sela woo la, la ka tã ti a sɔna Nawēnne mēŋa n botɪ a sɔna sela woo la. ²⁸ La Nawēnne sãn dɪkɛ sela woo ɛŋɛ Krisi nu'usum, ɛŋa n de Nawēnne Dayua la mē wun dɪkɛ a mēŋa ɛŋɛ Nawēnne nu'usum. Ti Nawēnne dɛna nējadãana sɔna sela woo.

²⁹ Seba n ki la sãn kãn malɪn vo'oge, nēr-seba n botɪ ba misra ba ko'om puam seba n ki ãyã la, wun ɛŋɛ la wãne? Kūm sãn kãn malɪn vo'oge, bɛm ti ba ɪta bela?

³⁰ La bɛm ti tōma pōsra ti yōore wakate wuu? ³¹ M sɔbiisi, mam pōsɪ m yōore mɛ daare woo, mam n yetɪ ya se'em na de la sɪra. La de la sɪra wu mam n ɪti sũ-yēlga ya yelle yãma n dɔlɪ Zuudãana Azezi-krisi ãyã se'em na.

³² La sãn dɛna la dūnia zuo vɔm mã'a ãyã, mam n daan yē yela Efɛɛzɪ tēŋa wu mam zɛbrɪ la we-dūnsi la, a yōoro de la bɛm? La sãn dɛna ti kūm kãn vo'oge, ti wun ye le nɪ wu nērba baseba n yetɪ se'em na: «Base-ya ti ti dita dee yūura, ti beere ti wun ki mɛ.»

³³ Da pã'asɛ-ya ya mēŋa. Fu sãn dɔla nēr-be'ego, fu wun lebge la nēr-be'ego. ³⁴ Base-ya tē'esɛ yooro, dee da le tōnna tōon-be'ero. Mam yetɪ ya ti la de la yãnne bɔ ya: Ya nērba baseba ka mi Nawēnne.

Seba n wun vo'oge la ĩyā n wun āna se'em

³⁵ La nēr-seka wun soke yeti: «Seba n ki la wun vo'oge la wāne wāne? Ba wun wa tara la ĩyā bēm buuri?»

³⁶ Sokre ēna de la ɔɔɔn-sokre! Fōn ka mi ti fu sān burɛ sela biire, a yem n wun bule yese vɔa, dee ti a pɔko pō'oge? ³⁷ La sān dɛna la ke-biire bu sela ayēma biire ti fu dɪke burɛ, a de la biire mā'a. La a sān yese, a ka le āna wu seka ti fu burɛ la. ³⁸ Nawēnne boti bōnbuuri la yesra āna wu ēna n boori ti ba āna se'em na. Bōnbuuri woo n yesrɪ āna se'em de la to'oto'ore.

³⁹ Bōn-vɔɔsɪ mē ka tarɪ ĩyā ayɪla. Nērsaalba ĩyā de la to'ore, dūnsi ĩyā de la to'ore, niinto ĩyā de la to'ore, ti zūma ĩyā mē dɛna to'ore. ⁴⁰ Bōn-seba n boe saazuum tarɪ la ba ĩyā, ti seba n boe tēna zuo mē tara ba ĩyā, la ba sōna dagɪ ayɪla. ⁴¹ Wēntulle peelem boe la a to'ore, ti wōrga peelem bɔna a to'ore, ti wōrbɛ peelem mē bɔna ba to'ore. La wōrbɛ la peelem mē le bɔna la to'oto'ore.

⁴² Kūm vo'ore la mē wun wa āna la bela. Nēra sān ki ti ba laage ē, a ĩyā pō'orɪ mē. La Nawēnne sān wa vo'oge ē, a kǎn le pō'oge. ⁴³ Ba sān laage kūm, a lɔrɛ mē dee dɛna gille. La a sān vo'oge, a ān na sōna, dee tara pāna. ⁴⁴ Ban laage ē na, a tarɪ la dūnia zuo ĩyā. La Nawēnne sān wa vo'oge ē, a tarɪ la ĩyā ti Nawēnne Sia bɔ ē. Dūnia zuo ĩyā boe mē, la ĩyā ti Nawēnne Sia bɔ'ɔrɪ mē boe mē. ⁴⁵ La gulɛ Nawēnne ɔɔɔɔ puam yeti: «Adam n de pɔɔpɔsɪ nēra la, Nawēnne n bɔ ē vɔm.» La Kisi ti ba wi'iri ti poorum Adam na, tarɪ la Sia n bɔ'ɔrɪ vɔm. ⁴⁶ La dagɪ ĩyā ti Nawēnne Sia bɔ'ɔrɪ la ti ti to'orɪ yien. Ti to'orɪ la dūnia wā ĩyā yien, dee yāna wun to'oge ĩyā ti Nawēnne Sia bɔ'ɔrɪ. ⁴⁷ Nawēnne yuun dɪke la tēna tēntōnɔ nāam pɔɔpɔsɪ nēra la. La poorum nēra la ze'ele la Nawēnne yire wa'am. ⁴⁸ Dūnia nēra wu ān wu nēr-seka ti Nawēnne yuun dɪke tēna tēntōnɔ nāam na. Ti Nawēnne yire nēra mē āna wu nēr-seka n ze'ele Nawēnne yire wa'am na. ⁴⁹ Bela, tōma n ān wu nēr-seka ti Nawēnne dɪke tēntōnɔ nāam na, ti mē wun wa āna wu nēr-seka n ze'ele Nawēnne yire wa'am na.

⁵⁰ M sɔbiisi, bela ti mam gulɛ yele ya ti, nērsaala ĩyā wā kǎn tā'age kē Nawēnne so'olum puam. ĩyā wā n pō'orɪ la kǎn tā'age yē vɔm n ka ba'asrɪ.

⁵¹ Selse-ya ti m yele ya yelle n sugɛ. Tōma nērsaalba wu kǎn ki dee ti dūnia ba'asɛ, la ti wu iisi wun teege mē. ⁵² Dūnia ba'asɔ daare, benkonne n wun peebe, ti ti wu teege tɔtɔ nini kǎbsɔɔ puam. Benkonne na sān peebe, seba n ki la wun vo'oge la ĩyā n kǎn malɪn ki, la Nawēnne wun teege tōma ĩyā mē. ⁵³ Dēnɪ ti nērsaala ĩyā wā n pō'orɪ la, lebge ĩyā n ka pō'orɪ, ti ĩyā n kiiri la, lebge ĩyā n ka kiiri. ⁵⁴ La ĩyā n pō'orɪ la sān lebge ĩyā n ka pō'orɪ, ti ĩyā n kiiri la lebge ĩyā n ka kiiri, wakat-ēna

ti Nawēnne ɔɔɔɔ n gulɛ se'em na wun ēnɛ. La gulɛ yeti:

«Nawēnne yānɛ kūm,

ti kūm ka le bɔna.

⁵⁵ Kūm, fu pāna boe la bɛ?

Fu toogo boe la bɛ?»

⁵⁶ La de la tōon-be'ero n boti kūm tara pāna kuura nēr-ba. Ti ɔɔ boti tōon-be'ero yēta pāna. ⁵⁷ Ti pu'use Nawēnne a yel-sōnnɛ, ēna n boti tōma yānɛ tōon-be'ero, la kūm, Zuudāana Azezi-kisi ĩyā la.

⁵⁸ Bela, m sɔbi-nōnɔrɪsɪ, mōrgɛ-ya ze'ele kǎnkǎnɛ. Tōn-na-ya Zuudāana tōoma la wakate wu da base, yāma n mi ti nāmsgɔ seka ti ya nāmsrɪ Zuudāana la ĩyā dagɪ zāna la.

Ba lagɛ ligri ti ba sōnɛ Nawēnne nēra n boe Zerizalem

16 Lɛɛɛ wā, mam boori ti m tɔgɛ la ligri la ti ya lagsrɪ ti ya sōnɛ Nawēnne nēra la yelle. Doose-ya pa'alg-seka ti mam pa'alɛ Nawēnne nēra la n boe Galatɪ so'olum na. ² Lasrɪ daare woo, nēra woo looge lig-seba ti a yeti a bɔ la bɪnɛ, da ze-ya gu'ura ti mam sān wa paam, ti ya yāna lagɛ. ³ Ti mam sān wa paam, mam wun gulɛ la ɔɔɔɔ tōm nēr-seba ti ya mēna wun looge la, ti ba tarɪ bɔ'a la sēnɛ Zerizalem. ⁴ La, la sān le nara ti mam mēna sēnɛ, bāma wun doose la mam ti ti sēnɛ.

Apolɪ tɔgrɪ a sore sēnnɛ yelle

⁵ Mam wun wa'am ya zē'am, la mam wun doose la Maseduanɪ so'olum wa'am. ⁶ La mam sān wa'am, mam wun yuuge ya zē'am fēɛ, bu tā ti mam wun bɔna la ya ti ɔɔɔ wakate wa tole, ti ya sōnɛ ma ti m sēnɛ zē'e-seka ti mam wun sēnɛ la. ⁷ Mam ka boori ti m wen doose bɪsɛ ya dee tole, mam tarɪ putē'ere ti mam wun bɔna ya zē'am yuuge, Zuudāana la sān bɔ mam sore. ⁸ La mam wun weege bɔna la Efɛzɪ tēna wā halɪ ka paage Pāntekɔtɪ kibsa daare. ⁹ Se'ere n soe la, Nawēnne yo'oge la sore bɔ mam ti m tōm a tōoma zozo'e, baa bɛ'ɛba n zo'oge la.

¹⁰ Atimōtɪ sān wa'am ya zē'am, ya to'oge ē sōna, dee ēnɛ-ya yan wun ēnɛ se'em ti a buraane da bo'oge. Se'ere n soe la, a tōnnɪ Zuudāana tōoma la wu mam n tōnnɪ se'em na. ¹¹ Nēra nēra da pɔ'ɔgɛ ē, sōnɛ-ya ē ti a leme wa'am mam zē'am la sū-mā'asum. Mam, la sɔbiisi la gu'uri ē mē.

¹² La sān dɛna ti sɔbia Apolɪsɪ, mam yele ē mē nōore faa ti a doose la sɔbiisi baseba la wa'am wa bɪsɛ ya. La a ka boori ti a wa'am lɛɛɛ wā. A sān wa yē nēna, a wun wa'am.

Ba'asgo yetɔga, la pu'usgo

¹³ Guuse-ya ya mēŋa zε kǎŋkǎŋε Nawēnnε sore doosgo la puam. Keŋe ya mēŋa, tara-ya buraanε. ¹⁴ lta-ya sεla woo la nōŋlum.

¹⁵ M sɔbiisi, ya mi Astefanasɩ la a yir-dōma yelle, bǎma n dēŋε bɔ Nawēnnε sɩra Akayi so'olum puam. Ba tōm mε bɔ Nawēnnε nērba. Mam belɩ ya mε ¹⁶ tɩ ya nanna nēr-bǎma, la nēr-seba wuu n tōnnɩ Nawēnnε tōoma wu bǎma la.

¹⁷ Mam tarɩ sū-yēlga mε Astefanasɩ la Afɔrtunatusi la Akayikusi n wa'am na. Se'ere n soe la, ba sōŋε mam wu

yǎma boe nɩ la mam zē'am na. ¹⁸ Ba keŋe mam, la yǎma sūure mε. Pēgra-ya nēr-bǎma buuri.

¹⁹ Nawēnnε nērba n boe Azi so'olum pu'usɩ ya. Akila, la Aprisili, la Nawēnnε nēr-seba n lagsɩ ba yire la pu'usɩ ya sōŋa Zuudǎana Azezi doosgo puam. ²⁰ Sɔbiisi la wuu pu'usɩ ya. Pu'usε-ya taaba la nōŋlum.

²¹ Mam Apolɩ n gulε pu'usgo wǎ la m mēŋa nu'ugo, mam pu'usɩ ya.

²² Nēr-seka n ka nōŋε Zuudǎana la, kǎ'a-be'ego wun bɔna a dǎana zuo. Maranata.

²³ Tɩ Zuudǎana Azezi yel-sōnnε wun bɔna la ya.

²⁴ Mam nōŋε ya wuu mε Azezi-krisi doosgo puam.

2 Korēnti

Bilgre

Korēnti nērba baseba n yuun sā'am Apoli sūure, ti baseba yeti a dagi Azezi-krisi Tōntōnna sira sira.

Bela ti Apoli gulse gōṇṇ wā yele ba ti ba ka taru buuru, dee pa'ale ba ti ba bāṇe ti ēṇa nōṇe ba me, la ēṇa boori me ti ba naage taaba.

Ποσπος, a pa'ale ti ēṇa nāmse me, la Nawēnne sōṇe ēṇa me, bela ti ēṇa tāna belsra nērba baseba (1:1-11).

A tēege ba la sū-sā'āṇṇ seka n boe ēṇa la bāma tēṇasuka, dee pa'ale ba ti Azezi n bō ēṇa nōore ti a dena Tōntōnna. Bela n soe ti ēṇa daan zebe ba gōṇṇ ayēma puam yeti ba ka ēṇe sōṇa. La ban teege yem base tōon-be'ero la, ēṇa sūure n ān yēlum se'em (1:12—7:16).

La Apoli tōge la ligri ti ba lagse ti ba sōṇe Azezi nērba n boe Zude yelle, a sose ba ti ba bō la yemleego (sapitri 8-9).

Ba'asgo, Apoli zebe nēr-seba n ka sake ti ēṇa de la Azezi-krisi Tōntōnna la me, dee pa'ale ba yeti nēr-bāma de la pōmporndōma (sapitri 10-13).

¹ Mam Apoli n de Azezi-krisi Tōntōnna wu Nawēnne n boori se'em, la ti sobia Atimōti n gulse gōṇṇ wā bō'ra yāma Nawēnne nērba wuu n boe Korēnti, la Akayi so'olum wuu puam na. ² Ti So Nawēnne, la ti Zuudāana Azezi-krisi wun ēṇe ya yel-sōnne, dee bō ya sū-mā'asum.

Apoli pu'usri Nawēnne a yel-sōnne

³ Ti pēge-ya Nawēnne n de ti Zuudāana Azezi-krisi So la. ēṇa n de So n zoti ninbāalga, la ēṇa n de Nawēnne n sōṇri nērba bō'ra ba buraane sela woo puam. ⁴ ēṇa n bō'ri tōma buraane ti tooro wuu puam, ti tōma n yeti buraane na, tōma mē wun yāṇe sōṇra nēr-seba wuu n boe tooro buuri wuu puam bō ba buraane. ⁵ Tōma n yeti nāmso zo'oge wu Krisi la, bela, tōma mē wun yē buraane zo'oge Krisi iya. ⁶ Tōma sān bōna too-go puam, la de la ti yāma wun yē buraane, la fāare. La tōma sān yēta buraane, la de la ti yāma wun yē buraane ti la sōṇe ya ti yāma mē wun yāṇe wibra nāmso puam wu tōma n mē wibri nāmso puam na. ⁷ Tōma taru putē'ere la yāma me, mina sōṇa sōṇa ti yāma n po nāmsra la tōma la, yāma mē wun po yē buraane la tōma.

⁸ Ti sobiisi, tōma boori ti ya bāṇe la tooro seba n paage tōma Azi so'olum puam na. Tooro la daan nāmse tōma me zo'oge gāṇe tōma pāṇa, ti tōma daan pōn ka le tara putē'ere ti tōma wun vā. ⁹ Tōma daan kō'oge ti putē'ere yeti tōma vōm teka n bela. La bela paage tōma ti ti da te'ege la ti mēṇa, la ti te'ege Nawēnne n vo'ori kūm na. ¹⁰ La de la ēṇa n fāage tōma kūm ēṇa puam, la a wun ken fāage tōma me. Asra, tōma taru putē'ere la ē le me ti a wun le fāage tōma me. ¹¹ Yāma n

sōṇri tōma pu'usra Nawēnne bō'ra tōma la, Nawēnne wun lerge nērba pāi pu'usgo sōṇe tōma, ti nērba zo-zo'e wun pu'use Nawēnne a yel-sōnne tōma iya.

Sela n gu Apoli ti a viige a sore sēnne

¹² Sela n bō'ri tōma sū-yēlga de la tōma mi ti sūa puam ti tōma yel-ure n ān se'em dūnia wā puam, la, lan gānni wuu yāma zē'am, de la pupeelem, la sira n ze'ele Nawēnne zē'am. La dagi la nērsaala yem ti tōma ti bela, la de la Nawēnne yel-sōnne iya. ¹³ Tōma n gulsri yāma sela wā, la dagi sela ayēma, la de la yāma n karēṇri sela wōnna a vōore la. La mam taru putē'ere ti ya wun wōm a wuu vōore me, ¹⁴ wu yāma n dēṇe bāṇe a vōore fēe, ti Zuudāana lemṇo daare tōma n de yāma zu-zēkre, ti yāma mē dena tōma zu-zēkre la.

¹⁵ Mam n taru putē'e-ēṇa la, mam daan boori me ti m dēṇe wa'am yāma zē'am, ti ya wun to'oge yel-sōnne nōore buyi. ¹⁶ Mam daan boori la m dēṇe wa'am yāma zē'am, yāṇa ze'ele yāma zē'am tole Maseduanu so'olum, le ze'ele bilam leme wa'am yāma zē'am, ti ya sōṇe mam ti m sēṇe Zude so'olum. ¹⁷ Mam n looge yem ti m ēṇe se'em na, yāma tē'ese ti mam de la nōgōla dāana bu? Bu yāma tē'ese ti mam n looge yem se'em na de la nērsaala yem loore ti mam tāna wun yeti «ēe», le yeti «aye!»? ¹⁸ Nawēnne n de mam sira dāana, ti mam n tōge se'em bō yāma la dagi «ēe», la «aye!». ¹⁹ Se'ere n soe la, Azezi-krisi n de Nawēnne Dayua ti mam, la Atimōti, la Asilvē daan mōole a kōa yāma zē'am na, dagi «ēe», la «aye!», ēṇa zē'am la de la «ēe» wakate wuu. ²⁰ Nawēnne n biṇe nōore ti a ēṇe sela wuu la, Azezi-krisi n yeti «ēe», ēṇa wun ēṇe. Bela, la de la Azezi-krisi iya ti tōma yeta ti: «Amina!» ti la de-

na Nawēnne nā'asgo. ²¹ La de la Nawēnne mēŋa n boti tōma la yāma lagim ze kǎŋkǎŋe Kriši doosgo puam, la ēŋa n looge to, welge ti to'ore. ²² Œŋa n dǎale tōma pa'alɩ ti ēŋa n soe to, bɔ tōma a Sia n de sela n pa'alɩ ti ti wun yē sela wuu ti a bīŋe ti a bɔ ti la.

²³ Nawēnne n de mam kaset-dǎana, mam sǎn parna, a boti m ki. La de la, la wun sōŋe ya ti ya sūure da sǎ'am īyǎ n base ti mam ka le wa'am Korēnti. ²⁴ La dagi ti tōma boori ti mōrge ya mē ya bɔ sura la puam. Tōma boori ti ti lagim na ya le mē tōm ti ya yē sū-yēlga. Se'ere n soe la, yāma ze mē kǎŋkǎŋe ya bɔ sura la puam.

2 Bela, mam looge la yem yeti mam kǎn le wa'am ya zē'am, ti m da boti ya sūure le sǎ'am. ² Mam sǎn boti yāma sūure sǎ'am, āne n wun bɔ mam sū-yēlga, sǎn dagna yāma seba ti mam wun boti nɩ ya sūure sǎ'am na? ³ Bela ti mam daan gulse bɔ ya, mam ka boori ti m sǎn wa wa'am ya zē'am, m tara sū-sǎ'anjɔ la yāma n de seba n wun bɔ mam sū-yēlga la. Mam mi sura sura ti mam sǎn tara sū-yēlga, yāma mē tarɩ sū-yēlga mē. ⁴ La daan de la toogo, la sū-sǎ'anjɔ, la nintām puam, ti mam daan gulse gōŋɔ la bɔ ya. La dagi ti mam daan boori ti m boti ya sūure n sǎ'am, la de la ti ya bǎŋe mam n nōŋe ya zo'oge paage se'em.

Bɔ-ya nēr-seka n koŋe la sugri

⁵ Nēra sǎn boti sū-sǎ'anjɔ wa'am, la dagi mam mā'a sūure ti a sǎ'am, la de la yāma wuu sūure ti a sǎ'am. La ti m da tɔge tole, m yeti a sǎ'am na ya nērba zozo'e sūure. ⁶ Sɩbgrē seka ti yāma nērba zozo'e bɔ nēr-ēŋa dǎana la, la seke mē. ⁷ Lēle wǎ, sela n ān sōŋa de la ya bɔ ē sugri, keŋe a sūure, ti la da kē'ese ē sū-sǎ'anjɔ zozo'e puam ti a sǎ'am. ⁸ Bela, mam kǎ'anɩ ya mē ti ya ēŋe sela n wun boti a bǎŋe ti yāma nōŋe ē mē. ⁹ Mam n daan gulse gōŋɔ la bɔ yāma la, mam daan boori ti m bise la ya sǎn sakra mam sela woo puam. ¹⁰ Ya sǎn bɔ nēra sugri, mam mē bɔ'ɔrɩ a dǎana sugri mē. La sǎn dena mam, mam bɔ sugri mē, la bōn-seka sǎn bɔna dena mam bɔ sugri, mam ɩti bela la yāma īyǎ Kriši nifum, ¹¹ ti la da boti Asūtǎana yǎŋe tɔ. Se'ere n soe la, tōma mi ēn boori ti a ēŋe se'em mē.

Apoli sū-sǎ'anjɔ Truasi

¹² Mam n daan paage Truasi ti m mōole Kriši kō-yēlga la, mam daan yē ti Zuudǎana la yo'oge sore bɔ mam mē, ¹³ la mam putē'ere daan ka gǎ zē'a ayɩa, mam n ka yē m sobia Atiti bilam na īyǎ. Bela ti mam daan keese ba, dee tole Maseduanɩ.

Kriši tā'are

¹⁴ Mam pu'usrɩ Nawēnne n boti tōma dɔla Kriši poore daare woo a tā'are la puam, dee boti tōma īyǎ nērba bǎŋra Kriši zē'a woo, wu yūuŋ-yēlga n taage zē'a wuu

la. ¹⁵ Asura, tōma ān wu yūuŋ-yēlga bɔ Nawēnne, tōma n mōolɩ Kriši kōa bɔ'ɔra nēr-seba n yēti fǎare, la nēr-seba n sǎ'anɩ la. ¹⁶ La sǎn dena la nērba baseba, la de la kūm yūuŋo n sēm na kūm, la nērba baseba zē'am, la de la vɔm yūuŋo n bɔ'ɔrɩ vɔm. Āne n wun tā'age tōm tōon-ēŋa? ¹⁷ Tōma ka ān wu nērba baseba zozo'e n dɩke Nawēnne kō-yēlga la lēbra eera yōoro la. Ayelɩ, la de la Nawēnne n tōm tōma, ti tōma pelge ti puure tɔgra a nēŋam Kriši doosgo puam.

Nōor-bīŋre paalga tōntōnɩba

3 Yāma tē'ese ti tōma boori ti ti pēge la ti mēŋa bu? Bu tōma boori ti ti bɔ ya la gōnno n pa'alɩ tōma n ān sōŋa se'em, bu tōma boori la ya gulse gōnno n pa'alɩ tōma n ān se'em bɔ tɔ, wu nērba baseba n ɩti se'em na? ² Yāma mēŋa n de tōma gōŋɔ n gulse tōma sūure puam, ti nērba wuu mina dee karēŋra ē. ³ La de la vēelga ti yāma de la Kriši gōŋɔ ti a doose tōma tōoma puam gulse. La dagi gulsɔ ko'om n gulse, la de la Nawēnne n vɔa la Sia n gulse. La ka gulse kug-palagsɩ zuto, la gulse la nērsaalba sūa puam.

⁴ Tōma n tɔgrɩ bela la, tōma mi sōŋa sōŋa ti bōn-ēŋa de la sura Nawēnne zē'am, Azezi-kriši īyǎ. ⁵ La ka boori ti la yeti tōma tā wun tōm tōon-ēŋa la tōma mēŋa pǎŋa, tōma pǎŋa ze'ele la Nawēnne zē'am. ⁶ La de la ēŋa n boti tōma tā'age dena a nōor-bīŋre paalga la tōntōnɩba. La dagi ɩɔɔ n gulse, la de la Nawēnne Sia. Lan de se'em na, ɩɔɔ n gulse la sēm na kūm, la Nawēnne Sia la bɔ'ɔrɩ la vɔm.

⁷ ɩɔɔ la yuun gulse la kug-palagsɩ zuto, ti Nawēnne na'am pǎŋa peelem nēege wakate ēŋa, ti Amoyisi nēŋa nēege yēgra, ti Israyelɩ dōma ka tāna wun bise ē. La na'am pǎŋa la yuun tollɩ mē. ɩɔɔ la n sēm na kūm na n yuun puke la na'am pǎŋa bela la, ⁸ Nawēnne Sia n tōnɩ tōon-seka la, wun tara na'am pǎŋa gǎnna bela mē zozo'e. ⁹ Tōon-seka n sēm na sɩbgrē la n yuun tarɩ na'am pǎŋa la, bela, tōon-seka n boti nērba masra Nawēnne zē'am na tarɩ na'am pǎŋa gǎnna bela mē zozo'e. ¹⁰ Tōma tā wun pōn yeti na'am pǎn-seka n yuun boe la lebge la zǎŋa, se'ere n soe la, seka n boe lēle wǎ gǎnnɩ ē mē zozo'e. ¹¹ Bela, sela n yuun tollɩ la n tarɩ na'am pǎŋa la, sela n boe wakate wuu la n tarɩ na'am pǎŋa zo'oge gǎnna bela.

¹² Tōma n tarɩ putē'e-ēŋa gu'ura la īyǎ, tōma tarɩ buraane zo'oge mē. ¹³ Tōma ka ɩti wu Amoyisi n yuun dɩke tǎnne pɩ a nēŋa ti Israyelɩ dōma da yē na'am pǎŋa n nēege a nēŋa n tollɩ la. ¹⁴ La Israyelɩ dōma la yem yuun ka like. Halɩ wakat-ēŋa wa paam lēle wǎ, ba sǎn karēŋra nōor-bīŋre keka gōŋɔ la, tǎnne na ken pɩ ba nēnsɩ mē, ti ba ka bɔkra a vōore. Tǎn-ēŋa ka pilgri, sǎn dagna Kriši peelem puam mā'a. ¹⁵ Asura, wakat-ēŋa tarɩ wa paam zīna, ba sǎn karēŋra Amoyisi gōnno la, tǎnne na ken pɩ ba yem mē. ¹⁶ La nēra sǎn teege yem

lebe Zuudāana la zē'am, tǎnne na pilgri mē. ¹⁷ Ban yeti Zuudāana la, la de la Sia la. La Zuudāana Sia la n boe zē'a la, to'og-m-mēŋa boe la bilam. ¹⁸ Tōma wuu n doli Zuudāana Azezi la, tǎnne na pilge mē, ti tōma nēnsi yēgra la Zuudāana na'am pǎŋa. Ti Zuudāana Sia tēera tōma, ti tōma āna wu ēŋa n ān se'em na, ti na'am pǎŋa la pa'asra zo'ora.

Tōma pǎŋa ze'ele la Nawēnne zē'am

⁴ Nawēnne n zoe tōma ninbāalga bɔ tōma tōon-ēŋa la iŷā n soe ti tōma buraane ka bo'ora. ² Tōma zagse mē ka tōnna tōon-seba wuu n suge n de yǎnne tōoma la, tōma ka uti yem pǎ'asra nērba. La tōma ka teerɔ Nawēnne yetoga. Tōma togrɔ pa'ala la sira vēelga vēelga, ti nērba sūure n mi se'em na wun bǎŋe ti tōma uti sela n ān sōŋa Nawēnne nifum. ³ La kō-yēlga la ti tōma mōoli la sǎn ken suge mē, a suge la nēr-seba n wun sǎ'am na. ⁴ La de la seba n ka bɔ Nawēnne sira la. Asūtāana n de dūnia wǎ naba la n pī ba yem ti ba da bǎŋe Krisi n de Nawēnne wōnne na kō-yēlga na'am pǎŋa. ⁵ La dagi tōma mēŋa yelle ti tōma mōoli, la de la Azezi-krisi n de Zuudāana la kōa ti tōma mōoli. La sǎn dena tōma, tōma de la yāma tōntōnɔba Azezi iŷā. ⁶ Nawēnne n yuun yeti: «Peelem nēege lika puam» na, la de la ēŋa n boti peelem nēege tōma sūa puam, boti tōma bǎŋe Nawēnne na'am pǎŋa n nēege Krisi nēŋa zuo.

⁷ La tōma n tarɔ bōntarsōm ēŋa la, tōma ān wu yogrɔ loogrɔ ti ba dɔke tuulum bōnɔ ēŋe mī. Ti la pa'ale ti pǎnkāte ēŋa ka ze'ele tōma zē'am, a ze'ele la Nawēnne zē'am. ⁸ Tōma yeti nāmsgɔ buuri to'oto'ore mē sela woo puam, la a ka yǎŋe tōma. Tōma fabli mē ka mina tōma n wun ēŋe se'em, la tōma buraane ka bo'oge. ⁹ Nērba nāmsrɔ tōma mē, la Nawēnne ka base tōma, ba wē'erɔ tōma lubra mē, la tōma ka ki. ¹⁰ Tōma tarɔ nāmsgɔ mē ti iŷā puam wu Azezi kūm nāmsgɔ la daare woo ka go'ora, ti nērba wun yē Azezi vɔm tōma puam. ¹¹ Tōma n vɔa wǎ, tōma pōsrɔ ti yōore mē wakate wuu Azezi iŷā, ti nērba wun yē a vɔm tōma iŷā n kiiri la puam. ¹² Bela, kūm zigri la a ku tōma, ti yāma yēta vɔm.

¹³ La gulse Nawēnne gōŋɔ puam yeti: «Mam bɔ sira mē n soe ti mam toge.» Tōma mē bɔ Nawēnne sira mē, bela n soe ti tōma togra. ¹⁴ Tōma mi mē ti Nawēnne n vo'oge ti Zuudāana Azezi la, a mē wun po vo'oge tōma mē la Azezi, la a wun lagum tarɔ tōma la yāma sēŋe a zē'am. ¹⁵ Bōn-bāma wuu n uti la de la yāma iŷā. Bela ti Nawēnne yel-sōnne wun paara nērba zozo'e, ti nērba wun po'usra Nawēnne a yel-sōnne zo'ora pa'asra, ti la dena a nā'asgɔ.

¹⁶ Bela ti tōma buraane ka bo'ora. La baa tōma iŷā n sǎ'anɔ na, tōma sia lebgri la paalga daare woo.

¹⁷ Nāmsgɔ seka ti tōma yeti wakate fēfēe wǎ de la pika

ka tǎna wun dɔke make la nā'asgɔ zozo'e n ka tarɔ ba'asgɔ ti a wun boti tōma yē la. ¹⁸ Tōma putē'ere n boe la sela la, dagi sela ti nini yēti. A de la sela ti nini ka yēti. Bōn-seka ti nini yēti tolli mē. La sela ti nini ka yēti la boe la wakate n ka ba'asrɔ.

⁵ Tōma iŷā ti ti tarɔ dūnia wǎ zuo ān wu fuu-deego.

Tōma mi ti fuu-deego ēna sǎn wa sǎ'am, Nawēnne wun ēŋe kē'a zē'a saazuum bɔ to. A de la kē'a zē'a n boe wakate wuu, a dagi nērba n ēŋe ē. ² La tōma nāmsrɔ mē bɔora zozo'e ti ti kē saazuum kē'a zē'a na.

³ Se'ere n soe la, ti sǎn kē kē'a zē'e-ēŋa, la ān wu ti ye la fuugo la, ti kǎn dena beela. ⁴ Tōma n ken bɔna dūnia zuo iŷā wǎ puam na, tōma nāmsrɔ mē tara toogo. La dagi ti tōma boorɔ ti ti base la dūnia wǎ zuo iŷā la, tōma boorɔ ti Nawēnne n dɔke saazuum iŷā la ye to, ti sela n de vɔm wun pī sela n kiiri la. ⁵ La de la Nawēnne mēŋa n ēŋe tōma ti tōma āna bela, dee bɔ tōma a Sia n de sela n pa'alɔ ti tōma wun yē sela wuu ti a bīŋe ti a bɔ ti la.

⁶ Bela ti tōma tara buraane zozo'e daare woo, dee mina ti tōma n ken bɔna dūnia iŷā wǎ puam na, tōma zāage la Zuudāana kē'a zē'a na mē. ⁷ La tōma doli la sela ti tōma bɔ sira dee nǎn ka yē. ⁸ Tōma tarɔ buraane mē zo'oge, dee boorɔ nɔ ti ti base dūnia iŷā wǎ, dee sēŋe ka bɔna Zuudāana la zē'am. ⁹ Bela ti tōma mōrgra bɔora ti ti ēŋe ti la paage a yem, tōma sǎn bɔna dūnia iŷā wǎ puam, bu ti sǎn sēŋe a zē'am. ¹⁰ Se'ere n soe la, tōma wuu wun ze'ele la Krisi nēŋam ti a di tōma sariya, dee bɔ nēra woo yogrɔ ti la mase wu ēn tōm se'em dūnia wǎ, a sǎn tōm sōŋa, bu a sǎn tōm be'em.

Krisi n naage tōma la Nawēnne

¹¹ Bela tōma n mi ti zota Zuudāana n de se'em na, ti tōma mōrgra ti ti toge yǎŋe nērba ti ba sake ē. Wēn-naam mi tōma sōŋa mē. La mam tarɔ putē'ere ti yāma sūure puam ya mē mi mam mē. ¹² Tōma ken ka bɔora ti ti pa'ale ya tōma n ān sōŋa se'em, tōma boorɔ ti ti bɔ ya la folle ti ya tara yēsōm tōma iŷā. Bela ti ya wun tā'age toge lerge nēr-seba n wē'erɔ yō'ogo la sela n yeti la nini, dee ka bɔsra ba sūure puam na. ¹³ Tōma sǎn dena zo'lo, la de la Nawēnne iŷā. La tōma sǎn ka zalla, la de la yāma sōŋre iŷā. ¹⁴ La de la Krisi nōŋlum n soe tōma la iŷā. Tōma bǎŋe mē ti nēra ayula n ki nērba wuu iŷā, ti la pa'ale ti nērba wuu po lagum na ē ki mē. ¹⁵ A ki nērba wuu iŷā ti nēr-seba n vɔa la, da le vɔa ba mēŋa n boorɔ se'em, ba vɔa wu seka n ki ba iŷā dee vo'oge la n boorɔ se'em.

¹⁶ Bela iŷā ti leele wǎ, tōma ka le bɔsra nēra wu nēr-saala n tē'esrɔ se'em na. La baa tōma daan sǎn bɔsra Krisi wu nērsaalba n tē'esrɔ se'em na, leele wǎ tōma ka le bɔsra ē bela. ¹⁷ Nēra sǎn lagum na Krisi dena ayula, a lebege la nēr-paalga, yel-kegsɔ la tole mē, ti sela woo lebege paalsɔ. ¹⁸ La de la Nawēnne n ēŋe bela wuu, ēŋa

n boti Kriši naage tōma la ēṇa, dee bɔ tōma tōon-ēna ti ti boti nērba naage la ēṇa. ¹⁹ Tōma n yeti se'em na, la de la Nawēnne n boti Kriši boti dūnia dōma la ēṇa naage taaba, dee ka geele ba tōon-be'ero. Dee bɔ tōma yetɔga ti ti tɔge naare yelle bɔ nērba.

²⁰ Bela, Kriši n tōm tōma ti tōma sɔɔge a zē'am tɔgra la yāma wu Nawēnne mēṇa n tɔgru kǎ'ana ya tōma yetɔga la puam. Kriši iṽā tōma sosru ya mē ti ya naage la Nawēnne. ²¹ Kriši ka tōm tōon-be'ero. La Nawēnne base mē ti a lebge wu tōon-be'ero dāana tōma iṽā, ti tōma wun lebge nērba n mase Nawēnne zē'am ēṇa iṽā.

6 Tōma n lagum na Nawēnne tōnna la iṽā, tōma sosru ya mē ti ya da base ti yel-sōnne na ti ya to'oge Nawēnne zē'am na dēna zāṇa. ² Se'ere n soe la, Nawēnne yele a gōṇɔ puam yeti:

«Mam lerge ya pu'usgo la wakat-seka ti mam boori ti m ēṇe ya yel-sōnne na.

Fāare la daare, mam sōṇe ya mē.»

La selse-ya, lēle wā de la wakate ti Nawēnne iti yel-sōnne, lēle wā de la fāare daare la.

³ Tōma ka boori ti ti ēṇe sela n wun boti nēra tuuge, ti nēra da zerge tɔ ti tōoma la puam. ⁴ La sela woo puam tōma pa'alɪ mē ti tōma de la nērba n tōnni Nawēnne tōoma. Tōma mā'aru ti sūure mē, wibra nāmsgo puam, la toogo, la sū-sā'arɔ puam. ⁵ Ba wē tōma mē, dee yu tōma yu'a deto puam. Ba boti nērba zo-zo'e gire mē zēbe la tōma, tōma tōnni tōon-ke'eno mē targe ka gīsra, ka dita. ⁶ La tōma tōnni na pupeelem, la bāṇre, la sū-mā'are, la ɪr-sōṇɔ, la Nawēnne Sia, la nōṇlum sira sira. ⁷ Tōma tɔgru la sira yetɔga la Nawēnne pāṇa. Tōma n iti sela n mase la n de tōma zēbe lɔ-grɔ ti tōma tarɪ zebra dee gu'ura ti mēṇa. ⁸ Nērba baseba nā'asru tōma mē, ti baseba pɔ'ɔra tōma, baseba sā'anɪ tōma yu'ure mē, ti baseba pēgra tōma. Ba bɪsru tōma wu tōma de la pōmpɔrndōma, baa la tōma n tɔgru sira la. ⁹ Ba bɪsru tōma wu tōma de la sāama, baa la ban mi tōma sōṇa la, ba bɪsru tōma wu nērba n kiiri, dee ti tōma vɔa. Ba sɪbgru tōma mē, dee ti tōma ka kiira. ¹⁰ Ba bɪsru tōma wu tōma tarɪ la sū-sā'arɔ, la tōma tarɪ la sū-yēlga daare woo. Ba bɪsru tōma wu nasdōma, dee ti tōma boti nērba zozo'e tara bōntarsōm. Ba bɪsru tōma wu nērba n ka tarɪ sela, dee ti tōma tara sela woo.

¹¹ Korēnti dōma, tōma tɔge ya la vēelga, tōma pelge la ti puure tɔge la ya. ¹² La dagɪ tōma n ka nōṇe yāma, la de la yāma n ka pa'alē ya nōṇlum. ¹³ Mam tɔgru la ya wu m koma la, ya mē nōṇe tōma, pelge-ya ya puure la tōma.

Lika la peelem ka tā wun lagum taaba

¹⁴ Da dɪke ya mēṇa lagum na nēr-seba n ka bɔ Nawēnne sira la. Se'ere n soe la, sōṇa la be'em kǎn

yāṇe lagum taaba. Bēm lagɔɔ n boe peelem, la lika tēṇasuka? ¹⁵ Bēm naa-nōore n boe Kriši, la Asūtāana tēṇasuka? Bu seka n bɔ Kriši sira, la seka n ka bɔ ē sira tarɪ la bēm pure la taaba? ¹⁶ Bēm lagɔɔ n boe Wēn-naam deego, la бага ti ba māale tēṇasuka? La sǎn dēna tōma, tōma de la Nawēnne n vɔa la deego wu Nawēnne n yele yeti:

«Mam wun bɔna la ba, kē'era la ba.

Mam wun dēna ba Nawēnne, ti ba dēna mam nērba.»

¹⁷ Bela n soe ti Zuudāana Nawēnne yeti:

«Yese-ya ba puam, welge-ya ya mēṇa dee base ba.

La ya da kalum sela n de dēgrɔ, ti mam wun to'oge ya.

¹⁸ Mam wun dēna ya Sɔ, ti ya dēna mam dayɔɔsi, la m pɔyɔɔsi.»

Zuudāana Nawēnne n de ke'eṇo wuu dāana la n yele.

7 Bela m sɪr-nōṇrɪsɪ, nōor-bīṇre bāma wuu n de tōma bōnɔ na, base-ya ti ti malge ti mēṇa la dēgrɔ wuu n dēgru iṽā, la sia, dee āna sōṇa, vɔa pupeelem puam mase sela woo puam, zɔta Nawēnne.

Apoli tarɪ sū-yēlga la Korēnti dōma

² Base-ya ti tōma nōṇlum bɔna ya sūure puam. Tōma ka ēṇe nēra baa ayɪla be'em, tōma ka sā'am nēra yelle, la tōma ka zām nēra to'oge a sela. ³ Mam n tɔgru bela la, dagɪ ti mam boori ti m mōṇe ya la buurɔ. Mam daan pōn dēṇe yele ya tōma n nōṇe ya zo'oge se'em mē, tōma sǎn ki, bu tōma sǎn vɔa mē. ⁴ Mam bɔ ya sira mē, la mam yēsni mē yāma iṽā. Baa tōma toogo la wuu puam, mam tarɪ buraane, la sū-yēlga zo'oge mē.

⁵ Asira, tōma n daan paage Maseduanɪ na, tōma daan ka yē vo'osgo baa fēfēe. Tōma yē toogo buuri wuu mē, nērba n zēbe la tōma, dee ti dabeem tara tōma. ⁶ La Nawēnne n bɔ'ɔru sū-sā'arɔ dōma buraane na, daan boti Atiti n wa'am ti tōma yē buraane. ⁷ La dagɪ a wa'arɔ la mā'a iṽā, la de la ēn wa'am wa yele tōma yāma n bɔ ēṇa buraane se'em na iṽā. A yele tōma la yāma n boori ti ya le yē mam zo'oge se'em, dee yele mam yāma sū-sā'arɔ, la yāma n wɪsge ya mēṇa mam iṽā se'em. Bela n soe ti mam sū-yēlga le zo'oge pa'ase.

⁸ Mam gōṇɔ la ti mam daan gulse la sǎn sā'am ya sūure, mam ka iti m sǎn bāṇe nɪ. Mam sǎn wun yeti m sǎn bāṇe nɪ, la de la mam n daan bāṇe ti gōṇɔ la sā'am yāma sūure la. La bela de la wakate fēfēe puam. ⁹ La mam iti sū-yēlga mē lēle wā, la dagɪ mam n boti ya sūure sā'am na iṽā, la de la ya sū-sā'arɔ la n boti ya teege yem base tōon-be'ero la iṽā. Yāma sū-sā'arɔ ēṇa de la Nawēnne n boori se'em. Bela tōma ka ēṇe ya sela

n de be'em. ¹⁰ Asura, sū-sā'anjō sēka n de Nawēnne n boori se'em na boti nēra tēera la yem basra tōon-be'ero, yēta fāare. Nēra nēra ka ɩti a sǎn bǎnje nɩ bela puam. La dǔnia sū-sā'anjō sēm na kǔm. ¹¹ Sū-sā'anjō sēka n de Nawēnne n boori se'em na n boti ya ɩta se'em n wǎna: A boti ya mō'ora la nini, a boti ya pa'ala tɩ ya ka tarɩ taale yel-ēja puam, a boti ya sūure n ka āna yēlum, a boti ya zota la dabeem, a boti ya bɔɔra mē la ya sūure wuu tɩ ya yē mam, a boti ya tara la yemleego tɩ ya ēje sela n ān sōja, dee wɩsge ya mēja tɩ ya subge sēka n tōm be'em na. Yāma pa'alē mē sela woo puam tɩ yāma ka tarɩ taale yel-ēja puam.

¹² Bela, mam n daan gulse ya la, la dagɩ sēka n tōm tōon-be'ero la ɩyǎ, la dagɩ nēr-sēka tɩ a ēje ē be'em na mē ɩyǎ. La de la, la boti ya bǎnje sōja Nawēnne nējam yāma n nōje tōma zo'oge se'em. ¹³ La de la bela n soe tɩ tōma yē buraane, la dagɩ buraane na mā'a tɩ tōma yē, tōma ken yē sū-yēlga zo'oge mē, tōma n yē tɩ Atiti tarɩ sū-yēlga, yāma n keje a sūure se'em na. ¹⁴ La sǎn dēna mam n pēge yāma Atiti zē'am na, yāma ka ēje mam yǎnne. Tōma n ēn tɔgra sɩra bɔ'ɔra ya daare woo la, bela tōma n pēge yāma Atiti zē'am na mē de la sɩra. ¹⁵ Atiti sǎn tēege yāma sakre, la yāma n to'oge ē na dabeem na, a nōje yāma zo'oge pa'ase mē. ¹⁶ Mam ɩti sū-yēlga mē, mam n tā wun bɔ yāma sɩra sela woo puam na ɩyǎ.

Krisi nērba n sōjɩ taaba se'em

8 M sɔbiisi, tōma boori tɩ ya bǎnje la Nawēnne n ēje Maseduanɩ Wēndeto la nērba yel-sōnne se'em.

² Ba yē toogo mē nāmse zozo'e, la ba tarɩ sū-yēlga zo'oge mē, tɩ baa la ba nōjɩ la n zo'oge la, ba bɔ sōjɩ zo'oge mē la ba sūure wuu. ³ Mam yetɩ ya tɩ ba bɔ mase wu ban tā se'em, la ba bɔ halɩ gǎnje la ba pǎja. ⁴ Ba mēja n sose tōma tɩ tɩ bɔ ba sore tɩ ba po sōje Nawēnne nērba n boe Zerizalem na. ⁵ Ba ēje gǎnje tōma n daan tarɩ putē'ere se'em na mē. Ba dēje dɩke la ba mēja bɔ Zuudāana la, dee dɩke ba mēja bɔ tōma doose wu Nawēnne n boori se'em. ⁶ Bela tɩ tōma sose Atiti n pɔse sōjɩ tōon-ēja yāma zē'am na, yetɩ a tōm ē ba'ase. ⁷ Yāma mōrge sela woo puam mē: Yāma bɔ Krisi sɩra zo'oge mē, tāna tɔgra Nawēnne yelle sōja, tara Nawēnne mi'ilum zo'oge, wɩsge ya mēja sela woo puam, la yāma tarɩ tōma nōjlum zo'oge mē. Bela, mōrge-ya la sōjɩ tōon-ēja mē tōone.

⁸ Mam n yetɩ bela la, la dagɩ pǎja tɩ mam ɩti ya. Mam dɩke la nērba baseba n ēje se'em make bɔ ya, tɩ ya pa'alē yāma nōjlum n de nōjlum sɩra sɩra se'em. ⁹ Yāma mi tōma Zuudāana Azezi-krisi yel-sōnne na mē: Baa la ēja n daan de bōntarsōm dāana la, a daan ēje a mēja la nasa yāma ɩyǎ. Tɩ ēn ēje a mēja nasa la, wun botɩ yāma lebge bōntatba Nawēnne zē'am.

¹⁰ La de la mam putē'ere tɩ mam yetɩ m bɔ ya yel-ēna wǎ puam: La ān sōja bɔ ya tɩ ya sēje nēja la tōon-ēna wǎ. Yāma n de pɔspɔsɩ dōma n looge yem yuune n tole tɩ ya tōm tōon-ēna. La dagɩ bela mā'a, yāma n ken dēna pɔspɔsɩ dōma n pɔse lig-lobre la. ¹¹ Bela, lēle wǎ, tōm-ya ē la yemleego ba'ase, wu yāma n yetɩ yāma boori tɩ ya ēje se'em na. La ya bɔ mase wu yāma n tarɩ se'em. ¹² Se'ere n soe la, nēra sǎn bɔ la yemleego mase wu ēn tarɩ se'em, Nawēnne to'ori a bɔ'a la mē, a ka bɩsɩ sela tɩ fu ka tarɩ la. ¹³ Mam ka boori tɩ yāma n sōjɩ nērba baseba la kē'ese ya nōjɩ puam. La de la tɩ ya zōna taaba. ¹⁴ La de la yāma seba n tarɩ zo'oge lēle wǎ la, sōje seba n de nasdōma la. Tɩ bāma mē sǎn wa tara zo'oge, tɩ ya mē sǎn bɔɔra sōjɩ, tɩ ba sōje ya, bela tɩ ya wuu wun zōna taaba, ¹⁵ tɩ la doose wu Nawēnne gōjɩ puam tɩ la yetɩ:

«Nēr-sēka n vaage zo'oge la,
ka tarɩ sela tɩ la zo'oge gǎnje.
La sela ka pɔ'oge
sēka n vaage fēe la.»

¹⁶ Tɩ pu'usɩ Nawēnne a yel-sōnne, ēja n ēje yemloore ēja Atiti sūure puam tɩ a bɔɔra tɩ a sōje ya wu tōma n boori tɩ sōje yāma se'em na. ¹⁷ Atiti sake tōma sosgo mē, ken pa'ase, a looge la yem a mēja bɔɔra tɩ a wa'am yāma zē'am wa sōje ya. ¹⁸ Tōma tōm na tɩ sɔbia ayɩla tɩ Wēndeto nērba la wuu pēgrɩ ē, ēn tōnnɩ kō-yēlga la tōoma ɩyǎ, tɩ ēja la Atiti wa'am. ¹⁹ Sela n pa'ase, Wēndeto nērba la n looge ē tɩ a lagum la tōma eera tōnna sōjɩ tōon-ēna wǎ. Tōma tōnnɩ tōon-ēna nǎ'asra la Zuudāana Nawēnne mēja, dee pa'ala tɩ tōma boori tɩ tɩ sōje nērba.

²⁰ Tōma guusɩ la tɩ mēja tɩ nēr-sēka da wa tā'age zerge tōma, tōma n bɩsɩ ligri la n zo'oge yelle se'em na. ²¹ Tōma boori tɩ tɩ ēje la sela n ān sōja Nawēnne zē'am, la nērsaalba mē zē'am.

²² Tōma tōm na tɩ sɔbia ayēma la bāma. Tōma make ē mē nōore faa bɩse, la a wɩsge a mēja mē tōnna. Lēle wǎ a wɩsge a mēja gǎnna kurum mē. Se'ere n soe la, a bɔ yāma sɩra zo'oge mē. ²³ La sǎn dēna tɩ sɔbia Atiti yelle, a de la mam tōntōn-tadāana n lagum na mam tōnna yāma ɩyǎ. La sǎn dēna tɩ sɔbi-seba n dolɩ ē na, ba de la nērba tɩ Wēndeto nērba la tōm, tɩ la dēna Krisi nǎ'asgo. ²⁴ Bela, ēje-ya sela n pa'alɩ ba, la Wēndeto nērba la tɩ ya nōje ba, tɩ ba wun bǎnje tɩ tōma n pēge yāma ba zē'am na, la de la sɩra.

9 La ka le dēna tɩ mam gulse yele ya sōjɩ tɩ ya yetɩ ya bɔ Nawēnne nērba n boe Zerizalem na yelle.

² Mam mi tɩ ya boori tɩ ya sōje mē, bela tɩ mam pēge ya Maseduanɩ dōma zē'am, yele ba yetɩ: «Nawēnne nērba n boe Akayi la pōn māasum na yuune n tole tɩ ba sōje.» La yāma n wɩsge ya mēja la keje nērba zo-zo'e mē, tɩ ba mē bɔɔra tɩ ba ēje. ³ La mam tōm na tɩ sɔbiisi la tɩ ba wa'am ya zē'am, tɩ tōma n pēgrɩ yāma se'em bōn-ēja puam na, da kǎn dēna zǎja. Mam

boori la ya māasum ba'ase wu mam n yele se'em na. ⁴ La sãn dagna bela, Maseduanı döma la sãn doose mam wa'am wa yẽ ti ya ka māasum, tōma n daan bɔ yāma sira zo'oge se'em na, la wun dena la yānne zozo'e bɔ tōma, la, la mẽ wun dena la yānne bɔ yāma. ⁵ Bela ti mam bise ti la ān sōja ti mam sose ti sobiisi la ti ba dēje nēja wa'am yāma zē'am wa bise yemleego bɔ'a la ti ya yeti ya bɔ la yelle. Ti mam sãn wa paam, ti ya pōn māasum bɔ'a la ba'ase mē, ti la wun pa'ale ti ya bɔ la ya yemleego, la dagi mōrgre.

⁶ Bāje-ya ti nēr-seka n bure fēe, wun lagse la fēe. La nēr-seka n bure zo'oge, wun lagse zo'oge. ⁷ Bela, nēra woo bɔ wu ēn looge yem se'em na, ti la da dena nēnzūgre, bu mōrgre. La de la nēr-seka n bɔ'ori la sū-yēlga ti Nawēnne nōje. ⁸ La Nawēnne tarı ke'ero me tāna wun bɔ ya bōn-sōma buuri wuu, ti ya wun tara yāma n boori sela la wuu daare woo ti la seke, dee tara sela wun tōm tōon-sōma wuu. ⁹ La de wu lan gul-se Nawēnne gōja puam nēra n mase la yelle yeti:

«A puti a bōntarsōm me bɔ'ora nasdōma,
a tōoma n mase boe la wakate n ka ba'asri.»

¹⁰ Nawēnne n bɔ'ori ka-kɔra bōnbuuri, dee bɔ'ora ē dia ti a dita la, wun bɔ ya sela ti ya tāna wun tōm tōon-sōma zozo'e wu bōnbuuri n wam zo'oge se'em, ti ya tōoma n mase wun zɔ'ora pa'asra. ¹¹ A wun bɔ ya bōntarsōm ti la seke sela woo puam, ti ya wun bɔ'ora la ya sūure wuu, ti nērba zozo'e wun pu'usra Nawēnne a yel-sōnne, yāma bɔ'a la ti tōma dıke bɔ ba la iya.

¹² Se'ere n soe la, sōgre tōone na ti ya tōnni na, la dagi Nawēnne nērba la sōgre mā'a iya, la ken boti nērba zozo'e n pu'usra Nawēnne a yel-sōnne. ¹³ Ba sãn to'oge sōgre ēja, ba wun pēge Nawēnne me yāma n pa'ale ti yāma sakri Krisi kō-yēlga la, la yāma n tarı yemleego, tara ya bōntarsōm puta la bāma, la Nawēnne nērba wuu la iya. ¹⁴ Ba wun nōje ya me pu'usra Nawēnne ya iya, ēja n ēje ya yel-sōnne zozo'e la iya. ¹⁵ Ti pu'use-ya Nawēnne a yel-sōnne, a bɔ'a n ka tarı makre la iya.

Apoli tōgrı a tōoma yelle

10 Mam Apoli ti ya yeti, mam sãn bɔna yāma zē'am, mam de la nēr-bugsgɔ, la mam sãn ka bɔna yāma zē'am, mam tarı la buraane tōgra la, mam belı ya me la Krisi sū-bugsum, la a sōja. ² Mam sosri ya me ti ya da ita, ti mam sãn wa'am wa bɔna ya zē'am, la dena pēgre ti mam tara buraane tōgra, se'ere n soe la, mam mi ti mam wun tōge la buraane la nēr-seba n yeti tōma ıti la tōma nērsaalba mēja n boori se'em na. ³ Tōma de la nērsaalba, la tōma ka zebra wu nērsaalba n ıti se'em na. ⁴ Zebra lōg-seba ti tōma tarı zebra la dagi nērsaalba zebra lōgrɔ, ba de la pāja n ze'ele Nawēnne zē'am, n tā sā'ana sela wuu n tarı ke'ero. Tōma tarı ba sā'ana la tē'esgo seba wuu n de pōmporɔ, ⁵ la bōn-seba wuu n zēkri ba mēja boti

nērba ka bāja Nawēnne pāja. Dee yāja tē'esgo buuri wuu boti ba sakra Krisi. ⁶ Yāma sãn wa ēje sela n pa'ale ti ya sakri Nawēnne nōore sōja, tōma māasum me ti ti sibge seba n sı'srı la wuu.

⁷ Yāma bısrı la sela ti yāma nini yeti la. Nēra sãn tē'esɛ ti ēja de la Krisi nēra, a dāana mẽ tē'esɛ wāna wā: ēja n de Krisi nēra la, tōma mẽ de la Krisi nērba. ⁸ La mam sãn wē m yō'ogo zo'oge fēe la ke'ero seka ti Zuudāana bɔ tōma la, yānne ka tarı mam, la de la Zuudāana n bɔ tōma ke'ero ti ti sōje ya ti ya sēje nēja Nawēnne doosgo puam, la dagi ti sā'am ya. ⁹ Mam ka boori ti la āna wu mam yeti m kē'esɛ ya la dabeem la m gōnnɔ na. ¹⁰ Se'ere n soe la, nērba n yeti se'em n wāna: «Apoli gōnnɔ na yetoga ke'em me, dee dena toogo. La a mēja sãn bɔna tōma zē'am, a ka tarı pāja, ti a yetoga la dena ninbāalga.» ¹¹ Nēr-seka dāana n tōgrı bela la, a bāje sōja ti tōma n ka boe yāma zē'am dee tōgra se'em gōnnɔ na puam na, tōma sãn wa'am wa bɔna ya zē'am, tōma ken āna la bela.

¹² Tōma kãn saage zōsōm ti mēja, bu dıke ti mēja make la seba n pa'ale ba mēja tē'esɛ ti bāma ān sōja la. Ba dıkrı la ba mēja māmsra, makra ba mēja la taa-ba. Ban ıti se'em na, ba ka tarı yem. ¹³ La sãn dena tōma, tōma kãn wē yō'ogo ti la yōsge, tōma wun wē yō'ogo mase la tōon-seka ti Nawēnne bɔ tōma la beene. ēja n bɔ tōma sore ti tōma paage yāma zē'am. ¹⁴ Tōma ka yōsge ti beene wu tōma ka wa'am na yāma zē'am na, tōma n de pɔspɔsı nērba n wa'am yāma zē'am wa mōole Krisi kō-yēlga la. ¹⁵ Tōma ka wē'eri yō'ogo la tōon-seba ti nērba baseba tōm, bela tōma ka yōsge. La tōma tarı putē'ere ti yāma n bɔ Nawēnne sira la wun pa'asra me, ti tōma tōone na zɔ'ora pa'asra yāma zē'am, ti la ken mase Nawēnne n bɔ tōma se'em na beene. ¹⁶ Ti tōma yāja wun mōole kō-yēlga la so'olum seba n boe ya nēja la puam, ti la kãn dena ti tōma wē'era yō'ogo la tōon-seba ti nērba baseba dēje tōm ba tōoma zē'am.

¹⁷ La gulse Nawēnne gōja puam yeti: «Nēr-seka n boori ti a wē yō'ogo, a wē yō'ogo la sela ti Zuudāana ēje la.» ¹⁸ Se'ere n soe la, la dagi nēr-seka n pa'ali a mēja ti ēja ān sōja la n mase, la de la nēr-seka ti Zuudāana Nawēnne yeti a ān sōja la.

Guuse ya mēja la pōmporɔ Tōntōnıba

11 Mam sosri ya me ti ya sake m yalne wā fēe, asıra, sake-ya m yetoga wā. ² Mam ıti la sūure yāma iya, la sūure ēja ze'ele la Nawēnne zē'am. Se'ere n soe la, mam yeti m dıke ya bɔ la Krisi mā'a, mam boori ti ya tara la ya mēja sōja ti m dıke ya bɔ ē wu pugla n nān ka mi buraaga ti ba dıke bɔ sira. ³ La mam zoti la dabeem ti nēr-seka wun pā'ase ya, ti ya wērgɛ ka le dola Krisi la sūure ayıla, la pupeelem, wu Awa ti bōnsela la yuun dıke yemkēgsıga pā'ase ē ti a tuuge la.

⁴ Se'ere n soe la, nēra woo sãn wa'am ya zē'am wa mōola Azezi ayēma yelle, tɪ la ka dēna Azezi sēka tɪ tō-ma mōole bɔ ya la, yāma to'orɪ mɛ tɔtɔ, la yāma to'orɪ la sɪa ayēma n dagɪ sēka tɪ ya pōn to'oge la, la yāma to'orɪ la kō-yēlga ayēma n dagɪ sēka tɪ yāma pōn to'oge la, sakra ba sōŋa sōŋa. ⁵ Mam ka tē'esē tɪ nēr-bāma n pa'alɪ tɪ bāma de la Tōntōnɪba n gānnɪ na, mam de poorum dāana ba zē'am. ⁶ Baa la mam sãn ka mina yetɔga wu yetɔg-mita, la dagɪ tɪ mam ka tarɪ bāŋrɛ. La tōma pa'alɛ ya bōn-ēŋa mɛ vēelga vēelga sēla woo puam, wakate wuu.

⁷ Mam n daan mōole Nawēnnɛ kō-yēlga la bɔ yāma la, mam ka botɪ ya bɔ sēla. Mam daan sike m mēŋa mɛ, dee zēke yāma. Yāma tē'esē tɪ mam n daan ēŋe se'em na de la be'em bu? ⁸ Mam n daan tōnnɪ bɔ'cra yāma la, mam sake mɛ tɪ Wēndeto baseba nērba yɔ mam. La ān wu mam fā la bāma, dɪke sōŋe yāma. ⁹ La mam n daan boe ya zē'am bɔ'cra sōŋrɛ seba wuu la, mam ka te'ege ya nēra nēra tɪ a sōŋe mam. La daan de la tɪ sɔbi-seba n ze'ele Maseduanɪ wa'am na n daan bɔ mam sēla wuu n pɔ'ɔge mam na. Mam daan guusri m mēŋa mɛ tɪ m da dēna zeero bɔ ya, la mam wun ken āna la bela. ¹⁰ Krisi sɪra n boe mam sūure puam na, mam yetɪ ya mɛ tɪ nēra ka tā wun botɪ mam ka wē yō'ogo la bōn-ēŋa yelle Akayi so'olum puam. ¹¹ Bēm iyā tɪ mam yele wāna? La de la mam ka nōŋe ya mɛ bu? Ayɛɪ, Nawēnnɛ mēŋa mi tɪ mam nōŋe ya mɛ.

¹² Mam n itɪ se'em na, mam wun ken ita la bela, tɪ nēr-seba n boorɪ tɪ ba wē'era yō'ogo yetɪ bāma n tōnnɪ se'em, la tōma n tōnnɪ se'em na de la buyɪla la, da yē folle. ¹³ Nēr-bāma de la pōmpɔrɔŋ Tōntōnɪba, ba pā'as-ɪ la nērba, ita ba mēŋa āna wu ba de la Krisi Tōntōnɪba. ¹⁴ La ēna wā dagɪ bōn-di'ɪŋa. Se'ere n soe la, Asūtāana mēŋa teerɪ mɛ āna wu peelem malɛka. ¹⁵ Bela, la dagɪ di'ire tɪ a tōntōnɪba ita ba mēŋa āna wu sēla n mase tōntōnɪba. La ba ba'asgɔ wun āna wu ba tōoma la n de se'em na.

Apolɪ pa'alɛ ēŋa n nāmse a tōoma puam se'em

¹⁶ Mam le yetɪ mɛ tɪ nēra da bɪsɛ mam wu mam de la yalma la. La ya sãn bɪsra mam wu yalma, ya yi sake tɪ m wē m yō'ogo fēe, wu mam de la yalma la. ¹⁷ Mam n tɔgrɪ wē'era m yō'ogo wā, la dagɪ Zuudāana n yetɪ mam yele se'em na. Mam keŋe la m sūure tɔgra wu yalma la, wē'era yō'ogo. ¹⁸ Nērba zozo'e n wē'erɪ yō'ogo la dūnia yela la, mam mē wun wē m yō'ogo mɛ. ¹⁹ Yāma de la yem dōma, dee sake tɔ'cra yalmdōma la yem-leego! ²⁰ Yāma sakrɪ mɛ tɪ ba kē'esra ya yamne puam, sake tɪ ba dita ya, fāara ya, ka nanna ya, sake tɪ ba wē'era ya pegsɪ. ²¹ Tōma n daan ēŋe tɪ mēŋa tarumdōma ka ēŋe ya wu bāma n ēŋe ya se'em na, la de la yān-ne bɔ mam bu? Nēra sãn tāna wun wē yō'ogo sēla yelle, mam mē tā wun wē yō'ogo mɛ a yelle. Wāna de

la yalne tɪ mam tɔgrɪ. ²² Ba de la Ebre dōma, mam mē de la Ebre nēra. Ba de la Israyelɪ dōma, mam mē de la Israyelɪ nēra. Ba de la Abraham yusɪ, mam mē de la Abraham yuŋa. ²³ Ba yetɪ bāma de la Krisi tōntōnɪba, mam wun tɔge wu mam yem n bɔɪ la, mam n de Krisi tōntōnna gānna ba. Mam tōm nāmse gānna bāma mɛ. Ba kē'esē mam yu'a deem gānna bāma mɛ, ba wē mam zo'oge gānna bāma mɛ, nōore zozo'e mam deege la m ki. ²⁴ Nōore bunuu tɪ Zifdōma wē mam la ka'asa, ka'asrɛ ayɪla kaɪ pinaasɪ. ²⁵ Rom dōma wē mam mɛ nōore atā. Daare ayɪla nērba lobe mam mɛ la kuga deege la ba ku. Nōore butā tɪ mam boe ðorŋɔ puam, tɪ a sā'am ko-kāte puam mise. Mam ēŋe daare ayɪla mɛ ko'om puam, wuntɛɛŋa la yu'ɪŋɔ. ²⁶ Mam sɔa la sēnnɛ puam, mam yē yel-pakrɪsɪ mɛ zozo'e la kulsɪ ko'om n purɛ, la fāarba. Mam yē yela mɛ la Zifdōma n de mam buuri la, la bu-zāŋsɪ. Mam yē yel-pakrɪsɪ mɛ tēnsɪ puam, la weto puam, la ko-kāte puam. Mam daan yē yela mɛ la seba n parɪm tɪ bāma de la tɪ sɔbiisi la.

²⁷ Mam daan tōm tōon-ke'eno nāmse mɛ. La nōore faa mam ka gɪsɛ. Kɔm, la koyūuro yōke mam mɛ. Mam gā'arɛ kɔm mɛ wakate baseba. Wakate baseba ɔɔɔ yōke mam mɛ, tɪ mam ka tara fuugo wun pile. ²⁸ Tɪ mam ka tɔgra yel-seba n weege la. La sēla n de pakre bɔ mam daare woo, de la Azezi nērba n boe zē'esɪ wuu la yelle. ²⁹ Nēra sãn bɔna tɔrgɔ puam, la ān wu mam mē boe la tɔrgɔ puam na. La nēra sãn base Nawēnnɛ doosgo, mam sūure n sā'anɪ zozo'e.

³⁰ La sãn dēna yō'ogo wē'a, mam wun wē yō'ogo la m tɔrgɔ la. ³¹ Nawēnnɛ n de tɪ Zuudāana Azezi Sɔ n soe pēka wakate n ka ba'asrɪ la, mi mɛ tɪ mam ka parɪɪ.

³² Mam n daan boe Damaasɪ la, gɔmna tɪ naba Aretasɪ botɪ a sɔna Damaasɪ bɪsra la, daan botɪ ba gu'ura la tēŋa la nōa tɪ ba yōke mam. ³³ Tɪ ba daan botɪ mam sige pɪ'ɪgɔ puam, tɪ ba dɪke mam doose sawure sike lalga poorum, la de la bela tɪ mam yāŋe pōsɛ.

Apolɪ tɔgrɪ yel-seba tɪ Nawēnnɛ puke pa'alɛ ē, la a tɔrgɔ yelle

12 Dēnɪ tɪ mam wē yō'ogo, la yō'ogo wē'a la ka tarɪ yōorɔ. La mam wun ba'asōm tɔge la bōn-seba tɪ Zuudāana la puke pa'alɛ mam, tɪ mam yē wu zāasŋɔ la. ² Mam mi la Krisi nēra ayɪla yuuma pia la anaasɪ n wāna n tole, tɪ Nawēnnɛ zēke ē zom saazuum a yire. Mam ka mi a dāana sãn sɪrɪ zēke mɛ zom sɪra sɪra, bu la sãn āna wu zāasŋɔ la, Nawēnnɛ mā'a n mi. ³ Mam mi tɪ bura-ēŋa zēke mɛ zom Nawēnnɛ yire, la mam n yele se'em na, mam ka mi a sãn sɪrɪ zēke zom, bu la sãn āna wu zāasŋɔ la, ⁴ la mam n mi sēla de la a wōm na yetɔga mɪ tɪ nēra ka tā wun tɔge, la sēla tɪ ba ka bɔ nēr-saala nōore tɪ a yele. ⁵ Mam wun wē yō'ogo la bura-ēŋa n yē sēla la yelle, la mam kãn wē yō'ogo m yela baseba yelle, tɪ la sãn dagna mam tɔrgɔ la yelle mā'a. ⁶ Mam

sān bɔɔra tɪ m wē yō'ogo, mam kǎn dēna yalma, se'ere n soe la, mam wun tɔge la sɪra. La mam kǎn ēɲe bela, mam ka boori tɪ ba tē'ese mam yelle gǎɲe ban yē mam n ɪti se'em, bu ban wōnnɪ mam n ye le se'em na.

⁷ La, lan wun ēɲe se'em tɪ mam da tā'age zēke m mēɲa la bōn-yǎlma tɪ Nawēnne puke pa'ale mam na, a base tɪ Asūtāana ēɲe sela n ǎn wu gō'a mam īyǎ puam nāmsra mam tɪ mam ka tāna wun zēke m mēɲa.

⁸ Mam sose Zuudāana la nōore butǎ yetɪ a botɪ bōn-ēɲa fōrge dee base mam. ⁹ La a lerge mam yetɪ: «Mam yel-sōnnē seke fu mē. Se'ere n soe la, la de la tɔrgo puam tɪ mam pǎɲa tōnnɪ zozo'e.» Bela, mam wun wē yō'ogo m tɔrgo la puam, tɪ Kri si pǎɲa la wun bɔna la mam lē. ¹⁰ Bela n soe tɪ mam ɪta sū-yēlga m tɔrgo la puam, la tuure puam, la tooro puam, la nāmsgo puam, la sū-sǎ'arɔ puam, mam n sake Kri si la īyǎ. Se'ere n soe la, mam tɔrgo la puam tɪ mam tarɪ pǎɲa.

Apoli fabli Korēnti Wēndeego nērba yelle

¹¹ Yāma n mōrge mam tɪ mam tɔgra wu yalma la. La de la yāma n de nɪ ya tɔge po'oge mam, pa'ale mam n ǎn se'em. Baa mam sǎn ka dēna sela, nēr-seba n pa'alɪ tɪ bāma n de Tōntōnɪba n gǎnnɪ la, mam ka de poorum dāana ba zē'am. ¹² Yel-seba wuu tɪ mam daan wībri tōnna ya zē'am na pa'alɪ mē tɪ mam de la Kri si Tōntōnna. Bōn-yǎlma, la yel-kursɪ n pa'alɪ Nawēnne pǎɲa daan ēɲe mē. ¹³ Bēm yel-sōnnē tɪ mam ēɲe bɔ Azezi nērba zē'esɪ baseba, tɪ la pɔ'oge yāma? Sǎn dagna mam n ka to'oge sōɲɛ ya zē'am na mā'a. Bɔ-ya mam sugri yel-ēɲa puam.

¹⁴ Nōore atǎ dāana n wǎna tɪ mam māasum tɪ m wa'am ya zē'am wa bise ya. La, la dagɪ yāma n wun bise mam yelle. Se'ere n soe la, mam ka eerɪ ya sela, la de la yāma mēɲa tɪ mam eerɪ. Yāma ǎn wu mam kɔma la. Asura, la dagɪ kɔma n wun lagse sela bīɲe ba sɔdōma, la de la sɔdōma n wun lagse sela bīɲe ba kɔma. ¹⁵ La sǎn dēna mam, mam wun dɪke sela wuu tɪ mam tarɪ, la m mēɲa wuu bɔ la yemleego yāma sōɲɛ īyǎ. Mam n nōɲe yāma zo'oge la īyǎ n base tɪ yāma ka nōɲe mam bu?

¹⁶ Ya mi mē tɪ mam ka to'oge sōɲɛ ya zē'am, la ya nērba baseba yetɪ mam ēɲe la yemkēgsɪga pǎ'ase ya.

¹⁷ Mam n daan tōm nēr-seba tɪ ba wa'am yāma zē'am na, ba nēr-kǎna tɪ mam botɪ a to'oge sela ya zē'am bɔ mam? ¹⁸ Mam daan sose la Atiti tɪ a wa'am ya zē'am, dee tōm tɪ sɔbia la, tɪ a doose ē. Bela, Atiti pǎ'ase yāma to'oge sela mē bu? Mam la Atiti tarɪ la putē'ere ayɪla, la tōma doose la sore ayɪla.

¹⁹ Yāma tē'ese tɪ tōma n tɔgrɪ bela wuu la, tōma eerɪ la buurɔ yāma zē'am bu? Ayel. Tōma tɔgrɪ la Nawēnne nēɲam, Kri si doosgo puam. Tɪ sɔbi-nōɲrɪsɪ, tōma tɔgrɪ bela wuu tɪ la sōɲe la yāma, tɪ ya sēɲe nēɲa Nawēnne doosgo puam. ²⁰ Mam zotɪ mē tɪ m wun wa paam ya

zē'am yē tɪ ya ka ǎn wu mam n boori se'em na, tɪ yāma mē yē tɪ mam ka ǎn wu yāma n boori se'em na. Mam zotɪ mē tɪ zēbre, la ɪta sūure la taaba, la sū-isgre, la gēelgo, la pɔ'ɔg-taaba, la ya'anzūm, la zēk-m-mēɲa, la ɪr-yooro wun bɔna ya tēɲasuka. ²¹ Mam zotɪ mē tɪ mam sǎn wa wa'am yāma zē'am, mam dāana Nawēnne wun botɪ yǎnnē yōke mam yāma īyǎ, tɪ m sūure sǎ'am la ya nēr-seba n daan tōm tōon-be'ero, dee ka teege yem base tōon-dēgrɔ, la yalsɪ, la tōon-yooro se-ba tɪ ba ēɲe la.

Ba'asgo kǎ'arɔ, la pu'usgo

13 Nōore butǎ dāana n wǎna tɪ mam sēm ya zē'am. La mam wun ēɲe wu Nawēnne gōɲɔ n ye le se'em na yetɪ: «Yela wuu malgre, dēnɪ tɪ nērba bayi bu batǎ dēna kaset-dōma.» ² Mam n daan wa'am ya zē'am nōore buyi dāana la, mam daan kǎ'an seba n tōm tōon-be'ero, la nērba baseba la wuu mē. La lēle wǎ tɪ mam ka boe ya zē'am na, mam le yeta ya mē tɪ mam sǎn wa'am, mam kǎn zoe nēra ninbāalga. ³ Yāma boori tɪ ya yē la sela n pa'ale tɪ Kri si n botɪ mam tɔgra, ya wun yē. Kri si sǎn ɪta sela ya zē'am, tɔrgo ka tarɪ ē, a tarɪ pǎɲa zo'oge mē ya zē'am. ⁴ Asura, a ēɲe a mēɲa la tarma, tɪ ba ka ē dɔ-puurnja zuo. La a vɔa mē la Nawēnne pǎɲa. Tōma n de ayɪla la Kri si la, tōma mē de la tarɪmdōma, la tōma vɔa la Kri si lē, wun tōnna yāma zē'am la Nawēnne pǎɲa.

⁵ Vēese-ya ya mēɲa bise ya sǎn bɔna Kri si sore la zuo. Ya mēɲa geele bise, yāma ka mi tɪ Kri si boe la yāma mē? Sǎn dagɪ nɪ bela, ya kɔɲe mē. ⁶ La mam tarɪ putē'ere tɪ yāma mi mē tɪ tōma mōrge mē ka kɔɲe. ⁷ Tōma pu'usɪ Nawēnne mē ya īyǎ tɪ ya da ēɲe sela n de be'em. La dagɪ tɪ tōma boori tɪ tɪ pa'ale tɪ tōma yǎɲe mē, la de la tɪ yāma wun ēɲe sela n ǎn sōɲa, baa la tōma sǎn ǎna wu tōma kɔɲe mē. ⁸ Se'ere n soe la, tōma ka tā wun ēɲe sela n sɪ'ɪsɪ sɪra, tōma dolɪ la sɪra. ⁹ Tōma sǎn bɔna tɔrgo puam dee tɪ yāma tara pǎɲa, tōma tarɪ sū-yēlga mē. La tōma n sosɪ Nawēnne sela tɪ pu'usgo puam, de la ya vɔm wuu wun mase ǎna sōɲa. ¹⁰ Bela n soe tɪ mam gulsra ya bōn-bāma, mam n ka boe ya zē'am na, tɪ m sǎn wa wa'am ya zē'am, m da dɪke Zuudāana n bɔ mam nōor-seka la sɪbge ya. A bɔ mam nōore la tɪ m sōɲe ya mē tɪ ya sēɲe nēɲa Nawēnne doosgo puam, la dagɪ tɪ m sǎ'am ya.

¹¹ Sela n deege, m sɔbiisi, tara-ya sū-yēlga, mōrge-ya tōm mase sela woo puam, bɔ'ɔra-ya taaba buraane, tara-ya nōore ayɪla la taaba, vɔa-ya la sū-mā'asum la taaba, tɪ Nawēnne n de nōɲlum, la sū-mā'asum dāana la wun bɔna la ya lē. ¹² Pu'use-ya taaba la nōɲlum. Nawēnne nērba wuu pu'usɪ ya.

¹³ Tɪ Zuudāana Azezi-kri si yel-sōnnē, la Nawēnne nōɲlum, la Nawēnne Sɪa lagɪmtaare wun bɔna la ya wuu.

Galatı

Bilgre

Galatı dōma yuun ze'ele la Golu, tēn-seka yu'ure n de Frānsı zīna wā, sēŋe ka zī'ire Azi-minēerı. Azi-minēerı la yu'ure yāŋa de la Tırki. Apolı sore sēnne buyi, la butā dāana tı a mōole Azezi kō-yēlga mī, tı nērba bō Azezi sūra. Bela poorum, nērba baseba n mē sēŋe ka pā'ase nēr-seba n dagı Zıfdōma dee bō Azezi sūra la, yetı dēnı tı ba sake Zıfdōma lō, la ba wāta ba buraası wu lō la n bō nōore se'em na.

Apolı wōm na kō-ēŋa, tı a gulse yele ba tı la dagı pērgre tı ba doose Zıfdōma lō la, tı la de la ban bō Azezi sūra la tı ba wun mase Nawēnne zē'am, la dagı ban sakrı lō la iŷā.

Apolı dēŋe pa'ale la Azezi n wi ēŋa botı ēŋa dēna a Tōntōnna, la Azezi mēŋa n puke a kō-yēlga la pa'ale ēŋa se'em. Dee yetı ēŋa la Azezi Tōntōnıba baseba la yē taaba me, la ba sake tı ēŋa zāsŋa la de la sūra (sapıtrı 1-2).

A dıke la Nawēnne gōn-seba n yuun pōn gulse bōna kurum kurum na, zāsum ba yetı, fu sān bō Azezi sūra, tı fu wun yē fāare. Azezi n ki dō-puurŋa zuo la iŷā tı tōma sōna tı mēŋa, tōma ka le dēna lō yamsı (sapıtrı 3-4).

Gōŋa la ba'asgı, a yetı dēnı tı tōma vōa vōm seka n pa'alı tı tōma vōa la nēr-seba n soe ba mēŋa vōm. La dēnı tı Nawēnne Sıa la pa'ala tı sore, wun bō tı vōm paalga n ān sōŋa, tı tı nōŋe taaba (sapıtrı 5-6).

1 Mam Apolı n de Kriŷi Tōntōnna n gulse gōŋa wā.

La dagı nērsaalba n tōm mam, la mē dagı nēr-saalba n looge mam tı mam dēna Kriŷi Tōntōnna. La de la Azezi-kriŷi, la tı Sı Nawēnne n vo'oge Azezi la n looge mam. ² Tı sōbi-seba wuu n boe kalam na, n lagım na mam gulse bō'ora yāma Azezi-kriŷi nērba n lagsrı Galatı tēnsı puam na.

³ Tı Sı Nawēnne, la tı Zuudāana Azezi-kriŷi wun ēŋe ya yel-sōnne, dee bō ya sū-mā'asum. ⁴ Azezi-kriŷi n dıke a mēŋa bō tı ba ku ē tōma tōon-be'ero iŷā, tı a fāage tı dūnıa wā be'em puam base, wu tı Sı Nawēnne n boorı se'em na. ⁵ ēŋa n soe nā'asgı wakate n ka ba'asrı. Ami-na.

Azezi kō-yēlga la de la ayıla mā'a

⁶ Mam ze la yerı la yāma n dare base Nawēnne n wi ya Kriŷi yel-sōnne iŷā, dee to'oge kōa ayēma wu kō-yēlga la. ⁷ Kō-yēlga ayēma ka boe. La de la nērba n bursrı ya putē'era bō'ora tı ba teege Kriŷi kō-yēlga la. ⁸ Nēra sān mōole kō-yēlga ayēma bō ya, tı la dagna seka tı tōma mōole bō ya la, baa la sān dēna tōma mēŋa, bu maleka n ze'ele Nawēnne yire, Nawēnne kā'a-be'ego bōna a dāana zuo. ⁹ Tōma pōn yele ya me, la mam le yeta ya me, tı nēra sān mōole kō-yēlga ayēma n de to'ore la seka tı ya to'oge la, Nawēnne kā'a-be'ego bōna a dāana zuo.

¹⁰ Bela, yāma tē'esε tı mam boorı tı nērba n pēge mam bu, bu Nawēnne n pēge ma? Yāma tē'esε tı mam boorı tı m ēŋe tı la paage la nērsaalba yem bu? Ayel, mam sān boorı nı tı m ēŋe tı la paage nērsaalba yem, mam ka de nı Kriŷi tōntōnna.

Apolı n lebge Azezi tōntōnna se'em

¹¹ M sōbiisi, mam boorı tı ya bāŋe me tı kō-yēlga la tı mam mōolı la ka ze'ele nērsaalba zē'am. ¹² La mam mē ka to'oge ē nēra zē'am, la mē dagı nēra n zāsum mam. La de la Azezi-kriŷi mēŋa n puke ē pa'ale mam.

¹³ Ya wōm mam daan ān se'em Zıfdōma sore la puam, daan nāmsra Azezi nērba la zozo'e, mōora tı m sā'am ba sore la. ¹⁴ Tōma Zıfdōma sore la puam, mam daan sēŋe nēŋa me wısgε m mēŋa la tı yaabdōma dıgmike la yelle, lta lan yele se'em na gānna m zuu-taaba zozo'e. ¹⁵ La Nawēnne daan welge mam na to'ore lan dēŋe mam dıka, ēŋe mam yel-sōnne, looge mam tı m dēna a tōntōnna. ¹⁶ ēŋa n daan wa bıse tı la ān sōŋa, tı a puke a Dayua la pa'ale mam tı m mōole a Dayua la kō-yēlga bō bu-zāŋsı la, mam daan ka sēŋe nēr-seka zē'am tı a zāsum mam. ¹⁷ La mam mē daan ka sēŋe Zerizalem seba n dēŋe mam dēna Azezi Tōntōnıba la zē'am. Mam daan sēŋe la Araabı so'olum, bela poorum tı mam lebe Damaası. ¹⁸ Bela poorum yuuma atā n tole, tı mam yāŋa sēŋe Zerizalem tı m ka bāŋe Apıyεerı, daan ēŋe dabsa pia la anuu a zē'am. ¹⁹ La mam ka yē Azezi Tōntōnna ayēma pa'ase, sān dagna Azakı n de Zuudāana yıbga la mā'a.

²⁰ Mam n gulse ya sela wā, mam yetı ya Nawēnne nēŋam tı la dagı pōmpōŋa.

²¹ Bela poorum mam ze'ele Zerizalem sēŋe la Siiri, la Silisi so'olum. ²² La Azezi-kriŷi nēr-seba n boe Zude tēnsı la daan nān ka yē mam. ²³ Ba daan wen wōm me tı ba tıgrı mam yelle yetı: «Seka n daan nāmsrı tōma

mōora ti a sā'am kō-yēlga ti ti bɔ sura la, yāŋa mōoli la kō-yēlga la.» ²⁴ Ti ba nā'asra Nawēnne mam iŷā.

Apoli, la Azezi Tōntōnɩba baseba la tarɩ la nō-yēnne

2 Bela poorum yuuma pia la anaasi n tole, ti mam la Abarnabasi lebe Zerizalem, la mam tarɩ la Atiti lagum mī. ² Nawēnne n daan puke pa'ale mam, ti mam sēŋe. Mam daan pa'ale ba la kō-yēlga ti mam mōole bɔ bu-zāŋsi la. La de la Azezi nērba nēŋadōma la mā'a ti mam tɔge bɔ ba. Mam daan ka boori ti tōon-seka ti mam daan tōm, dee ken tōnna wā, wa dena zāŋa. ³ La Atiti n de Greki n doli la mam na, ba pōn ka pērgē yeti ba wā ē. ⁴ Nērba baseba n daan pā'ase ti bāma de la Azezi karēnbiisi, li'ise kē tōma tēŋasuka bɔɔra ti ba bāŋe tōma n lagum na Azezi-krisi dena ayɩla la, tōma n to'oge ti mēŋa se'em, bāma daan boori ti ba base ti tōma le dena la Zifdōma lɔɔ yamsi. ⁵ Tōma daan ka sake ban boori se'em na baa fēfēe, ti kō-yēlga n de sura la wun ken bɔna yāma iŷā.

⁶ Nēr-seba ti ba bɩsɩ wu nēŋadōma la, ba sān dena nēŋadōma bu ba dagi nēŋadōma, la ka pake mam, Nawēnne ka tū'usri nērba. Nēŋadōma bāma ka mōrgē mam ti m ēŋe sela sela pa'ase mam zāsŋɔ la puam. ⁷ Ba tōn yē ti Nawēnne dɩke kō-yēlga la ēŋe la mam nu'usum ti m mōole bɔ bu-zāŋsi, wu ēn dɩke ēŋe Apyeeri nu'usum ti a mōole bɔ Zifdōma la. ⁸ Nawēnne n bɔ Apyeeri pāŋa, tōm ē Zifdōma zē'am na, ēŋa n ken bɔ mam pāŋa ti mam tōnna bu-zāŋsi zē'am. ⁹ La Azaki, la Apyeeri, la Azā ti ba bɩsɩ wu ba wuu kē'endōma la, n bāŋe ti Nawēnne n ēŋe mam yel-sōnne dɩke tōone na ēŋe mam nu'usum na, ba yōge mam, la Abarnabasi nu'usi mē, pa'ale ti ti de la ayɩla lagum tōnna Nawēnne tōoma, ti tōma tōnna bu-zāŋsi zē'am, ti bāma mē tōnna Zifdōma zē'am. ¹⁰ Sela ti ba daan sose tōma de la ti sōŋra ba Wēndeego la nasdōma mā'a. La de la bela ti mam daan itɩ zozo'e.

Apoli pa'ale Apyeeri a tuure

¹¹ Apyeeri n daan wa'am Antɩɔsi la, mam daan tɔge ē mē vēelga vēelga ka sake ē, se'ere n soe la, a daan ēŋe la sela n ka mase. ¹² Ēn daan boe Antɩɔsi la, a daan lagnɩ na bu-zāŋsi la dita mē. La nērba n daan ze'ele Azaki zē'am wa'am, ti a welge ka le dita la bu-zāŋsi la, se'ere n soe la, a daan zotɩ la seba n yeti dēni ti nēr-seba wuu n doli Nawēnne sore wāta la. ¹³ Ti ti sobiisi baseba n de Zifdōma daan po ita wu Apyeeri n itɩ se'em na, halɩ ti Abarnabasi mē po kē ba pulibsum ɩrgɔ la puam. ¹⁴ La mam n daan yē ti ban itɩ se'em na ka mase wu kō-yēlga la sura n de se'em na iŷā, mam daan yele Apyeeri ba wuu nēŋam yeti: «Fōn de Zifu dee daan vɔa wu bu-zāŋsi n vɔa se'em na, fōn wun ēŋe la wāne mōrgra bu-zāŋsi la ti ba vɔa wu Zifdōma?»

¹⁵ La sān dena tōma, tōma dɔge dena la Zifdōma, tōma dagi bu-zāŋsi n ka doli Nawēnne lɔɔ la. ¹⁶ La tōma mi mē ti la dagi nēra n doli lɔɔ la n yeti se'em na iŷā, n wun base ti a mase Nawēnne zē'am, la de la nēra n bɔ Azezi-krisi sura mā'a ti Nawēnne wun base ti a mase a zē'am. Tōma mē bɔ la Azezi-krisi sura, ti Nawēnne base ti ti mase a zē'am, tōma n bɔ Azezi-krisi sura la iŷā, dee dagi tōma n doli lɔɔ la n yele se'em na iŷā. Nēra nēra ka tā wun mase Nawēnne zē'am, ēn doli lɔɔ la n yele se'em na iŷā. ¹⁷ Tōma n te'ege Nawēnne, ti a base ti ti mase a zē'am tōma n bɔ Krisi sura iŷā la, bōn-ēŋa sān base ti tōma mē dena tōon-be'ero dōma wu bu-zāŋsi la, yāma tē'ese ti Krisi botɩ ti tōnna la tōon-be'ero bu? Ayɩ. ¹⁸ Nēra sān base Zifdōma lɔɔ ti a daan doli la, dee le yeti ba dɩla ē, la de la a mēŋa n sā'anɩ lɔɔ la. ¹⁹ La sān dena lɔɔ la, a botɩ mam lebge la kūm a iŷā, mam ka le dɩla ē. Mam lagum na Krisi ki dɔ-puurŋa zuo, ti m vɔa Nawēnne iŷā, ²⁰ ti mam n vɔa wā, la ka le dena mam mēŋa n vɔɩ, la de la Krisi n botɩ mam vɔa. La vɔm seka ti mam vɔa lɛɛɛ wā, de la mam n bɔ ēŋa n de Nawēnne Dayua n nōŋe mam ki mam yelle sura la, n base ti mam vɔa. ²¹ Mam ka sake ti Nawēnne yel-sōnne na de la zāŋa. La sān dena la nēra n doli lɔɔ iŷā n base ti a mase Nawēnne nēŋam, Krisi kūm na de nɩ na zāŋa.

Tɩn bɔ Nawēnne sura la iŷā, ti ti mase a zē'am

3 Yāma Galatɩ dōma, āne n botɩ yāma zuto lebge ti ya ka tara yem? Mam daan pa'ale ya Krisi n ki dɔ-puurŋa zuo la yelle mē sōŋa sōŋa, ti la dena vēelga bɔ ya. ² Mam boori ti m soke ya la sokre ayɩla mā'a ti ya lerge mam: Yāma n to'oge Nawēnne Sia la, la de la yāma n sakɩ ita lɔɔ la n yele se'em na iŷā bu? Ayɩ, la de la yāma n wōm kō-yēlga la, bɔ Azezi-krisi sura la iŷā. ³ Yāma yem na pɔ'ɔge paage la wāna? Yāma n pɔse lebge Nawēnne nērba la a Sia pāŋa la, yāma yāŋa boori ti ya ba'ase la ya mēŋa pāŋa? ⁴ Yāma n yē se'em wuu la lebge la zāŋa bu? Dēni ti la da kān lebge zāŋa. ⁵ Nawēnne n bɔ ya a Sia, dee ita bōn-yālma ya tēŋasuka la, la dagi yāma n itɩ lɔɔ n yele se'em na iŷā, la de la yāma n wōm kō-yēlga la, bɔ Azezi-krisi sura la iŷā.

⁶ Abraham zē'am la mē yuun de la bela: La gulse Nawēnne gōŋɔ puam yeti: «Abraham bɔ la Nawēnne sura, ti Nawēnne bɩse ē yeti a mase ēŋa zē'am.» ⁷ Bāŋe-ya ti nēr-seba n bɔ Nawēnne sura la n sɩɩ de Abraham yɩsi. ⁸ Nawēnne gōŋɔ la pōn yele mē ti Nawēnne wun base ti bu-zāŋsi mase a zē'am, ban bɔ ē sura la iŷā. Nawēnne yuun pōn tɔge kō-yēlga ēŋa bɔ Abraham mē yeti: «Fōn iŷā ti dūnia buuri wuu wun yē yel-sōnne.» ⁹ La de la bela, Abraham n yuun bɔ Nawēnne sura yē yel-sōnne na, nēr-seba n mē bɔ Nawēnne sura wun lagum na Abraham yē yel-sōnne.

¹⁰ Nēr-seba n te'lege lɔɔ la, kā'a-be'ero boe ba zuto, se'ere n soe la, la gulse yeti: «Kā'a-be'ego boe nēr-seka

woo n ka itı wu lan gulse se'em wuu Nawēnne ɔɔ gōŋɔ puam na zuugo.» ¹¹ La de la vēelga tı nēra baa ayıla ka tā wun yē buurɔ Nawēnne zē'am ēn doli ɔɔ la iŷā, se'ere n soe la, la gulse yetı: «Nēra n bɔ Nawēnne sira mase a zē'am wun vɔa, ēn bɔ ē sira la iŷā.» ¹² Nēra n doli ɔɔ la, la dagı tı a bɔ la Nawēnne sira, bēm iŷā, la gulse yetı: «Nēr-seka n itı ɔɔ la n yele se'em na, a wun vɔa bela iŷā.» ¹³ La tōma n ka ēŋe ɔɔ la n yele se'em na wuu iŷā, Nawēnne kǎ'a-be'ego n boe tōma zuto. La Krisi n ki dɔ-puurnɔa zuo la, a dɔke kǎ'a-be'ego la tōma zuto mɛ, tı ēŋa mēŋa sɔɔge tōma zē'am, tı kǎ'a-be'ego la bɔna a zuugo, se'ere n soe la, la gulse yetı: «Kǎ'a-be'ego boe nēr-seka tı ba yulse ē dɔɔɔ zuo la zuugo.» ¹⁴ Krisi ēŋe bela tı yel-sōnne na tı Nawēnne bīŋe nōore tı a bɔ Abraham na, mē wun dena bu-zāŋsı bōɔɔ, bāma n lagım na Azezi-krisi dena ayıla la iŷā, dee tı tōma mē to'oge Nawēnne Sıa la tı a bīŋe nōore tı a bɔ tɔ, tōma n bɔ ē sira la iŷā.

Lɔɔ la ka sǎ'am nōor-bīŋre

¹⁵ M sɔbiisi, mam yetı m dıke la nērsaala yelle make pa'ale ya. Nēra sǎn looge yem dee gulse bīŋe, tı la doose la tēŋa la ɔɔ, nēra nēra ka tā wun sǎ'am ē, bu pa'ase sela mī. ¹⁶ Nawēnne yuun bīŋe nōore bɔ la Abraham, la a yuŋa. La ka gulse yetı, a bīŋe a nōore bɔ la a yuŋsı, wu la de la nēra zozo'e. La yetı, a yuŋa, la de la nēra ayıla mā'a. Nēr-ēŋa de la Krisi. ¹⁷ Mam n yele se'em na vōore n wǎna: La de tı Nawēnne n bīŋe a nōore la, yuuma kɔbsnaası la pitā n tole dee tı a yāŋa bɔ a ɔɔ la. Bela ɔɔ la kǎn yāŋe sǎ'am nōor-bīŋre la tı a lebge zāŋa. ¹⁸ Se'ere n soe la, la sǎn de nı na ɔɔ la dɔlga iŷā tı nēra wun to'oge sela sɔna, la ka le dena nōor-bīŋre iŷā. La, la de la Nawēnne n bīŋe a nōore la iŷā, tı a ēŋe Abraham yel-sōnne.

¹⁹ La sǎn dena bela, bēm iŷā tı Nawēnne yuun bɔ ɔɔ la? A yuun bɔ ē tı a botı nēra n bāŋe ba tōon-be'ero, halı ka paage wakat-seka tı Abraham yuŋa la wun wa wa'am, seka iŷā tı a yuun bīŋe nōore la. Malekadōma n yuun to'oge ɔɔ la Nawēnne zē'am bɔ la, la doose la nēra ayıla n boe Nawēnne, la nēra tēŋasuka wē'era nu'ugo. ²⁰ Nēra ka wē'eri nu'ugo la nēra ayıla mā'a. La Nawēnne de la a ayıla mā'a, dee yuun bīŋe nōore, tı nu'u-wē'era ka bɔna.

²¹ Bela, ɔɔ la sı'ısrı Nawēnne nōor-bīŋre la mɛ bu? Ayel, la dagı bela baa fēfēe. Se'ere n soe la, ɔɔ sǎn boe nı n tā wun botı nēra tara vɔm n ka ba'asrı, bela a ken tā nı wun base tı nēra mase Nawēnne zē'am mɛ, ban sakrı ɔɔ la iŷā. ²² La Nawēnne gōŋɔ la yetı, dūnia dōma wuu boe la tōon-be'ero nu'usum. La de la bela tı seba n bɔ Azezi-krisi sira la wun to'oge sela tı Nawēnne bīŋe nōore tı a bɔ ba, ban bɔ Azezi-krisi sira la iŷā.

²³ Wakat-seka tı Azezi-krisi daan nǎn ka wa'am tı nēra bɔ ē sira la, ɔɔ la lu tōma mɛ wu tōma boe la yu'a

deem na, gu'ura halı tı Nawēnne wun wa puke Azezi-krisi tı tı wun bɔ sira la peelem. ²⁴ Bela ɔɔ la n yuun de tōma gu'ura pa'ala tōma sore halı wa paam wakat-seka tı Krisi wa'am na, tı tōma wun dena nēra n mase Nawēnne nēŋam, tōma n bɔ ē sira la iŷā. ²⁵ La leelee wǎ tı Azezi-krisi wa'am tı tı bɔ ē sira la, ɔɔ la ka le dena tōma gu'ura.

²⁶ Yāma n bɔ Azezi-krisi sira la, ya wuu de la Nawēnne kɔma. ²⁷ Yāma wuu tı ba mise ya ko'om puam na, ya lagım na Krisi dena ayıla, āna wu ēŋa n ān se'em na. ²⁸ Yāma n lagım na Krisi la, bɔkre ka le bɔna tı fu de la Zifu, bu bu-zāŋka, yamŋa bu nēra n soe a mēŋa, pɔka bu buraaga, ya wuu de la ayıla. ²⁹ Yāma n lagım na Krisi la, ya de la Abraham yuŋsı, wun to'oge sela tı Nawēnne bīŋe nōore tı a bɔ la.

4 Mam n yetı m yele se'em n wǎna: Bia n yetı a wa sɔɔge sɔna a sɔ bōɔɔ dee ken dena bōn-pıka, a ān wu a de la yamŋa la, baa la ēŋa n wun wa sɔna sela woo la. ² Ēn nǎn de bia la, a boe la nēra nu'usum tı ba gu'ura ē, dee bısrı a sela woo yelle bɔ'ɔra ē halı ka paage wakat-seka tı a sɔ looge la, tı a yāŋa sɔna sela woo. ³ Tōma n mē daan ka bāŋe Nawēnne sira, āna wu kɔma la, tōma daan de la dūnia wǎ yela yamsı. ⁴ La wakat-seka tı Nawēnne looge la n paage la, a tōm na a mēŋa Dayua, tı pɔka dɔge ē, tı a dɔla Zıfɔdōma ɔɔ la, ⁵ tı a fāage seba n doli ɔɔ la, tı tı wun lebge Nawēnne kɔma.

⁶ La yāma n de Nawēnne kɔma la, a tōm na a Dayua Sıa tı a bɔna tı sūure puam, tı Sıa la wi'ira Nawēnne yetı: «Abba, m Sɔ.» ⁷ Bela tı ka le dena yamsı, tı de la Nawēnne kɔma. Tōma n de a kɔma la iŷā, a wun bɔ tɔ sela wuu tı a bīŋe tı a bɔ a kɔma la.

Apoli yem yɔɔrı Galatı dōma yelle

⁸ Kurum, yan daan ka mi Nawēnne na, ya daan doli la dūnia wǎ bōn-yooro n dagı Nawēnne poore, dena ba yamsı. ⁹ La nǎnanne wǎ tı ya mi Nawēnne na, la, lan gǎnnı, Nawēnne n mi ya la, la ēŋe la wǎne tı yāma le dɔla bōn-yooro n ka tarı pāŋa dee ka tara vōore poore, le bɔɔra tı ya dena ba yamsı? ¹⁰ Yāma looge la dabsa, la wōrsı, la wakate baseba yuune puam, la yuuma dɔla tı la dena sisgo. ¹¹ Yāma n itı se'em na botı dabeem n tara mam, tı mam n tōm se'em yāma iŷā la, tā wun dena zāŋa.

¹² M sɔbiisi, mam belı ya mɛ tı ya āna wu mam na, tı mam lebge āna wu yāma la. Yāma daan ka ēŋe mam tuuge. ¹³ Ya mi tı la daan de la mam bǎ'aga la iŷā tı mam yē folle mōole kō-yēlga la bɔ ya pɔspɔsı. ¹⁴ Mam bǎ'aga la daan de la nǎmsgɔ bɔ ya, la yāma daan ka nē'ese mam, la ya mē daan ka zagse mam, ya daan to'oge mam wu mam de la Nawēnne maleka, bu Azezi-krisi la. ¹⁵ Yāma sūure daan ān yēlum mɛ, tı mam tāna wun yetı, yāma daan sǎn tā nı, ya wun dıke ya nini bɔ

²² La Nawēnne Sia tōoma de la nōŋlum, la sū-yēlga, la sū-mā'asum, la sū-mā'are, la sōŋa, la ır-sōŋo, la ēŋe sira, ²³ la sū-bugsum, la yōk-m-mēŋa. Loo ka boe n si'lsrı bōn-bāma. ²⁴ Nēr-seba n de Azezi-krisi nērba la ka ba mēŋa n boori se'em n de be'em, la ba yemleego la me dɔ-puurŋa zuo, ti ba ka le sɔna ba. ²⁵ Nawēnne Sia n bɔ'ɔrı ti vɔm na, base-ya ti ti dɔla ēŋa n boori se'em na. ²⁶ Ti da dena-ya uk-m-mēŋa dōma, ti da ɛera-ya taaba nōore, bu ita sūure la taaba.

Ita-ya taaba sōŋa

6 M sɔbiisi, ya sãn yē nēra ti a tōnni tōon-be'ero, yāma seba ti Nawēnne Sia boe la ya le la, pa'ale-ya ē la sū-bugsum tarı ē leme so-sōŋo la zuo. La guuse fu mēŋa, ti fu mē da po tōm a tōon-be'ero la. ² Sōŋra-ya taaba malgra taaba yela, ti bela ti ya wun ēŋe Krisi nōore n yele se'em na. ³ Nēra sãn tē'ese ti ēŋa de la sela dee ka dena sela sela, a pā'asrı la a mēŋa. ⁴ Nēra woo geele bise a mēŋa tōoma n ãn se'em, a sãn yē a tōoma la puam sela n de a ēŋe sū-yēlga, ti a ēŋe a mēŋa iŷā. La a da magra a mēŋa la nērba baseba. ⁵ Nēra woo n wun tara a mēŋa zuugo yelle.

⁶ Nēr-seka ti nēra zāsni ē Krisi yetɔga la, a base ti se-ka n zāsni ē na yēta pure ēn tarı sela woo la puam.

⁷ Da pā'ase-ya ya mēŋa, ba ka pɔ'ɔrı Nawēnne. Nēra n bure bōn-seba la, bōn-bāma ti a wun lagse. ⁸ Nēr-se-ka n iti sela ti a mēŋa yemleego boori, a wun yē a yemleego yōoro n de kūm. La seka n iti sela ti Nawēnne Sia boori la, a wun yē Nawēnne Sia n bɔ'ɔrı sela n

de vɔm n ka ba'asrı. ⁹ Bela, ti da targe-ya la tōon-sōma tōoma. Ti sãn ita dee ka base, wakate la sãn wa paage, ti wun yē a yōoro. ¹⁰ Bela, tin yē folle seka woo, ti tōm ēŋe nērba wuu sōŋa, lan gãnni wuu, ti ita seba n lagum na tōma bɔ Krisi sira la sōŋa.

Ba'asgo yetɔga

¹¹ Bise-ya gulsgo bie kār-bāna wā de la mam Apoli n gulse la m mēŋa nu'ugo. ¹² Seba n mōrgri ya bɔɔra ti ya wā la, de la nērba n boori yu'ure nērsaalba zē'am. Ban ka boori ti ba yē nāmsgo Krisi kūm dɔ-puurŋa la iŷā mā'a yelle ti ba ita bela. ¹³ Bāma seba n wātı la mēŋa ka iti bɔ la n yele se'em na, ba boori la ya wā ti ba tā'age wē yō'ogo, bāma n botı ya wā la. ¹⁴ La sãn dena mam, mam ka wē'eri m yō'ogo la sela yelle, sãn dagna ti Zuudāana Azezi-krisi n ki dɔ-puurŋa zuo la mā'a yelle. Krisi kūm na iŷā dūnia yela wuu ãn wu ba ki me ka le sɔna mam, ti mam mē ãna wu mam ki me, ka le bɔna dūnia yela puam. ¹⁵ La dagı nēra n wā, bu nēra n ka wā n tarı yōoro, sela n tarı yōoro de la ti tarı la vɔm paalga. ¹⁶ Seba wuu n doli nōor-ēna wā, Nawēnne wun bɔ ba sū-mā'asum, dee zoe ba ninbāalga, bāma la Nawēnne nērba la wuu.

¹⁷ Nēra nēra da le base ti toogo paage mam, se'ere n soe la, yisa seba ti mam tarı m iŷā la pa'alı me ti mam de la Azezi nēra.

¹⁸ M sɔbiisi, ti Zuudāana Azezi-krisi yel-sōnnne wun bɔ-na la ya. Amina.

Efɛɛzɪ

Bilgre

Efɛɛzɪ de la Azi-mineɛrɪ so'olum tɛŋa. Apolɪ sore sɛnnɛ butã dãana tɪ a zĩ'ire mĩ yuuma atã mōole, dee zãsum Azezi kō-yɛlga (Tōoma 19:1—20:1). Wakat-sɛka tɪ a gulɛ gōŋɔ wã la, a boe la yu'a deem.

Zãŋɔ seba n boe gōŋɔ wã puam na dagɪ Efɛɛzɪ dōma mã'a ãyã, la de la nɛrba wuu ãyã.

A gulɛ tɔge yetɪ, lan dɛŋɛ Nawɛnnɛ n wun nãam dũnia, a pōn looge yem mɛ tɪ a botɪ Azezi-krisi dɛna bōn-seba wuu n boe saazuum, la tɛŋa Zuudãana (Efɛɛzɪ 1:10).

Apolɪ pɔsɛ pa'alɛ la Nawɛnnɛ n looge a nɛrba, base ba tōon-be'ero taalɛ, botɪ ba lebgɛ a kɔma Azezi kũm na ãyã. Tɪ nɛr-seba wuu n bɔ Azezi sɪra la lebgɛ buuri ayɪla, Zifdōma, la bu-zãŋsɪ wuu (sapɪtrɪ 1-3).

A sose nɛr-seba wuu n wun karɛŋɛ gōŋɔ la mɛ yetɪ ba vɔa tɪ la mase wu vɔm paalga tɪ Nawɛnnɛ bɔ ba la, dee lagum taaba tara nō-yɛnnɛ, vɔa la taaba Azezi doosgo la puam (sapɪtrɪ 4-6).

A dɪkɛ la bōnɔ batã makɛ pa'alɛ Azezi nɛrba n lebgɛ ayɪla se'em.

A makɛ pa'alɛ tɪ Azezi nɛrba la ãn wu nɛra ãyã, tɪ Azezi ãna wu zuugo la (1:22-23, 4:16).

Buyi, a makɛ pa'alɛ tɪ Azezi nɛrba la ãn wu deego, tɪ Azezi ãna wu kugre n botɪ deego la zɛ kãŋkãŋɛ (2:20-22).

Butã, a makɛ pa'alɛ tɪ Azezi nɛrba la ãn wu pɔka, tɪ Azezi ãna wu sɪra (5:21-33).

1 Mam Apolɪ n de Azezi-krisi Tōntōnna wu Nawɛnnɛ n boorɪ se'em na, n gulɛ gōn-ɛna wã bɔ'ɔra yãma Nawɛnnɛ nɛrba n boe Efɛɛzɪ dɛna sɪra dōma Azezi-krisi doosgo puam na. ² Tɪ Sɔ Nawɛnnɛ, la tɪ Zuudãana Azezi-krisi wun ɛŋɛ ya yel-sōnnɛ, dee bɔ ya sũ-mã'asum.

Nawɛnnɛ n ɛŋɛ tōma yel-sōnnɛ se'em Krisi ãyã

³ Tɪ pɛgɛ Nawɛnnɛ n de tɪ Zuudãana Azezi-krisi Sɔ la, ɛŋa n bɔ tɔ a Sɪa yel-sōnnɛ wuu n ze'ele saazuum, tōma n lagum na Krisi dɛna ayɪla la ãyã. ⁴ Nawɛnnɛ looge tōma la ɛŋa ãyã, lan dɛŋɛ dũnia nãaŋɔ, tɪ tɪ welge to'ore dɛna a nɛrba, ka tara yelle a nɛŋam. ⁵ A nōŋlum na ãyã tɪ a dɛŋɛ looge tōma tɪ tɪ lebgɛ a kɔma Azezi-krisi ãyã, wu a mɛŋa yem n boorɪ se'em na. ⁶ A ɛŋɛ belɪ tɪ tɪ pɛgɛ ɛ mɛ, a yel-sōnnɛ n zo'oge gãŋɛ tɪ a ɛŋɛ bɔ tɔ zãŋa, tōma n de ayɪla la a Dayɔ-nōŋrɛ la ãyã. ⁷ La de la Krisi n ki tɪ a zum yese la ãyã tɪ Nawɛnnɛ base tōma tōon-be'ero taalɛ, tɪ tōma yɛ fãarɛ, tɪ la mase wu Nawɛnnɛ yel-sōnnɛ n zo'oge pãɪ se'em na. ⁸ Yel-sōnnɛ ɛŋa n zo'oge la bɔ tōma la yem wuu, la bãŋrɛ wuu.

⁹ Nawɛnnɛ base tɪ tōma bãŋɛ ɛn boorɪ tɪ a ɛŋɛ se'em n daan sugɛ tɪ a looge yem tɪ a ɛŋɛ Krisi ãyã la mɛ.

¹⁰ Wakatɛ la sãn wa paage, Nawɛnnɛ wun ɛŋɛ ɛŋa n looge yem tɪ a ɛŋɛ se'em na mɛ, a wun lagɛɛ sɛla wuu n boe saazuum, la dũnia zuo, tɪ ba sake Zuudãana ayɪla n de Krisi.

¹¹ Nawɛnnɛ n base tɪ sɛla woo ita wu ɛn boorɪ se'em na, n dɛŋɛ looge tōma tɪ tɪ dɛna a nɛrba Krisi ãyã. ¹² Tɪ

tōma n dɛŋɛ tara putɛ'ere la Krisi la, wun base tɪ nɛrba pɛgɛ ɛ a na'am pãŋa la ãyã.

¹³ Yãma n mɛ wōm sɪra kō-yɛlga la, n base tɪ ya bɔ Krisi sɪra yɛ fãarɛ, ɛŋa ãyã tɪ Nawɛnnɛ bɔ ya a Sɪa wu ɛn bĩŋɛ nōore se'em na, Sɪa ɛŋa de la dãalgɔ pa'alɛ tɪ ya de la a nɛrba. ¹⁴ A Sɪa la n de sɛla n pa'alɛ tɪ tɪ wun yɛ sɛla woo tɪ a bĩŋɛ nōore tɪ a bɔ tɔ la, halɪ ka paage wakat-sɛka tɪ a wun fãage tōma wuu n de a nɛrba la ba'ase la, bōn-ɛŋa n wun base tɪ tɪ pɛgɛ ɛ, a na'am pãŋa la ãyã.

Apolɪ pu'usɪ Nawɛnnɛ Efɛɛzɪ dōma ãyã

¹⁵ Belɪ n soe tɪ mam n wōm yãma n bɔ tɪ Zuudãana Azezi sɪra, la yãma n tarɪ nōŋlum la Nawɛnnɛ nɛrba wuu se'em na, ¹⁶ tɪ mam tɛra ya yelle m pu'usgo puam, pu'usra Nawɛnnɛ a yel-sōnnɛ ya ãyã ka gɔ'ɔra. ¹⁷ Mam sosɪ la tɪ Zuudãana Azezi-krisi Sɔ n de Nawɛnnɛ n tarɪ na'am pãŋa la, tɪ a bɔ ya a yem Sɪa tɪ a vɛlgɛ ya yem, tɪ ya bãŋɛ ɛn ãn se'em. ¹⁸ Mam ken sɔsra Nawɛnnɛ tɪ a botɪ ya putɛ'era like tɪ ya bãŋɛ ɛn wi ya tɪ ya tara putɛ'ere gu'ura sɛla, dee bãŋɛ bōn-sōma seba tɪ a bĩŋɛ nōore tɪ a bɔ a nɛrba la n ba ãna sōŋa, dee zo'oge se'em. ¹⁹ Mam ken sɔsra ɛ tɪ a botɪ ya bãŋɛ a pãŋa la n ãn kãtɛ gãŋɛ se'em tɪ a tarɪ tōnna la tōma n bɔ ɛ sɪra la lɛ, wu a na'am pãn-kãtɛ n tōnnɪ tōon-kãra se'em na.

²⁰ Pãn-kãtɛ ɛŋa n belɪ tɪ a dɪkɛ vo'oge Krisi botɪ a zĩ'ire a zuugo bɔba saazuum Nawɛnnɛ yire. ²¹ A botɪ Krisi n gãnna na'adōma wuu, la pãnsɪ dōma wuu, la ke'endōma wuu, la ke'ɛŋo buuri wuu, ɛŋa yu'urɛ n gãnnɪ

yu'ura wuu, la dagɪ dũnia ɛna puam mǎ'a, la ken dena la dũnia seka n wun wa'am na puam. ²² Nawɛnnɛ base mɛ tɪ Krisi sɔna sela woo, dee botɪ a dena a nɛrba wuu Zuudǎana sela woo puam. ²³ Krisi nɛrba la ǎn wu a mɛɲa ɪyǎ la, ɛɲa n vɔa ba puam, la ɛɲa n boe zɛ'a woo, botɪ sela woo bɔna.

Nawɛnnɛ yel-sɔnnɛ ɪyǎ tɪ tɪ yɛ fǎare

2 Ya daan ǎn wu ya ki mɛ Nawɛnnɛ zɛ'am, ya tɔon-be'ero, la ya tuure la ɪyǎ. ² Yǎma n daan ɪtɪ se'em na ǎn wu dũnia nɛrba n ka mi Nawɛnnɛ n ɪtɪ se'em na, dɔla Asũtǎana n de pǎnsɪ dɔma n boe saazuum naba la, ɛɲa n tɔnnɪ na seba n sɪ'lsrɪ Nawɛnnɛ nɔore la. ³ Tɔma wuu daan lagum ǎna wu bǎma n ǎn se'em na, tɔma daan vɔa wu nɛrsaala yemleego n boorɪ se'em, ɪta tɪ ɪyǎ, la tɪ yem n boorɪ se'em n de be'em na. La tɔma n daan ǎn se'em na base tɪ tɪ daan mase la Nawɛnnɛ sɪbgrɛ wu nɛrba baseba la.

⁴ La Nawɛnnɛ nɔɲɛ tɔma zo'oge mɛ, tɪ a zoe tɔma ninbǎalga zozo'e. ⁵ Tɪ baa tɔma n daan ǎn wu tɪ ki mɛ tɪ tɔon-be'ero ɪyǎ la, a base tɪ tɪ lagum na Krisi yɛ vɔm. La de la Nawɛnnɛ yel-sɔnnɛ ɪyǎ tɪ a fǎage ya. ⁶ La de la tɔma n lagum na Azezi-krisi dena ayɪla la ɪyǎ, tɪ Nawɛnnɛ lagum tɔma la Krisi vo'oge, base tɪ tɪ lagum na ɛɲa zɪ'ire Nawɛnnɛ yire. ⁷ A ɛɲɛ tɔma sɔɲa Krisi ɪyǎ, tɪ a pa'alɛ la nɛrba wakate n sɛm a yel-sɔnnɛ n zo'oge gǎɲɛ se'em. ⁸ La de la Nawɛnnɛ yel-sɔnnɛ la ɪyǎ tɪ ya yɛ fǎare, yan bɔ Krisi sɪra la ɪyǎ, la dagɪ ya mɛɲa pǎɲa, la de la Nawɛnnɛ bɔ'a. ⁹ La dagɪ ya tɔoma ɪyǎ, tɪ ya nɛrseka da pɛɲɛ a mɛɲa. ¹⁰ La de la Nawɛnnɛ n nǎam tɔ, botɪ tɪ lagum na Azezi-krisi dena ayɪla, tɔnna tɔon-sɔma tɪ a pɔn dɛɲɛ mǎasum tɪ tɪ wa tɔm na.

Krisi ɪyǎ tɪ lebge la buuri ayɪla

¹¹ Tɛɛɛɛ-ya yan daan ǎn se'em na, ba ka dɔɛɛ ya tɪ ya dena Zɪfdɔma buuri, Zɪfdɔma n wǎtɪ la wi'iri ya tɪ a ka wǎtɪ dɔma. Ba yetɪ bǎma de la Nawɛnnɛ nɛrba, bǎma n wǎtɪ la ɪyǎ, la bɔn-ɛɲa de la sela tɪ nɛrba ɪtɪ ba ɪyǎ puam mǎ'a. ¹² Tɛɛɛɛ-ya tɪ wakat-seka tɪ ya ka boe la Krisi la, ya daan de la sǎama la lsrayelɪ dɔma, ka tara nɔore la bɔn-seba tɪ Nawɛnnɛ yuun bɪɲɛ nɔore la lsrayelɪ dɔma la. Ya daan vɔa la dũnia wǎ zuo ka mina Nawɛnnɛ, dee ka tara putɛ'ere gu'ura sela. ¹³ Ya daan zǎage la Nawɛnnɛ mɛ, la lɛɛɛ wǎ, yǎma n lagum na Azezi-krisi dena ayɪla la, a zum na n yese la base tɪ ya yǎɲa lɛm ɛ mɛ. ¹⁴ La de la Krisi n botɪ tɪ tara sũ-mǎ'asum, ɛɲa n base tɪ Zɪfdɔma, la seba n dagɪ Zɪfdɔma lebge buuri ayɪla. ɛɲa n ki yese be'em n ǎn wu lalga ¹⁵ bɔna tɪ tɛɲasuka welge to tɪ tɪ sɪsra taaba la, dee base tɪ Amoyisi lɔɔ, la yel-seba tɪ a yetɪ ba ɪta la ka le tɔnna, botɪ Zɪfdɔma, la seba n dagɪ Zɪfdɔma naage taaba lagum na ɛɲa lebge buur-paalga ayɪla tara sũ-mǎ'asum la taaba. ¹⁶ Krisi n ki kũm dɔ-puurnɲa zuo la, a

lagum ba tɪ ba lebge la buuri ayɪla naage ba la Nawɛnnɛ botɪ ba ka le sɪsra taaba. ¹⁷ Krisi wa'am wa mɔolɛ la sũ-mǎ'asum kɔ-yɛlga bɔ yǎma seba n daan zǎage, la tɔma seba n lɛm na. ¹⁸ Krisi ɪyǎ tɪ tɔma wuu tara sore wun lɛm tɪ Sɔ Nawɛnnɛ zɛ'am, Nawɛnnɛ Sɪa ayɪla n boe la tɪ wuu lɛ la ɪyǎ.

¹⁹ Bela, ya ka le dena sǎama, bu nɛrba n ze'ele zɛ'a ayɛma, ya de la buuri ayɪla la Nawɛnnɛ nɛrba, ya de la a yire nɛrba. ²⁰ Yǎma po bɔna la Nawɛnnɛ nɛr-kuurɔ la n ǎn wu deego la mɛɛɲa puam. Azezi Tɔntɔnɪba, la Nawɛnnɛ nɔtɔ'ɔsrɪba n de deego la ɛbrɛ. Tɪ Azezi-krisi mɛɲa dena kugre n botɪ deego la tara pǎɲa. ²¹ ɛɲa n base tɪ deego la wuu zɛ kǎɲkǎɲɛ lebgra Wɛnde-kǎte ǎna sɔɲa bɔ Zuudǎana. ²² Yǎma n lagum na ɛ dena ayɪla la, ya mɛ po bɔna la Nawɛnnɛ deego la tɪ a boe mɪ mɛta la mɛɛɲa puam, tɪ Nawɛnnɛ mɛɲa Sɪa kɛ'era mɪ.

Apolɪ tɔm bɔ seba n dagɪ Zɪfdɔma

3 Bela tɪ mam Apolɪ pu'usra Nawɛnnɛ. Mam boe la yu'a deem Azezi-krisi yelle, mam n mɔolɛ a kɔ-yɛlga bɔ yǎma bu-zǎɲsɪ la ɪyǎ. ² Mam tɛ'ese tɪ ya wɔm tɪ Nawɛnnɛ dɪke a yel-sɔnnɛ kɔ-yɛlga la ɛɲɛ la mam nu'usum tɪ m tɔɛ bɔ yǎma. ³ Nawɛnnɛ puke a yelle n sugɛ la pa'alɛ mam mɛ, wu mam gulɛ se'em fɛɛ bɔ ya la. ⁴ Ya sǎn karɛɲɛ mam n gulɛ se'em na, ya wun yɛ mam n bǎɲɛ Krisi yelle n daan sugɛ la vɔore n ǎn se'em. ⁵ Nawɛnnɛ yuun ka puke ɛ pa'alɛ kurum dɔma, la lɛɛɛ wǎ a botɪ a Sɪa la puke ɛ pa'alɛ la seba tɪ a tɔm, la a nɔtɔ'ɔsrɪba. ⁶ Yel-ɛɲa n sugɛ la de la kɔ-yɛlga mɔolɔɔ n botɪ bu-zǎɲsɪ wuu lagum na Zɪfdɔma tara purɛ, lagum taaba dena ayɪla, dee lagum tɔ'ɔra sela tɪ Nawɛnnɛ bɪɲɛ nɔore Azezi-krisi ɪyǎ.

⁷ La de la Nawɛnnɛ yel-sɔnnɛ bɔ'a tɪ a botɪ mam dena a tɔntɔnna mɔola a kɔ-yɛlga la, la a pǎɲa. ⁸ Mam n de nɛra n pɔ'ɔɛ Nawɛnnɛ nɛrba la wuu puam, la bela wuu Nawɛnnɛ ɛɲɛ la mam yel-sɔn-ɛɲa tɪ m mɔolɛ Krisi kɔ-yɛlga la bɔ bu-zǎɲsɪ tɪ ba bǎɲɛ bɔn-sɔma n zo'oge gǎɲɛ tɪ nɛrba ka tǎna wun bǎɲɛ ba'ase la, ⁹ dee botɪ nɛrba bǎɲɛ Nawɛnnɛ n yetɪ a ɛɲɛ se'em n daan sugɛ la. ɛɲa n nǎam sela woo la, sugɛ bɔn-ɛɲa mɛ halɪ yuuma yuuma wa paam zɪna. ¹⁰ La lɛɛɛ wǎ, Azezi nɛrba la wun base tɪ ke'endɔma, la pǎnsɪ dɔma n boe saazuum bǎɲɛ Nawɛnnɛ yem n de to'oto'ore se'em wuu. ¹¹ La doose la Zuudǎana Azezi-krisi tɪ Nawɛnnɛ ɛɲɛ bela mase wu ɛn looge a yem se'em halɪ lan dɛɲɛ dũnia pɪ'iluɲo la. ¹² Tɔma n bɔ Krisi sɪra lagum na ɛ dena ayɪla la, sore boe mɛ tɪ tɔma tǎna wun paage Nawɛnnɛ zɛ'am tɪ dabeem ka tara tɔma. ¹³ Bela tɪ mam sɔsra ya tɪ ya da base tɪ ya buraane bo'oge mam nǎmsrɪ ya yelle la ɪyǎ, mam nǎmsgɔ la de la yǎma zu-zɛkrɛ.

Krisi nõɲlum

¹⁴ La de la bela ïyã tɪ mam ka dũma tẽɲa tɪ Sɔ Nawẽnne nẽɲam, ¹⁵ ẽɲa n botɪ sela wuu n boe saazuum la tẽɲa zuo vɔa wun dɛna sɔdõma la ba yir-dõma wu Nawẽnne n de Sɔ se'em na. ¹⁶ Mam sosɪ ẽ tɪ a Sɪa bɔ ya pãɲa ya sũure puam zozo'e wu a na'am pãn-kãte la n zo'oge se'em na, ¹⁷ tɪ Krisi wun bɔna ya sũure puam, yan bɔ sɪra la ïyã, tɪ ya wun ze'ele kãɲkãɲe tara nõɲlum zozo'e. ¹⁸ Tɪ yãma wun naage la Nawẽnne nẽrba wuu tã'age bãɲe Krisi nõɲlum n zo'oge se'em, ẽn yalɛ, la ẽn wɔɛ, la ẽn ɛn ko'ogo se'em, ¹⁹ la ya bãɲe a nõɲlum na n gãɲe tɪ nẽrba ka tãna wun bãɲe ba'ase la. Tɪ bõn-seba wuu n ze'eti Nawẽnne zẽ'am wun pɪɛ ya.

²⁰ Nawẽnne n tã ita sela woo zo'oge gãnna tõma n sosɪ se'em, bu tõma n tẽ'sɪ se'em, ẽɲa pãɲa n tõnnɪ la tõma lɛ la, ²¹ ẽɲa n mase tɪ a yẽta nã'asɔ Krisi nẽrba la zẽ'am Azezi-krisi ïyã zamãana woo zamãana wakate n ka ba'asɪ. Amina.

Krisi nẽrba la ɛn wu ïyã la

4 Mam n boe yu'a deem Zuudãana doosgo yelle la, mam sosɪ ya tɪ ya dɔla sorɔɔɔ la sõɲa, wu lan mase Nawẽnne n wi ya tɪ ya ɛna se'em na. ² La mase mɛ tɪ ya sikra ya mẽɲa sela woo puam, tara sũ-bugsum, la sũ-mã'are, la ya tara nõɲlum da isgra sũure la taaba. ³ Mõrɛ-ya tara nõ-yẽnne n ze'eti Nawẽnne Sɪa zẽ'am, naage-ya taaba tɪ sũ-mã'asum bɔna ya tẽɲasuka. ⁴ Azezi nẽrba de la ïyã aylɪ, tɪ Nawẽnne Sɪa aylɪ mã'a bɔna, la Nawẽnne n wi ya tɪ ya tara putẽ'ere gu'ura bõn-seba la de la bõn-yẽnne. ⁵ La Zuudãana aylɪ n boe, la tõma n bɔ sɪra se'em na de la aylɪ, la ko'om misga de la aylɪ, ⁶ la Nawẽnne aylɪ n de tɪ wuu Sɔ n soe sela woo, tɪ a pãɲa tara sela woo tõnna, dee bɔna sela woo puam.

⁷ La tõma nẽra woo to'oge yel-sõnnɛ bɔ'a mase wu Krisi n bɔ tɪ se'em. ⁸ Bela tɪ la gulɛ Nawẽnne gõɲɔ puam yetɪ: «Ẽn daan zom saazuum na, a daan yãɲe a be'eba mɛ yõɛ ba, dee bɔ nẽrba bɔ'a.» ⁹ Lan gulɛ yetɪ: «A zom saazuum na», a võore de la bẽm? La võore de tɪ a daan dẽɲe sige mɛ halɪ ka paage tẽɲa wã puam puam. ¹⁰ Seka n daan sige la, la de la ẽɲa n ken zom saazuum-zuum tɪ a sɔna sela woo. ¹¹ La de la ẽɲa n bɔ tɪ bɔ'a, botɪ seba dɛna a Tõntõnɪba, tɪ baseba dɛna a nõtɔ'wsɪba, tɪ baseba mõla a kõ-yẽlga la bɔ'ɔra nẽrba, tɪ baseba sɔna Nawẽnne nẽrba bɪsɪra, bu dɛna karẽn-sãandõma. ¹² A ẽɲe bela tɪ ba mãasum na Nawẽnne nẽrba tɪ ba tõnna Nawẽnne tõoma, tɪ Krisi nẽrba n de a ïyã la bita dee pa'asɪra, ¹³ halɪ tɪ tɪ wun wa lagum taaba bɔ sɪra dɛna aylɪ, bãɲe Nawẽnne Dayua la, lebege nẽrba n bɪ ba'ase paage wu Krisi n mase sela woo puam se'em na. ¹⁴ Bela tɪ kãn le ɛna wu kɔma tɪ nẽrba zãsnɪ zãsnɔ buuri to'oto'ore pã'asɪra ba, ita yem tɪ ba

botɪ ba tuuge, wu kusebgo, la ko-mĩ'isi n wẽ'erɪ õorɲɔ tɪ a yɛɲa se'em na. ¹⁵ La de la tun tɔɲɪ sɪra, la nõɲlum na ïyã, tɪ tɪ bita sela woo puam wu ka paage Krisi n de Zuudãana la. ¹⁶ La de la ẽɲa n de zuugo la n botɪ a nẽrba n ɛn wu ïyã la lagum taaba tõnna, wu kõb-suglɪ n botɪ ïyã zẽ'esɪ to'oto'ore tɔɲe taaba, tɪ zẽ'a woo tõnna wu lan mase se'em, tɪ ïyã la wuu bita sõɲa sõɲa la nõɲlum.

Vɔm paalga Krisi ïyã

¹⁷ Bela tɪ mam yeta ya la ninmõ'ore la Zuudãana nõore, tɪ ya da le ita wu seba n ka dolɪ Nawẽnne n ɪtɪ se'em na, bãma n ɪtɪ se'em na, ɛn wu ban tẽ'esɪ se'em n ka tarɪ võore la. ¹⁸ Ba yem na boe la lika puam, la ba ka vɔa wu Nawẽnne n boorɪ se'em, ban ke'em ba sũure ka bɔɔra tɪ ba bãɲe la ïyã. ¹⁹ Ba zuugo ka zɛɛɪ la tõon-be'ero ɪrɔɔ, ba tõnnɪ la yalsɪ, la be'em buuri wuu, ba boorɪ la tõon-dẽɲɔ mã'a.

²⁰ La sãn dɛna yãma, ba ka zãsum ya Krisi yelle bela. ²¹ Yãma n wõm Azezi-krisi yelle, dee tɪ ba zãsum yãma n de a nẽrba sɪra n ze'ele a zẽ'am na, ²² dɛnɪ tɪ ya base yãma n daan vɔa se'em kurum na. Base-ya vɔm kɛka, la a yemleego la n boorɪ sela n de be'em n wun pã'ase ya botɪ ya sã'am na. ²³ Base-ya tɪ Nawẽnne Sɪa teege ya putẽ'era tɪ ya lebege paalsɪ. ²⁴ Vɔa-ya vɔm paalga wu Nawẽnne n nãam ya tɪ ya ɛna wu a mẽɲa n ɛn se'em na. Vɔm ẽɲa de la sela n mase, la pupeelem n ze'ele sɪra puam.

²⁵ Bela ïyã, base-ya põmpɔɲɲɔ, tɪ ya nẽra woo tɔɲra sɪra bɔ'ɔra a tadãana, tɪ tɪ wuu lagum dɛna la ïyã aylɪ la taaba. ²⁶ Ya sũure sãn isge, da tõm-ya tõon-be'ero, la ya da base tɪ wẽnnɛ lui dee tɪ ya sũure la ka sige. ²⁷ Da bɔ-ya Asũtãana folle. ²⁸ Nẽr-seka n daan zũuri, a da le zũura, a mõrɛ a mẽɲa tõnna sela n mase, tɪ a wun tara sela sõɲe seba n boorɪ sõɲɛ. ²⁹ Da base-ya tɪ yetɔɔ-be'ero yese ya nõorum, tɔɲra-ya yetɔɔ-sõma n bɔ'ɔrɪ nẽrba buraane, tɪ la sõɲra nẽr-seba n selsɪ la, dee ita ba sõɲa. ³⁰ Da ẽɲe-ya sela sã'am Nawẽnne Sɪa sũure, tɪ la de la ẽɲa tɪ Nawẽnne dɪkɛ bɔ ya tɪ la dɛna dãalɔ pa'ale tɪ daare n sɛm tɪ ẽɲa wun fãage ya fasi fasi. ³¹ Base-ya sũ-toogo, la sũ-yĩire, la sũ-isgre, la nõke'ene, la taaba tuure, la putuulɔ wuu. ³² Ita-ya taaba sõɲa, la ya tara taaba zĩile, basra-ya taaba tõon-be'ero taale, wu Nawẽnne n base ya tõon-be'ero taale Krisi ïyã la.

Nawẽnne kɔma yel-ɪɛ

5 Yãma n de Nawẽnne kɔma tɪ a nõɲe la, ɛna-ya wu ẽɲa n ɛn se'em na. ² Ita-ya sela woo la nõɲlum wu Krisi n nõɲe tɪ se'em dɪkɛ a vɔm bɔ tõma ïyã, tɪ la ɛna wu kãabɔɔ n tarɪ yũuɲ-sõɲɔ paara Nawẽnne yem na.

³ Yãma n de Nawẽnne nẽrba la, la ka mase tɪ yalsɪ, la tõon-dẽɲɔ buuri wuu, la bõnɔ zozo'e yemleego yelle

pure ya tɛ̃nasuka. ⁴ La ken ka mase ti ya tɔgra yetɔg-yooro, la yetɔg-be'ero, la yetɔg-gālɪ, la de la ya pu'usra Nawɛ̃nne a yel-sɔ̃nne. ⁵ Bã̃ɛ-ya sɔ̃ɲa, ti nɛ̃ra n iti yalsi, bu tɔon-dɛ̃grɔ dāana, bu nɛ̃r-seka n nɔ̃ɲe bɔ̃ɔ zozo'e kã̃n yɛ̃ sela sela Krisi, la Nawɛ̃nne so'olum na puam. La seka n nɔ̃ɲe bɔ̃ɔ zozo'e ɛ̃n wu nɛ̃ra n kãabɪ бага dee base Nawɛ̃nne pu'usɔ̃ la.

⁶ Da base-ya ti nɛ̃ra pã'ase ya la yetɔg-yooro, ti la de la bɔ̃n-bãma n isgri Nawɛ̃nne sũure ti a subgra seba n zagse a nɔ̃ore la. ⁷ Da lagum-ya la nɛ̃r-bãma. ⁸ Kurum, ya daan boe la lika puam, la lɛɛɛ wã, yan lagum na Krisi dena ayɪla la ã̃yã, ya boe la peelem puam. Bela, ita-ya wu nɛ̃rba n boe peelem puam n iti se'em na. ⁹ Peelem tɔoma de la sela woo n ɛ̃n sɔ̃ɲa, la sela n mase, la sɪra. ¹⁰ Bã̃ɛ-ya sela n paari Zuudãana yem bɔke. ¹¹ Da po tɔ̃nna-ya tɔon-seba ti nɛ̃rba tɔ̃nni lika puam n ka tarɪ yɔ̃orɔ la, tɔ̃n pa'ale-ya ti ba ka ɛ̃n sɔ̃ɲa. ¹² Nɛ̃r-bãma n sugɛ ita sela la de la yã̃nne halɪ, ti nɛ̃ra kã̃n saage tɔge a yelle. ¹³ Ya sã̃n pa'ale ti ba ka ɛ̃n sɔ̃ɲa, nɛ̃rba wun yɛ̃ ti sela woo de la vɛ̃elga. ¹⁴ Se'ere n soe la, bɔ̃n-seka woo n de vɛ̃elga boe la peelem puam. Bela ti la gulɛ̃ yeti: «Fɔ̃n seka n gɪsri la, nɛ̃ge, isge kũm na tɛ̃nasuka ti Krisi peelem nɛ̃ge fɔ̃, bɔ̃ fu vɔm.»

¹⁵ Guuse ya mɛ̃ɲa sɔ̃ɲa la yan vɔa se'em na. Da ita-ya wu nɛ̃r-seba n ka tarɪ yem, ita-ya wu yem dɔma la.

¹⁶ Dɪke-ya folle ti ya tarɪ la wuu tɔ̃m tɔon-sɔma, ti wakate la de la tɔon-be'ero wakate. ¹⁷ Bela ã̃yã, da dena-ya geto, bã̃ɛ-ya Zuudãana la n boori se'em.

¹⁸ Da yũura-ya dāam bugra, ti a sã'anɪ la nɛ̃ra. Base-ya ti Nawɛ̃nne sɪa sɔ̃na ya, tɔ̃nna la ya lɛ̃ sela woo puam. ¹⁹ Naage-ya taaba yɔ̃ona Nawɛ̃nne yɔ̃oma, yɔ̃ona-ya yɔ̃om-sɔma buuri wuu ti Nawɛ̃nne sɪa bɔ̃ ya, nã'asra Zuudãana la ya sũure wuu. ²⁰ Pu'usra-ya ti sɔ̃ Nawɛ̃nne a yel-sɔ̃nne sela woo puam wakate wuu, la ti Zuudãana Azezi-krisi yu'ure.

Pɔgsɪ la ba sɪrba sakra taaba

²¹ Sakra-ya taaba, yãma n nã'asɪ Krisi la ã̃yã.

²² Pɔgsɪ, sakra-ya ya sɪrba wu yãma n sakɪ Zuudãana se'em na. ²³ Se'ere n soe la, sɪra n de pɔka la zuudãana, wu Krisi n de a nɛ̃rba la Zuudãana la. Krisi nɛ̃rba la de la a ã̃yã, ti Krisi dena ba Fãagra. ²⁴ Krisi nɛ̃rba n sakɪ ɛ̃ se'em na, pɔgsɪ mɛ̃ sakra ba sɪrba bela sela woo puam.

²⁵ Sɪrba, nɔ̃ɲe-ya ya pɔgba wu Krisi n nɔ̃ɲe a nɛ̃rba dɪke a mɛ̃ɲa vɔm bɔ̃ ba ã̃yã la. ²⁶ A ɛ̃ɲe bela ti a malge ba la a yetɔga, ti ba ɛ̃na sɔ̃ɲa wu ban sɔ̃ɔɪ ã̃yã la ko'om se'em na, botɪ ba welge to'ore dena Nawɛ̃nne nɛ̃rba.

²⁷ Ti ba da tara dɛ̃grɔ, la be'em, la sela n ka ɛ̃n sɔ̃ɲa, ba tara pupeelem ka tara dɔrga, ti a wun tarɪ ba sɛ̃ɲe a zɛ'am la nã'asɔ̃. ²⁸ Bela mɛ̃, dɛ̃nɪ ti sɪrba nɔ̃ɲe ba pɔg-ba wu ba mɛ̃ɲa ã̃yã la. Sɛka n nɔ̃ɲe a pɔga, nɔ̃ɲe la a mɛ̃ɲa. ²⁹ Nɛ̃ra ka boe n sisri a mɛ̃ɲa ã̃yã, a diisri ɛ̃ mɛ̃, bisra a yelle sɔ̃ɲa wu Krisi n iti se'em bɔ'ɔra a nɛ̃rba la,

³⁰ tɔma n de a ã̃yã zɛ'esi to'oto'ore la ã̃yã. ³¹ La gulɛ̃ Nawɛ̃nne gɔ̃ɲɔ puam yeti: «Buraaga wun base a sɔ̃, la a ma, dee lagum na a pɔga, ti bãma bayi lebge ã̃yã ayɪla.» ³² ɛ̃na de la yel-kãte n sugɛ yetɔg-bãna puam, mam n tɔgrɪ la de la Krisi, la a nɛ̃rba la yelle. ³³ La, la sã̃n dena yãma, nɛ̃ra woo nɔ̃ɲe a pɔga wu a mɛ̃ɲa. Ti pɔka woo mɛ̃ nanna a sɪra.

Kɔma, la ba dɔgrɪba yelle

6 Kɔma, sakra-ya ya dɔgrɪba nɔ̃ore Zuudãana la ã̃yã, ti bela n mase. ² «Nanna fɔ̃ sɔ̃ la fu ma.» Nawɛ̃nne n bɔ̃ a nɔ̃ore ti ba ita bɔ̃n-seba la wuu puam, ɛ̃na n de pɔspɔsɪ bɔ̃ɔ n lagum na nɔ̃ore bɪ̃ɲre, ³ a yeti: «Fu sã̃n ita bela, fu wun yɛ̃ yel-sɔ̃nne, la yɔ̃-woko dũnia zuo.»

⁴ La yãma n de sɔ̃dɔma la, da ita ya kɔma sela n wun botɪ ba sũure yĩge, uge-ya ba, kã'an ba, dee zãsum ba wu Zuudãana n boori se'em.

Yamsɪ, la ba zuudãandɔma yelle

⁵ Yamsɪ, sakra-ya seba n soe ya dũnia zuo wã la ya sũure wuu, nanna-ya ba dee zɔta ba, wu yan sakɪ Krisi la. ⁶ Da ita-ya bela ba nifum mã'a ti ba pɛ̃ge ya. Yãma n de Krisi yamsɪ la, ita-ya Nawɛ̃nne n boori se'em la ya sũure wuu. ⁷ Tɔ̃nna-ya ba tɔoma la bɔ'ɔra ba la yem-leego, wu ya tɔ̃nni bɔ'ɔra la Zuudãana la, la dagɪ nɛ̃r-saalba ã̃yã. ⁸ La ya mina ti nɛ̃ra woo wun yɛ̃ a tɔ̃one yɔ̃orɔ Zuudãana Krisi zɛ'am mase wu tɔon-sɔ̃ɲɔ seka ti a tɔ̃m na, a sã̃n dena la nɛ̃ra yamɲa bu a sã̃n dagna nɛ̃ra yamɲa.

⁹ La sã̃n dena yãma n de zuudãandɔma la, yãma mɛ̃ de la ya ita sɔ̃ɲa bɔ'ɔra ya yamsɪ la, da gi'ira-ya ba, mi-na-ya ti yãma, la bãma wuu lagum tarɪ la Zuudãana ayɪla n boe saazuum n ka bɔkɪ nɛ̃rba.

Zɛbre lɔg-seba ti Nawɛ̃nne bɔ'ɔri

¹⁰ Sela n deege, keɲe ya mɛ̃ɲa yɛ̃ Zuudãana pã̃ɲa ze'ele kã̃ɲkã̃ɲe a doosgo la puam, a pã̃n-kãte la ã̃yã.

¹¹ Ye-ya Nawɛ̃nne zɛbre lɔgrɔ wuu, ti ya wun tã'age ze'ele kã̃ɲkã̃ɲe, ti Asũtãana da yã̃ɲe pã'ase ya. ¹² Tɔma zɛbre ka boe la nɛ̃rsaalba, tɔma zɛbrɪ la Asũtãana ke'endɔma, la a pã̃nsɪ dɔma, la dũnia lika tɔon-be'ero na'adɔma, la kulkã'arsɪ wuu n boe saazuum. ¹³ Bela ã̃yã, dɪke-ya Nawɛ̃nne zɛbre lɔgrɔ la wuu ye, ti ya wun tã'age ze'ele zɛbe be'em wakate. La zɛbre la sã̃n wa ba'ase, ya wun ken ze kã̃ɲkã̃ɲe.

¹⁴ Bela, mãasum-ya ze, tara-ya sɪra ti a ɛ̃na wu sagã̃nne ti ya lu ya sɪa la, la ya ita sela n mase ti la ɛ̃na wu kuto fuugo ti ya ye pɪ ya yɔ'ogɔ, ¹⁵ tara-ya yemleego mɔ̃ola sũ-mã'asum kɔ̃-yɛ̃lga la wu tagra ti ya piti sɛ̃n-na la. ¹⁶ La ya bɔ̃ Nawɛ̃nne sɪra sela woo puam ti la gu'ura ya la Asũtãana pɛ̃ema n ɛ̃n wu bugum na, ti ya tã'age kɪ̃ɲe ba. ¹⁷ Base-ya ti fãare ti ya tarɪ la ɛ̃na wu kuto zuu-wanne gu'ura ya, dee dɪke Nawɛ̃nne yetɔga n

ǎn wu sukɔbgɔ tɪ Nawǎnnɛ Sɪa bɔ ya la zɛbɛ. ¹⁸ Pu'usra-ya Nawǎnnɛ sɛla woo puam, pu'usra-ya dee sɔsra ẽ wakatɛ wuu la a Sɪa pǎŋa. Nargɛ-ya pǎŋa pu'usra Nawǎnnɛ nǎrba wuu ɪyǎ da basɛ. ¹⁹ La ya mǎ pu'usra mam ɪyǎ tɪ m sǎn yetɪ m tɔgɛ, a wun ɛŋɛ yetɔga m nɔorum tɪ m tǎ'agɛ mɔolɛ a kɔ-yǎlga n sugɛ la, la buraanɛ tɪ nǎrba bǎŋɛ a vɔorɛ. ²⁰ La de la kɔ-yǎlga ɛŋa tɪ Nawǎnnɛ tɔm mam tɪ m mɔolɛ, belɛ ɪyǎ tɪ mam bɔ-na yu'a deem. Pu'usra-ya Nawǎnnɛ tɪ m wun tǎ'agɛ mɔolɛ la buraanɛ wu lan masɛ se'em.

Ba'asgɔ yetɔga

²¹ Mam boorɪ tɪ ya bǎŋɛ la mam n ǎn se'em, la mam n ɪtɪ se'em. Tɪ sɔbi-nɔŋɛ Atisiki n de Zuudǎana tɔntɔn-na n de sɪra dǎana la, wun pa'alɛ ya mam yelle wuu.

²² Mam tɔm ẽ ya zǎ'am na belɛ ɪyǎ, tɪ ya bǎŋɛ tɔma yɛla n ǎn se'em, dee tɪ a wun kenɛ ya sũure.

²³ Nawǎnnɛ n de tɪ Sɔ, la tɪ Zuudǎana Azezi-krisi wun bɔ tɪ sɔbiisi la wuu sũ-mǎ'asum, la nɔŋlum, dee botɪ ya bɔ ẽ sɪra. ²⁴ Nawǎnnɛ wun ɛŋɛ nǎr-sɛba wuu n nɔŋɛ tɪ Zuudǎana Azezi-krisi la nɔŋlum n ka ba'asɪ la yel-sɔn-nɛ.

Filipi

Bilgre

Filipi de la Maseduanı tēja ayula, Rom dōma n yuun soe ba. Filipi n de pɔspɔsı tēja Erɔptı tı Apolı mōole Azezi kō-yēlga, tı nērba bɔ sɔra (Tōoma 16:11-40).

Wakat-seka tı Apolı gulse gōŋɔ wā la, a boe la yu'a deem.

Nawēnne nērba n boe Filipi n yuun sōŋe ē, tı a pu'usra Nawēnne ba ūyā. Dee yele ba tı ba yē sū-ke'engo, la buraane, wu ēŋa n yē toogo dee ze'ele kāŋkāŋe se'em na. Ba tara sik-m-mēŋa tē'esgo, wu Azezi n sike a mēŋa se'em na, ba da ɛera ba mēŋa mā'a sōŋe (sapıtrı 1-2).

La Apolı tēege ba yetı ban mase Nawēnne zē'am na, la de la yel-sōnne tı Nawēnne ēŋe bɔ ba, ban bɔ Azezi sɔra la ūyā, la dagı ban sake Zıfdōma ɔɔ la ūyā. Dee kā'an ba yetı ba da sake pōmpɔrŋɔ karēnsāandōma, ba ita ēŋa n itı se'em na, la ba ken mōrge vɔa wu Azezi mēŋa n yuun vɔa se'em na (sapıtrı 3).

La a pa'ale ba yetı nēr-seba wuu n vɔa la Azezi la, Nawēnne bɔ'vɔrı ba la sū-yēlga, la sū-mā'asum (sapıtrı 4).

Gōŋɔ wā pa'ale me tı Apolı nōŋe Filipi dōma me zozo'e.

1 Mam Apolı la Atimōtı n de Azezi-krisi tōntōnıba n gulse gōŋɔ wā bɔ'vɔra yāma seba wuu n bɔ Azezi-krisi sɔra dena Nawēnne nērba, la ya nēŋadōma, la ya yel-bısrıba n boe Filipi. ² Tı Sɔ Nawēnne la tı Zuudāana Azezi-krisi wun ēŋe ya yel-sōnne, dee bɔ ya sū-mā'asum.

Apolı pu'usrı Nawēnne Krisi nērba n boe Filipi ūyā

³ Mam pu'usrı Nawēnne me a yel-sōnne ya ūyā wakate seka woo tı mam tēege ya yelle. ⁴ Wakate wuu tı mam pu'usrı Nawēnne ya wuu ūyā la, mam pu'usrı la sū-yēlga, ⁵ yāma n sōŋe mam la kō-yēlga la tōone halı pɔspɔsı daare wa paam zına la ūyā. ⁶ Mam mi sɔra sɔra tı Nawēnne n pɔse tōon-sōŋɔ ēŋa ya sūure puam na, wun ken tōm ē bela halı ka ba'ase Azezi-krisi lemŋo daare. ⁷ La mase me tı mam tē'esē bela ya wuu ūyā, se'ere n soe la, mam yem boe la ya le me. Bēm ūyā, la sān dena mam n boe yu'a deem wā, bu mam n tɔgrı pa'ala nērba tı kō-yēlga la de la sɔra la, ya wuu lagım na mam me yē Nawēnne yel-sōnne. ⁸ Nawēnne n de mam kaset-dāana tı mam yem boe la ya wuu me, mam nōŋe ya la Azezi-krisi nōŋlum. ⁹ La mam n sosrı Nawēnne bōn-seka de la ya nōŋlum wun pa'asra daare woo, la bāŋre, la yem vēlgre, ¹⁰ tı ya wun bāŋe sela n ān sōŋa, tı Krisi lemŋo daare ya wun dena pupeelem dōma ka tara dōrga, ¹¹ tı ya tōoma wun dena tōon-sōma n mase n ze'ele Azezi-krisi zē'am, tı la wun botı Nawēnne yē pēka la nā'asgo.

Krisi ūyā tı mam vɔa

¹² M sɔbiisi, mam boorı me tı ya bāŋe tı sela n ēŋe mam na base me tı kō-yēlga la mōolgo sēŋe nēŋa. ¹³ La base tı nayire sudaası, la nērba baseba la wuu bāŋe tı mam n boe yu'a deem na de la Krisi tōoma ūyā. ¹⁴ La tı sɔbiisi zozo'e yē buraane me Zuudāana doosgo la puam, mam n boe yu'a deem na ūyā, tı ba sūure kenra pa'asra, tı ba mōola Nawēnne kō-yēlga la ka zɔta dabeem.

¹⁵ La de la sɔra tı nērba baseba mōolı Krisi kō-yēlga la sūure ūyā, la gēelgo, la baseba mōolı la putē'e-sōŋɔ.

¹⁶ Putē'e-sōŋɔ dōma la mōolı ē na nōŋlum, ba mi tı Nawēnne n looge mam tı m tɔge pa'ale tı kō-yēlga la de la sɔra. ¹⁷ La baseba la mōolı Krisi kō-yēlga la gēelgo, la dagı la pupeelem. Ba tē'esrı tı bōn-ēŋa wun pa'ase mam na nāmsgo, mam n boe yu'a deem na.

¹⁸ La bela dagı yelle, la sān dena la putē'e-sōŋɔ bu putē'e-be'ego, lan de se'em wuu, Krisi kō-yēlga la mōole me, bela mam itı sū-yēlga me.

La mam wun ken ita sū-yēlga me, ¹⁹ se'ere n soe la, mam mi tı yāma pu'usgo ūyā, la Azezi-krisi Sıa sōŋre ūyā, bōn-ēŋa wun ba'asōm bɔ mam na fāare. ²⁰ Mam n boorı sela, dee tara putē'ere gu'ura sela la, de la mam kān ēŋe sela baa ayula tı yānne yōke mam. La de la mam tara buraane leele wā la wakate wuu, base tı Krisi yē nā'asgo mam ūyā, la sān dena mam vɔa me, bu mam sān ki me. ²¹ La sān dena la mam, mam sān vɔa, la de la Krisi ūyā, la kūm de la yōorɔ bɔ mam. ²² La mam sān ken vɔa, mam wun tōm na tōon-sōma sōŋe nērba. Bela, mam ka mi mam n wun looge seka. ²³ Mam boe la yela bayi tēŋasuka, mam boorı tı m base vɔm ēna

me dee sɛŋe ka bɔna Krisi zɛ'am, bela n ʔn sɔŋa gʌn-na. ²⁴ La yʌma ʔyʌ, mam sʌn ken vɔa n ʔn sɔŋa gʌnna. ²⁵ Mam mi ti bɔn-ɛŋa de la sɪra. Bela, mam mi ti mam wun ken vɔa me bɔna la ya wuu, sɔŋe ya ti ya sɛŋe nɛŋa Azezi-krisi doosgo puam, tara sũ-yɛlga. ²⁶ La mam sʌn leme wa bɔna la ya ɛ, ya zuugo wun zɛke pa'ase mam ʔyʌ Azezi-krisi doosgo la puam.

Mɔrgra-ya Krisi kɔ-yɛlga la ʔyʌ

²⁷ La bɔn-seka n gʌnni wuu, de la ya base ti ya yel-ɪre ʔna wu Krisi kɔ-yɛlga la n pa'alɪ se'em na. Ti mam sʌn wa'am ya zɛ'am bu m sʌn ka wa'am, m wun wɔm ti ya ze la kʌŋkʌŋe, tara yem ayɪla, lagum taaba la putɛ'ere ayɪla mɔrgra tɔnna ti nɛrba bɔ'ɔra kɔ-yɛlga la sɪra. ²⁸ Da base-ya ti dabeem tara ya la be'eba baa fɛfɛe, ti bela n wun pa'ale ba ti ba wun sʌ'am me, la yʌma wun yɛ la fʌare, bela ze'ele la Nawɛnne zɛ'am. ²⁹ Se'ere n soe la, Nawɛnne n ɛŋe ya yel-sɔnne na, la dagɪ ya bɔ Krisi sɪra mʌ'a, la de la ya ken nʌmse a ʔyʌ. ³⁰ Ya nʌmse wu yʌma n yɛ mam n nʌmse se'em, dee wɔnna ti mam ken nʌmsra ɛɛɛ wʌ.

Krisi sik-m-mɛŋa, la a na'am

2 Yʌma n lagum na Krisi dena ayɪla la base ti ya tara buraane me, ti a nɔŋlum na belsra ya. La yʌma lagum na taaba la Nawɛnne Sɪa, dee tara nɔŋlum, la taaba zɪile. ² Lan de bela la, lagum-ya taaba la nɔore ayɪla tara nɔŋlum, la yem ayɪla, la putɛ'ere ayɪla, bela ti mam sũ-yɛlga wun zo'oge gʌŋe. ³ Da ita-ya sela sela gɛela taaba la pa'al-m-mɛŋa, sikra ya mɛŋa tɛ'esra ti nɛrba baseba la gʌnni ya. ⁴ Nɛra nɛra da tɛ'esra a mɛŋa mʌ'a sɔŋre yelle. ɛera-ya ya taaba sɔŋre. ⁵ Tara-ya putɛ'e-seka ti Azezi-krisi daan tarɪ la. ⁶ Azezi-krisi la Nawɛnne n de ayɪla la, a ka tɛ'ese ti ɛŋa n zɔn na Nawɛnne na, de la sela ti ɛŋa wun gure kʌŋkʌŋe. ⁷ A sike a mɛŋa me, base ɛŋa n ʔn se'em na, dee lebge nɛrsaala, ɛŋe a mɛŋa tɔntɔnna, wa bɔna la nɛrsaalba ɛ. ⁸ ɛŋa n daan de nɛrsaala la, a sike a mɛŋa me, sake Nawɛnne halɪ ki do-puurŋa zuo. ⁹ Bela ʔyʌ ti Nawɛnne zɛke ɛ halɪ, bɔ ɛ yu'ure n gʌnni yu'ura wuu. ¹⁰ Ti Azezi ʔyʌ, bɔn-seba wuu n boe saazuum, la tɛŋa zuo, la tɛŋa puam, wun ka dũma tɛŋa a nɛŋam pɛge ɛ, a yu'ure la ʔyʌ. ¹¹ Ti nɛra woo wun yetɪ, Azezi-krisi n de Zuudʌana, ti la wun dena nʌ'asgo bɔ ti So Nawɛnne.

ʔna-ya wu peelem dũnia wʌ puam

¹² Bela, m sɪr-nɔŋrɪsɪ, mam n daan boe la ya ɛ la, ya daan sakrɪ me wakate wuu, la mam n ka boe ya zɛ'am wʌ, ken ita-ya gʌnna bela. Tɔnna-ya fʌare la tɔoma sɔŋa sɔŋa la Nawɛnne zua. ¹³ Se'ere n soe la, Nawɛnne n boe la ya ɛ tɔnna, botɪ ya bɔɔra ɛŋa n boorɪ se'em, dee tʌna ita ɛŋa n boorɪ se'em. ¹⁴ Ita-ya sela woo ti yɔŋa, la nɔke'ema wɛ'a da bɔna. ¹⁵ Ti ya wun dena nɛrba n ka tarɪ yelle, ʔna sɔŋa ka tara dɛgrɔ. Ti ya wun dena Nawɛnne kɔma n ka tarɪ dɔrga n boe nɛr-be'esi la nɛr-yaalsɪ tɛŋasuka, yɛgra wu peelem dũnia wʌ zuo, ¹⁶ wun pa'ale nɛrba yetɔga n bɔ'ɔrɪ wɔm. Ya sʌn ɛŋe bela, ya wun botɪ mam zuugo zɛke Krisi lemŋo daare, pa'ale ti mam tɔoma, la mam n mɔrgɪ la wuu dagɪ zʌŋa. ¹⁷ Ba sʌn ku mam, la wun ʔna wu kʌabgo pa'ase yʌma n bɔ Nawɛnne sɪra ti la ʔna wu kʌabgo bɔ ɛ na puam. Baa la sʌn dena bela, mam sũure ʔn yɛlum me, la mam wun ɛŋe sũ-yɛlga la yʌma wuu. ¹⁸ Bela, ya mɛ tara sũ-yɛlga lagum na mam sɪrum.

Apolɪ yetɪ a tɔm Atimɔtɪ la A'epafroditi

¹⁹ Mam tarɪ putɛ'ere ti Zuudʌana Azezi sʌn sɔŋe, la kʌn yuuge dee ti mam tɔm Atimɔtɪ ya zɛ'am, ti m wun tʌ'age bʌŋe yʌma n ʔn se'em ti m sũure mʌ'age. ²⁰ Nɛra ka boe mam zɛ'am n tarɪ putɛ'ere ayɪla la mam n fabɪ ya yelle, sʌn dagna ɛŋa mʌ'a. ²¹ Nɛra woo zɪgrɪ la a mɛŋa yelle, la dagɪ Azezi-krisi yelle. ²² Ya mi Atimɔtɪ n pa'ale ɛŋa n mase se'em, lagum na mam wu bia n lagum na a so la, tɔm kɔ-yɛlga la tɔoma se'em. ²³ Bela, mam tarɪ putɛ'ere ti mam wun tɔm na ɛŋa ya zɛ'am tɔtɔ, mam sʌn wa bʌŋe m yela la n wun ɛŋe se'em. ²⁴ La mam tarɪ putɛ'ere sɪra sɪra la Zuudʌana ti la sʌn ɛŋe fɛe, mam mɛŋa wun wa'am ya zɛ'am. ²⁵ Mam tɛ'ese ti la ʔn sɔŋa ti mam tɔm ti sobia A'epafroditi n de mam tɔntɔn-tadʌana n lagum na mam nʌmse la, ti a leme wa'am ya zɛ'am, ɛŋa ti ya daan tɔm, ti a tarɪ sɔŋre wa'am wa bɔ mam m nʌmsgɔ la puam. ²⁶ A boorɪ me halɪ la a sũure wuu ti a yɛ ya wuu, a sũure sʌ'am me halɪ, yʌma n wɔm a bʌ'asɪ la ʔyʌ. ²⁷ Asɪra, a daan be'erɪ me deege la a ki. Ti Nawɛnne zoe a ninbʌalga, la, la dagɪ ɛŋa mʌ'a ninbʌalga, la po dena la mam mɛ ʔyʌ, ti mam da le yɛ sũ-sʌ'arɔ pa'ase. ²⁸ Bela ti mam tɔm ɛ ya zɛ'am tɔtɔ, ti ya sʌn yɛ ɛ, ya sũure wun le ɛŋe yɛlum, ti mam mɛ sũ-sʌ'arɔ wun bo'oge. ²⁹ To'oge-ya ɛ la sũ-yɛlga wu lan mase, ɛn de ti sobia Zuudʌana sore puam na. Nanna-ya nɛr-bʌ-na taaba. ³⁰ Se'ere n soe la, a daan deege la a ki Krisi tɔoma ʔyʌ, a pɔse a yɔore me sɔŋe mam la sɔŋre seka ti yʌma ka tʌ'age sɔŋe mam na.

Dike ya sira wuu bo Azezi

3 Sela n deege, m sobiisi, ita-ya sū-yēlga Zuudāana doosgo la puam. La ka nāmsrɪ mam tɪ m le gulse bōn-bāna bo ya, se'ere n soe la, ba wun sōŋe ya me tɪ sela da ēŋe ya.

² Guuse-ya ya mēŋa la nēr-seba n ān wu baasɪ la, nēr-bāma n tōnnɪ tōon-be'ero, dee mōrgra nērba botɪ ba wāta īyā mā'a la. ³ Tōma n pu'usrɪ Nawēnne la a Sɪa pāŋa, dee ita sū-yēlga Azezi-krisi doosgo puam, ka te'ege nērsaalba n itɪ sela la, tōma n de nērba n wā wāaga mēŋa mēŋa.

⁴ Nērsaalba sisgo sān tarɪ nɪ yōorɔ, mam mē tarɪ nōore me tɪ m dike m mēŋa te'ege ba. Nēra sān tē'ese tɪ ēŋa tarɪ nōore tɪ a te'ege nērsaalba sisgo, mam n tara nōore gānna. ⁵ Ba dɔge mam me, dabsa anii daare tɪ ba wā mam. Mam de la Israyelɪ nēra, Abēnzamē bu-urɪ, mam de la Ebre nēra mēŋa mēŋa. La sān dena Nawēnne lɔɔ la doosgo, mam de la Farisi nēra. ⁶ Mam daan mō'oge nifo me lɔɔ la yelle halɪ daan nāmse Azezi nērba. La sān dena lɔɔ la sakre, mam daan ka tarɪ dōr-ga.

⁷ La bōn-seba wuu tɪ mam daan dike tɪ la dena yōorɔ bo mam na, mam dike ba wuu tɪ ba dena la zāŋa Krisi īyā. ⁸ Mam n bāŋe Azezi-krisi n de m Zuudāana n ān sōŋa gānna wuu la, mam bɪse bōn-bāma wuu wu sela n ka tarɪ yōorɔ. Krisi īyā mam base bōn-bāma me, bɪse ba wu sɔgrɔ tɪ m tā'age yē Krisi, ⁹ lagum na ē dena aylɪ. Mam ka le yetɪ la de la lɔɔ la sakre īyā tɪ mam mase Nawēnne zē'am, la de la mam n bo Krisi sira la īyā. Nawēnne n botɪ mam mase, mam n bo sira la īyā. ¹⁰ Mam n boorɪ se'em wuu de la m bāŋe Krisi, la pān-seka n base tɪ a vo'oge la, la m lagum na ē nāmse, āna wu ēn ān se'em a kūm na puam, ¹¹ tɪ m tara putē'ere tɪ mam mē wun vo'oge.

¹² Mam ka yetɪ mam dare paage bōn-seka tɪ mam boorɪ la me, bu mam dare mase me sela woo puam, mam ken mōrgra me tɪ m paage gure ē, se'ere n soe la, Krisi dēŋe gure mam me. ¹³ M sobiisi, mam ka tē'ese tɪ mam dare yāŋe gure ē. Mam itɪ la sela aylɪ, mam yīnnɪ bōn-seba n boe mam poorum na me, dee mōrgra tɪ m yē sela n boe nēŋa na. ¹⁴ Mam zotɪ we'esa la nēŋa tɪ m paage a teka to'oge bo'a la tɪ Nawēnne wi mam tɪ m to'oge a yire Azezi-krisi īyā la.

¹⁵ Tōma seba wuu n bɪ Nawēnne sore doosgo puam na, tɪ tara-ya putē'e-ēna. La sela aylɪ yelle, ya sān tara putē'ere ayēma, Nawēnne wun vėlge ya tɪ ya bāŋe ēn de bōn-seka. ¹⁶ La, lan de se'em wuu, tōma n sēŋe paage zē'e-seka wā, tɪ ken sēnna we'esa zē'e-seka tɪ tɪ we'esɪ la.

¹⁷ M sobiisi, lagum ita-ya mam n itɪ se'em na, bɪsra-ya seba yel-ɪre n ān wu tōma n itɪ se'em na, tɪ la dena māmsgɔ bo ya. ¹⁸ Mam daan dēŋe yele ya me nōore

faa, la mam le yeta ya me la nintām, tɪ nērba zozo'e n boe tɪ ba yel-ɪre pa'ala tɪ ba de la Azezi-krisi kūm dɔ-puurŋa la be'eba. ¹⁹ Nēr-bāma n boorɪ se'em na n de ba wēnne, ba ba'asgo de la sā'arɔ. Ba dɪkrɪ la sela n de ba yānne wē'era ba yō'orɔ, ba tē'esrɪ la sela n de dūnia bōnɔ mā'a yelle. ²⁰ La sān dena tōma, tōma de la Nawēnne yire nērba, tōma gu'urɪ la Zuudāana Azezi-krisi n de tɪ Fāagra tɪ a ze'ele bilam wa'am. ²¹ A sān wa'am, a wun teege tōma īyā wā n pō'orɪ la me, tɪ a āna wu a mēŋa īyā n tarɪ nā'asgo la. A wun dike la a pān-kāte seka tɪ a tarɪ botɪ sela woo sakra a nōore la, ēŋe bela.

Kā'arɔ

4 Bela, m sobiisi, mam nōŋe ya me boora tɪ m le yē ya, yāma n botɪ mam tara sū-yēlga, dee wun botɪ mam yē nā'asgo la. M sobi-nōŋrɪsɪ, ze-ya kāŋkāŋe bela Zuudāana doosgo puam.

² Mam belɪ A'evodi, la Asēntiisi tɪ ba tara nōore aylɪ Zuudāana doosgo la puam. ³ La fōn mē, m tōntōn-tadāan-sōŋɔ, mam sosrɪ fu me tɪ fu sōŋe pɔg-bāma. Ba daan lagum na mam me, la Akelma, la mam tōntōn-taaba baseba la, mōrge tōm Krisi kō-yēlga la tōoma, tɪ ba wuu yu'ura gulse wɔm gōŋɔ puam.

⁴ Ita-ya sū-yēlga daare woo Zuudāana doosgo la puam. Mam le yeta ya me ita-ya sū-yēlga. ⁵ Base-ya tɪ nērba wuu bāŋe ya sū-bugsum yelle. Zuudāana la lemŋo lem me. ⁶ Da fabla-ya sela sela yelle, la sela woo puam pu'usra-ya sɔsra Nawēnne, la ya pu'usra ē a yel-sōnne, pa'ale-ya ē yāma n boorɪ sela. ⁷ Tɪ Nawēnne wun bo ya sū-mā'asum n gānnɪ nērsaalba bāŋe wuu, tɪ a gu'ura ya sūure, la ya tē'esgo Azezi-krisi doosgo puam.

⁸ M sobiisi, sela n deege, base-ya tɪ ya putē'era tē'esra sela woo n de sira, la sela woo n narɪ nā'asgo, la sela woo n mase, la sela woo n tarɪ pūpeelem, la sela woo n itɪ sūure yēlum, la sela woo tɪ nērba yetɪ la ān sōŋa, tē'esra-ya bōn-seba wuu n ān sōŋa mase pēka yelle. ⁹ Ita-ya bōn-seba tɪ mam zāsum ya, tɪ ya to'oge, sela tɪ ya wōm dee yē mam zē'am na, tɪ Nawēnne n bo'orɪ sū-mā'asum na wun bo'na la ya le.

Apolɪ pu'usrɪ Filipi dōma ba sōŋe īyā

¹⁰ Mam ēŋe sū-yēlga zozo'e me Zuudāana doosgo puam, mam n yē tɪ yāma yāŋa le tēege mam yelle sōŋe mam na. Asira, mam mi tɪ yāma daan tē'esrɪ mam yelle me, la ya daan ka yē la sore sōŋe mam. ¹¹ La dagɪ tɪ mam boorɪ la sela īyā tɪ mam yele bela. Mam zāsum me ita sū-yēlga sela woo puam la bōn-seka tɪ mam tarɪ la. ¹² Mam tā nōŋɔ puam vɔa me, la mam ken tāna bōntarsōm puam vɔa me. Sela woo puam, la zē'a woo mam zāsum me, tɪ la sān dena mam di tɪge me, bu kɔm, bu mam tarɪ me tɪ la seke, bu mam ka tarɪ, mam

mi mam wun ênge se'em me. ¹³ Mam tã ita sela woo me, Kriši n bɔ'ɔrɪ mam pãŋa la ãyã.

¹⁴ La baa bela, ya ênge sɔŋa, yãma n sɔŋe mam m too-go la puam na. ¹⁵ Yãma Filipi dɔma, yãma mɛŋa mi tɪ mam n daan pɔse mɔɔle kɔ-yɛlga la bɔ ya, dee daan ze'ele Maseduanɪ fɔrge la, mam ka to'oge sela Nawɛn-ne nɛrba zɛ'am baa zɛ'a ayula, sãn dagna yãma mã'a zɛ'am. ¹⁶ Se'ere n soe la, mam n daan boe Tesaloniki tɛŋa la, yãma daan tɔm sɔŋre bɔ mam me nɔore faa.

¹⁷ La dagɪ tɪ mam eerɪ la bɔ'a, mam n boorɪ sela de la ya yɛ yɔɔɔ zo'oge. ¹⁸ Mam to'oge sela woo tɪ yãma bɔ mam na me, la seke gãŋe me. Mam n to'oge ya bɔ'a la tɪ A'epafroditi tarɪ wa'am na, mam tarɪ me tɪ sela ka le pɔ'ɔge mam. Bɔ'a bãma ãn wu sela yũuŋo n ãn yɛlum

tɪ ya kãabe bɔ Nawɛnne, tɪ a to'oge la sũ-yɛlga. ¹⁹ Mam dãana Nawɛnne n tarɪ bɔn-sɔma wuu tɪ la zo'oge gãŋe la, wun bɔ ya sela woo n wun sɔŋe ya Azezi-kriši ãyã.

²⁰ Nawɛnne n de tɪ So wun yɛ nã'asgo daare woo wakate n ka ba'asɪ. Amina.

Pu'usgo

²¹ Pu'use-ya Nawɛnne nɛrba la wuu n dolɪ Azezi-kriši la. Tɪ sɔbi-seba n boe la mam na pu'usɪ ya. ²² Nawɛnne nɛrba la wuu pu'usɪ ya, lan gãnnɪ wuu nɛr-seba n boe na-keko yire la pu'usɪ ya.

²³ Tɪ Zuudãana Azezi-kriši yel-sɔnne wun bɔna la ya.

Kolɔsɪ

Bilgre

Kolɔsɪ de la Azi-minɛɛrɪ so'olum tɛŋa. Kolɔsɪ la Efɛɛzɪ zāage la taaba mase wu kilomɛtrɪ kɔbsyi. La dagɪ Apolɪ mɛŋa n mōole Azezi kō-yɛlga bɔ ba, la de la A'epafrasɪ n de Kolɔsɪ nɛra n mōole, tɪ ba bɔ Azezi-krisi sɪra (Kolɔsɪ 1:7 la 4:12).

Apolɪ yuun boe la yu'a deem (Kolɔsɪ 4:3), tɪ A'epafrasɪ sɛŋe a zɛ'am ka yele ɛ tɪ nɛrba baseba n tarɪ pōmpɔrŋɔ zāŋɔ sɛŋe Azezi nɛrba n boe Kolɔsɪ la zɛ'am. Pōmpɔrŋɔ karɛnsāandōma bāma yetɪ, nɛra sān bɔɔra tɪ a yɛ fāare yese tōon-be'ero puam, dɛnɪ tɪ a nā'asra bōnɔ zozo'e, dee sakra ba nōore. La nɛr-bāma ken yetɪ la de la pɛrgre tɪ ba sake malŋɔ baseba n de wāaga, la dia yela, la bōn-yūula yela, la sisgo baseba.

Bela iŷā tɪ Apolɪ gulɛ gōŋɔ wā bɔ ba tɪ a vɛlge ba tɪ ba bāŋe sɪra, tɪ ba da sake pōmpɔrŋɔ karɛnsāandōma la. Apolɪ vɛlge ba yetɪ ban bɔ Azezi sɪra la, a fāage ba mɛ, la dagɪ lɔɔ dɔlga n wun tā'age fāage ba. Dee yele ba tɪ la doose la Azezi tɪ Nawɛnnɛ nāam dūnia, Azezi n de sela woo nɛnadāana, la de la ɛŋa iŷā tɪ Nawɛnnɛ wun fāage nɛrsaalba base (sapɪtrɪ 1-2).

Bela poorum, Apolɪ pa'alɛ ba la ban wun vɔa se'em vɔm paalga tɪ Nawɛnnɛ bɔ ba Azezi-krisi iŷā la puam, dee yele ba tɪ sela wuu tɪ ba ɪtɪ la, ba ɪta Zuudāana Azezi yu'ure iŷā (sapɪtrɪ 3-4).

Apolɪ dɪke gōŋɔ la tōm na Atisiki, la A'onezim, tɪ ba tarɪ sɛŋe ka bɔ Kolɔsɪ dōma (4:7-9).

1 Mam Apolɪ n de Azezi-krisi Tōntōnna wu Nawɛnnɛ n boorɪ se'em, la tɪ sɔbia Atimōtɪ ² n gulɛ gōŋɔ wā bɔɔra yāma Nawɛnnɛ nɛrba n boe Kolɔsɪ, dɛna tɪ sɔbiisi n de sɪra dōma Krisi sore doosgo puam na. Tɪ Sɔ Nawɛnnɛ wun ɛŋe ya yel-sōnnɛ, dee bɔ ya sū-mā'asum.

Apolɪ pu'usɪ Nawɛnnɛ a yel-sōnnɛ

³ Tōma pu'usɪ Nawɛnnɛ n de tɪ Zuudāana Azezi-krisi Sɔ a yel-sōnnɛ mɛ, tōma pu'usɪ ɛ mɛ yāma iŷā wakate wuu. ⁴ Tōma wōm ban tɔgrɪ yāma n bɔ Azezi-krisi sɪra, dee nōŋe Nawɛnnɛ nɛrba wuu se'em, ⁵ yāma n tarɪ putɛ'ere gu'ura sela tɪ Nawɛnnɛ bɪŋe a yire gu'ura tɪ a bɔ ya la iŷā. La de la yāma n dɛŋe wōm sɪra yetɔga n de Nawɛnnɛ kō-yɛlga la, n botɪ yāma tara putɛ'ere ɛŋa. ⁶ Kō-yɛlga ɛŋa paage yāma zɛ'am mɛ, wu ɛn paage dūnia zɛ'esɪ wuu se'em na, la a ɪtɪ nɛrba sōŋa mɛ, tɪ ba sakra zozo'e, tɪ ba kālɛ pa'asra. A mɛ ɪtɪ la bela yāma zɛ'am lan sɛŋe la daar-seka tɪ yāma wōm, dee bāŋe Nawɛnnɛ yel-sōnnɛ sɪra sɪra la. ⁷ Yāma zāsum bōn-ɛŋa la A'epafrasɪ n de tōma tōntōn-tadāana tɪ tōma nōŋe la zɛ'am. A de la Azezi-krisi tōn-tōnna n de sɪra dāana tōnna bɔɔra yāma. ⁸ ɛŋa n yele tōma Nawɛnnɛ Sɪa n base tɪ yāma tara nōŋlum se'em.

⁹ Bela tɪ lan sɛŋe la daar-seka tɪ tōma wōm yāma yelle la, tɪ tōma pu'usra Nawɛnnɛ yāma iŷā wa paam lɛɛɛ wā. Tōma sosɪ ɛ tɪ a botɪ ya bāŋe ɛŋa n boorɪ se'em sōŋa sōŋa, la ya tara yem, la bāŋre wuu tɪ Nawɛnnɛ Sɪa bɔɔrɪ. ¹⁰ Tɪ ya yel-ure wun mase wu Zu-

udāana la n boorɪ se'em, tɪ la paage a yem sela woo puam. Tɪ ya wun tōm tōon-sōma buuri wuu, dee bāŋe Nawɛnnɛ pa'ase. ¹¹ Nawɛnnɛ wun bɔ ya pāŋa sela woo puam a na'am pān-kāte la iŷā, tɪ ya wun wibe sela woo puam la sū-mā'asum. ¹² Pu'usra-ya tɪ Sɔ Nawɛnnɛ a yel-sōnnɛ la sū-yɛlga, ɛŋa n base tɪ ya tāna wun po to'oge bōn-sōma tɪ a bɪŋe tɪ a bɔ a nɛrba a so'olum n de peelem puam na. ¹³ Nawɛnnɛ fāage tɪ mɛ lika pāŋa puam, tarɪ tɪ sɛŋe a Bi-nōŋre so'olum puam. ¹⁴ ɛŋa iŷā tōma yɛ fāare mɛ, tɪ Nawɛnnɛ base tɪ tōon-be'ero taale.

Krisi n de seka

¹⁵ Azezi-krisi de la Nawɛnnɛ tɪ ba ka yɛtɪ la wōnnɛ. ɛŋa n de bōn-seba n nāam na wuu yien dāana. ¹⁶ La doose la ɛŋa tɪ Nawɛnnɛ nāam sela woo, bōn-seba n boe dūnia zuo la saazuum, bōn-seba tɪ ba yɛtɪ, la bōn-seba tɪ ba ka yɛtɪ, bōn-seba n tarɪ na'am, la zu-udāandōma, la pānsɪ dōma, la ke'endōma wuu. La doose la ɛŋa tɪ Nawɛnnɛ nāam sela woo, tɪ la dɛna a bōnɔ. ¹⁷ ɛŋa n dɛŋe sela woo bɔna, la de la ɛŋa iŷā tɪ sela woo ken bɔna a zɛ'am. ¹⁸ ɛŋa n de a nɛrba n de a iŷā la zuudāana. ɛŋa n de sela woo pɔspɔsɪ dāana, ɛŋa n de pɔspɔsɪ dāana n vo'oge dee base kūm tɪ a dɛna sela woo nɛnadāana. ¹⁹ La paage la Nawɛnnɛ yem tɪ a base tɪ ɛŋa n ān se'em na wuu, Azezi mɛ āna bela. ²⁰ Dee botɪ la doose la Azezi tɪ sela woo, la ɛŋa naage taaba, la de la Azezi n ki kūm dɔ-puurŋa zuo tɪ a zum

yese la ïyã, n boti sũ-mã'asum bɔna sela n boe tẽja, la saazuum wuu, la Nawẽnne tẽjasuka.

²¹ La yãma mẽ daan zãage me la Nawẽnne, ya daan de la be'eba ya putẽ'e-be'ero, la ya tɔon-be'ero la ïyã.

²² La lɛɛɛ wã, Nawẽnne naage ya me la ẽja, a Dayua n lebge nẽrsaala ki la ïyã, ti a tarɪ ya sẽje ka ze'ele Nawẽnne nẽjam la pupeelem, ti ya ka tara yelle, ti dɔrga kana. ²³ Bela, dẽni ti ya ken bɔ sɪra ze kãnkãnje, da base ti sela zãage ya la kɔ-yẽlga la ti ya wɔm tara putẽ'ere gu'ura sela la. La de la kɔ-yẽlga ẽja ti ba mɔole bɔ nẽrsaalba wuu n boe dũnia zuo la. Mam Apoli de Nawẽnne tɔntɔnna ti m mɔole la kɔ-yẽl-ẽja.

Apoli n tɔm se'em bɔ Nawẽnne nẽrba

²⁴ Lɛɛɛ wã, mam sũure ɔn yẽlum me, mam n nãmsɪ bɔ'ɔra yãma la ïyã. Mam n nãmsɪ wã de la Kɪsi nãmsgo n deege dena mam nãmse bɔ a nẽrba n de a ïyã la.

²⁵ Nawẽnne n looge mam ti m dena Azezi nẽrba tɔntɔnna mɔole a yetɔga la wuu bɔ yãma. ²⁶ Yetɔg-ẽja suge me yuuma yuuma, zamãana wuu wa paam zĩna, la lɛɛɛ wã a yãja puke me bɔ Nawẽnne nẽrba.

²⁷ Nawẽnne n boori ti a base ti a nẽrba la bãje yel-ẽja n daan suge la na'am pãja n ɔn sɔja zo'oge se'em bu-zãjsɪ tẽjasuka. Yel-ẽja n suge la de la Kɪsi boe la ya lɛ, boti ya wun yẽ na'am pãja ti ya tarɪ putẽ'ere gu'ura la a zẽ'am. ²⁸ La de la ẽja yelle ti tɔma mɔoli, kã'ana nẽra woo, dee zãsna nẽra woo la yem ti ti boti nẽra woo mase sela woo puam Kɪsi doosgo puam ka ze'ele Nawẽnne nẽjam. ²⁹ La de la bela ïyã ti mam tɔnna dee mɔrga. La de la Kɪsi pãn-kãte ti a bɔ mam zozo'e la n boti mam tɔnna bela.

2 Mam boori ti ya bãje la mam n mɔrge tɔnna se'em yãma ïyã, la nẽr-seba n boe Laodise, la nẽr-seba wuu n nãn ka yẽ mam na nifo la ïyã. ² Mam mɔrgɪ ti ya sũure n kenje ti ya lagum taaba tara nɔɲlum, dee tara yem zozo'e, ti ya bãje sɪra sɔja sɔja Nawẽnne yelle n suge n de Kɪsi la. ³ La de la ẽja n tarɪ yem la bãjre wuu n suge n tarɪ yɔoro zozo'e.

⁴ Mam yele ya wãna ti nẽra n da wa tɔge nɔ-yẽlum yetɔga pã'ase ya. ⁵ Baa mam n zãage la yãma la, mam yem boe la ya me, mam sũure ɔn yẽlum me, mam yẽ ti ya yel-ɪre doli sore sɔja sɔja, la yan bɔ Kɪsi sɪra ze kãnkãnje la.

Tɔma tarɪ vɔm me Kɪsi zẽ'am

⁶ Bela, yãma n sake ti Azezi-kɪsi de la ya Zuudãana la, bɔna-ya la ẽ lɛ, ⁷ ze kãnkãnje wu tia yẽga n kẽ tẽja ze kãnkãnje se'em na, ken bɔ-ya sɪra la ya sũure wuu wu ban zãsum ya se'em na, la ya pu'usra Nawẽnne a yel-sɔnne zozo'e.

⁸ Guuse-ya ti nẽra da dɪke bãjre zãsjɔ la yem yooro n de nẽrsaalba sisgo, la dũnia wã yela pã'ase ya, ba ka ze'ele Kɪsi zẽ'am. ⁹ Se'ere n soe la, Nawẽnne n ɔn

se'em wuu la, Kɪsi mẽ ɔn na bela mẽja. ¹⁰ La yãma n lagum na ẽ na, ya tarɪ sela woo me ti la seke. Ẽja n de ke'endɔma, la pãnsɪ dɔma wuu Zuudãana. ¹¹ Yãma n lagum na ẽ na, ya wã me, la dagɪ wã-seka ti nẽrsaalba wãti ti la pa'ale ti ba de Nawẽnne nẽrba la. La de la Kɪsi n teege ya sũure ti ya lebge Nawẽnne nẽrba, yese ya putẽ'e-be'ero wuu. ¹² Ban daan mise ya ko'om puam na, la ɔn wu ba lagum ya me la Kɪsi laage. La yãma mẽ lagum na ẽ me vo'oge, yãma n bɔ Nawẽnne pãja n boti Kɪsi vo'oge sɪra la ïyã. ¹³ Yãma daan ɔn wu ya ki me Nawẽnne zẽ'am ya tɔon-be'ero ïyã, la ban ka dɔge ya ti ya wãta dena Nawẽnne nẽrba la ïyã. La Nawẽnne boti ya lagum na Kɪsi me vɔa, base ya tɔon-be'ero wuu taale. ¹⁴ Tɔma daan sɪ'ɪse la Nawẽnne lɔɔ, tɔm tɔon-be'ero n pa'ale ti tɔma mase la sɪbgrɛ. La ban ka Kɪsi kũm dɔ-puurnja zuo la, Nawẽnne base yel-ẽja taale me, ti a ka le bɔna tɔma zuo. ¹⁵ A boti pãnsɪ dɔma wuu, la ke'endɔma wuu pãja sã'am me, ẽje ba yãnne nẽrba wuu nẽjam pa'ale ti Kɪsi tã'age ba me kũm dɔ-puurnja zuo.

¹⁶ Bela, da base-ya ti nẽra le bɔ ya sisgo la sela ti ya diti, bu sela ti ya yũuri, bu yuune yuune kibsa, bu wɔr-paalsɪ de'ẽjo, bu vo'osgo dabsa yelle. ¹⁷ Bɔn-bãma de la sela n sɛm na mãmsgo mã'a, la sela la mẽja de la Kɪsi. ¹⁸ Da base-ya ti nẽra n ɪti a mẽja wu a de la sik-m-mẽja dãana dee pu'usra malekadɔma, pã'ase ya yeti yãma n ɪti sela de la zãja. Nẽr-ẽja dãana yeti Nawẽnne n puke sela pa'ale ẽja, la a pa'alɪ la a mẽja zãja, se'ere n soe la, la de la nẽrsaalba putẽ'ere ti a tarɪ. ¹⁹ A ka lagum na Kɪsi n de Zuudãana la. Kɪsi n de zuugo sɔjra ïyã la wuu sela woo puam, ti kɔb-suglsi, la zĩla boti ïyã la zẽ'esɪ to'oto'ore tonje taaba bita wu Nawẽnne n boori se'em.

Vɔm kɛka, la vɔm paalga yelle

²⁰ Yãma lagum na Kɪsi ki me, ti a boti dũnia yela ka le tara pãja la ya lɛ. Bẽm ti ya ɪta wu dũnia wã n ken sɔna ya, base ti ba le mɔrga ya ti ya sakra sisgo bãna wã n yeti. ²¹ «Da dɪke, da leme, da kalum»? ²² Sisgo bãma de la bɔn-seba n sã'anɪ la ïyã. Ba de la nẽrsaalba sisgo la ba zãsjɔ. ²³ Sisgo la zãsjɔ bãna ɔn wu yem tɔoma la, ba pa'alɪ la pu'usgo sore n ɪti la yemleego, la sik-m-mẽja n dagɪ sɪra, la ïyã nãmsgo yelle. La ba ka tã wun sɔje nẽra ti a yɔke a mẽja la nẽrsaala yem n boori se'em n de be'em na.

3 Yãma lagum na Kɪsi vo'oge me, bela ɛera-ya bɔn-seba n boe Nawẽnne yire, zẽ'e-seka ti Kɪsi zĩ Nawẽnne zuugo la. ² Base-ya ti Nawẽnne yire yelle pake ya, da base-ya ti dũnia yela pake ya. ³ Se'ere n soe la, ya ki me, la ya vɔm boe la Kɪsi lɛ Nawẽnne zẽ'am. ⁴ La Kɪsi n de ti vɔm na sãn wa puke, ya wun po naage la ẽ puke la a na'am pãja.

⁵ Bela, base-ya dūnia wā putē'e-be'ero n de yalsi tōoma, la tōon-dēgrɔ, la yalsi ɪrgɔ yemleego, la be'em yemleego, la nōŋe bōnɔ zozo'e. Nēra n nōŋe bōnɔ zozo'e ān wu nēr-seba n kāabrɪ бага dee base Nawēnne pu'usgɔ la. ⁶ La de la tōon-bāma n isgri Nawēnne sūure, tɪ a sɪbgra nēr-seba n zagsrɪ a nōore la. ⁷ Yāma n daan vɔa tōon-be'ero puam na, ya mē daan ɪtɪ la bela. ⁸ La lɛɛɛ wā, base-ya bōn-bāma wuu. Base-ya sū-isgre, la sū-yīire, la putuulgɔ, la taaba tuure, la yetɔg-yaalsɪ mē ka le mase tɪ ba yese ya nōorum. ⁹ Da parna-ya bɔ'ɔra taaba. Yāma base yāma n daan ān se'em na mē la a yel-ɪrɛ, ¹⁰ dee teege tara āsum paalga. La de la Nawēnne n botɪ ya teege tara āsum ēŋa, dee malgra ē tɪ a āna wu a mēŋa la, tɪ ya wun tā'age bāŋra ēŋa sōŋa sōŋa pa'asra.

¹¹ Nēr-seba n tarɪ āsum paalga wā, la sān dena Zifdōma, bu bu-zāŋsɪ, bu seba n wā, la seba n ka wā, bu se-ba nini n ka pike, la weem nērba, bu yamsɪ, la seba n dagɪ yamsɪ, welgre ka le bɔna ba tēŋasuka. La de la Kriisi mā'a n gānnɪ sela woo, dee sɔna a nērba wuu.

¹² Yāma de la nēr-seba tɪ Nawēnne looge, a nōŋe ya mē, welge ya to'ore tɪ ya dena a nērba. Bela, zɔta-ya taaba ninbāalga, ɪta taaba sōŋa, sikra ya mēŋa, dee tara sū-bugsum, la sū-mā'are. ¹³ Da isgra ya sūure la taaba, nēra sān ēŋe ya tuuge, base-ya ē taale wu Zuudāana n base ya tōon-be'ero taale se'em na. ¹⁴ Lan gānnɪ wuu, tara-ya nōŋlum, tɪ ēŋa n wun botɪ ya lagum taaba tara nō-yēnne sōŋa sōŋa. ¹⁵ Base-ya tɪ Kriisi sū-mā'asum la sɔna ya sūure, Nawēnne wi ya tɪ ya tara la sū-mā'asum ēŋa, lagum taaba dena ayɪla. Mina-ya yel-sōnne pu'usgɔ. ¹⁶ Base-ya tɪ Kriisi yetɔga la bɔna la ya le sōŋa sōŋa. Tɪ ya tara yem zozo'e zāsna taaba, dee kā'ana taaba. Yōona-ya Nawēnne yōoma, yōona-ya yōom-sōma buuri wuu tɪ Nawēnne sɪa bɔ ya la ya sūure wuu, pu'usra Nawēnne a yel-sōnne. ¹⁷ Bōn-seba wuu tɪ ya ɪtɪ, la sān dena la tōoma bu yetɔga, ɪta-ya la Zuudāana Azezi-kriisi yu'urɛ, dee pu'usra tɪ sɔ Nawēnne a yel-sōnne Azezi-kriisi yu'urɛ ɪyā.

Kriisi nērba n wun vɔa se'em ba yie puam

¹⁸ Pɔgsɪ, sakra-ya ya sɪrba wu lan mase tɪ la āna se'em Zuudāana doosgo puam.

¹⁹ Sɪrba, nōŋe-ya ya pɔgba, da tɔ-ya la ba.

²⁰ Kɔma, sakra ya dɔgrɪba nōore sela woo puam, tɪ la de la bela n ān Zuudāana sūure yēlum.

²¹ Sɔdōma, da ɪta-ya sela n wun base tɪ ya kɔma sūure yīige, tɪ ba buraane da bo'oge.

²² Yamsɪ, sakra-ya seba n soe ya dūnia wā zuo sela woo puam, da ɪta-ya bela ba nifum mā'a tɪ ba pēge ya. Tōnna-ya la ya sūure wuu yāma n nannɪ Zuudāana la ɪyā. ²³ Sela woo tɪ ya ɪtɪ, ɪta-ya la ya sūure wuu, wu ya ɪtɪ bɔ'ɔra la Zuudāana la, la dagɪ nērsaalba ɪyā, ²⁴ yāma n mi tɪ ya wun to'oge la yɔɔɔ tɪ Zuudāana la bīŋe tɪ a

bɔ a nērba la ɪyā. La de la Kriisi n de Zuudāana la tɪ ya tōnnɪ bɔ'ɔra. ²⁵ Nēr-seka n ɪtɪ sela n ka mase, a wun to'oge yel-ɪrɛ n ka mase yɔɔɔ, se'ere n soe la, Nawēnne ka bɔkrɪ nērba.

4 La sān dena yāma n de zuudāandōma la, ɪta-ya sela n ān sōŋa, la sela n mase bɔ'ɔra ya yamsɪ la. Mina-ya tɪ yāma mē tarɪ la Zuudāana n boe saazuum.

Kā'anjɔ, la ba'asgɔ yetɔga

² Pu'usra-ya Nawēnne da base, mōrgɛ-ya la pu'usgɔ, pu'usra-ya ē a yel-sōnne. ³ Pu'usra-ya tōma mē ɪyā, tɪ Nawēnne bɔ tɔ sore tɪ tɪ mōole a kō-yēlga la pa'ale nērba Kriisi yelle n daan sugɛ la. La de la yel-ēŋa ɪyā tɪ mam bɔna yu'a deem. ⁴ Pu'usra-ya Nawēnne tɪ m tā'age tɔge yel-ēŋa vēelga vēelga wu lan mase tɪ m tɔge se'em na.

⁵ Base-ya tɪ ya yel-ɪrɛ āna sōŋa nēr-seba n ka doli Azezi la tēŋasuka, dɪke-ya fol-seka tɪ ya tarɪ la wuu tōm sōŋa. ⁶ Base-ya tɪ ya yetɔga āna sōŋa wakate wuu tara yēlum wu jaarum na, dee bāŋe yan wun lerge nēra woo se'em tɪ la mase.

⁷ La sān dena mam yelle, tɪ sɔbi-nōŋrɛ Atisiki n de Zuudāana tōntōnna n de sɪra dāana, n lagum na mam tōnna Zuudāana tōoma la, wun yele ya mam yelle wuu. ⁸ Mam tōm ē ya zē'am na bela ɪyā, tɪ ya bāŋe tōma yela n ān se'em, dee tɪ a wun keŋe ya sūure. ⁹ Mam tōm na ēŋa, la A'onezim n ze'ele yāma zē'am, a de la tɪ sɔbi-nōŋrɛ n de sɪra dāana. Ba wun yele ya bōn-seba wuu n ɪtɪ kalam.

¹⁰ Aristarkɪ n lagum na mam bɔna yu'a deem na pu'usrɪ ya. Amarkɪ n de Abarnabasɪ sōogɔ la mē pu'usrɪ ya. Mam pōn dēŋe pa'ale yāma, yan wun ēŋe se'em a ɪyā mē, a sān wa'am ya zē'am, ya to'oge ē sōŋa. ¹¹ Azezi seka tɪ ba wi'iri tɪ Azustusi la mē pu'usrɪ ya. Nēr-bāna mā'a n de Zifdōma n lagum na mam tōnna Nawēnne so'olum tōoma. Bāma n de nērba n bɔ mam buraane.

¹² A'epafraɪsɪ n de ya nēra la pu'usra ya. ēŋa n de Azezi-kriisi tōntōnna la mōgrɪ mē pu'usra Nawēnne ya yelle ka basra tɪ ya ze'ele kāŋkāŋe, dena nērba n bɪ sela woo puam sake Nawēnne n boorɪ se'em wuu. ¹³ Mam bɔ'ɔrɪ ya a kaseto tɪ a mōgrɪ mē zozo'e yāma yelle, la Laodise dōma, la Hiyerapolisi dōma yelle. ¹⁴ Tɪ sɔbi-nōŋrɛ Aluki n de logtore, la Ademasɪ pu'usrɪ ya.

¹⁵ Pu'use-ya tɪ sɔbiisi la n boe Laodise la, la Animfa, la Azezi nērba n lagsrɪ a yire la. ¹⁶ Ya sān karēŋe gōŋɔ wā ba'ase, ya base tɪ ba ken karēŋe ē bɔ Azezi nērba n boe Laodise la. La yāma mē karēŋe Laodise dōma n wun bɔ ya gōn-seka la. ¹⁷ Yele-ya Arsipi tɪ a bɪse tōon-seka tɪ Zuudāana bɔ ē na yelle sōŋa, a tōm ē sōŋa sōŋa ba'ase.

¹⁸ Mam Apolɪ n gulse pu'usgɔ wā la m mēŋa nu'ugo, mam pu'usrɪ ya. Tēra-ya mam n boe yu'a deem na yelle.

Nawěnnε yel-sõnnε wun bɔna la ya.

1 Tesaloniki

Bilgre

Tesaloniki yuun de la Maseduanı so'olum na-tēja. Apolı ze'ele la Filipi sêñe Tesaloniki ka pɔse Nawēñne tōoma. Apolı ka yuuge Tesaloniki dee fōrge, se'ere n soe la, Zifdōma baseba n yuun ıtı sūure la ē, tı a fōrge (Tōoma 17:1-10).

Bela poorum, Apolı sêñe ka bɔna la Korēntı, tı Atimōtı n dolı la ē tōñna Nawēñne tōoma la, sêñe a zē'am ka yele ē Nawēñne nērba n boe Tesaloniki la yelle n ān se'em. Tı Apolı gulse gōñɔ wā bɔ ba.

Apolı dēñe pu'use la Nawēñne a yel-sōñne ba ĩyā, ēn wōm tı ba bɔ Azezi sɔra, dee nōñe taaba la ĩyā (sapıtrı 1).

A tēege ba la ēñja n tōm ba zē'am se'em, dee yetı ēñja boorı me tı a lebe ba zē'am ka kaage ba bıse (sapıtrı 2-3).

A bɔ ba la buraane yetı ba sêñe nēñja Nawēñne doosgo la puam la pupeelem (4:1-12).

Bela poorum, a lerge ba la sokrı tı ba soke ē kūm vo'ore yelle, la Azezi n wun leme la na'am pāñja la yelle (4:13—5:11).

Gōñɔ la ba'asgo, a kǎ'an ba me, dee pu'use ba (5:12-28).

Gōñɔ wā sōñrı nēr-seba wuu n fablı dūñia ba'asgo yelle me. A pa'alı tı la mase me tı Azezi nērba bɔ Nawēñne sɔra sêñe nēñja, tōñna la sū-mǎ'are gu'ura Azezi lemñjo.

1 Mam Apolı, la Asilvē, la Atimōtı n gulse gōñɔ wā bɔ'ɔra yāma seba n de tı Sɔ Nawēñne, la tı Zu-udāana Azezi-krisi nērba n boe Tesaloniki. Nawēñne wun ēñe ya yel-sōñne, dee bɔ ya sū-mǎ'asum.

Tesaloniki dōma n bɔ Nawēñne sɔra se'em

2 Tōma pu'usrı Nawēñne me wakate wuu a yel-sōñne ya wuu ĩyā, dee tēra ya yelle tı pu'usgo puam ka gɔ'ɔra.

3 Tōma tērı ya yelle tı Sɔ Nawēñne nēñam, yāma n bɔ sɔra tōñna se'em, la yāma n tarı nōñlum tōñna zozo'e se'em, dee ken tēra yāma n tarı putē'ere gu'ura sela tı ya bɔ sɔra, ze kǎñkǎñe tı Zuudāana Azezi-krisi doosgo puam ka bigsra la yelle. **4** Tı sɔbiisi, tōma mi tı Nawēñne nōñe ya me looge ya tı ya dena a nērba.

5 Tōma n daan tarı kō-yēlga la wa'am wa mōole bɔ ya la, la ka de yetɔga mǎ'a, la de la Nawēñne Sıa pāñja. La tōma daan mi tı tōma n tɔge se'em na de la sɔra. Yāma mi tōma n daan boe ya zē'am na, tōma n vɔa se'em yāma sōñre ĩyā. **6** La yāma ıtı la tōma, la tı Zuudāana n ıtı se'em na, la baa yāma n to'oge kō-yēlga la yē nāmsgɔ zozo'e la, ya tarı ē me la sū-yēlga n ze'ele Nawēñne Sıa zē'am. **7** Bela, yāma de la seba tı Maseduanı, la Akayi so'olum nēr-seba n bɔ Azezi sɔra la wun bısrı, ıtı yāma n ēñe se'em na. **8** Zuudāana Azezi kō-yēlga la ze'ele la yāma zē'am saage Maseduanı, la Akayi, la, la dagı bil-am mǎ'a, zē'esı wuu nērba wōm yāma n bɔ Nawēñne sɔra se'em me, tı la pōn ka le dena tı tɔge. **9** Nērba la wuu tɔgrı pa'ala yāma n daan to'oge tōma sōñja se'em, base бага, dee dɔla Nawēñne tōñna bɔ'ɔra ēñja n de vɔm, la sɔra dāana, **10** dee gu'ura a Dayua Azezi n wun

ze'ele Nawēñne yire wa'am. La de la ēñja n daan ki, tı Nawēñne botı a vo'oge, ēñja n yetı a fāage tɔ Nawēñne sū-isgre n sēm na puam.

Apolı n daan tōm se'em Tesaloniki

2 M sɔbiisi, yāma mēñja mi tı tōma n daan wa'am ya zē'am na, la dagı zāñja. **2** La ya ken mina tı ba daan nāmse tōma me dee tu tōma Filipi tēja, dee tı tōma yāñja wa'am yāma zē'am Tesaloniki. La Nawēñne daan bɔ tōma buraane me, tı tōma mōole a kō-yēlga la bɔ ya, baa nāmsgɔ la n daan zo'oge la.

3 Tōma n pa'alı pa'alg-seba la dagı tuure, bu putē'e-be'ero pa'algɔ. La tōma ka ıtı yemkēgsıga pǎ'asra nērba. **4** La de la Nawēñne n bıse tı tōma mase tı a dıke a kō-yēlga la ēñe tōma nu'usum. Bela, tōma ka mōolı tı la ēñe nērsaalba sūure yēlum, tōma mōolı tı la ēñe la Nawēñne n vēesrı mina tı putē'ere n ān se'em na sūure yēlum. **5** Yāma mi sōñja tı tōma ka dıke nō-yēlum pǎ'ase nērba, la tōma ka dıke kōnkomǎ'asum tɔge tı tı to'oge sela, Nawēñne n de tōma kaset-dāana. **6** Tōma ka ε pē-ka nērsaalba zē'am, tōma ka ε yāma zē'am, bu nērba baseba zē'am. **7** La tōma daan tarı nōore me, tōma n de Krisi Tōntōnıba la ĩyā, la tōma daan ka ēñe bela. Tōma daan tarı la sū-bugsum ya zē'am, wu pɔka n bısrı a koma yelle sōñja se'em na. **8** Tōma n nōñe ya la ĩyā, tı tōma daan mōole kō-yēlga la n ze'ele Nawēñne zē'am na bɔ ya. La, la dagı bela mǎ'a, tōma daan sake me tı dıke tı vɔm bɔ ya, tōma nōñe ya me halı zozo'e.

9 M sɔbiisi, yāma tērı tōma n daan tōm nāmse se'em, tōma n daan mōolı Nawēñne kō-yēlga la bɔ ya la. Tō-

ma daan tōm na wuntɛɛŋa la yu'ɔŋɔ, tōma daan ka boori ti tōma dia yelle dena nāmsgɔ bɔ ya nēra baa ayɩla. ¹⁰ Yāma mi tōma n daan boe yāma seba n bɔ sɩra zē'am na, tōma yel-ɩɛ n ān se'em, la Nawēnne mē mi mɛ. Tōma yel-ɩɛ daan ān na sōŋa sōŋa, mase ti dōrga kana. ¹¹ Yāma mi ti tōma daan ān wu sɔ n ān se'em la a kōma la, yāma nēra woo ɩyā. ¹² Tōma keŋe ya sūure mɛ, bɔ ya buraane, pa'ale ya yeti ya dɔla so-seka n mase Nawēnne yem, ɛŋa n wi ya ti ya kē a so'olum puam po dita na'am.

¹³ Tōma n daan mōole Nawēnne kō-yēlga la bɔ ya la, ya daan to'oge ɛ, sake ti la de la kō-yēlga n ze'ele Nawēnne zē'am, a ka ze'ele nērsaalba zē'am. Asɩra, la de la Nawēnne yetɔga n boe yāma seba n bɔ sɩra la sūure puam tōnna. Bela ti tōma pu'usra Nawēnne wakate wuu bōn-ɛŋa ɩyā. ¹⁴ M sɔbiisi, Nawēnne nēr-kuɔŋɔ n doli Azezi-krisi n boe Zude tēnsɩ puam n yē nāmsgɔ seba la, yāma mē yē la nāmsgɔ bāma. Yāma buuri la n nāmsɩ yāma se'em na, Zifdōma mē nāmsɛ ba nēr-seba n doli Azezi-krisi la bela. ¹⁵ Bāma n daan ku Zuudāana Azezi, la Nawēnne nōtɔ'ɔsrɩba, dee mē nāmse tōma. Ba ɩti la sela n ka ān Nawēnne sūure yēlum, ba de la nērba wuu be'ɛba. ¹⁶ Ba gu'uri tōma mɛ ti ti da mōole kō-yēlga la bɔ bu-zāŋsɩ ti ba yē fāare. Bela ti ba tōnna tōon-be'ero pa'asra wakate wuu. La ba'asgo, Nawēnne sū-isgre boe ba zuo.

Apoli boori ti a sēŋe ka kaage Tesaloniki dōma

¹⁷ M sɔbiisi, lan daan pērgɛ ti tōma ze'ele ya zē'am fōrgɛ wakate fēe la, ti ka le yēta taaba la nini, la tōma putē'era ken bɔna la ya ɩɛ mɛ, ti yāma sɩa tara tōma, ti tōma mōrgɩra bɔɔra ti ti le yē ya. ¹⁸ Bela ti tōma daan bɔɔra ti ti leme ya zē'am. La mam mēŋa Apoli mōrgɛ mɛ nōore faa ti m leme ya zē'am, ti Asūtāana gu tōma. ¹⁹ La de la yāma ti tōma tarɩ putē'ere gu'ura, yāma n wun bɔ tōma sū-yēlga, la de la yāma n wun botɩ tōma yē nā'asgo tōma Zuudāana Azezi nēŋam a lemŋo daare. ²⁰ La de la bela, yāma ɩyā ti tōma wun yē nā'asgo la sū-yēlga.

3 Bela ti tōma ka le tāna wun zī'ire, ti tōma tē'ese ti la ān sōŋa ti tōma mā'a bɔna Atenɩ tēŋa, ² dee tōm ti sɔbia Atimōti n de Nawēnne tōntōnna n lagum na tōma mōola Krisi kō-yēlga la, ti a wa'am wa bɔ ya buraane, ti ya ze'ele kāŋkāŋe Azezi doosgo la puam. ³ Ti nāmsgɔ seka n nāmsɩ ya la da base ti ya nēra baa ayɩla buraane bo'oge Nawēnne sore la doosgo puam. Yāma mēŋa mi ti la de la pērgɛ ti ti nāmse. ⁴ Tōma n daan boe la yāma la, tōma daan dēŋe yele ya yeti, ti wuu wun yē nāmsgɔ mɛ. La ya mi ti la de la bōn-ɛŋa n bela n wa'am. ⁵ Bela ti mam ka tāna wun zī'ire, ti mam tōm Atimōti ti a wa'am wa bāŋe yāma n ān se'em Azezi sore doosgo la puam, mam zotɩ mɛ ti Asūtāana wun pā'ase ya ti ti tōoma la lebge zāŋa.

⁶ La ɩɛɛɛ wā ti Atimōti ze'ele ya zē'am leme wa'am, a tarɩ la kō-yēlga wa bɔ tōma, a pa'ale tōma la yāma n bɔ sɩra se'em, la yāma n tarɩ nōŋlum se'em, dee yeti ya ken tē'esra tōma yelle mɛ sōŋa sōŋa bɔɔra ti ya yē tōma, wu tōma n boori ti ti yē yāma se'em na. ⁷ Bela m sɔbiisi, yāma n bɔ sɩra se'em na keŋe tōma sūure mɛ tōma toogo, la tōma nāmsgɔ la puam. ⁸ ɩɛɛɛ wā, tōma le vɔa la sū-yēlga, yāma n ze kāŋkāŋe Zuudāana doosgo la puam na. ⁹ Tōma ka mi pu'usgo seka ti tōma wun pu'use Nawēnne ya ɩyā, sū-yēlga seka ti yāma bɔ tōma a nēŋam na ɩyā. ¹⁰ Tōma sosɩ Nawēnne mɛ la ti sūure wuu, yu'ɔŋɔ la wuntɛɛŋa, ti ti tā'age le yē ya, sōŋe ya la sela n pɔ'ɔge ya Azezi doosgo la puam pa'ase.

¹¹ Tōma sɔ Nawēnne mēŋa, la ti Zuudāana Azezi-krisi wun bɔ tɔ sore ti ti wa'am ya zē'am. ¹² Ti Zuudāana wun base ti ya nōŋlum taaba ɩyā, la ya nōŋlum nērba wuu ɩyā pa'asra zozo'e wu tōma n nōŋe ya se'em na. ¹³ A wun bɔ ya buraane ti ya ze'ele kāŋkāŋe a sore la zuo la pupeelem, ka tara dōrga ti sɔ Nawēnne nēŋam, wakat-seka ti ti Zuudāana Azezi wun leme wa'am la a nērba wuu la.

Tun wun ita se'em ti la paage Nawēnne yem

4 Sela n pa'ase, m sɔbiisi, yāma zāsum tōma zē'am mɛ yāma n wun ita se'em paage Nawēnne yem. Yāma pōn ita la bela. La tōma kā'anɩ ya mɛ, dee belna ya la ti Zuudāana Azezi yu'ure ti ya maln ɛŋe gāŋe bela. ² Yāma mi bōn-seba ti tōma daan to'oge ti Zuudāana Azezi zē'am pa'ale ya ti ya ita la. ³ Nawēnne n boori ti ya āna se'em n wāna: Welge-ya to'ore dena pupeelem dōma, dee yōke ya mēŋa da tōnna yalsɩ tōoma. ⁴ La ya nēra woo bāŋe ɛŋa n wun tara a ɩyā se'em la pupeelem ti la āna sōŋa. ⁵ Da base-ya ti yalsɩ tōoma yemleego tara ya, wu seba n ka doli Nawēnne n ɩti se'em na. ⁶ Yel-ɛna puam, nēra da kān tōm a tadāana sela n ka ān sōŋa, bu fā sela n de a bōnɔ. Ti daan pōn dēŋe yele ya, dee kā'an ya mɛ, ti Zuudāana wun sɩbge seba n tōnnɩ tōon-be'ero bāma mɛ. ⁷ Nawēnne ka looge to ti ti tōnna tōon-dēgrɔ, a looge to ti ti welge la to'ore tara pupeelem. ⁸ Bela, nēr-seka n zagse pa'algo ɛna, a ka zagse nērsaala, a zagse la Nawēnne n bɔ tɔ a Sɩa la.

⁹ La sān dena yāma n wun nōŋe sɔbiisi se'em yelle, la ka le dena ti gulse bɔ ya. Nawēnne pōn zāsum yāma ya wun nōŋe taaba se'em mɛ. ¹⁰ La yāma sɩɩ nōŋe ya sɔbiisi wuu n boe Maseduanɩ so'olum wuu la bela. La tōma kā'anɩ ya mɛ ti ya maln ɛŋe gāŋe bela pa'ase.

¹¹ Mōrgɛ ya mēŋa vɔa la sū-mā'asum, la ya bɩsra ya mēŋa tōoma yelle, tōnna-ya la ya mēŋa nu'usi dita, wu tōma n daan yele ya se'em na. ¹² Ita-ya bela, ti ya yel-ɩɛ la base ti ya yē nā'asgo nēr-seba n ka doli Nawēnne na zē'am. La ya da ze gu'ura ti nēra bɔ ya sela.

Zuudāana Azezi lemŋo

¹³ M sɔbiisi, tōma boori tɪ ya bāŋe la sɪra nēr-seba n ki la yelle, tɪ ya sūure da sā'am wu nēr-seba n ka tarɪ putē'ere gu'ura sela la. ¹⁴ Tōma n bɔ sɪra tɪ Azezi ki mɛ, dee vo'oge la, bela tōma ken bɔ sɪra mɛ tɪ seba n doli Azezi dee ki la, Nawēnne wun botɪ ba bɔna la Azezi.

¹⁵ Zuudāana zāsŋɔ n wāna tɪ tōma yetɪ tɪ pa'alɪ ya: Wakat-seka tɪ Zuudāana la lemɪ la, tōma seba n ken vɔa Zuudāana lemŋo daare la kǎn dēŋe seba n ki la Zuudāana zē'am. ¹⁶ Se'ere n soe la, nōore n wun bɔ, tɪ malekadōma naba tɔge ke'enke'em, tɪ Nawēnne benkonne peebe, tɪ Zuudāana mēŋa ze'ele Nawēnne yire sige, tɪ seba n doli Azezi dee ki la dēŋe vo'oge. ¹⁷ Tɪ Nawēnne lagum bāma, la tōma seba n ken vɔa la zēke sawara puam tɪ tɪ tu'use Zuudāana la saazuum, tɪ tɪ bɔna la Zuudāana la le wakate wuu. ¹⁸ Bela, kɛŋra-ya taaba sūure la yetɔg-bāna.

5 M sɔbiisi, la ka le dena tɪ gulɛ ya pa'alɛ wakate, la dabs-seba tɪ bōn-bāma wun ēŋɛ. ² Yāma mēŋa pōn mina sōŋa mɛ tɪ Zuudāana lemŋo la daare wun āna wu nayiga n ēn wa'am yu'ŋɔ la. ³ Nērba sǎn wa yeta tɪ: «Laafe la sū-mā'asum boe», wakat-ēŋa tɪ toogo wun wa'am di'ige ba wu pɔka virgre toogo la, la ba kǎn yāŋe pōɛ.

⁴ La yāma, m sɔbiisi, yāma dagɪ nērba n boe lika puam tɪ Zuudāana la daare wun wa di'ige ya wu nayiga la. ⁵ Yāma wuu de la peelem nērba, yāma tōoma tōnnɪ la wuntɛŋa. Tōma tōoma ka tōnnɪ yu'ŋɔ, tōma dagɪ lika nērba. ⁶ Bela, tɪ da gīsra-ya wu nērba baseba la, tɪ nēege-ya māasum tara tɪ mēŋa sōŋa. ⁷ Seba n gīsri, gīsri la yu'ŋɔ, tɪ seba n yūuri dāam bugra, bugra yu'ŋɔ. ⁸ La tōma n de wuntɛŋa nērba la, tɪ tara tɪ mēŋa sōŋa. La tɪ bɔ Azezi sɪra, dee tara nōŋlum wu kuto fuugo tɪ sudaaga dɪke pɪ a yō'ogɔ tɪ la gu'ura ē zɛbrɛ puam na. Dee base tɪ fāare la tɪ ya tarɪ putē'ere gu'ura la, āna wu kuto zuu-wanne gu'ura ya.

⁹ Nawēnne ka looge to tɪ a sū-isgre sā'am tɔ, a looge to tɪ tɪ yē la fāare tɪ Zuudāana Azezi-krisi ŋyā. ¹⁰ Ŋŋa n ki tɪ ŋyā, tɪ a lemŋo daare, tɪ sǎn vɔa mɛ bu tɪ sǎn ki mɛ, tɪ wun bɔna la ē le.

¹¹ Bela, bɔ'ɔra-ya taaba buraane, sōŋra taaba ze'ele kǎŋkǎŋe Azezi doosgo la puam, wu yāma n pōn ita se'em na.

Kǎ'ŋɔ, la ba'asgo yetɔga

¹² M sɔbiisi, tōma sosɪ ya mɛ tɪ ya nanna seba n tōnnɪ ya tēŋasuka la, seba tɪ Zuudāana looge tɪ ba bɔna ya nēŋa pa'ala ya Azezi sore la puam, dee kǎ'ana ya la.

¹³ Ŋŋe-ya sela n pa'alɪ tɪ yāma nannɪ ba mɛ, nōŋe ba zo-zo'e ba tōoma la ŋyā. Tara-ya sū-mā'asum la taaba.

¹⁴ M sɔbiisi, tōma sosɪ ya mɛ tɪ ya kǎ'ana seba n ka boori tɪ ba tōm na, dee bɔ'ɔra seba n ka tarɪ buraane la buraane, dee sōŋra seba n ka tarɪ pǎŋa la, la ya mā'ara ya sūure la nēra woo. ¹⁵ Guuse-ya tɪ nēra da lebse a tadāana be'em, be'em ŋyā, mōrgɛ-ya ita taaba sōŋa, la nērba wuu sōŋa wakate wuu.

¹⁶ Tara-ya sū-yēlga daare woo. ¹⁷ Pu'usra-ya Nawēnne wakate wuu da base. ¹⁸ Sela woo puam pu'usra-ya Nawēnne a yel-sōnne. Nawēnne boori tɪ ya ita la bela Azezi-krisi doosgo puam. ¹⁹ Da gu'ura-ya Nawēnne Sɪa tōoma. ²⁰ Da pɔ'ɔra-ya yetɔg-seba tɪ nēra to'oge Nawēnne zē'am tɔgra bɔ'ɔra ya. ²¹ Magra-ya sela woo bɪsra la ān se'em, to'oge sela n ān sōŋa. ²² Dee bɪkra-ya yel-seba wuu n de be'em.

²³ Nawēnne n de sū-mā'asum dāana la mēŋa wun base tɪ ya dena ēŋa mā'a nērba tara pupeelem. A wun gu ya ŋyā, la ya sɪa, la ya yem wuu tɪ ya kǎn tara dōrga tɪ Zuudāana Azezi-krisi lemŋo daare. ²⁴ Nawēnne n looge ya la de la sɪra dāana, a wun ēŋe bela.

²⁵ M sɔbiisi, pu'usra-ya Nawēnne bɔ'ɔra tɔ. ²⁶ Pu'use-ya tɪ sɔbiisi la wuu la nōŋlum. ²⁷ Mam sosɪ ya la Zuudāana yu'ure tɪ ya karēŋe gōŋɔ ēna wā tɪ sɔbiisi la wuu wōm.

²⁸ Tɪ Zuudāana Azezi-krisi yel-sōnne wun bɔna la ya.

2 Tesaloniki

Bilgre

Gõn-ëna wã puam Apolü ken tɔgra la Azezi lemɲo yelle. Se'ere n soe la, Azezi lemɲo la yelle, Tesaloniki döma ken ka mina bãma n wun êɲe se'em tɪ la doose sore. Nërba baseba daan tẽ'ese tɪ Azezi põn leme me (2 Tesaloniki 2:2). Tɪ baseba mẽ daan zagse tɪ bãma kãn le tõm, tɪ Azezi lemɲo paage ba'ase me, dee ze gu'ura tɪ nërba baseba bɔ ba sela. Bela n soe tɪ Apolü gulse kã'an ba.

A dẽɲe yeti êɲa pu'usrɪ la Nawẽnne a yel-sõnne ban bɔ Nawẽnne sɪra, la ban nõɲe taaba la ãyã. Dee yeti êɲa sosrɪ Nawẽnne me ba ãyã tɪ a boti ba ze'ele kãɲkãɲe a tõoma la puam (sapitrɪ 1).

Bela poorum, a tɔge ba la Azezi-krisi lemɲo la yelle, pa'ale ba yeti dẽnɪ tɪ seka n de tõon-be'ero dãana n wun sã'am na wa'am, dee tɪ Krisi yãɲa leme wa'am (2:1-12).

A ken kã'an Nawẽnne nërba la yeti, baa tõon-be'ero sãn põn pa'asra zɔ'ɔra, ba mörge ze'ele kãɲkãɲe Nawẽnne sore doosgo la puam, la ba da base Nawẽnne pu'usgo (2:13—3:5).

Dee kã'an zẽyãgsɪ yeti ba tõnna bɪsra ba mẽɲa yelle, wu êɲa la nër-seba n doose taaba tõm Nawẽnne tõoma la n êɲe se'em na (3:6-15).

Gõɲɔ la ba'asgo, a kã me bɔ ba, dee pu'use ba (3:16-18).

1 Mam Apolü, la Asilvẽ, la Atimõtɪ n gulse gõɲɔ wã bɔ'ɔra yãma seba n de tɪ Sɔ Nawẽnne, la Zuudãana Azezi-krisi nërba n boe Tesaloniki. ²Tɪ Sɔ Nawẽnne, la tɪ Zuudãana Azezi-krisi wun êɲe ya yel-sõnne, dee bɔ ya sũ-mã'asum.

Tesaloniki döma ze la kãɲkãɲe nãmsgɔ puam

³M sɔbiisi, tõma mase me tɪ tɪ pu'usra Nawẽnne daare woo a yel-sõnne yãma ãyã. La ãn sõɲa me tɪ tõma ita bela, se'ere n soe la, yãma n bɔ Azezi sɪra la sẽnɪ nẽɲa me zozo'e, tɪ yãma nẽra woo nõɲlum taaba ãyã pa'asra. ⁴Bela tɪ tõma tɔgra yãma yelle Nawẽnne nërba lagsgɔ zẽ'a woo la sũ-yẽlga. Se'ere n soe la, yãma mörge me ze kãɲkãɲe Azezi doosgo la puam ka basra, baa nërba n nãmsrɪ ya, la toogo n paarɪ ya la.

⁵Bela pa'ale tɪ Nawẽnne diti sarɪya la sɪra. Se'ere n soe la, yãma n nãmsrɪ Nawẽnne so'olum yelle se'em wã, Nawẽnne wun yeti ya mase tɪ ya kẽ a so'olum na puam. ⁶Nawẽnne wun êɲe sela n mase, a wun boti seba n nãmsrɪ yãma la yẽ nãmsgɔ, ⁷dee base tɪ yãma seba n nãmsrɪ la, lagum na tõma vo'ose wakat-seka tɪ Zuudãana Azezi wun ze'ele Nawẽnne yire wa'am, la a malekadõma n tarɪ pãn-kãte, ⁸la bug-zɪlɪsɪ wa sɪbge seba n zagse Nawẽnne dee ka sake tɪ Zuudãana Azezi kō-yẽlga la. ⁹Ba wun yẽ la sɪbgre n de sã'aɲɔ n ka ba'asrɪ. La ba wun zãage me la Zuudãana kãn yẽ a na'am pãn-kãte la, ¹⁰wakat-seka tɪ a wun wa'am na. Daar-ẽɲa, a wun wa'am me wa to'oge pẽka la nã'asgo a mẽɲa nërba n bɔ ẽ sɪra la zẽ'am, la yãma po bɔna ba

puam me, yãma n sake a kō-yẽlga la tɪ tõma tɔge bɔ ya la ãyã.

¹¹Bela ãyã tɪ tõma pu'usra Nawẽnne wakate wuu ya ãyã, tɪ a base tɪ ya ãna sõɲa mase wu êɲa n wi ya tɪ ya ãna se'em na. La a wun bɔ ya pãɲa tɪ ya ita bõn-sõma seba wuu tɪ ya boorɪ tɪ ya êɲe, dee base tɪ yãma n bɔ sɪra tõnna tõon-seba la tõm ba'ase. ¹²Bela tɪ tɪ Zuudãana Azezi yu'ure wun yẽ nã'asgo ya zẽ'am, tɪ yãma mẽ yẽ nã'asgo a zẽ'am. Bela wuu de la Nawẽnne, la tɪ Zuudãana Azezi-krisi yel-sõnne.

Sela n wun êɲe dee tɪ Azezi wa'am

2 La sãn dena tɪ Zuudãana Azezi-krisi lemɲo, la tõma n wun wa lagse taaba a zẽ'am na yelle, m sɔbiisi, tõma sosrɪ ya me ²tɪ ya da base tɪ ya yem yɔɔra tɪ dabeem tara ya, ya sãn wõm tɪ nërba yeti Zuudãana la lemɲo daare paage me. Baa nẽra sãn yele ya yeti la de la Nawẽnne Sɪa n pa'ale êɲa, bu a sãn yeti tõma n tɔge, bu a sãn yeti tõma n gulse gõɲɔ, da kãn sake-ya. ³Da base-ya tɪ nẽra pã'ase ya, baa lan de se'em wuu. Lan dẽɲe daar-ẽɲa n wun wa'am, dẽnɪ tɪ nërba zozo'e isge tulge ze'bra la Nawẽnne, tɪ nër-seka n de tõon-be'ero dãana la wun wa'am wa puke a mẽɲa, êɲa n de nër-seka n wun sã'am. ⁴A wun sise bõn-seba wuu tɪ nërba nã'asrɪ, dee yeti ba de la wẽnne, a wun zẽke a mẽɲa me gãnna bõn-bãma wuu. Halɪ, a wun põn sẽɲe ka kẽ la Nawẽnne deego la puam zĩ'ire yeti êɲa de la Nawẽnne.

⁵Mam n daan ken bɔna yãma zẽ'am na, mam daan yele ya bela wuu me. Yãma ka tẽrɪ? ⁶La yãma mi tɪ sela

n boe gu'ura ti tōon-be'ero dāana la nān ka puke, halı ti wakate la wun wa paage. ⁷ Tōon-be'ero pānja n suge pōn tōnna me. La seka n nān gu'uri ē na, wun wa fōrge me dee base folle. ⁸ Bela ti tōon-be'ero dāana la yānja wun puke. La tōma Zuudāana Azezi n wun leme wa'am ti a nōore sapebsum ku ē. La a lemjo la na'am pānja wun sā'am a pānja fast. ⁹ La sān dena tōon-be'ero dāana la n wun wa'am na, a wun tara la Asūtāana pānja ita bōn-yālma la yel-kursı, la yela buuri zozo'e n de pā'asgo. ¹⁰ A wun tōm na be'em buuri to'oto'ore pā'ase nēr-seba n wun yē sā'anjo la, ban zagse ka nōnje sira to'oge ē wun yē fāare la iya. ¹¹ Ban ka sake sira la, ti Nawēnne base ti ba putē'era botı ba tuuge sake pōmporjo. ¹² Bela ti nēr-seba wuu n ka sake sira, dee bōra tōon-be'ero la wun yē sarıyadia n de sā'anjo.

Nawēnne looge ya ti ya yē la fāare

¹³ La ān sōja ti tōma pu'usra Nawēnne a yel-sōnne wakate wuu yāma n de ti sobiisi ti ti Zuudāana nōnje la iya. Se'ere n soe la, Nawēnne looge ya la halı pōspōsı, ti a Sia botı ya dena a nērba tara pupeelem, dee sake sira yē fāare. ¹⁴ La de la bela iya ti Nawēnne doose la tōma kō-yēlga la wi ya ti ya po yē ti Zuudāana Azezi-krisi na'am pānja la. ¹⁵ Bela, m sobiisi, mōrge-ya ze kānkānje, tara yel-seba ti tōma zāsum ya, bu gulse gōrjo bō ya la. ¹⁶ Tōma pu'usrı ti Zuudāana Azezi-krisi, la ti So Nawēnne n nōnje tō dee ēnje ti yel-sōnne bō tō buraane n ka ba'asrı, dee botı ti tara putē'ere gu'ura bōn-sōma seba ti ti sake la. ¹⁷ A wun keje ya sūure, dee bō ya pānja ti ya ēnje sela wuu n ān sōja, la ya tōge sela n ān sōja.

Pu'use-ya Nawēnne bō tō

3 Sela n deege, m sobiisi, sose-ya Nawēnne bō tō, ti ti Zuudāana kō-yēlga la ken saage pa'ase dee ti nērba pēgra ē, wu la ān se'em yāma zē'am na. ² Ken sose-ya ē ti a fāage tō la nēr-wēensi, la nēr-be'esi, se'ere n soe la, la dagı nērba wuu n sake Nawēnne kō-yēlga la.

³ La Zuudāana la de la sira dāana, a wun botı ya ze'ele kānkānje, dee gu'ura ya ti be'em dāana la da

yānje ya. ⁴ Zuudāana la iya tōma bō yāma sira me, tōma mi ti ya itı la tōma n yele ya se'em na, la ya wun ken ita la bela.

⁵ Zuudāana la wun base ti ya tara Nawēnne nōnjum, dee mōrge ze kānkānje wu Krisi la.

Kā'anjo zēyāgsı iya

⁶ M sobiisi, tōma yetı ya la Zuudāana Azezi-krisi yu'ure ti ya zāage ya mēja la sobiisi seba wuu n de zēyāgsı vōa yooryooro ka dōla pa'algo seba ti tōma pa'ale ya la. ⁷ Yāma mēja mi sōja ti la mase me ti ya ita tōma n daan itı se'em na. Tōma n daan boe ya zē'am na, tōma daan ka tarı zēyāgre, ⁸ la tōma ka diti nēra dia zānja, tōma daan tōnnı na wunteεja la yu'uho nāmsra zozo'e ka bōra ti tōma dia yelle dena nāmsgo bō ya nēra baa ayıla. ⁹ Tōma n daan itı bela la, la dagı ti tōma ka tarı la sore ti ti sose sōnje ya zē'am, tōma daan tōnnı ti pa'ale ya, ti ya mē ita la bela. ¹⁰ Tōma n daan boe ya zē'am na, tōma daan yele ya yetı: «Seka n ka boorı ti a tōm, a da di.» ¹¹ La tōma wōm ti nērba baseba n boe ya zē'am dena zēyāgsı vōa yooryooro, dee kē'era nērba yela puam. ¹² Tōma yetı nēr-bāma me, dee kā'ana ba la Zuudāana Azezi-krisi yu'ure ti ba yōke ba mēja mōrge tōm bise ba mēja yelle.

¹³ La sān dena yāma, m sobiisi, da kān targe-ya la tōon-sōma ırgo.

¹⁴ Nēra sān ka sake bōn-seba ti tōma yele ya gōrjo wā puam na, ya bānje a dāana lōkra ē, ti yānne yōke ē. ¹⁵ La ya da dıke ē ti a lebge ya be, kā'an ya ē wu ya sobia.

Ba'asgo yetōga

¹⁶ Zuudāana mēja n de sū-mā'asum dāana la wun bō ya sū-mā'asum wakate woo la sela woo puam. Zuudāana wun bōna la ya wuu.

¹⁷ Mam Apolı n gulse pu'usgo wā la m mēja nu'ugo, mam pu'usrı ya. Mam gulsrı la wāna m gōnnı wuu puam, pa'ala ti la de la mam n gulse.

¹⁸ Ti Zuudāana Azezi-krisi yel-sōnne wun bōna la ya wuu.

1 Timōti

Bilgre

Atimōti ma de la Zifu n bɔ Azezi sɪra, dee tɪ a sɔ dɛna Greki. La de la Apoli sore sɛnnɛ buyi dāana tɪ a tu'usɛ Atimōti Listri (Tōoma gōŋɔ 16:1-3). La daan pɔsɛ la bilam tɪ Atimōti dɔla Apoli tōnna Nawēnnɛ tōoma (Tōoma gōŋɔ 17:14, 18:5, 19:22).

Apoli gulɛ la gōnnɔ bayi bɔ Atimōti. Gōn-bāma bayi, la Atiti gōŋɔ puam, a kā'anɪ la Azezi nērba nēŋadōma. Pɔsɔsɪ gōŋɔ tɪ a gulɛ bɔ Atimōti wā puam, a tɔgɛ la bōna batā yelle:

A kā'an na Azezi nērba yetɪ ba guuse ba mēŋa la pōmpɔrŋɔ zāsŋɔ. Pōmpɔrŋɔ zāsŋɔ la pa'alɛ tɪ dūnia zuo bōna de la bōn-be'ero, nēra ka tā wun yē fāare tɪ la sān dagna tɪ a dāana tarɪ la yɛla n sugɛ bāŋrɛ tɪ nērba baseba ka mi. Ba ken yetɪ nērba tɪ ba guuse ba mēŋa da dita dia baseba, la ba da dita pɔgsɪ. Bela de la pōmpɔrŋɔ.

Buyi, a pa'alɛ la Azezi nērba la pu'usgɔ sɔa n wun dɔla se'em, la Azezi nērba, la ba nēŋadōma, la ba yel-bɪsrɪ-ba n mase tɪ ba āna se'em.

Butā, a pa'alɛ la Atimōti mēŋa, ēŋa n wun ēŋɛ se'em tara nērba buuri to'oto'ore n boe Wēndeego la puam, tɪ a wun tāna tōnna Nawēnnɛ tōoma sōŋa.

¹ Mam Apoli n de Azezi-krisi Tōntōnna n gulɛ gōŋɔ wā. La de la Nawēnnɛ n de tɪ Fāagra, la Azezi-krisi tɪ tɪ tarɪ putē'ere gu'ura la, n bɔ mam nōore tɪ mam dɛna a Tōntōnna. ² Mam gulɛ gōŋɔ wā bɔ'ɔra la Atimōti n lebge mam mēŋa bia Azezi-krisi doosgo la puam. Tɪ Sɔ Nawēnnɛ, la tɪ Zuudāana Azezi-krisi wun ēŋɛ fu yel-sōnnɛ, dee zoe fu ninbāalga, dee bɔ fɔ sū-mā'asum.

Seba n zāsnɪ pōmpɔrŋɔ zāsŋɔ

³ Mam n daan we'esɪ Maseduanɪ dee yele fu se'em na, ken weege Efɛzɪ tēŋa yele nēr-seba n zāsnɪ pōmpɔrŋɔ zāsŋɔ la tɪ ba da zāsum. ⁴ Yele ba tɪ ba base kurum kurum dōma sɔlma, la yaabdōma deto kāalɔ n ka tarɪ ba'asgɔ. Bōn-bāma tarɪ la nōke'ene sēna, dee ka sōŋra tɪ Nawēnnɛ tōoma sēnna nēŋa. Nērba n bɔ Nawēnnɛ sɪra n botɪ a tōoma la sēnna nēŋa. ⁵ Mam yetɪ fu yele ba bela, tɪ ba tara la putē'ere n ān sōŋa, dee bāŋɛ ba sūure puam tɪ ba ka tarɪ dōrga, dee bɔ Nawēnnɛ sɪra la ba sūure wuu tɪ ba nōŋlum zo'oge. ⁶ La nērba baseba base bōn-bāma mɛ, dee tɔgra yetɔg-yaalsɪ, ⁷ bɔɔra tɪ ba dɛna Nawēnnɛ lɔɔ karēnsāandōma, dee ka wōnna ba mēŋa n yetɪ se'em, bu yel-seba tɪ ba zāsnɪ na vōore.

⁸ Tɪ mi tɪ Amoyisi lɔɔ ān sōŋa, ba sān dɪkɛ ē tōm wu lan mase se'em. ⁹ Tōma mi tɪ lɔɔ la ka ēŋɛ seba n mase la īyā, a ēŋɛ la nēr-seba n ka sakrɪ lɔɔ, la seba n ka sakrɪ nōore la īyā, la seba toogo n ka boe la Nawēnnɛ, la tōon-be'ero dōma, la nēr-seba n pɔ'ɔrɪ Nawēnnɛ dee ka nanna bōn-seba wuu n de Nawēnnɛ bōnɔ, la seba n kuuri ba sɔdōma, la ba madōma, la seba n de nēr-

kuurba īyā, ¹⁰ la seba n ɪtɪ yalsɪ, la bura-seba n gā la taaba, la pɔg-seba n gā la taaba, la seba n yōgrɪ nērba kɔɔsra, la pōmpɔrndōma, la seba n pɔtɪ dee ka ɪta ban yele se'em na, la nēr-seba n ɪtɪ sɛla woo n sɪ'lsrɪ sɪra kō-yēlga la īyā. ¹¹ Kō-yēlga ēŋa ze'ele la sū-yēlga dāana Nawēnnɛ n tarɪ na'am pāŋa la zē'am, ēŋa n dɪkɛ ē ēŋɛ mam nu'usum tɪ m mōolɛ.

Apoli pu'usrɪ Nawēnnɛ a yel-sōnnɛ

¹² Mam pu'usrɪ tɪ Zuudāana Azezi-krisi n bɔ mam pāŋa, la ēn bāŋɛ tɪ mam de sɪra dāana looge mam tɪ m tōm a tōone wā. ¹³ Baa mam n daan pɔ'ɔrɪ a yu'urɛ, nāmsra a nērba, dee tuura ē na, a zoe mam ninbāalga mɛ. Se'ere n soe la, mam daan ka bāŋɛ mam ɪtɪ sɛla, mam n daan ka bɔ Azezi sɪra la īyā tɪ mam ɪta bela. ¹⁴ Tɪ Zuudāana Azezi-krisi la ēŋɛ mam a yel-sōnnɛ mɛ zozo'e, botɪ mam bɔ ē sɪra, dee tara a nōŋlum. ¹⁵ Yetɔg-seka tɪ mam yetɪ m tɔgɛ wā de la sɪra, la a mase mɛ tɪ nēra woo to'oge ē sōŋa:

«Azezi-krisi wa'am dūnia zuo
wa fāage la tōon-be'ero dōma.»

La mam n de tōon-be'ero dāana gānna ba wuu. ¹⁶ La ēn zoe mam ninbāalga la, la de la Azezi-krisi n pa'alɛ a sū-mā'are zozo'e la mam n de tōon-be'ero dāana gānna la, tɪ la wun dɛna makrɛ pa'alɛ nēr-seba n wun wa bɔ ē sɪra la, tɪ a wun ēŋɛ a sū-mā'asum la ba, dee bɔ ba vɔm n ka ba'asrɪ.

¹⁷ Nawēnnɛ n de naba wakate wuu, n ka kiiri, tɪ nini ka yēta ē, ēŋa ayɪla mā'a sɔna pēka la nā'asgɔ wakate n ka ba'asrɪ. Amina.

¹⁸ M bia Atimōti, mam zāsɲɔ n wāna ti mam dɪkɛ ita fu nu'usum, wu ban daan to'oge Nawēnne yetɔga tɔge fu yelle se'em na: Base ti yetɔg-bāma bɔ fu pāɲa, ti fu zebe zebre sɔɲa, ¹⁹ ken bɔ Nawēnne sɪra, dee ita sela ti fu mi fu sūure puam ti la ān sɔɲa. Nērba baseba zagse bela mɛ, ti bōn-ēɲa base ti ba ka le dɔla Azezi sore. ²⁰ Nēr-bāma puam, Ahimēni, la Alegsāndri n daan boe mī, ti mam daan base ba la Asūtāana ti ba yōge yem, da le pɔ'ɔra Nawēnne.

Pu'usgo nērba wuu iŷā

2 Mam yeti ya mɛ lan gānni wuu, ti ya sɔsra dee kǎ'ara Nawēnne, dee pu'usra ɛ a yel-sōnne nērba wuu iŷā. ² Sɔsra-ya Nawēnne bɔ'ɔra na'adōma, la seba wuu n tarɪ ke'ɲo, ti ti tǎ'age vɔa la laafe, ti dāɲɔ da bɔna, ti ti tǎ'age dɔla Nawēnne sore sɔɲa, ti ti yel-ɪrɛ āna sɔɲa. ³ Bōn-ēna n ān sɔɲa bɔ Nawēnne n de ti Fāa-gra dee āna a sūure yelum. ⁴ Ūɲa n boori ti nērba wuu yē fāare, dee bāɲɛ sela n de sɪra. ⁵ Nawēnne ayɪla mǎ'a n boe, la nēra ayɪla mǎ'a n mē boe nērba la Nawēnne tēɲasuka naara ba taaba, ēɲa de la Azezi-krisi n lebge nērsaala la. ⁶ La de la ēɲa n dɪkɛ a vɔm yɔ to'oge nērba wuu base, bela de la kaseto n pa'alɛ ti Nawēnne n boori ti a fāage nērba wuu, a pa'alɛ bela la wakat-seka ti a looge la. ⁷ Bela ti Nawēnne daan looge mam ti m dena Azezi Tōntōnna dɪkɛ yel-ēna wǎ mōole, dee zāsum bu-zāɲsɪ Nawēnne sɪra ti ba bɔ ɛ sɪra. Mam tɔ-grɪ la sɪra, mam ka parnɪ.

⁸ Bela mam boori ti zē'a woo buraasi pu'usra Nawēnne, ba zēke ba nu'usi la pupeelem pu'usra Nawēnne, ba da tara sū-isgre bu nōke'ene. ⁹ Pɔgsɪ mē yɛera futo wu lan mase, ti la da dena pa'al-m-mēɲa bu yānne. Ba da ɛera ti ba nēnnōm dena zuto lua, bu sālma lɔgrɔ, bu kug-sōma lɔgrɔ, la futo ligri n zo'oge yea. ¹⁰ Ba base ti ba yel-ɪrɛ āna sɔɲa wu pɔgsɪ n nannɪ Nawēnne n mase ti ba ita se'em. ¹¹ La mase ti zāsɲɔ wakate pɔgsɪ āna sīm, dee sakra nōore. ¹² Mam ka bɔ pɔgsɪ nōore ti ba zāsna, bu ba sɔna buraasi, ba āna sīm. ¹³ La de la Adam ti Nawēnne daan dēɲɛ nāam, dee yāɲa nāam Awa. ¹⁴ La, la dagɪ Adam ti Asūtāana daan pǎ'ase, a daan pǎ'ase la Awa yāɲɛ, ti a sɪ'ɪsɛ Nawēnne nōore. ¹⁵ La baa pɔgsɪ n nāmsɪ dee dɔgra la, ba tǎ wun yē fāare, ba sǎn mōrge ze'ele kǎɲkǎɲɛ Nawēnne doosgo puam, tara nōɲlum la pupeelem, dee guusra ba mēɲa.

Seba n boe Nawēnne nērba nēɲa n wun āna se'em

3 Yetɔg-ēna ti mam yeti m tɔge wǎ de la sɪra, nēra sǎn bɔɔra ti a dena Nawēnne nērba nēɲadāana, la de la tōon-sōɲɔ ti a boori ti a tōm. ² La dēni ti nēɲadāana dena nēra n ka tarɪ dōrga, la a dena pɔg-yēɲa dāana, la a dena nēra n tarɪ a mēɲa sɔɲa, dee tara putē'e-sōɲɔ, a dena nēra ti ba nannɪ, la a dena nēra n ɪti nērba sǎanɔ, dee tǎna wun zāsum nērba. ³ A

da dena nēra n dɪkɛ a mēɲa bɔ dāam, a da dena zebzebra, a dena sū-bugsum dāana, da nōɲɛ girgiri, la a da nōɲɛ bōnɔ. ⁴ A dena nēra n bɪsrɪ a yir-dōma yelle sɔɲa, ti a kɔma sakra a yetɔga, nǎ'asra ɛ sela woo puam. ⁵ Nēra sǎn ka tǎna bɪsrɪ a mēɲa yir-dōma yelle, a wun ēɲɛ la wāne bɪsɛ Nawēnne nērba yelle? ⁶ A da dena nēr-paalga Azezi sore la puam, ti a da zēke a mēɲa ti ba wa di a sarɪya wu Asūtāana la. ⁷ La dēni ti nēr-seba n ka doli Nawēnne mē tɔgra a yelle yeti a de la nēr-sōɲɔ. Ti ba da wa pɔ'ɔge ɛ, ti yānne yōke ɛ ti a lui Asūtāana bērgɔ puam.

⁸ Yel-bɪsrɪba mē mase mɛ ti ba dena nērba ti ba nannɪ, ba da dena nērba n tarɪ nōgōla, ba da yūura dāam bugra, ba da dena nērba n ɪti sela n ka mase yēta bōn-tarsōm. ⁹ Ba dena nērba n tarɪ Nawēnne sɪra n daan sugɛ, ti a puke pa'alɛ ti la, ita sela woo ti ba mi ba sūure puam ti la mase mɛ. ¹⁰ Dēni ti ba dēɲɛ make ba bɪsɛ, ba sǎn ka tara dōrga, ti ba yāɲa tōm yel-bɪsrɪba tōoma la.

¹¹ La ba pɔgɔba mē mase ti ba dena la nērba ti ba nannɪ, ba da dena nērba n tɔgrɪ nērba be'em, ba tara ba mēɲa sɔɲa, dee dena sɪra dōma sela woo puam.

¹² Dēni ti yel-bɪsrɪ dena pɔg-yēɲa dāana, dee tǎna bɪsrɪ a kɔma, la a yir-dōma yelle sɔɲa. ¹³ Yel-bɪsrɪba se-ba n tōnnɪ ba tōoma sɔɲa yēti nǎ'asgo mɛ, la ba wun yē buraane zozo'e Azezi-krisi doosgo puam.

Bōn-kāte seka ti Nawēnne pa'alɛ tōma

¹⁴ Mam tarɪ putē'ere ti la kǎn yuuge dee ti mam wa'am fu zē'am, la mam gulɛ wāna bɔ'ɔra fɔ, ¹⁵ ti mam sǎn yuuge, fu tǎ'age bāɲɛ nēra n wun āna se'em Nawēnne nērba tēɲasuka, nēr-seba n de vɔm dāana Nawēnne mēɲa nērba n tarɪ Nawēnne sɪra wu zēere n sōɲrɪ deego se'em na. ¹⁶ Ti wuu mi ti Nawēnne sɪra n daan sugɛ ti a dɪkɛ pa'alɛ tɔ a doosgo puam na, de la bōn-kāte. Bōn-kāte ēɲa de la:

Krisi n daan lebge nērsaala.

Ti Nawēnne Sɪa pa'alɛ ti a de la sɪra dāana.

Ti malekadōma bɪsɛ ɛ.

Ti ba mōole a yelle buuri wuu tēɲasuka.

Ti nērba bɔ ɛ sɪra.

Ti Nawēnne zēke ɛ la na'am pāɲa sēɲɛ a yire.

Pōmpɔrɲɔ zāsɲɔ yelle

4 Nawēnne Sɪa tɔge mɛ vēelga vēelga yeti, dūnia ba'asgo wakate, nērba baseba wun base Nawēnne sore doosgo, dee dɔla sela n de pǎ'asgo, la kulkǎ'arsɪ pōmpɔrɲɔ zāsɲɔ. ² Ba de la pōmpɔrɲɔdōma, la pulibsum dōma, ti ba zāsna pōmpɔrɲɔ dee ti ba zuto ka zɛera. ³ Nēr-bāma zāsni nērba yeti, pɔgsɪ da ella surba, ti buraasi mē da dita pɔgɔba, la ba sisra dia baseba da dita. La de la pōmpɔrɲɔ, Nawēnne nāam bōn-bāma ti nēr-seba n sake ēɲa mina sɪra la pu'usra ɛ a yel-sōnne

dee dita ba. ⁴ Se'ere n soe la, sela woo ti Nawēnne nāam ān sōŋa me. Sela sela ka boe n de fu zagse, fu sän pu'use Nawēnne a yel-sōnne. ⁵ Nawēnne yetoga, la pu'usgo n basri ti sela woo āna sōŋa Nawēnne zē'am.

Azezi tōntōn-sōŋa

⁶ Pa'ale sobiisi la bela, ti fu wun dena Azezi-krisi tōn-tōn-sōŋa, n to'oge Nawēnne yetoga ti fu bɔ sira la, ti a pa'asra fu pāŋa, dee dɔla zāsŋa n de sira la sōŋa. ⁷ Zāage fu mēŋa la solma n ka tarɪ vōore, dee keŋe fu mēŋa dɔla Nawēnne sōŋa. ⁸ Nēra n itɪ se'em wɪsgra a ŷā la tarɪ yōoro la fēe, la a sän dɔla Nawēnne sōŋa, la tarɪ yōoro me sela woo puam, ēŋa n sōŋri tōma vɔm seka ti ti tarɪ lēele wā puam, dee wun bɔ tɔ vɔm n ka ba'asri. ⁹ Yetog-ēna de la sira, la a mase me ti nēra woo to'oge ē. ¹⁰ Bela, tōma n tōnnɪ nāmsra mōrgra la, la de la tōma n tarɪ putē'ere gu'ura vɔm dāana Nawēnne n de nērsaalba wuu Fāagra la ŷā, la a de la seba n bɔ ē sira la Fāagra gānna.

¹¹ Pa'ale ba, dee zāsum ba bōn-bāna. ¹² Da base ti nēra zēen fɔ, fōn de bōnbɪ'a la ŷā, base ti fu yetoga, la fu yel-ɪre, la fu nōŋlum, la fōn bɔ Nawēnne sira se'em, la fu pupeelem āna sōŋa, ti la pa'ale Nawēnne nērba, bāma n wun vɔa se'em. ¹³ Mōrge karēŋra Nawēnne gōŋa pa'ala nērba, bɔ'ora ba buraane, dee zāsna ba halɪ ti m wa wa'am. ¹⁴ Da base bɔ'a la ti Nawēnne bɔ fɔ, ti ba daan to'oge Nawēnne yetoga tɔge a yelle, ti kēma la daan dɪke nu'usi pagle fu zuo pu'use bɔ fu la. ¹⁵ Tōm tōon-bāna sōŋa, dɪke fu mēŋa bɔ tōoma la, ti nērba wuu wun yē fōn sēnnɪ nēŋa se'em.

¹⁶ Guuse fu mēŋa la fu vɔm, la fu zāsŋa la. Mōrge ze'ele kāŋkāŋe ita bela wuu. Fu sän ita bela, ti fu wun fāage fu mēŋa, la seba n selsri fu la.

Fōn wun kā'an Nawēnne nērba se'em

5 Bura-yā'aŋa sän ēŋe sela, da tāse ē, kā'an ē wu fu sɔ la. Kā'an kɔmbɪ'ɪsɪ wu fu sobiisi la, ² la fu kā'an pɔg-yā'asɪ wu fu madōma la, dee kā'an pug-sarsɪ wu fu tāpa la, la pupeelem.

Pɔkōpa yelle

³ Nanna pɔkōpa seba n boe ba yɪla mā'a la, dee sōŋra ba. ⁴ Pɔkōore sän tara kɔma bu yɪsɪ, bāma n mase ti ba bɪsra ba mēŋa yir-dōma yelle, ba bɪsra ba dɔgrɪba la yelle wu ba dɔgrɪba la n daan bɪsri ba yelle se'em na, bela n ān Nawēnne sūure yēlum. ⁵ Pɔkō-seka n boe ayɪla mā'a ka tara nēra nēra la, a te'ege la Nawēnne pu'usra sɔsra wuntēŋa la yu'ŋɔ. ⁶ La pɔkōore seka n eerɪ tōnna a yem n boori se'em, ēŋa pōn ki me baa la ēn ken vɔa la. ⁷ Kā'an ba bela, ti nēra da zerge ba. ⁸ Nēra sän ka bɪsra a yir-dōma yelle, lan gānnɪ a dee dōma yelle, ēŋa dāana zagse sela ti ti bɔ sira la me, la

a de la tōon-be'ero dāana gānna seka n ka dolɪ Nawēnne na.

⁹ Pɔkō-seka ti ba tā wun gulse a yu'ure pa'ase pɔkōpa gōŋa puam de la pɔkō-seka n paage yuuma pisyooɪ, dee ele sira ayɪla mā'a. ¹⁰ La dēnɪ ti nērba mina ti a de la tōon-sōma dāana, la a uge kɔma sōŋa, la a de la nēra n ēŋe nērba sāano, la a peege Nawēnne nērba nāma, la a sōŋe nēr-seba n nāmse, dee dena nēra n tōm tōon-sōma buuri wuu.

¹¹ La sän dena pɔkō-seba n ka kurge la, da gulse ba yu'ura pɔkōpa la puam, se'ere n soe la, ba yem sän wa bɔna buraasɪ puam, ba wun base Krisi tōoma me, dee bɔora ti ba ele. ¹² La bela wun dena la tuure bɔ ba, ban sā'am ba nōore la ti ba dēŋe bīŋe la ŷā. ¹³ Sela n pa'ase, ba sän gulse ba, ba wun lebge la zēyāgsɪ ēera kaara yie, la, la dagɪ bela mā'a, ba wun lebge la yetog-tɔgsrɪba kē'era nērba yela puam, dee tɔgra yetog-seba n ka narɪ ba tɔge. ¹⁴ Bela, mam boori ti pɔkō-seba n ka kurge la le ele dɔge kɔma, bɪsra ba yir-dōma yelle, da base ti be'eba yē folle tɔge ti be'em. ¹⁵ Se'ere n soe la, pɔkōpa baseba pōn wērge me base Nawēnne sore dee dɔla Asūtāana.

¹⁶ Nēra n bɔ Azezi sira sän tara pɔkōpa a yire, a bɪsra ba yelle, a da dɪke ba yelle base Nawēnne nērba zuo, ti Nawēnne nērba la tā'age sōŋe pɔkō-seba n ka tarɪ nēra nēra la.

Nawēnne nērba kēma yelle

¹⁷ Wēndeego nērba kēma sän bɪsri nērba la yelle sōŋa, lan gānnɪ wuu, seba n mōrgrɪ mōola dee zāsna Nawēnne yetoga la, ba wun yē la nā'asgo buyi. ¹⁸ La gulse Nawēnne gōŋa puam yetɪ: «Da ēŋe lɔlga n tōnnɪ si puam nōore yuka», dee ken yetɪ: «La mase ti tōntōn-na to'oge a ɔɔɔɔ.»

¹⁹ Nēra sän dōre kēma yetɪ a tōm na tōon-be'ero, da selse ē, sän dagna nērba bayi bu batā n de kaset-dōma. ²⁰ La kēma sän tōm tōon-be'ero, fu kā'an ē Wēndeego la puam nērba wuu nēŋam, ti nērba baseba la zoe dabeem. ²¹ Mam yetɪ fu la Nawēnne, la Azezi-krisi, la malekadōma nēŋam yetɪ, fu doose pa'algo bāna wā la sira, da bɔkra nērba.

²² Da kāble dɪke fu nu'usi pagle nēra zuo ti a tōm Nawēnne tōoma, da naage la nēra a tōon-be'ero puam, dena pupeelem dāana.

²³ Da le yūura ko'om mā'a, yūura vē fēe fu puur-dōoma, la fu ŷā n ka tarɪ pāŋa la ŷā.

²⁴ Nērba baseba tōon-be'ero puke me lan dēŋe ba wun di ba sarɪya. La nērba baseba tōon-be'ero nān ka puke, dee wun wa puke me. ²⁵ Bela mē, tōon-sōma baseba puke me, la seba n sugē la ka tā wun sugē ka puke.

La mase me ti sake zuudāandōma

6 Nēr-seba n de yamsi la, dēni ti ba nanna ba zu-udāandōma sōja, ti nēra da pɔ'oge Nawēnne yu'ure, la ti zāsja la. ² La yam-seba zuudāandōma n bɔ Azezi sira la, la ka mase ti ba ka nanna ba yeti bāma de la sɔbiisi. La de la ba tōn malun tōnna bɔ'ora ba gān-na bela, se'ere n soe la, seba ti ya tōnni bɔ'ora la, de la nēra n bɔ Azezi sira dee ti Nawēnne nōje ba.

Pōmpɔɔja zāsja, la ligri nōjlum

La de la bōn-bāna ti fu wun zāsum ba, dee kā'an ba ti ba ita. ³ Nēra sān zāsum zāsja ayēma ka dɔla tōma Zuudāana Azezi-krisi sira yetɔga, bu ka dɔla zāsja seka n pa'alɔ ti wun āna se'em Nawēnne sore doosgo puam na, ⁴ a tarɔ la pa'al-m-mēja zo'oge dee ka mina sela sela, la a nōje la yetɔg-yaalsi la nōke'ene wē'a. Bōn-bāma n sēm na ita sūure la tadāana bōnɔ, la a ka wōm taaba, la yu'ur-sā'anɔ, la tē'esē be'em bɔ'ora nēra, ⁵ ti ba wē'era nōke'ene n ka ba'asri la taaba, ban tarɔ yem be'ero dee ka tara yel-sira, dee tē'esra ti Nawēnne sore doosgo la de la sela n wun base ti ba yē bōntarsōm na iya.

⁶ La de la sira ti nēra n doli Nawēnne sore sān tara sū-yēlum la sela ti a tarɔ la, a yēti yōoro zozo'e mē. ⁷ Ti ka tarɔ sela sela wa'am dūnia zuo, la ti mē kān tā'age tarɔ sela sela dūnia wā zuo fōrge. ⁸ Bela, ti sān tara dia la futo, la seke mē. ⁹ La seba n boori ti ba yē bōn-tarsōm na kē'erɔ la yela puam, luta Asūtāana bērgo puam. Ba boori la bōnɔ zozo'e n de yalne la be'em, bōn-bāma n kē'esri nērsaalba wōjre la sā'anɔ puam. ¹⁰ Se'ere n soe la, ligri nōjlum de la tōon-be'ero wuu yēgre. Nēra baseba nōje la ligri burge dee base Nawēnne sore, nāmse ba mēja la toogo buuri zozo'e.

¹¹ La fōn de Nawēnne nēra la, zāage fu mēja la bōn-bāma, dee ε sela n mase, la Nawēnne sakre, ken bɔ ē

sira, ε nōjlum, la sū-mā'are, la sū-bugsum. ¹² Mōrge mē mēere sōja Nawēnne sore doosgo la puam yē vɔm n ka ba'asri, ti la de la bela iya ti Nawēnne looge fo, ti fu daan tɔge yetɔg-sōja yeti fōn bɔ Azezi sira nēra zo-zo'e nējam na.

¹³ Mam yeti fo Nawēnne n bɔ'ori sela woo vɔm nējam, la Azezi-krisi n daan tɔge sira kaseto Apōnsi-pilatɔ nējam na, ¹⁴ yeti fu sake pa'algo ti fu to'oge la, gure ba sōja la pupeelem, ti dōrga kana, halɔ ka paage ti Zuudāana Azezi-krisi lemjo.

¹⁵ Nawēnne wun botɔ a leme wa'am na wakat-seka ti a looge la. Sū-yēlga dāana Nawēnne ayila mā'a n de na-kāte, a de la na'adōma Naba, la zuudāandōma Zu-udāana. ¹⁶ Eja mā'a n vɔa wakate wuu, a boe la peelem n nēge gāje puam ti nēra ka tāna wun paage mī, nēra baa ayila ken ka yē ē, la nēra nān ka yēti ē. Eja n soe nā'asgo, la pāja n ka ba'asri. Amina.

¹⁷ Kā'an nēr-seba n tarɔ dūnia wā bōntarsōm na yeti, ba da zēkra ba mēja, la ba da dɔke ba te'ere te'ege bōntarsōm ti ba ka mī ban wun āna se'em, ba te'ege Nawēnne, ti eja n bɔ'ori tɔ sela woo ti la sekra sōja sōja ti ti ita sū-yēlga. ¹⁸ Kā'an ba yeti, ba ita sōja, ba dena nēra n tōnni tōon-sōma zozo'e, la ba dena nēra n bɔ'ori, dee puta sela ti ba tarɔ bɔ'ora nēra la sū-yēlga. ¹⁹ Bela ti ba wun lagse bōntarsōm n ān sōja kān sā'am wakate n sēm na iya, ti ba wun yē vɔm mēja mēja.

²⁰ Fōn Atimōti, bɔsra sela ti Nawēnne dɔke gu'ule fo la, mōrge zāage fu mēja la yetɔg-yooro n ka doli Nawēnne sore, zāage fu mēja la nōke'ene wē'a ti nēra tē'esri ti la de la bājre dee ti la dagna bela la. ²¹ La nēra baseba tarɔ la bōn-bāma tē'esē ti bāma tarɔ la bājre, burge dee base Nawēnne sore.

Nawēnne wun ēje ya a yel-sōnne.

2 Timōti

Bilgre

Wakat-seka ti Apoli gulse gōn-ēna wā bɔ Atimōti la, a boe la yu'a deem Rom. La daan tɔ me zozo'e bɔ ẽ (2 Timōti 2:9), la nēra nēra ka boe n wun sōŋe ẽ (2 Timōti 4:16).

Apoli daan tē'ese ti ẽŋa wɔm lɛm na ba'asɔ, bela ti a gulse bɔ Atimōti n de a tōntōn-tadāana ti a nōŋe wu a mēŋa bia la, tɔge a ba'asɔ yetɔga bɔ ẽ.

Apoli dēŋe pu'use la Nawēnne a yel-sōnne Atimōti iŋā, dee kā'an ẽ yeti, baa nērba sǎn nāmsra ẽ Nawēnne tōo-ma la iŋā, a mōrge ze kǎŋkǎŋe wu Azezi suda-sōŋɔ (1:1—2:13).

Apoli kā'an ẽ me yeti a guuse a mēŋa la nēr-seba n wē'eri nōke'en-yooro la, ti la ka sōŋri nērba Nawēnne doosgo puam. A ken yeke Atimōti ti a ita ẽŋa n uti se'em na: A dɔla sɔra, la a bɔ sɔra, la a tara nōŋlum, la sū-mǎ'are, la a da yīm zāsŋɔ sōŋɔ seka ti a to'oge la (2:14—4:5).

Gōŋɔ la ba'asɔ, a pa'ale la ẽŋa n nāmse se'em, la Nawēnne n sōŋe ẽŋa se'em (4:6-18).

1 Mam Apoli n de Azezi-krisi Tōntōnna wu Nawēnne n boori se'em, ti m mōole wɔm seka ti Nawēnne bīŋe nōore ti a bɔ tɔ Azezi-krisi iŋā la yelle. ² Mam gulsɔ bɔ'ɔra la Atimōti n lebge mam bi-nōŋre la. Ti Sɔ Nawēnne, la ti Zuudāana Azezi-krisi wun ẽŋe fɔ yel-sōnne, dee zoe fu ninbāalga, dee bɔ fɔ sū-mǎ'asum.

Apoli pu'usɔ Nawēnne a yel-sōnne, dee bɔ Atimōti buraane

³ Mam pu'usɔ Nawēnne a yel-sōnne, mam tōnni bɔ'ɔra ẽ mina m sūure puam ti la ǎn sōŋa, wu mam yaabdōma n yuun tōnni bɔ'ɔra ẽ se'em na. Mam tēri fu yelle m pu'usɔ puam yu'ɔŋɔ la wuntɛɛŋa ka basra.

⁴ Mam tēri fōn daan kelli la me, ti mam bɔ'ɔra ti m le yē fɔ, ti m wun tara sū-yēlga zozo'e. ⁵ Mam tēri fōn bɔ Azezi sɔra la fu sūure wuu, wu fu ma-keko Aloyiizi, la fu ma A'enisi n daan dēŋe bɔ Azezi sɔra se'em na. Mam mi ti fu ken bɔ sɔra la bela. ⁶ La de la bela ti mam tēera fɔ ti fu dɛke bɔ'a la ti mam daan dɛke m nu'usi pagle fu zuo ti Nawēnne bɔ fɔ la, malun tōm gǎŋe bela. ⁷ Se'ere n soe la, Nawēnne n bɔ tɔ a Sɔ la ka boti ti tara dabeem, a boti ti tara la pǎŋa, la nōŋlum, la yōk-m-mēŋa.

⁸ Bela, da zoe yǎnne ka tɔge ti Zuudāana Azezi yelle. La fu ken da zoe yǎnne mam n boe yu'a deem Azezi-krisi kō-yēlga iŋā la, lagum na mam sake nāmsgɔ kō-yēlga la iŋā, ti Nawēnne wun bɔ fu pǎŋa. ⁹ Ẽŋa n fāage tɔ, wi to ti ti dena a nērba, la dagi tun tōm tōon-sōma iŋā, la de la a mēŋa n boori se'em, la a yel-sōnne ti a ẽŋe bɔ tɔ Azezi-krisi iŋā, halɔ lan dēŋe dūnia pī'iluŋo.

¹⁰ Yel-sōnne ẽŋa yǎŋa puke la Azezi-krisi wa'aŋɔ la iŋā. Ẽŋa n fāage tɔ, sǎ'am kūm pǎŋa dee boti ti yē wɔm n ka ba'asɔ a kō-yēlga la iŋā.

¹¹ Nawēnne n looge mam ti m dena Krisi Tōntōnna mōola a kō-yēlga, dee zāsna nērba. ¹² La de la kō-yēlga la iŋā ti mam yēta nāmsgɔ, la mam ka zoti yǎnne, se'ere n soe la, mam mi seka ti mam bɔ sɔra la me, la mam mi m sūure puam ti a tarɔ pǎŋa me wun gu'ura sela ti a dɛke ẽŋe mam nu'usum na sōŋa, halɔ ka paage Nawēnne sarɔyadia daare. ¹³ Base ti zāsŋɔ seka ti mam pa'ale fu la bɔna fu sūure puam ti fu bisra dɔla, ken bɔ Azezi-krisi sɔra tara nōŋlum a doosgo puam. ¹⁴ Tara zāsŋɔ sōma seba ti Nawēnne dɛke ẽŋe fu nu'usum na la Nawēnne Sɔa n boe la ti le la pǎŋa.

¹⁵ Fōn pōn mina ti Nawēnne nēr-seba n boe Azi so'olum la wuu base mam me, Afizeli la Ahermozenu boe la nēr-bāma puam. ¹⁶ Ti Zuudāana wun zoe A'onezifɔɔri la a yir-dōma ninbāalga, se'ere n soe la, a ẽn bɔ'ɔra mam buraane me, dee ka zoe yǎnne la ban ba mam la bǎnsɔ la. ¹⁷ La ẽn wa'am Rom na, a mō'oge la nifo ɛ mam, halɔ wa yē mam. ¹⁸ Sarɔyadia daare, ti Zuudāana wun zoe a ninbāalga. La fōn ken mina sōŋa sōŋre seka wuu ti a sōŋe mam Efɛɛzi.

Azezi-krisi tōntōn-sōŋɔ n uti se'em

2 M bia, keŋe fu mēŋa yel-sōnne seka ti Azezi-krisi ẽŋe bɔ tɔ la puam. ² Mam n zāsum fu bōn-seba nērba zozo'e nēŋam na, dɛke ba zāsum nērba n de sɔra dōma n mē tā wun dɛke ba zāsum nērba baseba. ³ Fōn de Azezi-krisi tōntōn-sōŋɔ la, fu mē sake nāmsgɔ wu suda-sōŋɔ n sakri nāmsgɔ se'em na. ⁴ Sudaaga sǎn bɔ'ɔra ti a tōm ti a ke'ema sūure ẽŋe yēlum, a ka kē'esri a mēŋa yel-seba n dagi sudaasɔ yela puam. ⁵ La de'ɛŋo mē puam, nēra ka tā wun zoe di to'oge bɔ'a ti a sǎn ka doose zua la sɔa wuu. ⁶ La de la kaara seka n tōm nāmse n wun dēŋe to'oge a bōnkɔɔla la yōɔɔ. ⁷ Wōm mam

n yele se'em na vōore, ti Zuudāana wun base ti fu bānje sela woo vōore.

⁸ Tēra Azezi-krisi n de naba Adavidi yuŋa la yelle, a ki dee vo'oge, wu kō-yēlga la ti mam mōolu la n yeti se'em na. ⁹ La de la kō-yēlga ēŋa iŋa ti mam nāmsra, hal ti ba ba mam na bānsi, wu mam de la tōon-be'ero dāana la. La ba ka ba Nawēnne yetoga la. ¹⁰ Bela iŋa ti mam mōrge wibra sela woo puam Nawēnne nērba la ti a looge la iŋa, ti ba mē yē fāare Azezi-krisi iŋa, dee po yē nā'asgo n ka ba'asri. ¹¹ Yetog-ēna wā de la sura:

Ti sǎn ki la ē,

ti wun lagum na ē vɔa.

¹² La ti sǎn mōrge ze'ele kǎŋkǎŋe,

ti wun lagum na ē di na'am.

Ti sǎn zagse yeti tōma ka mi ē,

a mē wun zagse yeti ēŋa ka mi to.

¹³ Ti sǎn ka bɔna ti sura puam,

ēŋa ken dena la sura dāana,

se'ere n soe la, a ka malun viira a yetoga.

Tōnna ti la paage Nawēnne yem

¹⁴ Tēge nērba la bōn-bāma, dee kā'an ba Nawēnne nēŋam ti ba da wē'era nōke'ema yetog-bie yela, ti ba ka taru yōoro baa fēfēe, dee sā'ana seba n selsri la.

¹⁵ Narge pāŋa dena nēra n paage Nawēnne yem, la fu dena tōntōnna n ka zoti yānne la a tōoma, dee mōola sura kō-yēlga la lan mase se'em. ¹⁶ Zāage fu mēŋa la yetog-yooro n ka sōŋri Nawēnne doosgo puam, nēr-seba n tōgru yetog-bāma la zāaru me la Nawēnne wē'esa be'em puam. ¹⁷ Ba yetoga la ān wu nōr-keka n diti iŋa yāara se'em na. Ahimēni la Afileti boe la nēr-bāma puam. ¹⁸ Bāma burge me base sura sore la, yeti kūm vo'ore la pōn tole me, ba ēŋe bela base ti nēr-seba n bɔ sura la baseba n lebra poorum. ¹⁹ La baa bela, Nawēnne n looge seba la ken ze la kǎŋkǎŋe wu ēbre n taru pāŋa la. Yetog-bāna n de dāalgɔ n pa'ale bela: «Zuudāana la mi seba n de a nērba me», la «seba wuu n yeti bāma de la Nawēnne nērba la, dēni ti ba base tōon-be'ero».

²⁰ Yi-kāte puam, dagi sālma bu zūuro laasi mā'a n boe mī, dɔɔɔ la yɔgrɔ laasi mē boe mī me, ti ba dīke sālma la zūuro laasi la ti ba dena tuulum lɔgrɔ, dee dīke baseba la ti ba dena daare woo tōoma lɔgrɔ.

²¹ Bela mē, nēra sǎn zāage a mēŋa la tōon-be'ero seba ti mam pa'ale wā, a wun āna wu tuulum lɔkɔ n welge to'ore tara yōoro bɔ Zuudāana, dee tāna wun tōm tōon-sōma buuri wuu.

²² Zāage fu mēŋa la yel-yooro seba ti kombi'isi boori ti ba ita n de be'em na, dee ε sela n mase, ken bɔ Nawēnne sura, ε nōŋlum, la sū-mā'asum, dee lagum na nēr-seba n pu'usri ti Zuudāana la pupeelem na.

²³ Zāage fu mēŋa la nōke'en-yaalsi n ka taru vōore la. Fōn mi ti ba taru la zebre sēnna. ²⁴ La Zuudāana tōn-tōnna ka mase ti a zebra. La mase me ti a dena nēra n

nōŋe nērba, tāna wun zāsum nērba la sū-mā'asum.

²⁵ La mase ti a pa'ala nēr-seba n ka sakri la, la sū-bugsum, ti Nawēnne tā wun base ti ba teege yem me bānje sura, ²⁶ le yē yem sōŋɔ yese Asūtāana bērgɔ la puam, ti a daan taru ba ti ba ita ēŋa n boori se'em na.

Guuse fu mēŋa la dūnia ba'asgo wakate yela

3 Bāŋe ti dūnia ba'asgo wakate, la wun dena la too-go. ² Nērba wun dena la nōŋ-m-mēŋa dōma, la lig-nōŋruba, ba wun dena la nērba n wē'eri ba yō'oro, la pa'al-m-mēŋa dōma, la nērba n tōgru sela n ka ān sōŋa, la nērba n ka sakri ba sɔdōma la ba madōma nōore, la nērba n ka mi yel-sōnne ti ba ēŋe ba, la nērba toogo n ka boe la bōn-seba n de Nawēnne bōnɔ, ³ la nērba n ka nōŋe taaba, la nērba n ka taru nēra zīle, la gōŋgō'osri-ba, la nērba n ka taru ba mēŋa sōŋa, la nēr-tɔɔsi, la nērba n sisri sela n ān sōŋa, ⁴ la zām dōma, la nērba n ka yōkri ba mēŋa ita sela n ka mase tɔtɔ, la uk-m-mēŋa dōma, la nērba n nōŋe sela n ita bāma mēŋa sūure yēlum gānna Nawēnne. ⁵ Ba ita ti la āna wu ba sakri la Nawēnne, la ba ka sakri a pāŋa la. Zāage fu mēŋa la nēr-bāma buuri.

⁶ Ba nērba baseba kē'eri la yie puam pā'asra pɔg-seba yem n ka boe zē'a ayila la. Pɔg-bāma tōm na tōon-be'ero ti la dena zeero bɔ ba, ban boori se'em na n taru ba ye'ena, ⁷ ti ba zāsna wakate wuu dee ka tāna wun bānje sela n de sura la. ⁸ Nēr-bāma ka sakri sura, wu Azanesi la Azāmbresi n yuun ka sake bɔ Amoyisi se'em na. Ba de la nērba yem n burum, ti ba Nawēnne doosgo la lebege zāŋa. ⁹ La ba kǎn sēŋe nēŋa, se'ere n soe la, nērba wuu wun yē ba yalne na me, wu ban yuun yē Azanesi la Azāmbresi yelle se'em na.

¹⁰ La fōn mi bōn-seba ti mam zāsum nērba me, fu mi mam yel-ure, la mam yem loore n ān se'em me, la fu mi mam n bɔ Nawēnne sura se'em, la mam sū-mā'are, la mam nōŋlum, la mam n ze'ele kǎŋkǎŋe se'em, ¹¹ fu mi nērba n nāmse mam se'em, la toog-seba wuu n paage mam Antiyɔsi, la Ikonim, la Listri tēnsi puam Azezi iŋa. Bēm nāmsgɔ ti mam ka yē? La Zuudāana la fāage mam bela wuu puam me. ¹² La de la bela, nēr-seba wuu n boori ti ba vɔa wu Nawēnne n boori se'em Azezi-krisi doosgo puam, ba wun nāmse ba me. ¹³ La tōon-be'ero dōma, la seba n pā'asri nērba wun ken kē'era la tōon-be'ero puam pa'asra wē'esa, ba pā'asri la nērba, dee pā'asra ba mēŋa.

¹⁴ La sǎn dena fōn, tara bōn-seba ti fu zāsum dee sake ti la de la sura la kǎŋkǎŋe, fu mi nēr-seba zē'am ti fōn zāsum bōn-bāma. ¹⁵ Fōn pōn mina Nawēnne gōŋɔ la me hal fu bōnbɔ'ulum, ēŋa n tā wun bɔ fɔ yem, ti fu yē fāare fōn bɔ Azezi-krisi sura la iŋa. ¹⁶ Nawēnne gōŋɔ la wuu de la Nawēnne n boti ba gulse, a yōoro de la a zāsum nērba sura, la a boti nērba bāŋe ba kōŋre, la a kā'an nērba, la a pa'ale nērba ti ba ita sela n mase āna

sōja, ¹⁷ bela ti Nawēnne nēra wun mase, māasum tā'age tōm tōon-sōma buuri wuu.

Apoli tōge a ba'asgo yetoga bo Atimōti

4 Mam bo'oru fu nōore Nawēnne, la Azezi-krisi n wun wa'am wa di nēr-vɔɔsi, la nēr-seba n ki sarɔya la nējam, la ēn wun wa di a na'am na iŷā, ² ti fu mōole Nawēnne yetoga la. Nēba sǎn selsra, bu ba sǎn ka sel-sra, mōole le malun mōole wakate wuu. Tōge pa'ale ba ti ba bāŋe ba koŋre, gi ba, dee bo ba buraane ti ba ita sōja, ita bela wuu la sū-mā'asum dee tara zāsŋɔ putē'ere. ³ Se'ere n soe la, wakate n sēm ti nēba kǎn le boora ti ba selse sra zāsŋɔ la, ba wun dola la ba mēja yem n boori se'em, bela ba wun ɛera la karēnsāandō-ma zozo'e n wun zāsum ba sela ti ba nōŋe ti ba selse mā'a. ⁴ Ba wun li ba tuba me kǎn selsra sra la, dee wēge selsra sela n de solma. ⁵ La fōn, tara fu mēja sōja sela woo puam, sake nāmsgo, mōole Nawēnne kō-yēlga la, la fu tōm tōone na ti Nawēnne dɔke ēŋe fu nu'usum na sōja.

⁶ La sǎn dena mam, mam vom ǎn wu ko'om ti ba ka'age bo Nawēnne, mam daare paage me, ti mam wun fōrge. ⁷ Mam mē mēere sōja me yāŋe, mam zoe paage zua la tɛka me, la mam bo Nawēnne sra me ka base. ⁸ Leele wǎ, tā'are yɔɔɔ gǎ me gu'ura mam, ti Zuudāana n diti sarɔya wu lan mase la, wun dɔke bo mam daare ēja daare. La, la dagi mam mā'a, la de la nēr-seba wuu n nōŋe ē boora ti a leme wa'am na.

Apoli soolum Atimōti ti a wa'am

⁹ Mōrge wa'am mam zē'am tɔtɔ. ¹⁰ Se'ere n soe la, Ademasu base mam me dee sēŋe Tesaloniki, ēn nōŋe

dūnia wǎ bōn-yooro la iŷā. La Akresǎnsi sēŋe la Galati, ti Atiti mē sēŋe Dalmati, ¹¹ Aluki mā'a n weege mam zē'am. Fu sǎn sēna, fu tarɔ Amarkɔ wa'am, ti a tarɔ sōŋre me bo mam tōone na iŷā. ¹² Mam tōm Atisiki la Efɛɛzi. ¹³ Fu sǎn sēna, fu dɔke m ɔɔɔ fuugo la ti mam daan base Truasɔ Akarpusi zē'am na tarɔ wa'am, la fu dɔke gōnɔ na pa'ase, lan gǎnnɔ wuu gōn-seba ti ba gulse la dūnsi gǎna kilim na.

¹⁴ Alegsǎndri n de kuta la ēŋe mam na be'em halɔ zo-zo'e, Nawēnne wun yɔ ē ēn ēŋe se'em na. ¹⁵ Fu mē gu-use fu mēja la ē, ti a si'ise tōma yetoga la me zozo'e.

¹⁶ Mam n daan ze'ele sarɔyadia zē'am pɔspɔsi la, nēra nēra ka ze'ele mam poorum sōŋe mam, ba wuu base mam me. Nawēnne da geele ban ēŋe se'em na. ¹⁷ La Zuudāana la daan ze'ele mam poorum me sōŋe mam, bo mam pǎja halɔ ti mam mōole kō-yēlga la sōja sōja, ti bu-zǎŋsi zozo'e wōm. La mam daan yē fǎare me gɔŋe nōorum. ¹⁸ Zuudāana la n wun ken fǎage mam yese mam be'em wuu puam, kē'ese mam a so'olum na puam. Ŋja n soe nǎ'asgo wakate n ka ba'as-ri. Amina.

Pu'usgo

¹⁹ Pu'use Aprisili, la Akila, la A'onezifɔɔri yir-dōma.

²⁰ A'erastɔ weege la Korēntɔ. La Atrofim bē'eri me, ti mam base ē Miletɔ. ²¹ Mōrge wa'am dee ti ɔɔɔ wakate paage. A'ebulusi la Apudēnsɔ, la Alinusi, la Aklodia, la ti sobiisi la wuu pu'usri fɔ.

²² Ti Zuudāana wun bona la fɔ. Nawēnne wun ēŋe ya a yel-sōnne.

Atiti

Bilgre

Atiti de la Azezi karēmbia, a dagi Zifu. A daan doli la Apoli tōnna Nawēnne tōoma. Wakat-seka ti Apoli gulse gōŋɔ wā bɔ ẽ na, Atiti boe la Kretɩ bɩsra Azezi nērba yelle ti sela woo āna sōŋa.

Apoli dēŋɛ pa'alɛ la Azezi nērba nēŋadōma n mase ti ba āna se'em (sapitri 1).

A ken pa'alɛ Atiti la ɛn wun zāsum nērba buuri to'oto'ore n boe Wēndeego la puam se'em, la sǎn dɛna bōnkegsɩ, la pɔg-yǎ'asɩ (ti bāma mē zāsum pɔg-paalsɩ), la a zāsum bōnbɩ'ɩsɩ, la yamsɩ wuu (sapitri 2).

Dee pa'alɛ Azezi nērba n mase ti ba ita se'em, wun tā'age kē'era la taaba la sū-yēlum, ti nōke'ene, la welgre da bɔna ba tēŋasuka (3:1-11).

Gōŋɔ la ba'asgɔ, a pa'alɛ Atiti la ēŋa n boori ti a ēŋɛ se'em, dee pu'use ẽ (3:12-15).

¹ Mam Apoli n gulse gōŋɔ wā, mam de la Nawēnne yamŋa, la Azezi-krisi Tōntōnna ti a tōm ti m mōole a kō-yēlga ti seba ti Nawēnne looge la bɔ sɩra, dee bāŋɛ Nawēnne sɩra n pa'alɩ ban wun dɔla Nawēnne sore se'em. ² Ti tarɩ putē'ere ti ti wun yē la wɔm n ka ba'asɩ, ti Nawēnne n dagi pōmpɔrma la daan bīŋe nōore halɩ ti dūnia nǎn ka nāam. ³ La wakate n paage la, a puke bōn-ēŋa mɛ pa'alɛ a yetɔga puam, a dɩke a yetɔga la ēŋɛ la mam nu'usum ti m mōole bɔ nērba, wu Nawēnne n de ti Fāagra n bɔ nōore se'em na. ⁴ Mam n gulse gōŋɔ wā bɔ'ɔra Atiti n lebge mam mēŋa bia, tōma n lagum dɔla Azezi-krisi la īyǎ. Ti Sɔ Nawēnne, la ti Fāagra Azezi-krisi wun ēŋɛ fɔ a yel-sōnnɛ, dee bɔ fɔ a sū-mā'asum.

Atiti n wun tōm se'em Kretɩ

⁵ Mam n daan botɩ fu weege Kretɩ la, la de la fu malge bōn-seba n deege dɛna ba malge ba'ase la, la fu looge kēma tēŋa woo Nawēnne nērba puam wu mam n yele fu se'em na. ⁶ Kēema mase ti a dɛna la nēra n ka tarɩ dōrga, la a dɛna pɔg-yēŋa dāana, ti a kɔma bɔ Azezi-krisi sɩra, ka ita yooryooro, dee nanna nērba. ⁷ Dēnɩ ti nēŋadāana n bɩsɩ Nawēnne nērba yelle dɛna nēra n ka tarɩ dōrga, la a da dɛna pa'al-m-mēŋa dāana, bu sū-isgre dāana, a da dɛna dā-yūura, bu zebzebra, bu nēra n itɩ sela n ka mase yēta bōntarsōm. ⁸ La mase mɛ ti a ita sǎama sǎanɔ, la a dɛna nēra n nōŋɛ sela n ān sōŋa ɩrgɔ, la a tara putē'e-sōŋɔ, la a dɛna nēra n mase sela woo puam, la a dɛna pupeelem dāana, la a tāna a mēŋa yōkra. ⁹ La mase ti a tara sɩra zāsŋɔ la kǎŋkǎŋɛ, wu ban zāsum ẽ se'em na, ti a wun tā'age bɔ nērba buraanɛ ti ba dɔla sɩra zāsŋɔ la, dee tā'age pa'alɛ sɩ'ɩsɩba ti ba bāŋɛ ba kōŋɛ.

¹⁰ Se'ere n soe la, nērba zozo'e n boe dɛna sɩ'ɩsɩba, la yetɔg-yooro dōma, dee pā'asra nērba. Lan gǎnnɩ wuu,

nēr-bāma boe la Zifdōma n wātɩ la puam. ¹¹ La mase ti fu gu ba ti ba da tɔgra bela, ti ba zāsɩ nērba la sela n ka mase, wā'ara nērba baseba yie, ba zāsɩ sela n ka mase ɛera la bōntarsōm. ¹² Kretɩ dōma mēŋa bāŋra ayɩla yuun yetɩ: «Kretɩ dōma de la pōmpɔrndōma wakate wuu, la putuul-dōma āna wu we-dūnsɩ la, ba de la zēyāgsɩ dee tara puyā'anɛ.» ¹³ Yel-ēŋa de la sɩra, bela īyǎ, kǎ'an ba sōŋa sōŋa ti ba dɔla Nawēnne sɩra la sōŋa. ¹⁴ Yele ba ti ba base Zifdōma sɔlma, la bōn-seba ti nērba zagse sɩra dee bɔ nōore ti ba ita la. ¹⁵ Sela woo ān sōŋa mɛ bɔ nēr-seka n de pupeelem dāana, la seka n de tōon-dēgrɔ dāana ka sakra Nawēnne, sela sela ka boe n ān sōŋa bɔ ẽ. Ōŋa putē'ere, la a yem wuu ki mɛ. ¹⁶ Ba yetɩ bāma mi Nawēnne mɛ, la ba tōoma la pa'alɩ ti ba sɩ'ɩsɩ Nawēnne mɛ. Ba de la nēr-be'esi gǎŋɛ, la ba ka sakɩ Nawēnne nōore, dee ka tāna wun tōm tōon-sōŋɔ.

Zāsum nērba sɩra

² La fōn, zāsum nērba la bōn-seba n mase la sɩra zāsŋɔ la. ² Zāsum bura-yǎ'asɩ ti ba tara ba mēŋa sōŋa, ba dɛna nērba ti ba nannɩ, ba tara putē'e-sōŋɔ, la ba dɛna nērba n doli Nawēnne sɩra la sōŋa, ba tara nōŋlum, dee dɛna nērba n mā'age ba sūure sēnna nēŋa.

³ Yele pɔg-yǎ'asɩ ti ba yel-ɩre puam ba dɛna pupeelem dōma, la ba da dɛna gōŋgō'osɩba, ba da dɛna nērba n dɩke ba mēŋa bɔ dāam. Ba pa'ala sela n ān sōŋa, ⁴ ba pa'ala pɔg-bɩ'ɩsɩ ti ba nōŋɛ ba sɩrba, la ba kɔma, ⁵ ti ba tara putē'e-sōŋɔ, ti ba da ita dēgrɔ, ti ba dɛna pɔg-mēnsɩ, la pɔg-sōma, ti ba sakra ba sɩrba, ti nērba da pɔ'ɔge Nawēnne kō-yēlga la.

⁶ Kǎ'an kɔmbɩ'ɩsɩ la mē ti ba tara ba mēŋa sōŋa sela woo puam. ⁷ Fōn mēŋa botɩ fu yel-ɩre wuu āna sōŋa, pa'alɛ ba ban wun āna se'em, la fu zāsum nērba

Nawēnne yetɔga la sɪra, la ninmō'ore. ⁸ La fu tɔgra sɪra tɪ ba da tã'age zerge fɔ, tɪ yānne wun yōke seba n sɪ'ɪsrɪ la, ban kãn yē sela n de be'em tɪ zē'am tɔge la ãyã.

⁹ Yele yamsɪ tɪ ba sakra ba zuudãandōma sela woo puam, ita ba sūure yēlum, ba da zagse ba nōore, ¹⁰ la ba da zūura ba lɔgrɔ. Ba tōnna tōon-sōma pa'ale tɪ bāma de la sɪra dōma, bela tɪ Nawēnne n de tɪ Fāagra zāsɪɔ la wun yēta pēka sela woo puam.

¹¹ Bēm ãyã, Nawēnne botɪ tɪ bāɲe a yel-sōnne la n de fāare bɔ nērsaalba wuu la mē. ¹² A zāsɪ tōma tɪ tɪ base la sela n ka dolɪ Nawēnne sore, la dūnia nēba n boorɪ sela la, dee vɔa dūnia wã zuo la putē'e-sōɲɔ, la sɪra, dee dɔla Nawēnne sore sōɲa. ¹³ Bela tɪ tɪ wun tara putē'ere gu'ura sū-yēlga daare la, daar-ēɲa Azezi-krisi n wun leme wa'am la a na'am pāɲa. Ēɲa n de tōma Nawēnne, la tɪ Fāagra. ¹⁴ Ēɲa n dɪke a vɔm bɔ tōma ãyã, tɪ a fāage tɔ tōon-be'ero wuu puam, dee base tɪ tɪ malge āna sōɲa dena a mēɲa nēba, mōrge tōnna tōon-sōma.

¹⁵ La de la bela tɪ fu wun zāsum ba, bɔ ba buraane, dee kã'an ba. Ēɲe bela la nōore seka tɪ fu tarɪ la. Da base tɪ nēra pɔ'ɔge fɔ.

Nawēnne nēba yel-ɪre n wun āna se'em

3 Tēege ba wuu yetɪ la mase mē tɪ ba nanna tēɲa la nēɲadōma, la ke'endōma dee sakra ba nōore, dee tōnna tōon-sōma buuri wuu. ² Ba da tɔgra nēba be'em, ba da dena zebzebrɪba, la ba dena nēba n tarɪ sū-mā'asum, dee ita sū-bugsum la nēba wuu.

³ Tōma mē daan de la nēba n ka mi sela, la sɪ'ɪsrɪba, la nēba n burge ka dɔla sɪra sore, tɪ tōma yemleego, la bōn-yooro tɪ tōma boorɪ la sɔna tōma. Tōma daan vɔa la putuulɔ puam, ita sūure la tɪ taaba bōnɔ, dee dena nēba tɪ ba ka nōɲe, dee sɪsra taaba.

⁴ La Nawēnne n de tɪ Fāagra la n wa pa'ale nērsaalba a yel-sōnne, la a nōɲlum na, ⁵ a fāage tɪ mē, la, la dagɪ tun tōm tōon-sōma ãyã, la de la a mēɲa ninbāal-zua ãyã tɪ a fāage tɔ. A botɪ a Sɪa la n peege tōma sūure dēgrɔ botɪ tɪ lebge nēr-paalsɪ tara vɔm paalga. ⁶ La de la Azezi-krisi n de tɪ Fāagra la ãyã, tɪ Nawēnne bɔ tɔ a Sɪa la sōɲa sōɲa, ⁷ tɪ a yel-sōnne na botɪ tōma mase a nēɲam, lebge a kɔma wun yē vɔm n ka ba'asɪ tɪ tōma tarɪ putē'ere gu'ura la.

⁸ Yetɔg-ēna de la sɪra. Bela tɪ mam bɔɔra tɪ fu mōrge pa'ale ba yel-bāma, tɪ nēr-seba n bɔ Nawēnne sɪra la mōrge tōnna tōon-sōma. Yel-bāma n ān sōɲa dee tara yōorɔ bɔ'ɔra nēba. ⁹ La sãn dena nōke'en-yooro, la yaabdōma deto kãalɔ, la nōke'ema wē'a Zɪfdōma lɔɔ la yela, zāage fu mēɲa la bōn-bāma, se'ere n soe la, ba ka tarɪ yōorɔ, ba de la zãɲa. ¹⁰ Nēra sãn tara welgre sēnna, fu kã'an ē nōore ayi, tɪ a sãn ken zagse, fu base ē, la ya da le tara yetɔga la ē. ¹¹ Tɪ fu mi tɪ nēr-ēɲa buuri burge mē base sɪra sore, dee tōnna tōon-be'ero n pa'alɪ tɪ a kãn yē buurɔ.

Ba'asɔ yetɔga, la pu'usɔ

¹² Mam wun tōm na Artemasɪ bu Atisiki fu zē'am, a sãn wa'am, fu narge pāɲa wa'am mam zē'am Nikopoli, tɪ mam looge yem tɪ m bɔna la bilam tɪ ɔɔɔ wakate tole. ¹³ Mōrge bɪse Azenaasɪ n de yetɔg-mita, la Apolɔsɪ sore sēnne na yelle, tɪ sela da pɔ'ɔge ba. ¹⁴ Tōma nēba la mase mē tɪ ba zāsum tōnna tōon-sōma tɪ la sōɲe seba n boorɪ sōɲe la, dee da vɔa vɔm n ka tarɪ yōorɔ.

¹⁵ Nēr-seba n boe la mam na wuu pu'usɪ fɔ. Pu'use nēr-seba n bɔ Azezi sɪra nōɲe tōma la.

Nawēnne yel-sōnne wun bɔna la ya wuu.

Afilmõ

Bilgre

Afilmõ yuun de la nēr-kāte n bɔ Azezi sɪra bɔna Kolɔsɪ Wēndeego la puam, a de la Apolɪ sɪrɛ. La de la Apolɪ n pa'alɛ ẽ Nawēnne sɪra, tɪ a sakɛ.

Afilmõ yuun tarɪ la yamɲa yu'urɛ n de A'onezim, tɪ a zoe fōrge dee base ẽ.

Apolɪ n boe yu'a deem wakat-seka la, tɪ A'onezim sēɲɛ a zē'am. Tɪ Apolɪ tɔge Nawēnne yetɔga bɔ ẽ, tɪ a bɔ Azezi sɪra. Bɛla poorum tɪ Apolɪ yele ẽ tɪ a lebe a zuudāana la zē'am.

Bɛla tɪ a gulɛ gōɲɔ wā bɔ a sɪrɛ Afilmõ sose ẽ tɪ a base sɛla wuu tɪ A'onezim ẽɲɛ la taalɛ. Se'ere n soe la, wakat-ẽɲa, yamɲa sān zoe fōrge, tɪ a zuudāana la le yē ẽ, a wun botɪ a yē la nāmsgɔ zozo'e. Bɛla tɪ Apolɪ sose Afilmõ tɪ a da le to'oge ẽ wu a yamɲa mā'a, a bɪsɛ ẽ wu a de la a sɔbia Azezi-krisi ĩyā.

¹ Mam Apolɪ n boe yu'a deem Azezi-krisi yelle, la tɪ sɔbia Atimōtɪ n gulɛ gōɲɔ wā bɔ'ɔra tɪ sɪr-sōɲɔ Afilmõ n de tɪ tōntōn-tadāana, ² la tɪ tā Aplɪ, la Arsipi n lagum na tōma yē nāmsgɔ Azezi tōoma puam na, la Nawēnne nērba la n lagsɪ fu yire puam na. ³ Tɪ Sɔ Nawēnne, la tɪ Zuudāana Azezi-krisi wun ẽɲɛ ya yel-sōnne, dee bɔ ya sū-mā'asum.

⁴ Mam pu'usɪ Nawēnne daare woo a yel-sōnne mɛ, dee tēra fu yelle m pu'usɔ puam ka basra. ⁵ Se'ere n soe la, mam wōm ban tɔgrɪ fōn bɔ tɪ Zuudāana Azezi sɪra se'em, la fōn tarɪ nōɲlum Nawēnne nērba la wuu ĩyā se'em. ⁶ Mam sosɪ Nawēnne tɪ fōn lagum na tōma bɔ Azezi-krisi sɪra la wun sēnna nēɲa, a wun base tɪ fu bāɲɛ bōn-sōma seba wuu tɪ tɪ tarɪ Krisi doosgo puam. ⁷ M sɔbia, fu nōɲlum na bɔ mam sū-yēlga zozo'e mɛ, dee bɔ mam buraanɛ, fōn botɪ Nawēnne nērba la wuu sūure mā'age la ĩyā.

⁸ Bɛla tɪ baa mam n tarɪ nɪ nōore wun yele fo tɪ fu ẽɲɛ se'em Krisi ĩyā la, mam ka ẽɲɛ bɛla, ⁹ mam sosɪ fu la nōɲlum. La de la mam Apolɪ n de bura-yā'aɲa, mam boe la yu'a deem lɛɛɛ wā Azezi-krisi yelle. ¹⁰ Mam sosɪ fu la A'onezim tɪ mam boe yu'a deem tɪ a sakɛ Azezi lebge mam bia la ĩyā. ¹¹ Kurum, a daan ka tarɪ yōorɔ bɔ fɔ, la lɛɛɛ wā a yāɲa tarɪ yōorɔ mɛ bɔ fōn na mam.

¹² Mam lebe tōnna ẽ na fōn zē'am, mam nōɲɛ ẽ na m sūure wuu. ¹³ Mam boorɪ nɪ tɪ a bɔna la mam zē'am to'oge fōn zē'a sōɲra mam, mam n ken bɔna yu'a deem Nawēnne kō-yēlga la ĩyā la. ¹⁴ La mam ka boorɪ

tɪ m ẽɲɛ sɛla tɪ fōn sān ka sakɛ, tɪ la da kān dɛna mam mōrge fu mɛ tɪ fu ẽɲɛ mam yel-sōnne, la dɛna fu mēɲa n boorɪ se'em.

¹⁵ Tā tɪ A'onezim n daan base fōn dee fōrge wakate fēe la, la de la tɪ fu le to'oge ẽ tɪ a bɔna la fu wakate wuu. ¹⁶ La a ka le dɛna fu to'oge ẽ tɪ a dɛna fu yamɲa mā'a, a gānnɪ yamɲa mɛ, a yāɲa de la sɔbi-nōɲɛ. Mam nōɲɛ ẽ mɛ halɪ zozo'e, la fōn wun nōɲɛ ẽ gānna, se'ere n soe la, a de la fu yamɲa dee ken dɛna fu sɔbia Zuudāana doosgo puam.

¹⁷ Bɛla, fu sān dɛna mam sɪrɛ, fu to'oge ẽ wu fōn wun to'oge mam mēɲa se'em na.

¹⁸ La a sān ẽɲɛ fu tuuge, bu a sān tara fu sānne, base tɪ la dɛna mam sānne. ¹⁹ Mam Apolɪ n gulɛ wāna la mam mēɲa nu'ugo yetɪ: Mam wun yɔ fɔ. Mam kān tēegɛ fɔ tɪ fu mēɲa tarɪ mam sānne, la de la mam n sōɲɛ fɔ tɪ fu yē vɔm. ²⁰ Ẽe, m sɔbia, ẽɲɛ yel-ēna bɔ mam, Zuudāana la ĩyā. Botɪ m sūure mā'age Krisi ĩyā.

²¹ Mam n mi tɪ fu wun ẽɲɛ mam n boorɪ se'em na ĩyā tɪ mam gulɛ bɔ fɔ, la mam mi tɪ fu wun pōn ẽɲɛ gāɲɛ mam n yele fu se'em na mɛ.

²² La mam sosɪ tɪ fu ken māasum gā'argɔ zē'a bɔ ma, tɪ mam tarɪ putē'ere tɪ yāma n pu'usɪ Nawēnne na ĩyā, ba wun base mam tɪ m leme wa'am ya zē'am.

²³ A'epafrasɪ n lagum na mam bɔna yu'a deem Azezi-krisi yelle la pu'usɪ fɔ. ²⁴ La mam tōntōn-taaba, Aluki la Amarkɪ, la Aristarkɪ, la Ademasɪ mē pu'usɪ fɔ. ²⁵ Tɪ Zuudāana Azezi-krisi yel-sōnne wun bɔna la ya.

Ebre

Bilgre

Ebre de la Zifdōma yu'ure ayēma. Nēr-seka n gulse gōn-ēna wā la, gulse bɔ la nērba n nāmsrɪ zozo'e, ban bɔ Azezi sɪra ɪyā. A daan gulse bɔ ba yetɪ ba da base Nawēnne sore doosgo, ba yē buraane ze'ele kǎŋkǎŋe, la ba bǎŋe tɪ Zuudāana Azezi n gǎnnɪ sela woo.

Gōŋɔ la pa'ale ba me tɪ ba bǎŋe tɪ Nawēnne doose la a Dayua Azezi-krisi puke a mēŋa pa'ale nērsaalba. Azezi n gǎnnɪ wuu, ēŋa n gǎnnɪ Nawēnne nōtɔ'ɔsrɪba seba n yuun boe la, la Nawēnne malegsɪ, la Amoyisi, la Azoze (sapɪtrɪ 1-4).

Azezi n gǎnnɪ kǎabgo kēma n yuun boe la wuu, a de la Nawēnne kǎabgo kēma nējadāana n boe wakate wuu. ēŋa n gǎnnɪ Nawēnne kǎabgo kēma wuu la, ēŋa n yesrɪ nērba ba tōon-be'ero, la kūm puam, botɪ ba yēta fāare sɪra sɪra. Dūnsɪ tɪ lsrayelɪ dōma yuun ēn yōge kǎabe bɔ Nawēnne na, la de la Azezi-krisi kūm māmsgɔ (sapɪtrɪ 4-10).

Gōŋɔ la ba'asgo a bɔ nērba la buraane yetɪ ba ken sēŋe nēŋa Nawēnne sore doosgo puam. Dee pa'ale kurum kurum Nawēnne nērba baseba n bɔ Nawēnne sɪra se'em, dee kǎ'an nēr-seba n wun karēŋe gōŋɔ wā la, yetɪ ba te'ege Azezi mā'a, ba bɪsra ēŋa tɪ ba dolɪ la, la ba sūure wuu. La ba sake toogo, la nāmsgɔ, ze'ele kǎŋkǎŋe tarɪ ka paage ba'asgo (sapɪtrɪ 10-13).

Nawēnne doose la a Dayua tɔge la tōma

¹ Kurum, Nawēnne yuun botɪ a nōtɔ'ɔsrɪba n tɔge nōore zozo'e bɔ tɪ yaabdōma, la yetɔga buuri to'oto'ore. ² La lēle wā n de ba'asgo wakate la, Nawēnne botɪ a Dayua la n tɔge bɔ tɔ. La doose la ēŋa tɪ a nāam dūnia la saazuum wuu, la a botɪ ēŋa n sɔna sela woo. ³ ēŋa n tarɪ Nawēnne na'am pǎŋa wa pa'ale tɔ, a ān wu Nawēnne mēŋa n ān se'em na. La a yetɔga la tarɪ pǎŋa me botɪ sela woo bɔna a zē'a. ēŋa n yese nērsaalba tōon-be'ero tɪ ba lebge sōŋa la poorum, a sēŋe ka zēa la Naba Wēnne zuugo saazuum-zuum. ⁴ Tɪ Nawēnne zēke ē tɪ a gǎnna malekadōma halɪ zozo'e dee bɔ ē yu'ure n gǎnnɪ malekadōma yu'ura.

Nawēnne Dayua Azezi-krisi n gǎnnɪ malekadōma

⁵ Nawēnne ka yele maleka baa ayɪla yetɪ:
«Fōn de mam Dayua,
zīna mam lebge la fu sɔ.»
La a ken ka yele maleka yetɪ:
«Mam n wun dena fu sɔ,
tɪ fu dena mam Dayua.»
⁶ La ēn daan tōm a bi-kēŋa la dūnia puam na, a yele yetɪ:
«Dēnɪ tɪ malekadōma wuu nǎ'asra ē.»
⁷ La sǎn dena malekadōma la yelle, a tɔge yetɪ,
ba de la ēŋa tōntōnɪba,
ēŋa base tɪ ba āna wu kusebgo la,

dee base tɪ ba āna wu bug-zɪlɪsɪ la.

⁸ La a yele a Dayua la yelle yetɪ:

«Fōn de la Nawēnne,
fu na'am na wun bɔna la wakate n ka ba'asrɪ.
Fu wun sɔna fu so'olum na la sɪra.

⁹ Fōn nōŋe la sela n mase,
dee sisra be'em.
Bela n soe tɪ fu Nawēnne welge fu to'ore,
bɔ fu pēka, la sū-yēlga gǎnna baseba wuu.»

¹⁰ Dee ken yetɪ:

«Zuudāana, fōn nāam tēŋa halɪ pī'iluŋo wakate,
la saazuum wuu de la fōn nu'usi tōoma.

¹¹ Ba wuu wun sā'am me,
la fōn wun weege bɔna.

Ba wun kurge
wu fuugo n kurgrɪ se'em na.

¹² Fu wun lobe ba base
wu fuugo tɪ ba kilim lobe base la.
Bōnɔ wuu wun teege
wu ban teerɪ fu-keka la.
La fōn, fōn de la fōn de se'em na ka tēera,
fōn yuuma ka tarɪ teka.»

¹³ Nawēnne ka yele maleka baa ayɪla yetɪ:

«Zī'ire m zuugo, halɪ tɪ m wa base
tɪ fu be'eba bɔna fu nāma tēŋa.»

¹⁴ Malekadōma de la bēm? Ba de la susɪ n tōnnɪ bɔ'ɔra Nawēnne, tɪ Nawēnne tōnna ba, tɪ ba sōŋra nēr-seba n de ba yē fāare la.

Da zagse-ya Nawēnne fāare

2 Bela n soe ti la mase ti tōma gure yetōga la ti ti wōm na sōṇa sōṇa, ti ti da burge. ² Malekadōma n yuun tōge yetōg-seba kurum na ēṇe ba tōone me, nēr-seba n si'ise ka sake ba la, yē sibgre seka n mase ti ba yē la me. ³ La sǎn dena bela, tōma sǎn pɔ'oge Nawēnne fāare kǎte ēna, tōma wun ēṇe la wāne pōse sibgre? Zudāana mēṇa n daan pōn dēṇe mōole fāare ēṇa yelle, ti nēr-seba n wōm na pa'ale tōma ti la de la sira. ⁴ Ti Nawēnne mēṇa mē tōm tōon-yālma, la yel-kursi, la bōn-yālma buuri wuu to'oto'ore, dee bɔ nērba a Sia pǎṇa wu ēn boori se'em, pa'ale ti la de la sira.

Azezi n tarɔ fāare wa'am

⁵ La dagɔ malekadōma ti Nawēnne yetɔ ba sɔna dūnia seka n sēm ti tōma tɔgra a yelle la. ⁶ La nēra n tōge Nawēnne gōṇṇa la puam zē'a ayēma yetɔ:

«Nērsaala de la bēm

ti fōn tēra a yelle?

Nērsaala bia de la bēm

ti fōn bɔsra a yelle?

⁷ Fōn base me ti a ka paage

malekadōma wakate fēe mā'a,

dee yǎṇa nǎ'ase ē,

bɔ ē na'am pǎṇa la pēka.

⁸ Fōn base me ti a sɔna sela woo.»

Lan yetɔ Nawēnne base ti sela woo sakra nērsaala la, a ka base ti sela weege ka sakra ē. La, lan de se'em na, tōma nǎn ka yetɔ ti sela woo sakra ē. ⁹ La tōma yē ti la de la Azezi ti Nawēnne sike ti a ka paage malekadōma wakate fēfēe, dee yǎṇa nǎ'ase ē, bɔ ē na'am pǎṇa la pēka ēn nāmse ki la iŷā. La de la Nawēnne yel-sōnne iŷā, ti a ki nērsaalba wuu iŷā. ¹⁰ Nawēnne n de seka n base ti sela woo bɔna, dena a bōnɔ na, la mase la ēṇa yem n boori se'em ti a botɔ Azezi nāmse, ēṇe sela woo ba'ase, fāage nērba, tarɔ a kɔma zozo'e sēṇe a na'am pǎṇa zē'am.

¹¹ Azezi n malgrɔ nērba ti ba dena pupeelem dōma, la seba ti a malge ti ba dena pupeelem dōma la lagum tara la sɔ ayɔla. Bela n soe ti a ka zɔta yǎnne ti a wi ba ti a sɔbiisi. ¹² Bela ti a yeke Nawēnne yetɔ:

«Mam wun tōge fu yelle m sɔbiisi zē'am,
mam wun nǎ'ase fɔ ba lagsɔ zē'am.»

¹³ Dee le yetɔ:

«Mam wun dɔke m sira wuu bɔ la Nawēnne.»

Dee ken yetɔ:

«Mam n wāna,

mam na kɔm-seba ti Nawēnne bɔ mam na.»

¹⁴ Kɔma la ti a tɔgrɔ la n de nērsaalba tara iŷā la zum na, bela ti Azezi mē lebge nērsaala wu bāma la ki, ti a kūm na sǎ'am Asūtāana n de seka n base ti nērba kiira la pǎṇa. ¹⁵ La de la bela ti a ēṇe fāage seba ti kūm

dabeem tarɔ ba botɔ ba āna wu yamsɔ ba wɔm na wuu puam na base. ¹⁶ La dagɔ malekadōma ti a wa'am ti a sōṇe, la de la Abraham yɔsɔ la ti a wa'am ti a sōṇe.

¹⁷ Bela n soe ti la daan mase ti a lebge nērsaala āna wu a sɔbiisi la sela woo puam, tā'age dena ba kǎabgɔ kēma nēṇadāana n de ninbāal-zɔta, dee dena sira dāana Nawēnne tōoma puam. A ēṇe la bela yese nērba tōon-be'ero, naage ba la Nawēnne. ¹⁸ Azezi mēṇa n daan yē nāmsoɔ wakate seba ti Asūtāana make ē bɔse la, a tā wun sōṇe nēr-seba n yetɔ nāmsoɔ la me, bɔ ba pǎṇa.

Azezi-krisi n gǎnnɔ Amoyisi

3 Bela m sɔbiisi, yāma ti Nawēnne wi ti ya welge to'ore dena a nērba la, bɔsra-ya Azezi, ēṇa n de seka ti Nawēnne tōm, la ēṇa n de tōma kǎabgɔ kēma nēṇadāana Nawēnne sore doosgo la puam. ² A de la sira dāana seka n looge ē na zē'am, wu Amoyisi n yuun de sira dāana se'em Nawēnne nērba la puam na. ³ La mase me ti Azezi yē nǎ'asgo gǎnna Amoyisi halɔ zozo'e, wu de-mēta n yetɔ pēka gǎnna deego la mēṇa se'em na. ⁴ Asira, deego woo de la nēra n mē ē, la sela woo mēta de la Nawēnne. ⁵ La sǎn dena Amoyisi, a yuun de la tōntōnna n de sira dāana Nawēnne nērba n ān wu deego la puam, dēṇe tōge sela n wun wa tōge la yelle. ⁶ La Krisi de la Nawēnne Dayua n de sira dāana sɔna deego la. A deego la de la tōma, tōma sǎn ze'ele kǎṇkǎṇe la buraane, dee tara putē'ere gu'ura sela ti ti bɔ sira la, la sū-yēlga, ka paage ba'asgo.

Nawēnne wun bɔ a nērba vo'osgo

⁷ Bela, sake-ya Nawēnne Sia n yeke se'em yetɔ:

«Zina, ya sǎn wōm Nawēnne kōa,

⁸ ya da ke'em ya sūure,

wu ya yaabdōma n yuun ke'em ba sūure si'ise Nawēnne nōore se'em, make ē bɔse weem na.»

⁹ Nawēnne yetɔ:

«Bilam, ya yaabdōma yuun make mam me bɔse, baa ban yuun yē mam tōoma yuuma pinaasi la.

¹⁰ Bela ti mam sūure yuun yīige la zamāan-ēṇa nērba. Ti mam yetɔ: «Ba putē'era la botɔ ba tuura me wakate wuu,

ti ba ka dɔla mam sore.»

¹¹ Mam sū-yīire la puam, mam pɔɔ me yetɔ:

«Ba kǎn malun kē zē'e-seka ti mam yetɔ m bɔ ba ti ba yē vo'osgo la.» »

¹² M sɔbiisi, guuse-ya ya mēṇa ti ya nēr-seka da tara putē'e-be'ero n wun base ti a ka bɔ Nawēnne sira, ti bōn-ēṇa base ti a welge la Nawēnne n de wɔm dāana la. ¹³ La bɔ'ora-ya taaba buraane daare woo, wu Nawēnne n tɔgrɔ la tōma zina se'em na, ti ya nēr-seka da ke'em a sūure ti tōon-be'ero base ti a tuuge. ¹⁴ Tōma sǎn ze'ele kǎṇkǎṇe wu tōma n bɔ sira se'em

ῥῶσῳσῑ la ka paage ba'asgo, ti wun lagum na Krisi to'oge pure.

¹⁵ Bela ti la yele Nawēnne gōṅṅ puam yeti:

«Zīna, ya sǎn wōm Nawēnne kōa,
ya da ke'em ya sūure,
wu ya yaabdōma n yuun ke'em ba sūure si'ise
Nawēnne nōore se'em na.»

¹⁶ Seba n yuun wōm Nawēnne kōa dee si'ise a nōore la de la bǎna? Ba de la nēr-seba wuu ti Amoyisi yuun tarī Ezipti tēṅa yese la. ¹⁷ Seba ti Nawēnne sūure yuun yīige la ba yuuma pinaasi la de la bǎna? Ba de la seba n yuun tōm tōon-be'ero ki weego puam na. ¹⁸ Seba ti a yuun pɔɪ yeti ba kǎn kē zē'e-seka ti a yeti a bɔ ba ti ba yē vo'osgo la de la bǎna? Ba de la seba n si'ise la. ¹⁹ La tōma yē ti ba yuun ka yāṅe kē, ban ka bɔ Nawēnne sira la iŷā.

4 Nawēnne n bīṅe a nōore ti ti kē a vo'osgo zē'am na ken bɔna mē, bela ti guuse, ti ba'asgo ya nēr-seka da wa yē ti a koṅe ka kē. ² Se'ere n soe la, tōma mē wōm Nawēnne kō-yēlga la wu nēr-bǎma n wōm se'em na. La bǎma zē'am, yetoga la ti ba yuun wōm na ka tarī yōoro bɔ ba, bēm iŷā, seba n wōm na ka bɔ sira. ³ La tōma seba n bɔ ē sira la, tōma wun kē vo'osgo la zē'am ti a yuun yeti:

«Mam sū-yīire la puam, mam pɔɪ mē yeti,
ba kǎn maln kē zē'e-seka ti mam yeti m bɔ ba ti ba yē vo'osgo la.»

Nawēnne n yele bela la, ti a dēṅe pōn tōm a tōoma wuu ba'ase mē halī lan pɔse dūnia nāaṅṅ wakate. ⁴ La gulse Nawēnne gōṅṅ puam zē'a ayila tɔge dabsa ayopɔɪ daare la yelle yeti:

«Nawēnne nāam sela woo ba'ase,
dee vo'ose la dabsa ayopɔɪ daare.»

⁵ La zē'e-ēna wǎ la ken tɔge yeti:

«Ba kǎn maln kē zē'e-seka ti mam yeti m bɔ ba ti ba yē vo'osgo la.»

⁶ Nēr-seba n yuun wōm Nawēnne kō-yēlga la pɔspɔsi la ka kē, ban ka sake la iŷā. La dēni ti nērba kē. ⁷ Bela ti Nawēnne le looge daare ayēma ti ba wi'iri ti zīna. Ti yaabdōma n si'ise Nawēnne na, yuuma zozo'e n tole ti a boti Adavidi tɔge wu lan pōn gulse se'em na yeti:

«Zīna, ya sǎn wōm Nawēnne kōa,
ya da ke'em ya sūure.»

⁸ Azoze yuun sǎn tarī nī ba paage la vo'osgo asira sira zē'am, Nawēnne kǎn le tɔgra vo'osgo daare ayēma yelle. ⁹ Bela, vo'osgo n ken bɔna Nawēnne nērba la iŷā, wu Nawēnne n vo'ose dabsa ayopɔɪ daare la. ¹⁰ Se'ere n soe la, nēr-seka n kē Nawēnne vo'osgo la zē'am, mē basri a tōoma mē dee vo'osra, wu Nawēnne n ba'ase a tōoma dee vo'ose se'em na.

¹¹ Bela, ti wisge ti mēṅa yē vo'osgo ēna, ti guuse ti nēra baa ayila da doose si'isgo la sore koṅe ka kē.

¹² Nawēnne yetoga la vɔa mē, tara pǎṅa, dee tara nōore gǎnna sukɔbgɔ n saase tara nōa bayi. A kē'eri la

nēra puam mina a sia, la a sūure yela wuu bɔkra, dee mina a putē'ere, la a yem wuu n ān se'em, wu su'a n welgrī kōb-suglsi paara kōb-sōom na. ¹³ Sela baa ayila ka boe n sugē ti Nawēnne ka yēta. Bōn-seba ti a nāam na wuu de la vēelsi a zē'am. La de la ēṅa n de seka ti ti wun ze'ele a nēṅam tɔge ti yela wuu bɔ ē.

Azezi-krisi n gǎnni kǎabgo kēma wuu

¹⁴ Tōma tarī la kǎabgo kēma nēṅadāana n de Nawēnne Dayua Azezi n zom saazuum Nawēnne yire. Bela, ti ze'ele-ya kǎṅkǎṅe Nawēnne sore la doosgo puam. ¹⁵ Ti tarī la kǎabgo kēma nēṅadāana n tarī ti zīile ti tɔrgo puam, se'ere n soe la, a yē nāmsgo mē sela woo puam wu tōma la, la a ka tōm tōon-be'ero. ¹⁶ Bela, base-ya ti ti lem Nawēnne n de yel-sōnnē dāana la na'am bīm-bīnne na zē'am la buraane, ti a zoe ti ninbāalga ēṅe ti yel-sōnnē, dee sōṅe tɔ wakat-seka ti ti boori.

5 Nawēnne kǎabgo kēma nēṅadāana woo, ba loori ē na nērsaalba puam ti a tōnna bɔ'kra Nawēnne, nērba iŷā. ēṅa n bɔ'kri Nawēnne bɔ'a, dee kǎabra bɔ'kra ē ba tōon-be'ero iŷā. ² A tā wun wōm seba n ka mi, la seba n tuuri la vōore mē zoe ba ninbāalga, ēṅa mēṅa n boe tɔrgo puam na iŷā. ³ La de la bela iŷā, ti la dēna a kǎabe bɔ Nawēnne a mēṅa tōon-be'ero, la nērba la tōon-be'ero iŷā. ⁴ Nēra ka tā wun nǎ'ase a mēṅa dīke tōon-ēna bɔ a mēṅa dēna kǎabgo kēma nēṅadāana, la de la Nawēnne n loori, wu ēn yuun looge Aarō se'em na.

⁵ Bela mē, la dagi Krisi mēṅa n ē nǎ'asgo lebge kǎabgo kēma nēṅadāana, la de la Nawēnne n looge ē yele yeti:

«Fōn de mam Dayua,
zīna mam lebge la fu So.»

⁶ Dee le yele zē'a ayēma yeti:

«Fu de la kǎabgo kēma wakate wuu iŷā,
wu Amelkisedeki n ān se'em na.»

⁷ Azezi-krisi n daan boe dūnia wǎ wakat-seka la, a pu'use mē sose Nawēnne n de seka n tā wun fāage ē kūm puam base la, belem ē na nintām. Ti Nawēnne lerge a sosgo, a sik-m-mēṅa la puam. ⁸ Baa la ēn de Nawēnne Dayua la, nāmsgo la puam a bǎṅe sakre n de sela mē. ⁹ La ēn daan tōm Nawēnne n boori se'em wuu ba'ase la, a lebge la seka ti nēr-seba wuu n sakri a nōore la yēti fāare n ka tarī ba'asgo a zē'am. ¹⁰ Bela ti Nawēnne yele yeti, a de la kǎabgo kēma nēṅadāana wu Amelkisedeki n ān se'em na.

Sēṅe-ya nēṅa Nawēnne doosgo la puam da base

¹¹ Yela zozo'e ti tōma tarī wun tɔge yel-ēṅa yelle, la, la tɔ mē ti mam pa'ale ya a vōore ti ya wōm, se'ere n soe la, yāma lebge la mā'asga ka wōnna sela vōore tɔtɔ.

¹² Lan yuuge paage se'em wǎ, la seke nī mē ti yāma lebge karēnsāandōma pa'ala nērba baseba. La baa

bela, yāma ken boora ti ba zāsna ya la Nawēnne pɔspɔsi yela n de nāana, wu koma n boori bī'isum dee ka boora di-ke'ene na. ¹³ Nēr-seka n ken āna wu bia n mōgru bī'isum na, a nān ka tā wun bānje sela n mase, la sela n ka mase yelle bōke. ¹⁴ La seba n de bōnkegsi la diti la di-ke'ene, bāma n de seba n zāsum mina sela n ān sōja, la be'em bōkra.

6 Bela, ti sēje-ya nēja zāsum bōnkegsi zāsja, dee base Krisi pɔspɔsi yela la zāsja ti ti dēje mina la. Ti kǎn le zāsna pī'ilunjo yela la n de ti teege yem base tōon-be'ero n sēm na kūm, la ti bɔ Nawēnne sira, ² la ko'om misga zāsja, la ban pagli nu'usi nērba zuto pu'usra yelle, la kūm vo'ore, la dūnia ba'asgo sarlyadia yelle. ³ Ti wun ēje se'em n bela, ti sēje nēja, Nawēnne sǎn sake.

⁴ Nēr-seba n bānje Nawēnne sira bɔna peelem puam, yē Nawēnne yel-sōnne, to'oge Nawēnne Sia pāja, ⁵ bānje Nawēnne yetɔga n ān sōja se'em, dee mina dūnia seka n sēm na pāja n ān se'em, ⁶ bāma sǎn lebe poorum dee base Nawēnne sore, la ka tā ti ba le taru ba leme ti ba teege yem base tōon-be'ero. Se'ere n soe la, nēr-bāma ān wu ba le ka'ara Nawēnne Dayua la kūm dɔ-puurja zuo, dee yaala ē nērba tējasuka. ⁷ Ti dūke makre: Saaga sǎn niira zozo'e ti va'am yūura ko'om sōja, a bōnkɔla wun māale me bɔ seba n kɔɔri ē na, bela a yeti Nawēnne yel-sōnne me. ⁸ La va'am na sǎn yesra gō'osi, la mō-yooro mā'a, a ka taru yōorɔ, ba wun kǎ la be'em bɔ ē, la ba'asgo ba wun yō ē na bugum.

⁹ M sir-nōgrisi, baa tōma n tɔgru wǎna la, tōma mi ti sūure puam sira sira ti yāma boe la so-sōja n wun botu ya yē fāare la zuo. ¹⁰ Nawēnne de la sira dāana, a kǎn yīm ya tōoma, la yāma n pa'ale ti yāma nōje ē me, tōm bɔ a nērba, dee ken tōnna bɔ'ɔra ba lēle wǎ.

¹¹ Bela tōma n boori se'em de la ya nēra woo kenje a mēja bela, sēnna nēja ka paage ba'asgo, yē bōn-seba ti a taru putē'ere gu'ura la. ¹² Tōma ka boori ti ya tara zēyāgre, ita-ya wu nēr-seba n bɔ Nawēnne sira, mōrge sēje nēja yē sela ti Nawēnne bīje nōore ti a bɔ a nērba la.

Nawēnne nōore ti a bīje la ka viiri

¹³ Nawēnne n yuun bīje nōore la Abraham na, a pɔi me, la nēra n ka boe gǎnna a mēja la īyǎ, a pɔi la a mēja ¹⁴ yeti: «Asira, mam wun ēje fu yel-sōnne zozo'e, dee botu fu yusi yirge zozo'e.» ¹⁵ Ti Abraham mōrge sēje nēja, yē sela ti Nawēnne bīje nōore ti a ēje la. ¹⁶ Nērsaala sǎn yeti a pɔi, a pɔti la sela n gǎnni a mēja, ti pɔte la dena sela n pa'alɔ ti ēn ye le se'em na de la sira, ti nōke'ene ba'ase. ¹⁷ Bela, Nawēnne yuun boori ti a pa'ale la seba ti a bīje nōore la ba la, ti ēja n bīje a nōore se'em na ka viiri, bela ti a bīje a nōore dee pɔi pa'ase. ¹⁸ Nawēnne n ka parni na, n ēje bōn-

bāma bayi n ka viiri. Bela n bɔ'ɔri tōma buraane zozo'e, tōma seba n base sela woo, dee tara putē'ere gu'ura sela ti a yeti a ēje bɔ tɔ la. ¹⁹ Tōma n taru putē'ere gu'ura sela la botu tōma ze la kǎnkǎnje Nawēnne nējam, wu ka'aga n ka tēja kē paage puam puam yōke kǎnkǎnje la. Bela ti tōma wun kē gǎnje fu-seka n berje Nawēnne zē'e-sōja la, paage Nawēnne zē'am. ²⁰ La de la zē'e-ēja ti Azezi dēje tōma kē, bɔna mī tōma īyǎ, dena kǎabgo kēma nējadāana wakate wuu īyǎ, wu Amelkisedeki n ān se'em na.

Amelkisedeki n de kǎabgo kēma gǎnna Leviti dōma

7 Amelkisedeki ēja yuun de la Salem naba, la Nawēnne n gǎnni wuu kǎabgo kēma. Abraham n yuun sēje ka zēbe yānje na'adōma dee lebe kulla la, Amelkisedeki n tu'use ē kǎ kǎ'a-sōma bɔ ē. ² Ti Abraham looge lɔg-seba wuu ti a to'oge la pia puam ayila bɔ ē. Amelkisedeki yu'ure la vōore de la: «Naba n uti sela n mase», sela n pa'ase, a de la Salem naba, n boori ti la yeti: «Sū-mā'asum naba». ³ Ba ka mi a sɔ, la a ma, la a yaabdōma. Sela ka boe n pa'alɔ a vɔm pī'ilunjo, la a vɔm ba'asgo, a ān wu Nawēnne Dayua la, a de la kǎabgo kēma wakate n ka ba'asri.

⁴ Bise-ya Amelkisedeki n taru ke'engo se'em. ēja ti ti yaaba Abraham yuun looge lɔg-seba ti a zēbe to'oge la pia puam ayila bɔ ē. ⁵ Alevi yusi seba n de kǎabgo kēma la, Amoyisi lɔ la bɔ ba nōore ti ba tɔ'ɔsra pia puam ayila la Abraham yusi n de ba mēja nērba la zē'am. ⁶ La Amelkisedeki n dagi ba buuri la to'oge pia puam wuu ayila me Abraham zē'am, dee kǎ kǎ'a-sōma bɔ Abraham n de seka ti Nawēnne bīje nōore bɔ ē na. ⁷ La de la sira, sē'engo ka boe, seka n kǎ kǎ'a-sōma bɔ nēra n gǎnni seka ti a kǎ bɔ ē na. ⁸ La sǎn dena Alevi yusi la n to'osri pia puam ayila la, ba de la nērsaalba n kiiri, la Amelkisedeki de la seka ti Nawēnne gōja la yeti, a vɔa me. ⁹ Ti tā wun yeti, Abraham n yuun looge sela ti a to'oge la pia puam ayila bɔ Amelkisedeki la, Alevi n de seka ti a buuri to'osri pia pure la mē bɔ ē me. ¹⁰ Se'ere n soe la, Amelkisedeki n yuun tu'use Abraham wakat-seka la, ti Alevi nān boe la Abraham zum puam.

Azezi n de kǎabgo kēma wu Amelkisedeki la wakate wuu īyǎ

¹¹ Lɔ la ti Nawēnne yuun bɔ a nērba la ēebe la Leviti dōma kǎabgo tōoma la zuo. Leviti dōma kǎabgo tōoma la yuun ka tā wun base ti sela woo mase āna wu Nawēnne n boori se'em na. A sǎn tā ni, la ka le de ni ti kǎabgo kēma buuri ayēma wa'am wu Amelkisedeki la dagna Aarō buuri. ¹² Bela, kǎabgo kēma tōoma la sǎn teege, dēni ti lɔ la mē teege. ¹³ Ti Zuudāana Azezi yelle ti ba tɔgru la, de la buuri ayēma nēra, la buur-ēja nēra nēra nān ka tōm kǎabgo kēma tōoma. ¹⁴ La de la vēelga ti ti Zuudāana la de la Azuda buuri nēra, la

Amoyisi n yuun tɔge k̄aabgo k̄ema tōoma yelle la, a ka po tɔge buur-ēŋa yelle.

¹⁵ K̄aabgo k̄ema ayēma n ān wu Amelkisedekɪ n wa'am na n base ti yetɔga la ti tōma tɔgrɪ la d̄ena vēelga. ¹⁶ A ka lebḡe k̄aabgo k̄ema wu n̄ersaala dɔgum lɔɔ n dolɪ se'em na, la de la vom n ka sā'anɪ p̄aŋa n botɪ a lebḡe k̄aabgo k̄ema. ¹⁷ Nawēnne gōŋɔ la yele yetɪ: «Fu de la k̄aabgo k̄ema wakate n ka ba'asrɪ īyā, wu Amelkisedekɪ n ān se'em na.» ¹⁸ Bela ti kurum nōore la n yele se'em na ka le tōnna, ēn ka tarɪ p̄aŋa, dee ka tara yōorɔ la īyā. ¹⁹ Se'ere n soe la, Amoyisi lɔɔ la ka tā'age base ti sela sela mase wu Nawēnne n boorɪ se'em na. La l̄eɛɛ wā, Nawēnne ēŋe la so-paalɛ, ti tōma n tarɪ putē'ere gu'ura sela n ān sōŋa gānna la base ti tōma l̄enna Nawēnne.

²⁰ La sela n pa'ase, Nawēnne yuun pɔɪ mɛ. Leviti dōma n yuun lebḡe k̄aabgo k̄ema la, Nawēnne ka pɔɪ.

²¹ La Azezi n lebḡe k̄aabgo k̄ema la, Nawēnne pɔɪ mɛ yetɪ:

«Mam n de Zuudāana la pɔɪ mɛ,
mam k̄ān viige m nōore.
Fu de la k̄aabgo k̄ema
wakate n ka ba'asrɪ īyā.»

²² La de la bela ti Azezi base ti ti mina sōŋa sōŋa, ti Nawēnne n bīŋe a nōore se'em la tōma la, n ān sōŋa gānna kurum nōore la. ²³ Sela n le pa'ase, kurum k̄aabgo k̄ema la yuun zo'oge mɛ sɔɔsna taaba, se'ere n soe la, k̄ūm n yuun gu'uri ba ti ba ka tāna tōnna wakate wuu. ²⁴ La Azezi vɔa la wakate wuu, n̄era ka sɔɔrɪ a k̄aabgo k̄ema tōoma la tōnna. ²⁵ La de la bela ti a tāna wun f̄āage seba wuu n doose la ēŋa l̄enna Nawēnne zē'am na, wakate wuu īyā. Se'ere n soe la, a vɔa mɛ wakate wuu yōkra Nawēnne sɪa bɔ'ɔra ba.

²⁶ La de la k̄aabgo k̄ema n̄ējadāana n ān wāna n mase ti ti tara: A de la pupeelem dāana, ka tara yelle, ka tara dōrga, a welge a mēŋa mɛ la tōon-be'ero dōma, ti Nawēnne zēk̄e ē sēŋe saazuum-zuum. ²⁷ Œŋa ka ān wu k̄aabgo k̄ema n̄ējadōma baseba la, ti daare woo la d̄ena ba d̄ēŋe k̄āabe ba mēŋa tōon-be'ero īyā, dee yāŋa k̄āabe n̄erba tōon-be'ero īyā la. Œŋa d̄ike la a mēŋa k̄āabe nōore ayula mā'a bɔ n̄erba tōon-be'ero īyā. ²⁸ Amoyisi lɔɔ la yuun loorɪ la n̄ersaalba p̄aŋa n pɔ'ɔge ti ba d̄ena k̄aabgo k̄ema n̄ējadōma. La Nawēnne n bīŋe a nōore dee pɔɪ bela poorum na, a looge la a Dayua n mase sela woo puam wakate n ka ba'asrɪ īyā.

Azezi n de nōor-bīŋre paalḡa k̄aabgo k̄ema

8 Tōma yetɔga la ti tōma tɔgrɪ la zuo n wāna: Tōma tarɪ la k̄aabgo k̄ema n̄ējadāana, ēŋa n zī saazuum Nawēnne n de ke'engo dāana la na'am bīm̄bīnne zuugo. ² Œŋa n boe zē'e-sōŋɔ mēŋa mēŋa la puam tōnna bɔ'ɔra Nawēnne, zē'e-ēŋa de la Zuudāana Nawēnne mēŋa yire, la dagɪ zē'e-seka ti n̄ersaalba tī pu'usra

Nawēnne na. ³ Ba loorɪ k̄aabgo k̄ema n̄ējadāana woo ti a bɔ'ɔra la Nawēnne bɔ'a, la a k̄āabra bɔ'ɔra ē. Bela ti la m̄e mase ti ēŋa tara sela bɔ Nawēnne. ⁴ Azezi s̄ān boe nɪ na tēŋa wā zuo, a ka de nɪ k̄aabgo k̄ema. Se'ere n soe la, k̄aabgo k̄ema pōn bɔna mɛ bɔ'ɔra bɔ'a wu Amoyisi lɔɔ la n de se'em na. ⁵ Bāma n tōnnɪ tōon-seka la de la sela n ɪtɪ Nawēnne yire la wōnnɛ, la a m̄āmsgɔ. La ān wu Amoyisi n yuun yetɪ a tī zē'e-seka ti ba pu'usra Nawēnne na, Nawēnne yuun yele ē yetɪ: «B̄use sōŋa sōŋa ti fu wun tī ē ti a āna wu mam n pa'ale fu tāŋa zuo se'em na.» ⁶ La l̄eɛɛ wā, Azezi tarɪ la tōon-keko gānna bāma. Nōore ti Nawēnne bīŋe la tōma Azezi īyā la n ān sōŋa gānna, se'ere n soe la, sela ti a yetɪ a ēŋe bɔ tɔ nōor-bīŋre ēna puam na n ān sōŋa gānna.

⁷ Pɔspɔsɪ nōor-bīŋre la yuun s̄ān ka gelge nɪ, la ka de nɪ ti Nawēnne bīŋe nōore buyi dāana. ⁸ La Nawēnne zerge ba mɛ, bela ti a yele yetɪ:

«Dabsa n sēm ti mam wun bīŋe nōor-paalga la ls-rayelɪ dōma, la Zuda dōma lɛ.

⁹ La k̄ān āna wu nōor-bīŋre seka ti mam yuun bīŋe la ba yaabdōma wakat-seka ti mam gurɛ ba nu'usi tarɪ ba Ezipti yese la.

Ba yuun ka doose mam nōore la ti mam bīŋe yetɪ ba ēŋe se'em na, bela n soe ti mam base ba.

Mam n de Zuudāana la n yele.

¹⁰ Mam n yetɪ m bīŋe m nōore se'em la lsrayelɪ dōma dabsa bāma poorum n wāna:

Mam wun d̄ike m lɔɔ la ēŋe la ba putē'era puam,
mam wun gulɛ ba la ba sūure puam.

Mam wun d̄ena ba Nawēnne,
ti ba d̄ena mam n̄erba.

¹¹ N̄era n̄era k̄ān le z̄āsum a tadāana bu a sɔbia yele ē ti a b̄āŋe Zuudāana la,
se'ere n soe la, ba n̄erba wuu wun b̄āŋe mam mɛ,
halɪ lan pɔsɛ la kɔm-pɪgsɪ ka paage bōnkegsɪ.

¹² Lan de se'em na, mam wun base ba kōŋre la taalɛ mɛ,
mam k̄ān le t̄era ba tōon-be'ero la yela.»

¹³ Nawēnne n tɔgrɪ nōor-bīŋre paalḡa yelle la, a botɪ pɔspɔsɪ dāana la d̄ena la keka. La sela n lebḡe keka kurgɛ deegɛ la a bɔɪ.

N̄erba n yuun pu'usrɪ Nawēnne se'em fuu-deego la puam

9 Pɔspɔsɪ nōor-bīŋre la yuun tarɪ la zē'e-sōŋɔ tēŋa zuo, la sɔa ti ba dɔla pu'usra Nawēnne. ² Ba yuun tī la fuu-deego beŋe zē'esɪ bayi, wi'ira pɔspɔsɪ zē'a la ti Nawēnne zē'e-sōŋɔ. Bilam, f̄itladōma dɔglɔgɔ zē'a, la taablɪ ti ba dɔglɪ borborɪ bɔ'ɔra Nawēnne n boe m̄i. ³ La fuugo la n beŋe deego buyi dāana la, ba wi'iri bilam ti Nawēnne zē'e-sōŋɔ mēŋa mēŋa. ⁴ K̄aabgo bīm̄bīnne n de s̄ālma ti ba yō'orɪ tudare a zuo n boe m̄i,

pa'ase la nõor-bĩjre daka ti ba dıke sālma yũlge a wuu. Sālma lɔkɔ ti mannı boe a puam, la Aarō dasaare n puse vōorɔ la, la kug-palagsı seba ti Nawēnne n bɔ nõore se'em na gulse ba zuto la n boe daka la puam. ⁵ Daka la zuo, ba ẽje la malekadōma ti ba wi'iri ti seribē n pa'alı Nawēnne na'am pãja ẽje mĩ, ti ba kem-pagsı yerge ti ba mǎ'asum pĩ zē'e-seka ti ba ıti zum mĩ ti Nawēnne basra nērba tōon-be'ero taale la. La leele wǎ, mam kǎn wegse bōn-bǎma yelle pa'ale ya.

⁶ Sela woo mǎasum na bela bɔna a zē'a, ti kǎabgɔ kēma la kē'era pɔspɔsı deego la puam daare woo tōnna ba tōoma. ⁷ La deego buyi dǎana la puam, kǎabgɔ kēma nējadǎana la mǎ'a n kē'eri mĩ nõore ayıla yuune puam. A sǎn kē'era mĩ, dēnı ti a tara dũnsi zum ka bɔ Nawēnne, a mēja tuure, la nērba tuure ıyǎ.

⁸ Bela, Nawēnne Sia pa'alı ti pɔspɔsı deego la n daan ken bɔna la, sore ka pake ti nēra tǎna wun kē Nawēnne zē'e-sōjɔ mēja mēja la puam. ⁹ Bela de la mǎmsgɔ pa'ala tōma bōn-seba n boe leele wǎ vōore. Bɔ'a, la dũnsi ti ba kǎabrı bɔ'ɔra Nawēnne na, ka tǎ wun base ti seba n ıti bela pu'usra Nawēnne na sũure mase a zē'am. ¹⁰ Ba de la dia, la bōn-yũula, la ko'om peere buuri to'oto'ore yelle mǎ'a. lrgɔ bǎma de la ıyǎ yela n de dũnia wǎ bōnɔ n yuun boe ti nērba dɔla, halı wa paage wakat-seka ti Nawēnne malın malge sela woo sōja.

Azezi-krisi ıyǎ ti Nawēnne bĩje nõor-paalga

¹¹ La Krisi n wa'am na, a de la kǎabgɔ kēma nējadǎana, ẽja n bɔ tōma bōn-sōma ti ti tarı wǎ, ẽja n kē zē'e-sōjɔ n mase sela woo puam n gǎnnı na, la dagı fuugo deego ti nērsaalba tĩ, a dagı dũnia wǎ bōnɔ. ¹² A daan kē Nawēnne zē'e-sōjɔ la puam na nõore ayıla mǎ'a wakate wuu ıyǎ. La dagı buusi zum, la lɔl-pɔla zum ti a dıke kǎabe bɔ Nawēnne, a dıke la a mēja zum kǎabe bɔ Nawēnne fǎage tōma wakate n ka ba'asrı ıyǎ. ¹³ Ba yuun tarı la buusi, la lɔlsı zum, la nas'a'are ti ba yō tǎmpeglum mĩsra nēr-seba n sǎ'am lɔɔ la, ti ba le malge ba ti ba ǎna sōja mase la lɔɔ la.

¹⁴ Krisi zum na tarı pãja me gǎnna bela zozo'e. Ẽja ka tarı tuure, la doose la Nawēnne Sia n boe wakate wuu ti a dıke a mēja bɔ Nawēnne, peege ti tōon-be'ero n sēm na kũm na, ti ti sũure ǎna sōja, ti ti tōnna bɔ'ɔra vɔm dǎana Nawēnne. ¹⁵ La de la bela ıyǎ ti Nawēnne bĩje nõor-paalga ẽja ıyǎ. Ẽn ki la ıyǎ, a yɔ fǎage nēr-seba n tuuge pɔspɔsı nõore bĩje la puam me, ti Nawēnne n wi ba la, ba wun to'oge bōn-sōma ti a bĩje nõore ti a bɔ a nērba la wakate n ka ba'asrı ıyǎ.

¹⁶ Nēra sǎn pa'ale ba wun puı ẽja bōntarsōm se'em ẽja kũm poorum, dēnı ti a ki dee ti ba yǎja puı ba.

¹⁷ Nēra la sǎn ken vɔa, a nõore la ti a bɔ la de la yoogo. La de la a kũm poorum ti a tarı yōorɔ. ¹⁸ La mē de la bela baa la Nawēnne pɔspɔsı nõor-bĩjre la, la de la dũnsi zum n yese ti a pɔse tōnna. ¹⁹ Amoyisi n yuun

tɔge Nawēnne lɔɔ wuu pa'ale nērba wuu wu Nawēnne n ye se'em kı'ulum na, a yǎja dıke la lɔl-pɔla, la buusi zum, la ko'om, dıke pesgo kōbrɔ n ǎn mōlga, vile ızɔpı vōorɔ luse ba puam, mĩise nõor-bĩjre gōjɔ la, la nērba la wuu, ²⁰ dee ye ye yetı: «Zı-bǎna wǎ n pa'alı ti Nawēnne bĩje nõore la ya le ti ya sake ẽ.» ²¹ Amoyisi yuun ken dıke zum na mĩise fuu-deego la, la pu'usgɔ lɔgrɔ la wuu me. ²² La sǎn dēna lɔɔ la sore, la ǎn wu la de la sela woo ti zum malgrı ti ba le ǎna sōja Nawēnne zē'am. Ti zum sǎn ka yese, Nawēnne ka basrı nērba tōon-be'ero taale.

Krisi kũm n yese nērba tōon-be'ero base

²³ Lan yuun mase ti ba dıke dũnsi zum malge bōn-seba n mǎmsrı sela n boe Nawēnne yire la, ti ba le ǎna sōja bela la, la sǎn dēna bōnɔ la mēja n boe Nawēnne yire la, dēnı ti la dēna kǎabgɔ n ǎn sōja gǎnna bela.

²⁴ Krisi n kē zē'e-seka la, dagı deego ti nērsaalba ẽje bɔ Nawēnne n mǎmsrı Nawēnne zē'e-sōjɔ mēja mēja la, a kē la Nawēnne yire mēja, bɔna Nawēnne nējam tōma sōjre ıyǎ. ²⁵ Krisi ka kē nõore faa wu kǎabgɔ kēma nējadǎana la n kē'eri zē'e-sōjɔ la yuune woo la zum n dagı a mēja zum na, a kē la nõore ayıla mǎ'a dıke a mēja kǎabe bɔ Nawēnne. ²⁶ La sǎn dagı nı bela, a daan wun nǎmse nı me nõore faa, halı lan pɔse dũnia pĩilurɔ wa paam zĩna. La sela n de sıra, a wa'am na nõore ayıla mǎ'a dũnia ba'asgɔ wakate wǎ, ti a yese tōon-be'ero, ẽn dıke a mēja kǎabe la ıyǎ. ²⁷ Nēra woo kiiri la buyıla, dee ti Nawēnne dita a sarıya. ²⁸ Bela mē, Krisi dıke a mēja bɔ la nõore ayıla yese nērba zozo'e tōon-be'ero base. A wun le leme wa'am me nõore buyi puam, la, la kǎn dēna tōon-be'ero yesga ıyǎ, la de la nēr-seba n gu'uri ẽ ti ba yē fǎare la ıyǎ.

10 Amoyisi lɔɔ la yela yuun mǎmsrı la bōn-sōma n sēm na mǎ'a, ba ka de sela n de sıra la mēja mēja. A botı nērba kǎabra la kǎabgɔ bǎma mēja yuune woo bɔ'ɔra Nawēnne ka ba'asra. La a ka tǎ wun botı nēr-seba n kǎabrı bela la lem Nawēnne mase sela woo puam. ² Seba n ıti bela pu'usra Nawēnne na, sǎn malge nı me ǎna sōja wakate wuu ıyǎ, ba kǎn le tē'esra ti tōon-be'ero boe bǎma zuto, la ba wun base me kǎn le kǎabra. ³ La dagı bela, kǎabgɔ bǎma ti ba kǎabrı la, tēeri ba la ba tōon-be'ero yelle yuune woo. ⁴ Se'ere n soe la, lɔlsı, la buusi zum ka tǎ wun yese tōon-be'ero base.

⁵ Bela n soe ti Krisi n daan sēm dũnia zuo la, a daan ye le Nawēnne yetı:

«Fōn ka boorı kǎabgɔ, la bɔ'a, la fōn ẽje la ıyǎ bɔ mam.

⁶ Kǎabgɔ seka ti ba yō'orı bĩmbĩnne zuo, la kǎabgɔ seka ti ba kǎabrı tōon-be'ero taale basga ıyǎ la, ka ıti fōn sũure yēlum.

⁷ Bela ti mam yeti:
 «Zuudāana Nawēnne,
 mam n wāna n yeti m ēñe fōn boori ti m ēñe se'em
 na,
 wu lan gulse mam yelle fu gōñg puam se'em na.»
⁸ A dēñe yeti: «Fōn ka boori kāabg, la b'a, la kāabg
 seka ti ba yō'ori bīmīnne zuo, la kāabg seka ti ba
 kāabri tōon-be'ero taale basga iŷā, la ka itl fōn sūure
 yēlum.» La kāabg bāma, ba kāabri ba wu lɔ la n ye
 se'em na. ⁹ Dee le yeti: «Mam n wāna n yeti m ēñe fōn
 boori ti m ēñe se'em na.» A saam pɔspɔs kāabg la mē
 dee vigle buyi dāana. ¹⁰ Azezi-krisi ēñe la Nawēnne n
 boori se'em, a dīke la a mēña kāabe bɔ ē nōore ayula
 wakate wuu iŷā, ti tōma welge to'ore dēna Nawēnne
 nērba.

¹¹ Kāabg kēema woo ze la a tōoma zē'am daare woo
 tōnna, la a kāabri la kāabg bāma mēña nōore faa,
 dee ti la ka tāna tōon-be'ero yesra. ¹² La Krisi dīke a
 mēña kāabe la nōore ayula bɔ yese nērba tōon-be'ero
 wakate wuu iŷā, dee sēñe ka zēa Nawēnne zuugo,
¹³ gu'ura ti Nawēnne wa ēñe a be'eba ti ba bɔna a nā-
 ma tēña. ¹⁴ Bela, kāabg buyla la mā'a ti a welge nēr-
 ba to'ore ti ba dēna Nawēnne nērba mase sela woo
 puam wakate n ka ba'asri.

¹⁵ Nawēnne Sīa mē pa'alē tōma ti bōn-ēña de la sira,
 se'ere n soe la, a ye le yeti:

¹⁶ «Mam n yeti m bīñe m nōore se'em la ba dabsa bā-
 ma poorum n wāna:

Mam wun dīke m lɔ la ēñe la ba sūure puam,
 mam wun gulse ba ba putē'era puam.

Mam n de Zuudāana n ye le.»

¹⁷ Dee ken yeti:

«Mam kān le tēra ba tōon-be'ero, la ba tuure la yelle.»

¹⁸ Bela, Nawēnne n base tōon-be'ero taale la, la ka le
 nara ti ba kāabra tōon-be'ero taale basga iŷā.

Ti zē-ya kǎñkǎñe Nawēnne doosgo puam

¹⁹ M sobiisi, tōma mi ti Azezi zum na iŷā, tōma tarl
 nōore mē ti ti kē Nawēnne zē'e-sōñg mēña mēña la
 puam. ²⁰ Azezi n dīke a mēña iŷā kāabe bɔ la, a āage fu-
 ugo la n beñe tōma la Nawēnne na mē, yo'oge so-
 paale n bɔ'ɔrɔ vɔm bɔ tōma. ²¹ Tōma tarl la kāabg kē-
 ma nēñadāana n bīsrɔ Nawēnne nērba yelle. ²² Bela
 iŷā, base-ya ti ti lēm Nawēnne zē'am la pupeelem, la
 sūure n bɔ sira zōnzōnɔ, la sūure n peege ti ti mina ti
 tōon-be'ero ka le bɔna, la iŷā n peege la ko-sōma. ²³ Ti
 pa'alē-ya tūn tarl putē'ere gu'ura sela la da base, se'ere
 n soe la, Nawēnne de la sira dāana, a wun ēñe ēña n
 bīñe a nōore se'em na.

²⁴ Ti bīsrɔ taaba yelle wun kēñra taaba, ti ti tara
 nōñlum, dee tōnna tōon-sōma. ²⁵ Ti da base taaba
 lagsgo wu nērba baseba n itl se'em na, ti bɔ'ɔra-ya taa-

ba buraane, yāma n yē ti Azezi lemño daare la lēm mē
 na.

²⁶ Nēr-seka n bāñe Nawēnne sira la, a sān mina dee
 ken tōnna tōon-be'ero la yemleego, kāabg ka le bɔna
 tōon-be'ero yesga iŷā. ²⁷ Sela n yāña deege de la nēr-
 ēña gu'ura Nawēnne sarɔya, la bugum n wun di seba n
 sɔ'ise Nawēnne na, la dabeem. ²⁸ La sān dēna la Amoy-
 isi lɔ la, nēra sān sā'am lɔ la, ti nērba bayi, bu batā
 bɔna mī dēna kaset-dōma, ninbāalga ka boe, dēnɔ ti a
 dāana ki. ²⁹ La sān dēna bela, nēr-seka n kēsē Nawēnne
 Dayua la, kān yē subgre n de be'em halɔ gānna bela
 bu? Nēr-ēña bīse Azezi zum na ti Nawēnne bīñe a
 nōore a iŷā la zāña. La, la de la zum ēña ti Nawēnne
 dīke boti nēra la welge to'ore dēna Nawēnne nēra. Ēña
 dāana ken pɔ'ɔge Nawēnne Sīa n de yel-sōnne dāana
 la mē. ³⁰ Tōma mi Nawēnne n yeti: «Mam n de m lebse
 be'em, la de la mam n wun yɔ.» La ken yeti: «Zu-
 udāana la n wun di a nērba sarɔya.» ³¹ La de la yelle
 mēña mēña bɔ seka n lui Nawēnne n de vɔm dāana la
 nu'usum.

³² Tēege-ya yāma n daan pɔse yē Nawēnne peelem n
 pa'alē ya sira la, lan daan ān se'em bɔ ya, ya daan yē
 nāmso zo'oge mē, la ya wībe mē ze'ele kǎñkǎñe. ³³ Ba
 daan tuurɔ dee nāmsra ya nērba baseba mē nērba
 zē'am, la yāma naage la seba ti ba nāmsrɔ la mē sōñe
 ba. ³⁴ La yāma zoe seba n boe yu'a deem na ninbāalga
 mē. La ban fā yāma logrɔ la, yāma sake mē konje ba la
 sū-yēlga, yāma n mi ti yāma tarl la bōntarsōm sōma n
 gānnɔ bela n kān sā'am na iŷā. ³⁵ Bela, da base-ya sū-
 ke'ēño seka ti ya tarl la, ti ya wun yē yɔɔɔ zozo'e. ³⁶ Yā-
 ma de la ya narge pāña sēñe nēña ēñe Nawēnne n
 boori se'em, ti ya wun to'oge sela ti a bīñe nōore ti a
 bɔ ya la. ³⁷ La gulse ti Nawēnne yeti:

«La deege la fēe, fēfēe mā'a,
 ti seka n sēm na wun wa'am,
 a kān yuuge.

³⁸ Nēr-seka n bɔ mam sira
 mase mam zē'am wun vɔa,
 ēn bɔ mam sira la iŷā.

La seka n lebe poorum,
 mam sūure kān āna yēlum la a dāana.»

³⁹ La sān dēna tōma, tōma dagɔ seba n lebrɔ poorum
 wun sā'am na, tōma de la seba n bɔ sira wun yē fāare.

Bɔ sira yelle

11 Bɔ sira de la fōn mi sira sira ti fōn tarl putē'ere
 gu'ura sela la, fu wun yē, a boti fu mina la sela n
 ka yētɔ la nini. ² La de la kurum kurum dōma n yuun bɔ
 Nawēnne sira la iŷā, ti a tɔge ba yelle sōña. ³ La de la
 tōma n bɔ Nawēnne sira la iŷā, ti tōma bāñe ti Nawēn-
 ne dīke la a yetɔga nāam tēña la saazuum, bela ti tōma
 mina ti sela n yētɔ wā ze'ele la sela n ka yētɔ puam.

⁴ Abel n bɔ Nawēnne sɪra la ʔyǎ, tɪ a yuun kǎabe kǎabgɔ n tarɪ yɔɔɔɔ gǎnna Akǎi kǎabgɔ bɔ Nawēnne. La de la bɔ sɪra la ʔyǎ tɪ Nawēnne to'oge a bɔ'a la, dee yetɪ a mase ɛŋa zɛ'am. Abel n bɔ sɪra la ʔyǎ, baa ɛn ki la, a yelle ken tɔgra mɛ.

⁵ La de la A'enɔki n bɔ sɪra la ʔyǎ, tɪ Nawēnne yuun zɛke ɛ sɛŋe a yire, tɪ a ka ki, tɪ ba yuun ka le yɛ ɛ, Nawēnne n zɛke ɛ na ʔyǎ. Lan dɛŋe a zɛkre la, la gulse a yelle yetɪ, a paage Nawēnne yem mɛ. ⁶ Nɛra sǎn ka bɔ Nawēnne sɪra, a ka tǎ wun paage a yem. Nɛra sǎn lɛnna Nawēnne zɛ'am, dɛnɪ tɪ a bɔ sɪra tɪ a boe mɛ, la a yɔɔɔɔ sɛba n eerɪ ɛ mɛ.

⁷ Anoe n bɔ Nawēnne sɪra la ʔyǎ, tɪ a zoe Nawēnne sake a nɔɔɛ. Nawēnne yuun pa'ale ɛ na bɔn-sɛba n wun ɛŋe tɪ nɛrba nǎn ka yɛtɪ, tɪ a sake mǎale ɔɔɔɔ kǎte, tɪ ɛŋa la a yir-dɔma kɛ mɪ yɛ fǎare. Bela a pa'ale tɪ dɔnɪa dɔma n ka sake la kɔŋe buuɔ mɛ, dee tɪ ɛŋa mase Nawēnne zɛ'am, ɛn bɔ ɛ sɪra la ʔyǎ.

⁸ Abraham n bɔ Nawēnne sɪra la ʔyǎ, tɪ a yuun sake a wi'a, yese we'esa tɛn-seka tɪ Nawēnne bɪŋe nɔɔɛ tɪ a bɔ ɛ na bɔbre, dee ka mina ɛn we'esɪ zɛ'e-seka la.

⁹ Abraham n bɔ sɪra la ʔyǎ, a yuun sɛŋe ka kɛ'era tɛn-seka tɪ Nawēnne bɪŋe nɔɔɛ tɪ a bɔ ɛ na puam wu sǎana la, yuun tɪ fuu-deego bɔna mɪ. A'izaki, la Azakɔbi mɛ yuun kɛ'erɪ la fuu-deto puam. Nawēnne yuun bɪŋe nɔɔɛ bɔ la bǎma wuu. ¹⁰ Se'ere n soe la, Abraham yuun tarɪ la putɛ'ere gu'ura tɛn-seka ɛbre n ɛɛbe sɔŋa, tɪ Nawēnne mɛŋa dɛna sɛka n make dee mɛ.

¹¹ La de la Asaara n bɔ Nawēnne sɪra la ʔyǎ, tɪ baa ɛn yuun de kɔndɔgre dee kurge zo'oge la, Nawēnne base mɛ tɪ a dɔge bia, se'ere n soe la, a bɔ la sɪra tɪ sɛka n bɪŋe a nɔɔɛ la, wun ɛŋe ɛn yele se'em na mɛ. ¹² Bela n soe, tɪ buraaga ayɪla n yuun kurge ka zǎage la kɔm, dɔge yɪsɪ tɪ ba zo'oge ǎna wu wɔrbie n boe saazuun, bu tɛntɔnbɪ'isgo n boe ko-kǎte nɔɔɔɔ tɪ nɛrba ka tǎ wun kǎale ba.

¹³ Nɛr-bǎma wuu ki la ba bɔ sɪra la puam. Ba yuun ka to'oge bɔn-sɛba tɪ Nawēnne bɪŋe nɔɔɛ tɪ a bɔ ba la, la ba yuun tɔule yɛ ba la halɪ zǎazǎare, tɪ ba sɔure ǎna yɛlum. La ba bǎŋe mɛ yele tɪ bǎma de la sǎama ka tara zɛ'a dɔnɪa zuo. ¹⁴ Sɛba n tɔgrɪ wǎna la pa'alɪ tɪ ba eerɪ la tɛn-seka tɪ ba wun wi'ira ba mɛŋa tɛŋa. ¹⁵ Ba yuun sǎn tɛ'esra tɛn-seka tɪ ba yese dee base la yelle tɪ a sɪra tara ba, ba tarɪ nɪ sore wun lebe bilam mɛ. ¹⁶ Lan de se'em na, ba yuun eerɪ la tɛn-seka n ǎn sɔŋa gǎnna. Tɛn-ɛŋa de la Nawēnne yire. Bela n soe tɪ Nawēnne ka zoe yǎnne tɪ ba wi'ira ɛ tɪ ba Nawēnne, la de la ɛŋa n mǎasum tɛŋa bɔ ba.

¹⁷ La de la Abraham n bɔ Nawēnne sɪra la ʔyǎ, tɪ a yuun dɪke A'izaki tɪ a kǎabe bɔ Nawēnne, wakat-seka tɪ Nawēnne make ɛ bɪse yetɪ a dɪke a dayua la bɔ ɛ na. A'izaki n de a dayɔ-yɛŋa la tɪ a yuun dɪke tɪ a kǎabe bɔ, dee tɪ la dɛna la ɛŋa yelle tɪ Nawēnne yuun bɪŋe nɔɔɛ la ɛ lɛ. ¹⁸ Nawēnne yuun yetɪ: «La wun doose la A'izaki

tɪ fu yɛ yɪsɪ tɪ mam bɪŋe nɔɔɛ la.» ¹⁹ Abraham yuun tarɪ la putɛ'ere tɪ Nawēnne tǎ wun vo'oge A'izaki mɛ. Bela n soe tɪ Nawēnne lebse bɔ ɛ a dayua. La ǎn wu a vo'oge ɛ mɛ na, yel-ɛna puam mǎmsgɔ n boe mɪ.

²⁰ La de la A'izaki n bɔ Nawēnne sɪra la ʔyǎ, tɪ a kǎ kǎ'a-sɔma n de sela n sɛm bɔ Azakɔbi, la A'eso.

²¹ Azakɔbi n bɔ Nawēnne sɪra la ʔyǎ, tɪ ɛn yuun wa yɔ-na kɔm na, tɪ a kǎ kǎ'a-sɔma bɔ Azozefu dayɔɔɔɔ bayi, tike a dasaare ka dɔma nǎ'ase Nawēnne.

²² Azozefu n bɔ Nawēnne sɪra la ʔyǎ, tɪ ɛn yuun wa dee kɔm na, tɪ a yele lɪsɪrɛlɪ dɔma yetɪ, ba wun wa yese Ezipti tɛŋa mɛ, dee pa'ale ba wun wa ɛŋe ɛŋa kɔ-ba se'em.

²³ Amoyisi dɔgrɪba n bɔ Nawēnne sɪra la ʔyǎ, tɪ ba yuun dɔge ɛ, dɪke ɛ sugɛ wɔr-sɪtǎ. Ba yɛ mɛ tɪ a de la bia n ǎn sɔŋa, tɪ ba ka zoe dabeem la naba la n bɔ nɔɔɛ se'em na.

²⁴ Amoyisi n yuun bɔ Nawēnne sɪra la ʔyǎ, tɪ ɛn wa lebge bɔnkɛka la, tɪ a zagɛ tɪ ba da wi'ira ɛŋa tɪ naba Afaarɔ pɔyua la dayua. ²⁵ A yuun boorɪ mɛ tɪ a lagum na Nawēnne nɛrba la po nǎmsra, gǎnna ɛŋa n ɪtɪ sɔ-yɛlga la sela n de be'em wakate fɛfɛe. ²⁶ A bɪse mɛ tɪ ba sǎn pɔ'ɔge ɛŋa wu ba wun pɔ'ɔge Krisi la, n tarɪ yɔɔɔɔ zo'oge gǎnna Ezipti tɛŋa bɔntarsɔm wuu. Se'ere n soe la, a yuun tarɪ la putɛ'ere gu'ura yɔɔɔɔ n boe nɛŋa.

²⁷ ɛn bɔ Nawēnne sɪra la ʔyǎ, tɪ a ze'ele Ezipti fɔrge dee ka zoe naba la sɔ-isgre, a yuun mɔrge mɛ ze'ele kǎŋkǎŋe, se'ere n soe la, a yɛ la Nawēnne tɪ ba ka yɛtɪ la nini. ²⁸ La ɛn bɔ sɪra la ʔyǎ, tɪ a botɪ lɪsɪrɛlɪ dɔma ku zɔɔɔɔ-base pebila ɛŋe zum mɪise deto nɔa, tɪ maleka sɛka n wun ku kɔm-kɛendɔma la, da ku lɪsɪrɛlɪ dɔma kɔm-kɛendɔma.

²⁹ lɪsɪrɛlɪ dɔma n bɔ Nawēnne sɪra la ʔyǎ, tɪ mɔg-mɔlga la ko'om yuun welge dee base tɛn-ke'ɛŋa tɪ ba doose tole, tɪ Ezipti dɔma mɛ paage doose tɪ ba tole, tɪ ko'om di ba.

³⁰ lɪsɪrɛlɪ dɔma n bɔ Nawēnne sɪra la ʔyǎ, tɪ ba yuun sɛŋe kaage Zeriko tɛŋa dabsa ayopɔɪ, tɪ a lalsɪ lui.

³¹ Arahabi n de pɔɔɔ-seka n yuun ɪtɪ yalsɪ la n bɔ Nawēnne sɪra la ʔyǎ, tɪ a yuun to'oge nɛr-sɛba n sɛŋe tɪ ba lalse bɪse Zeriko tɛŋa n ǎn se'em na a yire sɔŋa, bela tɪ a ka po naage la sɪ'ɪsɪrɪba la ki.

³² Yɛla zozo'e boe mɛ tɪ mam wun tɔge nɪ, la nɛŋa ka boe tɪ mam wun tɔge Azedeyɔ, la Abaraki, la Asǎmsɔ, la Azefte, la Adavidi, la Asǎmwɛlɪ, la Nawēnne nɔtɔ'ɔsɪrɪba la yelle. ³³ La de la ban bɔ Nawēnne sɪra la ʔyǎ, tɪ ba yǎŋe na'adɔma to'ose ba so'olum, ba tɔm sela n mase mɛ, ba yɛ tɪ Nawēnne n bɪŋe nɔɔɛ se'em na ɛŋe mɛ, ba mɔm gɪgma nɔa mɛ. ³⁴ La ba kɪŋe bugum n diti la pǎŋa mɛ, ba pɔse sukɔbgɔ kɔm mɛ, ba yɛ pǎŋa mɛ ba tɔrgɔ puam, dɛna gǎndɔɔɔ zɛbre zɛ'a, zɛbe yǎŋe satɛma zɛbzɛbrɪba digɛ ba. ³⁵ Pɔɔɔ yɛ ba nɛrba n ki mɛ dee vo'oge. Sɛba yɛ nǎmsgɔ mɛ zozo'e dee zagɛ yolsɔ, se'ere n soe la, ba boorɪ tɪ ba wa vo'oge mɛ yɛ

vom n ǎn sōŋa gǎnna. ³⁶ Ba la'arɪ seba mɛ, wɛ ba la kafōbsɪ, ba ba seba mɛ la bǎnsɪ kē'esɛ yu'a deem. ³⁷ Ba lobe seba la kuga ku, wǎ seba la soya ku, sɛ baseba la sukɔbrɔ ku. Tɪ seba ɛɛra ye'ena, ye piisi gǎna bu buusi gǎna, sake ka tara sela sela, tɪ ba fɔ'ɔna ba, nǎmsra ba. ³⁸ Ba yuun eerɪ la weem, la tǎnsɪ zuto, gǎ tǎnsɪ yogro, la tɛŋa yogro puam. Dūnia ka narɪ tɪ a tara nɛr-bǎma.

³⁹ Nɛr-bǎma wuu, Nawēnne tɔge ba yelle sōŋa mɛ ban bɔ ɛ sɪra la ɪyǎ, la baa bela ba ka to'oge Nawēnne n bɪŋe nōore tɪ a bɔ ba sela la. ⁴⁰ Nawēnne yuun pōn dɛŋe looge yem tɪ a ɛŋe la sela n ǎn sōŋa gǎnna bɔ tōma, bela tɪ a ka botɪ ba mase sela woo puam, tɪ tōma ka naage la ba.

Tɪ sake tɪ So Nawēnne demsgo

12 Bela, tōma n tarɪ nɛrba zozo'e n gilge tōma pa'ala tɪ sore la, tɪ mɛ base bōn-seba n gu'uri tɪ sēnne, la tōon-be'ero tɪ tɪ ɪtɪ nǎana nǎana la, dee mōrgɛ zɔta zua n boe tɪ nɛŋa na. ² Tɪ bɪsra-ya Azezi, ɛŋa n botɪ tɪ bɔ sɪra, dee wun tarɪ tɪ paage a ba'asgo zɛ'am. A wɪbe mɛ ki dɔ-puurŋa zuo ka zoe yǎnne, se'ere n soe la, a yɛ sū-yɛlga seka n gu'uri ɛ na mɛ, la a yǎŋa zɪ la Nawēnne na'am bɪmbɪnne zuugo.

³ Tɛ'esɛ-ya bɪsɛ, tōon-be'ero dōma n sl'ɪsɛ ɛ, nǎmse ɛ se'em, tɪ a wɪbe, tɪ ya da base tɪ ya ɪyǎ ki tɪ ya buraane bo'oge. ⁴ Yǎma n zɛbrɪ la tōon-be'ero la, ya ken ka zɛbe ki. ⁵ Da yɪm-ya kǎ'arɔ seka tɪ Nawēnne kǎ'an ya wu nɛra n kǎ'anɪ a koma se'em yetɪ:

«M bia, Zuudǎana sǎn sɪbge fɔ,
da dɪke tɪ la dena zǎŋa,
a sǎn pa'ale fɔ fu tuure,
da base tɪ fu buraane bo'oge.

⁶ Se'ere n soe la,
Zuudǎana demsɪ la seba tɪ a nōŋe,
dee sɪbgra seka woo tɪ a dɪke tɪ a dena a bia.»

⁷ Wɪbra-ya, tɪ la de la ya demsgo, Nawēnne ɪtɪ ya la a koma ɪrgɔ. Bia ka boe tɪ a so ka sɪbgra ɛ. ⁸ Nawēnne sǎn ka demse ya wu ɛn ɪtɪ a koma wuu se'em na, bela ya yi de la tǎmpɪiba, ya dagɪ a koma. ⁹ La sǎn dena tɪ so'dōma n dɔge tɪ la, ba daan sɪbgrɪ tɪ mɛ, dee tɪ tɪ nan-na ba. Bela, tɪ sake tɪ So Nawēnne n boe saazuum nōore gǎnna, tɪ tɪ wun yɛ vom a zɛ'am. ¹⁰ Tɪ so'dōma la daan sɪbgrɪ tɪ la wakate fɛfɛe ɪyǎ wu bǎma mɛŋa n tɛ'esɛ se'em na. La Nawēnne sɪbgrɪ tɪ la tōma mɛŋa sōŋrɛ ɪyǎ, tɪ a botɪ tɪ welge to'ore dena pupeelem dōma wu ɛŋa la. ¹¹ Wakate seka tɪ ba sɪbgrɪ tōma la, la de la sū-sǎ'arɔ, la ka de sū-yɛlga. La bela poorum nɛr-seba n yɛ sɪbgrɛ ɛŋa la yɛtɪ a yōorɔ mɛ, n de sū-mǎ'asum, la vom n mase ǎna sōŋa.

Tɪ mōrgɛ da zagɛ Nawēnne yel-sōnne

¹² Bela, keŋe-ya ya nu'usi n targe, la ya dūma n ki la.

¹³ Base-ya tɪ ya nǎma la sēnna sorɔɔɔ n de tɛntɛesɪ zu-to, tɪ nɛr-seka n dū'usri la da lui, a wun yɛ ɪmǎ'asum.

¹⁴ Mōrgɛ-ya ɛ tɪ sū-mǎ'asum bɔna yǎma la nɛrba wuu tɛŋasuka, la ya ɛ pupeelem. Tɪ pupeelem sǎn ka bɔna, nɛra ka tā wun yɛ Zuudǎana la. ¹⁵ Guuse-ya tɪ ya nɛra nɛra da wa mōŋe a mɛŋa Nawēnne yel-sōnne, ken gu-use-ya tɪ nɛr-seka da ǎna wu yɛg-toogo n puse ya tɛŋasuka, wun base tɪ toogo la loŋe nɛrba zozo'e sǎ'am ba. ¹⁶ Da base-ya tɪ ya nɛra nɛra ɪta yalsɪ, bu nɛra n pɔ'ɔrɪ sela n de Nawēnne bōnɔ, wu A'eso n yuun dɪke a kēnɔ bōnɔ teege dia laaga ayɪla la. ¹⁷ La yǎma mi tɪ bela poorum, ɛn wa bɔɔra tɪ a so kǎ kǎ'a-sōma bɔ ɛ, ɛŋa n de kēema ɪyǎ la, a ka tā'age. A ka yɛ sore yǎŋe teege yelle la tɪ a ɛŋe la, baa ɛn kellɪ la.

¹⁸ Yǎma n ɪem Nawēnne zɛ'am se'em na, de la to'ore la ɪsrayɛl dōma n yuun ɪem sela tɪ ba tā wun kalum dee yɛ zɛ'am na. Bǎma yuun ɪem na tǎŋa yɛ bugum n diti, la lika n ǎn lim, la kusebgo kǎte. ¹⁹ La ba wōm na benkonne peebgo, la kōa n tɔge, tɪ nɛrba la n yuun wōm na belem yetɪ, la da le tɔge pa'asɛ. ²⁰ Se'ere n soe la, ba ka tā wun to'oge ɛn yele se'em yetɪ: «Seka sǎn kalum tǎŋa la, baa a sǎn dena dūŋa, ba lobe ɛ na kuga ku» la. ²¹ Bōn-seba n yuun ɛŋe la bɔ'ɔrɪ la dabeem, halɪ tɪ Amoyisi yele yetɪ, ɛŋa zotɪ la dabeem, halɪ tɪ ɛŋa gōgra.

²² La yǎma ɪem na tǎŋa tɪ ba wi'iri tɪ Siyō tǎŋa n de vom dǎana Nawēnne tɛŋa, ɛŋa n de Zerizalem mɛŋa mɛŋa n boe Nawēnne yire, tɪ malekadōma tusa tusa bɔna mɪ. ²³ La ya ken ɪem na Nawēnne nɛrba lagsgo n de a kɔm-kēendōma tɪ ba yu'ura gulɛ Nawēnne yire la. La ya ɪem Nawēnne n de nɛrba wuu sarɪyadita. Ya ɪem na nɛr-seba n mase Nawēnne zɛ'am, dee mase sela woo puam na sɪsɪ zɛ'am. ²⁴ Yǎma ɪem na Azezi n de seka n boe Nawēnne la tōma tɛŋasuka botɪ Nawēnne bɪŋe nōor-paalga la tōma ɪɛ. A zum na n yese bɔ tōma la pa'ale la sela n ǎn sōŋa gǎnna Abelɪ zum na.

²⁵ ɪta-ya guusgo, da zagɛ ka selse seka n tɔgrɪ la ya ɪɛ la. Seba n yuun zagɛ ka selse nɛr-seka n kǎ'anɪ ba tɛŋa zuo la ka pōsɛ nǎmsgo. Bela, tōma sǎn zagɛ ka selse seka n boe Nawēnne yire la yetɔga, tōma kǎn yǎŋe pōsɛ. ²⁶ A kōa la yuun botɪ tɛŋa la mɪim mɛ, la ɪɛɛɛ wǎ, a bɪŋe la nōore yetɪ: «Mam wun le mɪim dūnia mɛ nōore ayɪla, la dagɪ dūnia mǎ'a, saazuum mɛ wun mɪim mɛ.» ²⁷ ɛn yetɪ a wun le mɪim nōor-ayɪla la, pa'ale mɛ tɪ sela tɪ a nǎam na wun mɪim mɛ sǎ'am bɔɪ, dee tɪ sela n kǎn tā'age mɪim sǎ'am na mǎ'a n wun weege.

²⁸ Bela, tōma n wun to'oge so'olum n kǎn sǎ'am na ɪyǎ, base-ya tɪ tɪ pu'usra Nawēnne a yel-sōnne, tōnna se'em n wun ǎna a sūure yɛlum bɔ'ɔra ɛ, la tɪ nǎ'asra ɛ, dee

zota ē. ²⁹ Lan de se'em na, tōma Nawēnne ān wu bugum n diti.

Ti wun ita se'em paage Nawēnne yem

13 Ken nōŋe-ya taaba wu sōbiisi la. ² Da base-ya sāama sāano ɽgo, ti nērba baseba ēŋe la bela, ēŋe malekadōma sāane dee ka bāŋe.

³ Tēra-ya seba n boe yu'a deem na yelle, wu yāma mē po bōna la yu'a deem na. Tēra-ya seba ti ba nāmsrɩ ba la yelle, wu yāma mēŋa n nāmsrɩ la.

⁴ Base-ya ti pɔgdire tara nā'asgo, dee da base ti dēgro tōoma bōna mī, se'ere n soe la, Nawēnne wun di nēr-seba n itɩ yalsɩ, la nēr-seba n tūuli la sarɩya mē.

⁵ Da base-ya ti ligri nōŋlum sōna ya. Base-ya ti ya sūure āna yēlum la yāma n tarɩ sela la, ti Nawēnne yetɩ: «Mam kān base fɔ, mam kān malɩn base fɔ.» ⁶ Bela n soe ti tōma nēra woo tāna wun yele la buraane yetɩ: «Zuudāana de la mam sōŋra, mam kān zoe dabeem.

Nērsaala tā wun ēŋe mam na bēm?»

⁷ Tēra-ya ya nēŋadōma n mōole Nawēnne yetɔga bɔ ya la yelle. Bise-ya ba vom n daan ān se'em ka paage ba kūm, ti ya mē ita bāma n bɔ sɩra ēŋe se'em na. ⁸ Azezi-krisi de la ēn ān se'em zaam, la zīna, la wakate wuu.

⁹ Da base-ya ti zāsŋɔ sāasɩ buuri to'oto'ore botɩ ya tu-uge. Sela n ān sōŋa de la ti base ti Nawēnne yel-sōnne bɔ'a la keŋe ti sūure, la, la da dēna ɽgo sɔa n de dia yelle, seba n dolɩ ɽgo bāma la ka yē yōoro.

¹⁰ Tōma tarɩ la kāabgo, ti Zifdōma n tōnnɩ ba kāabgo tōoma la ka tara sore ti ba naage tōma kāabgo la puam. ¹¹ Zifdōma kāabgo kēma nēŋadāana tarɩ la dūnsi zum kē'era Nawēnne zē'e-sōŋɔ la kāabra tōon-be'ero taale basga ūyā, dee tara ba nēnnɔ na yesra tēŋa la kēnkernja yō'ora. ¹² La de la bela ti Azezi mē yese tēŋa la kēnkernja ka ki, ti a mēŋa zum malge nērba ti ba āna sōŋa Nawēnne zē'am. ¹³ Bela, ti yese-ya sēŋe a zē'am tēŋa la kēnkernja ka po sake pɔ'ɔre la. ¹⁴ Tōma ka

tarɩ tēŋa dūnia wā zuo n boe wakate wuu ūyā, tōma eerɩ la tēn-seka n sēm na.

¹⁵ Azezi ūyā, ti nā'asra Nawēnne wakate wuu ti la āna wu kāabgo la, la boorɩ ti la yetɩ ti nōore yetɔga zēke a yu'ure pa'ale ēn de seka. ¹⁶ Da base-ya ɩr-sōma ɽgo, la taaba sōŋre, ti tōon-bāma n ān wu kāabgo n itɩ Nawēnne sūure yēlum.

¹⁷ Sakra-ya ya nēŋadōma nōore, dee nanna ba yetɔga. La de la bāma n bɩsrɩ yāma n dolɩ Nawēnne sore la yelle, ba wun ka tɔge pa'ale Nawēnne bāma n bise ya yelle se'em mē. ēŋe-ya ya wun ēŋe se'em ti ba tā'age tōm ba tōoma la sū-yēlga da yōnna, ti bela ka tarɩ yōoro bɔ ya.

¹⁸ Pu'usra-ya Nawēnne bɔ'ɔra tɔ. Tōma mi ti sūure puam mē ti tōma ka ēŋe be'em, tōma boorɩ mē ti ti yel-ɩre āna sōŋa sela woo puam. ¹⁹ Mam sosrɩ ya mē zozo'e ti ya pu'usra m ūyā ti m yē sore leme wa'am ya zē'am tɔtɔ.

Pu'usgo, la ba'asgo yetɔga

²⁰ La de la Nawēnne n de sū-mā'asum dāana n vo'oge ti Zuudāana Azezi, ti a bɩsra tōma yelle wu dūnsiinke'ema, a zum na ti Nawēnne dɩke bīŋe nōore la tōma wakate n ka ba'asrɩ la ūyā. ²¹ Nawēnne wun base ti ya tā'age ita sela woo n ān sōŋa, dɔla a yem n boorɩ se'em. A wun base ti sela n ān a sūure yēlum ēŋe ti puam, Azezi-krisi ūyā, ēŋa n de seka n mase nā'asgo wakate n ka ba'asrɩ. Amina.

²² M sōbiisi, mam sosrɩ ya ti ya sake to'oge kā'anɔ yetɔg-bāna wā, ti mam n gulse ya gōn-seka wā ka zo'oge. ²³ Bāŋe-ya ti ba yo'oge ti sōbia Atimōtɩ base mē, a sān wa'am tɔtɔ, mam na ēŋa wun doose taaba wa'am wa kaage ya.

²⁴ Pu'use-ya ya nēŋadōma, la nēr-seba wuu n de Nawēnne nērba. Itali dōma pu'usrɩ ya.

²⁵ Nawēnne yel-sōnne wun bōna la ya wuu.

Azaku

Bilgre

Nërba zozo'e tē'ese ti la de la Azakı n de Azezi yibga la n gulse gōŋɔ wā. A gulse bɔ la Nawēnne nērba wuu n wurge bɔna dūnia zuo. A gulse pa'ale ba la sela ti ba ɪti ti la ka āna sōŋa, pa'ale ba ban mase ti ba vɔa se'em wakate wuu.

Azaku tɔge la yela buuri to'oto'ore yelle:

A tɔge la yem yelle, la bōntarsōm, la nōŋɔ yelle, la yelle sǎn paage tōma, la tōon-be'ero ɪrgɔ yelle. A yeti tōma sǎn yeti tōma dolı la Nawēnne, la mase me ti ti ita Nawēnne n ye le se'em na (sapıtrı 1).

A yeti la ka mase ti ti tū'usra nērba, dee pa'ale ti bɔ sira, la tōon-sōma dolı la taaba (sapıtrı 2).

A yeti ti guuse ti mēŋa la ti nōore yetɔga, dee pa'ale yem sira sira n de seka (sapıtrı 3).

La a kǎ'an na seba n wē'eri nōke'ene, la nēr-seba n nōŋe bōnɔ, la nēr-seba n zergrı taaba, la seba n de pa'al-m-mēŋa dōma, la seba n de bōntatba (4:1—5:6).

Gōŋɔ la ba'asgɔ, a kǎ'an na Azezi nērba yeti ba tara sū-mǎ'asum. Yelle sǎn paage ba, bu la sǎn dena sū-yēl-ga, bu bǎ'ası, ba pu'use Nawēnne (5:7-20).

Azaku gōŋɔ wā pa'ale ti fu sǎn bɔ Nawēnne sira, fu tōoma n wun pa'ale ti fu bɔ sira. Bela, nēra sǎn yeti ēŋa bɔ Nawēnne sira, dee ka tōnna tōon-sōma, la de la zǎŋa (2:26).

¹ Mam Azaku n de Nawēnne, la ti Zuudāana Azezi-krisi tōntōnna n gulse gōŋɔ wā pu'usra Nawēnne nērba wuu n wurge bɔna zē'a woo la.

Yelle sǎn paage nēra

² M sobiisi, nǎmsgɔ to'oto'ore sǎn paage ya Azezi sore la puam, ya dıke ba ti ba dena ya sū-yēlga zōnzōnnɔ, ³ se'ere n soe la, ya mi ti nǎmsgɔ sǎn paage ya, ya bɔ sira la puam, ti ya yǎŋe wıbe, la wun botı ya mōrge ze'ele la kǎŋkǎŋe. ⁴ La mōrge-ya ze'ele kǎŋkǎŋe ka paage a teka, ti ya wun mase sela woo puam, dena nērba n bı, ti sela ka pɔ'ɔge ya.

⁵ Yem sǎn pɔ'ɔge ya nēr-seka, a sose Nawēnne n bɔ'ɔrı nērba wuu la yemleego dee ka mōŋra ba la, ti a wun bɔ ē. ⁶ La a sǎn sose ē, dēnı ti a bɔ ē sira, da sē'ena baa fēfēe. Se'ere n soe la, nēr-seka woo n sē'enı, a ān wu ko-kāte ko-mı'isi ti kusebgo vugri wē'era ba ti ba yegna se'em na. ⁷ Nēr-ēŋa buuri da tara putē'ere ti a wun to'oge sela Zuudāana la zē'am. ⁸ A de la nēra n de putē'era bayi dāana, ti a yem yɔɔra ēn ɪti bōn-seba la wuu puam.

⁹ La mase ti sobi-seka n de nasa ēŋe sū-yēlga, ti Nawēnne zēkrı ē me. ¹⁰ La bōntarsa mē ēŋe sū-yēlga Nawēnne n sikri ē na, se'ere n soe la, a bōntarsōm na wun tole wu mō-puuro la. ¹¹ Wuntēŋa sǎn wōŋe mōogɔ, a puuro la zēkrı me suura kuta, ti ba dasānne na bɔta. Bōntarsa mē ān na bela, a wun ki me a bōntarsōm na tōoma puam.

¹² Nēr-seka n wıbri nǎmsgɔ puam tarı zu-yēlga. Se'ere n soe la, ēn ze'ele kǎŋkǎŋe la, Nawēnne wun bɔ ē bɔ'a n de vɔm n ka ba'asrı ti a bıŋe nōore ti a bɔ seba n nōŋe ē na.

¹³ Yelle sǎn paage nēra botı a bɔɔra ti a ēŋe be'em, a da yeti Nawēnne n base ti ēŋa bɔɔra ti a ēŋe be'em. Sela ka tā wun botı Nawēnne ēŋe be'em. La Nawēnne mē ka botı nēra bɔɔra ti a ēŋe be'em. ¹⁴ La de la nēra woo yemleego n de be'em n pǎ'asrı ē, botı a kē'era yela puam. ¹⁵ La be'em yemleego sǎn yōke puure, a dɔ-grı la tōon-be'ero. La tōon-be'ero la sǎn wa bı, a sēm na kūm.

¹⁶ M sobi-nōŋrısı, da pǎ'ase-ya ya mēŋa. ¹⁷ Bɔ'a wuu n ān sōŋa, la bɔ'a n mase wuu ze'eti la saazuum, Nawēnne n de peelem dāana la zē'am. ēŋa n nǎam bōn-seba wuu n boe saazuum nēera peelem, ti ba tēera, la ēŋa ka teerı, a ka tarı lika. ¹⁸ ēŋa mēŋa n boorı ti a base ti a sira yetɔga la bɔ tōma vɔm. A ēŋe bela ti tōma dena la pɔspɔsı dōma bōn-seba wuu ti a nǎam na puam.

Selsra-ya, dee ita Nawēnne n ye le se'em na

¹⁹ M sobi-nōŋrısı, bǎŋe-ya bōn-ēna wā sōŋa, nēra woo mōrge selsra sōŋa, la a mǎ'age a mēŋa tɔgra, la a da isgra sūure tɔtɔ. ²⁰ Nērsaala sūure sǎn isge, a ka ɪti sela n mase Nawēnne zē'am. ²¹ Bela, base-ya sela n de tōon-dēgrɔ buuri wuu, la sela n de putuulɔgɔ wuu, dee sike ya mēŋa to'oge Nawēnne yetɔga la ti a dıke ēŋe ya sūure puam, n tā wun fǎage ya la.

²² Da pã'ase ya mēŋa, dēna-ya nērba n sakrı Nawēnne yetōga, da dēna-ya nērba n selsrı mā'a. ²³ Nēr-seka woo n selsrı yetōga la, dee ka sakra ita lan yele se'em na, a dāana ān wu nēra n bise bısga puam yē a mēŋa n ān se'em, ²⁴ la ēn bise a mēŋa k'ulum dee fōrge la, a dare yīm ēŋa n ān se'em na mē. ²⁵ La nēr-seka n tarı Nawēnne lō n mase sōŋa n yolsrı nērba la, dee sake ē sōŋa ita lan yele se'em na, ēŋa dagı nēra n selsrı dee yīnna, ēŋa dāana tarı la sū-yēlga ēŋa n itı sela la puam.

²⁶ Nēr-seka woo n tē'esrı tı ēŋa de la nēra n doli Nawēnne, dee ka tāna a nōore yōkra, a pã'asrı la a mēŋa, nēr-ēŋa Nawēnne doosgo la de la zāŋa. ²⁷ Tı So Nawēnne n boorı tı tı dola ē se'em tı la āna sōŋa ka tara dēgrō n wāna: La de la fu bise kubsı la pōkōpa yelle ba nāmsgō puam, la fu guuse fu mēŋa la dūnia wā tōon-dēgrō.

Da tū'usra-ya nērba

2 M sōbiisi, yāma n sake tı Zuudāana Azezi-krisi n tarı na'am pāŋa la, da tū'usra-ya nērba. ² Tı dıke makre, wu yāma sān lagse taaba tı nēra n pire sālma nutua dee ye fu-sōma wa'am wa kē ya lagsgo la zē'a, tı nasa n mē ye fu-zōra kē, ³ tı yāma sān bise nēr-seka n ye fu-sōma la yele ē yetı: «Wa'am wa zī'ire kalam n de zē'e-sōŋ», dee yele nasa la yetı: «Ze saazuo, bu zī'ire tēŋa mam nāma zē'am wā.» ⁴ Yāma sān ēŋe wāna, yāma ka tū'usri nērba sūra? Bela, ya tarı la putē'e-be'ero bōkra nērba, yetı ayēma n gānnı ayēma.

⁵ M sōbi-nōŋrısı, selse-ya. Nawēnne looge la nēr-seba tı dūnia dōma bısrı tı ba de la nasdōma la, botı ba bō ē sūra dēna bōntatba, tı ba wun wa bōna a so'olum tı a bīŋe nōore tı a bō seba n nōŋe ē na puam. ⁶ La yāma pō'ırı la nasdōma. La dagı bōntatba n nāmsrı ya, dee yōgra ya sēnna sarıyaditba zē'am? ⁷ La de la bāma n pō'ırı Krisi yu'ur-sōŋ seka tı ba bō ya la.

⁸ Ya sān sake ita Nawēnne so'olum lō la n gulse Nawēnne gōŋ puam yetı: «Nōŋe fu tadāana wu fu mēŋa la», ya ēŋe sōŋa. ⁹ La ya sān tū'usra nērba, ya tōm na tōon-be'ego, la lō la pa'ale ya tı ya tōm na tōon-be'ego. ¹⁰ Nēr-seka sān sake lō la wuu, dee sı'ise ayıla tōm tōon-be'ego, a sı'ise la ba wuu. ¹¹ Nawēnne n yetı: «Da ēŋe yalsı» la, ēŋa n ken yetı: «Da ku nēra». La fu sān ka ēŋe yalsı, dee ku nēra, fu de la nēra n sı'ise lō la. ¹² Tōgra-ya dee tōnna tı la mase la lō n yolsrı nērba la, mina tı Nawēnne wun dıke la ēŋa di ya sarıya. ¹³ Nawēnne sān wa dita sarıya, a kān zoe ninbāalga la nēr-seka n ka zotı a taaba ninbāalga. Fu sān zoe nērba ninbāalga, Nawēnne mē wun zoe fu ninbāalga.

Bō sūra, la tōoma

¹⁴ M sōbiisi, nēra sān yetı, ēŋa bō Nawēnne sūra, dee ka tōnna tōoma n pa'alı bela, a yōorō de la bēm? Bō sūra ēŋa tā wun fāage ē mē bu? ¹⁵ Tı dıke makre, wu sōbia n ka tarı fuugo yeera, dee ka tara dita, ¹⁶ tı yāma nēra ayıla sān yele ē yetı: «Sēŋe la sū-mā'asum ka di tıge, dee ye fuugo tı wōrō da tara fō» dee ka bō ē sōŋre seka tı a boorı la, a yōorō de la bēm? ¹⁷ La mē de la bela la bō sūra, ya sān bō sūra tı la ka lagum na tōoma, a de la zāŋa.

¹⁸ La nēr-seka tā mē yetı, ayēma bō la sūra, la ayēma tōnnı la tōon-sōma. Mam wun yele ē yetı, pa'ale mam fu bō sūra la n ka lagum na tōoma la, tı mam wun dıke m tōon-sōma la pa'ale tı mam bō sūra. ¹⁹ Fōn sake mē tı Nawēnne ayıla mā'a n boe. La ān sōŋa. Kulkā'arsı mē sake la bela, dee gōgra la dabeem. ²⁰ A ka tarı yem dāana, fōn boorı mē tı m pa'ale fō tı fu sān bō sūra tı la ka lagum na tōoma, a ka tarı yōorō? ²¹ Tı yaaba Abraham tı Nawēnne yuun yetı a mase ya la, la de la a tōoma iŷā, ēn yuun dıke a dayua A'izakı tı a kāabe bō Nawēnne na iŷā. ²² Fu yē mē tı a bō sūra, la a tōoma la lagum na taaba. A tōoma la iŷā n botı a bō sūra la mase sōŋa sōŋa. ²³ Bela tı Nawēnne gōŋ n gulse se'em na ēŋe. La yetı: «Abraham bō la Nawēnne sūra, tı Nawēnne bise a bō sūra la, yetı a mase mē ēŋa zē'am.» Tı Nawēnne wi ē yetı a sūre. ²⁴ Ya yē tı la de la nēra tōoma n botı Nawēnne yetı a mase ya, la dagı a bō sūra mā'a iŷā.

²⁵ La yuun mē de la bela la Arahābı n de pōka n itı yalsı la. Zıfdōma n yuun tōm nērba la, tı a to'oge ba sugē a yire, botı ba doose sore ayēma kule la, tōon-ēŋa iŷā tı a mase Nawēnne zē'am.

²⁶ Nēra sıa sān fōrge deege ē, a iŷā de la kūm. La mē de la bela, nēra sān bō sūra tı la ka lagum na tōoma, la de la zāŋa.

Tara ya zuluŋa sōŋa

3 M sōbiisi, da kān bōra-ya tı ya wuu dēna karēn-sāandōma. Se'ere n soe la, ya mi tı tōma seba n de karēnsāandōma la sarıyadia n wun dēna toogo gānna. ² Tōma wuu tuuri mē zozo'e. Nēra sān ka tuura a yetōga puam, a de la nēra n mase sela woo puam, tāna wun yōkra a mēŋa sōŋa sōŋa. ³ Tōma sān ēŋe wiiri nōore salba tı ba sake ita tun boorı se'em, ba iŷā la wuu itı la tōma n boorı se'em. ⁴ Ken bise-ya ōorō n ān se'em na, baa ban kārge se'em, dee tı kuseb-kāra vugra zā'ara ba la, ba tarı la dō-pıka wēgrā ba, tı ba sēnna we'esa zē'e-seka tı seka n tarı ba la boorı. ⁵ Nērsaala zuluŋa mē ān na bela, a de la iŷā zē'a ayıla n ān pıka pıka, dee tōgra yel-kāra.

La de la bug-pıka n tā wun di we-kāte wuu. ⁶ Zuluŋa mē ān wu bugum na. A boe la tı iŷā la puam tōnna tōon-be'ero tı la taara tı iŷā la wuu. A bugum na ze'eti

la bug-tēja sã'ana tı vɔm wuu. ⁷ Nêrsaala tã dũnsi buuri wuu, la bõn-ẽgla buuri wuu, la bõn-vuula buuri wuu, la seba n boe ko'om puam wuu mɛ, botı ba sakra ẽ. ⁸ La nêra ka boe n tã wun yãŋɛ a zılɔŋa. A pıre la yetɔg-be'ero tɔgra ka gɔ'ɔra, a tarı la yabga n kuuri. ⁹ Tı tarı la ẽŋa pu'usra Zuudãana n de tı sɔ la a yel-sõn-nɛ, dee ken tara ẽ kã'ara be'em bɔ'ɔra nêrba tı Nawên-nɛ nãam tı ba ãna wu a mēja la. ¹⁰ Kã'a-be'ero, la kã'a-sõma ze'eti la nõ-ẽŋa ayıla puam yesra. M sɔbiisi, la ka mase tı la dɛna bela. ¹¹ Ko-sõma, la ko-be'ero tã wun bulla bulnifo ayıla puam? M sɔbiisi, kênkãŋa tã wun wɔnna tã'ama? ¹² Bu sênsãabga tã wun wɔnna kênkãma? Bela, bulga n bulli ko-be'ero ka tã wun bulla ko-sõma.

Yem n ze'ele Nawênne zẽ'am

¹³ ãne n boe ya puam tẽ'ese tı ẽŋa tarı yem, la bãŋrɛ? A ẽŋɛ yel-ır-sõŋɔ, dee sike a mēja pa'alɛ tı a tarı yem. ¹⁴ La, la sãn dɛna tı ya ıtı la sũure, dee gẽela taaba, da wẽ-ya yõ'ogo tı ya de la yem dõma parım sı'ıse sɔra la. ¹⁵ Yem ẽŋa dagı yem seka n ze'ele Nawênne zẽ'am. A de la tēja wã zuo bõnɔ, a de la nêrsaala bõnɔ, a ze'ele la Asũtãana zẽ'am. ¹⁶ Sũure la gẽelɔ n boe zẽ'e-seka la, tõon-yooro, la tõon-be'ero buuri wuu boe la bilam. ¹⁷ La yem n ze'ele Nawênne zẽ'am ãn na sõŋa ka tara dẽgrɔ, dee botı nêra tara sũ-mã'asum la a taaba, la sũ-bugsum, ita sugrı, zɔta nêrba ninbãalga zozo'e, tõnna tõon-sõma zozo'e, ka bɔkra nêrba, dee ka dɛna pulibsum dãana. ¹⁸ Sũ-mã'asum dõma n botı sũ-mã'asum bɔna nêrba tẽŋasuka la tõoma de la tõon-sõma n mase Nawênne zẽ'am.

Da base-ya tı dũnia yemleego sɔna ya

⁴ Zẽbre la nõke'ema n boe ya tẽŋasuka la ze'ele la be? La de la yan boorı se'em n de be'em n boe ya puam botı ya ita bela. ² Ya boorı la sela dee ka yẽta, bɔɔra tı ya kuura nêrba. Ya ıtı la sũure la ya taaba bõnɔ dee ken ka yẽta, bela tı ya zẽbra dee wẽ'era nõke'ema la taaba. Yan ka tarı la, la de la yãma n ka sose Nawên-nɛ na ãyã. ³ La ya sãn sɔsra mɛ dee ka yẽta, yãma n sosrı se'em na ka ãn sõŋa. Ya sosrı tı ya ẽŋɛ la ya yem n boorı se'em. ⁴ Yãma ka dolı Nawênne la sɔra. Yãma ka mi tı seka n nõŋɛ dũnia wã lɔgrɔ, la de la be'em la Nawênne? Bela, nêr-seka woo n boorı tı a yõge sıtɔ la dũnia wã lɔgrɔ, a wun dɛna la Nawênne be. ⁵ Bu yãma tẽ'ese tı lan gulse se'em Nawênne gõŋɔ puam na de la zãŋa? La yetı: «Nawênne sɔa la tı a ẽŋɛ tı puam na, boorı tı ẽŋa mã'a n sɔna tɔ.» ⁶ La a ıtı la yel-sõnne n ãn sõŋa gãnna bɔ'ɔra tɔ, wu lan gulse yetı: «Nawênne zagsrı zẽk-m-mēja dõma mɛ, dee ita sik-m-mēja dõma yel-sõnne.»

⁷ Bela, dıke ya mēja bɔ Nawênne, dee sı'ıse Asũtãana, tı a wun zoe dee base ya. ⁸ Lem-ya Nawên-

nɛ, tı a mẽ wun lem ya. Tõon-be'ero dõma, peege ya nu'usi, putẽ'era ayi dõma, peege ya sũure. ⁹ Bãŋɛ-ya ya ninbãalga, kaase-ya fable la sũ-sã'ãŋɔ. Base-ya tı ya lɔ'ɔrɔ lebge kuunɔ, tı ya sũ-yẽlga lebge sũ-sã'ãŋɔ.

¹⁰ Sike-ya ya mēja Nawênne nẽŋam, tı a wun zẽke ya.

¹¹ M sɔbiisi, da tɔgra-ya taaba yelle be'em. Nêr-seka n tɔge a tadãana yelle be'em, bu zergra ẽ, a tɔgrı la Nawênne lɔ la be'em dee zergra ẽ. La fu sãn zergra lɔ la, fu ka sakrı lɔ la, fu lebge la lɔ la sarıyadita.

¹² Nawênne mã'a n bɔ'ɔrı lɔ la, la ẽŋa mã'a n diti sarıya, la ẽŋa mã'a n tã wun fãage, bu sã'am. La fõn tẽ'ese tı fõn de la ãne, dita fu tadãana sarıya?

Da wẽ'era-ya yõ'ogo

¹³ Selse-ya! Yãma seba n yetı: «Zĩna bu beere, tõma wun sẽŋɛ la tẽn-ẽna ka ẽŋɛ yuune, leebe yẽ yõorɔ» la, ¹⁴ ya ka mi ya vɔm n wun ãna se'em beere. Ya ãn wu pi-ka n yu, tı la ẽŋɛ fẽe tı a pilge. ¹⁵ La de nı na ya ẽn yetı: «Nawênne sãn bɔɔra, tı tõma vɔa, tõma wun ẽŋɛ la wãna la wãna.» ¹⁶ La yãma pa'alı la ya mēja dee wẽ'era yõ'ogo yãma n boorı tı ya ẽŋɛ sela la puam. Pa'al-m-mēja wãna buuri wuu de la be'em.

¹⁷ Nêr-seka woo n mi sela n ãn sõŋa, dee ka ita, a tøm na tõon-be'ero.

Bõntatba yelle

⁵ Bõntatba, selse-ya! Kaasra-ya dee fabla, se'ere n soe la, toogo n sêm ya zuto. ² Ya bõntarsõm na wun põ'oge mɛ. Bõn-mõgla n wun mõge ya futo la. ³ Tẽŋanzẽem n wun kẽ ya sãlma, la ya zũuro la. Tẽŋanzẽem na n wun pa'alɛ tı ya ka ẽŋɛ sõŋa, la a wun dı ya wu bugum na. Yãma lagsrı la bõntarsõm bĩŋra dũnia ba'asgɔ wakate. ⁴ Tõntõnıba n tõnnı ya vato puam tı ya mõŋɛ ba yɔɔrɔ la kelli mɛ. Nêr-seba n lagse ya bõnkɔɔla la kelli mɛ, tı Zuudãana Nawênne n de ke'ẽŋo wuu dãana la wõm. ⁵ Dũnia zuo ya vɔa la na'am puam, ita ya yem n boorı se'em, dita tıgra nõbra, ãna wu dũnsi la gu'ura kua daare. ⁶ Ya tɔge la sɔra dãana yelle ku, yetı ya ku ẽ, tı a ka tãna wun sı'ıse ya tı ya ku ẽ.

Kã'ãŋɔ

⁷ M sɔbiisi, mã'ara ya sũure gu'ura Zuudãana la lemŋo. Bıse-ya kaara n mã'arı a sũure se'em gu'ura tı a va'am bõnkɔɔla bie wun wa bı sõŋa. A ẽn gu'ura mɛ tı sig-saaga wa ni, tı poorum saası ni, tı bõnkɔɔla la bie bı sõŋa. ⁸ Bela, yãma mẽ mõrge mã'ara ya sũure, tara buraane, tı Zuudãana la lemŋo lem mɛ.

⁹ M sɔbiisi, da yõnna-ya taaba, tı Nawênne da wa dı ya sarıya. Bıse-ya, sarıyadita la ze la zanõrum. ¹⁰ M sɔbiisi, Nawênne nõtɔ'ɔsrıba la n yuun tɔge a yetɔga, tı ba nãmse ba, tı ba mã'age ba sũure la, ya mẽ ẽŋɛ wu bãma n ẽŋɛ se'em na. ¹¹ Tõma yetı mɛ tı seba n mõrge

ze'ele kãḡkãḡe Nawēnne sore puam na, de la zu-yēlga dōma. Ya wōm ban tɔge Azɔɔbi n ze'ele kãḡkãḡe se'em yelle, la ya yē ba'asgo Nawēnne n ēḡe se'em bɔ ē. Se'ere n soe la, Nawēnne de la ninbāal-zɔta, dee tara nērba zīile.

¹² M sobiisi, sela n gānni wuu de la ya da pɔɔ. Da pɔɔ saazuum, bu tēḡa, bu sela ayēma. Base-ya ti ya «ēe» dena «ēe», ti ya «ayei» dena «ayei», ti Nawēnne da di ya sarıya.

¹³ Nēra sãn bɔna ya puam nãmsra, a pu'use Nawēnne. Nēr-seka sūure n ǎn yēlum, a yōom yōom-sōma pēge Nawēnne. ¹⁴ Nēra sãn bɔna ya puam bē'era, a wi Nawēnne nērba kēma, ti ba ēḡe kaam ēḡe a zuugo la Zuudāana Azezi yu'ure, pu'use Nawēnne bɔ ē. ¹⁵ Ban bɔ Nawēnne sira pu'use la, la wun fāage bā'ara la me, Zu-

udāana la wun bɔ ē ĩmā'asum me ti a isge. La a sãn tōm tōon-be'ero, a wun base ē taale. ¹⁶ Bela, pelge ya pua tɔge ya tōon-be'ero pa'ale taaba, pu'use bɔ taaba, ti ya wun yē ĩmā'asum. Nēra n mase Nawēnne zē'am pu'usgo tōnni me la pãḡa zozo'e. ¹⁷ A'eli yuun de la nēr-saala wu tōma la, la a pu'use me sose Nawēnne la a sūure wuu ti saaga da ni, ti saaga ka tɔke tēḡa yuuma atã la wōr-sıyoobi. ¹⁸ Ti a le pu'use, ti saaga ni, ti bōnkɔɔla wɔm biε.

¹⁹ M sobiisi, ya nēra ayıla sãn burge dee base sira sore, ti nēra tarı ē leme wa'am, ²⁰ ya bãḡe ti nēr-seka woo n tarı tōon-be'ero dāana a tōon-be'ero sorɔɔgo zuo leme wa'am, a fāage la tōon-be'ero dāana kūm puam, ti Nawēnne wun base a tōon-be'ero zozo'e taale.

1 Pilyeeri

Bilgre

Apilyeeri gulse gön-ëna wā bɔ la Azezi nērba n wurge bɔna Azi-mineeri so'olum tēnsi puam. La de la Apoli, bu nēr-seba n doose la ē tōm na n mōole ba Nawēnne kō-yēlga. Ba daan yē la nāmsgɔ, ban bɔ Azezi sira la īyā. Apilyeeri gulse tɪ a bɔ ba la buraane Azezi sore doosgo puam, tɪ ba wun ze'ele kārjkāŋe nāmsgɔ wakate, wu Azezi mēŋa n nāmse tɪ tōma yē fāare la.

Apilyeeri tēege ba la ban tarɪ putē'ere gu'ura sela Nawēnne zē'am, Azezi n ki dee vo'oge īyā la.

A kā'an ba yetɪ ba vɔa la pupeelem wu Azezi nērba n mase tɪ ba vɔa se'em. A yetɪ ba mase tɪ ba ita wu Azezi n ēŋe se'em a nāmsgɔ puam na. A kā'an ba la kā'aŋɔ buuri to'oto'ore tɪ ba bāŋe ban wun ēŋe se'em sela woo puam, tɪ seba n ka bɔ Azezi sira la wun yē ba tōon-sōma la, nā'ase Nawēnne.

¹ Mam Apilyeeri n de Azezi-krisi Tōntōnna n gulse gōŋɔ wā bɔ'ɔra yāma seba tɪ Nawēnne looge tɪ ya dēna a nērba wurge bɔna Pō, la Galatɪ, la Kapadɔsɪ, la Azi, la Bitini so'olum puam dēna sāama la. ² La de la tɪ Sɔ Nawēnne n looge ya wu ēŋa n dēŋe looge a yem se'em na, tɪ a Sɪa welge ya to'ore, tɪ Azezi-krisi zɪum peege ya tɪ ya āna sōŋa, sakra a nōore.

Nawēnne wun ēŋe ya yel-sōnne, dee bɔ ya sū-mā'asum zozo'e.

Tɪn tarɪ putē'ere gu'ura sela

³ Tɪ pu'use-ya Nawēnne n de tɪ Zuudāana Azezi-krisi Sɔ la a yel-sōnne. A ninbāal-zua n zo'oge la īyā tɪ a botɪ tɪ yē vɔm paalga, Azezi-krisi n ki dee vo'oge la īyā. Bela tɪ tɪ tara putē'ere wakate wuu gu'ura sela tɪ tɪ bɔ sira la, ⁴ dee mina tɪ tɪ wun yē sela tɪ Nawēnne bīŋe tɪ a bɔ a nērba. Bōn-bāma de la sela n ka sā'anɪ, n ka pō'orɪ, tɪ ba sōŋa ka botɪ, tɪ Nawēnne bīŋe a yire tɪ a bɔ ya. ⁵ Yāma n bɔ sira la, Nawēnne gu'uri ya mē la a pāŋa halɪ wun ka paage ba'asgo wakate fāage ya ba'ase.

⁶ Bela īyā tɪ ya tara sū-yēlga, baa la de ya sān yēta yela to'oto'ore n nāmsɪ ya wakate fēe lēle wā. ⁷ Nāmsgɔ la de la sela n makɪ bɪsra ya bɔ sira la n ān se'em. Sālma de la sela n sā'anɪ, la ba ēn dɪke ē make la bugum bɪse ēn ān se'em. La yāma bɔ sira la tarɪ yōoro mē zozo'e gānna sālma. Bela tɪ la makra ya bɔ sira la bɪsra, tɪ ya sān ze'ele kārjkāŋe, ya wun yē pēka, la nā'asgo Azezi-krisi lemŋo daare. ⁸ Yāma nān ka yē ē, dee nōŋe ē, ya nān ka yēti ē, dee bɔ ē sira, bela tɪ ya ita sū-yēlga zozo'e n ka tā wun pa'alē. ⁹ Se'ere n soe la, ya yē fāare mē n de ya bɔ sira la yōoro.

¹⁰ Nawēnne nōtɔ'ɔsrɪba la n yuun tɔge yel-sōnne na tɪ Nawēnne wun wa ēŋe bɔ ya la, yuun ε mē vēese tɪ ba bāŋe fāare wā yelle. ¹¹ Azezi-krisi Sɪa yuun boe la ba mē, dēŋe pa'alē ba yetɪ Krisi wun wa yē la nāmsgɔ dee

yāŋa yē na'am pāŋa. Tɪ ba yuun ɛera tɪ ba bāŋe wakate seka tɪ bōn-bāma wun ēŋe, la lan wun wa doose se'em tɪ la ēŋe. ¹² Tɪ Nawēnne yuun pa'alē ba tɪ yel-seba tɪ ba mōolɪ la dagɪ bāma mēŋa īyā, la de la yāma īyā. Yel-bāma n bela tɪ seba n mōole kō-yēlga la tɔge bɔ ya. La de la Nawēnne n tōm a Sɪa tɪ a wa'am wa bɔ ba pāŋa tɪ ba tɔge. Tɪ baa malekadōma la mēŋa bɔɔra tɪ ba wōm a vōore.

Tɪ dēna pupeelem dōma

¹³ Bela īyā, yōke ya tagsgɔ tara ya mēŋa sōŋa, dee gu'ura la ya sūure wuu yel-sōnne na tɪ ya tarɪ putē'ere gu'ura tɪ Nawēnne yetɪ a ēŋe bɔ ya Azezi-krisi lemŋo wakate la. ¹⁴ Sakra-ya Nawēnne nōore, da le vɔa-ya wu yāma n daan nān ka bāŋe Nawēnne sira, tɪ ya yem-leego botɪ ya bɔɔra sela n de be'em na. ¹⁵ Dēna-ya pupeelem dōma ya yel-ɪre wuu puam, wu Nawēnne n wi ya la n de pupeelem dāana se'em na. ¹⁶ La gulse Nawēnne gōŋɔ puam tɪ Nawēnne yetɪ: «Dēna-ya pupeelem dōma, tɪ mam de la pupeelem dāana.»

¹⁷ Yāma n pu'usrɪ Nawēnne na, ya wi'iri ē tɪ ya Sɔ. Nawēnne ka tū'usri nērba. A diti nērsaalba sarɪya la sira, wu nēra woo tōoma n de se'em na. Bela, pa'alē-ya tɪ yāma nannɪ ē ya yel-ɪre wuu puam, yāma n ken bɔna dūnia zuo wā.

¹⁸ Nawēnne fāage ya mē vɔm seka n ka tarɪ yōoro tɪ ya daan zāsum ya yaabdōma zē'am na puam. Ya mi tɪ la dagɪ bōn-seba n sā'anɪ wu sālma, bu zūuro tɪ a dɪke yɔ fāage ya. ¹⁹ La de la Krisi zɪum n tarɪ pāŋa la. Ba ku Krisi la tōma īyā wu pebila n ān sōŋa dee ka tara zānne. ²⁰ Nawēnne yuun pōn looge ē mē halɪ lan dēŋe dūnia nāaŋɔ, yāŋa botɪ a wa'am dūnia ba'asgo wakate wā yāma īyā. ²¹ Krisi īyā tɪ ya bɔ Nawēnne sira, Nawēnne n vo'oge Krisi, bɔ ē na'am pāŋa, bela tɪ ya dɪke ya bɔ sira, la yan tara putē'ere gu'ura sela la te'ege Nawēnne.

²² Yāma n sake sira la, ya lebge la pupeelem dōma, ti ya nōŋe ya sōbiisi la nōŋlum sira sira. Bela, nōŋe-ya taaba zozo'e la ya sūure wuu. ²³ Ba dōge yāma la dōg-paalga, la dagi nērsaala dōka n bō'wri wōm seka n sā'anū la, la de la Nawēnne yetōga n vōa dee bōna wakate wuu la, n boti ya yē dōg-paalga tara wōm n ka ba'asri. ²⁴ La gulse Nawēnne gōŋo puam yeti: «Nēr-saala woo ān wu mōoro, la a sōŋa la wuu ān wu mō-puuro la. Mōoro zēkri mē, ti ba puuro la suura. ²⁵ La Nawēnne yetōga boe la wakate n ka ba'asri.» Yetōg-ēŋa n de kō-yēlga la ti ba mōole bō ya la.

2 Bela, base-ya putuulgo wuu, la pōmpōrŋo, la pulibsum, la sūure, la taaba pō'wre. ² Nōŋe-ya Nawēnne yetōga wu bileesi n nōŋe ba ma bī'isum mā'a la. Ti a wun base ti ya bi Azezi-krisi sore doosgo la puam, yē fāare. ³ Ti yāma bāŋe Zuudāana la n ān sōŋa se'em mē.

Nawēnne mēŋa nērba

⁴ Lem-ya Zuudāana n de wōm dāana la zē'am, ēŋa ān wu kug-seka ti nērba zagse, ti Nawēnne looge ē ti a tara yōoro zozo'e. ⁵ Yāma mē vōa mē. Base-ya ti Nawēnne dūke ya ti ya āna wu kuga mē deego ti a Sīa bōna mī, ti ya āna wu kāabgo kēma bōna mī tōnna wu Nawēnne Sīa n boori se'em, ti la paara a yem, Azezi-krisi iŋā. ⁶ La gulse Nawēnne gōŋo puam yeti:

«Bise, mam looge la kugre n taru yōoro zozo'e ēebe m deego Siyō,

ēŋa n de kugre n boti deego la tara pāŋa.

Nēr-seka n bō ē sira, yānne kān yōke ē.»

⁷ Yāma seba n bō ē sira la, a taru la yōoro zozo'e bō ya. La seba n ka bō ē sira la, la gulse ba yelle yeti:

«Kug-seka ti tōnmētba zagse la n lebge kugre n boti deego la tara pāŋa.»

⁸ La ken gulse yeti:

«La de la kug-ēŋa n wun base ti nērba wē'era nāma, dee dena tāmpī-seka n wun base ti ba lui.»

Ban wē'eru nāma la, la de la ban ka bō Nawēnne yetōga sira la iŋā, wu lan mase ti la ēŋe ba se'em na.

⁹ La sān dena yāma, yāma de la buuri ti Nawēnne looge, ya de la ēŋa n de naba la kāabgo kēma, dee ken dena a nērba n welge to'ore tara pupeelem. A wi ya la lika puam, taru yese a peelem n ān sōŋa zozo'e puam, ti ya boti nērba bāŋe a tōon-kāra la. ¹⁰ Kurum, ya daan dagi Nawēnne nērba, la leeē wā ya de la a nērba. A daan ka zoti ya ninbāalga, la a yāŋa zoti ya ninbāalga mē.

Krisi nērba yel-ure

¹¹ M sir-nōŋrūsi, yāma de la sāmā la kōos-weto dūnia zuo, bela mam kā'anū ya mē ti ya base nērsaalba n boori se'em n de be'em n sā'anū ya la. ¹² Base-ya ti ya yel-ure āna sōŋa nēr-seba n ka doli Nawēnne na

tēŋasuka, ti baa ba sān dōta ya yeti ya de la tōon-be'ero dōma, ba wun yē ya tōon-sōma la, nā'ase Nawēnne a wa'anŋo daare.

¹³ Sakra-ya dūnia pānsi dōma wuu Zuudāana Azezi iŋā. Sakra-ya na-keko n soe ke'engo wuu, ¹⁴ la ya sakra gōmnadōma ti a tōm ti ba sūbri seba n tōnni tōon-be'ero, dee nā'asra nēr-seba n tōnni tōon-sōma la.

¹⁵ Se'ere n soe la, Nawēnne n boori se'em de la ya ita sōŋa, base ti nēr-seba n ka mi sela dee tōgra gōon-yetōga la go'oge. ¹⁶ Ita-ya wu nērba n soe ba mēŋa, la da dūke-ya yan soe ya mēŋa la ti la dena sela n boti ya tōnna be'em, tōnna-ya wu Nawēnne tōntōnba n mase ti ba tōnna se'em na. ¹⁷ Nanna-ya nērba wuu, nōŋe ya sōbiisi, zōta-ya Nawēnne, nanna-ya na-keko.

¹⁸ Tōntōnba, sakra-ya ya zuudāandōma dee zōta ba. La, la dagi seba n de nēr-sōma, la sū-bugsum dōma la mā'a, sakra-ya baa seba n de nēr-tōosi la. ¹⁹ Nēra sān sakra nāmsoŋo n ka mase ni ti a nāmse, ēn sakri Nawēnne na iŋā, la de la yel-sōnne. ²⁰ Fu sān tōm na tōon-be'ero ti ba nāmsra fō ti fu sake wībra, a ka taru yōoro. La fu sān tōm na tōon-sōma ti ba nāmsra fō, ti fu sake wībra, la de la yel-sōnne Nawēnne zē'am. ²¹ La de la bela iŋā ti Nawēnne wi ya. Krisi mē daan nāmse yāma iŋā mē, base māmsoŋo ti ya dōla a nabara ita wu ēŋa n ēŋe se'em na. ²² A daan ka tōm tōon-be'ego, la pōmpōrŋo ka yese a nōorum. ²³ Ban daan tu ē na, a ka lebse tu, la ban daan nāmse ē na, a daan ka zebe la ba, a dūke a mēŋa base la seka n diti sarūya la sira la nu'usum. ²⁴ Ōŋa n to'oge tōma zē'am ki dō-puurnga zuo tōma tōon-be'ero iŋā, ti la sān dena la tōon-be'ero tōoma, tōma ān wu ti ki mē, dee vōa ita sela n mase. A pōglunŋo la iŋā ti ya yē laafe. ²⁵ Ya daan ān wu piisi n bōi, la leeē wā, ya leme na ya dūnsiina la zē'am, ēŋa n bisri ya.

Pōgsi, la ba sirba yelle

3 Bela mē, pōgsi, sakra-ya ya sirba, ti baa seba n ka bō Nawēnne yetōga sira la sān yē ya yel-ure, ba wun sake ti la ka doose la yetōga, ² ban yeti ya yel-ure n ān sōŋa dena nā'asgo la. ³ Da base-ya ti ya nēnnōm dena yēŋa sōŋa, n de zuto pā'anŋo, la sālma lōgro, la fu-sōma yea. ⁴ Base-ya ti ya sōŋa la dena sūure puam sōŋa n de sū-bugsum la sū-mā'asum. Sōŋa ēna n ka sā'anū dee tara yōoro zozo'e Nawēnne nifum. ⁵ Kurum kurum, pōg-seba n yuun de Nawēnne nērba tara putē'ere gu'ura sela Nawēnne zē'am na, sōŋa mē yuun ān na bela, sakra ba sirba. ⁶ Asaara yuun ān na bela sakra a sira Abraham nōore, wi'ira ē ti a zuudāana. Ya sān tōnna tōon-sōma, dee ka base ti ba kē'ese ya dabeem, ya de la a pōyōosi.

⁷ Bela mē, yāma seba n de sirba la, bōna-ya la ya pōg-ba la le, la wōm taaba, la ya bāŋe ti ba ka taru pāŋa wu yāma la, la ya nanna ba, ti bāma la yāma n wun lagum

to'oge Nawēnne yel-sōnne n de vɔm. Ita-ya bela ti sela da gu ya pu'usgo.

Ita-ya sōŋa baa ya sǎn nāmsra

⁸ Ba'asgo puam, mam yeti ya wuu ti ya tara putē'ere ayila, la taaba zīile, la sobiisi nōŋre, la ninbāal-zua, la sik-m-mēŋa. ⁹ Nēra sǎn ēŋe ya be'em, ya da lebse ē be'em. Nēra sǎn tu ya, ya da tu lebse, tōn kā-ya kā'a-sōma bɔ ē. Se'ere n soe la, Nawēnne n wi ya la, la de la kā'a-sōma ti a bīŋe nōore ti a bɔ ya.

¹⁰ La gulse Nawēnne gōŋɔ puam yeti:

«Nēr-seka n boori ti a vɔm āna yēlum, dee ti a yē sū-yēlga,

dēni ti a yōke a nōore la yetɔg-be'ero, dee base pōm-ɔŋɔ.

¹¹ A zāage a mēŋa la tōon-be'ero, dee ita sela n ān sōŋa, la a mōrge ε ti sū-mā'asum bɔna nērba tēŋasuka da base.

¹² Se'ere n soe la,

Zuudāana bɔsɔ la seba n de sɔra dōma,

dee selsra ba pu'usgo,

la a wēgrɔ a nēŋa mē,

dee basra nēr-seba n de tōon-be'ero dōma.»

¹³ Yāma sǎn mōrge tōnna tōon-sōma, āne n wun ēŋe ya be'em? ¹⁴ La baa nērba sǎn nāmsra ya yan itɔ sela n mase ūyā, ya wun yē yel-sōnne. Bela, da zɔta-ya ba dabeem, la ya da base ti la dāana ya. ¹⁵ Nā'asra-ya Kriisi ya sūure puam, base-ya ti a dena ya Zuudāana.

Māasum-ya wakate wuu lergra nēr-seka woo n sokɔ ya, bɔɔra ti a bāŋe yāma n tarɔ putē'ere gu'ura sela la yelle n ān se'em na. ¹⁶ La ya ita bela la sū-bugsum, la wɔɔre. Ita-ya sela ti ya mi ya sūure puam ti la ān sōŋa, ti yānne yōke seba n tɔgrɔ ya be'em, yāma n tōnnɔ sōŋa Kriisi ūyā la. ¹⁷ Se'ere n soe la, ya sǎn ita sela n ān sōŋa nāmsra ti la sǎn dena la Nawēnne n boori bela, bela n ān sōŋa gānna yāma n wun ēŋe be'em nāmsra. ¹⁸ Kriisi nāmse mē ki buyila ti a yese tōon-be'ero, ēŋa n de seka n mase la, ki la seba n ka mase ūyā, ti a tarɔ ya sēŋe Nawēnne zē'am. Ba ku ē mē, ti Nawēnne Sɔa base ti a vo'oge ¹⁹ sēŋe ka mōole kō-yēlga bɔ sɔsɔ seba ti ba yu la. ²⁰ Sɔsɔ bāma de la nēr-seba n yuun ka sake Nawēnne nōore Anoe wakate la. Nawēnne yuun mā'age la a sūure gu'ura, wakat-seka ti Anoe yuun māalɔ ōorŋɔ la, ōorŋɔ ēŋa puam ti nērba fēe, banii mā'a kē mī pōse ko'om na puam yē fāare. ²¹ Bela de la makre pa'ala ko'om misga n fāarɔ ya lēle wā. Ko'om misga dagɔ ūyā dēgrɔ yesga yelle, la de la sela n pa'alɔ ti nēra looge yem ti a doose Nawēnne la pupeelem. Ko'om misga fāarɔ ya mē Azezi-kriisi n ki dee vo'oge la ūyā. ²² Ūŋa n zēke sēŋe Nawēnne yire ka zī'ire Nawēnne zuugo bɔba, ti malekadōma, la ke'endōma, la pānsɔ dōma wuu sakra ē.

Base-ya vɔm kēka, dee vɔa wu Nawēnne n boori se'em

4 Bela, Kriisi n nāmse a ūyā puam na, ya mē keŋe ya mēŋa tara putē'ere ēŋa mēŋa. Nēr-seka woo n nāmse a ūyā puam base tōon-be'ero mē. ² Ti ēn ken vɔa dūnia zuo wakat-seka la, a kǎn le vɔa wu nērsaala yem-leego n boori se'em, a wun vɔa wu Nawēnne n boori se'em. ³ Kurum, yāma n daan lagum na seba n ka doli Nawēnne ita bāma n boori se'em na, da le ita-ya bela. Yāma daan lagum na ba mē, ba yalsɔ, la ba be'em yem-leego, la ba dā-yūure, la ba puyā'an-yooro, la ba dā-buka, la ba бага kāabgo n de be'em na puam. ⁴ La lēle wā, yāma n ka le lagum na ba le tōnna tōon-dēgrɔ bāma la, ba ka bāŋe a vōore, ti ba tuura ya. ⁵ La ba wun wa tɔge bāma n ēŋe se'em bɔ Nawēnne n māasum gu'ura ti a di seba n vɔa, la seba n ki sarɔya la. ⁶ Bela ūyā ti ba daan mōole kō-yēlga la mē bɔ seba n ki la, ti ban ki wu Nawēnne n di nērsaalba wuu sarɔya ti ba kiira la, ba tā'age yē vɔm ti Nawēnne Sɔa bɔ'ɔrɔ.

⁷ Sela woo ba'asgo lem mē. Bela ūyā, tara-ya ya mēŋa sōŋa, dee mōrge la Nawēnne pu'usgo. ⁸ Sela n gānnɔ wuu de la ya nōŋe taaba zozo'e, se'ere n soe la, nōŋlum n botɔ ti basra taaba tōon-be'ero zozo'e taale. ⁹ Ita-ya taaba sāano, da yōnna. ¹⁰ Yāma nēra woo to'oge la Nawēnne yel-sōnne bɔ'a, dɔke-ya ba sōŋe nērba baseba. Bela ti ya wun dena nērba n bɔsɔ Nawēnne bɔ'a to'oto'ore la yelle sōŋa. ¹¹ Nēr-seka n tɔgrɔ, a tɔge wu Nawēnne n yele se'em, nēr-seka n tōnnɔ sōŋre tōoma, a sōŋe wu Nawēnne n bɔ ē pāŋa se'em. Ti tōon-bāma wuu wun nā'ase Nawēnne yu'ure Azezi-kriisi ūyā. Ūŋa n soe nā'asgo, la pāŋa wakate n ka ba'asɔ. Amina.

Seka n nāmsɔ Kriisi doosgo ūyā tarɔ zu-yēlga

¹² M sɔr-nōŋrɔsɔ, da base-ya ti nāmso kate seka n paarɔ ya la āna wu yel-di'ina bɔ ya. ¹³ Tōn tara-ya sū-yēlga, ti yāma po nāmsra la Kriisi nāmso, ti ya wun tā'age ēŋe sū-yēlga sɔrum wakate seka ti a na'am pāŋa wun puke la. ¹⁴ Ba sǎn tuura ya yāma n de Kriisi nērba la ūyā, ya tarɔ zu-yēlga, se'ere n soe la, Nawēnne Sɔa la n tarɔ nā'asgo zozo'e la boe la ya le mē. ¹⁵ La da base-ya ti ya nēr-seka nāmsra ēŋa n de nēr-kuura, bu nayiga, bu tōon-be'ero dāana, bu nēra n kē'erɔ nērba yela n ka pake ē puam. ¹⁶ La nēra sǎn nāmsra ēŋa n de Kriisi nēra ūyā, a da zɔta yānne. A nā'asra Nawēnne, ban wi'iri ē Kriisi nēra la ūyā.

¹⁷ Wakate paage mē ti Nawēnne wun di sarɔya, la a wun pɔse la a mēŋa nērba. La sǎn dena ti a wun dēŋe di la tōma sarɔya pɔspɔsɔ, seba n ka sake Nawēnne kō-yēlga la ba'asgo wun āna la wāne? ¹⁸ La gulse Nawēnne gōŋɔ puam yeti:

«La sǎn dena toogo bɔ tōon-sōma dāana dee ti a yē fāare,

tõon-be'ero dāana n ka dolɩ Nawēnne sore yelle wun āna la wāne?»

¹⁹ Bela, nēr-seba n nāmsɩ wu Nawēnne n boorɩ se'em na, ba ita sela n ān sōja, dee dɩke ba mēja ēje Nawēnne n nāam ba dee dena sɩra dāana la nu'usum.

Kā'anɔ

5 Mam yetɩ m kā'an na seba n de Nawēnne nērba kēma bɔna ya puam na. Mam mē de la kēema, dee dena Krisi nāmsgɔ la kaset-dāana, la mam wun po yē a na'am pāja n wun wa puke la mɛ. ² Mam yetɩ ya mɛ tɩ ya bɩsɩra Nawēnne nērba la tɩ a gu'ule ya wu dūn-sīima la. La, la da kān dena dɔk-m-zuugo yelle, la dena la yemleego wu Nawēnne n boorɩ se'em na. Da ita-ya yan boorɩ bōntarsōm īyā, ita-ya ya yem n boe a puam īyā. ³ Da ɛɛra-ya tɩ ya sɔna seba tɩ ba dɩke gu'ule ya la, la pāja. Dena-ya nērba tɩ ya yel-ɩɛ wun pa'alɛ ba sela n ān sōja, tɩ ba āna wu yāma n ān se'em na. ⁴ Tɩ dūn-sīin-ke'ema la sān wa puke, ya wun to'oge yɔɔɔɔ n ka sā'anɩ n tarɩ pēka.

⁵ Bela mē, kɔmbɩ'ɩsɩ, sakra-ya kēma la. La ya wuu tara sik-m-mēja la taaba, tɩ la gulɛ yetɩ:
«Nawēnne sisri zēk-m-mēja dōma mɛ,
dee ita sik-m-mēsɩ dōma yel-sōnne.»

⁶ Bela, sike ya mēja Nawēnne n de ke'engo dāana la nējam, tɩ wakate sān paage, a wun zēke ya. ⁷ Base-ya ya fablɩɔ la wuu bɔ ē, tɩ a bɩsɩ ya yelle mɛ. ⁸ Dena-ya nērba n yōkrɩ ya mēja, dee guusɩ ya mēja sōja, tɩ ya be Asūtāana eerɩ ya mɛ, wu gɩgne n kaarɩ ɛɛra sela tɩ a yōke obe. ⁹ Bɔ-ya Azezi-krisi sɩra ze'ele kāŋkāŋɛ, dee sɩ'ɩsɛ Asūtāana, la ya bāje tɩ ya sɔbiisi n boe dūnia zē'a woo mē nāmsɩ la nāmsgɔ bāma mēja buuri. ¹⁰ Ya wun ken nāmɛ mɛ wakate fēɛ. La Nawēnne n soe yel-sōnne wuu la wi ya mɛ tɩ ya po yē a na'am pāja n ka tarɩ ba'asɔ, yāma n lagum na Krisi dena ayɩla la īyā. Ēja wun le malge ya tɩ ya āna sōja, bɔ ya pāja tɩ ya ze'ele kāŋkāŋɛ, tɩ sela kān tā'age botɩ ya bike. ¹¹ Ēja n soe pāja wakate n ka ba'asɩ. Amina.

Pu'usɔ

¹² Mam botɩ Asilvē n gulɛ gōn-pɩka wā, ēja n de sɔbia tɩ mam bɩsɛ tɩ a de sɩra dāana. Mam gulɛ gōɔ wā tɩ m bɔ ya la buraane, dee botɩ ya bāje tɩ yel-sōnne na tɩ ya tarɩ la, de la Nawēnne yel-sōnne mēja mēja puam tɩ ya boe. ¹³ Nawēnne nērba n boe Babilɔnɩ tɩ a tū'use ba wu yāma la pu'usɩ ya, Amarkɩ n lebge mam dayua la mē pu'usɩ ya. ¹⁴ Pu'use-ya taaba la nōɲlum.

Sū-mā'asum wun bɔna la yāma seba wuu n lagum na Krisi dena ayɩla la.

2 Pɩyɛɛɾɩ

Bilgre

Apɩyɛɛɾɩ daan gulɛ gŋn-ɛna wã bɔ la nɛr-seba wuu n dolɩ Azezi. Pŋmpɔɾɲɔ karɛnsãandŋma zozo'e n yuun kɛ Azezi nɛrba la puam, tɩ ba zãɲɔ la botɩ nɛrba tŋnna tŋon-dɛgrɔ buuri wuu.

Apɩyɛɛɾɩ pa'ale ba tɩ Nawɛnnɛ yetɔga n de sɩra, la a ɩtɩ ɛɲa n yeɛ se'em na mɛ.

Apɩyɛɛɾɩ pa'ale la Nawɛnnɛ n wi ba la, bãma n mase tɩ ba vɔa se'em, ze kãɲkãɲɛ sɩra sɛka tɩ Azezi Tŋntŋnɩba pa'ale ba la puam (sapɩtrɩ 1).

A pa'ale tɩ pŋmpɔɾɲɔ karɛnsãandŋma la de la tŋon-dɛgrɔ dŋma, ba yel-ɩɛ ka ɛn sŋɲa (sapɩtrɩ 2).

Dee pa'ale tɩ nɛr-seba n yetɩ Azezi kãn leme wa'am na, la de la pŋmpɔɾɲɔ. A yetɩ Azezi n yuuri ka sɛna la, a mã'arɩ la a sũure tɩ nɛrba zozo'e teege yem base tŋon-be'ero, yɛ fãare (sapɩtrɩ 3).

¹ Mam Asimŋ-pɩyɛɛɾɩ n de Azezi-krisi yamɲa la a Tŋntŋnna, n gulɛ gŋɲɔ wã bɔ'ɔra yãma seba tɩ Azezi-krisi n de Nawɛnnɛ la tɩ Fãagra n mase sela woo puam, botɩ ya bɔ ɛ sɩra sŋɲa wu tŋma n bɔ ɛ sɩra se'em na.

² Yãma n bãɲɛ Nawɛnnɛ, la tɩ Zuudãana Azezi la, Nawɛnnɛ wun ɛɲɛ ya yel-sŋnnɛ, dee bɔ ya sũ-mã'asum zozo'e.

Nawɛnnɛ n looge tɩ la, tɩ yel-ɩɛ n mase tɩ la ɛna se'em

³ Azezi n tarɩ Nawɛnnɛ pãɲa la n botɩ tɩ bãɲɛ Nawɛnnɛ n wi tŋma tɩ tɩ po yɛ a na'am pãɲa, la a sŋɲa. Bela tɩ a bɔ tɔ bŋn-seba wuu n wun base tɩ tɩ vɔa vɔm sɛka n dolɩ a sore. ⁴ La de la bela tɩ a bɔ tɔ bɔ'a seba n ɛn sŋɲa gãnna wuu tɩ a bɩɲɛ nŋore tɩ a bɔ tɔ la. Tɩ bŋn-bãma ɩyã ya wun tã'age lɔke be'em yemleego n boe dũnia zuo sã'ana nɛrba la, dee lebge ɛna wu Nawɛnnɛ n ɛn se'em na. ⁵ Bela, narge-ya pãɲa, tɩ ya bɔ sɩra la puam, ɩr-sŋɲɔ pa'ase, tɩ ɩr-sŋɲɔ la puam, bãɲɛ pa'ase, ⁶ tɩ bãɲɛ la puam, yŋk-m-mɛɲa pa'ase, tɩ yŋk-m-mɛɲa la puam, wɩbga pa'ase, tɩ wɩbga la puam, Nawɛnnɛ doosgo sɩra sɩra pa'ase, ⁷ tɩ Nawɛnnɛ doosgo sɩra sɩra la puam, ya ɩta taaba sŋɲa pa'ase, tɩ ya ɩta taaba sŋɲa la puam, nŋɲlum pa'ase. ⁸ Se'ere n soe la, ya sãn ɩta bŋn-bãna wã zozo'e, ba wun base tɩ ya tŋm Nawɛnnɛ tŋoma, dee bãɲɛ tɩ Zuudãana Azezi-krisi pa'ase. ⁹ La sɛka n ka ɩtɩ bŋn-bãna wã ɛn wu fua la, a ka yetɩ, la a yɩm mɛ tɩ Nawɛnnɛ base a tŋon-be'ero tɩ a ɛɲɛ kurum na taale mɛ. ¹⁰ Bela m sɔbiisi, mŋrgɛ ya mɛɲa ze'ele kãɲkãɲɛ Nawɛnnɛ n wi ya, la ɛn looge ya la puam. Ya sãn ɛɲɛ bela, ya kãn burge dee base Nawɛnnɛ sore.

¹¹ La de la bela tɩ ya wun yɛ sore sŋɲa kɛ Azezi-krisi n de tɩ Zuudãana, la tɩ Fãagra la so'olum n boe wakate n ka ba'asɩ la puam.

¹² La de la bela ɩyã tɩ mam tɛera ya bŋn-bãna wakate wuu, baa la yãma n pŋn mina ba, la yãma n ze kãɲkãɲɛ sɩra la tɩ ya to'oge la puam na. ¹³ Mam n nãn vɔa wã, mam tɛ'ese tɩ la mase mɛ tɩ mam tɛege ya, tɩ ya da gɩse. ¹⁴ Tɩ Zuudãana Azezi-krisi n puke pa'ale mam, tɩ mam mina tɩ la deege la fɛɛ tɩ mam base vɔm ɛna wã dee fŋrgɛ. ¹⁵ Bela mam wun mŋrgɛ mɛ, la mam fŋrgɛ poorum, ya wun tɛra bŋn-bãna yelle sela woo puam.

Nawɛnnɛ nŋtɔ'ɔsrɩba n tɔge Azezi-krisi yelle se'em na de la sɩra

¹⁶ Tŋma n tɔge tɩ Zuudãana Azezi-krisi pãɲa, la a wa'aɲɔ la yelle la, la dagɩ sɔlma tɩ nɛrsaalba tɛ'ese nãam la ba mɛɲa yem. Tŋma sɩrɩ yɛ a na'am pãɲa n zo'oge se'em mɛ la tɩ nini. ¹⁷ La de la Nawɛnnɛ n de Sɔ la, n bɔ ɛ nã'asgo, la na'am pãɲa. ɛɲa n de na'am pãɲa wuu dãana la yetɩ: «ɛna de la mam Dayua tɩ mam nŋɲɛ la m sũure wuu, a paage la mam yem.» ¹⁸ Tŋma n daan boe la ɛ lɛ tãɲa la zuo la, tɩ tŋma wŋm kŋa la n ze'ele Nawɛnnɛ yire tɔge. ¹⁹ Bela n base tɩ tŋma malɩn bãɲɛ sŋɲa sŋɲa tɩ Nawɛnnɛ nŋtɔ'ɔsrɩba yetɔga la de la sɩra. La ɛn sŋɲa tɩ ya tara yetɔg-bãma sŋɲa, ba ɛn wu fitla n nɛege lika puam. Tara-ya ba halɩ ka paage beere yulɩɲɛ, tɩ Krisi nɛege ya sũure puam wu bewã'are la. ²⁰ Sela n gãnnɩ de la ya bãɲɛ tɩ Nawɛnnɛ nŋtɔ'ɔsrɩba yetɔga la n gulɛ Nawɛnnɛ gŋɲɔ puam na, nɛra ka tã wun pa'ale ba vŋore la a mɛɲa putɛ'ere. ²¹ Se'ere n soe la, ba ka de nɛrsaalba yem n boorɩ se'em, la de la Nawɛnnɛ Sɩa n botɩ nɛrsaalba tɔge yetɔga n ze'ele Nawɛnnɛ mɛɲa zɛ'am.

Põmpɔɾɲɔ karẽnsãandõma

(Azudi 4-13)

2 Kurum kurum, nẽrba n yuun boe Nawẽnne nẽrba la puam parna ti bãma de la Nawẽnne nõtɔ'ɔsrɩ-ba. Bela, põmpɔɾɲɔ karẽnsãandõma n mẽ wun bɔna ya puam. Ba wun ẽɲe la yem tarɩ zãɲɔ n sēm na sã'arɲ wa'am, dee wun sɩ'se Zuudãana n fãage ba la, bela n wun base ti sã'arɲ wa'am ba zuto tɔtɔ. ² La nẽrba zo-zo'e n wun doose ba, ba tɔon-yooro la poorum, ti la wun base ti nẽrba tɔge sɩra sore la yetɔg-be'ero. ³ Ban boorɩ bõntarsõm zo'oge la ãyã ti ba wun tɔge nõ-yẽlum yetɔga pã'ase ya, yẽ yõoro ya zẽ'am. La halɩ kurum kurum ti ba sɩbgrɛ põn mãasum gu'ura ba, ba sã'arɲ kãn viige.

⁴ Se'ere n soe la, Nawẽnne yuun ka base malekadõma seba n tɔm tɔon-be'ero la ti ba pɔse, a lobe ba base la bug-tẽɲa bog-ko'ogo n de lika puam, ba ba la bãnsɩ gu'ura sarɩyadia daare. ⁵ La a yuun ka base kurum kurum dõma la ti ba pɔse, sãn dagna nẽrba banii mã'a. La de la Anoe n mɔole sela n mase yelle, la a yir-dõma mã'a ti a yuun fãage, dee base ti sa-kãte ni, ti ko'om libe tẽɲa sã'am dũnia nẽrba wuu n ka doli Nawẽnne. ⁶ La a ken di Sodom la Gomɔorɩ tẽnsɩ sarɩya me sɩbge ba, base ti bugum di ba, ti ba lebge tãmpɛglum, ti la dena makre bɔ seba n ka doli Nawẽnne sore la. ⁷ La a yuun fãage la Alotɩ n de tɔon-sõma dãana. Ẽɲa sũure n yuun sã'am halɩ zozo'e la tɔon-be'ero dõma tɔon-yooro n zo'oge la. ⁸ Alotɩ n yuun de tɔon-sõma dãana vɔa la ba le, wõnna dee yẽta ba tɔon-be'ero la, a sũure n sã'anɩ daare woo, ti la nãmsra ẽ. ⁹ Bela pa'alɩ ti Zuudãana Nawẽnne mi ẽɲa n ɩti se'em fãara nẽr-seba n doli a sore la nãmsgɔ puam me, dee mina ẽɲa n ɩti tɔon-be'ero dõma se'em gu'ura sarɩyadia daare ti ba wun yẽ sɩbgrɛ. ¹⁰ Nẽr-seba n doli ba yemleego n boorɩ se'em n de tɔon-dẽgrɔ, dee pɔ'ɔra Nawẽnne n tarɩ nõore la ba le la, a wun sɩbge la bãma gãnna.

Põmpɔɾɲɔ karẽnsãandõma la de la zẽk-m-mẽɲa dõma, la tɩta'alum dõma, ba ka zotɩ dabeem ti ba tu saazuum pãnsɩ dõma. ¹¹ La baa malekadõma n tarɩ pãɲa, la ke'ɛɲo gãnna ba la, ka tɔgrɩ ba yelle pɔ'ɔra ba Zuudãana la nẽɲam. ¹² Nẽr-bãma ɩti la yooryooro, ba ɲn wu dũnsi n ka tarɩ yem ti ba yõgrɩ kuura la. Ba tɔgrɩ la sela ti ba ka mi be'em, ba mẽ wun sã'am wu dũnsi la. ¹³ Ba wun yẽ tɔon-be'ero yɔɔɔɔ ba tɔon-be'ero la ãyã. Ba tɔnnɩ na ba yem n boorɩ se'em n de tɔon-dẽgrɔ peelem puam, ti ba sũure ɲna yẽlum. Ba sãn lagum na ya dita, ɩta sũ-yẽlga la ba põmpã'asum na, la de la dẽgrɔ, la yãnnɛ. ¹⁴ Ba yem boorɩ la yalsɩ tɔoma mã'a, ba ka tɔnnɩ tɔon-be'ero tɩgra. Ba pã'asɩ la nẽr-seba putẽ'era n ka zo'oge Nawẽnne sore doosgo puam na ti ba tɔnna be'em. Ba nõɲe la bõnɔ zozo'e. Nawẽnne kã'a-be'ero boe ba zuto. ¹⁵ Ba base so-sõɲɔ la me dee

burge dɔla Abalaam n de Abozɔɔrɩ dayua la sore, ẽɲa nõɲe la ligri bɔɔra ti a tɔm tɔon-be'ero to'oge yɔɔɔɔ.

¹⁶ La Nawẽnne yuun gi Abalaam n de a nõtɔ'ɔsa la me a tɔon-be'ero la ãyã. A yuun botɩ Abalaam mẽɲa bõɲa n tɔge la ẽ wu nẽrsaala la, gu ẽ ti a da tɔm a yalne tɔoma la.

¹⁷ Nẽr-bãma ɲn wu bulsi n ka tarɩ ko'om, dee ɲna wu sawara ti kusebgo pe'ege la. Nawẽnne mãasum na zẽ'a n de lika tam gu'ura ba. ¹⁸ Ba pa'alɩ la ba mẽɲa tɔgra yetɔg-kãra n ka tarɩ võore, dee tara ba yem n boorɩ se'em n de tɔon-dẽgrɔ la pã'asra nẽr-seba n nãn welge ba mẽɲa la nẽr-seba n vɔa tuure puam na. ¹⁹ Ba yetɩ nẽrba la ti ba wun yẽ yolsgo, dee ti ba mẽɲa dena tɔon-dẽgrɔ n wun sã'am ba la yamsɩ. Se'ere n soe la, nẽra woo de la sela n soe ẽ na yamɲa. ²⁰ Nẽr-seba n bãɲe Azezi-krisi n de ti Zuudãana, la ti Fãagra la, ba base dũnia tɔon-dẽgrɔ me. Ba sãn le kẽ ba puam base ti ba sɔna ba, ba poorum toogo la wun gãnna pɔspɔsɩ la. ²¹ Bela, ba sãn ka bãɲe nɩ sela n mase sore la sɔlɩ ban bãɲe ẽ dee wẽrge base Nawẽnne nõore ti ba to'oge tɔge bɔ ba la. ²² La ẽɲe ba bela pa'ale ti magsa wã de la sɩra, ba yetɩ: «Baaga lebe ka di la sela ti a tĩ la», dee le yetɩ: «Kurkuri ti ba peege ẽ sõɲa sõɲa la, lebe ka bilim na beglum puam.»

Ti Zuudãana Azezi-krisi wun sɩrɩ leme wa'am me

3 M sɩr-nõɲrɩsɩ, la de la gõɲɔ buyi dãana n wãna ti mam gulse bɔ'ɔra ya. Gõnnɔ bayi la puam, mam tẽege ya la sela ti ya dẽɲe bãɲe la, ti m puke ya putẽ'era sõɲa. ² Mam boorɩ ti ya tẽra la yetɔg-seba ti Nawẽnne nõtɔ'ɔsrɩba dẽɲe tɔge halɩ yuuma yuuma, la ti Zuudãana Azezi n de ti Fãagra la nõore ti Tõntõnɩba la ti a tɔm ya zẽ'am na tɔge bɔ ya la. ³ Sela n gãnɩ de la ya bãɲe ti dũnia ba'asgo wakate, nẽrba n la'arɩ nẽrba n wun wa wa'am, wa vɔa vɔm seka n de be'em ti ba mẽɲa boorɩ. Ba wun la'ara ya, ⁴ dee yetɩ: «Azezi n daan bĩɲe nõore yetɩ a wun leme wa'am na, a bɛɛ? Halɩ kurum kurum ti ti yaabdõma ki wa paam wakat-ẽna wã, sela woo ken ɲna la bela wu dũnia pĩ'iluɲo n yuun ɲn se'em na.» ⁵ Ban tɔgrɩ bela la, ba boorɩ ti ba yetɩ bãma yĩm me ti kurum kurum Nawẽnne tɔge la yetɔga ti saazuum la tẽɲa nãam, ti zẽ'a woo daan dena ko'om, ti Nawẽnne botɩ tẽɲa ze'ele ko'om puam bɔna. ⁶ La ken dena la ko'om, ti Nawẽnne yuun botɩ ba libe dũnia ẽɲa sã'am ẽ. ⁷ Nawẽnne yetɔga mẽɲa n ken botɩ dũni-ẽna wã, la saazuum bɔna gu'ura ti bugum wa sã'am ba. A base ti ba bɔna gu'ura la daar-seka ti a wun di nẽrsaal-ba sarɩya, sã'am tɔon-be'ero dõma la.

⁸ M sɩr-nõɲrɩsɩ, sela ayɩla n boe ti yãma ka mase ti ya yĩm, la sãn dena la Zuudãana Nawẽnne, daare ayɩla ɲn wu yuuma tusre, ti yuuma tusre mẽ ɲna wu daare ayɩla. ⁹ Zuudãana la n bĩɲe a nõore ti a ẽɲe sela la, la ka yuuri ti a kãn ẽɲe wu nẽrba baseba n tẽ'esrɩ se'em

na. A mǎ'age la a sũure la ya, a ka boori ti nĕra nĕra sǎ'am, a boori ti nĕra woo n teege yem base tĕon-be'ero. ¹⁰ Zuudǎana la lemŋo daare wun ǎna wu nayiga n liŋri se'em na. Daar-ĕŋa, vool-kǎte n wun ĕŋe, ti bugum di bĕn-seba n boe saazuum, ti saazuum bɔɩ. Ti tĕŋa, la bĕn-seba n boe a puam na wuu mĕ ka le bɔna.

¹¹ Bĕn-bǎma wuu n wun sǎ'am bela la, dĕni ti ya base ti ya yel-ɩɛ, la ya Nawĕnne sore doosgo ǎna sŏŋa, ti ya sakra ĕ sela woo puam. ¹² Dĕni ti ya gu'ura Nawĕnne daare, ti Azezi wun wa'am na, la ya narge pǎŋa ti a wa'am tɔtɔ. Daar-ĕŋa, bugum n wun di saazuum, ti bĕn-seba n boe saazuum wun yĕlge sǎ'am. ¹³ Tŏma gu'uri la saazuum paalga, la dũnia paalga ti sela woo mase ǎna sŏŋa, wu ĕn bĭŋe a nŏore se'em na.

¹⁴ Bela, m sɩr-nŏŋɾɩsɩ, yǎma n gu'uri bela la, narge-ya pǎŋa ǎna sŏŋa, ti ya da tara dŏrga Nawĕnne nifum, ti ya wun bɔna la ĕ la sũ-mǎ'asum. ¹⁵ Bǎŋe-ya ti Zu-

udǎana la n mǎ'age a sũure gu'ura la, a boori ti ya yĕ la fǎare. La de la bela mĕ ti ti sɔbi-nŏŋɾe Apolɩ daan dɩke yem sɛka ti Nawĕnne bɔ ĕ na gulɛ bɔ ya. ¹⁶ A gŏn-seba wuu puam ti a tɔgrɩ bela yelle la, a gulɛ la bela. A gŏnnɔ na puam, zĕ'esɩ baseba n boe mĭ ti ba wŏŋa tɔ, ti nĕr-seba n ka mi, dee ka vigle ban bɔ sɩra la puam na, tɛera ba vŏore n de se'em, wu ban ɩti Nawĕnne gŏnnɔ baseba se'em na. Ban ɩti bela la sĕm na ba mĕŋa sǎ'aŋɔ.

¹⁷ La sǎn dɛna yǎma, m sɩr-nŏŋɾɩsɩ, yǎma n dĕŋe tara tiire la, guuse-ya, da base ti tĕon-be'ero dŏma n tuuge la, tuuge ya. Da base-ya ti ba botɩ ya base yǎma n bɔ sɩra ze kǎŋkǎŋe wǎ. ¹⁸ Sĕŋe-ya nĕŋa vɔa Azezi-kɾisi n de ti Zuudǎana la ti Fǎagra la yel-sŏnne puam, bǎŋra ĕ pa'asra.

Ĕŋa n soe na'am pǎŋa lɛɛɛ wǎ, la wakate n ka ba'asɩ. Amina.

1 Zā

Bilgre

Azā gulse gōŋɔ wā bɔ la Azezi nērba. Pōmpɔɔŋɔ karēnsāandōma n daan kē Azezi nērba la puam tara zāsŋɔ n zāarı ba la Azezi.

Bela tı Azā daan gulse kã'an ba yetı ba ken tara lagımtaare la Azezi, la Nawēnne, da tōnna tōon-be'ero. Nawēnne de la peelem, la nōŋlum dāana, tōma de la a kōma, bela la mase me tı tı vɔa peelem puam, dee nōŋe taaba. A kã'an ba yetı, pōmpɔɔŋɔ karēnsāandōma la n zāsı tı Azezi-krisi n de Nawēnne Dayua la ka lebge nērsaala la, ba da to'oge ba zāsŋɔ. Tı bōn-ēŋa tã wun sã'am ba lagımtaare la Nawēnne me.

Azezi n de yetɔga n bɔ'ɔɔɔ vɔm

1 Tōma gulse la seka n boe halı pĩ'ılunɔ wakate yelle bɔ'ɔɔɔ ya. A de la seka tı tōma wōm a yetɔga, yē ē la tı nini, bıse ē sōŋa sōŋa, kalum ē na tı nu'usi. Œŋa n de yetɔga n bɔ'ɔɔɔ vɔm. ² Seka n de vɔm na puke a mēŋa me, tı tōma yē ē. Tı tōma tɔgra a yelle, mōola vɔm n ka ba'asrı la yelle bɔ'ɔɔɔ ya. A daan boe la tı Sɔ Nawēnne zē'am, tı a puke ē pa'ale tōma. ³ Sela tı tōma yē dee wōm na, tōma tɔgrı la ēŋa bɔ'ɔɔɔ yāma, tı yāma wun lagım na tōma, mē naage la tōma tara lagımtaare la tı Sɔ Nawēnne, la a Dayua Azezi-krisi. ⁴ Tōma gulse ya la wāna tı tı wun tara sũ-yēlga zozo'e.

Tı vɔa pupeelem puam wu Nawēnne n ǎn se'em na

⁵ Kōa n wāna tı tōma wōm Azezi-krisi zē'am, tɔgra ē bɔ'ɔɔɔ ya: Nawēnne de la peelem, lika ka boe a zē'am baa fēfēe. ⁶ Tı sãn yetı tōma tarı lagımtaare la Nawēnne, dee ken vɔa lika puam tōnna be'em, tı parı me, tı ka itı sɔra. ⁷ La tı sãn vɔa peelem puam wu Nawēnne mēŋa n boe peelem puam na, tı tarı lagımtaare la taaba me, la a Dayua Azezi zıum peerı tı me yesra tı tōon-be'ero wuu.

⁸ La tı sãn yetı, tōma ka tarı tōon-be'ero, tı pã'ase la tı mēŋa, la sɔra ka boe tı zē'am. ⁹ Tı sãn pelge tı puure tɔge tı tōon-be'ero, Nawēnne wun base tı tōon-be'ero taale me, dee peege to, yese sela wuu n ka mase, se'ere n soe la, a de la sɔra dāana dee ita sela n mase. ¹⁰ Tı sãn yetı, tōma ka tōm tōon-be'ero, tı yetı a de la pōmpɔɔma, la a yetɔga la ka boe la tı le.

Krisi n de tōma sōŋra

2 M kōma, mam gulsrı ya wāna tı ya da tōm na tōon-be'ero. La nēra sãn tōm be'em, tōma tarı la sōŋra n boe tı Sɔ Nawēnne zē'am, la de la Azezi-krisi n de pupeelem dāana. ² La de la ēŋa n dıke a mēŋa bɔ tı

la dena kãabɔɔ, tı Nawēnne base tōma tōon-be'ero taale. La, la dagı tōma mǎ'a tōon-be'ero taale, la de la dūnia nērba wuu tōon-be'ero taale.

³ Tı sãn sakra Nawēnne nōore, bela n pa'alı tı tı sɔrı mi ē. ⁴ Nēr-seka n yetı ēŋa mi ē, dee ka sakra a nōore, a de la pōmpɔɔma, la a ka tarı sɔra. ⁵ Nēr-seka n sakrı Nawēnne yetɔga la, nēr-ēŋa n tarı Nawēnne nōŋlum sɔra sɔra. Bela n pa'alı tı tı lagım na ē dena ayıla. ⁶ Seka n yetı ēŋa lagım na Nawēnne, dēnı tı a dāana vɔa wu Azezi-krisi n daan vɔa se'em na.

Nawēnne nōore de la tı nōŋe taaba

⁷ M sɔr-nōŋrısı, la dagı nōor-paalga tı mam gulse bɔ'ɔɔɔ ya, a de la nōor-keka tı ya tarı halı pɔspɔsı la. Nōor-keka ēŋa de la kō-seka tı ya daan wōm na. ⁸ La a yerı dena la nōor-paalga tı mam gulse bɔ'ɔɔɔ ya. La de la Azezi-krisi zē'am, la yāma zē'am tı yel-ēŋa de sɔra, se'ere n soe la, lika la tollı me, dee tı peelem sɔra sɔra dare nēera.

⁹ Nēr-seka n yetı ēŋa boe la peelem puam, dee sisra a sɔbia, ken bɔna la lika puam. ¹⁰ Nēr-seka n nōŋe a sɔbia, vɔa la peelem puam, bela ũyã sela ka boe a zē'am n wun base tı a tuuge. ¹¹ La seka n sisrı a sɔbia, boe la lika puam, la a sēnnı na lika puam, ka mina ēn we'esı zē'a, se'ere n soe la, lika la fɔ a nini me.

¹² Mam gulse bɔ'ɔɔɔ la yāma, m kōma, se'ere n soe la, Nawēnne base ya tōon-be'ero taale me Azezi-krisi yu'ure ũyã.

¹³ Mam gulse bɔ'ɔɔɔ la yāma, m sɔdōma, se'ere n soe la, yāma mi seka n boe halı lan dēŋe dūnia pĩ'ılunɔ la me.

Mam gulse bɔ'ɔɔɔ la yāma, m kɔmbı'ııı, se'ere n soe la, yāma yāŋe be'em dāana Asūtāana la me.

¹⁴ Mam gulse bɔ'ɔɔɔ la yāma, m kōma, se'ere n soe la, yāma mi tı Sɔ Nawēnne me.

Mam gulse bɔ'ɔɔɔ la yāma, m sɔdōma, se'ere n soe la, yāma mi seka n boe halı lan dēŋe dūnia pĩ'ılunɔ la me.

Mam gulse bɔ'ɔra la yāma, m kɔmbɪ'ɪsɪ, se'ere n soe la, yāma tarɪ pāŋa mɛ, Nawēnne yetɔga la boe ya puam mɛ, la yāma yāŋe be'em dāana Asūtāana la mɛ.

Da nōŋe-ya dūnia

¹⁵ Da nōŋe-ya dūnia, la bōn-sɛba n boe a puam na. Nēra sǎn nōŋe dūnia wǎ, Nawēnne n de tɪ Sɔ la nōŋlum ka boe la a dāana lɛ. ¹⁶ Se'ere n soe la, bōn-sɛba n de dūnia wǎ bōnɔ de la nērsaala mēŋa n boorɪ se'em, la nini n yē sela bɔɔra n de be'em, la nēra n pa'alɪ a mēŋa a bōntarsōm īyǎ. Bāma wuu ka ze'ele tɪ Sɔ Nawēnne zē'am, ba de la dūnia bōnɔ. ¹⁷ Dūnia, la bōn-sɛba wuu tɪ nēba yemleego boorɪ la tollɪ mɛ. La nēr-seka n ɪtɪ Nawēnne n boorɪ se'em n wun bɔna wakate n ka ba'asrɪ.

Krisi sɪ'ɪsrɪba yelle

¹⁸ M kɔma, lɛɛlɛ wǎ la de la dūnia ba'asgɔ wakate. Yāma wōm tɪ ba yetɪ Krisi sɪ'ɪsrɪ n sēm. La lɛɛlɛ wǎ, Krisi sɪ'ɪsrɪba zo'oge mɛ bɔna, bela tōma mi mɛ tɪ la de la dūnia ba'asgɔ wakate. ¹⁹ Nēr-bāma ze'ele la tōma zē'am yese, la ba daan dagɪ tōma nēba sɪra sɪra. Ba daan sǎn de nɪ tōma nēba, ba wun weege nɪ bɔna la tōma zē'am. La ban base tōma la, dēnɪ tɪ la ēŋe bela tɪ la pa'alɛ vɛelga tɪ ba nēra baa ayɪla dagɪ tōma nēra.

²⁰ La sǎn dɛna yāma, Krisi bɔ ya Nawēnne Sɪa mɛ, bela yāma wuu mi sɪra mɛ. ²¹ Mam n gulse bɔ ya la, mam ka yetɪ ya ka mi sɪra la, la tōn dɛna la yan mi ē na īyǎ, la yāma mi tɪ sela n de pōmpɔrŋɔ ka ze'etɪ sɪra puam.

²² Āne n de pōmpɔrma la? La de la sɛka n sɪ'ɪsrɪ yetɪ Azezi dagɪ Krisi la. Ēŋa n de Krisi sɪ'ɪsrɪ la. A sɪ'ɪsrɪ la Sɔ Nawēnne, la a Dayua la. ²³ Nēr-seka n sɪ'ɪsrɪ Dayua la, mē ka boe la Sɔ la. La nēr-seka n yetɪ ēŋa mi Dayua la, mē boe la Sɔ la mɛ.

²⁴ La sǎn dɛna yāma, mōrgɛ-ya tara yetɔg-sɛba tɪ ya daan wōm halɪ pɔspɔsɪ la ya sūure puam. Ba sǎn ken bɔna ya sūure puam, yāma mē wun ken bɔna la Sɔ, la Dayua la lɛ. ²⁵ Krisi n bīŋe nōore tɪ a bɔ tɪ sela n wāna: La de la vɔm n ka ba'asrɪ.

²⁶ La de la nēr-sɛba n zɪgrɪ tɪ ba pǎ'ase ya tɪ ya tuuge la yelle tɪ mam gulse wāna bɔ'ɔra ya. ²⁷ La sǎn dɛna yāma, Nawēnne Sɪa la tɪ ya to'oge Krisi zē'am na, boe la ya lɛ mɛ, yāma ka le ɛera tɪ ba zāsɪm ya. Nawēnne Sɪa la n boe la ya lɛ la, zāsɪnɪ ya sela woo mɛ, la de la sɪra, a ka parɪnɪ. Bɔna-ya la Krisi wu ēn zāsɪnɪ ya se'em na.

²⁸ Ēe, m kɔma, bɔna-ya la ē lɛ, tɪ a sǎn wa puke daare tɪ tɪ tara sū-ke'ɛŋo, tɪ yānne da yōke tɔ a nēŋam a lemŋo la daare. ²⁹ Yāma mi tɪ Krisi de la sɛka n mase, bela, bāŋe-ya tɪ nēr-seka n mē ɪtɪ sela n mase de la Nawēnne bia.

Nawēnne kɔma

³ Bɪsɛ-ya Nawēnne n de Sɔ la n nōŋe tɪ se'em. A nōŋlum na zo'oge gāŋe mɛ, tɪ a wɪ'ira tōma tɪ a kɔma. La tōma sɪrɪ de la a kɔma. Wāna n soe tɪ dūnia dōma ka mina tōma: La de la ban ka mi Nawēnne na īyǎ. ² M sɪr-nōŋrɪsɪ, lɛɛlɛ wǎ tɪ de la Nawēnne kɔma. La tɪn wun wa āna se'em na nǎn ka puke. La tɪ mi tɪ Krisi sǎn wa puke, tɪ wun āna wu ēŋa n ān se'em na, tɪn wun wa yē ēŋa n ān se'em na īyǎ. ³ Nēr-seka woo n tarɪ putē'ere gu'ura bōn-ēŋa Krisi īyǎ, malgrɪ a mēŋa mɛ dɛna pupeelem dāana, wu Azezi-krisi mēŋa n de pupeelem dāana se'em na.

⁴ Nēr-seka woo n tōnnɪ tōon-be'ero, a sɪ'ɪsrɪ la Nawēnne nōore. Se'ere n soe la, tōon-be'ero de la Nawēnne nōore sɪ'ɪsgɔ. ⁵ La yāma mi tɪ Azezi-krisi wa'am tɪ a yese la nēba tōon-be'ero base, la a mēŋa ka tarɪ tōon-be'ero. ⁶ Nēr-seka n lagum na Krisi bɔna ka tōnnɪ tōon-be'ero. La sɛka n tōnnɪ tōon-be'ero ka yē ē, la a ka bāŋe ē.

⁷ M kɔma, da base-ya tɪ nēra pǎ'ase ya. Sɛka n ɪtɪ sela n mase, de la nēra n mase, wu Azezi mēŋa n mase se'em na. ⁸ Sɛka n tōnnɪ tōon-be'ero de la Asūtāana nēra, se'ere n soe la, Asūtāana tōnnɪ tōon-be'ero la halɪ pī'iluŋo. Tɪ Nawēnne Dayua la wa'am tɪ a sǎ'am Asūtāana tōoma.

⁹ Sɛka n de Nawēnne bia ka le tōnna tōon-be'ero, se'ere n soe la, Nawēnne pāŋa n bɔ'ɔrɪ vɔm n boe a puam, a ka le tāna wun tōnna tōon-be'ero, Nawēnne n de a Sɔ la īyǎ. ¹⁰ Bela n pa'alɪ tɪ ba bāŋra Nawēnne kɔma, la sɛba n de Asūtāana kɔma bɔkra. Sɛka n ka ɪtɪ sela n mase, bu sɛka n ka nōŋe a sɔbia dagɪ Nawēnne bia.

Tɪ nōŋe taaba

¹¹ Kō-yɛlga tɪ ya wōm halɪ pɔspɔsɪ la de la tɪ nōŋe-ya taaba. ¹² La ka de tɪ āna wu Akāɪ la, ēŋa de la Asūtāana nēra, yuun ku a yɪbga. La bēm n soe tɪ a yuun ku ē? La de la a tōoma n yuun de tōon-be'ero, dee tɪ a yɪbga tōoma mase la īyǎ.

¹³ Bela m sɔbiisi, dūnia nēba sǎn sisra ya, da kǎn base-ya tɪ la dɛna sela n di'ige ya. ¹⁴ Tōma mi mɛ tɪ tōma ze'ele la kūm puam yese bɔna vɔm puam, tōma n nōŋe tɪ sɔbiisi la īyǎ. Nēr-seka n ka nōŋe a sɔbia ken bɔna la kūm puam. ¹⁵ Nēr-seka woo n sisrɪ a sɔbia de la nēr-kuura. La ya mi tɪ nēr-kuura ka tarɪ vɔm n ka ba'asrɪ. ¹⁶ La de la bōn-ēna wǎ n botɪ tōma bāŋe nōŋlum n ān se'em: Azezi ki mɛ bɔ tōma, bela, tōma mē de la tɪ dɪke tɪ vɔm bɔ tɪ sɔbiisi īyǎ. ¹⁷ Nēra sǎn tara dūnia wǎ bōntarsōm, dee yē a sɔbia n boorɪ sōŋre, ka zoe a nin-bāalga sōŋe ē, ēŋa dāana ka tarɪ Nawēnne nōŋlum.

¹⁸ M kɔma, da base-ya tɪ tɪ nōŋlum dɛna yetɔga, la nō-

yēlum mā'a, tɪ base tɪ la dɛna nōŋlum sɪra sɪra n lagum na tōoma.

¹⁹ Bela n wun base tɪ tɪ bāŋe tɪ tōma de la sɪra dōma, la tɪ sūure wun āna ke'eŋo Nawēnne nēŋam. ²⁰ Baa tɪ sūure sǎn ka bɔ tɪ buurɔ, tɪ bāŋe tɪ Nawēnne gǎnnɪ tɪ sūure mɛ, la a mi sela woo bɔke mɛ. ²¹ M kɔm-nōŋrɪsɪ, tɪ sūure sǎn bɔ tɪ buurɔ, tɪ tarɪ sū-ke'eŋo Nawēnne nēŋam mɛ, ²² la bōn-seka wuu tɪ tɪ sosrɪ ē, a bɔ'ɔrɪ tɪ mɛ, tōma n sakrɪ a nōore, dee ita sela n paarɪ a yem na ŷā. ²³ Ēŋa n bɔ a nōore se'em n wāna: La de la tɪ bɔ a Dayua Azezi-krisi sɪra, dee nōŋe taaba wu ēŋa n bɔ tɪ a nōore se'em na. ²⁴ Nēr-seka n sakrɪ Nawēnne nōore la, a boe la Nawēnne lɛ, tɪ Nawēnne mē bɔna la ē. Bōn-seka n base tɪ tōma mina tɪ Nawēnne boe la tōma lɛ n wāna: La de la a Sɪa tɪ a bɔ tōma la.

Tɪ bāŋe-ya Nawēnne Sɪa, la be'em dāana sɪa bɔke

4 M sɪr-nōŋrɪsɪ, da bɔ-ya nēr-seba wuu n yetɪ bāma tarɪ la Nawēnne Sɪa la sɪra, mage-ya ba bɪse la sǎn dɛna Nawēnne Sɪa. Se'ere n soe la, pōmpɔrŋɔ nōtɔ'ɔs-rɪba zozo'e n boe dūnia wǎ zuo. ² Bōn-seka n wun base tɪ ya bāŋe Sɪa seka n de Nawēnne Sɪa n wāna: Nēr-seka woo n yetɪ Azezi-krisi n wa'am dūnia zuo, la a tarɪ la nērsaala ŷā, ēŋa n tarɪ Nawēnne Sɪa. ³ La seka n ka tɔ-grɪ Azezi yelle bela, ka tarɪ Nawēnne Sɪa, a tarɪ la Krisi sɪ'lsra la sɪa. Sɪ'lsra ēŋa tɪ ya daan wōm tɪ a sēm na, la lɛlɛ wǎ, a dare bɔna dūnia zuo mɛ.

⁴ La yāma, m kɔma, yāma de la Nawēnne nērba, la yāma yāŋe pōmpɔrŋɔ nōtɔ'ɔs-rɪba la mɛ. Se'ere n soe la, Nawēnne Sɪa n boe la yāma lɛ la, tarɪ pǎŋa gǎnna sɪ'lsra la sɪa n boe la dūnia dōma la mɛ. ⁵ Pōmpɔrŋɔ nōtɔ'ɔs-rɪba la de la dūnia wǎ bōnɔ, bela n soe tɪ ba tɔ-gra dūnia yela, tɪ dūnia dōma selsra ba. ⁶ La sǎn dɛna tōma, tōma de la Nawēnne nērba. Bela, nēr-seka n mi Nawēnne selsrɪ tōma mɛ. La seka n dagɪ Nawēnne nēra ka selsrɪ tōma. La de la bela tɪ tōma wun bāŋe sɪra Sɪa, la pōmpɔrŋɔ sɪa la bɔke.

Nawēnne de la nōŋlum dāana

⁷ M sɪr-nōŋrɪsɪ, tɪ nōŋe-ya taaba, se'ere n soe la, nōŋlum ze'ele la Nawēnne zē'am. Nēr-seka n tarɪ nōŋlum de la Nawēnne bia, la a mi Nawēnne mɛ. ⁸ La nēr-seka n ka tarɪ nōŋlum ka mi Nawēnne, se'ere n soe la, Nawēnne de la nōŋlum dāana. ⁹ Nawēnne n pa'ale ēŋa n nōŋe tōma se'em n wāna: A tōm na a Dayɔ-yēŋa dūnia zuo, tɪ tɪ tara vɔm ēŋa ŷā. ¹⁰ Nōŋlum na n doose se'em n wāna: La dagɪ tōma n dēŋe nōŋe Nawēnne. La de la Nawēnne n nōŋe tōma, tōm a Dayua, tɪ a dɛna kǎabgɔ tōma tōon-be'ero taale basga ŷā.

¹¹ M sɪr-nōŋrɪsɪ, Nawēnne n nōŋe tɪ bela la, dēnɪ tɪ tōma mē nōŋe taaba. ¹² Nēra nēra nǎn ka yē Nawēnne. Tɪ sǎn nōŋe taaba, Nawēnne boe la tɪ lɛ mɛ, la a nōŋlum n boe la tɪ lɛ la, de la nōŋlum zōnzōnnɔ.

¹³ Bōn-seka n base tɪ tōma bāŋe tɪ tōma boe la Nawēnne lɛ, tɪ Nawēnne mē bɔna la tōma lɛ n wāna: La de la a Sɪa tɪ a bɔ tōma la. ¹⁴ La tōma yē mɛ, tɪ tōma tɔ-gra yetɪ, Nawēnne n de Sɔ la tōm na a Dayua, tɪ a dɛna dūnia Fāagra. ¹⁵ Nēr-seka n sake yetɪ Azezi de la Nawēnne Dayua, Nawēnne boe la ē lɛ mɛ, tɪ a mē bɔna la Nawēnne. ¹⁶ La tōma mi mɛ, dee bɔ sɪra tɪ Nawēnne nōŋe tōma mɛ. Nawēnne de la nōŋlum dāana. Nēr-seka n tarɪ Nawēnne nōŋlum boe la Nawēnne lɛ, tɪ Nawēnne mē bɔna la ē. ¹⁷ Tōma sǎn tara Nawēnne nōŋlum zōnzōnnɔ, tɪ wun āna wu Azezi n ān se'em na dūnia wǎ zuo. Bela tɪ wun tara sū-ke'eŋo sarɪyadia daare. ¹⁸ Seka n tarɪ nōŋlum ka zotɪ dabeem, nōŋlum zōnzōnnɔ yesrɪ la dabeem, se'ere n soe la, dabeem zua pa'alɪ mɛ tɪ sɪbgɛ n boe. Seka n zotɪ dabeem na ka tarɪ nōŋlum zōnzōnnɔ.

¹⁹ La sǎn dɛna tōma, tōma tarɪ nōŋlum mɛ, se'ere n soe la, Nawēnne dēŋe nōŋe tōma mɛ. ²⁰ Nēr-seka sǎn yetɪ, ēŋa nōŋe Nawēnne, dee sise a sɔbia, a de la pōm-pɔrma. Se'ere n soe la, a sǎn ka nōŋe a sɔbia tɪ a yētɪ la, a ka tā wun nōŋe Nawēnne tɪ a ka yētɪ la. ²¹ Nōore seka tɪ Krisi bɔ tōma la n wāna: Nēr-seka n nōŋe Nawēnne, dēnɪ tɪ a mē nōŋe a sɔbia.

Tɪ bɔ Nawēnne Dayua la sɪra

5 Nēr-seka woo n bɔ sɪra tɪ Azezi de la Krisi tɪ Nawēnne tōm na, de la Nawēnne bia. Nēr-seka n nōŋe sɔ, mē nōŋe a kɔma mɛ. ² Sela n base tɪ tōma mina tɪ tōma nōŋe Nawēnne kɔma n wāna: La de la tōma n nōŋe Nawēnne, dee sakra a nōore wuu la. ³ Se'ere n soe la, Nawēnne nōŋlum de la tɪ sakra a nōore. A nōore la tɪ a bɔ tɪ la ka tɔ. ⁴ Nēr-seka woo n de Nawēnne bia n yāŋrɪ dūnia be'em. Tōma n yāŋe dūnia be'em na, de la tōma n bɔ Azezi-krisi sɪra la. ⁵ Āne n tā wun yāŋe dūnia? La de la nēr-seka n bɔ sɪra tɪ Azezi de la Nawēnne Dayua la mā'a.

⁶ Azezi-krisi n wa'am dūnia zuo la, la doose la ko'om, la zɔum. La dagɪ ko'om misga la mā'a, la ken dɛna la ēn ki tɪ a zɔum yese la. La de la Nawēnne Sɪa n bɔ'ɔrɪ a kaseto, Nawēnne Sɪa n de sɪra dāana la ŷā. ⁷ La de la bōn-bāna batǎ n bɔ'ɔrɪ kaseto. ⁸ La de la Nawēnne Sɪa, la ko'om, la zɔum. La bāma batǎ kaseto de la buyɪla. ⁹ Tōma n sakrɪ nērsaalba kaseto tɪ ba bɔ'ɔrɪ la, Nawēnne kaseto tarɪ pǎŋa gǎnna bela mɛ. La de la Nawēnne mēŋa n bɔ a Dayua la kaseto. ¹⁰ Bela, nēr-seka n bɔ Nawēnne Dayua la sɪra, tarɪ kaseto ēŋa mɛ a sūure puam. La nēr-seka n ka bɔ Nawēnne sɪra, base tɪ a āna wu pōmpɔrma la, ēŋa n ka sake Nawēnne n bɔ a Dayua la kaseto la ŷā. ¹¹ Nawēnne n bɔ kaseto la se'em n wāna: A bɔ tɪ la vɔm n ka ba'asrɪ, la vɔm ēŋa de la a Dayua la ŷā. ¹² Nēr-seka tɪ a Dayua boe la ē na, tarɪ vɔm na mɛ. La nēr-seka tɪ a Dayua ka boe la ē na, ka tarɪ vɔm.

Vɔm n ka ba'asɾɩ

¹³ Mam gulɛ wãna bɔ'ɔra ya tɩ ya bãɲɛ tɩ yãma seba n bɔ Nawěnnɛ Dayua sɩra la, tarɩ la vɔm n ka ba'asɾɩ.

¹⁴ Tõma sũure ǎn ke'eɲo mɛ la Nawěnnɛ, tɩ tõma mina tɩ tõma sǎn sose sela tɩ la mase wu ɛn boorɩ se'em, a selsɩ tõma mɛ. ¹⁵ La tõma n mi tɩ a selsɩ tõma n sosɩ ɛ sela la, tõma mi tɩ a bɔ'ɔrɩ tɩ sela tɩ tɩ sosɩ la mɛ.

¹⁶ Něr-seka sǎn yě a sobia n tõnnɩ tõon-be'ego n ka sɛm na kũm, a pu'usɛ Nawěnnɛ bɔ ɛ, tɩ Nawěnnɛ wun bɔ ɛ vɔm. La de la tõon-be'ego seka n ka sɛm na kũm tɩ mam yetɩ. Tõon-be'ego n boe n sɛm na nɛra kũm, la dagɩ tõon-be'ego ɛɲa yelle tɩ mam yetɩ ya pu'usɛ a ɲyǎ.

¹⁷ Sela n ka mase wuu de la tõon-be'ero. La, la dagɩ tõon-be'ego woo n sɛm na kũm.

¹⁸ Tõma mi tɩ nɛr-seka woo n de Nawěnnɛ bia ka le tõnna tõon-be'ero. La Nawěnnɛ Dayua la gu'uri ɛ mɛ, tɩ be'em dǎana Asũtǎana ka tǎna wun ɛɲɛ ɛ sela.

¹⁹ Tõma mi tɩ tõma de la Nawěnnɛ nɛrba. La dũnia dõma wuu boe la be'em dǎana Asũtǎana nu'usum.

²⁰ Tõma mi tɩ Nawěnnɛ Dayua n wa'am wa bɔ tɩ yem, tɩ tɩ bãɲɛ Nawěnnɛ n de sɩra dǎana la. Tõma lagum na seka n de sɩra dǎana la dɛna ayɩla, a Dayua Azezi-krisi ɲyǎ. ɛɲa n de Nawěnnɛ sɩra sɩra, n bɔ'ɔrɩ vɔm n ka ba'asɾɩ.

²¹ M kɔma, guuse-ya ya mɛɲa la бага.

2 Zā

Bilgre

Gõn-ēna puam Azā wi'iri a mēṇa tɪ kēema, ēṇa n gulṣe gōṇṇ wā bɔ Azezi nērba n boe zē'a ayɪla, tɪ a wi'ira ba tɪ zuudāan-pɔka la a kɔma.

A gulṣe kǎ'an ba mē yetɪ ba ken vɔa sɪra puam, dee nōṇe taaba. Dee yele ba tɪ ba guuse ba mēṇa la pōmpɔrṇṇ karēnsāandōma.

¹ Mam n de kēema la n gulṣe bɔ'ɔra zuudāan-pɔka tɪ Nawēnnē looge la, la a kɔma tɪ mam nōṇe sɪra sɪra la. La, la dagɪ mam mā'a, nēr-seba wuu n bāṇe sɪra la nōṇe ba mē. ² Se'ere n soe la, sɪra la n boe la tɪ lē, dee wun ken bɔna la tɪ lē wakate wuu.

³ Tɪ Sɔ Nawēnnē, la a Dayua Azezi-krisi wun ēṇe tɪ yel-sōnnē, zoe tɪ ninbāalga, dee bɔ tɪ sū-mǎ'asum, tɪ tɪ wun vɔa la sɪra, dee tara nōṇlum.

Sɪra, la nōṇlum

⁴ Mam ɪtɪ sū-yēlga mē halɪ zozo'e, mam n yē tɪ fu kɔma la baseba dolɪ la sɪra sore wu tɪ Sɔ Nawēnnē n yele tɪ se'em na. ⁵ Lēlē wā, zuudāan-pɔka, mam n gulṣe fu wā dagɪ nōor-paalga, la de la nōor-seka tɪ tɪ wōm halɪ pɔspɔsɪ la, mam sosɪ fu mē tɪ tɪ nōṇe taaba. ⁶ Nōṇlum n de sɛla n wāna: La de la tɪ ɪta wu Nawēnnē nōore n yele se'em na. Nōor-seka tɪ ya wōm halɪ pɔspɔsɪ la de la bɛla, la de la ya nōṇe taaba.

⁷ Nērba zozo'e n saage dūnia pǎ'asɪ nērba tɪ ba tuura. Nēr-bāma ka sake tɪ Azezi lebge la nērsaala wa'am dūnia zuo. Nēr-ēṇa dāana n de pōmpǎ'asum dāana, la Krisi sɪ'ɪsra. ⁸ Guuse-ya ya mēṇa, da kǎn base-ya tɪ tōma n tōm sɛla bɔ ya la bɔɪ, tɪ ya wun to'oge ɔɔɔɔ wuu.

⁹ Nēr-seka n yōsge tole nēṇa ka bɔna Krisi zāsṇṇ la puam, Nawēnnē ka boe la ē. La sɛka woo n boe a zāsṇṇ la puam, Sɔ Nawēnnē, la a Dayua boe la ē mē.

¹⁰ Nēra sǎn tarɪ zāsṇṇ ayēma wa'am ya zē'am, ya da to'oge ē ya yire, la ya da pu'use ē. ¹¹ Nēr-seka n pu'use ē, lagum na ē mē a tōon-be'ero puam.

Ba'asgɔ yetɔga

¹² Mam tarɪ yela zozo'e mē tɪ m tɔge bɔ ya, la mam ka boorɪ tɪ m gulṣe ba gōṇṇ puam bɔ ya. La mam tarɪ putē'ere mē tɪ mam wun wa'am ya zē'am, dee tɔge m mēṇa bɔ ya, tɪ tɪ sū-yēlga wun dēna sū-yēlga zōnzōn-ɔ. ¹³ Fu sɔbi-pɔka tɪ Nawēnnē looge la kɔma pu'usɪ fɔ.

3 Zã

Bilgre

Azã n de kēema la n gulɛ ɔ̃ɔɔ wã bɔ nēra ayɪla yu'urɛ n de Agayusi.

Agayusi de la nēra n dolɪ Nawēnnɛ sɪra, dee sɔ̃ɔra Azezi nēba, tɪ a pēɛ ẽ.

Azã ken tɔɛ la nēra ayēma yu'urɛ n de Adiyotrefɪ yelle, yetɪ nēr-ēɔa ka ēɛ sɔ̃ɔa, a ka to'oge ēɔa yetɔɔa, la a ka to'ose Azezi nēba.

Dee pēɛ nēra ayēma yu'urɛ n de Ademetrisi, yetɪ a de la nēr-sɔ̃ɔa nēba wuu nifum.

Gōn-ēna wã pa'alɛ tōma tɪ tɪ da pagsra sɛla n de be'em, tɪ dɔla Nawēnnɛ sɪra, la tɪ tara nōɔlum, tɔ'ɔsra taaba sãanɛ.

¹ Mam n de kēema la, n gulɛ bɔ'ɔra m sɪrɛ Agayusi tɪ mam nōɛ sɪra sɪra. ² M sɪr-nōɔrɛ, mam kã'arɪ Nawēnnɛ tɪ sɛla woo āna sɔ̃ɔa bɔ fɔ, tɪ fu wun tara ɪmã'asum wu fōn dolɪ Nawēnnɛ sɔ̃ɔa se'em na.

³ Tɪ sɔbiisi n wa'am kalam wa yele fōn dolɪ sɪra sore se'em, la fōn vɔa la sɪra se'em. Tɪ mam ēɛ sũ-yēlga zo-zo'e. ⁴ Sɛla ka bɔ'ɔrɪ mam sũ-yēlga ɔ̃anna mam n wōm tɪ ba yetɪ mam kɔma dolɪ sɪra la.

⁵ M sɪr-nōɔrɛ, fōn ɪtɪ sɛla bɔ'ɔra sɔbiisi la, baa la sɛba n de sãama la, fu ɪtɪ la sɪra. ⁶ Ba tɔɛ fu nōɔlum na yelle mɛ Azezi nēba zē'am. Fu sãn sɔ̃ɔa ba tɪ ba sēɛ ba sore la wu Nawēnnɛ n boorɪ se'em, fu ēɛ sɔ̃ɔa.

⁷ Se'ere n soe la, Azezi-krisi tōoma yelle tɪ ba wɛ'esa sore la, dee ka to'oge sɛla nēr-sɛba n ka dolɪ Azezi la zē'am. ⁸ Tōma de la tɪ sɔ̃ɔa nēr-bãma buuri pa'alɛ tɪ tōma naage la ba mɛ dɛna sɪra kō-yēlga la tōntōnɪba.

⁹ Mam daan gulɛ ɔ̃ɔɔ mɛ bɔ Azezi nēba, la Adiyotrefɪ n boorɪ tɪ a dɛna nēɔadãana la ka to'oge mam n yele se'em na. ¹⁰ Bɛla, mam sãn wa wa'am, mam wun

pa'alɛ sɛla tɪ a ēɛ, la ēn parɪ tɔɔra tōma yetɔɔ-be'ero la. La, la dagɪ bɛla mã'a, a ken zagsra mɛ ka tɔ'ɔsra sɔbiisi, dee mɛ gu'ura nēr-sɛba n boorɪ tɪ ba tɔ'ɔsra ba la, digra ba Azezi nēba la puam.

¹¹ M sɪr-nōɔrɛ, da pagɛ sɛla n de be'em, pagsra sɛla n ān sɔ̃ɔa. Nēr-sɛka woo n ɪtɪ sɛla n ān sɔ̃ɔa de la Nawēnnɛ nēra. La nēr-sɛka woo n ɪtɪ sɛla n de be'em ka mi Nawēnnɛ.

¹² La sãn dɛna Ademetrisi, nēba wuu tɔɔrɪ a yelle sɔ̃ɔa mɛ, tɪ ēn dolɪ sɪra se'em na mɛ pa'ala a yelle sɔ̃ɔa. Tōma mɛ tɔɔrɪ a yelle sɔ̃ɔa mɛ. La fu mi tɪ tōma kaseto de la sɪra.

¹³ Mam tarɪ yɛla zozo'e mɛ tɪ m tɔɛ bɔ fɔ, la mam ka boorɪ tɪ m gulɛ ba ɔ̃ɔɔ puam. ¹⁴ Mam tarɪ putē'ere mɛ tɪ mam wun wa yē fɔ tɪ tɪ sōɛ la taaba.

¹⁵ Sũ-mã'asum wun bɔna la fɔ.

Fu sɪrdōma pu'usɪ fɔ. Pu'usɛ tɪ sɪrdōma la wuu ayɪla ayɪla bɔ tɔ.

Azudi

Bilgre

Azudi gulse gōṇṇ wā bɔ la Azezi nērba. Gōṇṇ wā yetɔga wōn na gōṇṇ buyi dāana tɪ Apɪyɛɛɪ gulse la yetɔga. A kā'an ba mɛ tɪ ba guuse ba mēṇa la pōmpɔrṇṇ karēnsāandōma zāsṇṇ, la ba yel-ɪɛ la, tɪ Nawēnne wun sɪbge ba mɛ.

Dee kā'an Nawēnne nērba la tɪ ba ken bɔ Azezi sɪra, zɛ kāṇkāṇe Nawēnne sore doosgo puam la Nawēnne Sɪa pāṇa.

¹ Mam Azudi n de Azezi-krisi tōntōnna, la Azaki yɪbga la n gulse gōṇṇ wā bɔ'ɔra yāma seba tɪ tɪ Sɔ Nawēnne wi tɪ ya dɛna a nērba, nōṇe ya, tɪ Azezi-krisi gu'ura ya la.

² Nawēnne wun zoe ya ninbāalga zozo'e, bɔ ya sū-mā'asum, la nōṇlum zozo'e.

Pōmpɔrṇṇ karēnsāandōma

(2 Pɪyɛɛɪ 2:1-17)

³ M sɪr-nōṇrɪsɪ, mam daan boori mɛ tɪ m gulse ya la m sūure wuu tɔge fāare la tɪ tɪ wuu lagɪm yē la yelle. Mam bɪse mɛ tɪ la de la pēgrɛ tɪ mam gulse kā'an ya, tɪ ya mōrgɛ zɛbe zɛ'ele kāṇkāṇe yetɔga la tɪ ya bɔ sɪra la puam. Nawēnne dɪke yetɔg-bāma bɔ a nērba la nōore ayɪla mā'a wakate wuu īyā. ⁴ Se'ere n soe la, nērba baseba n li'ise kē ya puam. Nēr-bāma de la seba n sɪ'ɪsɪ Nawēnne, tɛera a yel-sōnne yetɔga la, dɪke tōnna tōon-dēgrɔ, dee sɪ'ɪsɪra Azezi-krisi n de tɪ kɛ'ema la tɪ Zuudāana ayɪla mā'a la. Halɪ kurum kurum tɪ la pōn gulse sɪbgre seka tɪ ba wun yē.

⁵ Baa la yāma n mi bōn-bāma wuu sōṇa sōṇa la, mam boori tɪ m tēegɛ ya mɛ tɪ Nawēnne n yuun fāage a nērba Ezipti tēṇa la, a yuun yāṇa base mɛ tɪ nēr-seba n ka bɔ ē sɪra la ki. ⁶ La malekadōma seba n yuun ka sake Nawēnne n bɔ ba ke'ɛṇṇo se'em base zē'e-seka tɪ Nawēnne bɔ ba la, Nawēnne ba ba mɛ la bānsɪ, base tɪ ba bɔna lika puam wakate wuu gu'ura dabs-kāte la n de sarɪyadia daare la. ⁷ La sān dɛna Sodom la Gomōori dōma, la tēnsɪ seba n lɛm ba la, n mē yuun ēṇe wu bela, tōm yalsɪ tōoma, la, la dagɪ la nērsaalba mā'a. Ba yuun yē sɪbgre mɛ n de bugum n ka kīṇri, tɪ la dɛna kā'aṇṇ bɔ nērba baseba.

⁸ La de la bōn-bāma buuri n bela tɪ nēr-bāma mē ɪtɪ. Ban tē'esɪ se'em na botɪ ba dēgra la ba mēṇa, ba pɔ'ɔrɪ Nawēnne n tarɪ nōore la ba lɛ la mɛ, dee tuura saazuum pānsɪ dōma. ⁹ La baa malekadōma kɛ'ema Amisɛɪ n yuun tɔgrɪ la Asūtāana wē'era nōke'ene

Amoyisi kūm īyā la, a ka saage tɔge zerge ē tu ē, a yuun yetɪ: «Zuudāana la wun sɪbge fɔ.»

¹⁰ Nēr-bāma tɔgrɪ la sela tɪ ba ka mi be'em, ba ɪtɪ la yooryooro, ba ān wu dūnsɪ n ka tarɪ yem n ɪtɪ se'em na, bōn-ēṇa n sā'anɪ ba. ¹¹ Ba wun yē toogo, se'ere n soe la, ba dolɪ la so-seka tɪ Akāɪ yuun doose la, la ba kē'ese ba mēṇa mɛ tuure puam yɔɔɔw īyā, wu Abalaam n ēṇe se'em ligri īyā la. Ban sɪ'ɪse Nawēnne nōore wu Akoore n yuun sɪ'ɪse Nawēnne nōore se'em na, ba ki mɛ. ¹² Ba sān lagɪm na ya dita nōṇlum dia, la de la yānne bɔ ya. Ba ka zotɪ yānne, ba kɔ'ɔn dita mɛ ɪta sū-yēlga ba mēṇa īyā. Ba ān wu sawara n ka tarɪ ko'om tɪ kusebgo pe'eri, ba ān wu tusɪ n ka tarɪ bɪe ba wɔṇa wakate, tɪ ba vō, base tɪ ba vōɔɔ, la ba yēga wuu kuɪ. ¹³ Ba ken āna wu ko-kāte ko-mī'isi n wē'eri la pāṇa, ba yānne tōoma la ān wu ko-kāte fulfuka la, ba ān wu wōrbɪe seba n eerɪ. Nawēnne māasum na zē'a n de lika tam bīṇe wakate n ka ba'asɪ gu'ura ba.

¹⁴ La po dɛna la nēr-bāma yelle tɪ A'enōkɪ n de tɪ yaa-ba buyopɔɪ dāana lan pɔse la Adam na, yuun to'oge Nawēnne yetɔga tɔge yetɪ: «Bɪse-ya, Zuudāana Nawēnne sēm mɛ la a malekadōma tusa tusa ¹⁵ tɪ a di nērsaalba wuu sarɪya, sɪbge tōon-be'ero dōma wuu, ban sɪ'ɪse ē tōnna tōon-be'ero la wuu īyā, la yetɔg-be'ero wuu tɪ ba tɔge pɔ'ɔge ē na īyā.» ¹⁶ Nēr-bāma de la nērba n yōnnɪ wakate wuu, ba sūure ka ān yēlum la ban ān se'em na. Ba ɪtɪ la ba mēṇa yem n boori se'em, tɔgra pa'al-m-mēṇa yetɔga, dee tɔgra nērba nō-yēlum yetɔga tɪ ba yē yōɔɔ.

Kā'aṇṇ

¹⁷ La sān dɛna yāma, m sɪr-nōṇrɪsɪ, tēra-ya yetɔg-seba tɪ tɪ Zuudāana Azezi-krisi Tōntōnɪba la daan dēṇe tɔge bɔ ya la. ¹⁸ Ba daan yele ya yetɪ: «Dūnia ba'asgo wakate, nērba n la'arɪ nērba n wun wa bɔna dɔla ba mēṇa yem n boori se'em, sɪ'ɪsɪra Nawēnne.» ¹⁹ La de la bāma n tarɪ welgre sēna. Ba dolɪ la nērsaalba putē'era n boori se'em, Nawēnne Sɪa ka boe la ba lɛ. ²⁰ La yāma,

m sir-nõnrɪsɪ, sõŋra-ya taaba sēnna nēŋa yan bɔ Nawēnne sɪra la puam, pu'usra-ya Nawēnne la a Sia pãŋa. ²¹ Bɔna-ya Nawēnne nõŋlum na puam gu'ura tɪ tɪ Zuudãana Azezi-krisi n de ninbãal-zɔta la wun bɔ ya vɔm n ka ba'asɪ. ²² Zɔta-ya sɛba yɛm n yɔɔɪ la ninbãal-ga. ²³ Fãagɛ-ya sɛba n boe bugum puam na. La, la sãn dɛna baseba la, zɔta-ya ba ninbãalga, la ya guuse ya mēŋa da lagum na ba tōnna tōon-dēgrɔ tɪ ba mēŋa boorɪ la baa fēfēe.

²⁴ Pēgɛ-ya Nawēnne, ēŋa n tarɪ pãŋa wun gu ya tɪ ya kãn base a sore, dee wun tarɪ ya sēŋɛ ka ze'ele a nēŋam tɪ ya ka tara dōrga, tɪ ya yē a na'am pãŋa, la sũ-yēlga zozo'e. ²⁵ Nawēnne ayɪla mǎ'a n de tɪ Fãagra tɪ Zuudãana Azezi-krisi ãyǎ, n soe pēka, la nǎ'asgɔ, la pãŋa, la ke'ɛŋo, lan dēŋɛ pĩ'ilunɔ, la lɛɛɛ wǎ, la wakate n ka ba'asɪ. Amina.

Pukre

Bilgre

Azã yuun gulɛ gôn-ëna wã la wakat-sëka tɪ Rom na-keko nãmsrɪ Azezi nërba zozo'e, ban yetɪ Azezi mã'a n de bãma Zuudãana, dee ka nã'asra na-keko la wu Nawënne na ÿã.

Wakat-sëka tɪ Azã gulɛ gôn wã la, tɪ a yuun boe la Patmõsɪ, tēja tɪ ko'om gilge. Ba yuun yõke ẽ me sēja ka base bilam, ẽn mōole Azezi kō-yëlga la ÿã.

Azã gulɛ tɪ a botɪ Azezi nërba n yẽ buraane, la ba ken tara putẽ'ere gu'ura sela tɪ Nawënne wun bɔ ba, Azezi n yãɲe sela woo la ÿã.

Gôn-ëna puam, mãmsgɔ zozo'e n boe mĩ n ze'ele Nawënne gôn-keka la puam. Nimõrdõma zozo'e n boe mĩ n de yela mãmsgɔ.

Azã yetɪ Azezi n dēja puke a mēja pa'ale ẽɲa, yetɪ ẽɲa gulɛ gônno bɔ Wẽnde-seba n boe Azi-minɛɛrɪ tẽnsɪ bayopɔɪ puam (sapɪtrɪ 1-3).

Bela poorum, Nawënne Sɪa tarɪ ẽɲa sēja la Nawënne yire ka pa'ale ẽɲa yela zozo'e:

- Ban nã'asrɪ Nawënne, la Azezi se'em (sapɪtrɪ 4-5).
- Azezi n lake gôn n tabe zẽ'esɪ buyopɔɪ (sapɪtrɪ 6-8).
- Malegsɪ n peebe benkɔma bayopɔɪ (sapɪtrɪ 8-11).
- Bõna bayopɔɪ n de dãalgɔ (sapɪtrɪ 12-15).
- Nawënne sũ-isgre n pɪrɛ laasɪ bayopɔɪ (sapɪtrɪ 16).
- Babilɔnɪ n de tẽn-kãte n sã'am, la ban sã'am Asũtãana la a poorum dõma (sapɪtrɪ 17-20).
- Nawënne tẽn-paalga, la Azezi lemɲo (sapɪtrɪ 21-22).

Bõn-seba tɪ Azã yẽ la, de la bõna buuri to'oto'ore mãmsgɔ n kẽ'erɪ taaba puam. Nërba n wõnnɪ gôn wã bõndõma baseba võore se'em na, de la to'oto'ore.

Baa la bela, a yetɔg-zuugo la de la aylɪ. Azezi-krisi yãɲe sela woo me. Asũtãana, la bõn-be'ero seba n ken bɔna lɛɛɛ wã, Nawënne wun sã'am ba ba'ase me. La seba n bɔ Nawënne sɪra yãɲe, wun yẽ sũ-yëlga n ka ba'asrɪ.

Bõn-seba tɪ Azezi-krisi puke pa'ale Azã

1 Gôn wã tarɪ la sela tɪ Azezi-krisi puke pa'ale. Nawënne n daan bɔ ẽ bõn-bãma tɪ a pa'ale a tõn-tõnba sela n wun ẽɲe wakate fẽfẽe puam. Azezi-krisi daan tøm na a maleka a tõtõnna Azã zẽ'am tɪ a pa'ale ẽ bõn-bãma. ² Azã n gulɛ sela wuu tɪ a yẽ la pa'ale tɪ la de la Nawënne yetɔga tɪ Azezi-krisi puke pa'ale ẽɲa. ³ Nër-sëka n karɛɲrɪ Nawënne yetɔga tɪ a to'oge tɔge wã, la seba n selsrɪ bõn-seba n gulɛ gôn-ëna wã puam dee sakra ba tarɪ zu-yëlga. Wakate la lem me, tɪ bela wuu wun ẽɲe.

Azã pu'usrɪ Nawënne nërba n lagsrɪ tẽnsɪ bayopɔɪ

⁴⁵ Mam Azã n gulɛ gôn wã bɔ'ɔra tẽnsɪ bayopɔɪ n boe Azi so'olum puam na Wẽndeto nërba. Zuudãana Nawënne n daan boe, n ken bɔna, dee wun bɔna wakate wuu la, la sɪsɪ bayopɔɪ n boe a na'am bĩm-bĩnne nẽɲam, la Azezi-krisi n tɔgrɪ Nawënne yelle sɪra, ẽɲa n ki dee dena pɔspɔsɪ dãana n vo'oge, dena dũnia

na'adõma naba la, wun ẽɲe ya yel-sõnne, dee bɔ ya sũ-mã'asum.

Azezi-krisi nõɲe tøm me, ki tɪ a zum fãage tøm tõn-be'ero puam, ⁶ botɪ tøm dena a so'olum kãabgɔ kẽma tõnna bɔ'ɔra Nawënne n de a Sɔ la. Ẽɲa n soe nã'asgɔ, la pãɲa wakate n ka ba'asrɪ. Amina.

⁷ Bɪsɛ-ya, a boe la sawara puam sɛna. Nẽrsaalba wuu wun yẽ ẽ, baa la nër-seba n daan lu ẽ na. Buuri wuu nërba n boe dũnia wun kella me fabla a yelle. Ẽe, la de la bela. Amina.

⁸ Zuudãana Nawënne n de ke'ɛɲo wuu dãana la yetɪ: «Mam de la pĩ'iluɲo la ba'asgɔ, mam n daan boe, n ken bɔna, dee wun bɔna wakate wuu.»

Azã yẽ Azezi-krisi wu zãasɲo la

⁹ Mam de la Azã n de ya sɔbia n po nãmsra, lagum na yãma po tara pure Nawënne so'olum na puam, ken po lagum na yãma mõrgra sɛnna nẽɲa Azezi doosgo la puam. Mam daan tɔge la Nawënne yetɔga, la Azezi-krisi yelle, tɪ ba tarɪ mam sēja tēja tɪ ko'om gilge yu'ure n de Patmõsɪ. ¹⁰ Tɪ Zuudãana daare n de Lasrɪ

tõm se'em pɔspɔsɪ la mɛ. ²⁰ La yel-seka tɪ mam tarɪ la yāma n wāna: La de la yan sake base Azezabelɪ n de pɔ-ka n yetɪ ɛŋa de la Nawēnne nōtɔ'ɔsa, tɪ a zāsna nērba, pā'asra mam tōntōnɪba tɪ ba ita yalsɪ, dee ɔbra бага nēnnɔ na. ²¹ Mam bɔ ɛ na wakate tɪ a teege yem base tōon-be'ero, la a ka boorɪ tɪ a teege yem base a yalsɪ tōoma la. ²² Bela, mam wun base tɪ a gā'are yē nāmsgɔ zozo'e. La seba n lagum na ɛ tōnna yalsɪ tōoma la wun yē toogo zozo'e, sǎn dagna tɪ ba base la tōon-be'e-seba tɪ a botɪ ba tōnna la. ²³ Mam wun ken base tɪ a kɔma ki, tɪ Wēndeto nērba la wuu wun bǎŋe tɪ mam de la seka n mi nērba tē'esgɔ, la ban boorɪ se'em. La mam wun yɔ ya nēra woo mase wu ɛn tōnnɪ se'em. ²⁴ La yāma Tiyaatiiri nēr-seba n ka sakrɪ zāsŋɔ bāma, dee ka mina sela tɪ ba wi'iri tɪ Asūtāana yela n suge la, mam ka tarɪ sela wun yele ya pa'ase. ²⁵ La gure-ya sela tɪ ya tarɪ la kǎŋkǎŋe halɪ tɪ mam wa wa'am. ²⁶ Nēr-seka n yǎŋe ɛŋe mam n boorɪ se'em ka paage ba'asgɔ, mam wun botɪ a sɔna so'olum buuri wuu. ²⁷⁻²⁸ La de la pǎn-seka tɪ mam to'oge m Sɔ Nawēnne zē'am na tɪ mam wun bɔ ɛ. A wun tara la kuto dasaare sɔna ba wu ban wōtɪ lg-kegsɪ la. La mam wun ken bɔ ɛ bewā'are.

²⁹ Seka n wōm yetɔga wǎ, a selse Nawēnne Sɪa n yetɪ a nērba se'em na sōŋa sōŋa. »

Krisi kōa tɪ a bɔ Sardɪ Wēndeego nērba

3 «Gulɛ bɔ Sardɪ Wēndeego nērba la gu'ura yetɪ: Seka n tarɪ Nawēnne susɪ bayopɔɪ, la wōrbie bayopɔɪ la n yele se'em n wāna: «Mam mi ya tōoma mɛ, fu yu'ure yese mɛ tɪ ba yetɪ ya vɔa mɛ, la, ya ki mɛ. ² Bela, guuse ya mēŋa, tɪ sela n deege la a ki la, yǎage da ki ba'ase. Se'ere n soe la, mam bǎŋe mɛ tɪ ya tōoma la ka paage Nawēnne yem. ³ Tēege-ya zāsŋɔ la tɪ ya daan wōm dee to'oge ɛ se'em na, sake-ya ɛ teege yem base tōon-be'ero. Ya sǎn ka guuse, mam wun wa'am wa di'ige ya wu nayiga la, la ya kǎn bǎŋe wakat-seka tɪ mam wun wa'am ya zē'am. ⁴ La nērba baseba n boe yāma puam Sardɪ ka dēge ba futo. Bāma n wun yɛ fu-peelsɪ doose mam, bāma n mase la ūyǎ. ⁵ Nēr-seka n yǎŋe wun wa yɛ la fu-peelsɪ bela, la mam kǎn saam a yu'ure wɔm gōŋɔ la puam. La mam wun wi a yu'ure mam Sɔ, la a malekadōma la nēŋam yetɪ a de la mam nēra.

⁶ Seka n wōm yetɔga wǎ, a selse Nawēnne Sɪa n yetɪ a nērba se'em na sōŋa sōŋa. »

Krisi kōa tɪ a bɔ Filadelfi Wēndeego nērba

⁷ «Gulɛ bɔ Filadelfi Wēndeego nērba la gu'ura yetɪ: Seka n de pupeelem dāana, la sɪra dāana n tarɪ naba Adavidɪ kulɪnbie, seka n yu'urɪ tɪ nēra ka tāna yɔ'ɔra, dee yɔ'ɔra tɪ nēra ka tāna yu'ura la n yele se'em n wāna:

⁸ «Mam mi ya tōoma mɛ, mam mi tɪ ya pǎŋa ka zo'oge, la baa la bela, ya sake mam yetɔga la mɛ, la ya ka si'ise tɪ yāma ka mi mam. Mam yo'oge la sore bɔ ya, la nēra nēra kǎn yǎŋe yu ɛ. ⁹ Mam n wun ɛŋe nēr-seba n dolɪ Asūtāana la se'em n wāna: Nēr-bāma yetɪ bāma de la Zifdōma, la dagɪ bela, ba de la pōmpɔrɔndōma. Mam wun base mɛ tɪ ba wa'am wa ka dūma ya nēŋam, la ba wun bǎŋe tɪ mam nōŋe ya. ¹⁰ Yāma n sake mam yetɔga la mōrge sēŋe nēŋa na ūyǎ, mam mē wun gu'ura ya sōŋa tɪ toogo seka n sēm dūnia wuu zuo, tɪ a make nēr-seba wuu n boe dūnia zuo la, da paage ya. ¹¹ Mam sēm na lɛɛɛ, gure-ya sela tɪ ya tarɪ la kǎŋkǎŋe, tɪ nēra da to'oge ya yɔɔɔ. ¹² Nēr-seka n yǎŋe, mam wun botɪ a āna wu zēere mam Sɔ Nawēnne yire puam, la ba kǎn malɪn yese ɛ mɪ. La mam wun gulɛ mam Sɔ Nawēnne yu'ure, la a tēŋa n de Zerizalem paalga n ze'ele saazuum Nawēnne zē'am signa la yu'ure a zuo, la mam wun ken gulɛ mam mēŋa yu'ur-paalga la a zuo.

¹³ Seka n wōm yetɔga wǎ, a selse Nawēnne Sɪa n yetɪ a nērba se'em na sōŋa sōŋa. »

Krisi kōa tɪ a bɔ Laodise Wēndeego nērba

¹⁴ «Gulɛ bɔ Laodise Wēndeego nērba la gu'ura yetɪ: Seka n de Amina la, seka n de sɪra dāana, dee sɪrɪ tɔgra sela tɪ a nini yē, dee ken dɛna seka tɪ Nawēnne n nāam sela wuu ze'ele a zē'am n yele se'em n wāna:

¹⁵ «Mam mi ya tōoma mɛ, mam mi tɪ ya dagɪ mā'asga, ya mē dagɪ tuulga. Mam boorɪ nɪ tɪ ya dɛna la mā'asga bu tuulga. ¹⁶ La yāma n ka de mā'asga bu tuulga mam tōoma la puam, dee āna wam na, mam wun uke ya mɛ m nōorum base.

¹⁷ Ya yetɪ yāma de la bōntatba, yāma tarɪ sela woo mɛ tɪ sela ka pɔ'ɔge yāma. La, ya ka mi tɪ ya de la nin-bāal-dōma, la fare dōma. Ya de la nasdōma, la beela, la fɔɔsɪ. ¹⁸ Bela ūyǎ, mam kǎ'anɪ ya mɛ tɪ ya da sǎlma mēŋa mēŋa tɪ ba zuge bugum puam yese ba mam zē'am, tɪ ya wun sɪrɪ dɛna bōntatba. La ya da fu-peelsɪ yɛ pɪ ya yǎnne na, dee da tum dō ya nini yēta. ¹⁹ Mam sɪbgɪ la seba wuu tɪ mam nōŋe, dee demsra ba. Bela, narge-ya pǎŋa teege yem base tōon-be'ero. ²⁰ Bise-ya, mam ze la kulɪŋa nōorum wē'era, nēr-seka n wōm mam kōa yo'oge kulɪŋa bɔ mam, mam wun kē a zē'am lagum na ɛ di, tɪ a mē lagum na mam di. ²¹ Nēr-seka n yǎŋe, mam wun botɪ a lagum na mam po zɪ'ire mam na'am bɪmbɪnne zuo, wu mam yǎŋe po lagum na mam Sɔ Nawēnne zɪ'ire a na'am bɪmbɪnne zuo la.

²² Seka n wōm yetɔga wǎ, a selse Nawēnne Sɪa n yetɪ a nērba se'em na sōŋa sōŋa. »

Ba nǎ'asrɪ Nawēnne saazuum

4 Bela poorum, mam bise mɛ yē tɪ kulɪŋa n yo'oge Nawēnne yire. Tɪ kōa la tɪ mam wōm pɔspɔsɪ n

tɔge la mam wu benkonne n peebe la, yele mam yeti: «Zom wa'am kalam, ti mam wun pa'ale fu sela n wun wa ɛ̃ŋɛ.» ² Ti Nawēnne Sɔa dare bɔna la mam boti mam yē na'am bīm̃bīnne n boe Nawēnne yire, ti nēra zēa a zuo. ³ Seka n zī bīm̃bīnne na zuo la nēge yēgra wu ku-ga n tarɪ yōorɔ yu'urɛ n de zaspi, la sarduani. La gō-mati-tāpɔ n yēgrɪ āna wu kugre yu'urɛ n de emerɔdi n kaage na'am bīm̃bīnne na. ⁴ La na'am bīm̃bīna pisyi la anaasi n daan gilge na'am bīm̃bīn-ɛ̃ŋa, ti kēma pisyi la anaasi n ye fu-pɛɛlsɪ vuge sālma mūnsi zēa ba zuto. ⁵ Ti saaga ze'ele na'am bīm̃bīnnum na yēgra, tāsra dee sūnna, la fitladōma bayopɔɪ n lasum dita na'am bīm̃bīnne na nēŋam. Bāma de la Nawēnne susɪ bayopɔɪ la. ⁶ Na'am bīm̃bīnne na nēŋam, bōnɔ n gāi āna wu ko-kāte yēgra wu bɪsga.

La bōn-vɔɔsɪ banaasi n gilge na'am bīm̃bīnne na n boe tēŋasuka la, ti nini purɛ ba nēŋa, la poore. ⁷ Pɔspɔsɪ bōn-vɔa la wōn na gɪgne, ti buyi dāana la wōna lulla, ti butā dāana la tara nēŋa n wōn na nērsaala nēŋa. La bōn-vɔa bunaasi dāana la wōn na tugfo n ɛ-grɪ. ⁸ Bōn-vɔɔsɪ banaasi la ayɪla woo tarɪ la kempagsɪ bayoobi ti nini purɛ ba zē'a woo, tilum na zuum. Yu'urɔŋa la wuntɛŋa, ba yōoni mɛ ka gɔ'ɔra yeti:

«Sōŋa, sōŋa, sōŋa,
Zuudāana Nawēnne n de ke'ɛŋo wuu dāana n ān sōŋa.
Ŕŋa n daan boe, n ken bɔna, dee wun bɔna wakate wuu.»

⁹ Bōn-vɔɔsɪ banaasi la ɛ̃n nā'asra seka n zī na'am bīm̃bīnne zuo n vɔa wakate wuu la mɛ, pēgra ɛ̃ dee pu'usra ɛ̃ a yel-sōnne. ¹⁰ Ba sān ɛ̃n ɛ̃ŋe bela, kēma pisyi la anaasi la ɛ̃n ka la dūma seka n zī na'am bīm̃bīnne zuo n vɔa wakate wuu la nēŋam nā'asra ɛ̃, dee vugse ba mūnsi bīŋe na'am bīm̃bīnne na nēŋam, dee yeta ti:

¹¹ «Ti Zuudāana Nawēnne,
fōn mase fu to'oge na'am pāŋa,
la nā'asgɔ, la ke'ɛŋo,
la de la fōn nāam sela woo,
la de la fōn boori ūyā,
ti fōn nāam ba ti ba bɔna.»

Gōŋɔ n tabɛ zē'esi bayopɔɪ, la Azezi n de Pebila yelle

5 La mam yē la gōŋɔ n boe seka n zī na'am bīm̃bīnne zuo la zuugɔ nu'ugo puam, ti a nēŋa la a poore wuu gulse, ti ba dɪke bōnɔ n tabɪ tabɛ ɛ̃ zē'esi bayopɔɪ. ² Ti mam yē maleka n tarɪ pāŋa n tɔgrɪ ke'enke'em yeti: «Āne n mase wun lake bōnɔ na n tabɛ la, dee lake gōŋɔ la?» ³ La nēra nēra daan ka boe Nawēnne yire, bu dūnia zuo, bu tēŋa wā puam puam n tā wun lake gōŋɔ la, dee bɪsɛ a puam. ⁴ Ti mam daan kella zozo'e, ban ka yē nēra n mase n wun lake gōŋɔ la, dee bɪsɛ a puam na ūyā. ⁵ Ti kēma la nēra ayɪla yele mam yeti: «Da kella. Bɪsɛ, seka n de Azuda buuri gɪgne

n de naba Adavidi yuŋa la yāŋe mɛ, ɛ̃ŋa n tā wun lake bōnɔ na n tabɛ zē'esi bayopɔɪ la, dee lake gōŋɔ la.» ⁶ Ti mam yē Pebila n ze na'am bīm̃bīnne na tēŋasuka, ti bōn-vɔɔsɪ banaasi, la kēma la gilge ɛ̃ base tēŋasuka. Pebila la ān wu ba daan ku ɛ̃ mɛ na. A tarɪ la ulɪ bayopɔɪ, la nini bayopɔɪ n de Nawēnne susɪ bayopɔɪ la ti a tōm dūnia wuu puam na. ⁷ Ti Pebila la paage to'oge gōŋɔ la seka n zī na'am bīm̃bīnne zuo la zuugɔ puam. ⁸ Ĕn to'oge gōŋɔ la, bōn-vɔɔsɪ banaasi la, la kēma pisyi la anaasi la, ka la dūma a nēŋam. Ba nēra woo zālɪ la kōlŋɔ, la sālma laasi n purɛ la tɪdare n tarɪ yūuŋo n ān yēlum, n de Nawēnne nēra pu'usgɔ. ⁹ Ba daan yōoni la yōom-paale yeti:

«Fōn mase ti fu to'oge gōŋɔ la lake bōnɔ na n tabɛ la. Se'ere n soe la, ba daan ku fōn mɛ,
ti fōn dɪke fu zum na yɔ to'oge nērsaalba buuri wuu, la yetɔga buuri wuu, la tēnsɪ wuu nēra, la so'olum wuu nēra bɔ Nawēnne.

¹⁰ Fōn boti ba dena la fu so'olum kāabgɔ kēma tōnna bɔ'ɔra Nawēnne, dee wun di na'am dūnia zuo.»

¹¹ Ti mam le bɪsɛ, wōm malekadōma kuuŋɔ kōa, ba daan de la tusa nōore tusa tusa. Ba daan gilge la na'am bīm̃bīnne na, la bōn-vɔɔsɪ banaasi, la kēma la.

¹² Ba daan yōoni mɛ ke'enke'em yeti:

«Pebila ti ba daan ku la n mase ti a to'oge ke'ɛŋo, la bōntarsōm, la yem, la pāŋa, la nā'asgɔ, la na'am pāŋa, la pēka.»

¹³ Ti mam wōm bōn-nāanɪsɪ wuu n boe Nawēnne yire, la tēŋa zuo, la tēŋa puam puam, la ko-kāte puam, la bōn-nāanɪsɪ n boe zē'esi wuu n yeti:

«Seka n zī na'am bīm̃bīnne zuo, la Pebila la n soe pēka, la nā'asgɔ, la na'am pāŋa, la ke'ɛŋo wakate n ka ba'asɪ.»

¹⁴ Ti bōn-vɔɔsɪ banaasi la yeti: «Amina.» Ti kēma la ka dūma tēŋa nā'asra ɛ̃.

Bōnɔ n tabɛ zē'esi bayopɔɪ la, bayoobi lakre

6 La mam yē mɛ ti Pebila la lake bōnɔ na n tabɛ zē'esi bayopɔɪ la ayɪla. Ti mam wōm bōn-vɔɔsɪ banaasi la ayɪla n tɔgrɪ ti a kōa āna wu saaga n tāsɪ la yeti: «Wa'am!» ² Ti mam bɪsɪra, yē wemōa n de pɛɛlga. Ti nēra bā ɛ̃ zāla tāpɔ, ti ba bɔ ɛ̃ mūŋa. Ti a dena nēra n yāŋrɪ, sēŋe ti a yāŋe.

³ Ti Pebila la lake bōnɔ buyi dāana n tabɛ la, ti mam wōm bōn-vɔa buyi dāana n yeti: «Wa'am!» ⁴ Ti wemōa n de mōlga yese. Ti ba bɔ seka n bā ɛ̃ na ke'ɛŋo ti a yese dūnia sū-mā'asum ti nēra kuura taaba, dee bɔ ɛ̃ sukɔbgɔ n ān kāte.

⁵ Ti Pebila la lake bōnɔ butā dāana n tabɛ la, ti mam wōm bōn-vɔa butā dāana la n yeti: «Wa'am!» Ti mam bɪsɪra, yē wemō-sabga. Ti seka n bā ɛ̃ na zāla bōn-makrɪga a nu'ugo puam. ⁶ Ti mam wōm dāmne n ān wu kōa n ze'ele bōn-vɔɔsɪ banaasi la tēŋasuka yeti: «Si

ligri wun zo'oge me, ti nēra daare ayula yɔɔɔ wun da si wulla ayula, dee ti kamāana wulsɪ batā dena nēra daare ayula yɔɔɔ. La, la sān dena kaam la dāam, da pa'ase sela.»

⁷ Ti Pebila la lake bōɔɔ bunaasɪ dāana n tabe la, ti mam wōm bōn-vɔa bunaasɪ dāana n yeti: «Wa'am!»

⁸ Ti mam bɪsra, yē wemōa n de puka. Seka n bā ē na yu'ure n de Akūm, ti kɪ'ɪn-tēɲa dɔla a poore. Ti ba bɔ ba ke'engo ti ba ku dūnia nēba banaasɪ woo puam nēra ayula. Sukɔbɔɔ, la kɔm, la bā'asɪ, la we-dūnsi n wun ku ba.

⁹ Ti Pebila la lake bōɔɔ bunuu dāana n tabe la, ti mam yē nēr-seba ti ba daan ku ba, ban mōole Nawēnne yetɔga la, dee vɔa wu yetɔga la n yele se'em na ŷyā, susɪ n boe kāabɔɔ bīm-bīnne na tilum. ¹⁰ Ti ba tɔgra ke'enke'em yeti: «Zuudāana n gānnɪ wuu n ān sōɲa, n de sɪra dāana, fōn wun yuuge paage la wāne dee di dūnia nēba sarɪya sɪbge ba, ban ku tōma la ŷyā?» ¹¹ Ti ba bɔ ba nēra woo fu-peelga, dee yele ba yeti ba gu fēe, halɪ ti ba ku ba sɔbiisi n de ba tōntōn-taaba, n de ba ku ba wu bāma la, ti ba sōore paage.

¹² Ti Pebila la lake bōɔɔ buyoobi dāana n tabe la, ti tēɲa mīim zozo'e, ti wuntēɲa lebge lika wu tāt-sabga, dee ti wōrga lebge mōlga wu zum na. ¹³ Ti wōrbie ze'ele saazuun suuge tēɲa, wu kēnkāɲa ti kuseb-kāte mīim ti kēnkāma suuge la. ¹⁴ Ti sagōɲɔ kilim wu sōɲɔ la bɔɪ. Ti tānsɪ wuu, la tēn-seba ti ko'om gilge la wuu ka le bɔna ba zē'esɪ. ¹⁵ Ti dūnia na'adōma, la nēr-kegro, la sudaasɪ ke'endōma, la bōntatba, la pānsɪ dōma, la yamsɪ, la burkīndōma wuu sugra tānsɪ bogro puam, la tāmpīisi lēma. ¹⁶ Dee yetɔ tānsɪ, la tāmpīisi la yeti: «Luiya ti zuto suge tɔ, ti seka n zɪ na'am bīm-bīnne zuo la da yēta tɔ, ti Pebila la sū-isgre da paage tɔ. ¹⁷ Se'ere n soe la, ba sū-isgre daare paage me, nēra ka boe n wun yāɲe pōse.»

Nawēnne nēba dāalɔɔ

⁷ Bela poorum, mam yē la malekadōma banaasɪ n ze dūnia sakugrɔ banaasɪ. Ba daan yōge la dūnia kusebɔ n ze'ele zē'esɪ banaasɪ la wuu, ti ba da vugra wē'erɪ tēɲa, bu ko-kāte, bu tɪa. ² La mam yē la maleka ayēma n ze'ele wēntulle n doorɪ zē'a la zɔnna, a zālɪ la vɔm dāana Nawēnne dāalɔɔ bōɔɔ. La a tɔge la ke'enke'em yele malekadōma banaasɪ la ti Nawēnne bɔ ba nōore ti ba sā'am tēɲa, la ko-kāte la yeti: ³ «Nān da sā'am-ya tēɲa, bu ko-kāte, bu tɪsɪ, base-ya ti ti ēɲe Nawēnne tōntōnɪba la dīa dāalɔɔ, dee ti ya sā'am.» ⁴ Ti mam wōm seba ti ba ēɲe ba Nawēnne dāalɔɔ la sōore. Ba de la nēba tuskɔbɔga la tuspinaasɪ la anaasɪ (144'000). Ba ze'ele la Israyelɪ buuri la wuu puam.

⁵ Azuda buuri nēba ti ba dāale de la tuspia la ayi, Arubā buuri nēba tuspia la ayi, Agadɪ buuri nēba tuspia la ayi,

⁶ Azēerɪ buuri nēba tuspia la ayi, Aneftali buuri nēba tuspia la ayi, Amanase buuri nēba tuspia la ayi,

⁷ Asimeyō buuri nēba tuspia la ayi, Alevi buuri nēba tuspia la ayi, A'isakaarɪ buuri nēba tuspia la ayi,

⁸ Azabilō buuri nēba tuspia la ayi, Azozefu buuri nēba tuspia la ayi, Abēnzamē buuri nēba tuspia la ayi.

Nēr-kuuɲɔ zozo'e n lagse

⁹ Bela poorum mam bɪsɪ me, yē nēr-kuuɲɔ zozo'e ti nēra nēra ka tā wun kāale. Ba de la so'olum wuu nērba, la buuri wuu nērba, la tēnsɪ wuu nērba, la yetɔga buuri wuu nērba. Ba daan ye la fu-peelsɪ zāla karkɔɲa vōɔɔ ba nu'usum ze na'am bīm-bīnne, la Pebila la nēɲam. ¹⁰ Ba tɔgrɪ la ke'enke'em yeti:

«Fāare ze'eti la tōma Nawēnne n zɪ na'am bīm-bīnne zuo, la Pebila la zē'am.»

¹¹ Malekadōma la wuu daan ze gilge la na'am bīm-bīnne, la kēma, la bōn-vɔɔsɪ banaasɪ la. Ba daan ēn ka la dūma dɪke ba nēnsɪ vōgle tēɲa na'am bīm-bīnne na nēɲam nā'asra Nawēnne ¹² yeti:

«Asɪra, Nawēnne n soe nā'asɔɔ, la na'am pāɲa, la yem, la yel-sōnnē pu'usɔɔ, la pēka, la ke'engo, la pāɲa wakate n ka ba'asɪ. Amina.»

¹³ Ti kēma la ayula soke mam yeti: «Āndōma n de nēr-bāma n ye fu-peelsɪ la, ba ze'ele la be?» ¹⁴ Ti mam lerge ē yeti: «M zuudāana, fōn mi.» Ti a yele mam yeti: «Ba de la nēr-seba n ze'ele toog-kāte puam na. Ba peege ba futo me Pebila la zum puam ti ba pelge. ¹⁵ Bela n soe ti ba ze Nawēnne na'am bīm-bīnne na nēɲam, tōn-na bɔ'ɔra ē wuntēɲa la yu'ɔɲɔ a yire la puam. Seka n zɪ na'am bīm-bīnne zuo la n wun gu'ura ba. ¹⁶ Kɔm la koyūuro kān le yōke ba, wuntēɲa la a tuulɔɔ kān le wōɲe ba. ¹⁷ Se'ere n soe la, Pebila la n boe na'am bīm-bīnne tēɲasuka la n wun bɪsra ba yelle, ēɲa n wun tarɪ ba sēɲe ko'om n bulli n bɔ'ɔrɪ vɔm zē'am. La Nawēnne n wun duuse ba nintām wuu.»

Bōɔɔ n tabe bayopɔɪ dāana la lakre

⁸ Pebila la lake la bōɔɔ bayopɔɪ dāana n tabe la, ti la āna yɪrɪrɪr Nawēnne yire wakate fēe paage karf-ayula pusuka. ² Ti mam yē malekadōma bayopɔɪ n ze Nawēnne nēɲam, ti ba bɔ ba benkɔma bayopɔɪ.

³ La maleka ayēma n wa'am wa ze'ele kāabɔɔ bīm-bīnne na zē'am. A daan tarɪ la sālma laaga ti ba tarɪ yō'ora tɪdare. Ti ba bɔ ē tɪdare pāl, ti a dɪke ba lagum na Nawēnne nēba wuu pu'usɔɔ yō sālma kāabɔɔ bīm-bīnne n boe na'am bīm-bīnne na nēɲam na zuo bɔ Nawēnne. ⁴ Ti tɪdare la ti a yō la bug-zū'usi lagum na Nawēnne nēba la pu'usɔɔ, ze'ele maleka la n ze Nawēnne nēɲam na nu'usum zɔnna saazuun. ⁵ Ti

maleka la dıke laaga la tı ba tarı yō'ora tudare la, pıre ē na tudare bugum na n boe kāabgo bīmīnne zuo la lobge ba tēja zuo. Tı saaga tāsra, yāgra dee sūnna, tı tēja mīim.

Benkoma peebgo

⁶ Malekadōma bayopɔi la n zāl benkoma bayopɔi la, māasum me tı ba peebe ba.

⁷ Tı pɔspɔsi maleka la peebe benkonne. Tı sakuga la bugum n gaam na zıum ka'age dūnia zuo. Tı dūnia zē'esi batā puam, bugum di zē'a ayıla, tı tısi zē'esi batā puam, bugum di zē'a ayıla, tı mō-mā'asa wuu di bugum.

⁸ Tı maleka buyi dāana peebe benkonne. Tı ba lobge sela ko-kāte puam n ān wu tăn-kāte tı bugum diti. Tı ko'om na zē'esi batā puam, zē'a ayıla lebge zıum. ⁹ Tı bōn-vɔɔsi seba n boe ko'om puam na batā puam woo ayıla ki. Tı ōorno batā puam woo ayıla sā'am.

¹⁰ Tı maleka butā dāana peebe benkonne. Tı wōrbikāte n diti bug-zılıŋa ze'ele saazuum lui mōga, la kulsi ko'om puam, a lui la ko'om na zē'esi batā ayıla puam.

¹¹ Wōrbiire la yu'ure de la Azēlōm. Tı ko'om na zē'esi batā puam, zē'a ayıla lebge zēlōm. La nērba zozo'e n yū ko'om na ki, ko'om na n de zēlōm na iŷā.

¹² Tı maleka bunaasi dāana peebe benkonne. Tı wēntulle zē'esi batā puam zē'a ayıla, la wōrga zē'esi batā puam zē'a ayıla, la wōrbie zē'esi batā puam zē'a ayıla pāŋa ba'ase, tı ba wuu zē'esi batā puam, zē'a ayıla lebge lika. Tı wuntēŋa zē'esi batā puam ayıla ka le nēera peelem, tı yu'urɔ me bela.

¹³ Tı mam yē sil-kāte n ēgrı saazuum-zuum, wōm ēn tɔgrı ke'enke'em yetı: «Waı, waı! Nēr-seba n boe tēja wā zuo wun yē la toogo, malekadōma batā n weege la n wun peebe ba benkoma, tı ba yē toogo.»

9 Tı maleka bunuu dāana peebe benkonne. Tı mam yē wōrbiire n ze'ele saazuum lui dūnia zuo. Tı ba bɔ ē bog-ko'ogo saafıbiire. ² Tı wōrbiire la pake bog-ko'ogo la, tı bug-zū'usi ze'ele bog-ko'ogo la puam yesra wu bug-kāte zū'usi la, botı wuntēŋa, la sapebsum sobe. ³ Tı tēnta'aba ze'ele zū'usi la puam yese saage dūnia zuo. Tı ba bɔ ba toogo wu nānsı toogo la. ⁴ La ba yele ba yetı ba da ēŋe mōoro, la bōn-seba wuu n yesrı tēja, la tısi sela, ba pɔglum nēr-seba n ka tarı Nawēnne dāalgo ba dīa zuto la mā'a. ⁵ Ba daan ka bɔ tēnta'aba la nōore tı ba ku nērba la, la de la ba nāmse ba wōr-sınuu. Ban botı toog-seka nāmsra nērba la ān wu nāŋa n ēn dōn nēra tı la dōnna se'em na. ⁶ La dabsa bāma, nērsaalba wun ēera kūm, la ba kān yē ē. Ba wun bɔɔra tı ba ki, la kūm wun zoe dee base ba.

⁷ Tēnta'aba la ān wu wiiri n māasum gu'ura zebre, la sela n boe ba zuto āna wu sālma mūnsi, dee tı ba nēnsı āna wu nērba nēnsı la. ⁸ Ba tarı la zomto n ān wu pɔgsı zomto la. Dee tı ba yēna āna wu gıgma yēna la.

⁹ Ba dıke la bōnɔ n ān wu kuto futo pı ba yō'oro. La ba kempagsı la dāmne ān wu wiiri toto tı wiiri zozo'e ve'erı zɔta we'esa zebre zē'a. ¹⁰ Ba tarı la zɔa wu nānsı zɔa la dōnna. Ba zɔa bāma n bɔ ba ke'engo tı ba nāmse nērba wōr-sınuu. ¹¹ Ba daan tarı la naba, a de la malek-seka n gu'uri bog-ko'ogo la. A yu'ure la Ebre yetɔga de la «Abadō», la Grēkı yetɔga de la «Apoliyō», n boorı tı la yetı «Sā'ama».

¹² Pɔspɔsi toogo la tole me. La toogo buyi n wun ken wa'am.

¹³ Tı maleka buyoobi dāana peebe benkonne. Tı mam wōm kōa n ze'ele sālma kāabgo bīmīnne n boe Nawēnne nēŋam kugra banaasi la zē'am. ¹⁴ Kōa la yele maleka buyoobi dāana n zāl benkonne na yetı: «Lorge malekadōma banaasi tı ba lu ba, tı ba bɔna Efratı kul-kāte zē'am na base.» ¹⁵ Tı a lorge malekadōma banaasi la base. Ba daan māasum maleg-bāma gu'ura la wakate ēŋa, la dabsre ēŋa, la wōr-ēŋa, la yuun-ēŋa, tı ba ku nērsaalba batā woo puam ayıla. ¹⁶ Tı ba pa'ale mam ba sudaasi n bā'arı wiiri kālle, ba de la tusa kɔb-syi nōore tusre. ¹⁷ Tı mam yē wiiri la, la ba wi-bā'arba n ān se'em: Ba tarı la kuto futo n pı'iri yō'oro, tı ba mō'oge āna wu bugum, dee dena yōosne, la dōbuulum. Wiiri la zuto ān wu gıgma zuto la. Bugum, la bug-zū'usi, la kidibre n ze'ele ba nōa puam yesra.

¹⁸ Tı tooro bāma batā n de bugum, la bug-zū'usi, la kidibre n ze'ele wiiri la nōa puam yesra la, ku nērsaalba batā puam woo ayıla. ¹⁹ Wiiri la ke'engo boe la ba nōa, la ba zɔa puam. Ba zɔa la ān wu bōnse'edōma la, ba tarı la zuto bāma tı ba tarı ita nērba be'em sā'ana ba. ²⁰ La nēr-seba n weege tı tooro bāma ka ku ba la, ka teege yem base ban ıtı sela tı ba mēŋa boorı la. Ba ken dɔla la kulkā'arsı, la бага tı ba dıke sālma, la zūuro, la yōgōm, la kuga, la dɔɔɔ māale, tı ba ka yēta, ka wōnna, ka tāna sēnna. ²¹ Ba ken ka teege yem base ba nēr-kua, la ba tıum tōoma, la ba yalsı tōoma, la ba nayigum na.

Maleka n zāl gön-pıka n lake

10 Tı mam daan yē maleka ayēma n tarı pāŋa n ze'ele Nawēnne yire sığra. Tı sawara pile ē wu fuugo tı a ye, dee tı gōmatı-tāpɔ kɔke a zuugo. A nēŋa ān wu wēntulle, dee tı a nāma āna wu bug-zılısı la. ² A zāl la gön-pıka n lake a nu'usum. A dıke a zuugo nā'are tagle la ko-kāte zuo, dee dıke a gobga nā'are tagle tēja zuo. ³ A daan tɔge me ke'enke'em wu gıgne n kaase la. Ēn daan tɔge la, saaga n tāsē nōore buyopɔi. ⁴ Saaga la n tāsē tɔge la, mam yetı m gulse la ban yele se'em na. La mam wōm na kōa n ze'ele Nawēnne yire tɔge mam yetı: «Suge sela tı saaga tāsē buyopɔi tɔge la, da gulse ba.»

⁵ Tı malek-seka tı mam daan yē tı a ze ko-kāte la tēja zuo la, n zēke a zuugo nu'ugo saazuum, ⁶ pɔi la Nawēn-

ne n boe wakate wuu, n nāam saazuum, la tēja, la ko-kāte, la sela wuu n boe ba puam na, yetu: «La kân le yu-uge. ⁷ Maleka buyopɔɔ dāana la sãn peebe benkonne, Nawēnne wun ēŋe ēn looge yem ti a ēŋe se'em n suge la mē, wu ēn yuun tɔge la a nōtɔ'ɔsrɪba n de a tōntōnɪba se'em na.»

⁸ Tɪ kōa la n ze'ele Nawēnne yire tɔge ti mam wōm na, le yele mam yetu: «Sēŋe ka to'oge gōn-pɪka la n lake bɔna maleka la n ze ko-kāte la tēja zuo la nu'um.»

⁹ Tɪ mam sēŋe maleka la zē'am ka yele ē yetu: «Bɔ mam gōn-pɪka la.» Tɪ a yele mam yetu: «To'oge ē obe vole. A wun lebge la toogo fu puurum. La fu nōorum, a wun āna yēlum wu seero la.» ¹⁰ Tɪ mam to'oge gōn-pɪka la a nu'um obe vole. Tɪ a āna yēlum wu seero mam nōorum. La mam n vole ē na, a lebge la toogo mam puurum.

¹¹ Tɪ ba yele mam yetu: «Dēnɪ ti fu le tɔge Nawēnne yetɔga pa'alē la wun ēŋe tēnsɪ zozo'e nērba, la so'olum zozo'e nērba, la yetɔga buuri zozo'e nērba, la na'adōma zozo'e se'em.»

Kaset-dōma bayi

11 Tɪ ba daan bɔ mam mēelɔɔ n ān wu dibga ti ba tarɪ makra, dee yele mam yetu: «Isge make Wēnde-kāte la, la kāabɔ bīm̃bīnne na, dee kālē nēr-seba n pu'usrɪ a puam na. ² La base a zēnzaka la, da make ē, se'ere n soe la, ba dɪke ē bɔ la bu-zāŋsɪ la, ba wun nē Nawēnne tēja la mē wōrsɪ pinaasɪ la ayi sǎ'am.»

³ «Mam wun tōm na nērba bayi n wun ze'ele mam poorum tɔge mam yelle. Ba wun ye la bɔra futo to'ose mam yetɔga tɔge bɔ nērba dabsa tusre la kɔbsyi la pisyobɪ.»

⁴ Nēr-bāma bayi de la Oliivi tɪsɪ bayi, dee ken dēna futladōma bayi n ze dūnia wuu Zuudāana nēŋam na.

⁵ Nēra sãn ɛera ti a ēŋe ba be'em, bugum n ze'etɪ ba nōa puam dita ba be'eba la. Asɪra, nēr-seka n eerɪ ti a ēŋe ba be'em, dēnɪ ti a ki bela. ⁶ Ba tarɪ la ke'engo wun yōke saaga ti a ka niira wakat-seba wuu ti ba to'osrɪ Nawēnne yetɔga tɔgra bɔ'ora nērba la. La ba ken tara ke'engo mē wun botɪ ko'om lebge zum, dee ken tara ke'engo wun botɪ tooro buuri wuu paage dūnia nērba wakat-seka wuu ti ba boorɪ.

⁷ Ba sãn wa tɔge yetɔga la ba'ase, dūŋa n wun ze'ele bog-ko'ogo la puam yese zēbe la ba, yāŋe ku ba. ⁸ Tɪ ba kūm na wun gǎ peelem nēŋam tēn-kāte la puam. Bilam ti ba daan ka ba Zuudāana dɔ-puurnja zuo. Tēja la yu'ure n pa'alē ēn ān se'em de la Sodom, la Ezipti.

⁹ Tēnsɪ wuu nērba, la buuri wuu nērba, la yetɔga buuri wuu nērba, la so'olum wuu nērba wun bɪsra ba kūm na la dabsa atǎ la pusuka, dee kân sake ti ba dɪke ba kūm na laage. ¹⁰ Dūnia nērba sūure wun ēŋe yēlum mē, ban yē ti nērba bayi la ki la īyǎ. Tɪ ba wun ēŋe sū-

yēlga de'em, bɔ taaba bɔ'a, se'ere n soe la, nōtɔ'ɔsrɪba bayi la nāmse nērba dūnia mē. ¹¹ La dabsa atǎ la pusuka la poorum, vo'osum n bɔ'ɔrɪ vɔm n wun ze'ele Nawēnne zē'am wa'am wa kē ba puam, ti ba vo'oge isge. Tɪ dabeem zozo'e wun yōke seba n yē ba la. ¹² La nōtɔ'ɔsrɪba bayi la wun wōm na kōa n ze'ele Nawēnne yire yele ba yetu: «Zom-ya wa'am.» Tɪ ba kē sawara puam zɔnna we'esa Nawēnne yire, ti be'eba la bɪsra ba. ¹³ Wakate ēŋa mēŋa, tēja n wun mīim halɪ zozo'e. Tɪ Zerizalem tēja la zē'esɪ pia puam, zē'a ayɪla wun lui saam. Tɪ nērba tusa ayopɔɔ ki, tēja la n mīim na īyǎ. Tɪ dabeem wun yōke nēr-seba n weege la, ti ba bɔ Nawēnne n boe saazuum nǎ'asɔɔ.

¹⁴ Toogo buyi dāana tole mē. La toogo butǎ dāana la dee la fēe la a wa'am.

Benkonne buyopɔɔ dāana

¹⁵ Tɪ maleka buyopɔɔ dāana peebe benkonne, ti kōosi ze'ele Nawēnne yire tɔge ke'enke'em yetu:

«Dūnia so'olum lebge la tōma Zuudāana, la Krisi ti a tōm na n soe, la a na'am na boe la wakate n ka ba'asrɪ.»

¹⁶ Tɪ kēma pisyi la anaasɪ la n zɪ ba na'am bīm̃bīna zuto Nawēnne nēŋam na, vōgle nēnsɪ tēja nǎ'asra Nawēnne yetu:

¹⁷ «Zuudāana Nawēnne n de ke'engo wuu dāana, n daan boe, n ken bɔna la,

tōma pu'usrɪ la fōn fu yel-sōnne, fōn dɪke fu ke'engo n zo'oge vɪgle fu na'am na īyǎ.

¹⁸ Bu-zāŋsɪ wuu nērba sūure isge mē, la lēle wǎ fōn sū-yīire wakate n paage, ti fōn wun di seba n ki la sarɪya, la fōn wun yɔ fu tōntōnɪba la n de fu nōtɔ'ɔsrɪba, la fu nērba la n nǎ'asrɪ fōn, ke'endōma la tarɪmdōma wuu mē.

La de la wakate ti fōn wun sǎ'am nēr-seba n sǎ'anɪ dūnia la.»

¹⁹ Tɪ Wēnde-kāte n boe Nawēnne yire la yo'oge, ti nōor-bīŋre daka la yēta. Tɪ saaga yāgra, sūnna, tāsra, ti tēja mīim, ti sakuga zozo'e lui.

Pɔka, la puryōŋ-yālma

12 Bōn-bān-kāte n puke saazuum. Pɔka n dɪke wēntulle pile wu fuugo la, ti wōrga bɔna a nāma tēja, dee ti a vuge mūŋa n tarɪ wōrbie pia la ayi. ² Pɔka la tarɪ la puure virgra ti a dɔge, wulsra kaasra, dɔka toogo n tarɪ ē na īyǎ. ³ Tɪ bōn-bānne ayēma puke saazuum: A de la puryōŋ-yālma n ān kātē dēna mōlga, a tarɪ la zuto bayopɔɔ, la ulɪ pia, ti mūnsi vuge a zuto la wuu. ⁴ Tɪ a zuure kǎ'ase wōrbie batǎ puam ayɪla saazuum lobe base tēja zuo. Puryōŋ-yālma la ze la pɔka la n yetɪ a dɔge la nēŋam gu'ura ti pɔka la dɔge ti a yōke a bia la obe. ⁵ La pɔka la dɔge la budibla n wun

tara kuto dasaare sɔna so'olum buuri wuu. Tɪ ba zɛ bia la tarɪ sɛŋɛ Nawɛnnɛ zɛ'am, a na'am bɪmbɪnnɛ na zɛ'am. ⁶ Tɪ pɔka la zoe sɛŋɛ weem, zɛ'e-seka tɪ Nawɛnnɛ mǎasum a ɪyǎ la, bilam tɪ ba diise ɛ dabsa tusɛ la kɔbsyi la pisyoobi.

⁷ Tɪ zɛbrɛ isge Nawɛnnɛ yire. Tɪ malekadɔma ke'ema Amiseli, la a malekadɔma zebra la purɔŋ-yǎlma la, tɪ purɔŋ-yǎlma la, la a malegsɪ mɛ zebra la ba. ⁸ La ba kɔŋɛ pǎŋa mɛ, tɪ sore ka le bɔna tɪ ba bɔna Nawɛnnɛ yire. ⁹ Tɪ ba daan lobe purɔŋ-yǎlma kǎte la base. Ɛŋa n de bɔnsela n yuun boe, tɪ ba wi'ira ɛ tɪ «Dɔta» bu «Asɩtǎana» n pǎ'asɪ dɩnia nɛrba wuu la. Ba lobe ɛ, la a malegsɪ base la tɛŋa zuo. ¹⁰ Tɪ mam wɔm kɔa n tɔgrɪ ke'enke'em Nawɛnnɛ yire yetɪ: «Nǎnanne wǎ, Nawɛnnɛ fǎare daare paage mɛ, Nawɛnnɛ yǎŋa pa'ale a pǎŋa, la a na'am mɛ, dee pa'ale Krisi tɪ a tɔm na ke'engo, se'ere n soe la, ba dige seka n wǎ'arɪ tɪ sɔbiisi Nawɛnnɛ zɛ'am wuntɛŋa la yu'urɔ la mɛ. ¹¹ La de la Pebila la zum ɪyǎ, la ban mɔole Nawɛnnɛ yetɔga la ɪyǎ, tɪ tɪ sɔbiisi la yǎŋɛ ɛ. Ba ka zoe tɪ ba wun ku ba. ¹² Bela, Nawɛnnɛ yire, la yǎma seba wuu n boe mɪ na, ɛŋɛ-ya sɩ-yɛlga. La toogo n wun yɛ tɛŋa, la ko-kǎte, se'ere n soe la, Asɩtǎana sige ya zɛ'am la sɩ-yɛire, ɛn mi tɪ a wakate deege la fɛɛ la ɪyǎ.»

¹³ Purɔŋ-yǎlma la n yɛ tɪ ba lobe ɛ base la tɛŋa zuo la, a babse la pɔka la n dɔge bia la. ¹⁴ Tɪ ba bɔ pɔka la sɩ-kǎte kempagsɪ bayi tɪ a ɛke sɛŋɛ weem, zɛ'e-seka tɪ ba wun diisra ɛ yuuma atǎ la pusuka la, zǎage la bɔnsela la. ¹⁵ Tɪ bɔnsela la uke ko'om a nɔorum wu mɔgre la pɔka la poorum tɪ ba pe'ege ɛ fɔrge. ¹⁶ La tɛŋa sɔŋɛ pɔka la mɛ, ya'age nɔore fɔoge ko'om na n ze'ele purɔŋ-yǎlma la nɔorum na. ¹⁷ Tɪ purɔŋ-yǎlma la sɩure yɛige la pɔka la, tɪ a sɛŋɛ ka zebra la pɔka la yɩsɩ seba n weege ken sakra Nawɛnnɛ nɔore, dee tɔgra Azezi yelle bɔ'ora nɛrba la. ¹⁸ Purɔŋ-yǎlma la sɛŋɛ ka ze la ko-kǎte la nɔorum.

Dɩnsi bayi

13 Bela poorum, mam yɛ la dɩŋa n ze'ele ko-kǎte puam dooge. A tarɪ la ɩla pia, la zuto bayopɔɪ, tɪ mɩnsi pia vuge a ɩla la wuu. La yu'ura n pɔ'ɔrɪ Nawɛnnɛ yu'ure n gulɛ a zuto la zuo. ² Dɩŋa la tɪ mam yɛ la wɔn na webaaga. Tɪ a nǎ'a-tala ǎna kǎra, tara nǎ'a-ɛesi wu tɛŋambɔŋa la. Dee tɪ a nɔore ǎna wu gɩgne nɔore la. Tɪ purɔŋ-yǎlma la dɩke a pǎŋa, la a na'am bɪmbɪnnɛ, la a ke'engo bɔ dɩŋa la. ³ Dɩŋa la zuugo ayɩla daan pɔglum mɛ, ǎna wu a ki mɛ na, la a pɔglurɔ la daan bɔɪ mɛ. Tɪ la di'ige dɩnia nɛrba wuu, tɪ ba dɔla dɩŋa la. ⁴ Tɪ nɛrba wuu nǎ'asra purɔŋ-yǎlma la, ɛn bɔ dɩŋa la a ke'engo la ɪyǎ. Dee nǎ'asra dɩŋa la yetɪ: «ǎne n tarɪ ke'engo wu dɩŋa la? La ǎne n tǎ wun zɛbe la ɛ le?»

⁵ Tɪ ba bɔ dɩŋa la nɔore tɪ a tɔge tɩta'alum yetɔga, dee tu Nawɛnnɛ. A to'oge ke'engo tɪ a tɔm na wɔrsɩ

pinaasɩ la ayɩ. ⁶ Tɪ a pɔse tɔgra pɔ'ɔra Nawɛnnɛ dee pɔ'ɔra a yu'ure, la zɛ'e-seka tɪ a boe, la seba n boe Nawɛnnɛ yire la wuu. ⁷ Tɪ ba bɔ ɛ nɔore tɪ a zɛbe la Nawɛnnɛ nɛrba yǎŋɛ ba. Ba bɔ ɛ ke'engo tɪ a yǎŋɛ la buuri wuu nɛrba, la tɛnsɩ wuu nɛrba, la yetɔga buuri wuu nɛrba, la so'olum wuu nɛrba. ⁸ Nɛrba wuu n boe dɩnia zuo wun nǎ'ase dɩŋa la mɛ, sǎn dagna seba yu'ura n gulɛ Pebila tɪ ba daan ku la wɔm gɔŋɔ puam na. Nɛr-bǎma yu'ura daan pɔn gulɛ wɔm gɔŋɔ la puam na halɩ dɩnia pɩ'ilurɔ wakate.

⁹ Seka n wɔm yetɔga wǎ, a selse sɔŋa sɔŋa. ¹⁰ Nɛr-seka n de ba yɔke ɛ sɛŋɛ, ba wun yɔke ɛ sɛŋɛ. Nɛr-seka n de ba ku ɛ na su'a, ba wun ku ɛ na su'a. Bela, dɛnɩ tɪ Nawɛnnɛ nɛrba tara sɩ-ke'engo, dee bɔ Nawɛnnɛ sɩra.

¹¹ Bela poorum, mam yɛ la dɩŋa ayɛma n ze'ele tɛŋa puam yese. A tarɪ la ɩla bayi n wɔn na pebila ɩla, dee tɔgra wu purɔŋ-yǎlma la. ¹² A tarɪ la pɔspɔsɩ dɩŋa la ke'engo tɔnna a nifum. A pɛrge dɩnia nɛrba wuu mɛ tɪ ba nǎ'asra pɔspɔsɩ dɩŋa la n daan pɔglum ǎna wu a ki mɛ, dee yeege la. ¹³ Dɩŋa buyɩ dǎana la ɛŋɛ la bɔn-yǎlm-kǎra, halɩ botɩ bugum ze'eta saazuum sigra dɩnia, nɛrba nifum. ¹⁴ Bɔn-yǎlma la tɪ a ɛŋɛ pɔspɔsɩ dɩŋa la nifum na, botɩ a pǎ'ase dɩnia nɛrba mɛ. A yele ba tɪ ba mǎale bɔnɔ tɪ a ǎna wu dɩŋa la tɪ ba pɔglum na su'a tɪ a vɔa la. ¹⁵ Tɪ ba bɔ dɩŋa buyɩ dǎana la ke'engo tɪ a bɔ bɔnɔ na tɪ ba mǎale tɪ a ǎna wu pɔspɔsɩ dɩŋa la vo'osum, tɪ a tǎna tɔgra, dee ku seba wuu n ka nǎ'asɩ ɛ na. ¹⁶ La dɩŋa la pɛrge nɛrba wuu mɛ, tarumdɔma la ke'endɔma, bɔntatba la nasdɔma, yamsɩ la burkɩndɔma tɪ ba dǎale ba zuugo nu'ugo bu ba dɩire. ¹⁷ Tɪ nɛra nɛra ka tǎna wun da bu koose sela, a sǎn ka tara dɩŋa la dǎalɔ, a yu'ure, bu a yu'ure la kǎlle.

¹⁸ Dɛnɩ tɪ fu tara yem: Nɛr-seka n tarɪ putɛ'ere, ɛŋa n wun tǎ'age bǎŋɛ dɩŋa la kǎlle vɔore. Se'ere n soe la, kǎlle la vɔore de la nɛrsaala kǎlle. Kǎlle la bie de la 666.

Pebila, la seba n boe la ɛ

14 Tɪ mam le bɩse, yɛ Pebila la n ze Siyɔ tǎŋa zuo. Tɪ nɛrba tuskɔbga la tuspinaasɩ la anaasɩ (144'000) ze a zɛ'am, ba tarɪ la Pebila la yu'ure, la a Sɔ yu'ure n gulɛ ba dɩa zuto. ² Tɪ mam wɔm kɔa n ze'ele Nawɛnnɛ yire tɪ a dǎmne ǎna wu ko-kǎte dǎmne, dee ǎna wu saaga n tǎsɩ sɩnna, dee ǎna wu kɔl-wɛ'erba n wɛ'erɩ ba kɔnnɔ. ³ Nɛr-kuurɔ bǎma ze la na'am bɪmbɪnnɛ, la bɔn-vɔɔsɩ banaasɩ, la kɛma la nɛŋam yɔona yɔom-paale. Nɛra nɛra ka tǎ wun zǎsum yɔone na, sǎn dagna nɛrba tuskɔbga la tuspinaasɩ la anaasɩ la n yɛ fǎare dɩnia zuo la mǎ'a. ⁴ Nɛr-bǎma ka dɛge ba mɛŋa la pɔgsɩ, ba tarɪ ba mɛŋa sɔŋa mɛ. Ba dolɩ la Pebila la zɛ'e-seka woo tɪ a we'esi. Ba yɛ fǎare nɛrsaalba puam tɪ ba dena la pɔspɔsɩ dɔma bɔ Nawɛnnɛ, la Pebila la. ⁵ Pɔmpɔrɔ yetɔga ka tole ze'ele ba nɔorum, ba ka tarɩ tuure.

Malekadōma batā kōosi

⁶ Tl mam yē maleka ayēma n ēgrl saazuum-zuum, a tarl la Nawēnne kō-yēlga n boe wakate wuu tl a mōole bō nēr-seba wuu n boe dūnia zuo, so'olum wuu nērba, la buuri wuu nērba, la yetoga buuri wuu nērba, la tēnsi wuu nērba. ⁷ A daan tōgrl mē ke'enke'em yetl: «Zoe-ya Nawēnne, la ya nā'ase ē, se'ere n soe la, wakate paage mē tl a wun di nērba sarlya. Ka-ya dūma nā'ase Nawēnne n nāam saazuum, la tēja, la ko-kāte, la kulsi wuu n bulli la.»

⁸ Tl maleka buyi dāana dola pōspōsi dāana la poore yeta tl: «A lui mē, a lui mē, Babilōni n de tēn-kāte la lui sā'am mē. Ēja n botl so'olum wuu nērba tōm a yalsi tōoma zozo'e wu dāam tl a yūuse ba la.»

⁹ Tl maleka butā dāana dola malekadōma bayi la tōgra ke'enke'em yetl: «Nēra sāl nā'ase dūja la, la a bōnō na tl ba māale la, la a sāl to'oge a dāalgō la a dīire zuo bu a nu'ugo zuo, ¹⁰ Nawēnne sūure wun yīige la ē, tl a sūge ē wu dā-ke'engo n ka pulum tl a pūrē wanne bō ē tl a yū. A wun nāmse la kidibre n diti bugum puam, maleg-sōma, la Pebila la nējam. ¹¹ Nēr-bāma nāmso go bug-zū'usi zonni la saazuum wakate wuu. Nēr-seba wuu n nā'asrl dūja la, la a bōnō na tl ba māale la, dee to'oge a yu'ure dāalgō la, kām maln yē vo'osgo wuntēja la yu'urja.»

¹² Bela, dēni tl Nawēnne nērba n sakra a nōore dee bō Azezi sra la, tara sū-ke'engo.

¹³ Tl mam wōm kōa n ze'ele saazuum yele mam yetl: «Gulse yetl: «Lan pōse lēle wā, nēr-seba n kiiri Zu-udāana doosgo puam na tarl zu-yēlga.» Tl Nawēnne Sla yetl: «La de la sra, ba wun vo'ose la ba tōon-tooro, ba tōon-sōma la doli ba mē.» »

Dūnia bōnkōla lagsgo

¹⁴ Tl mam būsra, yē sawate n de pēelga, tl nēra n wōn na nērsaala dayua zca a zuo. A vuge la sālma mūja, dee tarl geego n saase tara nōore a nu'um. ¹⁵ Tl maleka ayēma ze'ele Wēnde-kāte la puam yese tōge la seka n zo sawate zuo la ke'enke'em yetl: «Dike geego la seera, tl lagsgo wakate paage mē, se'ere n soe la, tēja zuo bōnkōla bi mē seke lagsgo.» ¹⁶ Tl seka n zī sawate zuo la dīke a geego la doose tēja zuo, se tēja bōnkōla lagsē.

¹⁷ Tl maleka ayēma ze'ele Wēnde-kāte n boe saazuum na puam yese, ēja mē tarl la geego n saase tara nōore. ¹⁸ Tl maleka ayēma n tarl ke'engo sōna bugum ze'ele kāabgo bīmīinne na zē'a yese tōge ke'enke'em la malek-seka n tarl geego n tarl nōore la yetl: «Dike fu geego la se viinye tūsi la biē n boe tēja zuo la. Se'ere n soe la, ba biē la bi mē.» ¹⁹ Tl maleka la dīke a geego doose tēja zuo se viinye tūsi la biē, dīke ba lobge bōn-kāte tl ba wēkrl viinye biē a puam n pa'alū Nawēnne sū-

yīire la puam. ²⁰ Tl ba wēke biē la wēkre bōnō na puam tēja la kēnkēja. Tl zum ze'ele wēkre bōnō na puam yese pūrē tēja zoe paage kilomētri kōbstā. Tl wemōa sāl sige ba puam, la de ko'ogo paara la a garēje.

Malekadōma bayopōi n zālū ba'asgo tooro, la Pebila yōone

15 Tl mam le yē bōn-bānne ayēma saazuum n de yel-kāte n ēgrl palēja. La de la malekadōma bayopōi n zālū tooro bayopōi n de ba'asgo tooro. Se'ere n soe la, bāma n wun ēje tl Nawēnne sū-yīire la ba'ase.

² Tl mam yē sela n ān wu ko-kāte n yēgrl wu būsra n gaam na bugum. La mam yē la nēr-seba n zēbe yāje dūja, la a bōnō tl ba māale, dee ka sake to'oge a yu'ure la kālē dāalgō la, n ze ko-kāte n yēgrl wu būsra la nōorum. Ba zālū la kōnnō tl Nawēnne bō ba. ³ Ba yōoni na Nawēnne tōntōnna Amoyisi yōone, la Pebila la yōone yetl:

«Zuudāana Nawēnne n de ke'engo wuu dāana, fōn tōoma de la tōon-kāra, la tōon-yālma. So'olum buuri wuu Naba, fōn yela la mase mē, la ba de la sra.

⁴ Zuudāana, āne n kām zoe fōn, nā'ase fōn yu'ure la? Se'ere n soe la, fōn mā'a n de pupeelem dāana. So'olum wuu nērba wun wa'am wa ka dūma nā'ase fō, se'ere n soe la, fōn tōoma n mase la puke mē tl ba yē.»

⁵ Bela poorum mam būsē mē, yē tl Wēnde-kāte n boe Nawēnne yire la puam deego la yo'oge mē. ⁶ Tl malekadōma bayopōi la n zālū tooro bayopōi la ze'ele Wēnde-kāte la puam yese, ba ye la fu-pēelsi n yēgrl, dee dīke sālma sēbrl bobe ba yō'oro. ⁷ Tl bōn-vōosi banaasi la ayūla bō malekadōma bayopōi la sālma laasi bayopōi n pūrē la Nawēnne n vca wakate wuu la sū-isgre. ⁸ Tl Wēnde-kāte la pūrē la bug-zū'usi n pa'alū Nawēnne na'am pāja, la a ke'engo. Tl nēra nēra ka tāna wun kē Wēnde-kāte la puam, sāl dagna tl tooro bayopōi la tl malekadōma bayopōi la zālū la n ba'ase.

Malekadōma ka'age Nawēnne sū-isgre bayopōi dūnia zuo

16 Tl mam wōm kōa n ze'ele Wēnde-kāte la puam tōgra ke'enke'em la malekadōma bayopōi la yetl: «Sēje-ya ka ka'age Nawēnne sū-isgre la n pūrē laasi bayopōi la base dūnia zuo.»

² Tl pōspōsi maleka sēje ka ka'age a laaga bōnō base dūnia zuo. Tl nōrtānke'ē-tōosi n dōnni īyā yōge nēr-seba n tarl dūja la dāalgō, dee nā'asra a bōnō na tl ba māale la.

³ Tl maleka buyi dāana ka'age a laaga bōnō base ko-kāte puam. Tl ko-kāte la lebge wu nēra n ki zum, tl bōn-vōosi seba wuu n boe ko-kāte la puam ki.

⁴ Tl maleka butā dāana ka'age a laaga bōnɔ base mō-ga, la kulɔ ko'om puam, tl ko'om na lebge zum. ⁵ Tl mam wōm maleka n bɔsɔ ko'om yelle la n ye le Nawēn-ne yetu:

«Fōn de la pupeelem dāana,
fōn daan boe mɛ, dee ken bɔna.
Fōn di sarɔya se'em na mase mɛ.

⁶ Se'ere n soe la, ba ku la seba
n welge to'ore dēna fōn nērba,
la fōn nōtɔ'ɔsɔrɔba tl ba zum yese,
bela tl fōn bɔ ba zum tl ba yū.
Bela n mase la ba.»

⁷ Tl mam wōm kōa n ze'ele kāabgɔ bīm̃bīnne na zē'am yetu:

«Asɔra, Zuudāana Nawēnne n de ke'eɲo wuu dāana,
fōn sarɔyadia la mase mɛ, dēna sɔra.»

⁸ Tl maleka bunaasi dāana ka'age a laaga bōnɔ base wēntulle zuo tl a yō'oge nērba la a bugum. ⁹ Tl tuulg-kāte yō'oge nērba, tl ba tuura Nawēnne n de ke'eɲo wuu dāana n tara nōore la tooro bāma la. La ba ka teege yem base tōon-be'ero nā'ase Nawēnne.

¹⁰ Tl maleka bunuu dāana ka'age a laaga bōnɔ base dūŋa la na'am bīm̃bīnne na zuo. Tl dūŋa la so'olum wuu lebge lika. Tl toogo base tl nērba ɔbra ba zɔlɔsɔ, ba ūyā n dōnnɔ ūyā. ¹¹ Nōrtānke'esɔ la tooro n tarɔ nērba la ūyā, tl ba tuura Nawēnne n boe saazuun na. La ba ka teege yem base ba tōon-be'ero la.

¹² Tl maleka buyoobɔ dāana ka'age a laaga bōnɔ base mōg-kāte seka tl ba wi'iri tl Efratɔ la puam. Tl a ko'om kēese, lebge sore bɔ na'adōma seba n ze'ele wēntulle doore bɔba la. ¹³ Tl mam yē kulkā'arsɔ batā n ān wu lonno n ze'ele purɔŋ-yālma la nōorum, la dūŋa la nōorum, la pōmpɔrɔŋ nōtɔ'ɔsa la nōorum yesra. ¹⁴ Ba de la Asūtāana kulkā'arsɔ n ɪtl bōn-yālma. Ba we'esɔ la dūnia na'adōma wuu zē'am tl ba lagse ba, tl ba zebe la Nawēnne n de ke'eɲo wuu dāana, a dabs-kāte la daare.

¹⁵ Tl Zuudāana yetu: «Bɪse-ya, mam sēm wu nayiga la. Nēr-seka n ka gɪsɪrɪ dee ye a futo tarɔ zu-yēlga, bela tl a kān sēnna beele tl nērba yēta a yānnɛ.»

¹⁶ Tl kulkā'arsɔ la lagse na'adōma la zē'e-seka tl ba wi'iri la Ebre yetɔga tl «Armagedō».

¹⁷ Tl maleka buyopɔ dāana ka'age a laaga bōnɔ sapebsum puam. Tl kōa ze'ele na'am bīm̃bīnne n boe Wēnde-kāte la puam zē'am yetu: «La ēŋe ba'ase.» ¹⁸ Tl saaga yāgra, sūnna, tāsra, tl tēŋa mīim halɔ zozo'e. Nērsaalba n boe tēŋa zuo teka, tēŋa nān ka mīim be'em be'em wu bela. ¹⁹ Tēŋa la n mīim na, tēn-kāte la pārse la zē'esɔ batā. Tl dūnia so'olum wuu tēnsɔ lui. Nawēnne tēge Babilɔnɔ tēn-kāte la yelle mɛ, botɔ a yū a sū-isgre kāte n ān wu dāam n boe a wanne puam na.

²⁰ Tl tēn-seba wuu tl ko'om gilge, la tānsɔ wuu bɔɔ, tl nēra ka le yēta ba. ²¹ Tl sakug-kāra ze'ele saazuun lui nērba zuto. Sakugre ayɪla tɪbsɪgɔ paage wu kilo

pinaasi. Tl nērba tuura Nawēnne, sakuga la toogo ūyā. Se'ere n soe la, toogo la tarɔ la pāŋa tl la yōsge gāŋe.

Pɔg-yalsɔ dāana n de tēn-kāte yelle

17 Tl malekadōma bayopɔ la n daan zālɔ laasi bay-opɔ la, ayɪla wa'am mam zē'am wa ye le mam yetu: «Wa'am, tl mam wun pa'ale fɔ pɔg-yalsɔ dāana n de tēn-kāte n mē lem kulɔ zozo'e nōorum na n wun yē sɪbgɛ se'em. ² La de la ēŋa tl dūnia na'adōma tōm yalsɔ tōoma la ē zozo'e. La dūnia nērba mē tōm na a yalsɔ tōoma wu dāam tl ba yū buge la.»

³ Tl Nawēnne Sɪa bɔna la mam, tl maleka la tarɔ mam sēŋe mōom. Tl mam yē pɔka n bā dūŋa n de mōlga tl yu'ura n tuurɔ Nawēnne gulse a ūyā wuu. Dūŋa la daan tarɔ la zuto bayopɔ, la ɪla pia. ⁴ Pɔka la daan ye la fu-mōlga n de gomusga, dee ye nēnnōm lɔgrɔ n de sālma, la kug-sōma buuri ligri n zo'oge. La a zālɔ la sālma laaga n purɛ la bōn-be'ero n de a yalsɔ tōon-dēgrɔ la.

⁵ Yu'ure n daan gulse a dīire zuo, tl ba ka mina a vōore. Yu'ure la de la «Babilɔnɔ n de tēn-kāte la, a de la dūnia pɔg-yalsɔ dōma, la tōon-dēgrɔ wuu ma». ⁶ La mam yē tl pɔg-ēŋa yū la Nawēnne nērba zum buge, nēr-seba n bɔ Azezi sɪra tl ba ku ba la zum.

Mam n yē ē na, la di'ige mam mɛ zozo'e. ⁷ Tl maleka la soke mam yetu: «Bēm tl la dēna di'ire bɔ fōn? Mam wun tɔge pɔka la, la dūŋa la tl a bā n tarɔ zuto bayopɔ, la ɪla pia la vōore pa'ale fɔ. ⁸ Dūŋa la tl fu yē la, kurum a vɔa mɛ, la a ka le bɔna, la a wun ze'ele la bog-ko'ogo la puam dooge, sēŋe sā'arɔ zē'am. La dūnia nēr-seba yu'ura n ka gulse bɔna vɔm gōŋɔ la puam halɔ dūnia pɪ'iluŋo wakate la sān yē dūŋa la, la wun di'ige ba mɛ, dūŋa la n daan vɔa, ka le wa bɔna, dee le wa bɔna la ūyā.

⁹ Dēnɔ tl fu tara yem, la putē'ere. Zuto bayopɔ la de la tānsɔ bayopɔ tl pɔka la zo ba zuto. ¹⁰ La ba ken dēna la na'adōma bayopɔ. Banuu bayopɔ la puam na'am ba'ase mɛ, la ayɪla n boe lɛɛɛ wā, dee tl ayēma nān ka wa'am. La a sān wa wa'am, a wun bɔna la wakate fēe.

¹¹ La dūŋa la n daan vɔɔ dee ka le bɔna la, ēŋa de la na-ba bunii dāana, la a ken dēna la bayopɔ dōma la puam nēra ayɪla. La a we'esɔ la sā'arɔ zē'a.

¹² ɪla pia la tl fu yē la, de la na'adōma pia, la ba nān ka to'oge na'am. La ba wun wa to'oge na'am lagum na dūŋa la di karf-ayɪla. ¹³ Bāma pia la putē'ere de la ayɪla, ba dɪke ba pāŋa, la ba ke'eɲo la wuu bɔ la dūŋa la.

¹⁴ Ba wun zebe la Pebila la mɛ, la Pebila la wun zebe yāŋe ba mɛ, ēŋa n de zuudāandōma Zuudāana, la na'adōma Naba la ūyā. Pebila la, la nēr-seba tl a wi, looge ba tl ba dēna sɪra dōma la, n wun zebe yāŋe ba.»

¹⁵ Maleka la le ye le mam yetu: «Kulɔ la tl fu yē, tl pɔg-yalsɔ dāana la zɪ ba nōorum na, de la nēr-kuuŋɔ, tēnsɔ wuu nērba, la so'olum to'oto'ore, la yetɔga buuri to'oto'ore nērba. ¹⁶ ɪla pia la tl fu yē la, la dūŋa la wun

sise pɔg-yalsɪ dāana la mɛ, wun to'ose sɛla wuu tɪ a tarɪ la, dee base ẽ beele. La ba wun obe a nɛnnɔ mɛ, dee yõ ẽ na bugum. ¹⁷ Se'ere n soe la, Nawɛnnɛ n base tɪ ba put'era tɛ'sra tɪ ba ɛɲɛ ɛɲa n boori se'em. Tɪ ba wun lagum taaba la nɔɔre ayɪla dɪke ba na'am ke'ɛɲo bɔ dũɲa la, halɪ ka paage wakat-seka tɪ la wun ɛɲɛ wu Nawɛnnɛ yetɔga n ye le se'em na ba'ase. ¹⁸ Pɔka la tɪ fu yẽ la de la tɛn-kāte n soe dũnia na'adɔma wuu.»

Babilɔnɪ n de tɛn-kāte la sã'arɔ

18 Bela poorum, mam le yẽ la maleka n ze'ele Nawɛnnɛ yire sɪgra. A daan tarɪ la ke'ɛɲo zozo'e, tɪ a na'am pãɲa peelem nɛege dũnia wuu. ² A tɔge la ke'enke'em yetɪ: «A lui mɛ, a lui mɛ! Babilɔnɪ n de tɛn-kāte la lui mɛ. A lebge la kulkā'arsɪ kɛ'a zɛ'a, a de la kulkā'ar-be'esi, la bɔn-ɛgla n de bɔn-dɛgrɔ tɪ nɛrba sis-ri suka zɛ'a. ³ So'olum buuri wuu tɔm na a yalsɪ tɔoma wu dāam tɪ ba yũ la. Tɪ dũnia na'adɔma lagum na ẽ tɔm yalsɪ tɔoma. Tɪ dũnia leebdɔma doose a nɛnnɔm lɔgrɔ n zo'oge la poorum yẽ bɔntarsɔm, bela tɪ a sã'am.»

⁴ Tɪ mam wɔm kɔa ayɛma n ze'ele saazuum yetɪ: «M nɛrba, yese-ya a puam fɔrge, tɪ ya da kãn lagum na ẽ tɔm a tɔon-be'ero la, tɪ ya da lagum na ẽ yẽ tooro seba tɪ a wun yẽ la. ⁵ Se'ere n soe la, a tɔon-be'ero la zo'oge mɛ halɪ paage saazuum. Nawɛnnɛ tɛrɪ a tɔon-be'ero la wuu yelle mɛ. ⁶ ɛɲɛ-ya ẽ wu ɛɲa n ɛɲɛ baseba se'em na, yɔ-ya ẽ ɛn ɛɲɛ se'em na nɔɔre ayɪ. Pɪre-ya a wanne na la dā-ke'ɛɲo nɔɔre ayɪ bɔ ẽ, wu ɛn botɪ nɛrba baseba yũ se'em na. ⁷ Nāmse-ya ẽ tɪ a yẽ toogo la sũ-sã'arɔ, wu ɛɲa n nã'asɪ a mɛɲa la a nɛnnɔm lɔgrɔ se'em na: A yetɪ a mɛɲa tɪ: «Mam zɪ dena la pɔg-naba, mam dagɪ pɔkɔore, la mam kãn yẽ nāmsgɔ, la sũ-sã'arɔ.» ⁸ Bela ɪyã tooro wun wa'am a zuo la daare ayɪla puam: La de la bā'asɪ n kuuri, la sũ-sã'arɔ, la kɔm, la bugum n wun di ẽ, se'ere n soe la, Zuudāana Nawɛnnɛ n di a sarɪya la de la ke'ɛɲo dāana.»

⁹ Dũnia na'adɔma n tɔnnɪ yalsɪ tɔon-dɛgrɔ la tɛn-ɛɲa lɛ, dee yɛta nɛnnɔm lɔgrɔ a zɛ'am na, sãn wa yẽ bugum n laɲɛ tɛɲa la dita tɪ zũ'usi gulla, ba wun kella mɛ fabla a yelle. ¹⁰ Ban zotɪ dabeem la a nāmsgɔ la, ba wun ze la zāazāare dee yeta yetɪ: «Wai, wai! Tɛn-kāte la, Babilɔnɪ tɛɲa n tarɪ pãɲa la, karf-ayɪla puam tɪ fɔn yẽ subgre wāna!»

¹¹ Tɪ dũnia leebdɔma mɛ wun kella fabla a yelle, nɛra nɛra n ka le da'ara ba bɔn-kɔɔsla la ɪyã. ¹² Ba bɔn-kɔɔsla la de la sālma, la zũuro, la kug-sɔma buuri ligri n zo'oge, la tãn-sɔma, la tãn-mɔlsɪ n de gomusga, la tãn-saalsɪ n yɛgrɪ, la dɔɔɔ buuri wuu n tarɪ yũuɲ-yɛlga, la lɔg-seba tɪ ba dɪke wɔbɔgɔ yɛna mālale, la lɔg-seba tɪ ba dɪke dɔɔɔ n tarɪ yɔɔɔ mālale, la lɔg-seba tɪ ba dɪke yɔgɔm, la kuto, la sāl-m-kuga mālale. ¹³ La tɪsɪ pɔgrɔ n tarɪ yũuɲɔ, la bɔnɔ n ɛn wu kakadule, la tɪdare kaam,

la miiri, la tɪdare tɪ ba yɔ'orɪ, la dāam, la kaam, la zom, la bɔnkɔɔla, la niigi, la piisi, la wiiri, la toto, la halɪ baa nɛrsaalba.

¹⁴ Ba wun ye le tɛɲa la yetɪ: «Bɔn-seba wuu tɪ fu yem boori la fɔrge dee base fu mɛ. Fu bɔntarsɔm, la fu nɛnnɔm lɔgrɔ la tole mɛ dee base fɔ, tɪ nɛra nɛra kãn le malɪn yẽ ba.»

¹⁵ Leebdɔma n leebe lɔg-bāma yẽ bɔntarsɔm tɛn-ɛɲa puam na, wun zoe la dabeem la a nāmsgɔ la. Ba wun ze la zāazāare kaasra dee fabla ¹⁶ yetɪ: «Wai, wai! Tɛn-kāte la n daan ɛn wu pɔka n ye'eri fu-sɔma, la fu-mɔlsɪ n de gomusga, dee ita nɛnnɔm la sālma lɔgrɔ, la kug-sɔma buuri ligri n zo'oge la. ¹⁷ Karf-ayɪla puam tɪ a bɔntarsɔm na wuu dare sã'am.»

Ōornɔ ke'endɔma, la nɛr-seba n kɛ'eri ōornɔ sɛnna sore, la seba n tɔnnɪ ōornɔ na puam, la nɛr-seba n kɛ'eri ōornɔ na ɛera lɛebra la ze la zāazāare, ¹⁸ la ban yetɪ tɪ bugum diti tɛɲa la tɪ zũ'usi gulla la, ba kaasɪ mɛ yeta tɪ: «Tɛɲa nãn ka boe n de tɛn-kāte wu ɛna.»

¹⁹ La ba vaari la tɛntɔnnɔ pukra ba zuto, kaasra, dee fabla yetɪ: «Wai, wai! Tɛn-kāte ɛna bɔntarsɔm ɪyã tɪ nɛr-seba n tarɪ ōornɔ ɛera ko-kāte la puam lɛebra la lebge bɔntatba. La karf-ayɪla puam tɪ a bɔntarsɔm na wuu dare sã'am.»

²⁰ «Seba n boe Nawɛnnɛ yire, ɛɲɛ-ya sũ-yɛlga sɛla n paage ẽ na ɪyã. Yāma n welge to'ore dena Nawɛnnɛ nɛrba, a Tɔntɔnɪba, la a nɔtɔ'ɔsrɪba, ɛɲɛ-ya sũ-yɛlga. Se'ere n soe la, Nawɛnnɛ di tɛɲa la sarɪya sã'am ẽ mɛ, be'em seka tɪ a ɛɲɛ ya la ɪyã.»

²¹ Tɪ maleka n tarɪ pãɲa ōbge kug-kāte n ɛn wu nɛere la lobge ko-kāte la puam dee yetɪ: «Ba wun lobge Babilɔnɪ n de tɛn-kāte la base la bela la pãɲa, tɪ ba kãn le malɪn yẽ ẽ. ²² Ba kãn le wɔm kɔl-wɛ'erba wɛ'a, la yɔonyɔonɪba yɔoma, la wɪsɪ, la benkɔma peebgo, la ba kãn le yẽ nɛra n tarɪ nu'ugo tɔone a puam, la ba kãn wɔm nɛere dāmne mɪ. ²³ Futla bugum peelem kãn le nɛege mɪ. Ba kãn le wɔm pɔgdire kɔa mɪ. Tɛɲa la leebdɔma daan de la dũnia nɛrzuto. La tɛɲa la tum tɔoma pã'ase so'olum buuri wuu nɛrba mɛ.»

²⁴ La de la Babilɔnɪ tɛɲa la puam tɪ ba yẽ Nawɛnnɛ nɔtɔ'ɔsrɪba, la Nawɛnnɛ nɛrba, la nɛr-seba tɪ ba daan ku dũnia wuu la zum.

19 Bela poorum, mam wɔm na kɔa n tɔgrɪ ke'enke'em Nawɛnnɛ yire wu nɛr-kuuɲɔ kɔosɪ la yetɪ:

«Aleluya! Nã'ase-ya Nawɛnnɛ!

Fāare, la nã'asgɔ, la ke'ɛɲo de la tɔma Wɛnnaam n soe.

² ɛɲa sarɪyadia la mase mɛ, dena sɪra.

Se'ere n soe la, a di pɔg-tutulga la n daan tɔnnɪ yalsɪ tɔoma zozo'e sã'ana dũnia la sarɪya mɛ subge ẽ, ɛn botɪ a tɔntɔnɪba ki la ɪyã.»

³ Tɪ ba le yetɪ:

«Aleluya! Nã'ase-ya Nawɛnnɛ.

Tën-kâte la ti bugum laŋe dita la bug-zū'usi zonnı na saazuum wakate wuu.»

⁴ Ti kēma pisyi la anaasi, la bōn-vɔɔsi banaasi la ka dūma tēja nā'asra Nawēnne n zī a na'am bīm̄bīnne zuo la yeti:

«Amina. Aleluya! Nā'ase-ya Nawēnne.»

Pebila pɔgdire kibsa

⁵ Ti kōa ze'ele na'am bīm̄bīnne na zē'am yeti:

«Yāma n de Nawēnne tōntōnıba n zoti ē na, tarımdōma, la ke'endōma, nā'ase-ya ti Nawēnne.»

⁶ Ti mam le wōm kōa n ān wu nēr-kuuŋɔ zozo'e n tɔgrı, dee āna wu ko-kâte dāmne, dee āna wu saaga n tāsri ke'enke'em yeti:

«Aleluya! Nā'ase-ya Nawēnne.

Zuudāana Nawēnne n de ke'engo dāana la n soe na'am.

⁷ Base-ya ti ti ēŋe sū-yēlga sırum nā'ase Nawēnne, se'ere n soe la,

Pebila la pɔgdire wakate paage me,
ti ɔka la mē māasum a mēja ba'ase.

⁸ Ti ba bɔ ē fu-sōŋɔ n yēgrı ka tara dēgrɔ, ti a ye.»
Fu-sōŋɔ la de la Nawēnne nērba tōon-sōma.

⁹ Ti maleka la yele mam yeti: «Gulse yeti: Seba ti ba wi ba ti ba wa'am wa di Pebila la pɔgdire kibsa la tarı zu-yēlga.» Dee le yeti: «Yetɔg-bāma de la Nawēnne yetɔga sira sira.» ¹⁰ Ti mam ka dūma tēja a nēŋam ti m nā'ase ē, ti a yele mam yeti: «Da ēŋe bela! Mam mē de la Nawēnne tōntōnna wu fōn, la fu sɔbiisi la n sake sira ti Azezi pa'ale la. La de la Nawēnne n de fu nā'ase.»

Sira la ti Azezi puke pa'ale la n bela ti Nawēnne Sia botı a nōtɔ'ɔsɔrɔba tɔ'ɔsra tɔgra.

We-bā'ara n bā wemō-peelga

¹¹ La mam yē la Nawēnne yire n yo'oge, ti wemō-peelga bɔna mī, ti seka n bā ē na yu'ure dena Atēntēa, la Sira Dāana. A diti la sarıya ti la mase, dee zebra zebre ti la mase. ¹² A nini ān wu bugwitum na, dee vuge mūnsi zozo'e a zuum. A tarı la yu'ure n gulse ti nēra ka mina ē, sän dagna a mēja mā'a. ¹³ La a ye la fu-woko n luse zum puam. A yu'ure de la Nawēnne yetɔga. ¹⁴ Ti Nawēnne yire zebzebrıba ye fu-peelsı n ān sōŋa ka tara dēgrɔ, bā wemō-peelsı dɔla ē. ¹⁵ Ti sukɔbgɔ n saase tara nōore ze'ele a nōorum yesra. A wun dıke la su'a la zebe yāŋe so'olum buuri wuu. A wun tara la kuto dasaare sɔna ba. A wun mēre ba la viinye bie wēkre bōnɔ n pa'alı ke'engo dāana Nawēnne sū-isgre la puam.

¹⁶ Yu'ure n gulse a fuugo zuo, la a gere zuo yeti:

«Na'adōma Naba, la zuudāandōma Zuudāana.»

¹⁷ Ti mam yē maleka n ze wēntulle puam n tɔge ke'enke'em yele bōn-ēgla wuu n ēgrı saazuum yeti: «Wa'am-ya wa lagse Nawēnne di-kâte la zē'am. ¹⁸ Ya wun di la na'adōma nēnnɔ, la ke'endōma, la sudaasi

nēnnɔ, la wiiri, la wi-bā'arba nēnnɔ, la nērba wuu, burkındōma, la yamsı, la ke'endōma, la tarımdōma wuu nēnnɔ.»

¹⁹ Ti mam yē dūŋa la, la dūnia na'adōma, la ba zebzebrıba n lagse taaba ti ba zebe la seka n bā wemōa, la a zebzebrıba la. ²⁰ Ti ba yōke dūŋa la, la pōmpɔrŋɔ nōtɔ'ɔsa la n daan ēŋe bōn-yālma dūŋa la nifum pā'ase seba n to'oge dūŋa la dāalgɔ, dee nā'ase a bōnɔ ti ba māale la. Ba lobe dūŋa, la pōmpɔrŋɔ nōtɔ'ɔsa la wuu la vɔɔsi base bugum mōgre n diti kidibre puam. ²¹ Ti su'a la n ze'ele we-bā'ara la nōorum yesra la, ku seba n weege la. Ti bōn-ēgla wuu di ba nēnnɔ na tıge.

Yuuma tusre na'am

20 Bela poorum, mam yē la maleka n ze'ele Nawēnne yire sira. A zālı la bog-ko'ogo la saafıbiire, la zɔrgɔ n ān kâte. ² A yōke la puryōŋ-yālma la n de kurum kurum bōnsela, n de dōta, n de Asūtāana la lu ē yuuma tusre ūyā. ³ A lobe ē base la bog-ko'ogo la puam yu, dee bi taase, ti a da le yāŋe pā'ase dūnia so'olum nērba, gu'ura halı ti yuuma tusre la wa paage. Yuuma tusre la poorum, dēnı ti ba lorge ē base wakate fēfēe.

⁴ Ti mam yē na'am bīm̄bīna, ti ba bɔ nēr-seba n zī ba zuto la ke'engo ti ba di sarıya. Ti mam yē nēr-seba ti ba daan wige ba zuto, ban bɔ Azezi sira, dee mōole Nawēnne yetɔga la sırsı. Nēr-bāma daan ka nā'ase dūŋa la, la a bōnɔ na ti ba māale la, la ba ka to'oge a dāalgɔ ba dıa zuto bu ba nu'usi zuto. Ba vo'oge me lagum na Krisi di na'am yuuma tusre la puam. ⁵ Ēna de la ɔɔspɔsı kūm vo'ore. La kūm baseba la ka vo'oge, sän dagna yuuma tusre la n wun wa tole. ⁶ Nēr-seba n wun po vo'oge ɔɔspɔsı kūm vo'ore la, tarı zu-yēlga, bāma de la Nawēnne nērba. Kūm buyi dāana la ka tã wun ēŋe ba sela. Bāma n wun dena Nawēnne la Krisi kāabgɔ kēma, la ba wun lagum na Krisi di na'am yuuma tusre.

Ba yāŋe Asūtāana

⁷ Yuuma tusre la sän wa tole, ba wun yese Asūtāana yu'a zē'a na base me. ⁸ Ti a yese pā'ase dūnia so'olum buuri wuu nērba, Gɔɔgı la Magɔɔgı. A wun lagse ba me ti ba zebe zebre. Ba wun lagse zo'oge wu tēntōnbı'isgo n boe ko-kâte nōorum se'em na. ⁹ Ba wun yese me dūnia wuu lagse kaage Nawēnne nērba n boe zē'e-seka, tēn-seka ti Nawēnne nōŋe la. La bugum n wun ze'ele Nawēnne yire sige di ba. ¹⁰ Ti ba wun yōke Asūtāana n pā'asrı dūnia nērba la lobe base bugum mōgre n diti kidibre puam, zē'e-seka ti ba daan pōn lobe dūŋa, la pōmpɔrŋɔ nōtɔ'ɔsa la. Bilam ba wun nāmsra la wun-teŋa la yu'urŋɔ wakate n ka ba'asrı.

Nawēnne di ba'asgo sariya

¹¹ Tl mam le yē na'am bīm̄bīnne kâte n de pēelga, la seka n zī a zuo. Tl tēŋa la saazuum zoe fōrge a nēŋam, tl ba ka le yē ba. ¹² Tl mam yē nēr-seba n ki la, ke'endōma, la tarumdōma n ze na'am bīm̄bīnne na nēŋam. Tl ba lagse gōnnō. La ba lake la gōŋo ayēma n de vōm gōŋo. Tl ba di seba n ki la sariya mase wu ba tōoma n de se'em, wu lan gulse gōnnō na puam se'em na. ¹³ Tl ko-kâte base seba n ki a puam na, tl kūm, la kl'in-tēŋa mē base nēr-seba n ki bōna ba zē'am na. La ba di ba wuu sariya mase wu ban tōm se'em na. ¹⁴ Tl ba lobe kūm, la kl'in-tēŋa base bugum mōgre la puam. Bugum mōgre la de la kūm buyi dāana. ¹⁵ Sēka yu'ure n ka gulse vōm gōŋo la puam, ba wun lobe ē base la bugum mōgre la puam.

Saazuum paalga, la tēn-paalga

21 Tl mam yē saazuum paalga, la tēn-paalga. Pōspōsi saazuum, la pōspōsi tēŋa la bōi mē, la ko-kâte mē ka le bōna. ² La mam yē la Nawēnne tēŋa n de Zerizalem paalga n ze'ele saazuum Nawēnne zē'am sigrā. A malge mē āna sōŋa wu pōka n ye nēnnōm futo māasum a mēŋa tl a ele a sūra. ³ Tl mam wōm kōa n ze'ele na'am bīm̄bīnne na zē'am tōge ke'enke'em yeti: «Nawēnne kē'a zē'am boe la nērsaalba tēŋasuka. A wun kē'era la ba lē, tl ba dēna a nērba. Nawēnne mēŋa n wun bōna la ba lē. ⁴ A wun duuse ba nintām wuu. La kūm kān le bōna, sū-sā'aŋo la kaasga, bu toogo kān le bōna. Yel-kegsi la wuu tole mē.»

⁵ Tl sēka n zī na'am bīm̄bīnne zuo la yele yeti: «Bise, mam tl sēla woo la paalsi.» Dee yele mam yeti: «Gulse wāna, se'ere n soe la, mam yetōga wā de la sūra dee mase tl ba bō sūra.»

⁶ Dee le yele mam yeti: «La ēŋe ba'ase mē. Mam de la Alfa, la Omega, sēla woo pī'iluŋo, la ba'asgo. Koyūuro n tarl sēka, mam wun bō ē ko'om n bulli n bō'crl vōm zāŋa tl a yū. ⁷ Nēr-seka n yāŋe, a wun to'oge la bōn-bāma mam zē'am. Mam wun dēna a Wēnnaam, tl a mē dēna mam bia. ⁸ La sān dēna dabeto, la seba n ka bō sūra, la seba n tōnni tōon-dēgrō, la nēr-kuurba, la yalsi dōma, la seba n tōnni tum tōoma, la seba n nā'asrl bōndōma tl ba māale, la pōmpōrndōma la wuu, bāma zē'a de la bugum mōgre n diti kidibre puam. Bela de la kūm buyi dāana.»

Zerizalem tēn-paalga

⁹ Tl malekadōma bayopōi la n daan zālī laasi bayopōi n pīre la tooro bayopōi n de ba'asgo tooro la, ayila wa'am wa yele mam yeti: «Wa'am tl mam wun pa'ale fu pōka la n yeti a ele la, Pebila la pōga la.»

¹⁰ Tl Nawēnne Sīa bōna la mam, tl maleka la tarl mam zom tām-kâte n wōge zuo. La a pa'ale mam na

Nawēnne tēŋa n de Zerizalem n ze'ele saazuum Nawēnne zē'am sigrā, ¹¹ n yēgrī la Nawēnne na'am pāŋa. A sōŋa la yēgrī wu kug-sōŋo n tarl yōoro, āna wu kugre tl ba wi'iri tl zaspī, dee yēgra wu bīsga tl ba wi'iri kristalī. ¹² Tēŋa la tarl la lal-kâte n wōge gilge ē, tara nōa pia la ayi. Tl malekadōma pia la ayi gu'ura nōa la. Israyelī buuri pia la ayi la yu'ura n gulse nōa la zuto. ¹³ Nōa batā n boe lalga la dapoore bōba, tl batā bōna zuugo bōba, tl batā bōna gōbga bōba, tl batā bōna zanōa bōba. ¹⁴ Tēŋa la lalga ēebe la kuga pia la ayi zuto. Tl Azezi n de Pebila la Tōntōnība pia la ayi la yu'ura gulse kug-bāma zuto.

¹⁵ Malek-seka n daan tōge la mam na, tarl la sālma dōwgo tl ba tarl makra, tl a make tēŋa la, la a nōa, la a lalga la. ¹⁶ Tēŋa la de la tēn-wēko tl a lalsi banaasi la wuu zōna taaba. Tl maleka la dīke dōwgo la make tēŋa la. Tl a yōlŋo dēna sūtaadi tuspia la ayi. A woglum la a yōlŋo, la a saazuum woko zōn na taaba. ¹⁷ La a make lalga la mē, tl a woglum dēna kāntūsī kōbga la pinaasi la anaasi. A kāntūsī la de la buyila la nērsaala kāntūsī.

¹⁸ Ba dīke la kug-sōma yu'ure n de zaspī mē lalga la. La tēŋa la mēŋa de la sālma mēŋa mēŋa n yēgrī āna wu bīsga la. ¹⁹ Lalga la, ba dīke la kug-sōma buuri to'oto'ore n tarl yōoro ēebe ē, tl a āna sōŋa.

Ēbre la pōspōsi kugre la yu'ure de la zaspī, tl buyi dāana yu'ure dēna safurī, tl butā dāana dēna kalseduanī, tl bunaasi dāana dēna emerōdī. ²⁰ Tl bunuu dāana dēna sadonigsi, tl buyoobi dāana dēna sarduanī, tl buyopōi dāana dēna krizoliti, tl bunii dāana dēna berili, tl buwei dāana dēna topaazi, tl pia dāana dēna krizoprazi, tl pia la ayila dāana dēna yasēntī, tl pia la ayi dāana dēna ametisti.

²¹ Nōa pia la ayi la kulnsī, ba dīke la kug-sōma buuri n tarl yōoro yu'ure n de perlī pia la ayi ēŋe ba. Ba dīke la perlī ayila ēŋe nōore ayila woo kulŋa. Tēŋa la palī de la sālma mēŋa mēŋa n yēgrī wu bīsga la.

²² Mam ka yē Wēndeego tēŋa la puam, se'ere n soe la, Zuudāana Nawēnne n de ke'ēŋo wuu dāana, la Pebila la n boe mī. ²³ Tēŋa la ka boorī wēntulle, bu wōrga tl ba nēege ē, se'ere n soe la, Nawēnne na'am pāŋa peelem n nēerī ē, tl Pebila la dēna a fītla. ²⁴ Dūnia so'olum wuu nērba wun sēnna la a peelem na puam. La dūnia na'adōma wun tara ba bōntarsōm sēŋe mī.

²⁵ Tēŋa la nōa kān malūn yu, se'ere n soe la, yu'uhŋo ka boe mī. ²⁶ Ba wun tarl dūnia so'olum wuu nā'asgo, la ba bōntarsōm sēŋe mī. ²⁷ Sēla n de bōn-dēgrō wuu, bu nēr-seka woo n tōnni tōon-dēgrō, la pōmpōrndōma kān kē tēŋa la puam. Nēr-seba yu'ura n gulse Pebila la vōm gōŋo la puam mā'a n wun kē tēŋa la puam.

22 Tl maleka la pa'ale mam ko'om n b'w'ru w'm kulaaga. Kulaaga la yēgru wu b'isga la. A ze'ele la Nawēnne, la Pebila na'am b'imb'inne na zē'am ² z'ota tēja la puam palle tējasuka. Tla n b'w'ru w'm n boe kulaaga la sakugru bayi la w'onna biē nōore pia la ayi yuune puam. A w'onn na nōore ayila wōrga woo puam. Tla la vōorg b'w'ru la dūnia so'olum wuu īmā'asum. ³ Sela tl Nawēnne kā be'em b'ō ē k'ān le b'ona tēja la puam. Nawēnne, la Pebila la na'am b'imb'inne n wun b'ona mī. Tl Nawēnne tōntōnba wun nā'asra ē. ⁴ La ba wun yē a nēja, la a yu'ure wun gulse ba dīa zu-to. ⁵ Yu'ugru k'ān le b'ona. Nērba k'ān b'w'ra tl futla, bu wēntulle nēge peelem, Zuudāana Nawēnne n wun nēge peelem b'ō ba. La ba wun di la na'am wakate n ka ba'asru.

Azezi lemŋo

⁶ Tl maleka la yele mam yeti: «Yetg-bāna wā wuu de la sira, mase tl ba b'ō sira. La de la Zuudāana Nawēnne mēja n boti a nōt'w'sruba t'w'sra a yetga tōgra la, n tōm a maleka tl a wa'am wa pa'ale a tōntōnba sela n k'ān yuuge dee ēŋe.» ⁷ Azezi yeti: «Selse-ya! La k'ān yuuge dee tl mam wa'am. Seka n sakru gōŋ wā yetga tl ba to'osru Nawēnne zē'am tōgra la taru zu-yēlga.»

⁸ La de la mam Azā n wōm dee yē bōn-bāma. La mam n wōm dee yē ba la, mam ka la dūma tēja maleka la n pa'ale mam bōn-bāma la nēŋam tl m nā'ase ē. ⁹ Tl a yele mam yeti: «Da ēŋe bela, tl mam mē de la tōntōnna wu fōn, la fu s'biisi n de nōt'w'sruba, la nēr-seba wuu n sakru gōn-ēna wā yetga la. Nawēnne n de fu nā'ase.»

¹⁰ A yele bela dee yele mam yeti: «Da suge gōŋ wā yetga tl Nawēnne puke pa'ale fu la, se'ere n soe la, wakat-seka tl bōn-bāna wun ēŋe la lēm mē. ¹¹ Seka n de tōon-be'ero dāana, a ken tōnna be'em. Seka n de tōon-dēgru dāana, a ken tōnna tōon-dēgru. La seka n

tl sela n mase, a ken ita sela n mase. Tl seka n de pupeelem dāana, ken sēŋe nēja la pupeelem.»

¹² Azezi yele yeti: «Selse-ya! La k'ān yuuge dee tl mam wa'am. La mam taru la y'w'w sēna tl m y'ō nēra woo mase wu ēn tōm se'em. ¹³ Mam de la Alfa, la Omega, p'w'p'w' dāana, la poorum dāana, sela woo p'īlunjo, la ba'asgu.»

¹⁴ Seba n peege ba futo taru zu-yēlga. Bāma n wun tara nōore tl ba di w'm tla la biē, la bāma n wun doose tēja la nōa kē tēja la puam. ¹⁵ La nēr-seba n tōnni tōon-dēgru, la seba n tōnni tum tōoma, la seba n tōnni yalsi tōoma, la nēr-kuurba, la seba n nā'asru bōndōma tl ba māale, la nēr-seba wuu n nōŋe pōmp'w'ŋu dee parna la, wun weege la yēja, ba k'ān kē tēja la puam.

¹⁶ «Mam Azezi n tōm m maleka tl a wa'am wa tōge bōn-bāma wuu pa'ale m nērba. Mam de la naba Adavi-di yunja, la bewā'are n nēeru.»

¹⁷ Nawēnne Sira, la p'oka la n māasum a mēja tl a ele la yeti: «Wa'am!»

Seka n wōm bela, a mē yeti: «Wa'am!» Koyūuro n taru seka, a wa'am, seka n booru ko'om n b'w'ru w'm, a wa'am wa to'oge zāŋa.

Ba'asgu yetga

¹⁸ Nēr-seka woo n wōm Nawēnne yetga wā n boe gōŋ wā puam, mam Azā kā'an ē yeti, nēr-seka s'ān pa'ase sela yetga wā puam, Nawēnne wun boti a yē tooro seba n gulse gōŋ wā puam na. ¹⁹ La nēr-seka s'ān yese sela gōŋ wā yetga puam, Nawēnne wun yese a pure tl a k'ān po di w'm tla la biē, la a k'ān kē Nawēnne tēja la puam wu lan pa'ale se'em gōŋ wā puam na.

²⁰ Seka n tōge yetg-bāna b'ō la yeti la de la sira, a yeti: «Asira, la k'ān yuuge dee tl mam wa'am.»

Amina! La dēna bela. Zuudāana Azezi, wa'am.

²¹ Tl Zuudāana Azezi yel-sōnne b'ona la ya wuu.